

# Diidz ne rdeed guielmban

Mixtepec Zapotec New Testament

This Bible is copyrighted by BibleLeague International (BibleLeague.org) and translation was provided by Wycliffe Bible Translators (Wycliffe.org). This Bible is printed with permission and produced at cost by the Digital Bible Society (dbs.org) for non-commercial use.

This Bible

MATEO .....	4
MARCOS .....	37
LUCAS .....	58
JUAN .....	93
HECHOS .....	118
ROMANOS.....	148
1 CORINTIOS .....	162
2 CORINTIOS .....	176
GALATAS .....	185
EFESIOS .....	191
FILIPENSES.....	196
COLOSENSES .....	200
1 TESALONICENSES .....	204
2 TESALONICENSES .....	207
1 TIMOTEO.....	209
2 TIMOTEO.....	214
TITO .....	217
FILEMON .....	219
HEBREOS.....	220
SANTIAGO .....	230
1 PEDRO .....	234
2 PEDRO .....	238
1 JUAN .....	241
2 JUAN .....	245
3 JUAN .....	246
JUDAS.....	247
APOCALIPSIS .....	249

# MATEO

**1** Jesús meñ ne pxeel Dios ga, lo xtii Abraham, lo xtii David, ga brieequia me. Lëë grë xmenğoldoo me nu:

<sup>2</sup> Abraham goc pxoz Isaac,

Isaac goc pxoz Jacob,

Jacob goc pxoz Judá (bio zla xpëed Jacob),

<sup>3</sup> Judá goc pxoz Far ni Zar (Tamar brieelë tseeel Judá),

Far goc pxoz Srom,

Srom goc pxoz Aram.

<sup>4</sup> Aram goc pxoz Minadab,

Minadab goc pxoz Naasón,

Naasón goc pxoz Salmon.

<sup>5</sup> Salmóngoc pxoz Booz (Rahab brieelë tseeel Salmon),

Booz goc pxoz Obed (Rut brieelë tseeel Booz),

Obed goc pxoz Isaí.

<sup>6</sup> Isaí goc pxoz rey David,

David goc pxoz Salomón (lëë Salomón ga gop tseeel Urí wnaa ne bionie David).

<sup>7</sup> Salomón goc pxoz Roboam,

Roboam goc pxoz Abí,

Abí goc pxoz Asá,

<sup>8</sup> Asá goc pxoz Josafat,

Josafat goc pxoz Joram,

Joram goc pxoz Uzí.

<sup>9</sup> Uzí goc pxoz Jotam,

Jotam goc pxoz Acaz,

Acaz goc pxoz Ezequí.

<sup>10</sup> Ezequí goc pxoz Manasés,

Manasés goc pxoz Amón,

Amón goc pxoz Josí,

<sup>11</sup> Josí goc pxoz Jeconí (bio zla xpëed Josí).

Leñ dze ne nac Jeconí mëed, leñ dze co güeybee zhoo zha Babiloin grë zha Israel, beynie zho zho Babiloin.

<sup>12</sup> Babiloin, ga gol tib xpëed Jeconí brieelë Salatiel,

Salatiel goc pxoz Zorobabel.

<sup>13</sup> Zorobabel goc pxoz Abiud,

Abiud goc pxoz Liaquim,

Liaquim goc pxoz Azor.

<sup>14</sup> Azor goc pxoz Sadoc,

Sadoc goc pxoz Aquim,

Aquim goc pxoz Liud.

<sup>15</sup> Liud goc pxoz Leazar,

Leazar goc pxoz Matán,

Matán goc pxoz Jacob.

<sup>16</sup> Jacob co nagon goc pxoz José, meñ ne ptsieelnia Marí.

Marí goc xniaa Jesús, Meñ ne nacle diidz ga cxeel Dios guiaad lo guidzliu.

<sup>17</sup> Zig choopchop bdziñ lo dii co, dzigoraabrieequia Jesús. Tsiida zho wban desde Abraham haxta David; stsiida zho wban desde Salomón haxta leñ dze ne bey zho Babiloin; stsiida zho wban desde leñ dze co haxta bdziñ dze ne goc me mëed.

## Gol Jesús

(Lc. 2:1-7)

<sup>18</sup> Znu bzhaac Marí grop José leñ dze ne ziaadyob gal Jesús. Gard tsiieelnia Marí loxaque xtiidz me no ne laa me ycaa José, zeene bnabey Espíritu Sant pquialo tib mëed zdoo me. <sup>19</sup> Zeene bien Joséw, miñe been me go-cladz me mazd nsaan me Marí; sac sca rnabey ley ni zienalpaa me miñe rnabey ley; per laa me gocladz zhli-aanse nzozit me, sacne racladz me nriee xquieito Marí. <sup>20</sup> Zhgab co no me, tibaque blulo tib xanj Dios lo me lo mcaal.

—José (xiag David) —rëb anj co—, peet tsienied guic luu, pcaania Marí gac me tseeel luu; sac gon mëdyeen ne zoney me ga, Espíritu Sant bnabey pquialo win zdoo me. <sup>21</sup> Zeene gal dze ne laa win gal, JESUS cueelë luu win, sca grieelë win sac win csilaa grë menladz win lo do.

<sup>22</sup> Ga brieequia miñe bnee Dios padzeela, zeene bzeet zha ne biadnee xtiidz mew, rëb zho:

<sup>23</sup> Bii zan to ganle zeene laa tib mëedbgui yquiaalo zdoo tib wnaayeen ne gard gnee mgui lo.

Zeene laa win gal, Emanuel grieelë win.

(Emanuel nac zig nacne rnee ne: Dioszhal ziaad lo ne.)

<sup>24</sup> Zeene bna José laa guic me goc tibli; bin me xtiidz anj co laa me ptsieelnia Marí. <sup>25</sup> Laa me wban tipse grop me per ib bgaa d me Marí, haxta bded dze ne laa mëdyeen co gol. Bdziñ dzew, laa win gol, dzigo bleelë José win JESUS.

## Güeygan bla zha rac Jesús

**2** Tib guiedz win ne ndxie xtan Judé lë Belén, ga gol Jesús. Lëetse leñ dze co zob meñ ne lë Herod nac me rey ne rnabey dan co.

Goc palal dzew, laa bla zha ne runbey lo mel ziaad nëz ne rlan ngbidz bdziñ Jerusalén, <sup>2</sup> nbnabdiidz zho rëb zho:

—¿Pa lo dieñ no mëed ne gac meñ ne gnabey ladz to nu, mëed ne griñ gol ga? Bdziñ no tib mel nëz ne no no, mel co blu lo no laa win gol-le, miñ co ne ziaad no nu ziaaddziñ no win.

<sup>3</sup> Grë menğuedz Jerusalén, zeene bin zhow bzee zdoo zho. Laa Herod, rienđraa me zha gun me, bnabey

me pcaalsa grë zha ne nac pxoz non, grë zha ne rseed miech ley, bñabdiidz me lo zho dieñ pa lo nac diidz gal Meñ ne nole diidz cxeel Dios guiaad lo guidzliu ga.

<sup>5</sup> Dzigo rëbchaa zho lo me:

—Belén, guiedz ne ngab Judé ga none gal meñ co, sac scale zhobnee lo guits ne pquiaa zha ne pxeel Dios padzeela biadteed xtiidz me, zeene psiaab me guic zho znu bnee zho:

<sup>6</sup> Teñ Belén,

niicle ne winraaw lo grë guiedz ne ngab Judé, per nroob nona;

sac goñ ga grieequia tib meñ ne gnabey, meñ ne so yquiaanap grë meñ Israel, ne nac zho zha ne ngab lo naa.

<sup>7</sup> Nacne zhlianse bnabey Herod gocredz gza zha rac co, bñabdiidz me lo zho dieñ blapaa dze rac psilo goñ zho blan mel co.

<sup>8</sup> Blozhse ga, dzigo pxeel me zho Belén, rëb me lo zho:

—Ga gołtsie gołtsieguib mëed co. Zigne gdziel to win, gołtëniegazh diidz lo naa nu, zeena ye naa ga gagañ naa win.

<sup>9</sup> Blozhse sca pso me diidz lo zho, laa zho bio nëz stib laa zho zie. Laa mel ne goñ zho brieequia nëz ne ziaad zho ga, laa ma neraque lo zho; haxta bdziñ ma ngali guic yu ne no mëdyeen co, gataa laa ma blëz.

<sup>10</sup> Zeene goñ zho laa mel co blëz ga, per nli rley zho. Bzëeb zho leñ yu co, goñ zho laa mëdyeen co no ga grop xniaa win, dzigo pquitsgzhiz zho lo win, bnee zho tib xtiidz zho lo win. Blozh ga blee zho ncuaañe zienie zho lo win, blee zho or, blee zho tiblo yaalnex, ni tiblo nceit nex rnee zho mirr, bgad zho lo win.

<sup>12</sup> Zeene laa gza zha rac co wbi Belén, laa ne nieted zho Jerusalén, stible nëz bzheñ zho zey zho; sac bnee Dios lo zho lo mcaal, rëb me tsienied zho diidz lo Herod.

<sup>13</sup> Laa gza zha rac co zey, zeene güeylulo tib xanjil Dios lo José lëetse nixguies me, rëb anjl co lo me:

—José, na zeena guche i pcaanie mëdyeen qui nëz grop xniaa win, gołsë nëz Egipt, sac laa Herod yquiaguib win gut me win. Egipt, ga cuëznie to win, na naaque guialnie diidz lo to zeene laa to gbi ga.

<sup>14</sup> Guieel cogazh guche José, pcaanie me mëdyeen co nëz grop xniaa win, laa zho ziese nëz Egipt; <sup>15</sup> ga blëz me haxta bdziñ dze ne laa Herod gut. Ga brieequia miñe bnee zha ne biadteed xtiidz Dios padzeela, zeene znu bnee zho: “Nëz Egipt no xpëed naa, zeene bredz naa me.”

### Bñabey Herod gut grë mëedlas

<sup>16</sup> Laa zeene goñ Herod wbiredraa gza meñ rac co nienie zho diidz lo me, per nli blëe me. Ntseeb rac me, pxeel me zha ne güey Belén ni grëraa guiedz ne ndxie gax ga, güeygut zho grëse mëedbgui yeen ne no grë guiedz co, desde win ne golnëz, haxta win ne rap chop iz. Tibaque nañ me sca ngaa mëdyeen ne nac Jesús ga niet win, sac blee me cuent zhile gac chop iz psilo goñ gza zha rac co blan mel co. <sup>17</sup> Guieñëdnox ne bio grë

miech co, ga brieequia miñe bzeet Jeremí meñ ne biadteed xtiidz Dios padzeela, zeene znu rëb me:

<sup>18</sup> Tib redz nroob ne zëeb leñ guiedz Ramá.

Grë wnaa Judá, zha ne ziaad lo xtii Raquel, mbanse rac zho, roon zho no zho xquieñë xpëed zho; zha rna zha ne cchoobladz zdoo zho, sac laa xpëed zho gut.

<sup>19</sup> Goc palal dzew laa Herod gut, dzigo pxeel Dios tib xanjil me güeynee lo José lo mcaal zaatne no José nëz Egipt, rëb me lo José:

<sup>20</sup> —José, guche i, pcaanie mëdyeen qui nëz grop xniaa win, gołbire nëz Israel stib; laa zha ne quianañ win ga gutle.

<sup>21</sup> Dzigo brieenie José mëdyeen co ga grop xniaa win, bio me nëz laa me wbire zeynie win nëz Israel. <sup>22</sup> Per zeene bin José lëëque tib xpëed Herod meñ ne lë Arquelá, meñ co biaan xlugar Herod zobnabey xtan Judé, bdzieb José ndziñnie me mëdyeen co nëz co. Dzigo bneeque Dios lo me lo mcaal tsie me nëz Galilé.

<sup>23</sup> Goł zho Galilé, bdziñaque zho guiedz Nazaret, ga wbannie zho mëdyeen co. Ga brieequia miñe bzeet grë zha ne biadteed xtiidz Dios padzeela, zeene rëb zho: meñ Nazaret guiab miech nac Jesús.

### Psilo Juan Bautist noseed me miech

(Mr. 1:1-8; Lc. 3:1-9, 15-17; Jn. 1:19-28)

**3** Leñ dze ne psilo Juan Bautist noseed Juan miech xtan zha Judé, dan zit ne no me ga; <sup>2</sup> rnee me lo zho:

—iGołsaan xquieñtseeb to, gołnab lo Dios goñ me to perdon grëtaa doł ne ziyuñ to; sac goñ laa dze bdziñle laa me csilo gnabey!

<sup>3</sup> Lëe Juan Bautist ga bzeet profet Isá, zeene znu pquiaa me:

Bii zon miech ganle zeene laa tib tsi meñ zëeb tib dan zit, rnee me:

“Gołzhixcuaa nëz ne ted meñ ne rnabey, gołsaan grë guieñtseeb ne ruñ to.”

<sup>4</sup> Niapse guits lad camell niaa xab Juan, guid nac ncuaañe ndxie leñ me, ni niapse nguzhanch ni dzin dan row me.

<sup>5</sup> Nzian grë menquiedz Jerusalén, grë meñ Judé, grë meñ ne no gax ro guiubee Jordán, rriee zho riequiaa-diag zho zhiwseed me. <sup>6</sup> Grë zha ne rxobdoł grëse xtol zho, dzigo rchoobnis me zho ro guiubee co.

<sup>7</sup> Laa zeene rañ me grë zha farisé, zha saducé ne rdziñ lo me ga racladz zho ye zho chobnis, dzigo rnee me lo zho:

—iMiech ngoopdoł, masaque nac to zig nac meeñ! Nañ to na lëe, loxaque chobnis to laa to laale lo grë guieñëdnox ne ziaadyob. <sup>8</sup> Led scada goñ, none zaacse gban to zeena glu nli dib zdoo to psaan to grë xquieñtseeb to. <sup>9</sup> Ni gacniatsde to guiab to loxaque por nacse to xtii Abraham, laa Dios csilaale to; sac gneli naa lo to ganle telne gacladz Dios, haxta grë quie zac gnabey me tsaalow miech ne gac zha xtii Abraham. <sup>10</sup> Nañle to ganle, grë yag nex, zeene rquiad nex low led rruga, rlozh ga rliaala lo gui, ga reca. Scadaa

nagon gdieelo miech ne gband zigne racladz Dios, sac rreequia laa me nzhenle xquiibyag me cchug me yag ne sca nac.

<sup>11</sup> Nli tib wrobnisse nu rnedz naa lo to, nacsew zig tib señ, sac lëe gdib rluw laa to psaan xquieIntseeb to, laa to bzëeb xnëz Dios. Sangue men ne no guiaad ga, mesi Espiritu Sant gdeed me lo zha ne gliladz me; ni scagaa zha ne gliladz me, sonëz me zho zaatne nitlo zho. Ne nligaa tib men non nac me, tel naa peet nond naa, per ni par tib ngundziin ne glit lab me raguiald naa gac naa. <sup>12</sup> Laa me guiaad zig tib zha ne rbeeguizh zhobxtil, sac zha co rlozhse runmbe zho zhob, rgotsow zhow, laa paj rielaal zho lo gui, ga reca. Per gui ne gzëeg grë paj ne guiadbee me ga, gdziind dze guiuuw.

### Brobnis Jesús

(Mr. 1:9-11; Lc. 3:21-22)

<sup>13</sup> Len dze co brieed Jesús nëz Galilé zie me nëz ro guiubee Jordán, laa me zie par cchoobnis Juan me. Bdziñ me <sup>14</sup> nëd Juan cchoobnis Juan me, rëb Juan lo me:

—Lëda i gon, naa none guiał lo luu cchoobnis luu naa.

<sup>15</sup> Dzigo rëb me lo Juan:

—Nli scaw, per mazd pchoobnis naa, sac gon ib nonguiela dziuun ne miñe rnabey Dios.

Dzigoraa pchoobnis Juan me. <sup>16</sup> Laa me zieriee lo nis zeene laa zhan gbaa bzhal, gonpaa me zig rlu tib palom rlu Espiritu Sant laa me ziad-zëeb bdziñ me guic me, <sup>17</sup> ni blu zëeb tib tsi men co nëz gbaa rnee me:

—Xpëed naa gon nac men qui, rleynie naa me, men nziuu nac me lo naa.

### Gocladz menodox niungüet ma Jesús

(Mr. 1:12-13; Lc. 4:1-13)

**4** Zeene blozh brobnis Jesús, dzigo güeynie Espiritu Sant me tib dan zit, zaatne guiend miech; ga gocladz menodox niungüet ma me niun me miñe racladz ma.

<sup>2</sup> Zeene goc choo ngbidz choo guieel no me dan co ni tib lë peet rowd me, laa me pcaabedz <sup>3</sup> hor co bdziñ menodox zaatne no me ga, rëb ma:

—Telne nli Xpëed Dios nac luu, bnabey tsaalo grë quie rii ncuaañe gow luu.

<sup>4</sup> Dzigo pquiab me rëb me lo ma:

—Znu zhobnee lo Xtiidz Dios: “Niapse por xtiidz Dios mban miech, yquiamband zho loxaque guielwagwse.”

<sup>5</sup> Blozh ga güeynie ma me Jerusalén, blep ma me glaa guic yadoo nroob ne zob lad guiedz co, <sup>6</sup> rëb ma lo me:

—Telne nli Xpëed Dios nac luu, bringaa nu, beñque led znu zhobnee lo Xtiidz Dios: “Znabey Dios grë xanjł me yquiaanap luu, zha queedz luu, zeena ni tib quie ycaand ni luu.”

<sup>7</sup> Pquiab me rëb me lo ma:

—Psoladz ganle, noque stib zaatne znu rnee lo Xtiidz Dios: “Bien, Dios nac men ne rnabey luu, nodne quitnie luu me gnab luu lo me ncuaañe nod gun me.”

<sup>8</sup> Blozh ga bii güeynie ma me glaa tib guic gui, ga blu ma grëse guiedz ne ndxie dib lo guidzliu lo me, ni blu ma grëse ncuaañ ndaan ne rap tib tib guiedz co, <sup>9</sup> rëb ma lo me:

—Bui ganle, grëse ncuaañ qui gon gnedz naa lo luu telne squiitsgzhib luu lo naa niina, gunnon luu naa.

<sup>10</sup> Horco pquiab me rëb me lo ma:

—jBiche lo naa nu mendox! Znu gon zhobnee lo Xtiidz Dios: “Diosse nac men ne rnabey, mese none gunnon luu, lo me rieguial yquiitsgzhib luu; ni miñe rnabey me miñ co none gun luu.”

<sup>11</sup> Dzigoraa biche ma lo me, dzigo bdziñ bla anjł bdeed zho ncuaañe dow me.

### Psilo Jesús pseed me miech nëz Galilé

(Mr. 1:14-15; Lc. 4:14-15)

<sup>12</sup> Zeene bin Jesús laa Juan biab ladzguiib, dzigo brieed me ga güey me nëz Galilé, guiedz ne lë Nazaret.

<sup>13</sup> Zhisaque goca, brieed me ga güey me Capernaum tib guiedz ne ndxie gax ro Nisdoo Galilé, zaatne nac xtan zha xtii Zabulón ni zha xtii Neftalí. <sup>14</sup> Ga brieed miñe bzeet Isá (men ne pxeel Dios padzeela biadnee xtiidz me), zeene psiaab Dios guic Isá rëb Isá:

<sup>15</sup> Grëse menzit ne ndxie xtan Galilé,

nëz dan ro guiubee Jordán, gax ro Nisdoo Galilé, zaatne gocchen Zabulón ni Neftalí;

<sup>16</sup> miech ne no lo ncow nac zho,

per niina tib biini nroob biab lo zho.

Ladzniale guielgut no zho,

per laa biini co biab lo zho par gree zho ga.

<sup>17</sup> Ga psilo Jesús pseed me miech, rnee me lo zho csaan zho xquieIntseeb zho, gbig zho lo Dios, sac laa dze ne csilo gnabey Dios ziaadgaxle.

### Bredz Jesús tap ngoozmeł

(Mr. 1:16-20; Lc. 5:1-11)

<sup>18</sup> Len dze co, tib dze zieded Jesús gax ro Nisdoo Galilé gon me chop ngoozmeł, tib zho lë Simón Pedr, stib zho lë Ndrés; grop bets zho lëetse laa zho noron guix ne rgaa meł lo nis. <sup>19</sup> Dzigo bredz me zho, rëb me lo zho:

—jGoltë goltënał zhits naa! jLaa naa cxel to tsie to stib gooz, tsietop to grë miech ne sëeb xnëz Dios!

<sup>20</sup> Horcogazh psan zho guix ne rgaa meł ga, laa zho zienał zhits me.

<sup>21</sup> Zhisaque bzë me ro nis co, gon me laa Jacob ni Juan (lëe grop xingan men ne lë Zebedé ga) no tib len barcw gza pxoz zho, noquiaabdie zho guix ne rgaa meł; dzigo bredz me zho. <sup>22</sup> Zigne bredz me zho bi-aannieque pxoz zho barcw ga, laa zho zienał zhits me.

### Zëeb diidz grëtaa milagr ne run Jesús

<sup>23</sup> Dipse xtan zha Galilé, guiedz ne rdziñtaa Jesús rie me grë yadoo ne zob lad guiedz co rseed me miech Xtiidz Dios, rnee me lo zho zha racladz Dios gban zho, ni runguiac me grë men rzacnë, tel pe guielguiidztaa rzac zho.

<sup>24</sup> Teĭ pa lotaaw zëeb diidz scataa ruņ me grë milagr, haxta nëz Siria bin miecha. Nzian grë meņ co brieë ga bdziņnie zho grë zhimguidz zho lo me: no grë meņ rzacnë co noguitnie meņdox, no zho rlan guieĭguidz gutye, no zho gutoo dipse xcuerp, no zho rlan grë pe stib guieĭguidz, nogaa zho rlan grë pe yoob; grëse zho beeņguiac me zho. <sup>25</sup> Zaatne zieetaa me, miech guizhiu ne naĭ zhits me, grë zha Galilé, grë zha Decápolis, grë zha Jerusalén, grë zha Judé, haxta grë zha ne no stib nëz ro guiubee Jordán.

### Cho nac zha ne wen zie

(Lc. 6:20-23)

**5** Tib dzew, goņ Jesús laa grë miech guizhiu co bdziņ lo me, dzigo bzoquia me glaa tib guic gui win. Ga zob me, bdziņ grë xpëedscuel me lo me, <sup>2</sup> dzigo psilo me pseed me zho, rëb me:

<sup>3</sup> —ĭWen zie zha ne rieņ ib none gbig zho lo Dios, sac ib zdziņ zho zaatne rnabey me!

<sup>4</sup> ĭWen zie zha ne mban rac roon niina, sac schoobladz Dios zdoo zho!

<sup>5</sup> ĭWen zie zha ndooladz, zha ne zienie guic gban zigne rnabey Dios, sac scaania zho guidzliu ne gdeed me lo zho!

<sup>6</sup> ĭWen zie zha ne racladz guņ grë miņe rnabey Dios, rzac zhow zigne rzac zha ne rcaabedz, zha ne rnabgaa zhis, sac ible zacnie Dios zho parne grieelo guņ zhow!

<sup>7</sup> ĭWen zie zha ne rquia zdoo miech, sac zigne rquia zdoo zho samiech zho scaque Dios squia zdoo me zho!

<sup>8</sup> ĭWen zie zha ne mbele zdoo, zha ne biaanmbele lo xtoĭ, sac zanlo zho Dios!

<sup>9</sup> ĭWen zie zha ne noxco zaacse gban miech, tiĭd zho, sac masaque mëed gac zho lo Dios!

<sup>10</sup> ĭWen zie zha ne loxaque porne quiayun zho miņe rnabey Dios, rquianaĭ miech zho, sac ible zdziņ zho zaatne rnabey me!

<sup>11</sup> Zig nac to, zeēne csilo grë miech yquiaago zho to, ctsidiĭ zho to, yquiadiidzguizh zho to loxaque ne riladz to naa, ĭwen zie to ga! <sup>12</sup> ĭNley goĭco zdoo to, nguieeĭ golgac, sac goņ tib guieĭnzaac nroob ne gneedz Dios lo to! Goĭsoladz ganĭe, scaque beeņ zho grë zha ne px-eeĭ me padzeela biadnee xtiidz me.

### Nac to zig nac zed, zig nac biini

(Mr. 9:50; Lc. 14:34-35)

<sup>13</sup> Masaque nac to lo guidzliu rii zig nac zed. Nanĭe to ganĭe pa lotaa rquiin zed, per teĭne nzhida, ĭpa diēņ rquiina? ĭLëë gdib rliaaĭa lo guizh, zaatne rded rzë miech rzëēni zhow!

<sup>14</sup> Nac to zig tib biini ne noziini lo guidzliu. Grieelod tsongueets to, sac tib guiedz ne ndxie glaa tib guic gui, grieelod tsongueetsa. <sup>15</sup> Goĭguiē ganĭe nacd biini parne tsolana, sinque parne gziiniw lo grë miech ne no leņ yu. <sup>16</sup> Zaacse sca golgac, miņe rquiin miņ co golgun, masaque lëew gac zig tib biini; zeēna zeēne ganĭe miech biini co zieņ zho ganĭe pa lotaa meņ nroob nac Pxož to meņ ne no gbaa.

<sup>17</sup> Guiabde to togo bod laa naa ziaĭ ziaĭtichee naa ley ne psan Moisés, o grëgaa miņe bnee zha ne biadteed xtiidz Dios padzeela; sac led miņcod ziaĭ naa, sinque laa naa ziaĭ guņ naaw zigne no gaca. <sup>18</sup> Gneli naa lo to ganĭe: Laga niaa guidzliu rii, laga niaa gbaa, ib none gac miņe zhobnee lo ley, miņe bneegaa zha ne biadteed xtiidz Dios, ni tib lë paat gdzëēda. <sup>19</sup> Gacxe waa zha ne quiits tib ley niicle miņe mazdraa wina, ni cseed zho miecha zigne ruņ zho ga, ib tedsod zha nac zha ne mazdraa win guiaaņ lo grë zha ne yгаа zaatne rnabey Dios. Saņgue zha ne guņa zigne rnabeya, ni cseed zho miech scaque tsienaĭ zhow, zha cosi nroob gacnon zho lo grë zha ne gdziņ zaatne rnabey Dios.

<sup>20</sup> Rso naa diidz lo to sca, zaacse golgac guņde to zigne ruņ grë maistr ley, grë zha farisé; sac teĭne tsox-code to gban to zigne racladz Dios, grieelod gdziņ to zaatne rnabey me.

### Nodne gut miech

(Lc. 12:57-59)

<sup>21</sup> Led nanĭe to ganĭe, no tib ley ne biaan lo xmengol to padzeela, rneew: "Gute luu samiech luu"; rnabeya zha ne gut samiech, ib none guetaque zho, quizhgazh zho doĭ co. <sup>22</sup> Sca rnee ley co, per zig nac zha ne goņ në rac zdoo raņ samiech, rrieequia beetle zho ga, ye zho rieguiaĭ quizh falt co. Zig nac zha ne gnee pe tib diidznë lo samiech, none gacredz zho lo wxtis zeēna guņquizh zho zho doĭ co; zha ne quiegaa samiech, lëēque zha rguib guey zho gabiĭ ga.

<sup>23</sup> Gacxe waa teĭ ziesan to tib gon, per lo pcoogle zo to rsoladz to rdilnie to tib samiech to, <sup>24</sup> gase goĭsaņ gon co, goĭtsie goĭtsienabgazh perdon lo zha ne rlëë to lo ga, gbireraa to dzigo gdeed to gon co. <sup>25</sup> Zha ne sca rlëēnie to, goĭtsoxco pront goĭguiaaņ wen; zeēna tsiezod zho to lo wxtis, sac teĭ laa zho tsiezo to lo wxtis ib znabey wxtis tso to ladzguib. <sup>26</sup> Gneli naa lo to ganĭe grieede to ga, haxtaque lozh quizh to grë dimi ne gnab wxtis lo to.

### Nodne tsonie miech zha ne led tseield zho

<sup>27</sup> Nanĭaque to ganĭe zha rnee stib ley ne biaan lo xmengol to, rneew: "Zha ne nole tseiel, zigtaa mguiv zigtaa wnaaw, nodne tsonie zho zha ne led tseield zho." <sup>28</sup> Per zig nac zha ne goņ, raņ tib wnaa ni rsilo zho riogui zho tsonie zho wnaa co, laa zho bdiitsle ley co.

<sup>29</sup> Gacxe waa, bziaalo to miņe rquiaqui ruņctal to xtoĭ to, mazd goĭcueegazha; niicle teĭ bziaalo derech tow. Peet nacd nitlo tib lëque xcuerp to, lëdle dib nacsew tsietsoobe gabiĭ. <sup>30</sup> Laa teĭ niagaa tow, miņe rquiaqui ruņctal to xtoĭ to, niicle teĭ nia derech tow, goĭchuggazha. Peet nacd nitlo tib nia to, lëdle nitlo to leņ gabiĭ dib nacse xcuerp to.

**Nodne csëbtsieel miech**  
(Mt. 19:9; Mr. 10:11-12; Lc. 16:18)

<sup>31</sup> 'No stib ley znu rnee: "Mgui ne racladz csaan tsieel, zac ctso zho; totsaque gdeed zho tib guits lo wnaa, za-atne raquiet ne laa zho psaan wnaa." <sup>32</sup> Per gni naa lo to ganle: telne quiangobd tsieel zho stib mgui, ni rsëbtsieel zho, lëëque zha rguib ga yquianie tsieel zho stib mgui. Mgui ne ctsieelnia wnaa co, doḷ ga guḷ zho, sac goḷ nole tsieel wnaa co.

**Nodne yquidie miech**

<sup>33</sup> 'Ziyon to ganle zha nac stib ley ne biaan lo xmen-gol to rneew: "Zha ne gzeet lë Dios par glu zuḷ zho miḷe bnee zho, yase zeene gdeed zho tib gona, guḷ-gaa zho pe tib dziina, ib none guḷ zhow." <sup>34</sup> Per gni naa lo to ganle: nodne sca gzeet to lë Dios, per ni gbaa nodne ne sca gzeet to, sac goḷ ga nac zaatne zob Dios; <sup>35</sup> per ni guidzliu, sac lo guidzliu nac zaatne zo ni me; per ni Jerusalén, sac ga nac guiedz nroob ne rn-abey me; <sup>36</sup> guiaabgaa to gzeet to guic to. Guḷscade to, sac goḷ zig nac guic to, per ni tib guitsguic to grieelod csaḷ nquits to, grieelodgaa csaḷ ngas tow. <sup>37</sup> Gacxe waa ncuaane rgobey to zrieelo guḷ to, goḷguiab: "zuḷ naaw", togo riengaa to grieeloda, goḷguiab: "grieeeloda"; tsode to dieeḷ cho gzeet to, sac goḷ led Diosdraa rnabey miḷ co.

**Nodne ctsire miech guieḷnë**  
(Lc. 6:27-36)

<sup>38</sup> 'No stib ley znu rnee: "Teḷ cuee zho tib bziaalo luu, guiaand luu scase bleeque stib bziaalo zho, teḷ cuee-gaa zho tib lay luu, scaque beenḷ blee stib lay zho." <sup>39</sup> Saḷgue naa laa naa rso diidz lo to goḷ, guḷscade to; zha ne gacntseeb lo to, gacndaande to lo zho. Teḷ cap zho lo to, tiblise goḷgac, ib guḷde to glisague nia to. <sup>40</sup> 'Zha ne tsiezo to lo wxtis, ni lozh ga haxta gla zho xibiaagw to, goḷsaan güey zhow haxta xabnaḷ to goḷdeed lo zho. <sup>41</sup> Zeene grieequia zha ne gnabey to güey to xyo zho tib groḷ hor, goḷgüeya, haxta tib hor goḷtsie güey tow. <sup>42</sup> Zha ne gnabtaa pe cos lo to, goḷdeeda; zig nac zha ne ziadtiḷ, goḷdeed ncuaane ziadtiḷ zho, ctsirede to zho scase. <sup>43</sup> 'Ziyonle to ganle no zha ne znu rnee: "Zha ne rdzieel xtiidz luu bleynie zho, scagaa zha ne rlë lo luu, blëënie zho." <sup>44</sup> Per led scada goḷ, ḷnone zaacse gac to lo zha ne rlë lo to! ḷzha ne rgodee to, goḷnab lo Dios guḷlay me zho! <sup>45</sup> Zeena sca glu nli xpëed meḷ ne zob gbaa nac to. Goḷgaḷ ganle teḷ me rnabey me rziini ng-bidz lo grëse miech, zigtaa lo zha wena, zigtagaa lo zha ntseeba; scaque nisguie me rsiaba rquiin zho grëse zho, rbed me dieḷ cho ngable lo me, chogaa ngabd lo me. <sup>46</sup> ḷGase nasca goḷwi! Teḷ loxaque zha ne ndzieeldiidz to zha cose rleynie to, ḷniacxe zgaa to guieḷnzaac ne gdeed Dios? Haxta zha ne mazdraa ntseeb ruḷ miḷ co. <sup>47</sup> Teḷ loxaque zha ne nacse meḷlidz to, lo zha cose zaacse rnee to, ḷpe lëë guieḷwen ga na

rlu to? Haxta zha ne ruḷbeyd Dios ruḷ miḷ co. <sup>48</sup> Goḷt-soxco sca ndzinli goḷgac, zigne rleynie Pxoḷ to (meḷ ne zob gbaa) grëse miech, scaque none guḷ to.

**Zha ne ruḷ xyudar samiech**

<sup>6</sup> 'Zeene guḷ to xyudar samiech to, ib guḷde to za-atne ndxiepaa miech ga so to glu to xquieḷwen to, par gaḷ zho miḷe ruḷ to. Telne sca guḷ to, ygaade to guieḷnzaac ne gdeed Pxoḷ to meḷ ne zob gbaa. <sup>2</sup> Gacxe waa, zeene guḷ to xyudar zha ne guieḷnd pe yquiin, goḷdide tow zigne ruḷ grë zha ne rquiaalo rquia zdoosamiech; sac zha co teḷ pe ncuaane rgad zho, rzo zho leḷ yadoo, rzo zho ro nëz rlozhd yquiaabdzie zhow par gacnaḷpaa miecha, zeena zha ne gona guiab zho: ḷzha wentaa zha qui! ḷGneli naa lo to ganle ne sca riannziuu zho lo miech, lëële gdib guieḷnzaac ne ygaa zho ga! <sup>3</sup> Goḷguien sca, zeene guḷ to xyudar zha ne no tib li-aadz, choot lo gzodiidzde tow, per ni zha ne mazdraa ndzieeldiidz to nodne gacnaḷ. <sup>4</sup> Dzigo scagaa Pxoḷ to nroob guieḷnzaac ne gneedz me lo to, sac teḷ me grësew raḷ me.

**Zha gzodiidznie miech Dios**  
(Lc. 11:2-4, 34-36; 12:22-31, 33-34; 16:13)

<sup>5</sup> 'Scaque zeene gzodiidznie to me, guḷde to zigne ruḷ grë zha ne rquiaalo miech wen nac zho. Sac teḷ zha co zeene rzodiidznie zho me, rzo zho zaatne ganḷpaa miech zho, zig nac leḷ yadoo, zig nac leḷ guiedz za-atne rded rzë miech. Gneli naa lo to ganle lëële guieḷnzaac ne ygaa zho ga. <sup>6</sup> Goḷguien zeene gzodiidznie to me, goḷsëeb leḷ lidz to dziits goḷsioog ro yu, ga goḷ-zodiidznie me. Ible tedsod nroob guieḷnzaac gneedz me lo to, sac niicle ncuaane mazdraa nguets zhli-aana, raḷ mew.

<sup>7</sup> 'Ni zeene nozodiidznie to me, guḷde to ncuaane nonee to lëew rlozh, lëew rsilo zigne ruḷ grë zha ne ruḷbeyd me. Sac zha co rzac zho por nroob diidz gnee zho, por nzian vuelt gnee zhow dzigo squiaadiag mew. <sup>8</sup> Guḷscade to, sac me ne nac me Pxoḷ to gardle gnee to xliaadz to lo me laa me naḷle pe nac ncuaane rquiin to. <sup>9</sup> Gacxe waa zeene gzodiidznie to me, znu goḷnee: Dios, luu ne nac luu Pxoḷ no, zob luu gbaa; luuse nac meḷ ne mazdraa ndzon. <sup>10</sup> Luu nac meḷ ne gnabey no, miḷe gnabeytaa luu zigne raca gbaa, scaque none gaca lo guidzliu nu. <sup>11</sup> Beenḷ guieḷnzaac bneedz ncuaane dioow no nadze. <sup>12</sup> Bzhiguielḷ beenḷ no perdon grëse doḷ ne ziodziuuḷ no lo luu, zigne rdziuuḷ no samiech no perdon grë falt ne ruḷ zho lo no. <sup>13</sup> Gdeete luu diidz yquiil meḷdox no, beenḷ guieḷnzaac bla no lo ma. Luu nac meḷ ne rnabey, meḷ ne rap poder, meḷ ne mazdraa nroob. Miḷe rnab no nu, ndionḷpaa no zuḷ lu-uw. <sup>14</sup> 'Sca nagoḷ none gnee to. Ni goḷgona ganle, zha ne goḷ guḷ samiech zho perdon teḷ pe nactaa falt ne



been zho lo zho, scaque Pxoꝛ to meꝛ ne zob gbaa, zuꝛ me zho perdon. <sup>15</sup> Zha ne guꝛd samiech zho perdon, niicle megaa guꝛd me perdon xtoꝛ zho.

<sup>16</sup> Stiba, zeꝛe nocuan to nozodiidznie to me, guꝛm-bande to lo to. Sac grè zha ne rquiaalo miech wen nac zho, sca ruꝛ zho; zeꝛe nocuan zho xtsiinpaꝛ ruꝛ zho ruꝛmban zho lo zho par gaꝛ miech laa zho nocuan. Gneli naa lo to gaꝛle, zha ne sca ruꝛ lèèle guieꝛnzaac ne yгаа zho ga. <sup>17</sup> Guꝛscade to, nguieeꝛ golgac iꝛe golzèè biegw guic to, golquiib lo to, zeꝛe ni tib choot guieꝛd laa to nocuan, loxaque Pxoꝛ to gacnaꝛa, sac grèse ncuaaꝛe rac nguèets raꝛ mew. Grèse ncuaaꝛe rac, me raꝛa, me nac meꝛ ne gneedz tib guieꝛnzaac nroob lo to.

<sup>19</sup> Tsienalꝛe to loxaque dieꝛ zha gapcheꝛ to lo guidzliu rii, sac nac ncuaaꝛe lo guidzliu rii rban ngbaana, rnitlo mxila, haxta noxtseeb guioochena. <sup>20</sup> Mazd goltsocxo yгаа to guieꝛnzaac ndzon ne no gbaa, sac miꝛe no gbaa, led yed miꝛ co guioochen, led yed miꝛ co cuan ngbaan, led yedgaaw gnitlo mxil. <sup>21</sup> Golgona gaꝛle, guieꝛnzaac ne goꝛ guꝛlo to, ga glu pa gdziꝛ xalm to, sac zaatne guꝛlo to guieꝛnzaac co ga nac za-atne gdziꝛ xalm to.

<sup>22</sup> Rrieequia nac bziaalo to zig nac tib biini. Teꝛne niapse lo grè ncuaaꝛe ndzinli rwi to, dzigo gdipse xcuerp to no lo guieꝛbiini. <sup>23</sup> Laa teꝛne loxaque lo grè ncuaaꝛe nonguieꝛd rwi to, dzigo gdipse xcuerp to no lo guieꝛcow ga. iZha rnazhe lo guieꝛcow co, teꝛ lèèque biini noyac guieꝛcow!

<sup>24</sup> Golgona gaꝛle, grielod goꝛ gleynie to dimi, ni gleynieque to Dios. Ib none teꝛne Dios rleynie to, me none gleynie to, togo dimigaaw, dimi golleynie.

<sup>25</sup> Gacxe waa, gni naa lo to gaꝛle: Tsoꝛe to zhgab dieꝛ zha gban to lo guidzliu rii, pa griee pe gow to, pe guie to, pe gacwxabгаа to. Stiba, iꝛniacxe mazdraa non guieꝛwagw lo xquieꝛmban to? Xabгаа tow, iꝛniacxe mazdraa nona lo xcuerp to? <sup>26</sup> Golwi lo grè mguin gaꝛle, led yed ma rquia gon, led yed ma rquia wlaap, led yed ma rgotsow pe guieꝛgon, per row ma, sac Pxoꝛ to meꝛ ne zob gbaa, meꝛ co rdeed ncuaaꝛe row ma. iTeꝛ to goꝛ, mazdraa non to lo grè mguin co! <sup>27</sup> Ni lalnu paat rquiinda tant tso to zhgab. Teꝛne guiab to tso to zhgab dieꝛ zha gacnool xtse to spalal yeꝛse, iꝛniacxe zrieelo to guꝛnool tow?

<sup>28</sup> Zig nac lar, iꝛpe nacle tant tso to zhgab dieꝛ pe gacwxab to? Pe rwide to lo grè guiee ne gaꝛle zèèb dan, zha rrooba, led yeda rio zhgab dieꝛ zha gacwxaba, per niow rnaw; <sup>29</sup> gni naa lo to gaꝛle, per ni rey Salomón con grè xab niazh me, blud me scataa niow.

<sup>30</sup> Gase na gaꝛle golwi, niicxe grè guiee dan co na, zna dze zob nguiaꝛ, gzhe widz laaw bidzle, laaw tse-cle, ni scataa niow rgacwxab Dios, iꝛpe leꝛ to dzigo ygacwxabd me, niicle ne squi gard guieꝛ to dib zdoꝛ to gnalo to me?

<sup>31</sup> Tsoꝛe to zhgab sca guiab to: "iꝛBay pa griee pe dioow ne, pa griee pe dio ne, pa griee pe dziaacwxab ne?" <sup>32</sup> Grè miech ne ruꝛbeyd Dios, tibaque zhgab co rio zho. Saꝛgue to golsoladz gaꝛle, Pxoꝛ to meꝛ ne

zob gbaa, naꝛle me pe nac grè xliaadz to, <sup>33</sup> me nac meꝛ ne gneedz ncuaaꝛe yquii to, per ib none glo tsoꝛco to gban to zigne rnabey me. <sup>34</sup> Golguieꝛ sca tsoꝛe to zhgab dieꝛ zha ted to gzhe widz, sac gzhe widz co zhaalaeque xco ne ziaad. Tib tib dze zhaase zhaase zhgab ne ziaadniew.

### Nodne gzee zdoꝛ ne cho zha rac

(Lc. 6:37-38, 41-42)

#### 7 Blozh ga rèbchaa me lo zho:

—Golguieꝛ, ib guꝛde to nè gac zdoꝛ to zeꝛe raꝛ to ncuaaꝛe nonguieꝛd ne ruꝛ stib miech, sac to tozhal guꝛquizh zhow; zeꝛe scaгаа Dios, guꝛscad me to. <sup>2</sup> Sac goꝛ teꝛ zha rzac to samiech to, scasaque sac Dios to.

<sup>3</sup> iLèda ga goꝛ tso to lozhd gzee zdoꝛ to dieꝛ cho pe ruꝛ, ni nenda mazdraa miꝛe ruꝛ to! <sup>4</sup> iꝛPe ro to glisqui to miꝛe ruꝛ stib zho, ni teꝛ mazdraa nac miꝛe ruꝛ to? <sup>5</sup> iGolguieꝛ sca glude to ncuaaꝛe nacle to! Glo goltsocxo ndzinli gac to, dzigo lozh ga zac tsienee to lo stib zho zha gacndzinli zho.

<sup>6</sup> Ndzon nac Xtiidz Dios, gdeete tow lo zha ne rlèèniew, sac goꝛ rrieequia lo mècw ga gdeed tow, ib zuꝛ zho miꝛe ruꝛ mècw zacntseeb zho lo to. Naca zig nac quie perl, gdeete tow lo zha ne rleynieda, sac goꝛ rrieequia lo nguts ga gdeed tow, teꝛ ngutsa niicle ncuaaꝛe mazdraa non glaal zho lo ma, loxaque gzèèni maw.

### Ncuaaꝛe gnabtaa ne zgaa new

(Mr. 1:22; Lc. 6:31, 43-44, 47-49; 11:9-13; 13:24-27)

<sup>7</sup> Ncuaaꝛe rquii to, golnaba lo Dios, scagaa me zneedz mew. Golguib teꝛ pe racladz to, me nac meꝛ ne gacnie to gdziel tow. Golcuedzlè me, scagaa me scaania me to. <sup>8</sup> Sac grèse zha ne rbig lo me rnab zho ncuaaꝛe rquii zho, rdeed mew. Zha ne rguib ncuaaꝛe racladz, racnie me zho rdziel zhow. Zha ne rbedzlè me, rcaania me zho.

<sup>9</sup> Golwi gaꝛle, zig nac to zeꝛe rnab xpèèd to quiet gow win, iꝛniacxe ziazh to co to tib quie nia win?

<sup>10</sup> Zeꝛe rnabгаа win meꝛ, iꝛniacxe zdeed to tib meeꝛ lo win? <sup>11</sup> Led rioꝛco to lèè niapse ncuaaꝛe wen rdeed to lo xpèèd to, niicle ne miech ntseeb nac to. Teꝛne sca rioꝛco to xpèèd to, peleꝛ Pxoꝛ to dzigo, meꝛ ne zob gbaa, tsoꝛcod me to. Ib tedsod grèse zha ne gnab lo me gdeed me ncuaaꝛe rquii zho, zdeed mew.

<sup>12</sup> Zha ne racladz ndzinli gac miech lo zho, none glo zho zaacse gac zho lo miech. Zigtaa ley ne psan Moisésa, zigtagaa miꝛe bnee grè zha ne biadteed xtiidz Dios padzeelaw, sca rnabeya.

<sup>13</sup> Goltsocxo sca tsienalꝛe to miꝛe rnabey Dios, niicle ne nac guieꝛmban co zig nac zeꝛe rzè ne tib nèz nia. Zhis zha ne rzèèb nèz co, per nèz co zgaa miech guieꝛmban ndzon ne rdeed Dios. Sac goꝛ zha ne mban zigne notaa guic zho, rrieequia tib nèz nzhen ga zie zho; ndal miech ne zie nèz co, per nèz ne nitlo zho ga zie zho.

<sup>15</sup> Nsin golso lo zha ne gacladz yquidie to gnè zho xtiidz Dios noteed zho, niicle ndooladz rlu zho pale cho grè mècwxil yeen, per zha ntseeba, masaque nac zho zig grè coyot blè. <sup>16</sup> Zigne runbey miech tib yag por nex ne rquia low, scaque wen wen golwi zha nac ncuaaṅe ruṅ zho, dzigo ga guṅbey to cho nac zho. Sac gon zig nac uv, rquiada lo yag guiets; niicle guigw-gaaw rquiada lo grè lbè guiets. <sup>17</sup> Tib tib yag nex rdeedsew xnexa. Tib yag wen, nex wen rquia low; sca-gaa yag ncuana, nex ncuuan rquia low. <sup>18</sup> Grieelod yquia nex ncuuan tib lo yag ne rquia nex wen, ni grieelodgaa yquia nex wen tib lo yag ncuuan. <sup>19</sup> Gacxe waa grè yag ne rquia nex ncuuan, paat rquiinda, lèè gdib rruga, rlozh ga rzèèg zhow. <sup>20</sup> Miṅ co nagon rne naa lo to, zha ne sca guiaad, por ncuaaṅe ruṅ zho ga guṅbey to cho nac zho.

<sup>21</sup> Grè zha ne rnee noxco zho miṅe rnabey Dios, no zho lega rneesew. Nenda haxta rnee zho, naa nac meṅ ne rnabey zho, per gdziṅd zho zaatne rnabey Pxoṅ naa. Sac zha ne nlipaa ruṅ miṅe rnabey me, zha cose gdziṅ ga. <sup>22</sup> Gaḷ dze co, nzian zha ne grieequia gnè lo naa: "Conque rdziuuṅbey no luu, blactaa name bio no bionee no Xtiidz luu lo miech, nzian milagr ne bdziuuṅ no, haxta meṅdox bdziuuṅxooṅ no zeṅe bzeet no lè luu." <sup>23</sup> Niicle sca gnè zho, ib ycaaniad naa zho, sonèz naa zho; sac ni lalnu beṅd zho ncuaaṅe ndzinli.

<sup>24</sup> Zha ne rquiaadiag miṅe rne naa, ni rioxco zho rban zhow zigne naca, rrieequia nac zho ga zig tib zha ndzielguic ne bzaa lidz zaatne nac tib lo quie. <sup>25</sup> Niicle riab guiedox per peet racd lidz zho, niicle rrieed medox, nis naal ne raclo rded zaatne zoba ga, per rbixcheda.

<sup>26</sup> Laa grè zha ne rquiaadiag xtidz naa, ni rioxcod zho gban zhow zigne naca, ziaad gac zho ga zig tib zha nx-en ne güeyzoob lidz zaatne nac tib lo yuzh. <sup>27</sup> Znuse bnitlo lidz zho, sac zeṅe biab guiedox, lo medox ne brieed, lo nis naal ne goclo bded zaatne zoba, znuse bixchew, ni stib lèw biaaṅd.

<sup>28</sup> Zeṅe blozh bnee Jesús, grè miech ne noquiaadiag ga, per nli rzee zdoo zho gon zho zha rseed me, <sup>29</sup> sac rlu meṅ rnabey nac me, led yed me rseed miech zig rseed grè maistr ley.

### Biac tib mgui ne rlan lepr

(Mr. 1:40-45; Lc. 5:12-16)

**8** Laa Jesús ziad-zèeb cho gui win co, miech guizhiu ne naḷ zhits me, <sup>2</sup> tibaque brieequia tib mgui ne rlan guiedzdox ne lè lepr, wbig me pquitsgzhil me lo Jesús, rèb me:

—Tebaa siguieeḷ luu guṅguiac luu naa.

<sup>3</sup> Dzigo pxobnia Jesús guic mgui, rèb Jesús:

—Zuṅguiac naa luu. ¡Niinagazh laa luu guiaaṅmbe!

Horcogazha laa grè guiedz co bnitlo. <sup>4</sup> Dzigo rèbchaa Jesús lo me:

—Bina gaṅle, choot lo gzodiidz luu gon zha biac luu; sinque güey lo pxoz güeyṅ gon ne rieguiaḷ gdeed luu zigne rnabey ley ne psan Moisés, zeṅa gan zho gaṅle laa luu biacle.

### Biac tib zha ne rquia dziin tib lo meṅguib

(Lc. 7:1-10)

<sup>5</sup> Loxaque bdziṅ Jesús guiedz Capernaum, laa tib meṅ ne rnabey lo xmeṅguib zha Roma bdziṅle lo me, rnab meṅ co guṅguiac Jesús tib zha ne quia xtsiṅ me, rèb me:

<sup>6</sup> —Been tib guieḷnzaac beṅguiac tib zha ne rquia xtsiṅ naa, laa zho nix lidz naa ib gacd grial zho, mban rac zho yoobdox ne rquia zho.

<sup>7</sup> Dzigo rèbchaa Jesús:

—Peet nacda, na sè naa guio ne guṅguiac naa zho.

<sup>8</sup> —Coo —rèb meṅguib co—, rieguiaḷd csodziin naa luu sèè luu haxta lidz naa. Nanpaa naa zrieelo luu nugazh gnabey luu guiac zho. <sup>9</sup> Sac zig nac naa no zha ne rnabey lo naa, ni ron naa miṅe rnabey zho; scagaa teḷ guiep naa tib lo zhaguiib ne rnabey naa: "Güey nu", rie zho; rnegaa naa: "Dè nu", riaad zho; zha ne runṅaa dziin lo naaw, miṅe rnabeytaa naa zho, ruṅ zhow. Scaque luu nagon nanpaa naa zrieelo sca gnabey luu guiac xmoz naa.

<sup>10</sup> Zeṅe gon Jesús sca rnee meṅ co, rley me, rèb me lo grè zha ne zianaḷ zhits me ga:

—Lo grè zha Israel, gard gon gaṅ naa tib zha ne squitaa dib zdoo rnalo Dios. <sup>11</sup> Ni golquiaadiaga gaṅle, dzziṅ dze grèle zha zit ne squi gnalo Dios, zha co ygaa sobnie Abraham, sobnie Isaac ni Jacob zaatne rnabey Dios. <sup>12</sup> Laa grè zha Israel, niicle nac zho zha ne nac didz gdziṅ ga, leḷ lo ncow nèz ley guiaaṅ zho, ga tso zho goonnè zho, haxta gow lay zho lo guieḷnèdox co.

<sup>13</sup> Blozh ga rèbchaa me lo meṅguib co:

—Bzè nasca, gocnaṅ gaṅle zigne biladzse luu guiac xmoz luu, sca gaca.

Horcogazha laa moz co biac.

### Biac xniadzoop Pedr

(Mr. 1:29-34; Lc. 4:38-41)

<sup>14</sup> Laa zeṅe bdziṅ Jesús lidz Pedr, gon me laa xniadzoop Pedr nix rlan xlèè. <sup>15</sup> Dzigo bded me zaatne nix zhuz co, zigne bzheṅ me nia zhuz laa xlèè co blèz. Horcogazh guche zhuz beṅlo zhuz ncuaaṅe dow zho.

<sup>16</sup> Ziedzele dzew, laa ngbidz rzèèblew, zeṅe bdziṅ grè miech co, nzian grè zha ne nosacsi meṅdox bdziṅnie zho lo me. Grèse zho beṅguiac me, goctox me lo grè meṅdox ne nosacsi zho ga, beṅcxooṅ me ma; ni zha ne rlangaa pe stib guieḷguidz, grèse zho beṅguiac me. <sup>17</sup> Ga brieequia miṅe bzeet Isá, meṅ ne biadteed xtiidz Dios lo miech padzeela, zeṅe rèb me: "Grèse xquieḷnè ne, grèse guieḷguidz ne rziac ne, me biw."

### Zha ne racladz sèeb xnèz Jesús

(Mr. 4:35-41; Lc. 8:22-25; 9:57-62)

<sup>18</sup> Zeṅe gon Jesús scataa ndal miech ne goclo lo me ga, dzigo bnabey me xpèèdscuel me gzhixcuaa zho, sac laa zho no tedquia stib nèz ro nisdoo co. <sup>19</sup> Dzigo wbig tib meṅ ne nac maistr ley lo me, rèb maistr co:

—Zaatne tsietaa luu gon, sènaḷ naa zhits luu.

<sup>20</sup> Dzigo rëbchaa me:

—Gocnana ganle, naa ne nac naa Mgui ne pxeel Dios, peet rapd naa nu, mazd zig nac grë mèz, grë mguin, rap ma zhibliee ma, rap ma zhiptsieez ma; per naa per ni zaatne gaguies naa quianied naa.

<sup>21</sup> Wbigaque stib zha ne rzënalë zhits me, rëb zho:

—Ye naa gon sënal naa zhits luu, per bzhiguiel bneedz diidzbey cuëz naa gangazh naa tsoliu pxoz naa.

<sup>22</sup> Pquiab me rëb me:

—Dënal zhits naa. Psaan, nzian grë zha gut no, tsow tsiequeets zho sameṅgut zho.

<sup>23</sup> Dzigo laa me bzëëbnie xpëëdsuel me tib leṅ barcw, laa zho zie. <sup>24</sup> Laa zho zie lo nis co, tibaque zeene psilo brieë tib medox, masaque rlis me lo nis co, laaw psilo rzëëb leṅ barcw. Dzigo lëëlëd güey zho güey-cuaan zho me, sac lëëtaque nixguies me.

—Ligier ganle —rëb zho—, blee mcaal lo luu. ;Bui ganle laa ne nitlo lo nis rii, csaand luu guet ne nu!

<sup>26</sup> Dzigo rëbchaa me lo zho:

—¿Pe nacne squitaa rdzieb to? ;Gardaque dzigo lëë gliladz to cho nac naa!

Dzigo guche me, bnee me lo me co, bnee me lo nis co cuedzew. Horcogazha blëz me co, niicle nis cow laaw bredze. <sup>27</sup> Zeene gon zhow, bzee zdoo zho.

—Bay chozhe waa nac meṅ rii —rnee zho—. ;Zha nac ne haxta me, haxta nis ron xtiidz me?

### Meṅ Gadar ne nosacsi meṅdox

(Mr. 5:1-20; Lc. 8:26-39)

<sup>28</sup> Laa zho bdziṅdze stib nëz ro nisdoo co, zaatne nac xtan zha Gadar, zeene brieëquia chop mgui ne nosacsi meṅdox, bdziṅ lo Jesús ga. Zha ntseeba, rdzieb miech zho, choot rdete nëz co. Leṅ baa brieë grop mgui co bdziṅ zho ga, <sup>29</sup> nguiertz roptsie zho rnee zho:

—;Peet guṅd luu no Jesús, psaan no! Rdziunbey no luu, Xpëëd Dios nac luu. Ne nligaa beṅ guieṅzaac csacsid luu no niinaga.

<sup>30</sup> Zitlaaque ga ndxie tib dzoön nguts notop lag, dzi-go bnab grë meṅdox co lo Jesús rëb ma:

—Telne cuee luu no nu, bzhiguiel bneedz diidz lose grë nguts qui gdziṅ no.

<sup>32</sup> —Niinaga sca goṅtsie —rëb me.

Zigne psaan meṅdox co grop mgui co, güey ma bdziṅ ma lo grë nguts co. Horco psilo grë nguts co, rquiaa ma corr güeypix ma tib ro yeedox ne quia ro nisdoo co, bliaal ma lo nis, grëse ma gut.

<sup>33</sup> Zha ne quianap grë nguts co, gzase zho bzhoon. Güey zho lad guiedz güeyzodiidz zho zha goc grë nguts co, ni bzodiidz zho zha biac grop mgui ne nosacsi meṅdox ga. <sup>34</sup> Grëse miech co, brieë zho zieso zho. Zeene bdziṅ zho gon zho laa Jesús zo ga, dzigo bnab zho lo me siguiel me gbi me xtan zho.

### Biac tib meṅ ne gutoo

(Mr. 2:1-12; Lc. 5:17-26)

**9** Dzigo wbiireque bzëëb zho leṅ barcw, bdziṅ zho guiedz Capernaum stib, sac ga nac zaatne rbëz

Jesús leṅ dze co. <sup>2</sup> Zhisaque goc bdziṅ me, laa zho bdziṅniele tib meṅ rzacnë lo me, dipse meṅ co gutoo, ib gacd së me. Lo yag zhoob me bdziṅnie zho me ga.

Zeene gon Jesús dib zdoo grë zha co rnalo zho ne me guṅguiac meṅ rzacnë co, rëbchaa me lo meṅ rzacnë co:

—;Nley bloo zdoo luu xin! ;Laa naa beṅle perdon grëse xtoṅ luu!

<sup>3</sup> Ga zob blalaa maistr ley, zeene gon zho sca bnee me, bza zdoo zho rëb zho: “;Quiaguitnie meṅ qui Dios gon squi rzë xtiidz me!” <sup>4</sup> Bienga Jesús sca rza zdoo zho, dzigo rëbchaa me:

—Lëda i gon squi rza zdoo to. <sup>5</sup> Nli ngaṅda guiab ne lo miech: “Laa naa beṅle perdon grëse xtoṅ luu”; per grielod lega guiab ne laa ne guṅguiac zho. <sup>6</sup> Gacnan to sca ganle naa ne nac naa Mgui ne pxeel Dios, ible rap naa poder par gon naa miech perdon.

Dzigo rëbchaa me lo meṅ rzacnë co:

—;Niinagazh guche i, bi yag ne bzhoob luu i, zeṅ bzë!

<sup>7</sup> Zigne sca bnee me, laa mgui co bzoli, laa me zey.

<sup>8</sup> Grë miech guizhiu ne ndxie ga, zeene gon zho sca beṅguiac me mgui co, bdzieb zho. Psilo zho rdeed zho xquizh lo Dios, scataa poder ne bdeed Dios lo me.

### Bredz Jesús Matew

(Mr. 2:13-17; Lc. 5:27-32)

<sup>9</sup> Blozh ga laa Jesús brieë ga. Ro nëz zieded me gon me tib meṅ lë Matew, lëëtaque laa meṅ co zob lo mezh zaatne razh dimi ne rey lo zha Roma; sac me rcaania dimi co. Dzigo bredz Jesús me tsienal me zhits Jesús. Ga guso me, laa me zienal.

<sup>10</sup> Bded ga güeynie me Jesús tib wagw lidz me. Grë zha ne rcaania dimi ne razh lo zha Roma, grë zha ne zëëb diidz nac zha ntseeb, tipse brenie Jesús zho grë xpëëdsuel me.

<sup>11</sup> Blalaa zha farisé, gon zho sca tipse zobnie me grë zha co, bded ga, rëbchaa zho lo xpëëdsuel me:

—;Mod scataa na rownie xmaistr to grë zha ngoopdoṅ, grë zha beed ne nac recaudador!

<sup>12</sup> Bin Jesús sca quianee zho, dzigo rëbchaa me lo zho:

—Nanle to ganle, zha ne ruṅ rmed, zaatne no zha rzacnë ga rquiin zho, ;niacxe squiin zho zaatne no zha ne ndip ndaan? <sup>13</sup> Goṅsoladz ganle znu rnee Dios: “Laa naa racladz gacndooladz miech, yquia zdoo zho samiech zho, racladzdaxe naa waa guiaad zho dieṅ peraa guiaadlogon zho lo naa.” Mazd ganle goṅtsie, tsow goṅsob goṅguien dieṅ zha nacne sca rnee me. Tel naa, zialguibd naa miech wen, sinque laa naa zialguib grë zha ngoopdoṅ.

### ¿Pe nacne rcuand xpëëdsuel Jesús?

(Mr. 2:18-22; Lc. 5:33-39)

<sup>14</sup> Bdziṅaque xpëëdsuel Juan Bautist, bnabdiidz zho lo Jesús, rëb zho:

—¿Pe nac waa ib rcuand xpëëdsuel luu? Ni no grë no zha farisé, zhiga zhiga laa no rcuanle.

<sup>15</sup> Pquiab me rëb me lo zho:

—Zaatne nadien noyac tib guieltsieel, ¿pe niacxe lega csilo grë zha ne ndxie lo lni tso zho guielnë, ycuau zho, ni ran zho laa mgui ne notsieelnia zo lo zho? Per zdziñ dze zeene laa mgui co gbiche, ni zeene laa dze co gdziñ, dzigosi nagon rieguial tso zho guielnë, rieguial ycuau zho.

<sup>16</sup> Ranle to ganle, zha ne rquiaabdie tib lë lar, yquiaad zho lar cub lad lar gox, sac zha ne sca guñ paat yquiind wquiaabdie co. Zeene laa lar cub gbe, lëëque lëëw guñnat zaatne nriez lar gox. <sup>17</sup> Scaque tsod zha ne cotsow vin cub tib len guid ne padzeela noquiu, sac stsiez nziu cuba; dzigo niicle guid cow, niicle nziugaaw laaw nitlo ga. Gacxe, tel nziu cuba none len guid cubaque tsotsowa.

### Brieeban tib mëdwnaa yeen

(Mr. 5:21-43; Lc. 8:40-56)

<sup>18</sup> Lëëtaaque sca quianee Jesús lo xpëedscuel Juan Bautist, zeene bdziñ tib mgui ne nac zha non yadoo. Zigne bdziñ me pquiitsgzhib me lo Jesús, rëb me:

—Been tib guielnzaac së luu guio ne lidz naa. Laa tib xpëdwnaa naa blozh niina, per nanpaa naa telne cxobnia luu guic win, zbeeban luu win.

<sup>19</sup> Dzigo bio Jesús nëz zienał me zhits men co, gza xpëedscuel me. <sup>20</sup> Lad grë miech ne zienał ga, lad co no tib men wnaa, gocle tsiipchop iz rlan me tib guielguidz, rzac me zigne rzac grë men wnaa gzob mëë, tibaque rlan mew ib rbëzda.

Ga zie me, zeene wbig me nëz zhits Jesús, bzhen me ro lar ne mbix Jesús, <sup>21</sup> sac tibaque güeynie guic me, ziac me totsaque yгаа xab Jesús nia me. <sup>22</sup> Dzigo wbire lo Jesús, dze bui Jesús lo me.

—Xin —rëb Jesús—, peet tsienied guic luu. Laa luu biac sacne bliladz luu naa.

Gataa laa wnaa co biac lo guielguidz co.

<sup>23</sup> Laa zeene bdziñ Jesús lidz men rnbey co, laa zha ne rool ndxiele, noquiaa zho grë di ne rac lo ngutoo, grëraa zha ne ndxie ga, nguiedz zëëb tsi zho roon zho, tib ruid ne rac. <sup>24</sup> Dzigo rëbchaa me lo zho:

—Golriee nëz ley, sac gon gute mëëd qui, nixguiesse win.

Zha ne rlëë, zha ne rzhidzniegaa me, laa zho briee ley. <sup>25</sup> Dzigo laa me bzëëb len yu zaatne nix mëëd co, bzhen me nia win. ¡Horcogazha laa win guche!

<sup>26</sup> Grëse guiedz ne ndxie dib gax ga, gocnan miech scataa milagr nroob ne been me, bleeban me mëëd co.

### Biac chop zha ne rołd lo ni tib zha ngop

<sup>27</sup> Zeene laa Jesús wbi ga, nëz zie me brieenał chop zha ne rołd lo zhits me, nguiedz rbedz zho rnee zho:

—¡Jesús, xingan David, pquia zdoo no!

<sup>28</sup> Bdziñ Jesús yu ne rbëz me, laa zho wbig lo me. Dzi-go rëbchaa me lo zho:

—¿Dib zdoo to dzigo lëë rliladz to zrieelo guñguiac naa to?

—Dib zdoo now —rëb zho.

<sup>29</sup> Dzigo pquiaania me zhits bziaalo zho, ni rëb me:

—Miñe bliladz to i nasca, laaw gac niina zigne bliladz tow.

<sup>30</sup> ¡Horcogazha laa lo grop zha co biac!

Dzigo pso Jesús diidz lo zho choot lo gzodiidz zho zha biac zho, <sup>31</sup> ni zigne brieë zho ga, laa zho bzodiidzlew. Blozh ga, grëse guiedz ne ndxie dib gax ga, gocnan miech scataa nac milagr ne run me.

<sup>32</sup> Loxaque wbi grop zha ne biac lo ga, laa bla zho bdziñlaque, bdziñnie zho tib men ne nosacsi men-dox, psanngop ma men co. <sup>33</sup> Dzigo beñcxoon Jesús men-dox co, zeene laa ma bzhoon laa men co psilo bnee. Grë miech guizhiu ne ndxie ga, per nli rzee zdoo zho, rnee zho:

—¡Wlaltaa gard dzian ne tib men ne squitaa guñ grë milagr qui!

<sup>34</sup> Laa grë zha farisé rnee:

—Ma ne rnbey lo men-dox nacie men qui, gane rrieelo runcxoon me men-dox.

<sup>35</sup> Grëse guiedz ne ndxie gax ga, zigtaa guiedz nrooba, zigtagaa guiedz lasa rie Jesús rieseëd me miech. Zaatne rdziñtaa me, rie me xyadoo zho rnee me lo zho zha racladz Dios gban zho, ni runguiac me zho tel pe nactaa guielguidz ne rzac zho.

<sup>36</sup> Zeene ran me grë miech guizhiu ne rcaalsa lo me, rquia zdoo me zho, sac ran me mban rac zho guien-d cho tib zha ne gacnie zho, rac zho zig grë mëcwxiił yeen ne guien-d xbaxtor.

<sup>37</sup> Tib vuilt haxta rëb me lo xpëedscuel me:

—Golnab lo Dios cxeelraa me zha ne guñ xtsiñ me. Golwi ganle pe zhidaa grë miech qui, quiambëz zho dien cho gnee Xtiidz Dios lo zho. Masaque nac zho niina, zig tib guielgon ne golle gliiap.

### Bzo Jesús zha ne tsienee xtiidz me

(Mr. 3:13-19; Lc. 6:12-16)

**10** Blozhse sca bnee Jesús, dzigo bredz me gza tsiipchop zha ne nac xpëedscuel me ga, bzo me zho tsienee zho Xtiidz Dios lo miech, bdeed me poder lo zho guñcxoon zho men-dox zaatne nosacsi ma miech, ni guñguiac zho grë men rzacnë.

<sup>2</sup> Znu lë gza tsiipchop zha co:

Simón (zha ne rneeque zho Pedr),

Ndrés (bets Simón),

Jacob ni Juan (zha co nac xingan Zebedé),

Lip,

Bartol,

Mazh,

Matew (zha ne ptop dimi ne razh lo zha Roma),

Jacob (xingan Alfé),

Lebeo (zha ne rneeque zho Tadé),

Simón (zha ne no lo partid ne racladz gree zha Roma Israel),

ni Judas Iscariot (zha ne güeyto Jesús).

## Pxeel Jesús zha ne tsienee xtiidz me

(Mr. 6:7-13; Lc. 9:1-6)

<sup>5</sup> Blozhse ga, pso me diidz lo zho zha tsie zho, rëb me lo zho:

—Nanle to nagon, tsiede to zaatne no grë zha ne nacd zha Israel, niicle sëëbde to grë guiedz ne ndxie xtan zha Samar. <sup>6</sup> Zaatne no grë zha Israel, gase goltsie; lëë grë mëcwxiiil ne nonziaab ga.

<sup>7</sup> Goltsie, goltsienee lo zho gacnan zho ganle laa dze ziaadgaxle zeene laa Dios csilo gnabey.

<sup>8</sup> Grëse zha ne rzacnë, golgunguiac zho; zha ne rlan guiedz lepr, golšanmbe zho; zaatne nix zha ne gutle, golcueeban zho; grë zha ne nosacsi menodox, golgunxoon ma. Peet gnabde to lo miech, golguien ganle lega bnedz naa poder qui lo to, bzhiide tow.

<sup>9</sup> Peet güeyde to, xab tow, lab tow, miñe nacwse to, miñe quiasse ni to, mincose goltsienie. Güeyde to dimi, per ni tib quiet güeyde to; sac zaatne tsiegun to dziin rii, ib ga none gneedz zho ncuane gow to.

<sup>11</sup> Guiedz ne gdziñtaa to, golguib dien pa lo no tib zha ne ndzinli, dzigo lidz zha co goltsiebëz, haxta gza dze ne laa to gbi guiedz co. <sup>12</sup> Zeene noguib to pa cuëz to, yu ne tsie to, zaacse golgac, golquiaabdiuzh zha ne no yu co, <sup>13</sup> golnab gunlay Dios zho. Telne wen gac zho lo to, zunlay me zho, togo guncasdga zho to, dzigo toque gunlay me. <sup>14</sup> Zha ne sca siguield ycaania to, golriiegazh lidz zho; guiedz ne siguield zho yquiaadiag zho miñe nonee to, golbigazh guiedz co; gollit grë yudie co ni to, gollu lo zho ganle led xtoldraa to ga tel laa zho nitlo. <sup>15</sup> Gnelli naa lo to ganle zeene gal dze ne laa Dios gun xquielwxtis me, bii lëëtaa gac guielnë ne ygaa grë miech ne bio guiedz Sodom, guiedz Gomorr, lëdle guielnë ro ne ygaa grë miech ne sca siguield ycaania to.

<sup>16</sup> Nsin golso, golguien ganle rrieequia tib mëcwxiiil yeense nac to, ni laa naa rxel to zaatne no grë coyot dox. Ndooladz golgac, niowse golgac lo miech zig rac grë palom, per scagaa con cuidad goltsie, golgan ganle zha rzë meel. <sup>17</sup> Nligaa nsin golso, sac gon ib ziezio miech to lo wxtis, ni lëëque len yadoo ga quin zho to, <sup>18</sup> haxta xizto zho to lo grëraa zha nroob ne rnabey. Laa zho gun, loxaque ne nac to zha ne no xnëz naa, ni gagaa nagon gdeeda diidz gnee to xtidz naa lo grë zha co, ni lo grëragaa miech ne nacd zha Israel.

<sup>19</sup> Zeene sca tsiezo zho to lo grë zha rnabey co, tsoode to zhgab dien pe gnee to, dien zhagaa gnee tow; sac zeene sca tsiegala, Dios gneedz diidz ne gnee to.

<sup>20</sup> Led tod gnee, sinque, jzhiEspíritu Pxo z to men ne zob gbaa, men co gnee ga!

<sup>21</sup> Zlëënedox miech zha ne no xnëz naa. Zio zha ne lëëque bets zho, zha ne lëëque pxoz zho, zha ne lëëque xpëed zho ctsidi zho, tsielo zho zho lадznia zha ne gut zho. <sup>22</sup> Tel to, guiets yag gan miech to, per telne dziits so to tel pe nactaa lo guielnë ne ted to, ib zgaa to tib guielmban ndzon ne gdziñdraa dze lozh.

<sup>23</sup> Guiedz ne no to, zeene laa miech csilo yquiaana to, golriee ga, goltsie stib guiedz. Gnelli naa lo to ganle, ni-

icle stib guiedz stib guiedz tsie to, gardaque lozh tsieted to grë guiedz ne ndxie Israel zeene gal dze ne laa Mgui ne pxeel Dios guiaad stib.

<sup>24</sup> Golwi ganle zha ne nac mëëdscuel, tsod zha ne ndziibraa non lo maistr, zha ne rquiagaa dziin, tsod zha ne nonraa lo zha ne rree zho. <sup>25</sup> Tel zha gun miech maistr, scaque gun zho mëëdscuel; tel pe cteed zho bizhuan dziin, mincoque cteed zho zha ne quia dziin. Gacxe waa peet tsienied guic to, tel pe nactaa ncuane gnee miech to, sac gon niicxe naa name ne nac naa Dad, menodox rnee zho nac naa.

<sup>26</sup> Gdziebde to, dzin dze ne glu ganle cho ziana miñe nac diidzli, chogaa ziana guielntseeb, gal dze co grësew xoobnen.

<sup>27</sup> Grëse miñe rne naa lo to zeene nese rziodiidza, golneew lo miech, haxta glaa guic yu golso, nguiedz golneew. <sup>28</sup> Gdziebde to miech, golguien ganle no tib men nroobraa, lëë men co nac Dios. Tel miecha, loxaque cuerpse zrieelo zho csacsi zho, sangue Dios, zrieelo me gnitlo me miech dib xcuerp zho, dib xalm zho len gabil.

<sup>29</sup> Nligaa gdziebde to, csaand Dios lega pe gac to. Golwi ganle, zig nac grë mguin niicle ne rzac miech peet nond ma, haxta chop ma rdeed zho por tib gaay centav; per Pxo z to gon men ne zob gbaa rsaanladz me ma, ni tib ma guete telne gdeete me diidz. <sup>30</sup> Pelel to dzigo csaan me, haxta guits guic tow, grësew ngaba lo me. <sup>31</sup> Gdziebde to sca, golguien ganle nonraa to lo tib dzoon mguin.

<sup>32</sup> Gnelli naa lo to ganle, zha ne glu lo miech nacie zho naa, scaque naa zeen gal dze co zlu naa lo Pxo z naa men ne zob gbaa, nacie naa zho. <sup>33</sup> Sangue zha ne ctoladznie naa lo miech, scaque naa ziep naa lo me runbeyd naa zho.

<sup>34</sup> Guiabde to togo laa naa zial loxaque par cuiñ wense miech! Lëda gon, ye zial naa zialgunctil naa zho. <sup>35</sup> Sac zha ne sëëb xnëz naa, zlëënie xpëed zho zho, tel mëëdgaaw, zlëënie pxoz zho zho; scaque men wnaaw, zlëënie xinzhizh zho zho, zha ne nacgaa nguzhizha, zlëënie xnïaa tsieel zho zho. <sup>36</sup> Lëëque menlidz miech gac zha ne glëë gan zho!

<sup>37</sup> Zha ne mazdraa rquia zdoo glëënie pxoz zho zho, glëënie xnïaa zho zho, glëëniegaa xpëed zho zho, porne gun zho miñe rnabey naa, peet xtsiind zha co par ygab zho xnëz naa. <sup>38</sup> Scaque zha ne yquia zdoo cueeladz zho zho guiaadna zho zhits naa, grieelod ygab zho lo naa. <sup>39</sup> Sac grëse zha ne rquia zdoo guielmban ne rap zho lo guidzliu rii, ygaad zho guielmban ndzon ne gneedz Dios; sangue zha ne cueeladz xquielmban, niicle tel csacsi miech zho loxaque ne no zho xnëz naa, ib zgaa zho guielmban ndzon co.

<sup>40</sup> Niina gon ne squi tsie to, grëse zha ne zaacse ycaania to, zaacse gnee zho lo to, rrieequia naa ga sca ycaania zho; ni zha ne sca ycaania naa, rrieequia men ne pxeelle naa ga sca ycaania zho. <sup>41</sup> Zha ne cuëzlo tib men ne noteed xtiidz Dios lo miech, guielnzaac ne gdeed Dios lo men co, ye zho ygaa guielnzaac co. Zha

ne cuëzlo tib miech ndzinli, guie|nzaac ne gdeed Dios lo zha co, ye zho ygaaw. <sup>42</sup> Ni zha ne gneedz maase tib zhigaque nis yag lo cho tib zha win ne nac to ne nac to xpëëdsuel naa, ib tedsod zdeed Dios guie|nzaac ne tsiagua| zho.

### Zha ne pxeel Juan Bautist

(Lc. 7:18-35)

**11** Zeene blozh pso Jesús diidz lo gza tsiipchop zha co, dzigo laa zho zie. Blozh ga laa me brieque, güey me grë guiedz ne ndxie gax ga, güeyseed me grë miech co.

<sup>2</sup> Len dze co no Juan Bautist ladzguiib, ga no Juan bin Juan zha nactaa grë milagr ne run Jesús, dzigo pxeel Juan bla xpëëdsuel Juan güeynabdiidz zho lo me, dien pe lëele Men ne zëëble diidz cxeel Dios lo guidzliu ga nac me, te dzigora gdzin men co ye. <sup>4</sup> Dzigo rëbchaa me lo zho:

—Grë ncuaañe bin to rne naa, grëgaa ncuaañe gon to run naa, goltsie golzodiidza lo Juan. <sup>5</sup> Ran to ganle grë zha ne ro|d lo, grë zha ne gacd së, grë zha ne rlan guiedz lepr, grë zha ne rcuaat, laa zho riac; haxta grë zha ne gutle, laa zho rrieeban. Xtiidz Dios, laaw quia-gaaz lo grëse zha ne rquiina. Grësew, golzodiidza. <sup>6</sup> Ni golguiab lo me, dichos zha ne racchopd guic, sinque tiblrique rac zho riladz zho cho nac naa.

<sup>7</sup> Zeene laa xpëëdsuel Juan zey, dzigo psilo me bzeet me Juan lo miech guizhiu ne ndxie lo me ga, rëb me:

—Zeene güey to dan ngan co, güey to lo Juan, ¿zha dien güeynie guic to nian to me? ¿Pe rëb to rlu me zig tib goobgui ne nëzrii nëzrec rey me, te rëb to ye masaque grë lar niazh ne racw zha non nacw me? Per nanle to ganle zha ne scataa racwxab riod zho dan.

<sup>9</sup> Nligaa cho dien güeynie guic to nac me, ¿te rëb to ye tib men ne noteed xtiidz Dios? Gacnan to ganle tib men ne noteed xtiidz Dios gon nac me, ni me nac tib zha ne mazdraa nroob lo grë zha ne ziyun dziin co.

<sup>10</sup> Me ga raquiet lo Xtiidz Dios zaatne znu rnee:

Sxel naa tib zha ne tednerga lo luu,  
zha co gzhixcuaa nëz ne ted luu.

<sup>11</sup> Ne nligaa lo grëse mgui ne zieded lo guidzliu gard grieequia tib zha ne mazdraa non lo Juan Bautist; per zha ne gon winraa zaatne rnabey Dios, nonraa zha co lo me.

<sup>12</sup> Desde psilo Juan noseed me miech zhapa racladz Dios gban zho, ni rchoobnis me zho, hor co psiloque briequia zha ne rlëënie zhiwseed Dios, gacxe waa zha ne nlipaa rdziebd, zha cose rcaaniaw, rzëëb zho xnëz me. <sup>13</sup> Mazd glo tibaque raquiet ne laa men ne cxeel Dios ga guiaad, zigtaa lo leya, zigtagaa grë zha ne biadteed xtiidz Dios, bzeet zhow. Ni niina ne laa Juan bi-aad, laa men co blanso. <sup>14</sup> Juan gon biaad niina zig no diidz guiaad Lí; golgacnan sca ganle cho nac me.

<sup>15</sup> Zha ne racladz guien zho zha nac grë miñe none naa nu, ¡yquiaadiag zhow!

<sup>16</sup> Nac grë miech rii, rien d zho pe racladz zho. ¿Cho ganle run zig run zho? Lëë zho run miñe run mëëdlas ne rio wguir ro nëz, niicle rool xcompañer win di

ngueel ried win, niicle rool gaa zho di ngan, roond win. <sup>18</sup> Sac gon biaad Juan, ran zho rowd me tel pe ncuaañe row zho, ried me ncuaañe rie zho, dzigo laa zho rnee mendox nacie me. <sup>19</sup> Blozh ga ziaad Mgui ne pxeel Dios, ran zho row me, rie me, laa zho rneeque, lega rowcho me, lega riecho me, ib rien d me cho rt-sieelsa me, haxta grë zha ngoopdol, haxta grë zha yozh ne rtop dimi ne razh lo zha Roma rzënie me. Sca rnee zho, sangue zha ne rgaa guie|biini ne rdeed Dios, rien zho cho nac zha ne ziaadgon xtsiin me.

### Miech ne bzhiguie|d ncaania xtiidz Jesús

(Lc. 10:13-15, 21-22)

<sup>20</sup> Blozhse ga, dzigo psilo Jesús bzeet me miñe yгаа grë zha ne pcaaniad xtiidz me; sac nzian guiedz ne güey me niicle gon zho grëtaa milagr ne been me, per ib psaand zho xquie|ntseeb zho, rëb me:

<sup>21</sup> —¡Probsaxe grë men guiedz Corazín, grë men guiedz Betsaid! Sac gon gonpaa zho grë poder ne rap Dios, per ib psaand zho xquie|ntseeb zho. Tel niaca miñe nian grë men guiedz Tiro, grë men guiedz Sidón, grë milagr ne gon zho ben naa, ib ndedsod mban niac grë zha co nio zho guie|në, zëëb nsaan zho xquie|ntseeb zho, mbig zho lo Dios. <sup>22</sup> Gacnan zha Corazín, gacnan zha Betsaid sca ganle, gal dze ne gon Dios guie|wxtis, lëëtaa caxtigw ne yгаа zha Tiro ni zha Sidón, mazdraa miñe yгаа zho. <sup>23</sup> Scaque zha Capernaum, masaque rzac zho niina zha nziuuraa lo Dios, per gacnan zho ganle haxta quiet lo ncowdoo ne guey mendox ga guey zho; sac gon tel niaca miñe nian zha Sodom grë milagr ne ran zho noyun naa, ible nsaan zha co xquie|ntseeb zho, nitlod zho. <sup>24</sup> ¡Gacnan zha Capernaum ganle gal dze ne gon Dios guie|wxtis, lëëtaa caxtigw ne yгаа zha Sodom, mazdraa miñe yгаа zho!

<sup>25</sup> Dzigo bzodiidznie Jesús Dios, rëb me:

—Dios luu ne nac luu Pxoaz naa, luu rnabey gbaa luu rnabey guidzliu, rnedz naa xquizh lo luu sac grë miñe noyun luu nu niina bdeete luu diidz niacnan grë zha raca, sinque laaw blu luu lo grë zha ne nac zig grë mëëdlas. <sup>26</sup> Sca quiayun luu, sac ib scale racladz luu gaca.

<sup>27</sup> Blozh ga rëb me lo grë miech ne ndxie ga:

—Grëse ncuaañe ran to quiayun naa, Dios men ne nac Pxoaz naa, me bneedz poder rii lo naa; sac ib laa me bzo naa, naa gūña. Xpëëd me nac naa, wen wen runbey me naa, scagaa naa wen wen runbey naa me. Choot runbeyd me zigne runbey naa me, per zha ne gacladz naa gunbey me, zunbey zho me.

<sup>28</sup> Grëse to ne nac to zha ne në noded, rdib rdzag to quiaguib to dien zha guiaañwen zdoo to, go|të lo naa, naa gneedz tib wdziiladz ndzon lo to. <sup>29</sup> Nligaa golbig lo naa, go|tëna| zhiwseed naa, golgac tib miech tibiladz, tib miech ndooladz zigne nac naa; zeena gap to descans co. <sup>30</sup> Nacda ncuaañe ngan, nacda ncuaañe guiab to glëbde to gon tow.

**Dze ne rdziiladz zha Israel lo dziin**

(Mr. 2:23-28; Lc. 6:1-5)

**12** Len dze coquew, tib dze lëëtaque dze ne rdziiladz zha Israel lo dziina, bded Jesús zaatne zëëb zhobxtil grë xpëëdsuel me. Ga zie zho rcaabedz zho, dzigo psilo zho ptop zho mzion co dow zho zhobxtil co. <sup>2</sup> Gon bla zha farisew, dzigo rëb zho:

—iLëda i gon noyū to, noguiits to ley i! Golguien ganle dze nda nac dze rii.

<sup>3</sup> Pquiabchaa me rëb me lo zho:

—iPe gard glab to zaatne ziaad ganle zha been rey David, tib dze zeene pcaabedz me grë me zha ne ziegza me, ni zienied zho pe gow zho? <sup>4</sup> Rneew, bzëëb me len yadoo güeynab me quietxtil ne nac gon, downie me grë zha ne ziegza me ga, ni loxaque zha ne nacse pxoz row quietxtil co, ipe led bdiitsd me ley ga? <sup>5</sup> Lo xley Moisés name zhobnee ganle zha haxta dze ne rdziiladz to lo dziin ruñ grë pxoz dziin len yadoo, ni rneeda dol ga sca ruñ zho. <sup>6</sup> Golwi ganle zha rats ley par gac dziin len yadoo, ni yadoose ga, gacnañ to ganle lo to nu zo men ne mazdraa non lo yadoo.

<sup>7</sup> Rnee Dios lo Xtiidz me, quiambëzd me dien peraa guñ miech, dien peraa cogon zho lo me, sinque miñe racladz me guien zho yquia zdoo zho samiech zho. Tel niaca miñe nli rien to miñ co, zien to gdziibdojde to zha ne rapd dol. <sup>8</sup> Gacnañ to ganle naa ne nac naa Mgui ne pxeel Dios, naa rnabey dze rii, nanpaa naa pe nonguiel gac.

**Biac tib mgui ne mband tib nia**

(Mr. 3:1-6; Lc. 6:6-11)

<sup>9</sup> Bded ga, gol stib dze ne rdziiladz zho lo dziina, güey Jesús len yadoo win ne zob lad guiedz co. <sup>10</sup> Lad grë miech ne ndxie len yadoo co, no tib mgui ne mband tib nia; porque laa zha farisé bnabdiidzlaque lo me dien pe nonguiela gunguiac me miech dze ne rdziiladz zho lo dziin. Sca bnabdiidz zho, sac quiaguib zho dien pe yquiaaqui zho me tsiezo zho me lo wxtis.

<sup>11</sup> Dzigo pquiab me rëb me lo zho:

—Togase dien, zha ruñ to zeene lëëtse dze rii riet-sobe tib xpëcwxiil to tib len blë nroob, iled zëëb lëë rie to riebee to ma? <sup>12</sup> Tel sca rquia zdoo to mëcwxiil, i golguien ganle mazdraa gon non miech lo tib mëcwxiil! Gacxe waa ible nonguiela guñ ne xyudar samiech ne, niicle maase dze nda nac dze co.

<sup>13</sup> Dzigo rëbchaa me lo mgui ne në nia ga:

—iBzigaa nia luu!

Zigne bzigaa mgui nia mgui, biacgazha, biana zig nac stib miñe ndaantaque ga.

<sup>14</sup> Grë zha farisé co, zigne brie zho ga laa zho psilo bnediidz dien zha gdeeda diidz gut zho Jesús. <sup>15</sup> Bien Jesús sca no guic zho, dzigo mazd brie me ga. Miech guizhiu ne zienał zhits me, grëse men rzacné ne zienał ga, beenguiac me zho; <sup>16</sup> per pso me diidz lo zho, choot lo gzodiidz zhow.

<sup>17</sup> Ga brieequia miñe pquiaa Isá, tib men ne biadteed xtiidz Dios padzeela, zeene rëb me:

<sup>18</sup> Lëë men rii bzooblo naa guñ xtsin naa, rleynie naa me, rzac zdoo naa grë ncuaañe ruñ me. Zded naa zhiEspíritu naa gacnie me, me nac men ne cxobnen xtidz naa lo grëse miech.

<sup>19</sup> Tilnied me miech, sedzd yan me lo zho, sod me ro nëz goptsie me.

<sup>20</sup> Grë zha ne gzhe gzhele rac, zig tib goobgui ne quiaxweele, zig tib lë guier ne noyiidiele, csañd me zdoo zho;

zha ne mban rac lo xliaadz zho, csaand me zho.

Min co tsoxco me, haxta gan me grëse miech gacnañ miñe nac diidzli, ni tsienał zhow.

<sup>21</sup> Haxta zeene gan me ye grë zha ne nacdraa zha Israel, laa zho gnalo me.

**Rëb zho menox nacie Jesús**

(Mr. 3:20-30; Lc. 6:43-45; 11:14-23; 12:10)

<sup>22</sup> Dzigo güeynie zho tib mgui lo Jesús rold lo mgui ni gacdaque gnee mgui, sac nosaci menox mgui.

Znuse beenguiac me mgui, gagazh psilo gon mgui, psilo bnee mgui. <sup>23</sup> Grë miech ne ndxie lo me ga, per nli bzee zdoo zho, rnee zho:

—iBay pe lëë men qui naye nac Men ne zëëble diidz ga cxeel Dios!

<sup>24</sup> Zeene gon zha farisé sca rnee grë miech co, rzachaa zdoo zho rnee zho: “Pe Dios nazho cxeel me, ma ne rnabey lo menox ma co nacie me, gane rrieelo ruñxoon me menox.”

<sup>25</sup> Bien Jesús sca rza guic zho, dzigo rëbchaa me lo zho:

—iNcuaañe gacd gon rnee to! Tel tib wxtis nadien lëëque zha ne nacie zho csilo tilnie zho, i niacxe zac gnabey zho? Tib guiedza, tel lëëque zha guiedz co tilnie menladz zho, led znuse lozh guiedz co; tib diigaa miecha, tel lëëque zha tilnie menlidz zho, i niacxe nit-lod dii co? <sup>26</sup> Scaque menox nagon, telne lëëque lëë ma guñxoon sameñox ma, ipe nale na britlo ma!

<sup>27</sup> Nana ne squi rnee to Beelzebú nacie naa gane rrieelo ruñxoon naa menox, i zha ne nacgrë to dzigo, cho nacie zho ne ye zho ruñxoon ma? Gase naganle rlu dolox i quiayun to, squi rnee to. <sup>28</sup> Sangue tel naa zhiEspíritu Dios nacie naa gane ruñxoon naa menox, ni ga rlu ganle laa Dios psilo quianabeyle nu.

<sup>29</sup> iMasaque nac menox zig tib zha ne no xfuers, zha ne gacladz cuee grë ncuaañe no lidz zha co, none cxidoogazh zho zho! <sup>30</sup> Tel menoxa rlënie ma naa, ni nanle to ganle zha ne rlë lo ne, gacnied zho ne.

<sup>31</sup> Gacnañ to ganle, grëse dol ne ruñ miech, grë tel zha rguie zho, rdzibdee zho, niicle tel haxta gneenë zho naa, bii zun Dios zho perdon miñ co; sangue zha ne gneenë zhiEspíritu me, ib gundraa me zho perdon.

<sup>33</sup> Nanle to ganle zig nac yag nex, miñe nac yag, miñ co nac nex ne rdeeda. Tel yag wena nex wen rquia low, togo yag ncuangaaw, nex ncuanaque rquia low.

<sup>34</sup> iScaque to nagon zhin menox! i Zha nan to nadien gac to miech wen, tel desde zdoo to ntseeb? Miech

ntseeb to gane squi rzë xtiidz to, sac gon, jgrëse diidz ne rriee ro miech, zdoo zho rzaw! <sup>35</sup> Gacxe waa, zha ne mbe zdoo, niapse diidz wen, diidz ndooladz nac xtiidz zho. Sangue zha ne ntseeb zdoo, niapse diidz ntseeb, niapse diidznë rrieeche ro zho. <sup>36</sup> Ni gal dze ne gon gon Dios guielwxtis, ib tedsod zunquizh me miech tib tib diidz ntseeb, tib tib diidznë ne sca rriee ro zho. <sup>37</sup> Sac gon zigne rzë xtiidz zho niina, min co cueequia zho gal dze co, o mincogaa cteedquie zho.

**Racladz zha farisé gon zho milagr**  
(Mr. 3:31-35; 8:12; Lc. 8:19-21; 11:24-26, 29-32)

<sup>38</sup> Tib dze wbig zla zha farisé lo Jesús gza zho zla maistr ley, rëb zho lo me:

—Maestro, racladz no dzian no gon luu tib milagr, milagr ne glu nli Dios pxeel luu.

<sup>39</sup> Pquiab me rëb me lo zho:

—Nazdpaa ntseeb to, squitaa gocndip zdoo to nëz lo Dios, zha nacraa milagr ne racladz to gon to?

<sup>40</sup> Stibaque milagr gon gon to, lëe min co gac zeen gal dze ne laa Mgui ne pxeel Dios, tso len liu tson dze, tson guieel zigne bio Jonás len mel nroob co tson dze ni tson guieel. <sup>41</sup> Ni gal dze ne gon gon Dios xquielwxtis me, ib stedquie zha Nínive miech ntseeb ne nac to i; sac gon zeene güeynee Jonás lo zho, grëse zho psaan xquielntseeb zho wbig zho nëz lo Dios, laa to nëde to gon to diidz niicle ne lo to nu zo tib men ne mazdraa non lo Jonás. <sup>42</sup> Scaque rein ne bzob nëz Sabá, stedquie me to gal dze co, sac tel rein co golwi ganle pa lo guidzliu ne briece me biaadgan me rey Salomón, biadquiaadiag me grë xtiidz Salomón. Ni to lo to nu zo men ne mazdraa non lo Salomón, ni ib ronde to xtiidz me.

<sup>43</sup> Telne csaande to xquielntseeb to i gon, low lozh to. Sac to zig bzhaac tib zha ne psacsi menox. Zeene briece ma zdoo zho, güey ma güeyquianzë ma grë dan zit güeyguib ma dien pa cuëz ma. Gonse ma rdzielid zaatne cuëz ma, <sup>44</sup> rëb ma: “Mazd laa naa gbireque guia naa zaatne brie naa ga.” Zeene biire ma bdziñ ma zdoo zha co, gon ma nroob lugar no, pale tib yu dets, <sup>45</sup> nacne güeyaque ma güeyxi ma zgadz samendox ma, ma ne mazdraa ntseeb blëznie ma zdoo zha co. jDzigole mazdraa mban biaan zha co, lëdlegaa zigne goc zho glo! Scadaa nagon gdzieelo to.

<sup>46</sup> Laa me bii noneeque, zeene laa xniaa me ni zha bets me bdziñ, racladz zho gzodiidznie zho me. Per brieelod nzëeb zho haxta len yu, sac scataa miech guizhiu ne ndxie lo me ga. <sup>47</sup> Dzigo rëb tib zho lo me:

—Laa xniaa luu gon ni zha bets luu quiambëz luu nëz ley, racladz zho gzodiidznie zho luu.

<sup>48</sup> Pquiab me rëb me:

—jXnia naa ye, bets naa ye?

<sup>49</sup> Blis nia me, blu me grë xpëedscuel me, dzigo rëbchaa me:

—Zha ne gon nac zig zha rii, lëe xnia naa ga, lëe bets naa ga. <sup>50</sup> jSac grëse zha ne run mine rnabey Pxoz naa men ne zob gbaa, grëse zha co nac bets naa, nac bzian naa, nac xnia naa!

**Nac Xtiidz Dios zig zhoxtil**

(Mr. 4:1-20; Lc. 8:4-15)

**13** Blozh ga briece Jesús güey me ro nisdoo. Ga zob me, <sup>2</sup> zeene gon me nzian miech ne nocaalsa lo me ga, nacne biepe me güey sob me tib len barcw zo gax ro nis co, psilo me pseed me zho.

<sup>3</sup> Ndal grë ncuane pseed me zho, per niapse con cuent rnee mew lo zho. Lëe tib cuent ne bzodiidz me ga nu, rëb me:

—Tib zha name güey gon zhoxtil. Zeene laa zho quialaa zho co, now bliaa gax ro nëz, now bliaa lad quie, now bliaa len yag guiets. Mine bliaa gax ro nëz ga, güey grë mguin znuse dow maw. <sup>5</sup> Mine bliaa zaatne nac lad quie, znuse znuse blana, <sup>6</sup> per zeene laa lo ngbidz briece, znusaque bgoola, bidzgan; sac guien nroob low. <sup>7</sup> Mine bliaa zaatne nac len yag guiets co, zeene laa yag guiets pxii, bnitlogaw. <sup>8</sup> Sangue mine bliaa zaatne nac lo liu naa, blana, brooba ni goca; lo tib tib zho co no zhimziona briece galptsii zho, now briece tsonga, nogaaw briece haxta tib gayoow.

<sup>9</sup> Blozh ga, rëbchaa me:

—Zha ne racladz guien mine rne naa nu, yquiaadiag zhow.

<sup>10</sup> Zeene laa grë miech co zey, dzigo wbig xpëedscuel me bnabdiidz zho lo me dien pe nac ne sca niapse con cuent rseed me grë miech. <sup>11</sup> Pquiab me rëb me:

—Tel to, Dioszhal rlu lo to zha rnabey me, niicle ncuane mazdraa ngeetsa; laa grëraa miech ne gard gbig lo me, grieelod guien zhow. <sup>12</sup> Sac zha ne noxcole dien zha rnabey me, zdeedraa me guieibiini lo zho guien zhow, laa zha ne noxcoda, mine riense zho, stiche mew. <sup>13</sup> Sca rseed naa zho parne tsoguc zho zha rnabey Dios, per nac zho niicle nzial lo zho rwi zho, per peet ran zho; niicle nzial diag zho per peet rond zho; ib peet riend zho. <sup>14</sup> Lëe mine nac zho i bzeet Isá, zeene znu rëb me:

Nac miech qui, niicle peraa ron zho, per peet riend zho;

niicle rwiraa zho, per peet ran zho.

<sup>15</sup> Ne nlipaa miech nad, miech ndip zdoo nac zho, rrieequia ntse zho diag zho, ntse zho lo zho; parne peet gond zho, peet gand zho.

Ib riend zho zha gbig zho lo naa, ygab zho xnëz naa, parne csilaa naa zho.

<sup>16</sup> Sangue to —rëb Jesús lo zho—. jDichos to porne riend to pe ran to, ni riengaa to mine ron to! <sup>17</sup> Blactaa zha ne biadteed xtiidz Dios padzeela, blactaa zha ne güeyna mine nac diidzli, bzoobladz zho nian zho grë ncuane ran to niina, per bgaad zho nian zhow; bzoobladz zho nquiaadiag zho grë ncuane noquiaadiag to, per bgaad zho nion zhow.

<sup>18</sup> Golquiaadiag sca ganle zha nac xcuent zha ne güey gon ga. <sup>19</sup> Ro nëz ne sca bliaa zho co, sca nac palal miech ne riepaa zha ne rienee Xtiidz Dios lo zho, per riogucd zhow, rlozh ga rdziñaque menox, ri- etiche ma tel palalse mine riend zho. <sup>20</sup> Lad quie ne bliaa spalal zho co, sca nac grë zha ne rley rcaania Xti-



idz Dios; <sup>21</sup> per led dib zdood zho rcaania zhow, gane zeene laa miech rsilo rlëe lo zho, laa miech rtsidil zho porne riladz zhow, rsaanga zhow. <sup>22</sup> Nogaa zho nac zig nac len yag guiets co. Rquiaadiag zho Xtiidz Dios, per rsilo zho lel grë ncuane no lo guidzliu rii mazdraa rionie guic zho, rquidie grë dimi zho. Grë ncuane co rioxcoraa zho, laa ne tsonie Xtiidz Dios guic zho, min co rquiaqui ib rund zho mine rnabey me. <sup>23</sup> Laa liu naal ne bliaal mine scataa goc ga, sca nac grë zha ne dib zdoo rquiaadiag Xtiidz Dios, rien zho zha naca, ni rban zhow zigne rnabeya. Rrieequia grë ncuane run zho, no zho nac zig mzion ne brieegalptsii zho ga, no zho nac zig mine brieegalptsii zho ga, no zho nac zig mine brieegalptsii zho ga, no zho nac zig mine brieegalptsii zho ga.

### Zha nac xquielrnabey Dios

(Mr. 4:30-34; Lc. 13:18-21)

<sup>24</sup> Biire pcaalsa miech lo me stib, dzigo psiloque me pseed me zho con stib cuent, rëb me:

—Ziaad gac xquielrnabey Dios lo guidzliu rii zig bzhaac tib men ne gon zhobxtil. Niapse zhob wen, zhob nal gon me, <sup>25</sup> per no tib zha ne rlëe lo me, gol pcow liu, horne grëse miech nixguies, güey zho güey-laa zho xmidz guizh ncuane zaatne gon me.

<sup>26</sup> Zeene laa zhobxtil co psilo blan mzion, hor coraa blu laa guizh ncuane co no lada. <sup>27</sup> Grë zha ne quia xtsiin me, zeene gon zhow güey zho rëb zho lo me: “Tebaa gan luu ganle, dipse lad xoob luu zëeb guizh ncuane, ¿dieen pa brieew gocbniw ga?” <sup>28</sup> Dzigo rëb me: “Rien naa no cho tib zha ne rlëe lo naa, zha co been dziin co.”

‘Gocladz zho, hor cogazh nielaadz zhow per bzhiguelid me, <sup>29</sup> rëb me lo zho: “Tsielaadzde tow, sac tel glaadz tow niina ye zhobxtil gliaadzniew. <sup>30</sup> Golsaan sca zëeba ga, na zeene laa wlaap gac, hor co gnabey naa zha ne quits zhob, ctogazh zhow gdziin zhow tib lad tseca; lozhraa ga quiits zho zhob, tsasa ga, glansow ro yu.”

<sup>31</sup> Blozh ga bzeet me midz moxtaz, rëb me:

—Nac xquielrnabey Dios zig nac tib midz moxtaz ne ran miech dan rii. Nan to ganle midz moxtaz nac midz ne mazdraa win, <sup>32</sup> ni tel gacbniw, rooba ni lëew roobraa lo grë guizh ne ran zho ro yu, raca lal tib yag nex, haxta rdzin grë mguin rhixcuua ma zhiptsieez ma lo grë zhicwa.

<sup>33</sup> Rëbaque me:

—Nac xquielrnabey Dios zig nac ncobi ne rquiaa men wnaa lad ncob ne riaa quietxtil. Niipaque ncobi riots tson l mud rin, ni dib nacse ncob co rzibe.

<sup>34</sup> Grëse mine pseed Jesús grë miech co, niapse con cuent bnee mew lo zho. <sup>35</sup> Ga brieequia mine bzeet zha ne biadteed xtiidz Dios padzeela, zeene rëb zho: “Niapse con cuent cseed naa miech, sca gnee naa lo zho grëtaa ncuane gard gacnan miech wlal ne bre guidzliu.”

### Zha nac xcuent guizh ncuane co

<sup>36</sup> Blozhse bnee Jesús lo grë miech co guey zho, yeque me laa me zey gza xpëedscuel me. Bdzin zho ro yu, ga bnaab zho lo me siguiel me gnee me lo zho dien zha nac xcuent guizh ncuane ne bzeet me ga. <sup>37</sup> Dzigo rëbcha me lo zho:

—Golgona sca, znu gon nac cuent co. Rrieequia gon naa ga nac men ne gon zhob co. <sup>38</sup> Liu ne bniaaw ga, nac lo guidzliu, zhobxtil co nac grë miech ne nole xnëz Dios, laa guizh ncuane co nac grë zha ne no ladznia mendox. <sup>39</sup> Zha ne güeygan guizh ncuane co, lëe mendox ga. Dze lo wlaap co, gac dze ne gon Dios xquielwxtis me, zha ne tsie wlaap ga, lëe anj ga. <sup>40</sup> Ni zigne sca cuee zho guizh ncuane co lad zhobxtil, gzëeg zhow, scapaa nagon gal dze ne gac xquielwxtis Dios, <sup>41</sup> sxel naa grë xanj naa tsie zho tsiebee zho grë zha ntseeb, zha ne sca runctal xto grëraa miech, lad zha ne no xnëz naa. <sup>42</sup> Grëse zha ntseeb co, hor co laa zho guey lo guidox ne rieguial zho! Ga tso zho goonnë zho, haxta gow lay zho lo guielndox co. <sup>43</sup> Laa grë zha ne güeynal mine nac diidzli, zha co gdzin zaatne rnabey Pxo naa, masaque zig xbiini ngbidz glu zho ga. Zha ne racladz guiena yquiaadiag zhow!

<sup>44</sup> Ziaad gac xquielrnabey Dios zig tib ncuane non ne noliu tib lo xcuaa miech. Zha ne gdziel tib ncuane sca non, ib tedsod zie zho sto zho grëse ncuane rap zho gree dimi si zho liu co, parne gunchen zho ncuane non co.

<sup>45</sup> Zha ne rzëeb lo xquielrnabey Dios ziaad gac zho zig tib zha ne rzi quie perl mine mazdraa niazh.

<sup>46</sup> Zeene ron zho pa no tib perl co, rto zho grëse ncuane rap zho, rie zho rzi zhow.

<sup>47</sup> Nacaque xquielrnabey Dios, zig tib guix nroob ne rgaa mel niina, zeene rsëeb ngooz mel lo nis grë lose mel rtopa. <sup>48</sup> Rlozhse riodzëw, dzigo rbeequia zhow ro nis, garaa rzob zho rbe zho grë mel co; ma ne rquiin laa tib chicuid zole rio ma, laa ma ne rquiind rsëeb zho. <sup>49</sup> Scapaa nagon gac miech gal dze ne gon Dios xquielwxtis me, ziaad grë xanj me cuee zho grë zha ntseeb lo zha ne no xnëz me, <sup>50</sup> tsieron zho zho lo guidox ne rieguial zho. Ga tso zho goonnë zho, haxta gow lay zho lo guielndox co.

<sup>51</sup> Blozhse ga, rëb me lo zho:

—Pe bien to na zha nac grë mine blozh bne naa lo to nu?

Grëse zho pquiab rëb zho:

—Bien now.

<sup>52</sup> Dzigo rëbcha me:

—Tib zha ne rienle zha nac grë ley ne psan Moisés, ni squi guien zho zha nac zhiwseed Dios mine zialnie naa niina, masaque nac zho zig tib zha gol ne quianie chop lo ncuane non lidz zho, quianie zho grë min gol-le ni quianiequegaa zho min cub.

**Güey Jesús ladz me**

(Mr. 6:1-6; Lc. 4:16-30)

<sup>53</sup> Blozhse sca bzodiidz me grë cuent co lo zho, laa me brieë ga zie me nëz ladz me.

<sup>54</sup> Bdziñ me ga güey me yadoo, psilo me pseed me grë miech co. Per nli rzee zdoo zho ron zho grë miñe rnee me, rnabdiidzlsa zho rnee zho:

—¿Pazhe waa squitaa pseed men qui? ¿Zha nac guiełbiini ne squitaa rap me i, ne rnee miech ndal grë milagr ne ruñ me? <sup>55</sup> Tib zhinse ngurëëyag name nac me. Led lëë xingan Marí i, bets me name nac Jacob, nac José, nac Simón ni Judas; <sup>56</sup> grë bzian mew, nu no zho grë zho. ¿Pa dzigo güey me wseed qui?

<sup>57</sup> Ib beençasd zho me, haxta rlëë zho lo me. Zeene goñ me sca rac zho, rëbçhaa me lo zho:

—Zha ne rteed xtiidz Dios, mazd wen rnee miech lo zho stib dan, stib guiedz, lëdle ladz zho ni menlıdz zho ni menładz zho nëd gunbey zho.

<sup>58</sup> Beenđ me nzian milagr ga, sac sca ndip zdoo grë miech co ib nëd zho niladz zho cho nac me.

**Gut Juan Bautist**

(Mr. 6:14-29; Lc. 9:7-9)

**14** Len dze co bin rey Herod (men ne rnabey Galilé) grë ncuaane ruñ Jesús, sac tel pa lotaaw zëeb xtiidz me; <sup>2</sup> dzigo rëb Herod lo grë zha ne ruñ dziin lo me:

—Rien naa lëë Juan Bautist ga quiayun grë miñ co, segur brieëban me.

<sup>3</sup> Sca rnee Herod sac nanwen me zha been me Juan. Me bnabey bgaa Juan bzoob zho Juan caden bio Juan ladzguiib, <sup>4</sup> loxaque ne rnee Juan lo me nonguielđa ga lëëque Herodí ptsieelnia me, sac tsieelpaa bets me Lip nac Herodí. <sup>5</sup> Gocladz Herod niut me Juan, per bdzieb me menguedz, sac rleynie zho Juan, rien zho xtiidz Dios ziadteed Juan lo miech.

<sup>6</sup> Laa tibtaa dzew, lëëtaque noyac zhilni Herod dze ne blozh me stib iz, bded tib xindzoo Herodí squi ndxie grë zha ne zobnie me psilo ndzoo bieë ndzoo. Bdziladz me goñ me zha bieë ndzoo, <sup>7</sup> haxta brieë ro me rëb me: “Ncuaane gacladztaa luu gnab luu, znedz naaw.” <sup>8</sup> Per glole pquiil Herodí ndzoo, nagne rëb ndzoo lo me: “Miñe racladz naa, xoob guic Juan tib len bandej gneedz luuw lo naa niinagazh.”

<sup>9</sup> Zeene bin Herod sca rëb ndzoo, mbanse rac me; per rdeetraaw diidz niab me grieeloda, sac grëse zha ne zobnie me ga, bin zho rëb me zdeed me ncuaane gnabtaa ndzoo. Dzigo racse me pxeel me zha ne güeychug guic Juan len ladzguiib. <sup>11</sup> Zeene wbire zho, zhoobse guic Juan tib len bandej bdeed zhow lo ndzoo, dzigo güey ndzoo güeydeed ndzoo pa lo xniaa ndzoo.

<sup>12</sup> Zeene gocnañ xpëëdsuel Juana, güey zho güeylis zho me ga güeyqueets zho me. Blozh ga güeyzodiidz zho lo Jesús zha bzhaac me.

**Bguiaañ Jesús gaay mil miech**

(Mr. 6:30-44; Lc. 9:10-17; Jn. 6:1-14)

<sup>13</sup> Zeene bin Jesús sca bzhaac Juan, dzigo brieë me ga bzëëb me barcw zie me tib zaatne guieñd miech. Per znuse bien diidza, nzian grë guiedz co zha ne gocnañ, tib ro nis güey zho, glole zho bdziñ zaatne no gdziñ me ga.

<sup>14</sup> Laa me noyet len barcw, zeene blis lo me goñ me laa grë miech guizhiu co ndxie ga; pquia zdoo me zho, beenguiac me grë mguidz ne zienie zho.

<sup>15</sup> Laa dze ziedzelew, wbig xpëëdsuel me rëb zho lo me:

—Mazd gudz lo grë miech qui guey zho na, zeena guiob tsie zho grë guiedz win ne ndxie gax i tsiesi zho ncuaane gow zho; sac goñ laa dze bdzele.

<sup>16</sup> Pquiab me rëb me lo zho:

—¿Pe nagne guey zho squise? To none gdeed ncuaane gow zho.

<sup>17</sup> Rëbçhaa zho:

—¿Per pe dien yguiaañ no zho? Pe rnase gaay guietxtil ni chop mel ne ziaadnie no nu, lo grëtaa miech qui.

<sup>18</sup> Dzigo bnabey me zho güeynie zho guietxtil co, güeynie zho mel co lo me, <sup>19</sup> ni bnabey me grë miech co bzob zho lo grë guizh nguia ne zëëb ga. Horco bzhen me gza guietxtil co ni grop mel co, blis lo me nëz gbaa, bdeed me xquizh lo Dios. Blozhse bdeed me xquizh, beengroł me gza guietxtil co, mel co ne, zigse rdeed mew lo xpëëdsuel me scase scase bdiiz zhow lo grë miech co. <sup>20</sup> Grëse zho dow zho haxta zaatne bieltaa zdoo zho. Miech tafa, zha bguise rgaa zig gaay mil, nanđragaa grë men wnaa, grë mëëđlas; ni zeene blozh dow zho, scase ncuaane nroob biaan, biodzë tsiipchop chicuid bio grë guietxtil co, bio grë mel co.

**Rzë Jesús lo nisdoo**

(Mr. 6:45-56; Jn. 6:16-21)

<sup>22</sup> Zeene blozh ga, bnabey Jesús xpëëdsuel me bzëëb zho len barcw, zeena zienerga zho tedquia zho stib nëz ro nis co; laa me bii blëz ga, nozonëz me grë miech co. <sup>23</sup> Blozhse bzonëz me zho, dzigo güey me tib guic gui zob gax ga, güeyzodiidznie me Dios, tipse me zo ga laa liu pcow.

<sup>24</sup> Horco laa barcw ne zie xpëëdsuel me ga no lo nis co, ib gacd csëëniob zhow, sac rrieë me rtsire mew, nëzrii nëzrec raca lo nis. <sup>25</sup> Merle guini liuw, tibaque zeene laa me bdziñ zaatne zie zho ga, tib lo nis co ziezë me.

<sup>26</sup> Zeene goñ zho laa men co sca ziaad-zë lo nis co, bdzieb zho, broptsie zho rnee zho:

—Tib ndziin i goñ ziaad i!

<sup>27</sup> Dzigo bnee me lo zho rëb me:

—iGdziebde to, naa zial nu!

<sup>28</sup> Pquiab Pedr rëb Pedr:

—Telne luu i ziaad i, bneedz diidz së naa lo nis glanso naa lo luu i.

—iDë sca! —rëb me.

Lëëlëd biet Pedr leñ barcw, laa Pedr ziezële lo nis co<sup>30</sup> zeeñe goñ Pedr scataa rlis me low, bdzieb Pedr. Tibaque zeeñe bien Pedr laa Pedr nodedquiele low, hor co broptsiedan Pedr, rbedz Pedr me, tsiebee me Pedr ga.

<sup>31</sup> Dzigo wbig me bzheñ me nia Pedr, bzoli me Pedr lo nis co.

—¡Aque luu goñ Pedr! —rëb me—. ¿Pe nacne goc-chop guic luu? ¿Gard goñ gliladz wen luu cho nac naa?

<sup>32</sup> Zeeñe laa me biepnie Pedr leñ barcw, laa me co blëz. <sup>33</sup> Grëraa zha ne no leñ barcw ga, rleynie zho me, rzee zdoo zho rnee zho:

—¡Nasi nagon ndion no nli Xpëëd Dios nac luu!

<sup>34</sup> Zeeñe bdziñ zho stib nëz ro nis co, zaatne rnee zho Genesaret, ga biet zho barcw. <sup>35</sup> Grë miech co zeeñe gocnañ zho laa me bdziñ ga, znuse znuse pxoon zho diidz grëraa guiedz ne ndxie gax ga. Dzigo brieë grë miech co, güeynie zho grë meñ rzacné lo me, <sup>36</sup> rnab zho lo me siguiel me maase ni xabse me xeñ grë meñ rzacné co. Grëse zha ne bzheñ ni xab me, biac zho.

### Ncuaaḡe ruñctal xtoḷ miech

(Mr. 7:1-23)

**15** Tib dze, bdziñ bla zha farisé ni zla maistr ley ne ziaad nëz Jerusalén, lo Jesús; rëb zho lo me:

<sup>2</sup> —¿Pe nacne dieñ zianaḷd xpëëdscuel luu miñe blu xmeḡol ne, pe nacne zeeñe laa zho row, ib rguibd zho nia zho zigne nopaa tsara?

<sup>3</sup> Pquiab me rëb me lo zho:

—¿To waa, pe nacne quiaguiits to xley Dios? Goḷguien gañle laa ne guñ to miñe rnabey Dios zigne naca, leḷ ncuaaḡe blu xmeḡol to, miñ co zianaḷ to.

<sup>4</sup> Led znu goñ rnee lo xley Dios: “Goñ pxoz luu, goñ xniaa luu”, ni rneew: “Zha ne quie pxoz, quiegaa zho xniaa zho, ib none guet zho.” <sup>5</sup> Laa to goñ rnee to:

“Peet nacda guñd zho xyudar xmeḡol zho niicle no me liaadz, totsaque gdeed zho gon.” <sup>6</sup> Tib lad rsañ to xley Dios, miñe blu xmeḡol to miñ co noxcoraa to.

<sup>7</sup> ¡Loxaque guielwquidie qui no to! Rquiaalo to miech wen nac to, per lëppaa miñe ruñ to i ga bzeet Isá zeeñe rëb me:

<sup>8</sup> Grë miech rii, rquiaalose zho ruñnon zho naa, rond zho diidz guñ zho miñe rnabey naa.

<sup>9</sup> Zhlëse nac grë ncuaaḡe ruñ zho, rnee zho laa zho ri-aadgañ naa;

sac niapse guicle zho riab grë wseed ne quialu zho lo miech.

<sup>10</sup> Dzigo bnee me lo grë miech ne ndxie lo me ga, rëb me:

—Goḷquiaadiag miñe gni naa lo to nu, ni goḷtsoxco guien to zha naca. <sup>11</sup> Goḷgacnañ gañle, grë ncuaaḡe rdziñ zdoo miech, led miñcod ruñctal xtoḷ zho; sinque grë ncuaaḡe ntseeb ne rza guic zho, diidz ntseeb ne rrieë ro zho, miñ co ruñctal xtoḷ zho.

<sup>12</sup> Horco wbig xpëëdscuel me, rëb zho:

—¿Pe bien luu gañle blëë zha farisé goñ zho sca rëb luu lo zho?

<sup>13</sup> Pquiab me rëb me:

—Grëse yag ne squi beenbnid Pxoz naa meñ ne zob gbaa, ib none laaw gliaadz zolo zolow. <sup>14</sup> Goḷsaan zho, nli zha noseed miech per nac zho zig nac zha ne roḷd lo. Ni nañle to gañle, teḷ tib zha ne sca roḷdle lo ni xeñaque zho nia stib zha ne rañd, zaatne nac tib leñ blë, ib tedsod grop xcuaa zho tsietsobe ga.

<sup>15</sup> Bdedse ga, wbig Pedr lo me rëb Pedr:

—Bzhiguiel bnë lo no dieñ zha nac diidz ne në luu ga, ne rnee luu led ncuaaḡe rowd miech ruñctal xtoḷ zho.

<sup>16</sup> Pquiab me rëb me:

—¿Pe niicle to rienḡaquew dzigo lëë? <sup>17</sup> ¿Pe rienḡe to grë ncuaaḡe row miech, led miñcod ruñctal xtoḷ zho? Sac grë ncuaaḡe row zho rdziñda leñ zdoomban zho, zhaa zaatne rdziña; tib rietedsew xcuerp zho, rlozh ga rrieegaw. <sup>18</sup> Saḡue grë diidznë ne rrieë ro zho, zdoomban zho ga rzaw, ni lëë miñ co nac miñe ruñctal xtoḷ zho. <sup>19</sup> Zdoomban zho nac zaatne rza grë ncuaaḡe ntseeb ne ruñ zho, zig nac:

zeeñe rio zho grë zhgab yozh,

zeeñe rut zho samiech zho,

zeeñe rionie zho zha ne nole tsiel,

zeeñe rionie zho zha ne nacd tsiel zho,

zeeñe ruñ zho guielgbaan,

zeeñe lega rnexuu zho samiech zho,

zeeñe rneenë zho samiech zho.

<sup>20</sup> Grë ncuaaḡe ntseeb co nagon nac miñe ruñctal xtoḷ miech, guñctald zho xtoḷ zho niicle tsard nia zho zigne nacpaa grë zhiwseed meḡol.

### Biac xpëëd tib wnaa zit

(Mr. 7:24-30)

<sup>21</sup> Ga brieë Jesús, güey me haxta nëz Tiro ni nëz Sidón.

<sup>22</sup> Nëz co no me güey tib wnaa ne ziaad lo xtii zha Canaán lo me, nguiedz zëëb tsi wnaa co rnab me lo Jesús siguiel Jesús tsiegunḡuiac tib xpëdwanaa me nosacsi meḡox. <sup>23</sup> Per ib pquiabd Jesús lo xtiidz wnaa co, dzigo wbig xpëëdscuel me, rëb zho:

—Mazd bzhiguiel pquiaadiag miñe rnee wnaa qui, bui gañle zha ncuëtaa zëëb tsi me naḷ me zhits ne.

<sup>24</sup> Pquiab Jesús rëb me:

—Ziaḷd naa par guñ naa xyudar zha zit, sinque laa Pxoz naa pxeel naa par guñ naa xyudar grë zha Israel ne rzac zig grë mëcwxiil ne zonziaab lo xbaxtor.

<sup>25</sup> Scaque nonee me laa wnaa co wbig pquiitsgzhil lo me.

—Bzhiguiel —rëb me—, been tib guielnzaac been xyudar naa.

<sup>26</sup> Rëbchaa Jesús lo me:

—Nonguielḡa goñ, cob ne quiet ne no nia mëëd gdeed new lo mëcw.

<sup>27</sup> —Nliw, scaw —pquiab wnaa co—, per niicle mëcwa name rsaanaque bizhuan ma rbig ma row ma miñe rrieengaa nia mëëd.

<sup>28</sup> Horco pquiab Jesús rëb me:

—¡Squiw nagon! ¡Rlu nli dib zdoo luu rnaloo luu naa! Gacxe waa miñe r nab luu i guñ naa, niinagazh laaw gac.

Horcogazh biac xpëed wnaa co.

### Nzian miech ne beenguiac Jesús

(Mr. 8:1-10)

<sup>29</sup> Nèz co wbi Jesús bdziñ me ro Nisdoo Galilé.

Ro nis co no me, miech guizhiu ne pcaalsa lo me. Tib dze gon me scataa nzian miech co, dzigo güey me güey sob me tib guic gui win zob gax ga. <sup>30</sup> Ga zob me rdziñ grë miech co rdziñnie zho grë zhimguidz zho lo me, no zho zienie grë zha ne në ni, no zho zienie grë zha ne rold lo, grë zha ne guiñd tib nia, grë zha ne guiñd tib ni, grë zha ngop, ni grëragaa zha ne rlan pe stib guiñguidz; grëse zho beenguiac me. <sup>31</sup> ¡Ncuaane gzee zdoo ne goc ga! Grë zha ne ni tib diidz gard gnee, per nli rley zho laa zho psilo rnee; grë zha ne guiñd tib ni, guiñd tib nia, laa ni zho laa nia zho biaan zigne no gaca; grë zha ne rgob ni, haxta rias zho laa ni zho goc-wen; grë zha ne rold lo, rlozhd gzee zdoo zho grë ncuaane ran zho. Grëse miech ne ndxie ga, rzee zdoo zho, rley zho roolnie zho Dios.

<sup>32</sup> Dzigo bredz me xpëedscuel me rëb me lo zho:

—Rquia zdoo naa grë miech rii. Nadzele rac tson ng-bidz blanso zho lo ne nu, ni na quianiedraa zho pe gow zho. Teñe squise gzonëz naa zho, nend pa lo zie zho nëz ycow zho.

<sup>33</sup> Pquiab zho rëb zho:

—¿Per pe yguiaan ne zho? ¿Pa guioxi ne guiñwagw ne yquiiñ grëtaa miech qui dan rii, naca zaatne guiñd miech?

<sup>34</sup> Dzigo bnabdiidz me lo zho, rëb me:

—¿Bla quietxtil ziaadnie to i?

—Gadzaquew no —rëb zho—, ni chop tson meñ win.

<sup>35</sup> Dzigo bnabey me grëse miech co bzob zho lo liu.

Blozh bzhene me gza gadz quietxtil co, ni gza meñ co, bdeed me xquizh lo Dios; blozhse bdeed me xquizh, zigse rungroñ me quietxtil co scase scase rdeed mew lo xpëedscuel me rguiz zhow lo grë miech co; scaque beñ me gza meñ co.

<sup>37</sup> Grëse miech co dow zho haxta zaatne bieltaa zdoo zho. Miech guizhiuw, zha bguise rga zho maase tap mil, nantragaa grë meñ wnaa, grë mëedlas; ni zeene blozh ga bii biodzë gadz chicuid bio grë miñe biaan.

<sup>39</sup> Blozhse bnee me lo grë miech co, blozhse bzonëz me zho, dzigo laa me bzëeb leñ barcw zie ne nëz xtan zha Magdal.

### Gocladz zha farisé niungüet zho Jesús

(Mr. 8:11-21; Lc. 12:54-56)

**16** Magdal no Jesús, bdziñ bla zha farisé ni zla zha saducé lo me, gocladz zho niungüet zho me dien pe nxiñd me tib diidz, pe tib ncuaane nonguiñdgaa niuñ me. Rquiaalo zho r nab zho lo me guñ me pe tib milagr, zeña gliladz zho nli Dios pxeel me.

<sup>2</sup> Dzigo pquiab me rëb me lo zho:

—¡Pe nli paa rnee to riende to zha nac grë ncuaane noyac leñ dze rii! Zha zëeb dzigo runbey to pe rlu lo xcow. Zeene ran to rquia xcow nizhnie bdze dze, riende to quiet stib dze co zriee lo ngbidz. Sil ne rangaa to quia xcow nizhnie, quia xcow nlaan zhan gbaa, riende to guixoo guiab dze co. <sup>4</sup> Nazdpaa ntseeb to, squitaa gocndip zdoo to nëz lo Dios, ¿zha rnaraa milagr ne racladz to gan to? Stibaque milagr gon gan to, tib miñe gac zigne bzhaac Jonás.

Blozhse sca rëb me lo zho, zoque zho ga, ziega me.

<sup>5</sup> Zeene briee zho ga, zoladz xpëedscuel me ney zho quietxtil ne niow zho. <sup>6</sup> Lega nacle psilo me nonee me lo zho, rëb me:

—Golguien gon, napaa noyab to lo zhincobi zha farisé, lo zhincobigaa zha saducé.

<sup>7</sup> Zeene gon zho sca rëb me, rneechaa zho:

—Porne nagon ziaadnie ne quietxtil, gane squi rnee me lo ne.

<sup>8</sup> Bien me sca nonee zho, dzigo rëb me lo zho:

—¡Gardaque lëe guiñ to cho nac naa! ¿Pe nacne tso to zhizhgab quietxtil? <sup>9</sup> ¡Ni lalnu lëe peet riende to! ¿Pe rsoladzde to zeene gaayaque quietxtil bguiaan ne gaay mil miech, bla chicuida biaan? <sup>10</sup> Scaque zeene gadzaque quietxtil ni bgaaw dow tap mil miech, ¿pe niicle miñ co rsoladzdraa to? <sup>11</sup> ¿Zha nac dzigo rzac to quietxtil nozet naa? Golguien ganle zhincobi zha farisé, zhincobi zha saducé ni naa.

<sup>12</sup> Dzigoraa bien zho led ncobidpaa rzeet me, sinque rëb me lo zho gap zho cuidad lo zhiwseed zha farisé, lo zhiwseedgaa zha saducé.

### Bnee Pedr cho nac Jesús

(Mr. 8:27-30; Lc. 9:18-21)

<sup>13</sup> Bdziñ Jesús nëz xtan zha Cesarea de Filipino grë xpëedscuel me, nëz co no me bnabdiidz me lo zho rëb me:

—¿Cho dien ron to rnee miech nac naa?

<sup>14</sup> Pquiab zho rëb zho:

—No zho rnee Juan Bautista, no zho rnee Lív, no zho rnee Jeremíw, meñ ne biadteed xtiidz Dios padzeela; nogaa zho rnee no cho stib meñ ne ziadteed xtiidz Diosa zig biaan zha ne biaan padzeela.

<sup>15</sup> Dzigo rëb me lo zho:

—¿To waa? ¿Cho rzac to nac naa?

<sup>16</sup> Pquiab Pedr, rëb Pedr:

—¡Luu nac Meñ ne zëeble diidz ga cxeel Dios! ¡Xpëed Dios nac luu!

<sup>17</sup> Dzigo rëbchaa me:

—Dichos luu Simón (xingan Jonás) briee diidz qui ro luu, sac gon Pxoz naa meñ ne no gbaa, meñ co bneedz guiñbiini qui lo luu, nacda ncuaane cho miech nëw lo luu. <sup>18</sup> Ye naa gon niina laa naa gni ganle cho nac luu, luu nac zig tib quie, ni quie ne gon squi nac gzhixcuaa naa xyadoo naa; tsod zha ne grieelo gnitlo yadoo co, per ni guiñgut gnitloda. <sup>19</sup> Laa naa rzo luu, luu gnee Xtidz naa lo miech zeena gacnan zho zha grieelo yгаа zho zaatne rnabey Dios; luu gac zig tib zha ne rey liow, tel zha cow, zha zac cxal ro yu, ni zha zac csiooga.

<sup>20</sup> Dzigo pso me diidz lo zho choot lo gneed zho, me nac Men ne zëëble diidz ga cxeel Dios.

### Bzeet Jesús zha guñ miech me

(Mr. 8:31-9:1; Lc. 9:22-27)

<sup>21</sup> Len dze co psilo Jesús bzeet me lo xpëëdsuel me zha csacsi miech me. Rëb me nroob ncuaane cteed zho me, zeene laa me tsie Jerusalén; grë zha non lo menquiedz, grë pxoz ne rnabey, grë maistr ley, ible st-sidił zho me ni haxta zut zho me; per zeene gac tson ngbidz gut me, laa me griebean.

<sup>22</sup> Gon Pedr zha rnee me, dzigo bredzaque Pedr me blisqui Pedr lo me dien pe nacne rnee me laa me guet. <sup>23</sup> Zeene bin mew, zoque Pedr ga, biecw me rëb me:

—¡Biche lo naa nu menodox! ¡Loxaque no luu par gunğüet luu naa! Zienied guic luu miñe rnabey Dios, sinque miñe rleynie miech, miñ co zienie guic luu.

<sup>24</sup> Dzigo bnee me lo zho, rëb me:

—Zha ne racladz sëëb xnëz naa, none cueeladz zho zho, none lëb zho guiaadnal zho miñe rnabey naa, nicle tel miñ co yquiaaqui csacsi miech zho. Nodne yquia zdoo zho xquielmban zho, <sup>25</sup> sac zha ne yquia zdoo xquielmban, lel znu nitlo zho; sangue zha ne sca cueeladz xquielmban porne no zho xnëz naa, ib zgaa zho tib guielmban ndzon ne gdziñd dze lozh. <sup>26</sup> Zha ne zienie guic loxaque gapchen, ¿pa dien yquiina lo zho, tel lëw yquiaaqui guey zho gabił? ¿Niacxe zrieelo gdziib zho dimi, laa zho len gabił? <sup>27</sup> Naa ne nac naa Mgui ne pxeel Dios, dzidiñ dze ne gbiire guial naa stib, guialnie naa grë xanjł naa, glu naa ganle pa lotaa men nroob nac Pxoza naa; dze co gded naa miñe tsieguial tib tib miech, tel zha wban zho. <sup>28</sup> Ib tedsod lo grë zha ne ndxie nu niina, bii no zha ne gan ganle, zeene laa naa csilo gnabey lo guidzliu rii.

### Bdzëëlo Jesús

(Mr. 9:2-13; Lc. 9:28-36)

**17** Goca xoop ngbidz, bredz Jesús Pedr, Jacob ni Juan bets Jacob güeynie me zho tib guic gui glaa.

<sup>2</sup> Guic gui co no zho, zeene gon zho laa me bdzëëlo. Masaque biinidoo rriee lo me, pale lo ngbidz; xab mew, per nli rquiabniw, masaque biini ne rrona.

<sup>3</sup> Tibaque zeene gon zho laa Moisés ni Lí men ne biadteed xtiidz Dios padzeela, nozodiidznie me. <sup>4</sup> Rdzieb zho, lo dzeb co brieer ro Pedr rëb Pedr:

—Maestro, ¿tebaa zha grieelo guiaan ne nu! Telne racladz luu, na maase gzaa no tson yu yag xiid nu, tiba cuëz luu, tiba cuëz Moisés, stiba cuëz Lí.

<sup>5</sup> Scaque nonee Pedr, zeene znuse pquia tib xcow ngali zaatne zo zho ga, masaque biini ne rron xcow co, lo xcow co bin zho zëëb tsi tib men co, rnee me:

—Lëë xpëëd naa i gon, rleynie naa me, rzac zdoo naa miñe quiayun me. Miñe rnee me, golgona.

<sup>6</sup> Mazdraa bdzieb zho bin zho sca rnee men co, lëëlëd pquiitsgzhib zho haxta bdziñ lo zho lo liu. <sup>7</sup> Dziggo wbig Jesús, pcaañnia me zho, rëb me:

—Goljsoli, gdziebde to.

<sup>8</sup> Zeene blis lo zho bui zho, mese zo ga, gon draa zho schop men co.

<sup>9</sup> Blozhse ga, laa zho wbi ga. Cho gui co ziad-zëëbnie me zho, pso me diidz lo zho miñe gon zho ga, choot lo gzodiidz zhow, nieeda gal dze ne laa me briebean.

<sup>10</sup> Dzigo bnabdiidz zho lo me, rëb zho:

—¿Bay zha nacne rnee maistr ley, glo Lí no guiaad stib, dzigora guiaad Men ne zëëble diidz ga cxeel Dios?

<sup>11</sup> Rëbchaa me:

—Nliw, ible nacle diidz ne glo Lí guidseed miech gon zho xtiidz Dios. <sup>12</sup> Ni gacnañ to ganle laa me biaadle, per beñbeyd miech me, lel psacsi zho me beñ zho me miñe gocladztaa zho; ni ib tedsod gon, scaque csacsi zho Mgui ne pxeel Dios.

<sup>13</sup> Zeene blozh sca rëb me, dzigo bien zho Juan Bautist ga rzeet me.

### Biac tib mëed ne nosacsi menodox

(Mr. 9:14-29; Lc. 9:37-43)

<sup>14</sup> Zeene blozh biet zho cho gui co, gon zho miech guizhiu ndxie ga quiambëz Jesús. Lad co brieer tib mgui, wbig me lo Jesús, pquiitsgzhib me lo Jesús, rëb me:

<sup>15</sup> —Laa naa rnab lo luu, bzhiguieł beñguiac xpëëd naa, nrooble nosacsi guidz gutye win. Blactaa ziyobe win lo gui, ziyobe win lo nis ne. <sup>16</sup> Blansonie naa win lo xpëëdsuel luu nu, per rrieelod zho gunguiac zho win.

<sup>17</sup> Dzigo rëbchaa Jesús lo xpëëdsuel me:

—¡Pe na squitaa miech ntseeb nac to, ib nëde to gnalo to Dios! ¿Palal tiemp ne so naa gne naa lo to? ¡Ncuaane cxcwdraa naa lo to squi nac to! ¡Gol'tenie mëed qui nu!

<sup>18</sup> Dzigo goctox Jesús lo menodox ne nosacsi mëed co, beñcxoon me ma, hor cogazh laa mëed co biac.

<sup>19</sup> Haxta wbiraa zho ga, wbig zho lo me bnabdiidz zho dien pe nacne brieelod zho niuñcxoon zho menodox ne nosacsi mëed co. <sup>20</sup> Dzigo rëbchaa me:

—Brieelode to niuñcxoon to ma, sacne rnalode to Dios. Tel niaca miñe rnalole to Dios siquier palal yeen, gzoob ne siquier lal tib midz moxtaz, niicxe ncuaane mazdraa ngañ gnab to lo me, zun mew; tsod ncuaane grieeelod gun to.

### Bzeet Jesús laa miech csacsi me

(Mr. 9:30-32; Lc. 9:43-45)

<sup>22</sup> Xtan zha Galilé no zho, tib dzew rëb me lo zho:

—Naa ne nac Mgui ne pxeel Dios, ib znaaz miech naa, <sup>23</sup> haxta zut zho naa; per zeene gac tson ngbidz gut naa, zriebaan naa.

Zeene bin zho sca rnee me, bio zho guiełnë, mbanse rac zho.

<sup>24</sup> Bdziñ me guiedz Capernaum, loxaque bzëëb me lad guiedz, laa zha ne rtop dimi ne razh yadoo wbigle lo Pedr, bnabdiidz zho dien pe rguizh me dimi co. Pquiab Pedr rëb Pedr lo zho:

<sup>25</sup> —Rguizh mew, ¿pe nacne quizhd mew?

Zeene bdziñ zho leñ yu ne rbëz me, gardle guiab Pedra lo me, glome me bnabdiidz rëb me lo Pedr:

—Zig nac dimi ne razh lo men ne nac rey dien, ¿pe ye xpëed me rguizha, te loxaque zha zit rguizha ye?

<sup>26</sup> Pquiab Pedr rëb Pedr:

—Zha zitse rguizha.

—Nligaa sca naca —rëb Jesús—. Zha ne nac mëed nodne quizh zho, <sup>27</sup> per par guiabd zho rdziond ne didz, güey güeyron xanzuel luu lo nis. Meļ ne gloopaa ygaa low, bzhen ma pxal ro ma, ga gdziel luu dimi; dimi co güeynie bdiizh miñe no dizh ne grop ne.

### ¿Cho nonraa?

(Mr. 9:33-37, 42-48; Lc. 9:46-48; 15:3-7; 17:1-3)

**18** Leñ dze co bnabdiidz xpëedscuel Jesús lo me, dien cho tib zho gac zha ne mazdraa gacnon lo grë zha ne no xnëz Dios.

<sup>2</sup> Dzigo bredz me tib mëedbgui win, bzo me win glowtaa lo zho, <sup>3</sup> rëb me:

—Gneli naa lo to ganle, telne csaande to xquielntseeb to, telne gacnguudzladzde to, gac to zig mëedwin rii, per ni xnëz Dios grieelod sëeb to. <sup>4</sup> Zha ne racladz gac zho zha non, none gac zho tib miech ndooladz, none gac zho zig tib mëedlas. <sup>5</sup> Miech ne gacnie zha ne sca nac, zha ne rleynie naa, rriequia naale ga racnie zho.

<sup>6</sup> Per miech ne yquiił zho guñctal zho xtoł zho, įprob-saxe zha co! Mazd zhi guielnëw lo zho ygadoo tib quie molin zhoxtil yañ zho tsieron zho zho nisdoo. <sup>7</sup> ĮNac lo guidzliu rii, runfalte guielntseeb low! Runfalte ncuaañe guñctal xtoł miech, įper probsaxe zha ne yquiił zha ne nole xnëz naa, guñctal zho xtoł zho!

<sup>8</sup> Golguien telne tib nia to, tib nigaa to rquiaqui runctal to xtoł to, gołtichgazha. Peet nacda maase tibaque ni to, tibaque nia to zob totsaque ygaa to guielmban ndzon ne gdziñd dze lozh, lëdle zob gropa ni laa to guey gabil, lo beldox ne gdziñd dze guiuu. <sup>9</sup> Scaque bziaalo to, miñe rquiaqui runctal to xtoł to, gołtichgazha, peet nacd maase tibaque lo to zob totsaque ygaa to guielmban ndzon ne gdziñd dze lozh, lëdle zob gropa ni laa to guey lo beldox ne nac gabil.

<sup>10</sup> Įb guñde to csañwin to grëraa zha ne no xnëz naa, zha ne nac zha mban, sac gon non zho lo Dios, anjł ne quianap zho, tibaque zo me lo Pxoz naa men ne zob gbaa.

<sup>11</sup> Įziuu miech lo Dios, tel naa ne nac naa Mgui ne pxeel me, ib laa naa zial zialsilaa naa grë zha ne zonzi-aab lo me.

<sup>12</sup> Rzac Dios miech zig tib men ne rquianë zdoos xpëcwxiil. Telne quianie zho tib gayoo ma, ni gziab tib ma, led zëeb lëe rsañ zho stapgal tsiimtap ma ne zo lo zho, rbire zho rieguib zho ma ne bziaab ga. <sup>13</sup> Zeene rdziel ma lo zho, rlozhd gleynie zho ma, lëe ma rac guielbley que grëraa xcompañer ma. <sup>14</sup> Scadaa nagon rzac Pxoz naa miech, grë zha ne nole xnëz me, ib racladz me gziab zho.

<sup>15</sup> Golguien sca, tib tib to zeene cho tib zha ne nac grë to guñ pe tib falt lo to, gołtsie gołtsienee lo zho;

gropse to gołzodiidz pe nac miñe pxin zho. Telne siguiel zho guiaañ to mpas, laa to beenle gan ga gneewen to stib. <sup>16</sup> Laa telne nëd zho, dzigo gołguib tib zha ne së, chopgaa zha ne së gan ganle zha rac zho. <sup>17</sup> Tel nice scaw nëdaque zho guiaañ to mpas, dzigo mazd gołguiab lo grëse zha ne nacgrë to gnee zho lo zho. Telne niicle xtiidz zha co nëd zho gon zho, dzigotaa mazd gołsaan zho, sacdraa to bets to ga, gołcuae zho lad to, gołsac zho zig rzac miech grë zha ne zianał guielntseeb.

<sup>18</sup> Gneli naa lo to ganle, grëse zha ne gon xtiidz to zeene rnee to lo zho gac-wen zho, scagaa Dios scaania me zho; per zha ne gonda, ycaaniad me zho.

<sup>19</sup> Įni racladz naa gacnañ to ganle, grë zha ne no xnëz naa, niicle tib nëzaque zho, per telne tipse rac zho, ncuaañe gnabtaa zho lo Pxoz naa men ne zob gbaa, zdeed mew. <sup>20</sup> Sac zeene rcaalsa zho roolnie zho naa, ga zo naa lo zho; niicle maase chopaque, tsonaque zho.

<sup>21</sup> Dzigo wbig Pedr rëb Pedr lo me:

—Zha ne sca dzigo guñ falt lo naa, ¿blataa vuel no guñ naa zho perdon? ¿Gadztaaw lëe?

<sup>22</sup> Pquiab me rëb me:

—Lëda gon Pedr, led loxaque gadzse vuelta. Tel blataa vuel guñ zho falt lo luu, none guñ luu zho perdon.

### Zha ne beend perdon

<sup>23</sup> Grë zha ne no xnëz Dios, ib none guñ zho perdon samiech zho.

Įtib rey name, tib dzew bredz me grë zha ne rquia dziin lo me, par dien zha quiayun zho dziin. <sup>24</sup> Loxaque psilo me, zeene laa xcuent tib zha co blozh brie, nroob briequia zho lo me; <sup>25</sup> par quizh zhow, peet nzhen zho. Dzigo bnabey me to zho grop tsiel zho, xpëed zho ne, ni grëse ncuaañe rap zho, parne grielo gazh xquielqui zho. <sup>26</sup> Zeene gon zho sca rëb me, pqui-itsgzhib zho lo me, rëb zho: “Įbeen guielnzaac, gop tib paciens, na dien zha guñ naa quizh naa xquielqui naa lo luu!” <sup>27</sup> Gon me zha rac zho, pquia zdoo me zho, psilaa me zho, beenquizhdaque me zho xquielqui zho.

<sup>28</sup> Loxaque brie zho ga, bdziel zho tib zha ne nzëeb palal yeen dimi lo zho, tib zha ne rquiaque xtsiin rey cow. Zigne gon zho zha co, zolinëz wbig zho bdie zho yañ zho, rnab zho gagazh quizh zho xtimi zho.

<sup>29</sup> Dzigo pquiitsgzhib zha co lo zho, rnab zho siguiel zho gap zho paciens, dien zha gaclø dimi co quizh zhow. <sup>30</sup> Pe nquiaadiag zho ga, bnab zho bio zha co ladzguib, haxta bdiizh zho dimi ne zëeb zho ga.

<sup>31</sup> Grëraa zha ne rquia dziin lo rey co, zeen gocnañ zhow, bdeednë zho, güey zho güeyzodiidz zhow lo me.

<sup>32</sup> Zeene bin mew, bnabey me gocredz zho, goctox me lo zho rëb me: “ĮPe clas miech nac luu! Pe rsoladz luu zha rac luu bnab luu pquia zdoo naa luu, haxta beenquizhd naa luu guielquidox ne zëeb luu ga. <sup>33</sup> ĮPe nacle pquiad zdoo luu zha co, zigne pquia zdoo naa luu?” <sup>34</sup> Blëe me gon me sca been zho, bnabey me bio

zho ladzguiib, haxta blozh bdiizh zho grëse xquielqui zho.

<sup>35</sup> Scadaa nagon guñ Pxoż naa to, telne guñde to samiech to perdon, tel pe nac falt ne guñ zho lo to.

### Zha ne rsëbtsieel (Mr. 10:1-12; Lc. 16:18)

**19** Blozhse sca bnee Jesús lo zho, brieenie me zho ga güeyted zho grë guiedz ne ndxie xtan zha Judé, grë miñe riaañ nëz dan ro guiubee Jordán, nëz ne rlan ngbidz. <sup>2</sup> Miech guizhiu ne rriee grë guiedz co, rdziñ lo me; grë meñ rzacné ne rdziñnie zho, beenguiac me zho.

<sup>3</sup> Ga no me, bdziñ bla zha farisé gocladz zho ni-ungüet zho me, par dien pe nxiñd me tib diidz; bñabdiidz zho lo me rëb zho:

—Pe gnë luu dien, ¿pe wena csëbtsieel zha bgui ne gacladztaa csëbtsieel?

<sup>4</sup> Pquiab me rëb me:

—¿Mod rande to zha zhobnee lo Xtiidz Dios? Lo co zhobnee ganle zeene psañ me miech, tib nëz zho psañ me, tib mgui ni tib wnaa. <sup>5</sup> Ni rneew, ib none grieezhaa mgui lo pxoz zho, lo xniaa zho par gbannie zho wnaa ne nac tsieel zho, gac zho tibaque miech grop zho.

<sup>6</sup> Nligaa nacdreaa zho chop miech, sinque laa zho rac tibaque. Dios nac meñ ne psañ ycatsieel miech, cho dzigo nac miech par quiits zho miñe rnabey me.

<sup>7</sup> Dzigo rëb zho lo me:

—¿Pex nac dzigo waa bdeed Moisés diidz csëbtsieel mgui ne racladz csëbtsieel? Rëb Moisés, zac csëbtsieel zho, totsaque yquia tib guits gdeed zho lo wnaa za-atne raquiet laa zho psaan wnaa.

<sup>8</sup> Pquiabchaa me rëb me:

—Ne squitaaxe waa miech nad, miech ndip zdoo goc xmençol to, gane bdeed Moisés diidz csëbtsieel zho; sanque Dios psañd me diidz csëbtsieel miech. <sup>9</sup> Gacnañ to ganle, zha ne csëeb wnaa ne nac tsieel zho, ni tel peet guielyozh beenç wnaa co, dol ga guñ zho csëeb zho tsieel zho ycaa zho stib wnaa. Scaquegaa mgui ne ycaa wnaa ne psëeb zho ga, dol ga guñ zho sac goñ no tsieel wnaa co.

<sup>10</sup> Dzigo rëbchaa xpëedscuel me:

—Tel scataa nac xcuent guieltsieel, mazd lëeqew dzigo ctsieelniad ne.

<sup>11</sup> Pquiab me rëb me:

—Nligaa no mgui ne rtsieelniad, per zhis zho, ni no pe nacne sca riaañ zho. <sup>12</sup> No zho desde rac zho mëed, nacd zho zha ne grieeo tsonie wnaa; no zho ib miech sca rsañ zho. Nogaa zha ne ib zha rbeeladz zho ctsieelniad zho, parne grieeo tsoxcora zho guñ zho xtsiñ Dios. Zha ne sca rquiabladz ctsieelniad, maase ctsieelniad zho.

### Beenlay Jesús mëedlas (Mr. 10:13-16; Lc. 18:15-17)

<sup>13</sup> Ga no Jesús, ndal zha ne bdziñ bdziñnie zho xpëedlas zho lo me, parne cxobnia me guic win guñlay me

win. Grë zha ne nac xpëedscuel me, lel psilo zho rtsidil zho pe nacne nodziñnie zho grë mëedlas co lo me.

<sup>14</sup> Zeene goñ me sca quiayun zho, rëbchaa me lo zho:

—Ctsirede to grë mëedlas yeen qui, gołsaan guiaad win lo naa. Sac goñ grë mëedlas yeen, ni zha ne nac zig nac win, zha co nac zha ne sëeb ygab lo Dios.

<sup>15</sup> Dzigo psilo me pxobnia me guic grë mëedlas yeen co, beenlay me win. Blozhse ga, laa me briece ga.

### Bzodiidznie tib zha ricw Jesús (Mr. 10:17-31; Lc. 18:18-30)

<sup>16</sup> Laa me zieriee ga, zeene bdziñ tib mgui nguieg, tib zha ricwa, rëb zho lo me:

—Nañ naa luu nac tib meñ ne noseed miech, ni tib meñ wen nac luu. Bñe dien, ¿pe nac miñe guñ naa parne grieeo ygaa naa guielmban ndzon ne gdziñd dze lozh?

<sup>17</sup> Pquiab Jesús rëb me:

—Rnee luu lëe tib meñ wen nac naa. ¡Nligaaw, Diosse nac meñ wen! Telne nli racladz luu ygaa luu guielmban co, none tsoxco luu gban luu miñe rnabey Dios.

<sup>18</sup> Pquiab zho rëb zho lo me:

—¿Pa miñ waa?

Rëbchaa me:

—Miñe rnee:

Gute luu samiech luu, telne nole tsieel luu, tsonied luu zha ne led tsieeld luu,

cuand luu samiech luu, yquiadiidzguizhd luu samiech luu,

<sup>19</sup> goñ pxoz luu, goñ xniaa luu, cueed luu xquielto me. Bleynie samiech luu, zigne rleynie luu luu.

<sup>20</sup> Dzigo rëbchaa zho:

—Ni tib miñe rnee luu i gard quits naa, grësew zanañ naaw zigne naca. Racladz naa gacnañ naa, dien peraa no guñ naa.

<sup>21</sup> Horco rëb me lo zho:

—Tel racladz luu gac luu tib zha ne gban grëse miñe rnabey Dios, güey sca güeyto grëse ncuaaņe rap luu, dzigo güeytiiz dimi co lo grë zha ne guieñd pe yquiin. Lozh ga, dë dënañ zhits naa. Miñ co nagon guñ luu, dzigo zgaa luu guielmban ndzon co; ni scagaa nroob guielnzaac ne ygaa luu nëz lo Dios.

<sup>22</sup> Zeene bin zho sca rëb me, mbanse rac zho laa zho zey, sac nroob ncuaaņe quianie zho.

<sup>23</sup> Dzigo rëbchaa Jesús lo xpëedscuel me:

—Gneli naa lo to ganle, grë zha ne squi rapchen rza-cxu u zho par sëeb zho xnëz Dios gnabey me zho.

<sup>24</sup> ¡Ne nligaa ngañ rzac zhow! Mazd ngañdse rded tib camell guieer guzh lëdle sëeb tib zha ne squi rapchen xnëz Dios.

<sup>25</sup> Zeene bin zho sca rëb me, rzee zdoo zho, rnee zho:

—Bay, ¿choseszhe dzigo waa nac zha ne zrieelo sëeb xnëz Dios?

<sup>26</sup> Dze bui me lo zho, dzigo rëbchaa me:

—Nligaa par miech zootle tsod zha ne grieelo sëëb xnëz me; sangue me nan me no zho. Sac tel me, tsod ncuaañe grieelod gun me.

<sup>27</sup> Horco pquiab Pedr rëb Pedr lo me:

—No dzigo waa, ¿pe nac miñe ygaa no? Nanle luu ganle, tel no grëse ncuaañe rdziaap no, laa no psaña, ziaadnal no zhits luu.

<sup>28</sup> Pquiab me rëb me:

—Golgona ganle, dze ne gacncub grëse ncuaañe no, zeñe laa Mgui ne pxeel Dios zob lo xcan ne zo zaatne nac lo guielndzon ne no me, dze co lo gza to ne nac to zha ne biaadnal zhits naa, sob to lo gza tsiipchop xcan ne rieguial to. To gac zha ne gun guielwxtis lo gza tsiipchop dii ne nac zha Israel. <sup>29</sup> Grëragaa zha ne psan lidz, psan zho bets zho, bzian zho, xniaa zho, pxoz zho, tsieel zho, xpëed zho, liun zho porne noyun zho xtsin naa, na lo guielmban riique laa zho gaañe stib tib gayoogaw tib tiba; ni ib tedsod zgaa zho tib guielmban ndzon ne gdziñdraa dze lozh.

<sup>30</sup> Nli zig nac niina, nzian zha ne rzac zha non nac zho, nogaa zha ne rzac zho peet nond, per zeñe gal dze co lalga gac zho grë zho.

### Lalga nac grë zha ne no xnëz Dios

**20** 'Grë zha ne no xnëz Dios, zac zho lo me zig bzhaac grë zha ne güey xtsiin tib men co.

Tib men co name nroob dziin quanie me, tib dzew zigne biini liu brie me güeyguib me zha ne tsielaap xuv me. <sup>2</sup> Bziel me palal zho, biaan zho diidz palal quizh me zho dze, laa zho bzëëb lo dziin. <sup>3</sup> Glaale ngbidza brie me güeyted me len guiedz, lëetse güeytsib me lo bla zha ne zob ga racladz dziin. <sup>4</sup> Dzigo bree me zho, rëb me: "Goltsie xtsin naa, na quizh naa to miñe non xtse to."

<sup>5</sup> Rwe ngbidza, biire me güey me güeyguib me spalal zho. Maase las treza güeyaque me stib.

<sup>6</sup> Zhile sëëb ngbidza, biire me güey me len guiedz. Ga bdziel me zla zho, gon me scase zob zho ga. Dzigo rëbchaa me lo zho: "¿Pe nacre squise noded dze to?"

<sup>7</sup> Pquiab zho rëb zho: "Choot rneedzdaxe dziin waa yquiaa no." Rëbchaa me: "Nasca zeña tsie to lo xtsin naa, maase quizh naa xtse to." Dzigo laa zho zie.

<sup>8</sup> Zeñe laa dze blozh bdze, bnee me lo zha ne zo lo xtsiin me, rëb me: "Bredz grë zha qui na, bdiizh xtse zho grëse zho. Zha ne bza bzëëb lo dziin, zha co glo bdiizh, lozhraa ga quizh luu zha ne glo bzëëb." <sup>9</sup> Dzigo bded zha ne bdzele dze bzëëb lo dziin ga, tib tib zho pcaase zho miñe non zho tib dze. <sup>10</sup> Grë zha ne glo bzëëb lo dziin, zeñe gon zhow, tibaque güeynie guic zho nroobraa nguizh me zho. Per zeñe laa zho gozh, lalgaque pcaa zho.

<sup>11</sup> Zeñe gon zho lalga pcaa zho grë zho, blëë zho, güey zho güeylisqui zhow lo men ne nacchen dziin ga, rëb zho: <sup>12</sup> "Psacsi luu no i gon squi been luu. Bui ganle gdipse dze ptsuu ngbidz no pquiaa no xtsiin luu, ¿zha nac dzigo lalga quizh luu no grë no zha qui, ni niipyeeñaque been zho dziin?" <sup>13</sup> Pquiab me rëb me: "Bets, nosacsid naa to, biaanle ne diidz name palal quizh naa

xtse to. <sup>14</sup> Nana sca golgüey xtimi to i, zeña golsë. Ib zdoo naa rala lalga quizh naa to grëse to. <sup>15</sup> Stiba, xtimi naaw, zrieelo gundziin naaw zigne racladz naa! ¿Te në rac zdoo to ye, ran to rquia zdoo naa miech?"

<sup>16</sup> Scapaa nagon gac zha ne no xnëz Dios. Lal gacnon zho, zigtaa zha ne glo bzëëb xnëz mew, zigtagaa zha ne sëëb bzaw.

### Bzeet Jesús stib laa miech csacsi me

(Mr. 10:32-45; Lc. 18:31-34)

<sup>17</sup> Nëz no Jesús zie me nëz Jerusalén, tibaque bredz me gza tsiipchop xpëedscuel me, <sup>18</sup> bzeet me lo zho zha gun miech me zeñe laa zho gdziñ Jerusalén, rëb me:

—Ib ziaab naa ladznia grë pxoz ne rnabey grë zho maistr ley, zha gnab guet naa. <sup>19</sup> Zha co naa ladznia zha zit, parne gunnguzee zha co naa, parne quin zho naa, ni haxta squiaa zho naa lo cruz. Per zeñe gac tson ngbidza, zriebaan naa.

<sup>20</sup> Tibaque zeñe wbig tsieel Zebedé wbignie me grop xingan me Jacob ni Juan, pquiitsgzhib me lo Jesús rnab me gun Jesús tib favor ne racladz me. <sup>21</sup> Dzigo bnabdiidz Jesús lo me, pe nac favor ne racladz me. Pquiab me rëb me:

—Racladz naa gneedz luu diidz sob tibga xpëed rii naa cue luu zeñe gdziñ dze ne laa luu zob zobnabey luu; tib zho nëz derech, stib zho nëz revés.

<sup>22</sup> Pquiab Jesús rëb me lo wnaa co:

—iNi luu gon rien pe rnab luu! ¿Niacxe zlëb zho gan zho grë guielnë ne gan naa, tedgaa zho grë miñe teed naa?

Pquiab zho rëb zho:

—Zlëëb no.

<sup>23</sup> Rëbchaa me lo zho:

—Nli nenda zan to grë guielnë ne gan naa, ni zdedgaa to miñe teed naa; per ne gnedz naa diidz sob to cue naa nëz derech, nëz revésgaa, led naad raguial miñ co; sac laa lugar co biaanle par zha ne tsieguiala, ni Pxoz naa men ne zob gbaa men cose nan dien chow.

<sup>24</sup> Grëraa xpëedscuel me, zeñe bin zho pe nac miñe rnab Jacob grop Juan, blëë zho lo zho. <sup>25</sup> Dzigo bredz Jesús zho grë zho, rëb me lo zho:

—Ran to ganle zha ran grë zha ne rnabey grë guiedz ne ndxie lo guidzliu, ni grë zha ne nac zha non, masaque rnabey zho samiech zho zigne racladztaa zho. <sup>26</sup> Sangue to gon gunscade to. Zha ne racladz gac zho zha non lo to, laa ne glu zho zha non zho, none glo zho guiaanwin, gac zho zig tib ngundziin lo to.

<sup>27</sup> Scaquegaa zha ne racladz gnabey zho lo to, none glo cseed zho gun zho miñe gnabey to zho. <sup>28</sup> Golgan ganle, niicle naa ne nac naa Mgui ne pxeel Dios, ziald naa par gnabey naa miech, sinque laa naa zial par gac naa tib ngundziin lo zho, ni gded naa xquielmban naa zeña laa zho lo grëtaa ncuaañe ngadoo zho. Ni nanpaa naa miech guizhiu ne laa.



**Biac chop zha ne rold lo**

(Mr. 10:46-52; Lc. 18:35-43)

<sup>29</sup> Miech guizhiu naḷ zhits Jesús, laa me zieriee guiedz Jericó. <sup>30</sup> Ro nêz co zob chop zha ne rold lo, zeene bin zho laa me ziaad ga, psilo zho nguiedz rbedz zho rnee zho:

—¡Jesús, meḅ xtii rey David, pquia zdoo no!

<sup>31</sup> Blalaa zha ne zie ga, psilo zho ndox zho lo grop zha co parne guioog ro zho, per leḷ hor cole nguiedzraa rbedz zho me. <sup>32</sup> Nacne zeene bdziḅ me za-atne zob zho, blêz me, bnabdiidz me lo zho rêb me:

—¿Pe nadien guḅ to naa?

<sup>33</sup> Pquiab zho rêb zho:

—¡Racladz no guiac lo no!

<sup>34</sup> Pquia zdoo me zho goḅ me sca rac zho, dzigo pquiaania me zhits guidlo zho. Horcogazh laa lo zho biac, laa zho zienaḷ zhits me.

**Bdziḅ Jesús Jerusalén**

(Mr. 11:1-11; Lc. 19:28-40; Jn. 12:12-19)

**21** Sca no Jesús nêz grê xpêëdsuel me, laa me bdziḅ guiedz Betfagé. Gaxle ga riaanḅ Jerusalén, nêz danse squi riaanḅ Gui Oliv. Dzigo pxeel me chop xpêëdsuel me, rêb me lo zho:

<sup>2</sup> —Goltsie guiedz win ne ndxie danse lo ne i. Ga gdziḅ to zaatne quiadoo tib burr gus grop xpêëd, dzigo goḷxadz ma goḷtênie ma nu. <sup>3</sup> Teḷ cho gnabdiidz pe nacne noxadz to ma, goḷguiab lo zho: Meḅ ne rnabey ne, meḅ co rquiin ma, na zigne lozh xtsiinḅ ma guiaad-saḅ no ma.

<sup>4</sup> Ga brieequia miḅe bnee tib meḅ ne biadteed xtiidz Dios lo miech padzeela, zeene rêb me:

<sup>5</sup> Goḷguiab lo meḅ Jerusalén:

“Goḷwi gaḅle, laa meḅ ne nac zhirey to ziaad i.

Tib meḅ ligase rlu me, zob me lad tib burr win, tib ladse ma ne rey yo zob me.”

<sup>6</sup> Laa zho zie, zigne bnabeyse me zho ga, scase beenḅ zho. <sup>7</sup> Zeene wbire zho, laa zho bdziḅnie burr co grop xpêëd ma. Pxob zho lar ne rbix zho lad xpêëd ma, laa me bzob ma. <sup>8</sup> Zigse zie me, no grê miech guizhiu co, rta zho lar ne rbix zho ro nêz rded burr ne zob me ga; nogaa zha ne rchoo nia grê yag nguia, rdziinḅ zhow ro nêz rded me. <sup>9</sup> Grêse zho, zigtaa zha ne nera, zigtaa zha ne naḷa, nguiedz roptsie zho rnee zho:

—¡Goḷgotsaa co ne xviv xingan David! ¡Goḷgotsaa gleynie ne me! ¡Zha ndzontaa Dios, pxeel me meḅ nroob qui lo ne!

<sup>10</sup> Zeene bdziḅ me Jerusalén, rlozhd gzee zdoo grê miech ne ndxie ga, rnabdiidzlsa zho rnee zho:

—¿Bay cho nac meḅ qui?

<sup>11</sup> Rquiab grê zha ne naḷ zhits me ga, rnee zho:

—¡Lêê Jesús i! ¡Lêê meḅ Galilé qui, noteed xtiidz Dios lo miech!

**Blee Jesús miech lenḅ yadoo**

(Mr. 11:15-19; Lc. 19:45-48; Jn. 2:13-22)

<sup>12</sup> Biini liu co, zeene bdziḅ Jesús Jerusalén stib, güey me yadoo nroob ne zob lad guiedz co. Bdziḅ me goḅ me nzian miech ne ndxie ga, masaque tib lgui quiayunḅ zho, zha ne no wto, zha ne no wzi. Nacne güey me ptiixche me xmezḅ zha ne no wto palom; blee me zho ga grêse zho, <sup>13</sup> rêb me lo zho:

—Led znu goḅ zḅobnee lo Xtiidz Dios: “Zaatne nac lidz naa nu, nu none guiaad grêse miech sodiidznie zho naa.” Laa to goḅ, quiayunḅ to lugar rii zig tib zhib-liee ngbaan.

<sup>14</sup> Ga no me bdziḅ bla zha ne rold lo, zla zha ne nê ni, wbig zho lo me. Gzase zho beenḅguiac me. <sup>15</sup> Nzian mēëdlas yeenḅ ne ndxie lenḅ yadoo ga, psilo win nguiedz rnee win: “¡Zha ndzontaa xingan rey David!”

Grê zha ne nac pxoz ne rnabey, ni grê maistr ley, zeene goḅ zho milagr ne beenḅ me ga, ni goḅ zho zha rnee grê mēëdlas co, rlêê zho, <sup>16</sup> rêb zho lo me:

—¿Pe ib rond luu gaḅle pe nonee grê mēëdlas qui? Pquiab me rêb me:

—Ron naaw. ¿To waa, pe ranḅe to gaḅle zha zḅobnee lo Xtiidz Dios, zaatne raquiet miḅe noyac nu? Led rneew lêê:

Haxta grê mēëdlas ne bii radz, ye win rley win roolnie win me.

<sup>17</sup> Blozhse sca rêb me, zoque zho ga, laa me bio nêz zie me nêz Betain. Ga blêz me wdze co.

**Wbidz tib yag guigw**

(Mr. 11:12-14, 20-33; Lc. 20:1-8)

<sup>18</sup> Sil co zeene no me nêz gdziḅ me Jerusalén, pcaabedz me. <sup>19</sup> Goḅ me zob tib yag guigw gax ro nêz, dzigo güey me güeyso me low dienḅ pe ndzielḅ tib nex low niow me. Bdziḅ me goḅ me loxaque zhiblagsew zêëb, nacne rêb me low:

—¡Lêê blozh xtse luu nu goḅ! ¡Gdziḅndraa dze ne yquia nex lo luu!

<sup>20</sup> Biini liu, zeene laa zho zie Jerusalén stib, goḅ xpêëdsuel me, laa yag guigw co bidzle. Bzee zdoo zho, bnabdiidz zho lo me rêb zho:

—¿Bui gaḅle, bay zha nacne squi znuse wbidz yag guigw qui?

<sup>21</sup> Pquiab me rêb me:

—Gneli naa lo to gaḅle, teḷne dib zdoo to rnalo to Dios, niicle ncuaane mazdraa ngaḅ gnab to lo me, zun mew. Lêëraasi none dib zdoo to giladz to zaca, ni palal gacḅopd guic to. <sup>22</sup> Grêse ncuaane gnab to zeene rzodiidznie to me, zneedz mew, totsaque dib zdoo giladz to laa to ycaaniaw.

<sup>23</sup> Bdziḅ me Jerusalén, wbiire güey me lenḅ yadoo. Ga noseed me miech, zeene bdziḅ bla zha ne nac pxoz ne rnabey ni zla zha ne nac meḅ non lo menguiedz, bnabdiidz zho lo me rêb zho:

—¿Cho dzigo nac luu ne squitaa ziaadnabey luu lenḅ yadoo? ¿Cho rnabey luu?

<sup>24</sup> Pquiab me rëb me lo zho:

—Ye naa laa naa guṇ tib wṇabdiidz lo to. Teṇe stsire to low, dzigo gni naa lo to gaṇle cho rṇabey naa ne laa naa noyuṇ grë ncuaaṇe noyuṇ naa. <sup>25</sup> Goṇṇe dieṇ, ¿cho pxeel Juan Bautist biaad me pchoobnis me miech? ¿Pe Dios pxeel me, te miechsew ye?

Psilo zho rṇabdiidzlsa zho dieṇ zha ctsire zho lo xtiidz me, rnee zho:

—Teṇe dzieets ne Dios pxeel Juan, dzigo laa me gnë: “¿Pex nac dzigo waa bliladzde to miṇe bnee me?” <sup>26</sup> Teṇ na dzieetsgaa ne, miechse pxeel Juan, greequiadaque ne.

Rdzieb zho niab zho miechse pxeel Juan, sac naṇ meṇguiedz nli Dios pxeel Juan biadteed Juan xtiidz me lo miech.

<sup>27</sup> Dzigo mazd miṇe beeṇ zho rëb zho lo me:

—Ndioṇd no dieṇ cho pxeel Juan.

Dzigo rëbchaa me lo zho:

—Niicle naagaa nagon, grieelod gni naa lo to cho rṇabey naa quiayuṇ naa grë miṇ rii.

### Zha nac zha ne rond diidz

<sup>28</sup> ‘Goṇquiaadiaga gaṇle. Tib mgui, quianie me chop meëdbgui. Tib dzew, bredz me tib zho rëb me lo zho: “Xin, none gon tsie luu nadze, tsietop luu uv xcuaa ne.”

<sup>29</sup> Pquiab zho rëb zho: “¿Gad naa!” Wdzeelaaw, bieṇ zho nonguielḍa ga sca guṇ zho, dzigo bio zho nëz güey zho. <sup>30</sup> Laa stib zho, zeene bredz me zho bnabey me zho tsie zho lo dziin, rëb zho: “Peet nacda, na maase ga naa.” Blozh ga pasë zho nie.

<sup>31</sup> ‘Goṇṇe dieṇ, lo grop meëd co, ¿cho nac zha ne bin xtiidz pxoz?

Pquiab zho rëb zho:

—Zha glo cow.

Dzigo rëbchaa me:

—Gneli naa lo to gaṇle, miṇcodaa quiayac nu niina: Grë zha ne rzac to mazdraa ngoopdoṇ, zig nac grë zha ne rtop dimi ne razh lo zha Roma, zig nac grë wnaa ro nëz, mazd glöle zha co nozëëb xnëz Dios, lëdle to.

<sup>32</sup> Biaadpaa Juan Bautist name biadseed me miech csaan zho xquielṇtseeb zho, gban zho zigne racladz Dios, ni pe liaadz to nion to miṇe rnee me. Mazd grë wnaa ro nëz, grë zha ne rtop dimi ne razh lo zha Roma, znuse psaan zho xquielṇtseeb zho. Laa to, niicle raṇ to nosaan grë zha co xquielṇtseeb zho, per ib rsaande to miṇe nac to.

### Xcuent zha ne pquianap liu

(Mr. 12:1-12; Lc. 20:9-19)

<sup>33</sup> Dzigo bzodiidz me stib cuent lo zho rëb me:

—Tib meṇ name, nroob lbë uv beeṇbni me lo liuṇ me. Psilo me ptse me igose liu co, bzaa me zaatne gzhii grë uv co, ni bzaa me tib yu glaa zaatne sob zha ne yquiaanapa. Blozh ga, blediṇ me liu co lo bla zha ne ran liu, dzigo laa me brieë, laa me zey zit.

<sup>34</sup> ‘Zeene goṇ meë ne laa nex co gol, pxeel me bla zha ne quia xtsiṇ me zie lo zha ne quianap liuṇ me ga, parne gdeed zha co uv ne rieguial me ycaa me. <sup>35</sup> Per

leṇ bnaaz zho zho, zha ne blooquie zho, zha ne bdeed-golp zho, haxta beet zho tib zho. <sup>36</sup> Wbiire pxeel me zla zho, hor cole nzianraa zho pxeel me, per niapse sca psacsi zha co zho.

<sup>37</sup> ‘Tibaque zeene pxeelḍaque me xpëed me, bza guic me rëb me: “Gaṇse zho xpëed naaw, zon zho miṇe gnee me.”

<sup>38</sup> ‘Pex nion zho diidz, zeene gon zho xpëed me, rëbchaa zho: “¿Lëë zha qui nagon guiaaṇnie liu rii! ¿Goṇgotsaa dzuut ne zho, zeena guiaaṇa lo ne!” <sup>39</sup> Dzig bnaaz zho xpëed me, güeynie zho me zaatne nac tib lad lo liu co, ga güeygut zho me.

<sup>40</sup> ‘¿Zha sca dieṇ rzac to guṇ bizhuan liu co gza zha co, zeene laa me gbire?

<sup>41</sup> Pquiab grë zha ne nac pxoz ne rṇabey, ni zha ne nac zha non lo meṇguiedz ga, rëb zho:

—Ni lalnu yquiad zdoo me zho, znitlogazh me zho. Lozhse ga, cuediṇga me liuṇ me lo zla zha ne gundzi-ina, zha ne quiēṇ gdeed nex ne rieguial me ycaa me.

<sup>42</sup> Dzigo rëbchaa me lo zho:

—Haxta lo Xtiidz Dios no tib zaatne znu rnee, ¿pe gard gaṇle glab tow? Rneew:

Quie ne psëëb zha ne nozaa yu,

ni naṇd zho lëëpaa quie co nac miṇe rṇazdziits yu.

¿Ncuaaṇe gzee zdoo new! Sac Dios bnabey sca goca.

<sup>43</sup> ‘Gacnaṇ to gaṇle, scadaa nagon grie to lad grë zha ne ngab lo Dios, parne gbig zha ne tsoxcoopaa guṇ xtsiṇ me, zha cole guiaaṇ xlugar to. <sup>44</sup> Zha ne tsiet-sobe lo quie ne raquiet ga, zac zho zig tib ncuaaṇe rac tson tap lë; laa teṇ lëëgaaw tsobe lad zho, zac zho zig tib ncuaaṇe die die rac.

<sup>45</sup> Grë zha ne nac pxoz rṇabey ga, ni grë zha farisé, zeene blozh pquiaadiag zho cuent ne bzodiidz me lo zho ga, bieṇ zho zha ga rzeet me. <sup>46</sup> Nacne gocladz zho naaz zho me, per bdziebaque zho; sac ndal miech rleynie me, niicle ne rzac zho tib zha ne noteedse xtiidz Dios nac me.

### Zha ne nëd sëëb xnëz Dios

**22** Bzodiidz Jesús stib cuent lo zho, rëb me:

<sup>2</sup> —Grë zha ne rbedz Dios ygab zho xnëz me, none tsoxco zho gon zho miṇe rnee me; sac nenda gdzieelo zho zig bdzieelo zha ne bredz tib rey co nie zho lo zhilni xpëed me.

<sup>3</sup> ‘Tib rey name, ziaadyob ctsieelṇia xpëed me, nzian zha ne bredz me tsie lo lni. Zeene laa dze co bdziṇ, pxeel me zha ne quia dziin lo me zietsedz grë zha ne bredz me lo lni ga, per nëd zho nienal zho. <sup>4</sup> Wbiire me pxeel me zla zho rëb me: “Goṇtsietsedz zho, goṇguiab, laa guielwagw ne yquiiṇ goclöle, siguiel zho na guiaad zho.” <sup>5</sup> Per ib beeṇcasd zho zha ne pxeel me ga, no zho brieë zie lo xcuaa, no zho brieë zie zhiwto, <sup>6</sup> nogaa zho leṇ bnaaz zho zha co, psacsi zho zho, beet zho zho.

<sup>7</sup> Zeene gon me sca beeṇ zho, blëë me, bnabey me grë xmeṇguiib me güey zho güeygut zho grë zha ntseeb ne psacsi xmandad me ga, ni bnabey me bzëëg zho guiedz co. <sup>8</sup> Blozh ga biire pxeel me zla zho, rëb me: “Laa guielwagw rii goclöle, miṇe naca goṇtsie tib nëz

yu, zha ne gdieeltaa to, goꞤcuedz zho guiaad zho lo lni; sac grë zha ne bredz naa ga niaad, laa zho blule ganle rieguiaꞤd zho guiaad zho nu."

<sup>10</sup> Dzigo brieë zho güey zho, miech ne bdieeltaa zho, zigtaa zha ndzinliw, zigtaa zha ntseeba, grëse zho bredz zho bdziñnie zho zho lo lni. GoꞤ hor wagw, biodzëse leñ yu ndxie miech. <sup>11</sup> Zeene laa rey bzëëb zienee me lo zho, goñ me lad co no tib zha co nacwx-abd zho zigne rieguiaꞤ gacwxab zha ne sca rie tib lo guieꞤtsieel. <sup>12</sup> Dzigo rëbchaa me lo zho: "Bets, ¿pe nacne squire luu bzëëb luu nu, bui ganle nacwd luu lar ne bneedz zho niacw luu?"

'Dzese zob zho, rdziold zho pe guiab zho lo me. Goñse me sca rac zho, <sup>13</sup> bnabey me zha ne nodziib lo mezh rëb me: "GoꞤzobdoo zha rii, goꞤxidoo grop nia zho, grop ni zho, goꞤcuae zho nu goꞤtsieron zho lo ncow nëz ley. ¡Ga nac zaatne rieguiaꞤ zho, ga gan zho guieꞤnëdox ne no ted zho, goonnë zho, haxta gow lay zho!"

<sup>14</sup> Miñcodaa nagon rac leñ dze rii —rëb Jesús—, ndal zha ne racredz sëëb xnëz Dios, per zhis nac zha ne rioxco rzëëb.

### Pe nonguieꞤ quizh miech contribucion

(Mr. 12:13-17; Lc. 20:20-26)

<sup>15</sup> Blalaa zha farisé ne ndxie ga güey zho bnediidz zho dieñ zha guñgüet zho Jesús cxiñ me tib diidz, zeena miñ co yquiaaqui tsiezo zho me lo wxtis. <sup>16</sup> Dzigo pxeel zho bla zha ne nacgrë zho, ni güey zla zha ne racnie Herod gocgza zho. Bdziñ zho rëb zho lo me:

—Maestro, ndion no niapse diidzli zianaꞤ luu, ni sca-gaa zeene rseed luu miech, rdziebd luu miñe nac diidzli miñ co rnee luu lo zho. <sup>17</sup> Gane niina, racladz no gnë luu dieñ pe nonguieꞤa ga rdeed no dimi ne razh lo rey ne zob Roma, te nonguieꞤda ye.

<sup>18</sup> Bienga me racladz zho guñgüet zho me, dzigo rëbchaa me lo zho:

—¿Pe nan to na rieñd naa pe no guic to? Masaque rëb to na lëë, znuse guñgüet to naa. GoꞤneedz tib pes ne rguizh to nu ganle.

Dzigo bdeed zho tib pes plat lo me. <sup>20</sup> Blozh ga, rëbchaa me lo zho:

—¿Cho nu, cho lë nu quia lo pes rii?

<sup>21</sup> Pquiab zho rëb zho:

—Lëë rey i, lëë lë me i quia lo qui.

Dzigo rëb me lo zho:

—Miñe rieguiaꞤ sca ycaa rey, goꞤdeeda lo rey; scaquegaa miñe rieguiaꞤ ycaa Dios, lo Dios goꞤdeeda.

<sup>22</sup> Zeene goñ zho sca ptsire me lo xtiidz zho, bzee zdoo zho, mazd miñe been zho laa zho wbichese ga, laa zho zey.

### ¿Pe nli zrieeban miech?

(Mr. 12:18-27; Lc. 20:27-40)

<sup>23</sup> Dze coquew, güey bla zha saducé lo Jesús. Nac zha saducé riladzd zho zdziñ dze grieeban miech. Dzigo bdziñ zho, <sup>24</sup> rëb zho lo me:

—Maestro, znu psan Moisés diidz: Teñe glo mguiguet lo wnaa ne nac tsieel mguiguet, ni gopd wnaa mëëd, dzigo none betsaque zho ctsieelna wnaa co stib, zeena gap wnaa mëëd ne guiaaꞤ xlugar xpëëd zha ne gut ga.

<sup>25</sup> 'Bio tib dii zha co znu bzhaac, gadz bets nac zho. Ptsieelna zha ne nac zha gol, zeene laa zho gut bianaꞤ xpëëd zho. Dzigo ptsieelna stib bets zho wnaa co.

<sup>26</sup> Blozh ga gutaque zha co, pa së zho nsañ mëëd. Ptsieelnaque me stib zho, goc zho tson, niicle zha co psandaque mëëd. Sca sca haxta bza gza gadzse zho ptsieelna me, <sup>27</sup> tibaque zeene yeque me laa me gut.

<sup>28</sup> Miñe racladz no gacndion no, ¿chopaa dzigo gac tsieel wnaa co zeene laa zho grieeban? Sac gza gadzse zho ptsieelna me.

<sup>29</sup> Pquiab Jesús rëb me lo zho:

—I nagon laa to rxin, miñe naca rieñde to zha nac Xtiidz Dios, niicle riladzdde to zrieele me guñ me ncuanaꞤ ro ne gard gan miech. <sup>30</sup> Sac goñ zeene gal dze ne laa grë miech grieeban, niicle mguiw niicle wnaaw led yedraa hor co dieñ cho ctsieelna zho; sac hor co laa zho gac zig nac grë anjl ne no gbaa. <sup>31</sup> Stiba, ib nli zrieeban meñgut. Mod rande to zha zhobnee zaatne raquiet zeene rëb Dios: <sup>32</sup> "Naa nac Dios ne riladz Abraham, naa nac Dios ne riladz Isaac, naa nac Dios ne riladz Jacob." Niicle ne gutle gza zha co hor co, per zeene sca bnee Dios gase rlu mban zho no zho lo me; sac teꞤ Dios, ¡nacd me xDios meñgut, sinque xDios zha mban nac me!

<sup>33</sup> Grë miech ne ndxie ga, zeene goñ zho sca ptsire me lo xtiidz zha saducé co, rzee zdoo zho.

### Xley Dios miñe mazdraa non

(Mr. 12:28-34)

<sup>34</sup> Grë zha farisé ne ndxie ga, goñ zho sca psiog Jesús ro grë zha saducé co.

Horco biire grë zha farisé co bzodiidz zho stib. <sup>35</sup> Lad zho no tib maistr ley, dzigo wbig maistr ley co lo Jesús, rëb zho:

—Maestro, lo grë xley Dios, bhiguieꞤ bnë lo naa dieñ, ¿pa miñ nac miñe mazdraa non?

Sca rëb zho, sac gocladz zho niungüet zho me.

<sup>37</sup> Pquiab me rëb me lo zho:

—Lëë miñe mazdraa non nu znu rnee: "Dib zdoo luu, dib xalm luu, dib guieꞤbiini ne no guic luu, bleynie Dios, meñ nroob ne rnabey luu." Lëëw nac miñe mazdraa non, ni lëëw glopaa raquiet lo grëse ley. <sup>39</sup> No stib miñe rnee: "Bleynie samiech luu zigne rleynie luu luu."

Ye miñ rii nona, meraque lala con miñ glo. <sup>40</sup> Zha ne gban zigne rnabey grop ley rii, lëële grë ley ne psan Moisés ga, lëële grë zhiwseed zha ne biadteed xtiidz Dios ga, zianaꞤ zho.

### ¿Cho xpëëd nac Crist?

(Mr. 12:35-37; Lc. 20:41-44)

<sup>41</sup> Goñ Jesús nzian farisé ndxie lo me ga, nacne bnabdiidz me lo zho rëb me:

—¿Zha dien rzac to guiaad Meñ ne zëëble diidz ga cxeel Dios? ¿Cho lo xtii griequia me?

Pquiab zho rëb zho:

—Lo xtii David griequia me.

<sup>43</sup> Dzigo rëbchaa me lo zho:

—¿Pe scaw sca? Zha nac waa zeeñe bdeed Espíritu Sant guiełbiini lo David bzeet David meñ co, rëb David me nac meñ ne rnabey David. Golgañ ganle znu bnee David:

<sup>44</sup> Rëb Dios lo meñ ne rnabey naa:

“Cue naa nëz derech, nu bzob, nieeda lozh gnaz naa grëse zha ne rlëë lo luu, csañ naa zho ladznia luu.”

<sup>45</sup> Gase nagon telne nli zha xtii David gac Meñ ne cxeel Dios ga, ¿zha nac dzigo rnee David meñ co rnabey David?

<sup>46</sup> Ni tib zho ib bdield zho zha ntsire zho lo xtiidz me; desde dze co ni stib zho biazhdraa pe nabdiidz zho lo me.

### Miñe nac maistr ley grë zho zha farisé

(Mr. 12:38-40; Lc. 11:37-54; 13:34-35; 20:45-47)

**23** Dzigo psilo Jesús bnee me lo grë miech co, ni lo xpëëdsuel me, <sup>2</sup> rëb me lo zho:

—Grë maistr ley ni grë zha farisé ib lëë xtsiñ zho ga, nac cseed zho miech zha nac ley ne psañ Moisés.

<sup>3</sup> Golguien golgon xtiidz zho, iper nsin golso, ib guñde to miñe ruñ zho! Nac zho, ni lalnu ruñd zho miñe rseed zho miech. <sup>4</sup> Rio zho rnee zho lo miech, miñ rii, miñ rii rnabey ley guñ to, ni per ni zha rioxcd zho siquier csilo zho guñ zhow.

<sup>5</sup> ¿Grë ncuaañe ruñ zho, laaw ruñse zho par ganpaa miecha! Par quiab miech nguzobdiidz zho lo Dios, rio zho led zhid nzhen grë lo cint rquiaa zho Xtiidz Dios, rlozh ga rzhidoow yañ nia zho, rzhidoow quia zho ne. Lar ne rbix zhow, rlozhd dieen peraa rquia lada, xab zhow, haxta zhits ni zho rbiba. <sup>6</sup> ¿Zeeñe rbedz miech zho tib wagw nroob, rdziladz zho zhapaa rzob groł mez, niicle leñ yadoogaaw, zaatne glupaa zha non nac zho, ga rzob zho! <sup>7</sup> Ro nëza, rdziladz zho ndooladz gnee miech bdiuzh lo zho, zeeñe rnee miech “zha rac”, “zha non”, nac zho, rlozhd gley zho.

<sup>8</sup> Sangué to gon yguibde to dien zha gnee miech “zha rac” nac to, sac tibaque meñ rac no, lëë me ga zëëble diidz cxeel Dios; golguien ganle tel to lalga nac to, rriequia bets to grë to. <sup>9</sup> Ib guñde to zig ruñ grëraa miech, ruñnon zho tib samiech zho rnee zho lëë pxoz zho ga, sac tibaque meñ ne nac Pxoz to, lëë meñ co no gbaa. <sup>10</sup> Yguibde to sac miech topaa guñctsiñ zho lo Dios, sac loxaque Meñ ne nole diidz ga cxeel me, meñ cose zrieelo guñctsiñ zho lo me. <sup>11</sup> Nodne gacglaa to lo samiech to, mazd ndooladz golgac lo zho, sac zha ne racglaa, ziaañwin zho. Gaxe waa, telne racladz to gacnon to, none ndooladz gac to lo samiech to.

<sup>13</sup> ¿Probsaxe to maistr ley, probsaxe to zha farisé! Lëda i gon noyūñ to, rzac to noxco to sëëb miech xnëz Dios, per leł noca to sëëb zha ne racladz sëëb. Ni stiba,

per ni to nod xnëz me. <sup>14</sup> [¿Probsaxe to! Guiełntseeb i gon ruñ to, rio to rlozhd gool to xlay to rzo to ro nëz, ni noque to rla to ncuaañe rapse grë wnaa viud; ib ted-sod gon guiełnëdoh ne yгаа to.] <sup>15</sup> ¿Probsaxe to, rzac to na lëëw ga ruñ to! Rio to gui dan rbix to, haxta rded to nisdoo, rquiaguib to dien cho sëëb xnëz to ni rlozh ga laa ne ygab zho nëz lo Dios, leł nëz leñ gabił zienie to zho. <sup>16</sup> ¿Probsaxe to, nac diidz name to noseed miech, ni per ni to rienđ pe rnee to! Rnee to lo miech: “Zha ne rzeet yadoo ni tel guñd zho miñe rnee zho, peet nacd ga, per tel gzeet zho grë or ne no leñ yadoo ni guñd zhow, doł ga guñ zho.” <sup>17</sup> ¿Nadzpaa nxen to, nadzpaa ncow nac guic to! ¿Niacxe mazdraa non or lo yadoo? Golguien ganle por yadoo, naclay grë or co. <sup>18</sup> Rneeque to: “Zha ne gzeet lo pcoog, led dołda telne guñd zho miñe rnee zho; per tel gzeet zho gon ne ndziib lo pcoog ni guñd zhow, doł ga guñ zho.” <sup>19</sup> ¿Pe nlipaa rnee to peet rienđe to! ¿Niacxe mazdraa dzigo non gon que lo pcoog? ¿Pe ranđe to por lo pcoog co raclay gon? <sup>20</sup> Golguien ganle, zha ne rzeet lo pcoog, ye le grë ncuaañe ndziib low ga quiazeet zho; <sup>21</sup> zha ne gzeetgaa yadoo, haxta Diosle ga gon rzeet zho, sac ga rbëz me. <sup>22</sup> Scasaque zha ne gzeet gbaa, zaatne rzoble Dios ga nozeet zho, masaque rriequia me ga rzeet zho.

<sup>23</sup> ¿Probsaxe to maistr ley, probsaxe to farisé! Rzac to na demas nguzobdiidz to lo Dios, rio to haxta grë guizh bitxtil, guizh nizh, guizh comin ruñ to tsił lal, rdeed to tib lala miñe rieguiał tsiesañ to yadoo, laa ley ne mazdraa non zienied guic to guñ to miñe rnabeya. Nli rieguiała gdeed to grë gon co, per none scaque tsoxco to guñ to miñe nac diidzli, none yquia zdoo to samiech to, none dib zdoo to gnalo to Dios. Miñ rii nac miñe mazdraa non.

<sup>24</sup> ¿Ne nlipaa ib rienđe to pe quiayūñ to! Rzac to na noxco to guñctalde to xtoł to, masaque ni tib ngurudz rsaande to tso lo ncuaañe row to, ni rienđe to rriequia haxta tib camell rab to. <sup>25</sup> ¿Probsaxe to, masaque nac to zig tib plat, zig tib tas ne nëz zhitssew mbe rna, laa nëz leña rnadraa! Laglaase rquiaalo to miech wen nac to, per tibaque noban to, tibaque nosacsi to samiech to. <sup>26</sup> Golguien none glo csaan to xquełntseeb to, none gac to zig tib plat zig tib tas ne zigtaa mbe nëz zhitsa, scagaa mbe nëz leña. <sup>27</sup> ¿Probsaxe to, nac to gon zig grë baa ne dieen paraa nquitsbie rna! Niow rlu nëz zhitsa, laa nëz leña loxaque grë ncuaañ biodz, loxaque grë dzit ngutoo nodzë. <sup>28</sup> Sca gon nac to, ne rac to zootxe luu waa nli miech ndzinli nac to, per nëz leñ zdoo to loxaque zhgab ne dien zha yquidie to miech, zha csacsi to miech no to.

<sup>29</sup> ¿Probsaxe to maistr ley, probsaxe to farisé! Ni lalnu guiełto guieñd lo to, rio to rzhixcuaa to ro xpaa grë zha ne biadteed xtiidz Dios, ni lëëpaa grë pxozgol to beet zho. Dieen peraa ruñ to rquiaalo to rsoladz to zho. <sup>30</sup> Rnee to: “Telne niaca miñe nole ne leñ dze co, ndeete ne diidz nsacsi xmenđol ne grë meñ rii.”

<sup>31</sup> ¿Lëëque to gon nobeero ga, zha nactaa lo dii ntseeb ne ziaad to! <sup>32</sup> ¿Scaque nasca golgun! ¿Goltsienal grë

miñe been pxozgol to ga! <sup>33</sup> ¡Miech ngoopdo! ¡Zhin men̄dox! Teñe csaande to xquieñtseeb to i, ib tedsod gon̄ gabiñ guey to.

<sup>34</sup> Gr̄e zha ne cxeñ naa, zig nac zha ne guiadteed xtidz naa, zha ne nacie Esp̄ritu Sant, zha ne yгаа guieñbiini yquiaa zho miñe gnabey Esp̄ritu Sant zho, ib tedsod sacsi to zho. No zho gutgazh to, no zho yquiaa to lo cruz, no zho l̄eque leñ xyadoo to gdeed yag to zho, ib gan̄zede to zho, stib guiedz, stib guiedz tso to ctsidiñ to zho. <sup>35</sup> Blactaa gr̄e miech ne sca peet xtoñd ziyut to gr̄e xmengol to, psilow desde Abel haxta Zacarí xingan Berequí, men̄ ne beet xmengol to zaatne nac gax lo pcoog leñ yadoo. Ni ye to gon̄ z̄eëb xchen gr̄ese zha co. <sup>36</sup> ¡Gneli naa lo to gan̄le, gr̄e miech ne gon̄ mban leñ dze rii, gr̄e to zho yгаа guieñn̄edox ne tsieguiañ to por gr̄etaa guieñtseeb co!

<sup>37</sup> ¡Aque tow men̄ Jerusalén! ¿Pe nacne squitaa nac to, rut to zha ne ziadteed xtiidz Dios lo to, rgoquie to gr̄e zha ne rxeel me lo to? Blactaa gocladz naa, niacnie naa to, nquianaap naa to, zig ruñ nguid rgeuedz ma xp̄eëd ma, per bzhiguiel̄de to. <sup>38</sup> Gacnañ to sca gan̄le, nadzetaa gon̄ laa lidz to nu guiaañ ngan, <sup>39</sup> sac gan̄-draa to naa, haxta gañ dze ne guiab to: “¡Zha ndzontaa men̄ qui pxeel Dios lo ne!”

### ¡Nsin goñso!

(Mr. 13:1-23; Lc. 17:22-24; 21:5-24)

**24** Laa Jesús zieriee leñ yadoo gr̄e xp̄eëdscuel me, zeene pcuëëzdze zho me, r̄eb zho:

—Gotsaa gwi ne gan̄le zha niaataa yadoo rii.

<sup>2</sup> Blozhse bui zho low, r̄ebchaa me lo zho:

—Niicle squitaa nagon̄ niaaw, per zdziñ dze ne nitlow dib nacsew. Ni stib quie qui guiaañdraa zigne squi zhobxcuaaw i.

<sup>3</sup> Brie me leñ yadoo ga gr̄e me zho, laa zho zie n̄ez Gui Oliv. Bdziñ zho cho gui co, ga bzob me gr̄e me zho. Dzigo wbig gax bla zho lo me, bnabdiidz zho r̄eb zho:

—Bzhiguiel̄ bn̄e lo no dien̄, ¿pa hor dzigo gac miñe bzeet luu ga? ¿Zha glu zeene laa luu ziaadyoble guiaad? Zeene nitlogaa guidzliu, ¿zha gacndion̄ no laa dze co ziaadyoble?

<sup>4</sup> Pquiab me r̄eb me lo zho:

—Nsin goñso, zeena choot yquidiede to. <sup>5</sup> Sac nzian zha ne griequia guiab zho zha nac Men̄ ne z̄eëble diidz cxeel Dios; ni nzian miech ne yquidie zho. <sup>6</sup> Zeene gon to n̄ezrii n̄ezrec noxtseeb csilo diñ, guiabde to togo l̄eële dze ne guiañ naa ga bdziñ; sac niicle noyacle diñ, noxtseebragaa pa csilo gaca, led l̄edle ne nitlo guidzliu ga. <sup>7</sup> Garaa csilo gr̄e diñdox, gr̄e guiedz nroob laaw tiñnie saguiedz nrooba; gr̄e zha ne rnabey gr̄e guiedz nroob, laa zho tiñnie sazha rnabey zho. N̄ezrii n̄ezrec csilo gni gr̄e zhodox, nzian zaatne gan̄ miech gbin. <sup>8</sup> Ni lega loxaque miñe rsilosew ga, sac nroobraa guieñn̄e ne gan̄ miech lozh ga.

<sup>9</sup> Zeene laa gr̄e ncuaañ rii noyac, ¡nsin goñso! Sac hor co laa miech tsielo to ladznia zha ne csacsi to, haxta zut zho palal to, gr̄ese miech stsiidiñ zho to loxaque ne nac to zha ne no xn̄ez naa. <sup>10</sup> Nzian zha ne nole xn̄ez

naa, leñ dze co laa zho gbiche, laa zho csilo l̄eëque zha gl̄eënie zha ne nacgr̄e zho, haxta zielo zho zho ladznia zha ne gut zho. <sup>11</sup> Leñ dze co zrieequia nzian zha ne yquidie miech guiab zho xtiidz Dios noteed zho, ni nzian zha ne gliladza. <sup>12</sup> Gr̄e zha ne nole xn̄ez naa, zeene gan̄ zho gr̄etaa guieñtseeb, gr̄etaa doñ ne quiaayñ miech leñ dze co, ndal zho gleyñiedraa zho Dios dib zdoo zho. <sup>13</sup> Per zha ne tiblue gac, gbiched zho lo Dios, niicle teñ petaa gan̄ zho noyac, zha co gac zha ne gdziñ lo me. <sup>14</sup> Niicle scataa noyac gr̄e ncuaañ co, ib none ygaaz Xtiidz Ndzon Dios lo gr̄ese miech, gr̄etaa zaatne ndxie miech laa zho gacnañ; lozhraa ga dzigo laa guidzliu rii nitlo.

<sup>15</sup> Zeene gan̄ to zaatne nac Lugar Nda leñ yadoo, zo tib ncuaañ rieguiñd so ga, tib ncuaañ ziaad gnitlo, zigne bzeet Daniel men̄ ne biadteed xtiidz Dios (zha ne glaba, none guieñ zho zha naca), hor co goñguib dien̄ zha xoon to. <sup>16</sup> Zha ne no gr̄eraa guiedz ne ngab Judé, none xoon zho tsie zho dan, ga tsietsolan zho. <sup>17</sup> Zha ne l̄eëtaque hor co no glaa guic lidz, none l̄eëled xoon zho, ib guiabd zho s̄eëb zho leñ yu tsiebee zho ncuaañ rap zho. <sup>18</sup> Zha ne quiagaa lo dziin dan, ib guñd zho tsie zho lad guiedz tsixi zho xab zho.

<sup>19</sup> ¡Prob gr̄e men̄ wnaa ne l̄eëtse leñ dze co zoney xp̄eëd, men̄ ne quianiegaa mëdyeeñ ne bii radz!

<sup>20</sup> Goñab lo Dios gan̄de to guieñn̄e co leñ mëe ne rac nañ, dze ne rdziiladzga to lo dziin. <sup>21</sup> Ne nligaa guieñn̄edoxa. Wlal ne biaañ guidzliu haxta lo nadze, gard gan̄ miech tib guieñn̄edox sca, ni gan̄dragaa zhow ted ga. <sup>22</sup> Teñe csaan Dios nroob dze gac guieñn̄e co, ni stib miech rii guiaañdraa; per na por gr̄e zha ne bzooblo me s̄eëb xn̄ez me, gdeete me diidz gaca nroob dze.

<sup>23</sup> Zigne rne naa ga, leñ dze ne scataa gan̄ miech gr̄e diñ co, zha ne gn̄e lo to: “Golt̄e nu gan̄le, l̄eë Men̄ ne nole cxeel Dios ga blanso nu”, gn̄egaa zho: “Golt̄sie nec gan̄le, laa me bdziñ ga”, gliladzde tow. <sup>24</sup> Sac zrieequia zha ne yquidie guiab zho zha nac men̄ co, zrieequia zha ne guiab xtiidz Dios ziadteed zho lo miech, zuñ zho gr̄e milagr nroob, parne yquidie zho miech, haxta zha ne nole xn̄ez Dios, zguib zho dien̄ zha gdeeda diidz yquidie zho zho. <sup>25</sup> ¡Nsin sca goñso! Ben̄que laa naa nilew lo to. <sup>26</sup> Nligaa zha ne gn̄e lo to laa men̄ ne pxeel Dios ga blansole, gliladzde tow. Nenda cxeel zho to tib dan zit, gn̄e zho: “Golt̄sie gan̄le laa me no ga”, gn̄egaa zho pa tib leñ yu ne no me, ni tib xtiidz zho gliladzde to. <sup>27</sup> Sac zeene gan̄ dze ne guiaad me stib, gacda ncuaañ ngeets zhliian, gr̄ese miech gan̄ me. Zig teñ guiab tib belye nroob ne glu zhan gbaa, desde n̄ez ne rlan ngbidz haxta n̄ez ne rz̄eëb ngbidz, ¿niacxe gan̄d gr̄ese miecha? <sup>28</sup> Zlupaa zeene laa me guiaad; nan̄le to gan̄le zaatne nix ma gut, ga rcaalsa pech.

### Ziaad Jesús stib

(Mr. 13:24-37; Lc. 12:41-48; 17:26-30, 34-36; 21:25-33)

<sup>29</sup> Zeene lozhse gan̄ miech gr̄e guieñn̄edox co, laa lo ngbidz ycow, gziinidraa mëe. Gr̄e mel ne ndziib gbaa, laa ma gliaal; gr̄eraa ncuaañ no gbaa, masaque n̄ezrii

nëzrec gaca. <sup>30</sup> Horco zlu ganle zeene laa Mgui ne pxeel Dios ga, ziad-zëeb lo xcow con grë guie!ndzon, con grë poder ne rap me, grëse miech mban gac zho, zoon zho gan zho me. <sup>31</sup> Grë xanj! Dios, hor co laa Dios cxeel zho tsiecuedz zho zhitrompet zho parne ycaalsa grëse zha ne ngab xnëz me, tel pa lotaa lo guidzliu no zho.

<sup>32</sup> 'Golzoob cuidad zha nac yag guigw. Led nanle to ganle, zeene laa grë zhicwa racnieen, ni rsilo rdzib zhiblaga, gase rlu ne laa mëë nëëg ziaadgaxle. <sup>33</sup> Scaque nagon zeene gan to laa grë miñe rne naa lo to nu rsilo noyac, dzigo nanle to laa dze ne guiaad men co ziaadgaxle. <sup>34</sup> Gneli naa lo to ganle, nzian miech ne mban niina bii zan zho zeene laa grë ncuaan co csilo gac; sac ible ncuaane gaca. <sup>35</sup> Zdzin dze ne nitlo gbaa, nitlo guidzliu, sangue miñe rne naa lo to nu, nitloda; ible laaw none gac.

<sup>36</sup> 'Lëëraasi choot nan dnen pa dzew, dien pa horgaaw, per ni grë anjl ne no gbaa, per ni naa nan da, loxaque Pxoze naa nan a.

<sup>37</sup> 'Nanle to ganle zha bzhaac miech len dze ne wban Noé, ib biladzd zho xtiidz me. Guxt no zho lo zhilni zho, zha ne notsieelnia, zha ne nobediingaa xpëed, laa dze bdzin laa Noé bzëeb len barcw; tibaque zeene biazho biini laa guiedox co nonitlole zho. Scadaa nagon sac grë miech nad rii, tibaque zeene tsaa zho biini laa Mgui ne pxeel Dios ga ziaadle. <sup>40</sup> Horco zaatne quia chop mgui lo dziin dan; tib zho tsienal zhits me, stib zho guiaan. <sup>41</sup> Zaatne quiayot chop wnaa, tib zho tsienal zhits me, stib zho guiaan.

<sup>42</sup> 'iNsin sca go!so, sac gon nan de to dien pa horpaa guiaad me, benque laa vis racle lo to! <sup>43</sup> Golgan ganle, tel niaca miñe gacnan miech laa ngbaan tsieban lidz zho guieel, per nan d zho dien pa horpaaw; zhiacxe zaaguies zho? Led sobna zho lëë, nsin nsin so zho.

<sup>44</sup> Scaque to nagon, none nsin so to, sac gon lega naclew zeen gan to laa me ziaadle.

<sup>45</sup> 'Golgan ganle, masaque laa to gac nagon zig tib ngundziin ne riaanne ro lidz men ne rquia zho xtsiin.

'Ngundziin ne ndzinli, zeene laa men ne quia zho xtsiin ga griee, ine niowse guiaan zho guiaanne zho grëraa zha ne no lidz me. <sup>46</sup> Zha ne sca gun, jwen tsie zho, sac zeene gbire me gan me scataa noxco zho dziin ne pso me zho, zianzuiu zho lo me <sup>47</sup> haxta so me zho, zha yquiaanap grëse ncuaane rap me!

<sup>48</sup> 'Tel ngundziin yozhgaaw, miñe tsienie guic zho guiab zho gbireniobd men ne quia zho xtsiin ga, <sup>49</sup> csilo zho csacsi zho grëraa zha ne nac ngundziin, csilo zho ctsieelsa zho grë ngonziu tso zho loxaque gzudz zho, loxaque gowcho zho, <sup>50</sup> tibaque zeene gan zho laa me bdzinle. <sup>51</sup> Zha ne sca gun, per peraa dien gun me, ib tedsod nroob caxtigw ne cteed me zho, sonëz me zho guey zho zaatne no grëraa zha ne rond diidz, ga tso zho grë zho zha co goonnë zho, haxta gow lay zho lo guie!nedox ne ted zho.

### Zha bzhaac tsii wnaa nguieg

25 Blozh ga rëbchaa Jesús lo zho:

—Par sëeb miech zaatne rnabey Dios, masaque naca zig rzëeb miech tib lo lni zaatne noyac tib guie!tsieel.

'Tsii wnaa nguieg name, brie zho zixinëz zho mgui ne ctsieelnia, tib tib zho bise zho psin win ne rec nceit ne rziini. <sup>2</sup> Gaay zho goc ligier pcodzë zho zhipsin zho nceit, ni zhaaque bi zho zniipa; laa zgaay zho gocnroladz, zigne bzhense zho psin co scase bi zhow, bid zho nceit ne niodzëraaw.

<sup>5</sup> 'Goc pa hora rio zhimcaalo zho, ni rdzindaque mgui ne zixinëz zho ga, tibaque zeen laa zho pquia mcaal.

<sup>6</sup> Gol gro! guieela, zeen laa vis rac, laa mgui co ziaadle, zha ne zixinëz me ga, zac griee zho tsiedzieel zho me.

<sup>7</sup> Lëëled brie mcaallo gza wnaa nguieg co, psilo zho nozhixcuaa zho zhipsin zho. <sup>8</sup> Zeene gon gza zha nroladz co ygaadraa zhinceit zho, dzigo bnab zho lo zgaay zha co, gdeed zho niip nceit yquiiin zho, sac laa zhipsin zho noyuule. <sup>9</sup> Pquiab zho rëb zho: "Grieeloda, sac miñe yquiiinse zhipsin no ziaadnie no. Mazd go!tsie zatne rto zhow, ga go!tsiexiw."

<sup>10</sup> Per lo lal ne zixi zho nceit, laa mgui co bdzin. Zeene wbire zho, laa ro yu nioogle, loxaque gza zha ne nsinle zo ga, zha cose bzëeb len yu. <sup>11</sup> Dzigo psilo zho, rcaan nia zho ro yu, rbedz zho mgui co cxal me ro yu sëeb zho. <sup>12</sup> Per bdeete me diidz nzëeb zho, rëb me: "Runbeyd naa to gon, nan d naa dien cho nac to."

<sup>13</sup> 'iNsin sca go!so! —rëb Jesús—. Sac gon nan de to pa dzepaa, pa horpagaa gbiire guiaad Mgui ne pxeel Dios.

### Zha ne biaanne dimi

<sup>14</sup> 'Mgui ne pxeel Dios ga, ziaad gac me zig tib men ne no griee tsie tib viaj zit.

'Tib men name no griee me tsie me tib guiedz zit, dzigo bredz me zha ne run dziin lo me, bdeed me palalga xtimi me lo zho gundziin zhow len dze ne guie!nd me ga. <sup>15</sup> Tib zho pcaania gaay mil pes plat, tib zho chop mila, stib zho pcaania tib mila. Tib tib zho, bdeedse me miñe rgobey me grieelo zho gundziin zho, dzigo laa me brie laa me zie.

<sup>16</sup> 'Zha ne biaanne gaay mil pes plat co, güey zho bloonon zhow, beena gan zgaay mila. <sup>17</sup> Zha ne biaanne chop mila, ye zho güey zho bloonon zho dimi co, scaque beena gan schop mila. <sup>18</sup> Laa zha ne pcaania tib mila ga, lel güey zho güeyteen zho tib guieer güeyliu zhow.

<sup>19</sup> 'Goc bla iza laa men co bdzin, dzigo bredz me zho tib tib zho, tsie zho gzodiidz zho dien yo dimi ne biaanne zho ga.

<sup>20</sup> 'Bdzin zha ne pcaania gaay mil pes plat co, bdzin zho xtimi me, rëb zho: "Laa xtimi luu nu gon, lëë gaay mil pes ne psan luu lo naa nu, laa zgaay mil miñ rii nac miñe bdziniaaw." <sup>21</sup> Rley me rëb me lo zho: "iZha squi nagon racladz naa! Rley naa ran naa squitaa ndzinli luu, squitaa nguzobdiidz luu; sac gon lo palalse dimi ne psan naa lo luu ga, bioxco luu zaacse bendziin luu. Nana gon, nroobraa miñe gnedz naa gundziin luu. iNa bded, zeena yгаа luu grë guie!bley ne quiayac nu!"

<sup>22</sup> Blozh ga, bdziñaque zha ne biaanñie chop mila ga, ye zho laa zho bdziñnie xtimi me, rëb zho: "Laa xtimi luu nu gon, lëë chop mil pes ne psan luu lo naa nu, laa schop mil miñ rii nac miñe bdziniaaw." <sup>23</sup> Pquiab me rëb me: "¡Squiw nagon! Rley naa ran naa squitaa ndzinli luu, squitaa nguzobdiidz luu lo naa; sac gon lo palalse dimi ne psan naa lo luu ga, bioxco luu zaacse bendziin luuw. Nana gon, nroobraa miñe gnedz naa guñdziin luu. ¡Na bded, zeena yгаа luu grë guie|bley ne quaiyac nu!"

<sup>24</sup> Zeene bdziñntaa zha ne biaanñie tib mila ga, rëb zho lo me: "Nli bendziind naa xtimi luu, sac nanle naa zha nac luu, niicle paraa niuñdziin naaw, grëse miñe niuñgan gan lo luu niaana; <sup>25</sup> gane mazd bialoliu naaw. Tib mil naca bneedz luuw, ledaaw nu." <sup>26</sup> Blëë guic me, rëb me lo zho: "¡Biche nu, paat rquiind naa miech yozh, miech nroladz ne squi nac! Conque nanle luu sca nac naa, <sup>27</sup> ¿pex nac dzigo waa bioxcol luu maase mbediin luu dimi qui, ndziniaaw palal ncaania naaw niina?" <sup>28</sup> Dzigo rëbchaa me lo zha ne ndxie ga: "Ni-inagazh golcob tib mil pes qui lo zha qui, goldeeda lo zha ne ziaadnie tsiw i. <sup>29</sup> Sac zha ne rioxco ruñdziin ncuaañe rcaania zho, zacnroobraa ncuaañe yquianie zho. Laa zha ne squi nac, haxta miñe pcaaniale zho, zdioba lo zho. <sup>30</sup> Golxen zha yozh qui, goltsiesan zho lo ncow nëz ley. Ga gan zho guie|ñëdox ne tsieguial zho, ga goon zho haxta gow lay zho."

### Zha gon Jesús guie|wxtis

<sup>31</sup> Blozhse bzodiidz Jesús cuent co lo zho, rëbchaa me:

—Naa ne nac naa Mgui ne pxeel Dios, zeen gal dze ne laa naa guial stib, zialnie naa grë xanjil naa, zlu grë-taa guie|ndzon ne rap naa, laa naa sob lo xcan ne ragual naa soob naa. <sup>32</sup> Grëse miech ne ndxie dib-doose lo guidzliu, hor co laa zho gacredz lo naa, laa naa cueextso zho zig rbeextso baxtor chiv lad xpëcwxi-il zho. <sup>33</sup> Zha ne no xnëz naa, zha co gdziñ naa cue naa nëz derech, laa zha ne nod xnëz naa, cue nëz revés.

<sup>34</sup> Lozhse ga, naa ne nac naa men ne rnabey, hor co laa naa cuetz zha ne no xnëz naa, guiep naa lo zho: "Golte grëse to, to ne nac to zha ne nziuu lo Pxoza naa. Golted zeena ycaania to zaatne cuëz to, ible par to bzaa mew desde zeene bzaa me guidzliu. <sup>35</sup> Sac zeene pcaabedz naa, bneedz to ncuaañe dow naa; zeene bnaab zhis naa, bneedz to ncuaañe go naa; zeene bial naa ladz to, bneedz to lidz to blëz naa; <sup>36</sup> zeene gon to guieñd xab naa, bgacwxab to naa; zeene bzhaacñe naa, zeene bio naa ladzguuib, biaad to biaadgan to naa." <sup>37</sup> See zdoo zho gnë zho: "¿Per pa hor bneedz no ncuaañe doow luu, ncuaañe go luu, pa hor bneedz no zaatne blëz luu, pa horgaa bneedz no lar ne gotxab luu, ib bdziñd no nzaacñe luu, bdziñd no niogaa luu ladzguuib?"

<sup>40</sup> Dzigo guiep naa lo zho: "Gzobtaa hor ne gon been to xyudar zha ne nacgrë to, güeygan to zho, pcaania-gaa to zho, niicle zha ne bzoob miech peet nonda,

rrieequia xyudar naa ga been to, rrieequia naa ga bi-aadgan to."

<sup>41</sup> Laa zha ne ndxie nëz revés, hor co laa naa gzonëz zho, guiep naa lo zho: "¡Golbiche lo naa nu, miech ndziibdee! ¡Golsë lo guidox ne rieguial to, zaatne no guey mendox grë xanjil ma! <sup>42</sup> Sac gon, bio dze pcaabedz naa ni bneedzde to ncuaañe niow naa; bnaab zhis naa, ni bneedzde to pe nie naa. <sup>43</sup> Bial naa ladz to, ni bneedzde to zaatne mbëz naa; gon to guieñd xab naa, ni ni tib lë lar bneedzde to niacw naa. Bio naa ladzguuib, bzhaacñe naa, ni pe liaadz to niaadgan to naa."

<sup>44</sup> Squiab zho gnë zho lo naa: "Per pa hor bdziñ no luu rcaabedz luu, rnabgaa zhis luu; pa hor bdziñ no guieñd pa cuëz luu, guieñd lar ne gacw luu; pa horgaa bdziñ no no luu ladzguuib, nixgaa luu rzacñe luu."

<sup>45</sup> Dzigo guiep naa lo zho: "Grëse vuelte ne bzoliaadz to niuñ to xyudar zha ne no xnëz naa, bzoliaadz to niegan to zho niicle zha ne mazdraa wina, rrieequia naa ga sca been to."

<sup>46</sup> Horco grëse zha co laa zho guey lo guidox ne gdziñdraa dze griee zho; laa zha ne bioxco wban zigne rnabey naa, grëse zho laa zho yгаа tib guie|mban ndzon ne gdziñdraa dze lozh.

### Bnediiz zho dieñ zha gnaaz zho Jesús

(Mr. 14:1-2; Lc. 22:1-2; Jn. 11:45-53)

**26** Zeene blozh sca bnee Jesús lo grë miech co, dzi-gon rëbchaa me lo xpëëdscuel me:

<sup>2</sup> —Nanle to ganle schopaque ngbidz, laa lni Pascw csilo. Naa ne nac naa Mgui ne pxeel Dios, lo lni co gon gnaaz miech rii naa, tsielo zho naa ladznia zha ne yquiaa naa lo cruz.

<sup>3</sup> Grë zha ne nac pxoz ne rnabey, grë maistr ley ni grë zha ne nac men non lo men guiedz Israel, lëëtaque hor co laa zho ndxie lidz Caifás, men ne nac pxoz nroob. <sup>4</sup> Laa zho ndxie ga, nonediidz zho dieñ zha griee lo gnaaz zho Jesús, gut zho me, per tib mod ne griee lo glisqui men guiedza. <sup>5</sup> Rnee zho: "Lëëraasi choot gnabeyd yгаа me merpaa dze lni, zeena gacntseebd men guiedz."

### Pchoob tib wnaa nceit nex guic Jesús

(Mr. 14:3-9; Jn. 12:1-8)

<sup>6</sup> Betain ga no tib men ne biac lo guiedz lepr, lë Simón. Lëëtaque no Jesús lidz men co, <sup>7</sup> zeene bdziñ tib wnaa bdziñnie tiblo nceit nex, nosew tib len ncuaañ win niaa niapse quie rbebni, tiblo nceit niazha. Squi zob Jesús lo mezh, güey wnaa co güeychoob me nceit co guic Jesús. <sup>8</sup> Zeene gon xpëëdscuel Jesús sca been wnaa co, blëë zho, rnee zho:

—¡Pa rieguiala squi pxin zhlë wnaa qui nceit qui! <sup>9</sup> Tel niaca miñe ndow, pe zhidaa dimi ne nguizh zhow, nquiinpa dimi co ngaaza lo grë zha ne guieñd pe yquiin.

<sup>10</sup> Gon Jesús sca rac zho, dzigo rëbchaa me lo zho:

—¿Pe nacne rlëë to lo wnaa qui? Golsaan me. Par naa nroob non miñe been me i. <sup>11</sup> Tel nli lëë racladz to

gun to xyudar zha ne guiend pe yquii, zac ygad to lo zho stib dze, sac tibaque ran to zho; sangue naa zhile laa naa gbiche lo to. <sup>12</sup> Led pxin zhléd wnaa rii zhinceit me, sac gon rrieequia laa me bzhixcuaale xcuerp naa nu gal dze ne ygueetsa. <sup>13</sup> Gneli naa lo to ganle, dipse lo guidzliu zaatne cseedtaa miech Xtiidz Dios, ible so-ladz zho wnaa rii, seet zho miñe been me nu.

**Güeyto Judas Jesús**  
(Mr. 14:10-11; Lc. 22:3-6)

<sup>14</sup> Lo gza tsiipchop zha ne nac xpëedscuel Jesús ga, brie zha ne lë Judas Iscariot güeyzodiidznie Judas grë zha ne nac pxoz ne rnabey, <sup>15</sup> rëb Judas lo zho:

—¿Palal quizh to naa telne gun naa Jesús ntregar lo to?

Dzigo biaan zho diidz quizh zho Judas galptsii pes plat. <sup>16</sup> Nacne psilo Judas noguib Judas dien zha gdeeda diidz csañ Judas me ladznia zho.

**Dowxtseenie Jesús xpëedscuel me**  
(Mr. 14:12-25; Lc. 22:7-23; Jn. 13:21-30; 1Co. 11:23-26)

<sup>17</sup> Mer dze ne rsilo lni Pascwa, len dze ne sca row zho quietxtil ne riotsd ncobi ga, bnabdiidz xpëedscuel Jesús lo me dien pa lo racladz me tsiegunlo zho ncuane gowxtseenie me zho wdze co. <sup>18</sup> Dzigo rëbchaa me lo zho:

—Nanle to ganle cho lidz zrieelo gdziñ ne. Goltsie Jerusalén golguiab lo zho: “Znu në xmaistr no: Gneedz luu lidz luu me dioww no xtsee Pascw rii. Niinataa laa xtse me bdziñ, gane racladz me lidz luu nu diowxtsee no nawdze grë no me.”

<sup>19</sup> Dzigo laa zho zie. Güey zho zaatne pxeel me zho ga, ga beenlo zho xtsee co.

<sup>20</sup> Wdze co, laa me no xtsee grë me zho, zeene bnee me lo zho rëb me:

—Gacnan to ganle, lëeque tib to gon tsielo naa ladznia zha ne gnaaz naa nawdze rii.

<sup>22</sup> Zeene bin zho sca rëb me, mbanse rac zho, dzigo psilo zho tibga tibga zho rnabdiidz lo me, rnee zho:

—Bnë dien, ¿cho gun miñ co? ¿Pe naaw?

<sup>23</sup> Pquiab me rëb me lo zho:

—Zha ne gan to csëeb xcuuñ len xquien naa, lëe zho ga. <sup>24</sup> Naa ne nac naa Mgui ne pxeel Dios, niina laa miech gut naa zigne raquietsew lo Xtiidz Dios; per, jprobsaxe zha ne tsielo naa ladznia zho! ¡Mazd wen nie zho, ib niacd zho miech lo guidzliu!

<sup>25</sup> Yeze Judas rnabdiidz lo me rnee Judas:

—Maestro, ¿pe goon naaw ye?

Rëbchaa me lo Judas:

—Luuw gon Judas, luu güeyto naa.

<sup>26</sup> Laa zho noyow, zeene bzheñ Jesús tib quietxtil, bdeed me xquizh lo Dios, blozh ga beengroñ mew, dzigo bdiiz mew lo zho, ni rëb me:

—Golquiina, lëe xcuerp naa i gon.

<sup>27</sup> Ni bzheñ me tib cop nroob vin, bdeed me xquizh lo Dios, blozhse bdeed me xquizh, dzigo pteed me cop co lo zho grëse zho, rëb me:

—Golguie vin qui, <sup>28</sup> sac lëe xchen naa i, miñe no gzhiee par guiaanmbe grë miech lo xtoñ zho sëeb zho xnëz Pxoz naa, sac lëe stib mod cub nu psañ me parne sëeb miech xnëz me. <sup>29</sup> Lëe lultm vuelt nu guie naa vin rii, sac zhaale stib vin cub ne guie naa gal dze ne guenie naa tow zaatne rnabey Pxoz naa.

Dzigo psilo me biñnie me Dios gza me zho.

**Bzeet Jesús zha gun Pedr**  
(Mr. 14:26-31; Lc. 22:31-34; Jn. 13:36-38)

<sup>30</sup> Blozhse biñnie zho Dios, laa me brie zha gza me zho, laa me zienie zho nëz Gui Oliv.

<sup>31</sup> —Ible saan to naa nawdze rii —rëb me lo zho—, sac scale ziaad lo Xtiidz Dios zaatne rnee: “Zdeed Dios diidz csiwee zho baxtor, lozh ga nëzrii nëzrec gliaañ mëcwxiiil.” <sup>32</sup> Miñcopaa nagon gun miech naa, per zeene laa naa grieaban glole naa ga Galilé, ga cuëz naa to.

<sup>33</sup> Dzigo rëbchaa Pedr lo me:

—Niicle telne saan grë zha qui luu, sangue naa gon csaand naa luu.

<sup>34</sup> Pquiab me rëb me lo Pedr:

—Gneli naa lo luu ganle, guieel riigazh, gardle ycuedz gall, laa luu csale tson vuelt guiab luu runbeyd luu naa.

<sup>35</sup> Per tibaque nac xtiidz Pedr, rnee Pedr lo me:

—Niicle tel zaatne guet luu guet naa, per gunscad naa. ¿Pe nacne guiep naa runbeyd naa luu?

Scaque rnee grëraa xpëedscuel me.

**Bzodiidznie Jesús Pxoz me Getsemaní**  
(Mr. 14:32-42; Lc. 22:39-46)

<sup>36</sup> Zeene bdziñnie Jesús zho zaatne lë Getsemaní, dzigo rëbchaa me lo zho:

—Nuse nagon golsob, laa naa ga gazodiidznie naa Pxoz naa.

<sup>37</sup> Horco psilo mban rac zdoo me, riabguieñe me, dzigo bredz me Pedr, ni grop xingan Zebedé, bzënie me zho palal <sup>38</sup> dzigo rëbchaa me lo zho:

—Mban rac zdoo naa, zootle zig zet naa lo guieñe rii. Nuse nagon golguiaan, per golsobna.

<sup>39</sup> Bzë me spalal, dzigo pquitsgzhie me haxta bdziñ lo me lo liu; psilo me bnab me lo Dios, rëb me:

—Papá, laa naa rnab lo luu, telne zala zdoo luu, bzhiguieñ psilaa naa lo grë guieñe rii. Miñ rii rnab naa lo luu, per telne grieeloda, miñe gnëtaa luu, miñ co gac.

<sup>40</sup> Zeene guso me, güey me zaatne biaan gza tson zha co, gon me laa zho nixguiesle; dzigo rëbchaa me lo Pedr:

—¿Pe ni palal blëbde to nzobna to? <sup>41</sup> Golsobna, golnab lo Dios zeena yquiid mendox to. Niicle ne squi lëbdraa xcuerp to sobna to, per golnab lo Dios, sac gon miñ co nac miñe racladz zhiespíritu to.

<sup>42</sup> Dzigo güey me stib, güeyzodiidznie me Dios; scaque miñe bnab me glo miñcoque bnab me.

<sup>43</sup> Zeene wbiire me bdziñ me lo zho, gon me laa zho nixguieslaque, sac lëbdraa zho mcaañ. <sup>44</sup> Wbiire güey



me güeynab me lo Dios, scaque mincoque bnaab me.  
<sup>45</sup> Zeene laa me wbiiretaa bion vult co, rëbchaa me lo zho:

—Lëew nagon, zacle na gagueies to, zacle gdziiladz to. Naa ne nac naa Mgui ne pxeel Dios, laa hor nagon bdziñ zeene laa grë miech ntseeb rii guidnaaz naa.  
<sup>46</sup> Goltisieso, zeena zio ne; sac gon laa zha ne glu naa lo zho ziaadle nu.

### Bnaaz zho Jesús

(Mr. 14:43-50; Lc. 22:47-53; Jn. 18:2-11)

<sup>47</sup> Laa Jesús bii quianeeque, zeene laa Judas (tib zha ne nac xpëedscuel me) bdziñ, bdziñnie Judas tib dzoon zha ne pxeel grë pxoz ne rnabey, ni grë zha ne nac zha non lo men guiedz Israel. No zho nzhen spad, nogaa zho nzhen yag. <sup>48</sup> Biaaniele Judas zho diidz zha glu Judas cho nac Jesús, rëb Judas lo zho zha ne gan zho gow Judas bzhid cuas, lëe me ga, ligier so zho gnaaz zho me. <sup>49</sup> Zigne bdziñ Judas pquiaabdiuzh Judas me, blozhse ga wbig Judas dow Judas bzhid cuas me. <sup>50</sup> Dziggo rëbchaa me lo Judas:

—Judas, ¿pe ziaadgun luu nu?

Lëelëd wbig be grë zha co, bzhen zho me. <sup>51</sup> Horco biet tib zha ne rzënie me ga, bdoob zho zhispad zho psilaa zho tib niaw, bliengaa zho diag tib zha ne rquia xtsiñ men ne nac pxoz nroob. <sup>52</sup> Dziggo rëb Jesús lo zha ne pquiaaw ga:

—Blootsow zhispad luu, ib gundraa luu squi cob luuw. Sac gon zha ne rdiñ con spad, noxtseeb ne low guet zho. <sup>53</sup> ¿Niacxe nan to na grieelod gnab naa lo Pxoz naa niina cxeel me tsiipchop partid xanj me guiaadla ne nu? <sup>54</sup> Per telne sca gun naa, ¿zha dzigo gac mine zhobnee lo Xtiidz Dios, zaatne raquiet mine noyac nu?

<sup>55</sup> Dziggo rëbchaa me lo grë zha ne bdziñ ga:

—¿Pe nacne squitaa rac to? ¿Niacxe naa cho zha ntseeb, ne squitaa nzhen to spad, nzhen to yag ziaadnaaz to naa? Blactaa name gon to noseed naa miech len yadoo, ¿pe nacne bnaazde to naa ga? <sup>56</sup> Per ible laa grë ncuang rii gon noyac, zeena grieequia grë mine bzeet grë zha ne biadteed xtiidz Dios lo miech padzeela.

Horco grëse zha ne nac xpëedscuel me laa zho bzhoon, tipse me psan zho ga.

### Güeynie zho Jesús lo zhiwxtis zha Israel

(Mr. 14:53-65; Lc. 22:54-55, 63-71; Jn. 18:12-14, 19-24)

<sup>57</sup> Ga brieenie zho Jesús bdziñnie zho me lidz Caifás, men ne nac pxoz nroob. Grë zha ne rnabey lo menguiedz Israel, laa zho ndxiele ga. <sup>58</sup> Ye Pedr maase zit zit nañ Pedr laa Pedr bdziñ xley men co. Bdziñ Pedr güeysoyga Pedr lo grë zha ne ndxienap, quiambëz Pedr dien zha gun zho Jesús.

<sup>59</sup> Grë pxoz ne rnabey, grë zha ne nac zha non lo menguiedz, grëse zha ne nac wxtis, laa zho ndxie nëz len yu co, quiaguib zho zha ne gzhixcuua maase didzguizh ycaadz zho Jesús, parne gdeeda diidz gnab zho guet me. <sup>60</sup> Ndal zha ne sca been, per brieequiad

xtiidz zho, sac zhaase zhaase rnee zho. Tibaque zeene guso chop zho, <sup>61</sup> rëb zho:

—Bdzion no gon rnee me laa me ctixche yadoo ne zob lad guiedz nu, zaatne riodzian ne Dios, lozh ga tsonaque ngbidz gzaalo me stiba.

<sup>62</sup> Dziggo hor co bzoli men ne nac pxoz nroob, rëb me lo Jesús:

—¿Pe nacne rquiabd luu? ¿Pe nli sca rnee luu, te nli-da ye?

<sup>63</sup> Gon pxoz nroob co rquiabduaque Jesús, rëbchaa me:

—Zig zob Dios mban ne no gbaa, laa naa rnab lo luu bneeli lo no dien cho nac luu. Bnë tel nli Xpëed Dios nac luu, Men ne zëëble diidz ga cxeel me.

<sup>64</sup> Dziggo pquiab Jesús rëb me:

—Scaw gon, naa nac men co. Naa ne nac naa Mgui ne pxeel Dios, bii zan to ganle zeene laa naa zoob cue Dios nëz derech, ni zeene laa naa guieet gbaa zialzëeb naa lo xcow.

<sup>65</sup> Horco ptsiez pxoz nroob co xab me, sac blëe me bin me sca rëb Jesús.

—¿Pe mazdraa textigw ne racladz ne? —rëb me—. Laa to binle ganle zha rzëtaa xtiidz me noguitnie me Dios. <sup>66</sup> Nana waa, ¿pe gnë to zha dziuun ne me?

Pquiab be zho rëb zho:

—¡Ib rieguiañ guet me!

<sup>67</sup> Dziggo hor co psilo zho nosacsi zho me. Zha ne rt-suc lo me, zha ne rdeed puñet me, nogaa zho rgap lo me, <sup>68</sup> rlozh ga rzhidnie zho me rnee zho:

—Luu ne nac luu men ne pxeel Dios, ¿bnë dien cho ga bdiñ luu?

### Rëb Pedr runbeyd Pedr Jesús

(Mr. 14:66-72; Lc. 22:56-62; Jn. 18:15-18, 25-27)

<sup>69</sup> Horco laa Pedr bii zob nëz ley. Ga zob Pedr, güey tib ndzoop ne quia dziin lidz men rnabey co; rëb ndzoop lo Pedr:

—¿Ye luu lëe rzënie Jesús, men Galilé ne bdziñnie zho i?

<sup>70</sup> Per bneelid Pedr. Squi zob grë zha co, rëb Pedr:

—Rienñ naa dien cho men rnee luu.

<sup>71</sup> Laa Pedr ziele nëz ro puert ne quia ro nëz, zeene gon stib ndzoop ne rquia dziin ga Pedr, rëb ndzoop lo zha ne ndxie ga:

—Ye mgui qui gon nacgrë men Nazaret ne bdziñnie zho i.

<sup>72</sup> Scaque bneelid Pedr, haxta rzeet Pedr Dios rëb Pedr runbeyd Pedr me. <sup>73</sup> Wdzeepaaw, rëb zha ne ndxie ga lo Pedr:

—Ne nligaa ye luu rzënie men ne bdziñ i. ¡Rlupaa name zig rnee zha nëz Galilé rnee luu!

<sup>74</sup> Dziggo psilo Pedr rzeet Pedr Dios rnee Pedr runbeyd Pedr Jesús, haxta rnee Pedr:

—Dios zobwi ganle, telne led diidzlid nu rne naa, maase cuibdee naa.

Loxaque blozh sca brieer ro Pedr zeene laa tib gall pcuedz. <sup>75</sup> Horco psoladz Pedr xtiidz Jesús zeene rëb me lo Pedr: “Gardle ycuedz gall, tsonle vult rëb luu

runbeyd luu naa." Dzigo mbanse rac Pedr. Brieed Pedr ga, psilo Pedr biin Pedr guieḽnē co.

**27** Ziadyiinile liuw, wbiire pcaalsa grē pxoz rnabey, grē zha non lo menḡuiedz, bnediidz zho dieḡ zha gnabey zho guet Jesús. <sup>2</sup> Blozhse bzodiidz zho, dzi-go laa zho bzobdoo me blee zho me ga ziesan zho me lo Pilat, meḡ ne nac gobernador.

### Gut Judas

(Mr. 15:1; Lc. 23:1-2; Jn. 18:28-32)

<sup>3</sup> Laa Judas Iscariot zha ne pto Jesús ga, zeene bin Judas laa zho rnab guet me, lēēlēd güey Judas lo grē pxoz rnabey co, lo grē zha non lo menḡuiedz ga, zietsire Judas dimi ne bdiizh zho Judas ga. Mban rac Judas, <sup>4</sup> bdziḡ Judas rēb Judas lo zho:

—Naraa rienḡ naa lēda nu beḡ naa. ḡTib doḽ nrooble nu, znu biaḽto naa tib meḡ ne peet xtoḽd!

Pquiab zho rēb zho:

—ḡMiḡcota gōḡ ndioḡd no! ḡXcuentzhe luu ga!

<sup>5</sup> Horco pcheḽ Judas dimi co leḡ yadoo. Lo guieḽnē co brieed Judas ga güey Judas lēēque Judas pxiiyanḡ Judas.

<sup>6</sup> Grē zha ne nac pxoz rnabey ga, güey zho ptop zho dimi co. Per blozh ga, rienḡd zho dieḡ zha guḡ zhow.

—ḡZha dziuunḡ ne dimi rii? —rēb zho—. Teḽne guiaaḡa yadoo, per rdzieelda, sac gōḡ xchen tib miech bdzēew.

<sup>7</sup> Dzigo bzodiidz zho dieḡ zha gaca, nagne mazd pquiin zhow bzhii zho tib lē liu, zaatne rdieeḡ yu ne rīaa grē ncuaaḡ psin ne rquiin; parne lo liu co ygueets grē zha zit ne guet Jerusalén. <sup>8</sup> Nagne brieelē liu co "Liu ren", ni sca runbey zhow leḡ dze rii. <sup>9</sup> Ga brieequia miḡe bzeet zha ne biadteed xtiidz Dios padzeela, zeene rēb zho: "Gaḽptsii pes plat ne bzhii zha Israel meḡ nziuu co, dimi co bzhii zho tib lē liu, zaatne rdieeḡ yu ne rīaa grē ncuaaḡ psin ne rquiin. Sca nē Dios lo naa."

### Bnab zho guet Jesús

(Mr. 15:2-20; Lc. 23:3-5, 13-25; Jn. 18:33-19:16)

<sup>11</sup> Bdziḡnie zho Jesús lo Pilat, ga bnabdiidz Pilat lo Jesús rēb Pilat:

—Bnē dieḡ, ḡpe nli luu nac zhirey zha Israel?

Pquiab me rēb me:

—Nliw.

<sup>12</sup> Grē zha ne nac pxoz rnabey ga, ni grē zha ne nac zha non lo menḡuiedz, rzadraa ncuaaḡe rquiaqui zho me; per ni tib diidz rtsired me lo zho. <sup>13</sup> Dzigo rēbchaa Pilat lo me:

—ḡPe nagne rquiabd luu? ḡPe ib rond luu grētaa ncuaaḡe rquiaqui zho luu i?

<sup>14</sup> Bzee zdoo Pilat gōḡ Pilat, ible rquiabd me.

<sup>15</sup> Gzobse iz, zeene raḽ lni Pascw rnabey Pilat rlaa tib zha ne no ladzguiib, zha ne gnabtaa menḡuiedz laa.

<sup>16</sup> Leḡ dze co no tib zha ntseeb ladzguiib lē Barrabás, zēēb xtiidz zho. <sup>17</sup> Nagne rēb Pilat lo grē zha ne ndxie ga:

—ḡCho racladz to csilaa naa? ḡPe silaa naa Barrabás, te silaa naa Jesús ye, meḡ ne nac diidz pxeelḽ Dios lo to?

<sup>18</sup> Sca rēb Pilat sac bieḡ Pilat loxaque porne ndal miech nobig lo Jesús miḡ co ne rlēēnie zho me, bnabey zho bgaa me.

<sup>19</sup> Laa Pilat zob lo xcan ne runḡ me guieḽwxḡtis, zeene bdziḡ tib mandad rēb lo me:

—Znu nē tsieel luu: bzhiguieḽ me peet guḡd luu meḡ qui, rlu peet xtoḽd me; sac nieewdze me nroob ptseb mcaalḽ tsieel luu.

<sup>20</sup> Grē zha rnabey co, bio zho pquiil zho menḡuiedz gnab zho csilaa Pilat Barrabás, ni gnab zho guet Jesús.

<sup>21</sup> Zeene wbiire Pilat bnabdiidz Pilat stib, dieḡ chopaa racladz zho laa, grēse zho nguiedz pquiab be zho, rēb zho:

—ḡBarrabás psilaa!

<sup>22</sup> Dzigo rēbchaa Pilat:

—Meḡ ne waa nac diidz pxeelḽ Dios lo to nu, ḡzha guḡ naa me?

Pquiab zho rēb zho:

—ḡBnabey yquia me lo cruz!

<sup>23</sup> —ḡPer pe nagne yquia meḡ rii lo cruz? —rēb Pilat—. ḡNi tib doḽ rapd me!

Biire zho nguiedz roptsie zho rnab zho yquia me lo cruz. <sup>24</sup> Gōḡse Pilat rquiaadiagd zho xtiidz me, leḽ mazdraa rac zho, dzigo bnab me nis, squi ndxie zho bdiib me nia me, rēb me lo zho:

—ḡNaḡle to nasca, led xtoḽdraa naa nu ne laa xchen meḡ rii gzhiee, sac nanḡaa naa peet falt rapd me!

<sup>25</sup> Pquiab be zho rēb zho:

—ḡPeet nacd ga! ḡZhits no grē xpēed no cuib doḽ co, na no guiotizha!

<sup>26</sup> Dzigo bnabey Pilat blaa Barrabás, laa Jesús racse me bnabey me zha ne bdiḡ Jesús, blozhse ga laa me psan Jesús ladznia menḡuiib ne tsiequiaa me lo cruz.

<sup>27</sup> Biire grē menḡuiib co bzēēbnie zho me nēz leḡ yu-low, ga pcaalsa grēraa menḡuiib ne nacgrē zho, briḡ zho igose me. <sup>28</sup> Blee zho xab me, bgacw zho me tib lar nizhnie nlaan, zig rna lar ne racw grē rey, <sup>29</sup> bzieecw zho bla lē yag guiets, bzoob zhow guic me zig rzob coron guic zha ne nac rey, ni bloo zho tib lē goobgui nia me. Runḡguzee zho me, rquiitsgzhib zho lo me, rnee zho:

—ḡGoḽwi gaḡle zha ractaa zhirey zha Israel!

<sup>30</sup> No zho rtsuc zho lo me, rgob zho goobgui ne no nia me ga, rdeed zhow guic me.

### Güeyquiaa zho Jesús lo cruz

(Mr. 15:21-32; Lc. 23:26-43; Jn. 19:17-27)

<sup>31</sup> Blozhse sca bdziitnie zho me, blee zho lar nizhnie co lad me, bgacw zho me xab me stib, dzigo laa zho brieenie me ga zienie zho me zaatne yquia me lo cruz.

<sup>32</sup> Nēz zienie zho me bdzieel zho tib meḡ Ciren lē Simón, bnabey zho meḡ co bi me zhicruz me.

<sup>33</sup> Zeene bdziḡ zho zaatne nac "Gui Beerguic Ngutoo" (Gólgota), <sup>34</sup> ga bdeed zho nziu lo me notsa tiblo guizh nlayag, per zeene pquiaaro mew bieḡ me nziu cow, bnēd me nie mew.

<sup>35</sup> Blozhse pquiaa zho me lo cruz, bzheḡ zho tib xab me pchug zhow biaaḡnie zho tib lēgaw, laa stiba bio

zho rif; dzigo laa zho bzob ga, bzobnap zho. <sup>37</sup> Guic zhi-cruz me, ga pquiaa zho bla lan diidz zaatne rnee: "LĒĒ JESUS NU, MENĒ NE NAC ZHIREY ZHA ISRAEL." Sca pquiaa zho, sac miŋco pquiaqui sca pquiaa zho me lo cruz. <sup>38</sup> Ye chop ngbaan pquiaagza zho me lo cruz, tib-ga zhiczuz zho bzo tib nĕz cho zhiczuz me. <sup>39</sup> Grĕse miech ne rdedtaa raŋ zho laa me quia ga, rzhidznie zho me, haxta rdzi zho guic zho <sup>40</sup> rnee zho lo me:

—Led rĕb luu lĕĕ laa luu ntsil yadoo, ni tsonaque ng-bidz nzaalo luu stiba, ĩpe nac dzigo rrieelod luu guieet luu i? Teĭne nli Xpĕĕd Dios nac luu, biet lo qui.

<sup>41</sup> Scaque grĕ pxoz rnabey, grĕ maistr ley, grĕ zha farisĕ ni grĕ zha ne nac zha non lo menġuedz, rzhidznie zho me, rnee zho:

<sup>42</sup> —Stib miech scataa beenguiac me, stib miech scataa bla me, ĩpe nac dzigo rrieelod me gla me me? ĩGooŋ me name nac zhirey ne, quiet me i sca zho; zeeŋa dziuunbey ne menġ rnabey nac me! <sup>43</sup> ĩConque tant rnalo me Dios, haxta rnee me Xpĕĕd Dios nac me, guiaadsilaa Dios me i nazho!

<sup>44</sup> Ye ngbaan ne quiaagza me lo cruz ga, miŋcoque rbidzgo zho lo me.

### Gut Jesús

(Mr. 15:33-41; Lc. 23:44-49; Jn. 19:28-30)

<sup>45</sup> Zig groĭ dzew, tibaque zeeŋ goc tib ncow dipse lo guidzliu, haxta las tres baa biini stib. <sup>46</sup> Horco nguiedz zĕĕb tsi Jesús, rnee me:

—Elí, Elí. ĩLama sabactani?

Diidz co nac zig nac ne rnee ne: Luu nac xDios naa, luu nac xDios naa. ĩPe nacne psaan luu naa?

<sup>47</sup> Zha ne ndxie ga, zeeŋe bin zho sca rbedz me, no zho rĕb Lí, menġ ne biadteed xtiidz Dios padzeela, menġ co rbedz me. <sup>48</sup> Dzigo rias tib zho güeygad z tib lĕ zhiil lo nziu bla, bzoob zhow tib guic goobgui pquiaa zhow ro me. <sup>49</sup> Laa zla zho rnee:

—Psaan, nu dziaŋ ne dieŋ pe ziaad Lí guiaadlit Lí me i.

<sup>50</sup> Tibaque zeeŋe pquiaa me stib redz nroob, znuse blozh me.

<sup>51</sup> Horne nolozh me ga, hor co briez nzoli lar nroob ne quia leŋ yadoo, groĭtaa goca; psilo bni tib zhodox, grĕ quie masaque wbiĭa, <sup>52</sup> nzian ro baaŋ grĕ zha ne bnalo Dios mazd padzeela bzhial. <sup>53</sup> Zeeŋ goĭ dze ne brieaban me, ye zho laa zho brieaban, briea zho leŋ baa, bzĕĕb zho lad guiedz; nzian miech ne goŋ zho.

<sup>54</sup> Grĕ menġuiib ne quianap me ga, ni zha ne rnabey lo zho, zeeŋe goŋ zho bni zho co, ni goŋ zho grĕ ncuaaŋe goc ga, per nli bdzieb zho.

—ĭNe nlipagaa —rnee zho—, Xpĕĕd Dios nac menġ qui!

<sup>55</sup> Nzianlaa menġ wnaa, zit zo zho rwi zho. Lĕĕ grĕ menġ wnaa co güeynaĭ zhits Jesús, beenġ zho xyudar me dipse leŋ dze ne pseed me miech, desde dze ne psilo me nĕz Galilé. <sup>56</sup> Lad co no Marí Magdal, Marí tsiel Zebedé, ni Marí ne nac xniaa Jacob grop José.

### Bgueets Jesús

(Mr. 15:42-47; Lc. 23:50-56; Jn. 19:38-42)

<sup>57</sup> Zhile sĕĕb ngbidza, zeeŋe bdziŋ tib mgui lĕ José lo Pilat, bnaab me diidzbey tsielit me xcuerp Jesús lo cruz; tib zha ricwa, menġ guiedz Arimaté nac me, ye me zien-aĭ zhiwseed Jesús. Nacne pxeel Pilat diidz lo zha ne quianap Jesús ga, parne siguiel zho glit José me lo cruz.

<sup>59</sup> Dzigo güey José. Blozhse blit José me lo cruz, laa José neyle tib lĕ lar cub, pcheĭ José me lar co, <sup>60</sup> güeyxob José me tib leŋ baa ne nacchen José ndieen tib cho quie gax ga; tib baa cuba. Blozhse bdzig José tib quie nroob bioog ro baa co, laa José zey. <sup>61</sup> Laa Marí Magdal bii baaŋ ga, grop me stib Marí ne nacgrop me ga; zobse zho gax ro baa co.

<sup>62</sup> Biini liu co, pcaalsa grĕ pxoz rnabey, grĕ zho zha farisĕ, güey zho lo Pilat, <sup>63</sup> rĕb zho:

—Guŋ luu dispensar, laa no ziaadaque lo luu stib. Naraa rsoladz no, leŋ dze ne bii mban menġ ntseeb ne sca biaadquidie miech ga, rĕb me, zeeŋe gac tson ng-bidz guet me laa me grieaban. <sup>64</sup> Gane ziaad no lo luu, bzhiguiel pxeel zha ne yquiaanap ro baaŋ me haxta gac tson ngbidz co; sac nend tsie zha ne nac xpĕĕdscuel me tsiebee zho me, lozh ga guiab zho laa me brieaban. Naŋle luu ganle, teĭ gac miŋ co, cho gnĕ peraa gzhixcuaa zho.

<sup>65</sup> Dzigo rĕbchaa Pilat lo zho:

—Teĭne sca racladz to, laa tib partid menġuiib ndxie i. Goĭtsienie zho, goĭguiab lo zho yquiaanap zhow teĭ zha racladz to.

<sup>66</sup> Dzigo laa zho zie zienie zho grĕ menġuiib co. Bdziŋ zho bloo zho tib bey cho quie ne nioog ro baaŋ Jesús ga, par glu teĭ cho zha ne tsiegaala, ni baaŋ grĕ menġuiib co yquiaanapa.

### BRIEBAN JESUS

(Mr. 16:1-8; Lc. 24:1-12; Jn. 20:1-10)

**28** Zna dze goc dze ne rdziiladz zho lo dziin ga, biini liu, dze ne rsilo zhmaĭ, silgaw zie Marí Magdal grop me stib Marí co zieso zho ro baaŋ Jesús.

<sup>2</sup> Lĕĕtaaque hor co bni tib zhodox, lo zho co biet tib xanjĭ Dios gbaa bdoob me quie nroob ne nioog ro baa co, bdiix mew tib lad, bzobga me lada. <sup>3</sup> Masaque rlu me zigne rlu belye, xab mew, nquitsbie rnaw, zig rlu zaatne ndxie guieg. <sup>4</sup> Grĕ menġuiib ne quianap ro baa ga, zeeŋe goŋ zho anĭ co, per nli bdzieb zho, rzhidz zho. Lo dzeb co, pcowgazh zho, grĕse zho biab liu.

<sup>5</sup> Zeeŋe laa grop wnaa co bdziŋ, rĕbchaa anĭ co lo zho:

—Gdziebde to. Naŋle naa Jesús menġ ne pquiaa zho lo cruz ga, menġ co ziaadguib to. <sup>6</sup> Per guieŋde me nu, ĭlaa me brieabanle zigne bneele me ga! Goĭwi ganle nu nac zaatne pxob zho me. <sup>7</sup> Niinagazh goĭtsie goĭtsienie diidz lo xpĕĕdscuel me, goĭguiab lo zho laa me brieabanle. Galilé me cuĕz me zho, ga gan zho me. Laa to naŋlew nasca.

<sup>8</sup> Lĕĕlĕd briea grop wnaa co ga, rias zho laa zho zienie diidz lo xpĕĕdscuel me; lala rdzieb zho, ni lala rley

zho. <sup>9</sup> Laa zho zie, tibaque zeene gon zho laa Jesús zole lo zho, ine pquiaabdiuzh me zho. Horco wbig zho pquiitsgzhib zho lo me, bdeedz zho ni me. <sup>10</sup> Dzigo rëbchaa me lo zho:

—Gdziebde to. Gołtsie gołtsienie diidz lo grë zha bets naa, gołguiab lo zho tsie zho Galilé, ga gan zho naa.

<sup>11</sup> Horcoraa laa bla zhaguiib ne pquianap ro baan Jesús ga bdziñ lad guiedz. Güey zho lo grë pxoz rnabey, bzodiidz zho zha gon zho bzhal ro baa co. <sup>12</sup> Dzi-go pcaalsa grë pxoz co grë zho zha ne nac zha non lo menquiedz, dien zha gun zho. Nacne biaan zho diidz, mazd gdeed zho dimi lo grë menquiiib co, parne gneelid zho, sinque guiab zho, segur xpëëdsuelaque me güeybee me len baa, per biend zhow sac nixguies zho. Nroob dimi bdeed zho lo grë menquiiib co, <sup>14</sup> rëb zho:

—Peet tsienied guic to, niicle telne gon gobernadora na no guionee lo me, zeena peet gun me to.

<sup>15</sup> Dimi co pcaania zho, dzigo laa zho psilo pxoon diidz co zigne rëbse grë zha co lo zho. Grë zha Israel ne

bina len dze co, masaque bliladz zho nli sca goca, jni haxta lo nadze sca zienie guic zho!

<sup>16</sup> Zeene bdziñ dze ne gdieelo Jesús xpëëdsuel me nëz Galilé, brie gza tsiiptib zha ne bzo gaxpaa lo me ga, güey zho nëz co; bdziñ zho guic gui ne rëble me ga gdieelo me zho. <sup>17</sup> Zeene gon zho me pquiitsgzhib zho liu.

Lo grë zha ne ndxie ga, no zho rienpaa lëe me ga, nogaa zha ne bii racchop guic. <sup>18</sup> Dzigo wbig me lo zho, rëb me:

—Laa to gonle nasca naa rnabey. Grëse ncuane no gbaaw, nogaa guidzliuw, lадznia naa psan Pxoz naaw.

<sup>19</sup> Niina nagon, laa naa rсан diidz lo to: gołtsie dipse lo guidzliu, gołtsieseed miech gac zho zha ne sëeb xnëz naa, gołchoobnis zho, gołguiab lo zho lëe miñ co rnabey Pxoz naa, rnabey naa ne nac Xpëëd me, ni rnabeygaa Espiritu Sant. <sup>20</sup> Gołseed zho gban zho, grëse miñe bnabey naa to gun to. Miñ co rсан naa diidz lo to gun to; ni gacnan to ganle, ib csaand naa to, gzataa dzew niicle haxta dze ne nitlo guidzliuw, naa gacnie to.

# MARCOS

**1** Nu ganle laa naa csilo gzodiidz naa, miñe been Jesús, Men ne bneele Dios cxeel me lo guidzliu.  
<sup>2</sup> Lo guits ne pquiaa Isá, tib men ne biadteed xtiidz Dios padzeela, lo co zhobnee ganle ible laa Dios no cxeel me. Rneew, glo cxeel me tib zha ne tedner, guiaadnie diidz. Znu zhobnee lo guits co:  
 Sxel naa tib zha ne tedner lo luu, zeena zha co gzhixcuaa nēz ne ted luu.  
<sup>3</sup> Dan tso zho,  
 zon miech zeene laa tsi zho zēeb gnee zho:  
 “Gozhixcuaa nēz ne ted men ne rnabey, gojsaan grē guieñtseeb ne ruñ to.”  
<sup>4</sup> Ni nligaa scase goca, zeene laa Juan Bautist biaad, dan bio me rchoobnis me miech; rnee me lo zho csaan zho xquieñtseeb zho gbig zho lo Dios, ni chobnis zho, zeena csilaa Dios zho lo grētaa xtoñ zho. <sup>5</sup> Dzigo rriee miech grē guiedz ne ngab Judé, dib lad guiedz Jerusalén, riequiaadiag zho zhiwseed me; ni rxobdoñ zho grē xtoñ zho, dzigo rchoobnis me zho leñ guiubee Jordán.  
<sup>6</sup> Guits lad camell niaa xab me, ncuaañe rzhidoo leñ me guid niaaw ni niapse nguzhanch ni dzin dan row me. <sup>7</sup> Zeene rseed me grē miech co, rnee me lo zho:  
 —Iraa ziaad men ne mazdraa non lo naa. Tel naa peet nond naa, tib guieñzaac nroob ga ygaa naa telne niaca miñe grieelo maase lab me glit naa; per na ni miñ co rdziñd naa. <sup>8</sup> Laa naa rchoobnis to niina con nis; sañgue me con Espíritu Sant cchoobnis me to.

## Brobnis Jesús

(Mt. 3:13-17; 4:1-17; Lc. 3:21-22; 4:1-15)

<sup>9</sup> Leñ ngbidz coqew, laa Jesús brieed guiedz Nazaret xtan zha Galilé, güey me pchoobnis Juan me leñ guiubee Jordán. <sup>10</sup> Laa me norieedze lo nis, zeene gon me laa zhan gbaa bzhal, laa men ne nac Espíritu Sant biet gbaa zig tib palom laa me ziad-zēeb guic me. <sup>11</sup> Ni lēetaque zēeb tib tsi men co gbaa, rnee me:  
 —Xin, rleynie naa luu gon, nziuu luu lo naa.  
<sup>12</sup> Zeene blozh brobnis me, dzigo güeynie Espíritu Sant me tib dan ngan, zaatne no grē ma ntseeb; <sup>13</sup> bio me ga choo ngbidz. Ga no me güey Satanás (ma ne rnabey lo grēse menḁox), gocladz ma niuñgüet ma me. Bdedse ga, güey grē xañl Dios güeygan zho me.  
<sup>14</sup> Leñ ngbidz co bnabey Herod bio Juan ladzguiib. Ladzguiible no Juan zeene brieed Jesús güeyted me grē guiedz ne ngab Galilé güeyseed me miech Xtiidz Nd-zon Dios, <sup>15</sup> rnee me lo zho:

—Laa dze ne gnabey Dios ziaadgaxle, laaw bdziñ dzele. ¡Gojsaan grē xquieñtseeb to, goñab perdon lo Dios; dib zdoo to goñliladz Xtiidz me!

## Tap zha ne quia gooz meñ

(Mt. 4:18-22; Lc. 5:1-11)

<sup>16</sup> Tib dze zieded Jesús ro Nisdoo ne lē Galilé, gon me laa Simón grop Ndrés quia gooz meñ lo nis co; sac ible dziin co nac xtsiñ zho. Grop bets zho laa zho noron guix ne rgaa meñ lo nis. <sup>17</sup> Dzigo bredz me zho, rēb me lo zho:

—¡Goñtē, goñtēnañ zhits naa! ¡Laa naa cxeel to tsie to stib gooz, tsietop to grē miech ne sēeb xnēz Dios!

<sup>18</sup> Horcogazh psañ zho guix ne rnaaz zho meñ ga, laa zho zienañ zhits me.

<sup>19</sup> Zhisaque bzē Jesús ro nis co, gon me laa Jacob ni Juan no tib leñ barcw noquiaabdie zho guix ne rnaaz zho meñ, lēē grop xingan Zebedé ga; <sup>20</sup> dzigo bredz me zho. Zigne bredz me zho, zoque Zebedé lo barcw ga grē xmoz Zebedé, laa zho zienañ zhits me.

## Tib mgui ne nosacsi menḁox.

(Lc. 4:31-37)

<sup>21</sup> Laa zho bdziñ guiedz ne lē Capernaum. Zeene gon dze ne rdziiladz zho lo dziin nēz Israel, güey Jesús yadoo win ne zob lad guiedz co güeyseed me miech. <sup>22</sup> Grē miech ne ndxie leñ yadoo ga, rzee zdoo zho ran zho zha rnee me, sac rlu men rnabey nac me; led yed me rseed zigne rseed grē zha ne nac maistr ley.

<sup>23</sup> Lad grē miech co no tib mgui ne nosacsi menḁox, tibaque zeene nguiedz pcooptsie ma mgui, <sup>24</sup> rnee ma:  
 —¿Pe guñ luu no Jesús Nazaren? ¿Ziaad luu lēē par gnitlo luu no? Ruñbey naa luu, tib men peet xtoñd nac luu ni Dios pxeel luu.

<sup>25</sup> Dzigo goctox Jesús lo ma, rēb me:

—¡Psioog ro luu! ¡Na zeena psaan men qui!

<sup>26</sup> Horco masaque beencxidz ma mgui co, ni rquiaadan ma redz laa ma psaan mgui. <sup>27</sup> Grēse miech ne ndxie ga, bzee zdoo zho rnabdiidzlsa zho rnee zho:  
 —¿Bay cho nac men qui? ¡Wseed cub i gon ziaadnie me! ¡Rlu zha rnabey nac me, zha haxta menḁox rdzieb zeene ractox me lo ma!

<sup>28</sup> Znuse brieets bliaañ diidz zha beenguiac Jesús mgui co; grēse guiedz ne ngab Galilé gocnañ miecha.

**Biac xniadzoop Simón Pedr**

(Mt. 8:14-17; Lc. 4:38-41)

<sup>29</sup> Ga brieë Jesús güey me lidz Simón grop Ndrés gza me Jacob ni Juan. <sup>30</sup> Bdziñ zho, lëëtaque laa xniadzoop Simón nix rlan xlëë, nacne rëb zhow lo me. <sup>31</sup> Dziggo bd-ed me zaatne nix zhuz co, bzhen me nia me, blische me me. Horcogazh laa zhixlëë me blëz, guche me ga psilo me beenlo ncuaañe dow zho.

<sup>32</sup> Ziedzele dzew, laa ngbidz rzëëblew, zeene psilo grë miech co zo zo rdziñnie zho grë men rzacnë, grë zha ne nosacsi menox ne; bioogse ro yu co ndxie miech. <sup>33</sup> Zootle zig grëse miech ne no lad guiedz co pcaalsa ga.

<sup>34</sup> Ndal grë men rzacnë co zhaase zhaase guielguidz ne rzac zho, per beenguiac Jesús zho; zha ne nosacsi menox, benxoon me grë menox ne nosacsi zho. Goctox me lo ma, ib bdeete me diidz nee ma cho nac me, sac runbey ma me.

**Pseed Jesús miech Galilé**

(Lc. 4:42-44)

<sup>35</sup> Silgaw, scase bii ncow rnaw guche Jesús brieë me lad guiedz co, güey me zaatne guien draa miech, güey-zodiidznie me Dios. <sup>36</sup> Zeene rnit me choot guien d; dziggo brieë Simón ni zla zha ne nacgza Simón güeyguib zho me. <sup>37</sup> Zeene bdziel me, rëbchaa zho lo me laa grë miech co quiaguible me.

<sup>38</sup> Dziggo pquiab me rëb me lo zho:

—;Sca ye! Per ib laa ne none gon guio grëraa guiedz ne ndxie dib gax nu, zeena ye grë guiedz qui gnee naa Xtiidz Dios lo miech; sac ible miñ co pxeel me naa zial naa lo guidzliu.

<sup>39</sup> Dziggo güey zho grëse guiedz ne ngab Galilé. Zaatne rdziñtaa zho, rie me grëse yadoo win ne zob lad guiedz rseed me grë miech co Xtiidz Dios, ni runxoon me grë menox ne nosacsi miech.

**Biac tib mgui ne rlan lepr**

(Mt. 8:1-4; Lc. 5:12-16)

<sup>40</sup> Tib vuelt, wbig tib mgui ne rlan guiedzdox ne lë lepr lo Jesús (masaque riaa dipse guid lad mgui), pqui-itgzhib mgui lo me, rëb mgui:

—Tebaa siguieel luu gunguiac luu naa.

<sup>41</sup> Pquia zdoo Jesús mgui, pxobnia me guic mgui rëb me:

—Zunguiac naa luu. ;Niinagazh laa luu guiaanmbe!

<sup>42</sup> Zigne sca bnee me laa mgui co biac, mbese biaan xcuerp mgui. <sup>43</sup> Blozh ga bzonëz me mgui, ni pso me diidz lo mgui <sup>44</sup> rëb me:

—Bina ganle, choot lo gzodiidz luu gon zha biac luu. Bzë, güey lo pxoz, güey san gon ne rnabey xley Moisés gdeed luu; zeena gan zho ganle laa luu biacle.

<sup>45</sup> Ni zigne brieë mgui ga, psilo mgui grë lo miech bzodiidz mgui zha biac mgui. Grëse miech gocnaña, nacne brieelodraa nenlo ndziñ Jesús grë lad guiedz co. Miñe been me, blëz me zaatne choot miech guien d;

per niicle scaw, miech guizhiu ne rree grë guiedz co rdziñ lo me.

**Biac tib men ne gutoo**

(Mt. 9:1-8; Lc. 5:17-26)

**2** Goc bla dzew, laa Jesús biire bdziñ lad guiedz Capernaum stib. Zeene bin zho laa me bdziñ ro yu, <sup>2</sup> miech guizhiu ne pcaalsa zaatne no me ga, haxta ro yu ndxie grë miech co; dzigo psilo me noseed me zho Xtiidz Dios.

<sup>3</sup> Laa grë miech co ndxie ga, zeene bdziñ tap zha bgui ney zho stib men bgui, zhoobse me lo yag, ib gacd së me sac dipse me gutoo. <sup>4</sup> Ni ne scataa miech guizhiu ne ndxie, gacd ted zho nëz ro yu gdziñnie zho me lo Jesús, nacne biepaque zho guic yu. Pخال zho ngali zaatne zob Jesús, dzigo ga pteed zho men co dib yag ne zhoob me ga. <sup>5</sup> Zeene gon Jesús ne nli dib zdoo zho riladz zho me gunguiac men rzacnë co, dzigo rëbchaa me lo men co:

—Xin, niinagazh laa naa gun perdon grëse xto luu.

<sup>6</sup> Blalaa zha ne nac maistr ley zob ga, zeene bin zho sca rëb me lo men rzacnë co, bzachaa zdoo zho: <sup>7</sup> “;Lëda i gon squi rnee men qui! Quiaguitnie me Dios i squi rzë xtiidz me. ;Tibaque men ne run perdon xto miech, ni lëë men co nac Dios!”

<sup>8</sup> Bienga Jesús sca rza zdoo zho, dzigo rëbchaa me:

—;Pe nacne rlëë to ron to miñe rne naa? <sup>9</sup> Parga nli, cholze zha ne zac guiab: “Laa naa gun perdon grëse xto luu.” <sup>10</sup> Per laa naa glu lo to ganle, naa ne nac naa Men ne pxeel Dios zial naa lo guidzliu, ible naa no gun miech perdon.

Dziggo bnee me lo men rzacnë co, rëb me:

<sup>11</sup> —;Guche i, bi yag ne bzhoob luu i, zeen bzë!

<sup>12</sup> Zigne sca bnee me laa mgui co bzoli, blis me yag co, grop lo grë miech co gon zho laa me brieë ga, laa me zey. Grëse zho rzee zdoo zho, rlynie zho Dios rnee zho:

—;Nasi laa ne nodziañ ncuaañe gard dziañ ne!

**Bredz Jesús Leví**

(Mt. 9:9-13; Lc. 5:27-32)

<sup>13</sup> Blozh ga, laa Jesús brieë ga laa me zie nëz ro nis-doo stib; nzian miech ne pcaalsa lo me ga, dzigo pseed me zho.

<sup>14</sup> Ro nis co ziezë me gon me Leví, xingan Alfé, zob Leví zaatne rietizh zho contribucion, dzigo bredz me Leví tsienal Leví zhits me. Guso Leví ga, laa Leví zienal.

<sup>15</sup> Bded ga, bredz Leví me güey me tib wagw lidz Leví. Grë zha ne nac recaudador, grë zha ne zëëb diidz nac zha yozh, tipse lo mezh bzobnie me zho grë xpëëd-scucl me; sac ndal grë zha co zienal zhits me.

<sup>16</sup> Blalaa maistr ley ne nacgrë zha farisé, gon zho sca tipse noyownie Jesús grë zha co; bded ga, rëbchaa zho lo xpëëdscucl me:

—;Mod sca na rownie xmaistr to grë zha ngoopdol, grë zha beed ne nac recaudador!

<sup>17</sup> Dziggo rëbchaa Jesús lo zho:

—Nanle to ganle, men ne run rmed, zaatne no zha ne rzacnë, ga rquiin zho, zniacxe squiin zho zaatne no zha ne ndip ndaan? Ni miñ co rac niina, tel naa zi-alguibd naa miech wen, sinque laa naa zialguib miech ngoopdoj.

### ¿Pe nacne rcuand xpëedscuel Jesús?

(Mt. 9:14-17; Lc. 5:33-39)

<sup>18</sup> Lëëtaaque dze co nocuan xpëedscuel Juan Bautist, grë zho zha farisé. Dzigo bdziñ bla zha ne bnabdiidz lo Jesús, rëb zho:

—¿Pe nac waa ib rcuand xpëedscuel luu? Zha grë xpëedscuel Juan Bautist ni grë zha farisé, rcuan zho.

<sup>19</sup> Pquiab Jesús, rëb me:

—Zaatne nadien noyac tib guieltsieel, zpe niacxe lega csilo grë zha ne ndxie lo lni tso zho guielnë, ycuand zho ni ran zho laa mgui ne notsieelnia mban? <sup>20</sup> Per zdziñ dze zeene laa mgui co gbiche; ni zeene laa dze co gdziñ, dzigosi nagon rieguial tso zho guielnë, rieguial ycuand zho.

<sup>21</sup> Ranle to ganle, zha ne rquiaabdie tib lë lar, rquiaad zho lar cub lad lar gox, sac zha ne sca gun paat yquiind wquiaabdie co. Zeene laa lar cub gbe, lëëque lëew gunnat zaatne nriez lar gox. <sup>22</sup> Scaque tsod zha ne cotsow vin cub tib len guid ne padzeelale noquiin, sac stsiez vin cuba; dzigo niicle guid cow, niicle vingaaw laaw nitlo ga. Gacxe, tel vin cuba none len guid cubaque tsotsowa.

### Ptop xpëedscuel Jesús mzion zhobxtil

(Mt. 12:1-8; Lc. 6:1-5)

<sup>23</sup> Tib dze ne rdziiladz zho lo dziin nëz Israel, bdednie Jesús xpëedscuel me zaatne zëeb zhobxtil, dzigo zigse zieded zho pchoo zho palal mzion zhobxtil co. <sup>24</sup> Gon zha farisew, dzigo rëbchaa zho:

—¡Lëda i gon noyuj to! ¡Golguien ganle dze nda nac dze riil!

<sup>25</sup> Dzigo pquiab Jesús, rëb me:

—¿Pe gard glab to zaatne ziaad ganle zha been rey David tib dze zeene pcaabedz me grë me zha ne ziegza me, ni zienied zho pe gow zho? <sup>26</sup> Rneew, bzëeb me len yadoo güeynab me quietxtil ne nac gon, downie me grë zha ne ziegza me ga, ni loxaque zha ne nacse pxoz row quietxtil co. Len iz co nac men ne lë Abiatar pxoz nroob. <sup>27</sup> Golgacnan sca ganle, biaand dze rii par csaci miech xcuerp zho, sinque ne rleynie Dios miech gane psan mew. <sup>28</sup> Naa ne nac naa Men ne pxeel Dios zial naa lo guidzliu, naa rnabey dze rii, nanpaa naa pe nac miñe nonguiel gac.

### Biac tib mgui ne mband tib nia

(Mt. 12:9-14; Lc. 6:6-11)

**3** Gol stib dze ne rdziiladz zho lo dziin, güey Jesús len yadoo win ne zob lad guiedz co. Lad grë miech ne no len yadoo co, no tib mgui ne mband tib nia.

<sup>2</sup> Nzian zha ne ndxie ga, quialeets zho Jesús dien pe zunnguac me nia mgui co dze ne rdziiladz zho lo dziin. Quiambëz zho dien pe gun me, par gziel pe

yquiaaqui zho me. <sup>3</sup> Dzigo bredz me mgui co, bnabey me bzo mgui groltaa lo grë zha ne ndxie ga; <sup>4</sup> blozh ga rëbchaa me lo zho:

—¿Pe nadien rzac to nonguiel gun ne dze rii? ¿Pe nonguiela gun ne ncuane yquiin, te nonguiela gun ne guielntseeb ye? Zig nac samiech ne zha ne noxtseeb xquielmban, zpe maase csaan ne guet zho?

Ni tib zho pquiabd. <sup>5</sup> Dze bui me lo zho grëse zho, wbinladz guic me, ni mban goc zdoo me gon me scataa ntseeb zdoo zho; dzigo rëb me lo mgui co:  
—Bzigaa nia luu.

Zigne bzigaa mgui nia mgui, laaw biac.

<sup>6</sup> Grë zha farisé, ni grë zha ne nacie rey Herod, zigne briece zho ga laa zho psilo bnediidz dien zha gdeeda diidz gut zho Jesús.

<sup>7</sup> Len dze co, tib vuilt bdziñ Jesús ro nisdoo grë xpëedscuel me. Miech guizhiu ne nal zhits zho, ga zie grë zha ne ziaad nëz Galilé, grë zha ne ziaad nëz Judé, <sup>8</sup> grë zha Jerusalén, grë zha ne ziaad nëz Idumé, grë zha no dib nëz dan ro guiubee Jordán, grë zha ne no dib gax guiedz Tiro ni guiedz Sidón. Miech guizhiuw, sac ron zho grëtaa milagr ne run me.

<sup>9</sup> Dzigo bnabey Jesús xpëedscuel me, yguib zho tib len barcw zaatne gac so me zeena ctaagwd grë miech co me. <sup>10</sup> Zëëble diidz ndal miech ziyunguiac me, dzigo grëse zha ne rlan pe guielguidz, rbigbe zho dien zha grieelo maase lad xab me xen zho.

<sup>11</sup> Grë menox ne noguitnie miech, zeene ran ma me, runquitsgzhil ma zha ne noguitnie ma lo me ni rquiaadan ma redz rnee ma:

—¡Xpëed Dios nac luu!

<sup>12</sup> Per ractox me lo ma, rsaand me gnee ma parne xoobnen cho nac me.

### Ble Jesús gza tsiipchop xpëedscuel me

(Mt. 10:1-4; Lc. 6:12-16)

<sup>13</sup> Blozh ga biepe me tib guic gui win zob ga, ga bredz me zha ne gocladzse me. Zeene pcaalsa zho grë zho, <sup>14</sup> dzigo lad co ble me tsiipchop zha ne sënie me, zha ne cxeel me tsieseet miech Xtiidz Dios. Lëe zha co bleelë me poxtl, <sup>15</sup> ni bdeed me poder lo zho guncxoon zho menox.

<sup>16</sup> Znu lë gza tsiipchop zha ne ble me ga:

Simón (lëe Simón co bleelë me Pedr),  
Jacob ni Juan (xingan Zebedé, zha ne bleelë me "Zhin Nguzi" "Boanerj").

Ndrés,

Lip,

Bartol,

Matew,

Mazh,

Jacob (xingan Alfé),

Tadé,

Simón (zha ne nacgrë zha ne racladz cuee zha Roma xtan zho)

ni Judas Iscariot (zha ne güeyto me).

### Rëb zho men̄dɔx nacie Jesús

(Mt. 12:22-32, 46-50; Lc. 8:19-21; 11:14-23; 12:10)

<sup>20</sup> Wbire Jesús ga, laa me bdziñ ro yu grë me zho. Scaaque ndal miech ne pcaalsa ga stib, ni rdeetew didz gownie me zho. <sup>21</sup> Zeene bin men̄lidz mew, dzigo brieë zho ziexi zho me, sac rëb zho bod rzhiñle guic me.

<sup>22</sup> Haxta grë maistr ley, zha ne brieë nëz Jerusalén bdziñ ga, rnee zho:

—Beelzebú, ma ne rnabey lo men̄dɔx, ma co nacie me gane rrieelo ruñcxoon me men̄dɔx.

<sup>23</sup> Dzigo bredz me zho bzodiidz me tib cuent lo zho, rëb me:

—¿Pa nan to na grieelo lëëque men̄dɔx guñcxoon samendox ma? <sup>24</sup> Tel̄ tib guiedz nadien̄ gac miech chop dii, csilo zho til̄lsa zho, ¿niacxe nitlod guiedz co? <sup>25</sup> Tib diigaa miecha, tel̄ csilo zho lëëque zha til̄nie men̄lidz zho, ¿niacxe nitlod zho? <sup>26</sup> Scaquegaa men̄dɔx nagon, tel̄ne lëëque lëë ma til̄nie samendox ma, ipe nale na bnitlo ma! <sup>27</sup> Masaque nac men̄dɔx zig tib zha ne no xfuers, zha ne gacladz cuee grë ncuaañe no lidz zha co, none cxidoogazh zho zho.

<sup>28</sup> Gneli naa lo to gan̄le, grëse dol̄ ne ruñ miech, grë tel̄ zha rguie zho, rdzibdee zho, bii zuñ Dios zho perdon miñ co; <sup>29</sup> sangue zha ne gneenë Espiritu Sant, dol̄ nroob ga ruñ zho, gdziñd dze ne guñ Dios zho perdon.

<sup>30</sup> Sca rëb me lo zho, sac sca quianee zho rëb zho men̄dɔx nacie me.

<sup>31</sup> Horco laa xniaa me ni zha bets me bdziñ, per leyse blëz zho; dzigo pxeel̄ zho zha ne zietsedz me. <sup>32</sup> Blalaa zha ne zob gaxpaa lo me, zha co been̄ vis rëb zho:

—Laa xniaa luu gon, ni zha bets luu ziaadguib luu.

<sup>33</sup> Pquiab me rëb me:

—¿Xnia naa ye, bets naa ye?

<sup>34</sup> Dze bui me lo grë zha ne ndxie ga, dzigo rëbchaa me:

—To gon nac xnia naa, to nac bets naa. <sup>35</sup> Sac grëse zha ne ruñ miñe racladz Dios, lëë bets naa ga, lëë bzian naa ga, lëë xnia naa ga.

### Xcuent zha ne güey gon

(Mt. 13:1-23; Lc. 8:4-15)

**4** Dze coquew, laa Jesús psilo quiaseed miech zaatne nac ro Nisdoo Galilé ga. Miech guizhiu ne pcaalsa lo me, nacie güeytsep me tib len̄ barcw ne zo ro nis co, ga bzob me laa grë miech co bre tib ro nis. <sup>2</sup> Ndal grë ncuaañe pseed me zho, per niapse con cuent rnee mew lo zho. Lëë tib cuent ne bzodiidz me ga nu, rëb me:

<sup>3</sup> —¡Gol̄quiaadiaga gan̄le! Tib mgui name, brieë me güey me gon zhoxtil. <sup>4</sup> Zeene laa me quialaal̄ zho co, miñe bliaal̄ gax ro nëz; znuse güey grë mguin̄ güeytow maw. <sup>5</sup> Laa miñe bliaal̄ zaatne nac lo quie, znuse znuse blana; <sup>6</sup> per zeene laa lo ngbidz brieë, znusaque bgool̄a blozh ga bidzgaw; sac guien̄d nroob low. <sup>7</sup> Laa miñe bliaal̄ zaatne nac len̄ yag guiets, zeene laa grë yag guiets co broob znuse bnitlo yag guietsa, pasëw

niac. <sup>8</sup> Sangue grë miñe bliaal̄ zaatne nac lo liu naal̄, blana, brooba ni goca; lo tib tib zho co no mzion co brieë gal̄ptsii zho, now brieë tson̄gala, nogaaw brieë haxta tib gayoow.

<sup>9</sup> Blozh ga, rëbchaa me lo zho:

—Zha ne racladz guien̄ miñe rne naa, yquiaadiag zhow.

<sup>10</sup> Zeene laa grë miech co zey, laa gza tsiipchop xpëedscuel me, ni zla zha ne rzënie me, laa zho nbadidz lo me dien̄ zha nac cuent co. <sup>11</sup> Dzigo rëbchaa me lo zho:

—Tel̄ to, Dioszhal rlu lo to zha rnabey me, niicle ncuaañe mazdraa ngueetsa; laa lo grëraa miech ne gard gbig lo me niapse con cuent rzodiidz naaw lo zho parne guien̄ zhow. <sup>12</sup> Per niicle scaw, nzhial diag zho ron zho, per peet rien̄d zho; nzhial lo zho rwi zho, per peet ran̄d zho; ib nëd zho gbig zho lo Dios, gnab zho guñ me zho perdon.

<sup>13</sup> Nana to, tel̄ne bien̄de to zha nac cuent co, ¿zha guien̄ to grëraa miñe gne naa dzigo? Gol̄quiaadiaga gan̄le, znu gon naca: <sup>14</sup> Mgui ne güeylaal̄ zho ga, rrieëquia lëë zha ne rieneë Xtiidz Dios lo miech ga, laa zhoxtil co nac Xtiidz Dios. <sup>15</sup> No miech nac zig nac ro nëz ne bliaal̄ palal zho co: rquiaadiag zho Xtiidz Dios, rlozh ga lëëlëd rdziñ men̄dɔx rquiil ma zho, rsaanga zhow. <sup>16</sup> Nogaa zho nac zigne nac lo quie co: zeene rquiaadiag zho Xtiidz Dios, iñe rley zho rcaania zhow, <sup>17</sup> per led dib zdood zho rcaania zhow; gane zeene laa miech rsilo rlëë lo zho, laa miech rtsidil̄ zho porne rliladz zhow, rsaanga zhow. <sup>18</sup> Zzhisgaa zho nac zigne nac len̄ yag guiets co: nli rquiaadiag zho Xtiidz Dios, <sup>19</sup> per rsilo zho lel̄ grë ncuaañe no lo guidzliu rii mazdraa rionie guic zho, rquidie grë dimi zho, rzoobladz zho yquianie zho grëse ncuaañe racladz zho. Grë ncuaañ co rioxcora zho, laa ne tsonie Xtiidz Dios guic zho, miñ co rquiaqui ib ruñd zho miñe rnabey me. <sup>20</sup> Laa nogaa zho nac zigne nac liu naal̄ co: rquiaadiag zho Xtiidz Dios, dib zdoo zho rliladz zhow, ni rban zhow zigne naca. Grë zha co, no zho nac zig mzion ne brieë gal̄ptsii zho ga, no zho nac zig miñe brieë tson̄gala, nogaa zho nac zig miñe brieë tib gayoow ga.

### Xcuent biini ni midz moxtaz

(Mt. 13:31-32, 34-35; Lc. 8:16-18; 13:18-19)

<sup>21</sup> Blozh ga, biire pcaalsa miech lo me, dzigo rëb me lo zho:

—¿Pa dien̄ rquiin biini? ¿Pe rquiaguiw par tsolana tib len̄ guin̄ o soogaaw tib zhan lon? Led zeene rquiaguiw lëë, zaatne grieelo gziiniw ga rzoob zhow. <sup>22</sup> Scaque nagon grëse ncuaañe rac ngueetsa, grëse ncuaañe rnee miech zhliana, ib none xoobneña.

<sup>23</sup> Tel̄ne racladz to guien̄ to miñe rne naa, gol̄quiaadiaga; <sup>24</sup> ni zigne ron tow scagaa gol̄tsoxco gol̄güña. Tel̄ne tsoxco to guñ tow, scagaa ziogucraa tow. <sup>25</sup> Sac zha ne tsoxcow, zdedraa Dios guiel̄biini lo zho; sangue zha ne tsoxcoda, haxta tel̄ palalse guiel̄biini ne bdeed me lo zho stiche mew.

<sup>26</sup> Ni rëb me lo zho:



—Znu gon nac zha ne ngab lo Dios; nac zho zig bni ne ran miech. <sup>27</sup> Zha ne rielaal bni co, liu rcow, liu riini, laa zho raaguies, laa zho riebe. Sca sca laa dze zie, laa bni co ratslo, laaw rlan, laaw rroob, per rienḁ zho zha nacne laaw rroob.

<sup>28</sup> Zhal guidzliu rdeeda guieḁnzaac co, guizh nac zhob co zeene rлана, rac palal dzew laaw rlan mzion. <sup>29</sup> Laa zeene laaw ral, dzigo laa zho rietiitsa, sac laa dze bdziḁne ne laaw tsas.

<sup>30</sup> ¿Zha ganḁe gni naa lo to zeena guieḁ to zha nac xquieḁrnabey Dios? —rēb Jesús—. ¿Pa tib cuent ganḁe gzodiidz naa lo to zeena guieḁ to zha naca? <sup>31</sup> Naca gon zigne nac tib midz moxtaz ne ran miech dan rii. Midz moxtaz nac midz ne mazdraa win, <sup>32</sup> ni telḁ gacbniw, rrooba, ni lēew rroobraa lo grē guizh ne ran zho ro yu, haxta grē mguinḁ riezaa zhiptsieez ma low sacne ncala.

<sup>33</sup> Nzian grē cuent rii pquiin me par cseed me grē miech co, ni laa me bnee miḁe rgobey me guieḁ zho. <sup>34</sup> Niapse sca rseed me zho, laa zha ne nac xpēēdscuel me, zeene zhasew rnee mew lo zho zigne naca.

### Pcuēēz Jesús tib medox

(Mt. 8:23-27; Lc. 8:22-25)

<sup>35</sup> Zeene bdze dze co, rguetsle liuw rēbchaa me lo xpēēdscuel me:

—Goḁgotsaa dieedquia ne stib nēz lo nis rii.

<sup>36</sup> Blozhse bnee me lo grē miech co, laa zho bieḁ leḁ barcw ne zob me ga grē me zho, laa zho zie. Ye blalaa barcw ne zob lo nis co zianaḁ.

<sup>37</sup> Laa zho zie, tibaque zeene laa tib medox psilo brieē, masaque rliis me lo nis co; zeene riasoli low riechoona leḁ barcw, laa barcw psilo noyodzēle nis.

<sup>38</sup> Dzigo güey zho güeycuaan zho Jesús, sac lēētaque laa me nixguies nēz zhan barcw ncoogse me tib ḁmad. —ḁMaestro! —rēb zho—. Bui ganḁe, ¿pe znuse csaan luu nitlo ne nu?

<sup>39</sup> Dzigo guche Jesús, bnee me lo me co, bnee me lo nis co, rēb me:

—ḁLēew ga na! ḁGoḁcuedze!

Zigne sca bnee me, laa me co blēz, niicle nis cow laaw bredze. <sup>40</sup> Dzigo rēbchaa me lo zho:

—¿Pe nacne squitaa rdzieb to? ḁGardaque dzigo lēē gliladz to cho nac naa!

<sup>41</sup> Rienḁraa zho zha guḁ zho lo dzeb co, ni rnabdiidzlsa zho rnee zho:

—¿Bay cho nac me, zha nacne haxta me, haxta nisdoo ron xtiidz me?

### Meḁ Gadar ne nosacsi meḁdox

(Mt. 8:28-34; Lc. 8:26-39)

**5** Bdziḁ Jesús nēz dan ro nisdoo co gza xpēēdscuel me, ga nac xtan zha Gadar. <sup>2</sup> Laa me biedtze leḁ barcw, zeene laa tib mguieḁ ne nosacsi meḁdox bdziḁ lo me. Leḁ baa brieē mguieḁ co bdziḁ me ga, <sup>3</sup> sac leḁ baa nac zaatne rbēz me. Miech ne lēbd zho low, nzian vuelḁ ziezoob zho caden nia me, ni me ne, per znuse rchug mew, rzhoonga me. ḁChoot rlēbd lo me! <sup>5</sup> Dze, guieel

quianzē me grē dan co, rietso me grē leḁ baa. Ropt-siedan me, ni lēēque me rzheḁ quie rchug me guidlad me. <sup>6</sup> Laa dze co, zitraa gon me Jesús, rias me bdziḁ me pquitsgzhieb me lo Jesús. <sup>7</sup> Dzigo goctox Jesús lo meḁdox ne noguitnie me, rēb Jesús:

—ḁMeḁdox, psaan meḁ qui!

Horco pcooptsiedan meḁdox co mguieḁ co, ni rnee ma lo Jesús:

—¿Pe guḁ luu naa Jesús? Ruḁbey naa luu, Xpēēd Dios ne no gbaa nac luu. ḁNe nḁpagaa beenḁ guieḁnzaac csacsid luu naa!

<sup>9</sup> Dzigo bnabdiidz Jesús lo ma dieḁ cho lē ma. Pquiab ma rēb ma:

—Legion lē no, sac nzian nac no.

<sup>10</sup> Rnab grē meḁdox co lo Jesús, gzonēzd me ma zit.

<sup>11</sup> Gaxaque zhan guieḁ co ndxie tib dzoon nguts noyow,

<sup>12</sup> dzigo bnab ma lo Jesús, rēb ma:

—Bzhiguielḁ lose grē nguts qui bzonēz no.

<sup>13</sup> Bdeed Jesús diidz. Dzigo laa grē meḁdox co psaan mguieḁ co, laa ma zie bzēēb ma zdoo grē nguts ne ndxie ga; psilo grē nguts co rquiaa ma corr güeypix ma glaa tib ro yee ne quia ro nisdoo co, bliaalḁ ma haxta lo nis. Ga bieḁ ma nis, grēse ma gut. Rгаа ma zig chop mil.

<sup>14</sup> Zha ne quianap grē nguts co, gzase zho bzhoon güeyzodiidz zhow lad guiedz, ni grēraa yu ne zob gax ga. Brieē grē miech co, zieso zho. <sup>15</sup> Zeene bdziḁ zho, per nḁi bdzieb zho, sac gon zho laa mguieḁ ne sca bdiitnie meḁdox ga zobse lo Jesús, laa mguieḁ nacwxable, rlu ndzinlile nac guieḁ mguieḁ. <sup>16</sup> Psilo grē zha ne gon zha biac mguieḁ co, ni zha goc grē nguts co, psilo zho rzodiidz zhow lo grē zha ne bdziḁ ga. <sup>17</sup> Miḁ co bin grē zha co, mazd bnab zho lo Jesús siguielḁ me gbi me xtan zho.

<sup>18</sup> Zeene laa Jesús zie sēēb me leḁ barcw, dzigo laa mguieḁ co wbigaque lo me, naḁ mguieḁ nziguieḁ me nianaḁ mguieḁ zhits me. <sup>19</sup> Per bdeete me diidz, rēb me:

—Wbire, güey güeyzodiidz lo grē meḁlidz luu ganḁe pa lotaa pquia zdoo Dios luu, zha nactaa milagr nroob ne beenḁ me beenḁguiac me luu.

<sup>20</sup> Dzigo wbire mguieḁ. Güey mguieḁ dib xtan zha Decápolis, güeyzodiidz mguieḁ lo grē miech co zha beenḁguiac Jesús mguieḁ. Grēse zha ne rona, rzee zdoo zho.

### Brieēban xpēēdwnaa tib meḁ lē Jair

(Mt. 9:18-26; Lc. 8:40-56)

<sup>21</sup> Zeene laa Jesús biire brieēquia stib nēz ro nisdoo co, miech guizhiu ne pcaalsa lo me ga. <sup>22</sup> Ga zo me zeene laa tib meḁ ne nacgrē zha ne rnabey yadoo lē Jair bdziḁ. Zigne bdziḁ me lo Jesús pquitsgzhieb me, <sup>23</sup> rēb me:

—Beenḁ tib guieḁnzaac gotsaa guieḁ ne guḁguiac luu xpēēd naa. Laa win rlozhle; naḁpaa naa telḁne cxobnia luu guieḁ win, ziac win.

<sup>24</sup> Dzigo laa Jesús zie nēz lidz meḁ co. Ndal miech ne zianaḁ zhits me, haxta rtaagw zho me. <sup>25</sup> Lad grē miech co zianaḁ tib wnaa, gocle tsiipchop iz rlan me tib guieḁguidz, rzac me zigne rzac meḁ wnaa gzob mēē, tibaque rlan mew ib rbēzda. <sup>26</sup> Nzianle lo meḁ ne ruḁ

rmed ziye me, grëse ncuuaŋe rap me bloozh me lo rmed; per laa ne cuëz guieḷguidz co, leḷ znu rzhizhooraaw. <sup>27</sup> Ziyonle me grë milagr ne ruḅ Jesús. Bza zdoo me rëb me: "Totsaque ygaa maase lad lar ne mbix me xeeḅ naa, ziacle naa." Dzigo bded me lad grë miech co, wbig gax me nëz zhits Jesús, bzheḅ me lad lar ne mbix Jesús. <sup>29</sup> Nligaa hor cogazh laa guieḷguidz co blëz, bieḅ me laa me biac.

<sup>30</sup> Zeeḅe bieḅ Jesús ne laa me beeḅguiac wnaa co, dzigo ptsire lo me rwi me lo grë miech co, rëb me lo zho:

—¿Cho ga bzheḅ lad xab naa?

<sup>31</sup> Rëbchaa xpëëdscuel me:

—¿Zha naḅ luu glu dieḅ cho bzheḅ lad xab luu, ni squitaa ndaagw ziaad luu lad grë miech qui?

<sup>32</sup> Per laa me rwi lo grë miech co dieḅ chow. <sup>33</sup> Naḅ-paa wnaa co ne me ga, rdzieb me, rzhidz me laa me wbig pquitsgzhib me lo Jesús bneeli me zha nacne sca beeḅ me. <sup>34</sup> Dzigo rëbchaa Jesús lo me:

—Xin, laa luu biac sacne bliladz luu naa. Bzë na, peet tsieniedraa guic luu, laa guieḷguidz co bichele.

<sup>35</sup> Laa Jesús bii quianeque, zeeḅe laa bla zha ne ziaad nëz lidz Jair bdziḅ, rëb zho lo Jair:

—Csodziindraa luu lo meḅ qui, laa xpëëd luu gutle.

<sup>36</sup> Zeeḅe goḅ Jesús sca rëb zha co, dzigo bnee me lo Jair rëb me:

—Peet tsienied guic luu. Dib zdoo luu bliladz naa.

<sup>37</sup> Psaandraa me cho grë miech co nienal zhits me, loxaque Pedr, Jacob ni Juan bets Jacob; zha cose zienie me.

<sup>38</sup> Zeeḅe bdziḅ zho lidz meḅ co, tib ruid ne rac, nguiedz zëëb tsi zho roon zho no zho xquieḷnë mëëd co. <sup>39</sup> Dzigo bzëëb Jesús leḅ yu, rëb me lo zho:

—¿Pe nacne squitaa roon to? Goonde to, goḅ led gute ndzoo win rii, nixguies ndzoo.

<sup>40</sup> Leḷ rzhidznie grë miech co me, bin zho sca rëb me. Dzigo bnabey me brieë zho ley grëse zho, loxaque pxoz mëëd co, xniaa win ni gza tsoḅ xpëëdscuel me zha ne nal zhits me ga bzëëbnie me leḅ yu ne nix win.

<sup>41</sup> Wbig me bzheḅ me nia win, rëb me lo win:

—¿Guche i na, ndzoo yeeḅ! (Talita, cumi.)

<sup>42</sup> Zigne sca bnee me laa mëëd co guche, laa win bzë. Tib mëëd tsiipchop iza. Grëse miech co per nli rzee zdoo zho. <sup>43</sup> Dzigo pso me diidz lo zho choot lo gneed zhow; blozh ga bnabey me bdeed zho ncuuaŋe dow mëëd co.

### Güey Jesús ladz me

(Mt. 13:53-58; Lc. 4:16-30)

**6** Ga brieë Jesús grë xpëëdscuel me, laa me bdziḅ Nazaret zaatne nac ladz me.

<sup>2</sup> Laa zeeḅe goḷ dze ne rdziiladz zho lo dziin, laa me bdziḅ leḅ yadoo, psilo me pseed me grë miech co. Per nli rzee zdoo zho ron zho grë miḅe rnee me, rnabdiidzlsa zho rnee zho:

—¿Pazhe waa squitaa pseed meḅ qui? ¿Zha nac guieḷbiini ne squitaa rap me i, ne rnee miech ndal grë milagr ne ruḅ me? <sup>3</sup> Tib ngurëyagse name nac me.

Led lëë xingan Marí i, bets me name nac Jacob, nac José, nac Judas ni Simón, grë bzian mew, nu no zho grë zho.

Ib beeḅcasd zho me. <sup>4</sup> Zeeḅe goḅ me sca rac zho, dzigo rëb me lo zho:

—Zha ne rteed xtiidz Dios, mazd wen rnee miech lo zho stib dan, stib guiedz, lëdle ladz zho, ni meḅlidz zho ni meḅladz zho nëd guḅbey zho.

<sup>5</sup> Brieelod niuḅ me nzian milagr ga, blase zha rzacnë pxobnia me guic, beeḅguiac me. <sup>6</sup> Bzee zdoo me goḅ me scataa ndip zdoo zho, ib bliladz zho cho nac me.

Blozh ga mazd güey me grë guiedz ne ndxie gax ga, güeyseed me miech.

### Pxeeḷ Jesús xpëëdscuel me tsieseëd zho miech

(Mt. 10:5-15; Lc. 9:1-6)

<sup>7</sup> Tib dze, bredz me gza tsiipchop xpëëdscuel me, bnabey me zho tsieseëd zho miech. Pxeeḷ me zho chopga chopga zho, ni bdeed me poder lo zho par guḅcxooḅ zho meḅdox. <sup>8</sup> Pso me diidz lo zho güeyd zho pe yquiiin zho nëz, lëë gdib tib lë yag ne gzoxca zho güey zho. Zig nac ncuuaŋe gow zho, zig nac dimi, pe tib bziudgaa, güeyd zhow. <sup>9</sup> Lab zho, miḅe quiase ni zho; xab zho, miḅe nacwse zho miḅcose tsienie zho. <sup>10</sup> Ni rëb me lo zho:

—Guiedz ne gdziḅ to, zha ne gneedz zaatne cuëz to, lidz zha co goḷcuëz haxta gdziḅ dze ne gbi to guiedz co. <sup>11</sup> Laa zaatne ne ib gneedzd zho pa cuëz to, niicle nëdgaa zho yquiaadiag zho miḅe gnee to, dzigo goḷlit grë yudie co ni to, goḷrieegazh ga, zeeḅa guieḅ zho ganḷe lëda ga beeḅ zho.

<sup>12</sup> Dzigo laa zho brieë, laa zho zie. Güey zho, güeynee zho lo grë miech csaan zho xquieḷntseeb zho, gbig zho lo Dios. <sup>13</sup> Nzian zha ne nosacsi meḅdox, beḅcxooḅ zho meḅdox co; grë zha ne rzacnë, bdëëb zho nceit guic zho, beeḅguiac zho zho.

### Gut Juan Bautist

(Mt. 14:1-12; Lc. 9:7-9)

<sup>14</sup> Bin rey Herod rzeet zho Jesús, sac teḷ pa lotaaw zëëb diidz grëtaa milagr ne ruḅ me. Grë miech co, no zho rzac brieëban Juan Bautist lëë me ga nac Jesús, gane ruḅ me grëtaa milagr co; <sup>15</sup> nogaa zho rnee Líw, meḅ ne biaad pteed Xtiidz Dios padzeela; zzhisgaa zho rnee, no cho stib meḅ ne ziaad noteed Xtiidz Diosa, zig biaad grë zha ne biaad padzeela.

<sup>16</sup> Zeeḅe ron Herod sca rnee miech, dzigo rnee me:

—Nligaa Juan ga. Naa bnabey pchug zho yaḅ me, per lëë me ga brieëban.

<sup>17</sup> Sca rnee Herod sac rsoladz me zha beeḅ me Juan. Me bnabey bgaa Juan bio Juan ladzguiib, loxaque ne rnee Juan lo me nonguieḷda ga lëëque Herodí ptsieel-nia me; sac tsieelpaa bets me Lip nac Herodí.

<sup>19</sup> Blëënie wnaa ne nac Herodí ga Juan, rzac me tebaa zha gut me Juan; per rdeetew diidz, <sup>20</sup> sac rdzieb Herod lega pe guḅ me Juan, rieḅ me tib zha ne zienal miḅe nac diidzli, tib zha ne peet xtoḷd nac Juan; dzigo ib rdeete me diidz pe guḅ wnaa co Juan. Niicle ne cadque

zeene rnee Juan lo me, rio me zhgab rienḁ me dien zha guḁ me, per rdziladz me rquiaadiag me grē miḁe rnee Juan.

<sup>21</sup> Laa tibtaa dze laa miḁe no guic Herodí ga goc. Dze ne bloozh Herod stib iz, bnabey Herod goc tib lni nroob, bredz me grē zha ne nacie me dziin, grē zha ne zo lo menḁuiib, ni grē zha non lo zha Galilé. <sup>22</sup> Laa zho no mezh noyow zho, zeene bzēeb xindzooop Herodí psilo ndzooop biee ndzooop. Bdziladz Herod goḁ me zha biee ndzooop, grē zha ne zob lo mezh ga ne. Dzigo rēb Herod lo ndzooop, teḁ petaa gnab ndzooop zeed mew; haxta brieer ro me rēb me:

—Ncuaaḁe gacladztaa luu gnab luu, niicle zig groḁ grē ncuaaḁe rap naaw, znedz naaw.

<sup>24</sup> Rias ndzooop güeynabdiidz ndzooop lo xniaa ndzooop. Dzigo rēbchaa me lo ndzooop:

—Bnab lo me gnabey me tsiechug zho guic Juan gneedz zhow lo luu.

<sup>25</sup> Bdziḁ ndzooop lo Herod rēb ndzooop:

—Racladz naa xoob guic Juan Bautist tib leḁ plat, gneedz luuw lo naa niinagazh.

<sup>26</sup> Zeene bin Herod sca rēb ndzooop, mbanse rac me; per rdeetraaw diidz niab me grieeloda, sac grēse zha ne zobnie me ga, bin zho rēb me zeed me ncuaaḁe gnabtaa ndzooop. <sup>27</sup> Dzigo racse me pxeel me tib menḁuiib ne tsiechug guic Juan.

<sup>28</sup> Güey menḁuiib co leḁ ladzguuib pchug zho guic Juan. Bdziḁ zho, zhoobsew tib leḁ plat bdeed zhow lo ndzooop, dzigo güey ndzooop güeydeed ndzooopa lo xniaa ndzooop.

<sup>29</sup> Zeene bin xpēēdsuel Juana, dzigo güey zho güeylis zho me ga güeyqueets zho me.

### Bguiaaḁ Jesús gaay mil miech

(Mt. 14:13-21; Lc. 9:10-17; Jn. 6:1-14)

<sup>30</sup> Zeene laa gza xpēēdsuel Jesús bdziḁ lo me stib, psilo zho bzodiidz zho lo me grēse teḁ zha güey zho, grēse teḁ zha güeyseed zho miech. Per miech guizhiu ne ndxie lo me, zha ne rbi, zha ne rdziḁ; haxta ni riobd gow me grē xpēēdsuel me. Dzigo rēb me lo zho:

<sup>31</sup> —Mazd goḁgotsaa guio ne tib zaatne zitlaa lo grē miech rii, zeena grieeo gdziiladz to niip.

<sup>32</sup> Dzigo bzēeb me tib leḁ barcw grē me zho, laa zho zie. <sup>33</sup> Nzian zha ne goḁ zie me, beenbey zho ne mew. Dzigo ndal miech ne no grē guiedz gax co brieer, rias zho zie zho glole zho bdziḁ zaatne no gdziḁ me.

<sup>34</sup> Zeene biet me leḁ barcw, goḁ me laa grē miech guizhiu co ndxie ga. Pquia zdoo me zho goḁ me scataa ndxie zho zootle grē mēcwxiil yeen ne guiēḁ xbaxtor, dzigo psilo me nzian grē ncuaaḁe pseed me zho.

<sup>35</sup> Goḁ bdze dze co, wbig xpēēdsuel me lo me rēb zho:

—Mazd gudz lo grē miech qui guey zho na, zeena guiob tsie zho grē guiedz ne ndxie dib gax i, tsiesi zho ncuaaḁe gow zho; sac goḁ laa dze bdzele, ni choot miech guiēḁ nu.

<sup>37</sup> Pquiab me rēb me lo zho:

—To goḁdeed ncuaaḁe gow zho.

Rēbchaa zho lo me:

—¿Pe zhizhe dimi ne yquiin gziuu quietxtil ne gow grētaa miech qui?

<sup>38</sup> Dzigo bnabdiidz me lo zho, rēb me:

—¿Bla quietxtil ziaadnie to? ¡Goḁwi dien!

Zeene biire zho güeyso zho, rēbchaa zho lo me:

—Loxaque gaay quietxtil ziaad, ni ziaad chop meḁ.

<sup>39</sup> Dzigo bnabey me bzob grē miech co, wdzeepaaw bioogse lo guizh nguia ne zēeb ga ndxie zho. Tib dzoonga tib dzoonga zho bre, <sup>40</sup> zaatne bre tib gayoo zho, zaatne breegaa groḁ gayoo zho.

<sup>41</sup> Dzigo bzheḁ me gza gaay quietxtil co, ni grop meḁ co, blis lo me bui me nēz gbaa, bdeed me xquizh lo Dios. Blozh ga, beengroḁ me quietxtil co, zigse rdeed mew lo xpēēdsuel me, scase scase noguiz zhow lo grē miech co. Scaque been me grop meḁ co. <sup>42</sup> Grēse miech co, dow zho haxta zaatne bieltaa zdoo zho.

<sup>43</sup> Miech tafa, zha bguise rgaa zig gaay mil; ni zeene blozh dow zho, scase ncuaaḁe nroob biaan, biodzē tsi- ipchop chicuid bio grē quietxtil co, bio grē meḁ co.

### Rzē Jesús lo nisdoos

(Mt. 14:22-27, 34-36; Jn. 6:16-21)

<sup>45</sup> Zeene blozh ga, bnabey Jesús xpēēdsuel me bzēeb zho leḁ barcw, zeena zienerga zho tedquia zho stib nēz ro nis co, gdziḁ zho guiedz ne lē Betsaid; laa me bii blēz ga, nozonēz me grē miech co. <sup>46</sup> Blozhse bzonēz me zho, dzigo güey me tib guic gui zob gax ga, güeyzodiidznie me Dios.

<sup>47</sup> Zig rguets liuw, laa barcw ne zie xpēēdsuel me ga no lo nis co. Laa me zo ga tipse me, <sup>48</sup> ran me rlu ib gacd csēēniob zhow, sac rriee me rtsire mew. Merle guimbe liuw, tibaque zeene goḁ zho laa me bdziḁ zaatne zie zho ga; tib lo nis co ziezē me, rac me zig nac zeene tibted me lo zho.

<sup>49</sup> Zeene goḁ zho laa meḁ co sca ziaad-zē lo nis co, bdzieb zho, broptsie zho rnee zho:

—¡Tib ndziin i goḁ ziaad i!

<sup>50</sup> Sac grēse zho ranlo zho laa me sca ziezē lo nis co. Dzigo bnee me lo zho rēb me:

—¡Gdziebde to, naa ziaḁ nu!

<sup>51</sup> Zeene laa me biep leḁ barcw ne zie zho ga, laa me co blēz; dzigo mazdraa bzee zdoo zho. <sup>52</sup> ¡Per ib rienḁ zho cho nac me, niicle ne goḁle zho been me milagr nroob co bguiaaḁ me miech guizhiu co!

<sup>53</sup> Zeene laa zho bdziḁ stib nēz ro nis co, zaatne nac xtan zha Genesaret, dzigo laa zho pxidoo xbarcw zho ro nis ga. <sup>54</sup> Loxaque biet me leḁ barcw laa grē miech co beenbeyle me. <sup>55</sup> Rias zho güey zho grē guiedz co, güeynie zho diidz laa me bdziḁ ga. Dzigo psilo grē miech co rxob zho zhimguidz zho lo yag, rdziḁnie zho zho lo me zaatne rontaa zho no me. <sup>56</sup> Zaatne gdziḁtaa me, niicle guiedz nrooba, niicle guiedz lasa, rbee grē miech co zhimguidz zho rienie zho zho zaatne nac leḁ guiedz; ga rnab zho lo me siguiel me maase ni lar ne mbixse me xeḁ grē meḁ rzacnē co. Ni grēse zha ne rzheḁ xab me, riac zho.

### Ncuaaṅe ruṅctal xtoḷ miech

(Mt. 15:1-20)

**7** Tib dze, bdziṅ bla zha farisé, ni zla maistr ley ne ziaad nëz Jerusalén, lo Jesús. <sup>2</sup> Dzigo goṅ zho blalaa zha ne nac xpëèdscuel Jesús, zeṅe laa zho row rguibd zho nia zho zigne nacpaa grè zhiwseed xmeṅ-gol zho.

<sup>3</sup> (Nac zha farisé, ni grësegaa zha Israel telne tsard nia zho zigne nac xcostumbr xmeṅgol zho, ible rowd zho; sac zienaḷdox zho miṅe nac costumbr. <sup>4</sup> Zeṅe rbire zho lo lgui, ib no mod ne riar nia zho dzigoraa rzob zho row zho. Nzian grè wseed co psan xmeṅgol zho zienaḷ zho, zig nac zha riar grè tas, grè cant, grè xtsiṅ rotie zho miṅe niaa guuib, ni grè lo bangw ne rzob zho row zho.)

<sup>5</sup> Dzigo rëb zho lo Jesús:

—¿Pe nacne zienaḷd xpëèdscuel luu miṅe blu xmeṅ-gol ne? ¿Pe nacne squize nia beed zho i row zho?

<sup>6</sup> Pquiab Jesús rëb me lo zho:

—Nlipaa miṅe bnee Isá, meṅ ne biaad pteed Xtiidz Dios, zeṅe znu pquiaa me:

Grè miech rii, rquiaalose zho ruṅnon zho naa, rond zho diidz guṅ zho miṅe rnabey naa.

<sup>7</sup> Paat rquiind riaad zho riaadgaṅ zho naa;

sac niapse guicle zho riab grè wseed ne quialu zho lo miech.

<sup>8</sup> Sac tel to goṅ, nosaan to grè miṅe rnabey Dios, lel grè xcostumbr miech zienaḷ to.

<sup>9</sup> Xcostumbr to nac miṅe mazdraa rioxco to, laa miṅe rnabey Dios quiasaṅ to tib lad. <sup>10</sup> Led znu goṅ rnee ley ne bdeed Dios lo Moisés: “Goṅ pxoz luu, goṅ xniaa luu”, ni no stib miṅe rnee: “Zha ne quie pxoz, quiegaa xniaa, ib none guet zho.” <sup>11</sup> Laa to lel rnee to, zac guṅd miech xyudar xmeṅgol zho, telne bloogonle zho pe nac ncuaaṅe rieguiaḷ gdeed zho lo me. <sup>12</sup> Tole rdeete diidz ga guṅ zho xyudar pxoz zho, xyudar xniaa zho.

<sup>13</sup> Tib ladle goṅ rsaṅ to Xley Dios ga sca ruṅ to, lëe-paaze grè costumbr ne biaaṅnie to, ni quiasaṅgaa to lo zha ne ziaadquia, miṅ co noxcoraa to. Ni nzianraa grè falt ne squi quiaayṅ to.

<sup>14</sup> Dzigo bnee me lo grëraa miech ne ndxie ga, rëb me lo zho:

—Goḷquiaadiag miṅe gni naa lo to nu, ni goḷtsoxco guien to zha naca. <sup>15</sup> Goḷgacnaṅ gaṅle: Grè ncuaaṅe rdziṅ zdoo miech, led miṅcod ruṅctal xtoḷ zho; sinque grè ncuaaṅe ntseeb ne rza zdoo zho, miṅ co nac miṅe ruṅctal xtoḷ zho.

<sup>17</sup> Laa zeṅe laa me bdziṅ ro yu grè xpëèdscuel me, dzigo bnabdiidz zho lo me dien zha nac diidz ne sca rëb me lo grè miech co. <sup>18</sup> Rëbchaa me lo zho:

—¿Pe niicle to riendaquew dzigo lëe? ¿Pe riende to, grè ncuaaṅe row miech, led miṅcod ruṅctal xtoḷ zho?

<sup>19</sup> Sac grè ncuaaṅe row zho rdziṅda leṅ zdoomban zho, zhaa zaatne rdziṅa. Grè guielwagw, leṅ bziuud zdoose zho, leṅ zhitripse zho rieteda, rlozh ga rriiegaw xcuerp zho.

Ga blu me lo zho gaṅle, grëse ncuaaṅe nac guielwagw lëda ruṅctal xtoḷ miech. <sup>20</sup> Ni rëb me lo zho:

—Miṅe rza zdoomban miech, miṅ co nac miṅe ruṅctal xtoḷ zho. <sup>21</sup> Sac zdoomban zho rza grè ncuaaṅe ntseeb ne ruṅ zho, zig nac:

zeṅe rio zho grè zhgab yozh,

zeṅe ruṅ zho grè guielyozh,

zeṅe rban zho,

zeṅe rut zho samiech zho,

<sup>22</sup> zeṅe rionie zho zha ne nacd tsiield zho,

zeṅe rzoobladz zho ncuaaṅe rap stib miech,

zeṅe ruṅ zho grè guielntseeb,

zeṅe rquidie zho,

zeṅe rien zho ruṅ zho grè ncuaaṅe ndzinlid,

zeṅe nè rac zdoo zho raṅ zho cho zha ne stibnoded,

zeṅe rzhixcuaa zho diidzguizh,

zeṅe racniats zho,

zeṅe ruṅ zho grëraa ncuaaṅe paat rquiind.

<sup>23</sup> Grëse ncuaaṅe ntseeb rii, zdoomban miech rzaw, ni lëew nac miṅe ruṅctal xtoḷ zho.

### Biac xpëèd tib wnaa zit

(Mt. 15:21-28)

<sup>24</sup> Ga brieed Jesús, laa me zie nëz Tiro. Zeṅe bdziṅ me nëz co ga bdziel tib yu ne blëz me, gocladz me choot niacnaṅd ne laa me no ga; per brieeloda, znuse bien diidza.

<sup>25</sup> Zeṅe bin tib wnaa Sirofenis laa Jesús bdziṅ ga, dzigo güey me, sac noguitnie meṅdox tib xpëèd me. Zigne bdziṅ me pquiitsgzhib me lo Jesús, rnab me tsiegunxoon Jesús meṅdox co. Tib wnaa zit nac wnaa co; <sup>27</sup> dzigo rëbchaa Jesús lo me:

—Blëz niip dien. None glo mëed gow, nonguielḷa cuee ne quiet nia mëed gdeed new lo mëcw.

<sup>28</sup> Pquiab wnaa co, rëb me:

—Nli scaw, zigne rnee luu i; per niicle mëcwa led rio ma zhan mezh rtop ma grè miṅe rrieengaa nia mëed.

<sup>29</sup> Dzigo rëbchaa Jesús:

—¿Squiw nagoṅ! Lëëgazha i rnee luu. Peet tsieniedraa guic luu naa sca; bzë, laa meṅdox ne nosacsi xpëèd luu bichele.

<sup>30</sup> Laa wnaa co zey. Zeṅe bdziṅ me lidz me, goṅ me iṅe laa xpëèd me nixse lo lon, per laa meṅdox co psaanle win.

### Biac tib meṅ ne rcuaat

<sup>31</sup> Ga brieed Jesús, güeyted me nëz Sidón. Sidón brieed me bdziṅ me ro Nisdoo Galilé stib, zaatne nac xtan zha Decápolis. <sup>32</sup> Ga bdziṅnie zho tib mgui lo me, rcuaat mgui ni nca rnee mgui; bnab zho lo me cxobnia me guic mgui guṅguiac me mgui.

<sup>33</sup> Dzigo blee me mgui lad grè miech ne ndxie ga. Zit-laa güeynie me mgui, ga psëeb me mzhugnia me gropse leṅ diag mgui ni bdëeb me zhinzuc me lo ludz mgui. <sup>34</sup> Blozh ga, blis lo me bui me nëz gbaa, bnee-ladz zdoo me, dzigo rëb me:

—¿Bzhial! (¡Efata!)

<sup>35</sup> Zigne sca bnee me, laa diag mgui co bzhal, niicle ludz mguiw laaw wban, laa mgui psilo bneenal. <sup>36</sup> Dzi-go pso Jesús diidz lo grë miech co, choot lo gzodiidz zho zha biac mgui co.

Per laa ne rso me diidz lo zho, dzigole nözrii, nözrec rzodiidz zhow; <sup>37</sup> sac rzeedox zdoo zho gon zho miñe beñ me ga.

—iNcuaañe gzee zdoo ne i beñ meñ qui! —rnee zho—. Zha haxta nguaat, haxta ngop, runguiac me.

### Bguiañ Jesús tap mil miech

(Mt. 15:32-39)

**8** Leñ dze co, miech guizhiu ne biire pcaalsa lo Jesús stib. Zeene goc tson ngbidza, guiendraa ncuaañe gow zho. Dzigo bredz me xpëedscuel me, rëb me lo zho:

<sup>2</sup> —Rquia zdoo naa grë miech rii, tsonle ngbidz ga rac blanso zho nu, ni na quianiedraa zho ncuaañe gow zho. <sup>3</sup> Tejne squise zho gzonëz naa zho, glëbd zho, scow zho nöz, sac no zho zit brieë zho ziaad zho nu.

<sup>4</sup> Pquiab zho rëb zho:

—¿Per pe yguiañ ne zho? ¿Pa guioxi ne quietxtil ne gow grëtaa miech qui dan rii, naca zaatne guiend miech?

<sup>5</sup> Dzigo bnabdiidz me lo zho, rëb me:

—¿Bla quietxtil ziaadnie to i?

—Gadzaquew —rëb zho.

<sup>6</sup> Dzigo bnabey me grëse miech co bzob zho liu. Blozh ga bzheñ me gza quietxtil co, bdeed me xquizh lo Dios; blozhse bdeed me xquizh lo Dios, zigse noyuh-groj mew, scase scase rdeed mew lo xpëedscuel me rguiz zhow lo grë miech co. <sup>7</sup> Zienie zho zla meļ las; bzheñ me gza meļ co bdeed me xquizh lo Dios, blozh ga bnabeyaque me zho bdiiz zho ma.

<sup>8</sup> Grëse miech co, dow zho haxta zaatne bieltaa zho dzigo laa me bzonëz zho. Rgaa zho maase tap mil, ni zeene blozh dow zho bii bdop gadz chicuid miñe baañ.

<sup>10</sup> Blozh ga, laa me bzëëb leñ barcw grë xpëedscuel me, laa zho zie nöz xtan zha Dalmanut.

### Racladz zha farisé gan zho milagr

(Mt. 16:1-12; Lc. 12:54-56)

<sup>11</sup> Blalaa zha farisé ne no nöz co, zeene bin zho laa me bdziñ ladz zho, güey zho rzadraa ncuaañe rlisqui zho lo me. Rnab zho glu me cho nac me, rëb zho lo me:

—Racladz no dziañlo no gon luu tib milagr, tejne nli gbaa ziaad luu.

<sup>12</sup> Zeene gon me sca rac zho, bio me guiññe; dzigo haxta bneeladz zdoo me, rëb me lo zho:

—¿Zha rnaraa milagr ne racladz to gan to? Gneli naa lo to ganle, ni stib milagr gon ganndraa to.

<sup>13</sup> Blozhse sca rëb me lo zho, ndxieque zho ga laa me bzëëb leñ barcw laa me zie stib nöz ro nis co.

<sup>14</sup> Zeene brieë zho ga, zoladzd xpëedscuel me ney zho ncuaañe niow zho, lëë gdib tib quietxtil zienie zho leñ barcw. <sup>15</sup> Laa zho zie, tibaque zeene rëb me lo zho:

—Golguien gon, napaa noyac-wet to lo zhincobi zha farisé, lo zhincobigaa rey Herod.

<sup>16</sup> Zeene bin zho sca rëb me, bza zdoo zho rnee zho:

—Ne gon me nagon ziaadnie ne quietxtil gane squi rnee me.

<sup>17</sup> Bien me sca rnee zho, dzigo rëbchaa me lo zho:

—¿Pe nacre rnee to ziaadnie to quietxtil? ¿Riende to lëë zha rne naa? Ndip nac zdoo to gane riende tow.

<sup>18</sup> ¿Pa rquiin lo to, pa rquiin diag to ne laaw zob? <sup>19</sup> ¿Pe rsoladzde to zeene gaayaque quietxtil ni bgaaw bguiañ naa gaay mil miech? ¿Bla chicuid biodzë miñe baañ hor co?

Pquiab zho rëb zho:

—Tsiipchopa.

<sup>20</sup> Dzigo rëbchaa me:

—Zeene waa gadzaque quietxtil co, ni bguiañ naa tap mil miech, ¿bla chicuida baañ?

—Gadz chicuida —rëb zho.

<sup>21</sup> Dzigo rëb me lo zho:

—¿Pe niicle nana riendaque to pe rne naa?

### Biac tib meñ ne rcow lo

<sup>22</sup> Bdziñ Jesús guiedz ne lë Betsaid, ga güeynie zho tib mgui ne rcow lo lo me, bnab zho cxobnia me guic mgui gunguiac me mgui. <sup>23</sup> Dzigo bzheñ me nia mgui güeynie me mgui zaatne nacle ro guiedz co. Ga bdëëb me zhinzuc me leñ bziaalo mgui, ni pquiaania me zhits guidlo mgui; blozh ga bnabdiidz me lo mgui dien pe ranle mgui palal.

<sup>24</sup> Zeene laa mgui bui, rëbchaa mgui:

—Ranle naa niina nagon laa miech ziezë; per masaque ran naa zho zig rlu grë yag.

<sup>25</sup> Dzigo biire pquiaania me zhits lo mgui. Zeene laa mgui bui stib, ndiple rwi mgui laa lo mgui biacle. Grëse ncuaañe ran mgui, niicle zitraaw niini ran mguiw.

<sup>26</sup> Dzigo bzonëz Jesús mgui nöz lidz mgui, pso me diidz lo mgui tib nöz guey mgui, choot lo tsiezodiidz mguiw lad guiedz.

### Bnee Pedr cho nac Jesús

(Mt. 16:13-20; Lc. 9:18-21)

<sup>27</sup> Blozhse ga, laa Jesús brieë ga grë xpëedscuel me laa zho zie nöz Cesarea de Filipino, zieted zho grë guiedz las ne ndxie nöz co. Laa zho no nöz, tibaque zeene bnabdiidz me rëb me lo zho:

—¿Cho dien ron to rnee miech nac naa?

<sup>28</sup> Pquiab zho, rëb zho:

—No zho rnee Juan Bautista, no zho rnee Líw, meñ ne biadteed xtiidz Dios padzeela; nogaa zho rnee no cho stib meñ ne ziadteed xtiidz Diosa.

<sup>29</sup> Dzigo rëb me lo zho:

—¿To waa, cho rzac to nac naa?

Pquiab Pedr, rëb Pedr lo me:

—iLuu nac Meñ ne zëëble diidz ga cxeļ Dios guiaad lo guidzliu!

<sup>30</sup> Dzigo pso me diidz lo zho choot lo gneed zhow.

**Bzeet Jesús zha gon miech me**

(Mt. 16:21-28; Lc. 9:22-27)

<sup>31</sup> Bded ga, psilo Jesús bzeet me lo grë xpëedscuel me zha csacsi miech me. Rëb me nroob grë ncuuañe cteed zho me; grë zha non lo menquiedz, grë pxoz nroob, grë zha ne rseed miech ley, ible stsidil zho me, ni haxta zut zho me; per zeñe gac tson ngbidz gut me laa me grieeban. <sup>32</sup> Grëse miñe ted me, laaw nozodiidz me lo zho.

Gon Pedr sca rnee me, dzigo bredz Pedr me, blisqui Pedr lo me dien pe nacne rnee me laa me guet.

<sup>33</sup> Zeñe gon me zha rzë xtiidz Pedr, zoque Pedr ga biecw me bui me lo grëraa xpëedscuel me, goctox me rëb me:

—¡Biche lo naa nu menox! Zienied guic luu miñe rnabey Dios, sinque laa guic luu zienie miñe racladz luu.

<sup>34</sup> Dzigo blunia me lo grë miech ne ndxie ga, yquiaa-diag zho miñe gnee me; rëb me:

—Zha ne racladz sëeb xnëz naa, none cueeladz zho zho, none lëb zho guiaadnal zho miñe rnabey naa, nicle tel min co yquiaaqui csacsi miech zho. Nodne yquia zdoo zho xquielmban zho. <sup>35</sup> Sac zha ne yquia zdoo xquielmban, lel znu nitlo zho; sangue zha ne sca cueeladz xquielmban porne rleyne zho naa, porne rleyne zho grë Diidz Ndzon rii, zha co yгаа tib guielmban ne mazdraa ndzon. <sup>36</sup> Nana, tel zha ne gunlo grëse ncuuañe no lo guidzliu rii. ¿Pa yquiin grë ncuuañ co lo zho, tel lëew yquiaaqui laa zho guey gabil? <sup>37</sup> ¿Niacxe zrieelo gdziib zho dimi co laa zho len gabil? <sup>38</sup> Naa ne nac naa Men ne pxeel Dios zial naa lo guidzliu, zha ne ctoladz guiab zho lo grë miech ngoopdo rii laa zho no xnëz naa, o ctoladzniegaa zho xtudz naa, scaque naa stoladznie naa zho gal dze ne laa naa guiaal stib. Dze ne guiaalnie naa grë anjl, ni glu naa grë guielndzon ne rap Dios.

**9** Ni rëb me lo grë miech co:

—Gneli naa lo to ganle, nzian grë zha ne ndxie nu niina ib tedsod gardaque guet zho, bii zan zho ganle zeñe laa Dios glu ne nli men rnabey nac me.

**Bdzëëlo Jesús**

(Mt. 17:1-13; Lc. 9:28-36)

<sup>2</sup> Goca xoop ngbidz, brieë Jesús gza me Pedr, Jacob ni Juan, güey zho bzoquia zho tib guic gui glaa.

Bdziñ zho glaa guic gui co, tibaque zeñe gon zho laa me bdzëëlo. <sup>3</sup> Maaque rquiabni xab me, nquitsbie rnaw; ni tib miech grieelod scataa mbe quiib lar. <sup>4</sup> Gonlo zho zeñe laa Lí ni Moisés (grop zha ne biadteed xtiidz Dios glo) bdziñaque, laa zho nozodiidznie me. <sup>5</sup> Dzigo rëbchaa Pedr lo me:

—Maestro, ¡ne nligaa wena guiaañ ne nu! Laa no gzaa tson yu yag xiid win nu tso to: tiba tso luu, tiba tso Moisés, stiba tso Lí.

<sup>6</sup> Rdzieb Pedr gza Pedr schop zha co, lo dzeb co niicle rien daque Pedr pe rnee Pedr. <sup>7</sup> Tibaque znuse bdop tib xcow pquia ngali zaatne zo zho ga; dzigo bin zho zëeb tib tsi men co lo xcow co, rnee me:

—Lëë xpëed naa i gon, rleyne naa me. Golgon miñe rnee me.

<sup>8</sup> Lëëled biecw lo zho rwi zho, choot gon draa zho, Jesússe zo lo zho ga.

<sup>9</sup> Blozhse ga, laa zho wbique ga. Laa zho ziezëeb dan noyet zho cho gui co, zeñe rëb me lo zho:

—Miñe gon to gon, choot lo gneede tow. Golcuëz haxta gal dze ne grieeban Men ne pxeel Dios.

<sup>10</sup> Nacne choot lo bneed zhow, per psilo zho gza tson zho rnabdiidzlsa zho, zha mod grieeban tib zha ne gutle.

<sup>11</sup> Dzigo bnabdiidz zho lo me, rëb zho:

—¿Bay zha nacne rnee maistr ley, glo Lí no guiaad stib, dzigora a guiaad Men ne zëëble diidz ga cxeel Dios?

<sup>12</sup> Pquiab me rëb me lo zho:

—Nliw, ible nacle diidz ne glo Lí guida seed miech gon zho xtiidz Dios, per laa me biaadle; ni zigne bzeetse grë zha ne biadteed xtiidz Dios ted me, scae been miech me. Scaque Men ne cxeel Dios ga, rnee lo Xtiidz Dios nroob csacsi miech me, ible gandzed zho me.

**Biac tib niib ngop**

(Mt. 17:14-21; Lc. 9:37-43)

<sup>14</sup> Zeñe bdziñ Jesús zaatne biaan grëraa xpëedscuel me ga, gza me Pedr Jacob ni Juan; gon zho miech guizhiu ne ndxie lo zho; blalaa zha ne nac maistr ley zo lo zho ga, nodildiidznie zho. <sup>15</sup> Grë miech co, zeñe gon zho Jesús, rley zho, rias zho güeydzieelo zho me güeyquiaa bdiuzh zho me. <sup>16</sup> Dzigo bnabdiidz me rëb me:

—¿Pe nadien squitaa nodildiidz to?

<sup>17</sup> Lad grë miech co pquiab tib zho, rëb:

—Maestro, lo luu zialnie naa tib xpëed naa gunguiac luu win; ib gacd gnee win sac noguitnie menox win.

<sup>18</sup> Tel pataa zo win, zeñe laa ma rzëeb zdoo win rron ma win liu; ga nix win rdzib mtsiin ro win, ni row lay win; nrooble noyo win lëbdraa win së win. Blansonie naa win nu, dzigo bnab naa lo xpëedscuel luu guncxoon zho menox co, per brieelod zho.

<sup>19</sup> Dzigo rëbchaa Jesús lo zho:

—¡Pe na squitaa miech nad nac to, ib rnalode to Dios! ¿Palal tiemp ne so naa gne naa lo to? ¡Ncuuañe cxcwdraa naa lo to squi nac to! ¡Gol tienie mëedwin qui nu!

<sup>20</sup> Güey zho güeynie zho mëedwin co lo me. Zigne gon menox co me, psilo beenxidz ma win, znuse biab win liu, rtiibxto win ni rdzib mtsiin ro win. <sup>21</sup> Dzigo bnabdiidz me lo pxoz win, goc palal dze psilo sca rac win.

Rëbchaa pxoz win:

—Bii mëdyeen win psilo squi rac win. <sup>22</sup> Pe zhidaa vuel zieron menox qui win lo gui, zieron ma win lo nis ne, racladz ma gut ma win. Bzhiguie telne zrieelo gunguiac luu xpëed naa, ¡pquia zdoo naa, been tib guielnzaac beenguiac win!

<sup>23</sup> Rëbchaa Jesús lo me:

—¿Zha rnee luu “te|ne zrieelow”? ¿Zha ne dib zdoo rnalos Dios, grése ncuane racladz zho, zaca!

<sup>24</sup> Lèlèd pquiab pxoz mèed co, rëb me:

—Rnalo naa Dios, per bzhiguiel been xyudar naa, ¡dib zdoo naa gnalo naa me!

<sup>25</sup> Zeene gon Jesús laa grë miech co rbigberaa, dzigo goctox me lo menox ne noguitnie mèed co, rëb me:

—Menox, luu gon psan ngop mèed rii, luu psan nguaat win. ¡Niinagazh psaan win, ib gbiiredraa luu ygaal luu win!

<sup>26</sup> Horco biire beenxidz ma mèed co stib, masaque roptsiedan ma laa psaan win, nixtaque win ga, zootle gutle win. Nzian grë miech co, tibaque nan zho gutle win. <sup>27</sup> Laa zeene bzhen Jesús nia win, blis me win ga, laa win bzoli.

<sup>28</sup> Zeene bdzin Jesús len yu ne rbëz me grë xpëed-scuel me, bnabdiidz zho lo me rëb zho:

—¿Bay pe nacre brieelod no ndziunxoon no menox co?

<sup>29</sup> Dzigo rëbchaa me lo zho:

—Grë menox ne sca nac, rquiin dib zdoo ne gnab ne lo Dios dzigo zrieelo gunxoon ne ma.

### Bzeet Jesús laa miech csacsi me

(Mt. 17:22-23; Lc. 9:43-45)

<sup>30</sup> Brie Jesús ga grë xpëedscuel me, laa zho wbire nëz xtan Galilé stib. Racladz me cho gacnan pa lo no me; sac len dze co nzian grë ncuane noseed me zho. Haxta bzeet me zha csacsi miech me, rëb me:

—Naa ne nac naa Men ne pxeel Dios, ible ziaab naa ladznia miech, ni zut zho naa. Per zeene gac tson ngbidz gut naa, laa naa grieeban.

<sup>32</sup> Per ib rienz zho pe nacre sca rnee me, niicle gnabdiidzga zho rdzieb zho gnabdiidz zhow lo me.

### ¿Cho nonraa?

(Mt. 18:1-5; Lc. 9:46-50)

<sup>33</sup> Bdzin zho guiedz ne lë Capernaum; grése zho laa zho ndxie len yu ne blëz zho, tibaque bnabdiidz Jesús lo zho, rëb me:

—Golnë dien, ¿pe scataa nodiidiidz to zeene ziaad ne nëz?

<sup>34</sup> Ni tib zho ib pquiabd, sac zeene ziaad zho nëz quianeelsa zho dien cho nac zha ne nonraa.

<sup>35</sup> Dzigo bzob me, bredz me zho gza tsiipchop zho rëb me lo zho:

—Zha ne racladz gac zho zha non, none guiaanwin zho gac zho zig tib nguñdziin lo samiech zho.

<sup>36</sup> Dzigo bzo me tib mèedbgui win glowtaa lo zho; blozh ga bdeedz me win ni rëb me lo zho:

<sup>37</sup> —Zha ne ngab xnëz naa, ni gleynie zho tib mèedwin zig mèedwin rii, guñ naa cuent naa ga rleynie zho; ni zha ne sca rleynie naa, yele men ne pxeel naa ga rleynie zho.

<sup>38</sup> Blozh ga, rëbchaa Juan lo me:

—Maestro, bdzion no gon bzeet tib zha co lë luu zeene beñxoon zho menox; nacre nli blisqui now lo zho, sac gon, led yed zho nacgrë ne.

<sup>39</sup> Dzigo pquiab me rëb me lo zho:

—¡Gunscade to! Sac gon zha ne sca rzeet lë naa zeene run zho milagr, niacxe lëèque zha glëë lo naa.

<sup>40</sup> Zha ne nacie ne, glëed zho lo ne.

<sup>41</sup> ‘Golgacnan sca ganle, grése zha ne gdeed maase tib zhigaque nis guie zha ne ngab lo naa, ib tedsod stsire Dios miñe been zho ga. <sup>42</sup> Sangue zha ne yguib gunctal zho xtol zho ne nac zho zig tib mèedlas yeen; mazd lëetaa miñe ted zha co sobdoo tib quie molin zhobxtil yquiaw yan zho tsieron zho zho nisdoo.

### Choot gdeete diidz guiab lo dol

(Mt. 18:6-9; Lc. 17:1-2)

<sup>43</sup> ‘Zha ne rien nia zho nac miñe rquiaqui runctal zho xtol zho, mazd cchuggazh zho nia co zho. Peet nacd maase tibaque nia zho zob totsaque yгаа zho guie|mban ndzon ne gdziñd dze lozh, lëdle zob gropa ni laa zho guey gabil, lo beldox ne gdziñd dze guiuu. <sup>45</sup> Te|ne rienгаа zho ni zho nac miñe rquiaqui runctal zho xtol zho, mazd cchuggazh zho ni co zho. Peet nacd maase tibaque ni zho zob totsaque yгаа zho guie|mban ndzon ne gdziñd dze lozh, lëdle zob gropa ni laa zho guey gabil, lo beldox ne gdziñd dze guiuu. <sup>47</sup> Te| tib lo-gaa zho nac miñe rquiaqui runctal zho xtol zho, mazd cueegazh zho bziaalo co zho. Peet nacd maase tibaque bziaalo zho zob totsaque yгаа zho guie|mban ndzon co, lëdle zob grop bziaalo zho ni laa zho guey gabil.

<sup>48</sup> Zaatne nac gabil, ib gdziñd dze ne guiuu lo bel co; grë mziog ne ndxie ga, gdziñd dze ne nitlo ma.

<sup>49</sup> Grése zha ne gdziñ ga, masaque cuib gui lad zho zig rbib zed lad bël.

<sup>50</sup> ‘Zig nac zed, rquiindoxa zeene nzhiw, per zeene nzhida, ¿pa dien yquiina? Scaquegaa to nagon golgac zig zed ne nzhi, zeena yquiin to lo guidzliu rii; niowse golbannie samiech to, glëëlsade to.

### Zha ne rsëbtsieel

(Mt. 19:1-12; Lc. 16:18)

**10** Brie Jesús Capernaum güeyted me grë guiedz ne ndxie nëz xtan zha Judé, grë guiedz ne ndxie nëz dan ro guiubee Jordán. Miech guizhiu ne rcaalsa lo me, dzigo rsilo me rseed me zho zigne runtaque me.

<sup>2</sup> Tib vult bdzin bla zha farisé gocladz zho niungüet zho me, par dien pe nxiñd me tib diidz; bnabdiidz zho rëb zho:

—Maestro, mgui ne racladz csëbtsieel, ¿pe gnë luu pe zrieelo csëbtsieel zho?

<sup>3</sup> Pquiab me rëb me lo zho:

—¿Zha zho psan Moisés diidz lo to?

<sup>4</sup> Pquiab zho rëb zho:

—Te| Moisésa, bdeed me diidz csëbtsieel zha ne racladz csëbtsieel, lëëraasi none yquia tib guits gdeed zho lo wnaa zaatne raquiet ne laa zho psaan wnaa.

<sup>5</sup> Dzigo rëbchaa me lo zho:

—Ne squicxe waa miech nad nac to ib ronde to diidz, miñ co nacre biaan ley co. <sup>6</sup> Per ib nodne csëbtsieel miech; sac gon, zeene psan Dios grëtaa ncuane no, tib nëz miech bzaa me: tib mgui ni tib wnaa. <sup>7</sup> Gacxe

waa, mgui ne rtsieelnia ib none grieezhaa zho lo pxoz zho, lo xniaa zho, par gbannie zho wnaa ne nac tsiel zho; laa zho gactipse grop zho. Nacdraa zho chop miech, sinque laa zho rac tibaque. <sup>9</sup> Dios nac meṅ ne psan ycatsieel miech, cho dzigo nac miech par quiits zho miṅe rnabey me.

<sup>10</sup> Laa zeene bdziṅ me leṅ yu ne rbëz zho, dzigo bn-abdiidzaque xpëedscuel me miṅ co lo me stib. <sup>11</sup> Dzigo rëbchaa me lo zho:

—Mgui ne rsëbtsieel ni rbannie zho stib wnaa, nogu-itnie zho wnaa ne gocpaa tsiel zho ga, ni doḷ ga ruṅ zho. <sup>12</sup> Niicle wnaagaaw, wnaa ne rsëbtsieel ni rbannie zho stib mgui, lëëque doḷaque ga ruṅ zho.

### Beenlay Jesús mëedlas

(Mt. 19:13-15; Lc. 18:15-17)

<sup>13</sup> Tib vuelt nzian meṅ ne bdziṅ bdziṅnie zho xpëed-las zho lo Jesús, par cxobnia me guic win guṅlay me win. Grë zha ne nac xpëedscuel me, leḷ psilo zho ndox zho lo grë zha ne bdziṅnie grë mëedlas co.

<sup>14</sup> Zeene goṅ me sca quiayun zho, wbiṅladz guic me, dzigo rëb me lo zho:

—Ctsirede to grë mëedlas yeen qui, goḷsaan guiaad win lo naa. Sac goṅ grë mëedlas yeen, ni zha ne nac zigne nac win, zha co nac zha ne sëëb ygab lo Dios.

<sup>16</sup> Blozhse sca bnee me, dzigo psilo me bdeedz grë mëedlas co, ni pxobnia me guic win beenlay me win.

### Bzodiidznie tib zha ricw Jesús

(Mt. 19:16-30; Lc. 18:18-30)

<sup>17</sup> Laa Jesús nole nëz tsie me stib guiedz, zeene rias tib niib nguieg bdziṅ pquiitsgzhib lo me, rëb niib lo me:

—Naṅ naa luu nac tib meṅ ne noseed miech, ni tib meṅ wen nac luu; ḷbnë dieṅ pe nac miṅe guṅ naa zeena ygaa naa guieḷmban ndzon ne gdziṅdraa dze lozh?

<sup>18</sup> Rëbchaa Jesús lo niib:

—Rnee luu lëë tib meṅ wen nac naa. ḷNligaaw, Diosse nac meṅ wen! <sup>19</sup> Naṅle luu gaṅle zha nac Xley Dios, rnew:

Gute luu samiech luu,  
teḷne nole tsiel luu, tsonied luu zha ne led tsiel luu,

cuand luu samiech luu,  
yquiadiidzguizhd luu samiech luu,  
yquidieed luu samiech luu,  
goṅ pxoz luu, goṅ xniaa luu; bin miṅe rnabey me luu.

<sup>20</sup> Dzigo pquiab niib rëb niib lo me:

—Maestro, grësew zigne bzeetse luuw i, ni tiba gard quits naa wlal ne nac naa zha nguieg.

<sup>21</sup> Dze rwi Jesús lo niib, rleynie me niib.

—Stibaque miṅe rquiin guṅ luu —rëb me—, güey, güeyto grëse ncuaaṅe quianie luu, dzigo bdiiz dimi co lo grë zha mban ne guieṅd pe yquiin; sca nroobraa guieḷnzaac ne ygaa luu gbaa. Lozh ga, bleeladz xquieḷmban luu dënaḷ zhits naa.

<sup>22</sup> Zeene bin niib co sca rëb Jesús, biab guieḷnë niib, mbanse rac niib laa niib zey; sac ne nligaa nroob ncuaaṅe quianie niib.

<sup>23</sup> Dze rwi me goṅ me laa zha nguieg co zey, dzigo rëb me lo xpëedscuel me:

—ḷGrë zha ne squi rapcheṅ, rzacxuu zho par sëëb zho xnëz Dios gnabey me zho!

<sup>24</sup> Zeene bin zho sca rëb me, rzee zdoo zho. Dzigo bi-ire me bnee me rëb me lo zho:

—Xin, ḷne nligaa tib miech ne ndziib rap cheṅ, rzacx-uu zho sëëb zho xnëz Dios gnabey Dios zho! <sup>25</sup> Mazd znuse rded tib camell guieer guzh, lëdle sëëb tib zha ricw xnëz Dios.

<sup>26</sup> Zeene bin zho sca rëb me, mazdraa bzee zdoo zho, rnabdiidzlsa zho rnee zho:

—Bay, ḷchose dzigo nac zha ne zrieelo sëëb xnëz Dios?

<sup>27</sup> Dze rwi me lo zho, dzigo rëbchaa me:

—Par miech zootle tsod zha ne grieelo sëëb xnëz me. Saṅgue me, naṅ me no zho; sac tsod ncuaaṅe grielod guṅ me.

<sup>28</sup> Dzigo rëb Pedr lo me:

—Teḷ no, grëse ncuaaṅe rdziaap no laa no psana, laa no ziaadnaḷ zhits luu.

<sup>29</sup> Pquiab me rëb me:

—Grëse zha ne psan lidz, psan zho bets zho, bzian zho, xniaa zho, pxoz zho, xpëed zho, liun zho, porne riladz zho naa ni riladz zho Xtiidz Ndzon Dios; <sup>30</sup> nli nroob guieḷnë gaṅ zho, per gneli naa lo to gaṅle: grëse ncuaaṅe sca psan zho ga, lo guieḷmban riique laa zho gbiire gaṅa stib tib gayoogaw tib tiba; ni ib tedsod zgaa zho tib guieḷmban ndzon ne gdziṅdraa dze lozh.

<sup>31</sup> 'Nli zig nac niina, no zha ne rzac zha non nac zho, per zeene gaḷ dze co peet gaṅond zho; laa zha ne rzac zho peet nond, gaḷ dze co lalga gac zho grë zho.

### Biire bzeet Jesús laa miech csacsi me

(Mt. 20:17-28; Lc. 18:31-34)

<sup>32</sup> Brieet Jesús ga laa me zie Jerusalén. Nzian grë zha ne zianaḷ zhits me, nerse me lo zho laa zho zie. Grë zha ne nac xpëedscuel mew, rzee zdoo zho; laa grëraa miech co per nli rdzieb zho. Dzigo bredz me gza tsiip-chop zha ne nac xpëedscuel me ga, psilo me bzeet me grëse teḷ zha ziaadyob ted me, rëb me lo zho:

<sup>33</sup> —Bii zaṅ to gaṅle, naa ne nac naa Meṅ ne pxeel Dios, niina ne laa ne gdziṅ Jerusalén ible ziolo zho naa ladznia grë zha ne nac pxoz nroob ni grë zha ne rseed miech ley. Grë zha co gnab guet naa, ni san zho naa ladznia grë zha ne nacdraa zha Israel. <sup>34</sup> Xidznie zho naa, stsuc zho lo naa, zguiṅ zho naa, ni haxta zut zho naa; per dze ne gac tsonṅ ngbidz gut naa laa naa griee-ban.

<sup>35</sup> Dzigo wbig gax Jacob grop Juan (xingan Zebedé) lo me, rëb zho:

—Maestro, laa no gnab tib favor lo luu, per racladz no siguiel luu guṅ luuw.

<sup>36</sup> Dzigo rëb me:

—ḷPe favor ne racladz to guṅ naa lo to?



<sup>37</sup> Rëbchaa zho:

—Laa no racladz, siguiel luu zioob no cue luu gal dze ne laa luu nac rey rnabey luu, tib no nêz derech stib no nêz revés.

<sup>38</sup> Pquiab Jesús, rëb me lo zho:

—Ni to gon riend pe rnab to! ¿Pe zleb to gan to gre guielne ne gan naa, pe zleb to ted to gre mine teed naa?

<sup>39</sup> Rëbchaa zho:

—Zlëeb no!

Dzigo rëbchaa me lo zho:

—Nli zan to guielne ne gan naa, ni zded to mine teed naa; <sup>40</sup> per ne gnedz naa diidz sob to cue naa nêz derech o nêz revésgaa, led naad raguial min co; laa luga co biaanle par zha ne nole diidz ygaaw.

<sup>41</sup> Grëraa zha ne nac xpëedscuel me, zha ne nacgza Jacob ga grop Juan, zeene bin zho zha rzë xtiidz Jacob grop Juan blëe zho lo zho. <sup>42</sup> Dzigo bredz Jesús zho grëse zho, rëb me lo zho:

—Ran to ganle zha ran grë zha ne rnabey grë guiedz ne ndxie lo guidzliu, ni grë zha ne nac zha non, masaque rnabey zho samiech zho zigne racladztaa zho. <sup>43</sup> Sangue to gon, gunscade to. Lo gza to, zha ne racladz gac zho zha non lo to, laa ne glu zho zha non zho, none glo zho guiaanwin gac zho zig tib nguñdziin lo to. <sup>44</sup> Scaquegaa, zha ne racladz gnabey lo to, none glo cseed zho gon zho mine gnabey to zho. <sup>45</sup> Golgan ganle, niicle naa ne nac naa Men ne pxeel Dios, ziald naa par gnabey naa miech, sinque laa naa zial par gac naa tib nguñdziin lo zho, ni gded naa xquielmban naa zeena laa zho lo grëtaa ncuane ngadoo zho. Ni nan-paa naa miech guizhiu ne laa.

### Biac tib men lë Bartimé

(Mt. 20:29-34; Lc. 18:35-43)

<sup>46</sup> Sca no grë miech guizhiu co nêz, laa zho bdzin guiedz Jericó. Laa zeene laa grë miech taf co zieriee ro guiedz co, laa tib mgui ciegw lë Bartimé zob ga rtop gon (xingan tib men lë Timew). <sup>47</sup> Zeene bin Bartimé ye Jesús (Nazaren) ziaad ga, psilo me nguiedz rbedz me, rnee me:

—Jesús, men xti rey David, pquia zdoo naa!

<sup>48</sup> Nzian grë miech co ndox lo me nan zho guioog ro me, per dzigole mazdraa nguiedz roptsie me, rnee me:

—Jesús, pquia zdoo naa!

<sup>49</sup> Dzigo pcuëëzni Jesús, bnabey Jesús güeytsedz zho me. Bdzin zho lo me, rëb zho:

—Ligier guso i! Dë ganle laa me rbedz luu.

<sup>50</sup> Zeene bin mew, haxta squi bron me lar ne mbix me, guso me ga laa me bdzin lo Jesús. <sup>51</sup> Dzigo rëbchaa Jesús lo me:

—Bnë nadien, zpe racladz luu gon naa?

Pquiab me rëb me:

—Maestro, racladz naa guiac lo naa.

<sup>52</sup> Dzigo rëbchaa Jesús:

—Niinagazh laa lo luu gan! Laa luu biac, sacne dib zdoo luu bnalo luu naa. Ligier na bzë.

Horcogazha laa lo men co psilo bui, laa me zienal zhits Jesús.

### Bdzin Jesús Jerusalén

(Mt. 21:1-11, 18-19; Lc. 19:28-40; Jn. 12:12-19)

**11** Zhile gdzin zho Jerusalén, laa zho zie gax zaatne riaan guiedz Betfagé ni guiedz Betain, nêz dan squi riaan Gui Oliv, zeene bredz Jesús chop xpëedscuel me <sup>2</sup> rëb me lo zho:

—Goltsie guiedz win ne ndxie danse lo ne i. Zigne sëeb to lad guiedz, laa tib burr quidoo ga, ni tib miech gard sob lad ma; dzigo golxadz ma, goltënie ma nu. <sup>3</sup> Tel cho gnabdiidz pe nacte noxadz to ma, dzigo golguiab: men ne rnabey ne men co rquiin ma, na zigne lozh xtsiin ma guiaadsan no ma.

<sup>4</sup> Laa zho zie, nligaaw laa zho güeydziel burr co quidoo ma tib ro nêz, gax tib ro yu. <sup>5</sup> Blalaa zha ne zo ga, zeene gon zho laa zho noxadz ma, rëbchaa zho:

—¿Pe gon to burr qui dzigo na, ne noxadz to ma?

<sup>6</sup> Dzigo pquiab zho zigne rëbse Jesús lo zho ga, nacte bdeed men co diidz laa zho zienie ma.

<sup>7</sup> Bdziinne zho ma lo Jesús lëque lar ne rbix zho pxob zho lad ma, bzobga me ma. <sup>8</sup> Nzian grë miech co zigse zie Jesús, scase scase ner zho rta zho lar ne rbix zho rded me, nogaa zho rchoo nia grë pe yag rdziin zho zaatne rded me. <sup>9</sup> Grëse zho, niicle zha ne ner lo mew, niicle zha ne nal zhits mew, rley zho nguiedz roptsie zho, rnee zho:

—Zha ndzontaa men qui pxeel Dios lo ne! <sup>10</sup> Zha wentaa ziaad me gac me zhirey ne! Me gnabey zigne bnabey pxozgol ne rey David! Zha ndzontaa Dios ne zob gbaal!

Sca nguiedz roptsie zho rlynie zho me, laa me bdzin Jerusalén.

<sup>11</sup> Bdzin me Jerusalén, güey me güeyso me len yadoo. Blozhse bui me dipse len yadoo, laa me brieque ga laa me zie nêz Betain grë xpëedscuel me, sac bdzele dzew.

<sup>12</sup> Biini liu, loxaque zieriee zho Betain laa me psilo rcaabedz. <sup>13</sup> Zitlaa ziaad me gon me tib zhan yag guigw, nxii nac low zëeb zhiblaga; dzigo zie me zieso me dien pe gdziidz tib guigw low gow me. Bdzin me zaatne zoba, ni tib guigw guieñd low loxaque zhiblagsew scataa zëeb, sac gardpaa gdzin mëe ne rquia guigw. <sup>14</sup> Dzigo rëb me lo yag guigw co:

—Squitaa nagon guiaan luu! Gdzindraa dze yquia nex lo luu gow miech!

Grëse xpëedscuel me, bin zho sca bnee me lo yag co.

### Blee Jesús miech len yadoo

(Mt. 21:12-17, 20-22; Lc. 19:45-48; Jn. 2:13-22)

<sup>15</sup> Bdzin zho Jerusalén, bzëeb me len yadoo. Psilo me blee me grëse miech ne quiayun lgui ga, zigtaa zha ne no wto, zigtaa zha ne no wziw. Grë zha ne no wto palom, grë zha ne notsëe dimi, ptiixche me xmez zho. <sup>16</sup> Blozh ga, pso me diidz choot nodraa sëebnie grë ncuaan co len yadoo, <sup>17</sup> rëb me lo zho:

—Led znu gon̄ rnee lo Xtiidz Dios: “Zaatne nac lidz naa nu, nu guiaad gr̄ese miech ne ndxie lo guidzliu sodiidznie zho naa.” Laa to gon̄ quiayun̄ to lugar rii zig tib zhibliee ngbaan.

<sup>18</sup> Gr̄e zha ne nac pxoz nroob ni gr̄e zha ne rnabey lo maistr ley, bin zho sca r̄eb me, dzigo psilo zho rguib zho dien̄ zha gdeeda diidz gut zho me. Per rdzieb zho lega gnaaz zho me, sac ndal miech ne rley rquiaadiag zhiwseed me. <sup>19</sup> Zeene laa liu pcow, laa me wbique Jerusalén stib gr̄e xp̄eēdsuel me.

<sup>20</sup> Biini liu co, laa zho zieded zaatne zob yag guigw ne sca güeyguib me nex lo ga, gon̄ zho laaw bidzle dib low. <sup>21</sup> Dzigo beensoladz Pedr mew, r̄eb Pedr:

—Maestro, bui gan̄le laa yag guigw ne bdzibdee luu ga bidzle.

<sup>22</sup> Pquiab me r̄eb me:

—Zha ne dib zdoo rnaló Dios, <sup>23</sup> gneli naa lo to gan̄le: Niicle ncuane mazdraa ngañ gnab zho lo me, zun̄ mew; l̄ëraasi none dib zdoo zho gliladz zho zac miñe rnee zho, ni palal gacchopd guic zho. <sup>24</sup> Golgona sca gan̄le, gr̄ese ncuane gnab to lo Dios, dib zdoo to golgiladz ne zneedz mew, dzigo sca zac miñe rnab to. <sup>25</sup> Ni zeene gnab to lo Dios, gol̄soladz dien̄ pe no cho rl̄ënie to, dzigo gol̄gun̄ zho perdon; zeena scagaa, Pxoz to men̄ ne zob gbaa zun̄ me to perdon tel̄ pe nactaa xtōl to. <sup>26</sup> Sac tel̄ne guñde to samiech to perdon, dzigo niicle megaa, guñd me to perdon.

### Cho rnabey Jesús

(Mt. 21:23-27; Lc. 20:1-8)

<sup>27</sup> Blozh ga, laa zho bdzinaque Jerusalén stib. L̄ë-taaque laa Jesús quiawi dib len̄ yadoo, zeene bdziñ bla zha ne nac pxoz nroob, bla zha ne nac maistr ley ni zha ne nac men̄ non lo menguedz, <sup>28</sup> r̄eb zho lo me:

—¿Cho dien̄ nac luu ne squitaa ziaadnabey luu len̄ yadoo? ¿Cho rnabey luu?

<sup>29</sup> Pquiab me r̄eb me lo zho:

—Laa naa gun̄ tib wnabdiidz lo to. Tel̄ne stsire to low, dzigo gni naa lo to gan̄le cho rnabey naa ne laa naa noyun̄ gr̄e ncuane noyun̄ naa. <sup>30</sup> Gol̄n̄e dien̄, ¿cho pxeel̄ Juan baaad me pchoobnis me miech? ¿Pe Dios pxeel̄ me, te miechsew ye?

<sup>31</sup> Psilo zho rnabdiidzlsa zho, rnee zho:

—Tel̄ne dzieets ne Dios pxeel̄ Juan, dzigo laa me gn̄e: “¿Pex nac dzigo waa bliladzde to miñe bnee Juan?”

<sup>32</sup> Tel̄ na dzieetsgaa ne: “Miechse pxeel̄ Juan, grieeciadaque ne.”

Rdzieb zho niab zho miech pxeel̄ Juan, sac gr̄ese menguedz nan̄ ne nli Dios pxeel̄ Juan biadteed Juan xtiidz Dios lo miech. <sup>33</sup> Dzigo mazd miñe been̄ zho, r̄eb zho:

—Ndion̄d no dien̄ cho pxeel̄ Juan.

Dzigo r̄ebchaa me lo zho:

—Niicle naagaa nagon̄, grieelod gni naa lo to cho rnabey naa quiayun̄ naa gr̄e ncuane rii.

### Xcuent zha ne pquianap liu

(Mt. 21:33-46; Lc. 20:9-19)

**12** Dzigo psilo Jesús bzodiidz me tib cuent, r̄eb me: —Tib mgui name, nroob lb̄e uv been̄bni me lo liun̄ me. Psilo me ptse me igose liu co, bzaa me zaatne gzhii gr̄e uv co, ni bzaa me tib yu glaa zaatne sob zha ne yquiaanapa. Blozh ga, blediñ me liu co lo bla zha ne ran liu, dzigo laa me brieeg ga, laa me zey zit.

<sup>2</sup> Zeene gol̄ m̄eē ne ral uv, pxeel̄ me tib xmoz me lo zha ne quianap liu co, parne gdeed zho uv ne rieguiñ me ycaa me. <sup>3</sup> Per lēl̄ bnaaz zho moz co, bdiñ zho zho; blozh ga, scase bzon̄ez zho zho.

<sup>4</sup> Dzigo biire men̄ ne nacchen̄ liu co pxeel̄ me stib moz, scasaque been̄ zho: gocntseeb zho lo moz co, pquiaago zho zho, bdiñ zho zho, bl̄e zho guic zho.

<sup>5</sup> Biireque me pxeel̄ me stib zho, zha cole beet zho. Ni bii pxeel̄ me nzianraa zho, no zho psiwee zho, no-gaa zho beet zho. <sup>6</sup> Tibaque zeene loxaque xinganse me rianañ. Rleyniedox me xp̄eēd me, per laa me pxeel̄ me, bza guic me r̄eb me: “Gan̄se zho xp̄eēd naaw, zon zho miñe gnee me.”

<sup>7</sup> Zeene gon̄ zho laa xp̄eēd me bdziñ, r̄ebchaa zho: “¿L̄ë zha qui nagon̄ quiaañnie liu rii! ¿Gol̄gotsaa dzuut ne zho zeene quiaaña lo ne!” <sup>8</sup> Dzigo bnaaz zho men̄ co, beet zho me, güeyga zho güeyron̄ zho me tib lad lo liu co.

<sup>9</sup> Sca nagon̄ —r̄eb Jesús—, been̄ zha ne quianap liu co. Gol̄n̄ese nadien̄, ¿pe nac miñe gun̄ bizhuan liu co? Ib tedsod zeene laa me guiaad, znitlo me zha co; zhaale lo zha ne csañ me liun̄ me.

<sup>10</sup> Gol̄soladz gan̄le znu rnee lo Xtiidz Dios:

Quie ne ps̄eēb zha ne nozaa yu, ni nan̄d zho l̄ëpaa quie co nac miñe rnazdziits yu.

<sup>11</sup> ¡Ncuane gzee zdoo new! Sac Dios bnabey sca go-ca.

<sup>12</sup> Zeene gon̄ zho sca bnee me, gocladz zho naazgazh zho me ga; sac bien̄ zho miñe ruñ zho ga bzeet me. Per bnaazd zho me, sac rdzieb zho gr̄e miech guizhiu ne ndxie ga, nacne zeyga zho.

### Pe nonguiel̄ quizh miech contribucion

(Mt. 22:15-22; Lc. 20:20-26)

<sup>13</sup> Zhisaque goca, laa zho pxeelaque zla zha farisé, ni zla zha ne nacie Herod, zie zho ziegunḡüet zho Jesús par dien̄ zha cxiñ me tib diidz; zeena sca gdeeda diidz tsiezo zho me lo wxtis. <sup>14</sup> Bdziñ zho lo me, r̄eb zho:

—Maestro, ndion̄ no niapse diidzli rnee luu, led lega guñd luu miñe rnee tib miech, sac tibeyse nac miech lo luu, ni laa luu zianañ cseed zho miñe nac diidzli zeena s̄eēb zho xn̄ez Dios. Miñ co nagon̄, nacne racladz no gn̄e luu lo no dien̄, ¿pe nonguiela ga rdeed no dimi ne razh lo rey te nonguiela ye? ¿Pe dzizhraa no dimi co, te mazd dizhdraa now ye?

<sup>15</sup> Bienga Jesús racladz zho guñḡüet zho me, dzigo r̄ebchaa me lo zho:

—¿Pe nacne racladz to guñḡüet to naa? Gol̄guiid tib xpes to nu gan̄le.

<sup>16</sup> Dzigo bdeed zho tib pes lo me. Blozh ga, rëbchaa me lo zho:

—Golnè lo naa dien, ¿cho nu quia lo pes rii? ¿Cho lè nu quia low?

Pquiab zho rëb zho:

—Lèë rey Roma i, lèë lè me i quia low.

<sup>17</sup> Dzigo rëb me lo zho:

—Miñe nonguiel ycaa rey, goldeeda lo rey; scaque-gaa miñe nonguiel ycaa Dios, lo Dios goldeeda.

Zeeñe goñ zho sca ptsire me lo xtiidz zho, rdzieldraa zho zha guñ zho.

### ¿Pe nli zrieeban miech?

(Mt. 22:23-33; Lc. 20:27-40)

<sup>18</sup> Bdziñaque zla zha saducé, rëb zho lo me:

<sup>19</sup> —Maestro, znu pquiaa Moisés lo libr ley ne psañ Moisés lo no: tel glo mgui guet lo wnaa ne nac tsiel mgui ni gopd wnaa mëed, dzigo none betsaque zho ctsieelna wnaa co stib, zeeña gap wnaa mëed ne guiaañ xlugar xpëed zha ne gut ga.

<sup>20</sup> Bio tib dii zha co znu bzhaac, gadz bets nac zho. Ptsieelna zha ne nac zha gol, zeeñe laa zho gut, baañd xpëed zho. <sup>21</sup> Dzigo ptsieelna stib bets zho wnaa co, blozh ga gutaque zha co, pasè zho nsañ mëed. Ptsieelnaque me stib zho, goc zho tson, niicle zha co psañdaque mëed. <sup>22</sup> Sca sca haxta bza gza gadzse zho ptsieelna me, per ziese zho ni tib zho psañd mëed; tibaque zeeñe yeque me, laa me gut. <sup>23</sup> Miñe racladz no gacndion no, ¿chopaa dzigo gac tsiel wnaa co gal dze ne laa zho grieeban; sac gza gadzse zho ptsieelna me?

Sca bnabdiidz zho, sac nac zha saducé riladzd zho ne nli zdziñ dze grieeban zha ne ret.

<sup>24</sup> Dzigo pquiab Jesús rëb me lo zho:

—I nagon laa to rxin. Miñe naca riende to zha nac Xtiidz Dios, niicle riladzde to zrieelo me guñ me ncuaañ ro ne gard gan miech. <sup>25</sup> Sac goñ, zeeñe gal dze ne laa grè miech grieeban, niicle mguiw niicle wnaaw led yedraa hor co dien cho ctsieelna zho; sac hor co laa zho gac zig nac grè anjl ne no gbaa. <sup>26</sup> Stiba, ible nli zrieeban mençut. ¿Pe gard ganle glab to lo guits ne pquiaa Moisés, zaatne ziaad zeeñe bin Moisés tsi Dios tib lo yag zarz ngua ne noyazbel? Rëb Dios lo Moisés: “Naa nac Dios ne riladz Abraham, naa nac Dios ne riladz Isaac, naa nac Dios ne riladz Jacob.” <sup>27</sup> Niicle ne gutle gza zha co hor co, per zeeñe sca bnee Dios, gase rlu ne mban zho no zho lo me. Sac tel Dios, nacd me xDios mençut sinque xDios zha mban nac me. Ise nagon rlu, peet riende to gane squi rnee to.

### Xley Dios miñe mazdraa non

(Mt. 22:34-40)

<sup>28</sup> Zeeñe sca nozodiidznie Jesús zha saducé co, goñ tib maistr ley niapse diidzli ptsire me lo xtiidz zho. Dzi-go wbig maistr ley co, bnabdiidz me lo Jesús, rëb me:

—Bzhiguiel bnè lo naa dien, lo grè xley Dios, ¿pa miñ nac miñe mazdraa non?

<sup>29</sup> Pquiab Jesús rëb me:

—Miñ rii nac miñe mazdraa non, znu rneew: “Grëse to men Israel, golquiaadiaga ganle: men ne nac Dios ne riladz ne, tibaque me ni me nac men ne rnabey ne. <sup>30</sup> Dib zdoo to, dib xalm to, dib guielbiini ne no guic to, dipse xfuers to golleynie me.” Lèë tiba nu, <sup>31</sup> laa stiba znu rnee: “Bleynie samiech luu zigne rleynie luu luu.” Tsodraa stib ley ne mazdraa non lo grop ley rii.

<sup>32</sup> Dzigo rëbchaa maistr ley co lo Jesús:

—Diidzli rnee luu maestro, tibaque Dios no. <sup>33</sup> Ni none dib zdoo ne, dib guielbiini ne no guic ne, dipse xfuers ne gleynie ne me; ni gleynie ne samiech ne zigne rleynieque ne ne. Miñ co nac miñe mazdraa non, lèdle gzèeg ne pe cos cogon ne lo me o dien peragaa guñ ne.

<sup>34</sup> Zeeñe goñ Jesús sca niini rzè xtiidz me, rëbchaa Jesús lo me:

—Zhile runfalt sèeb luu xnèz Dios, gnabey me luu.

Blozh ga, grëse zha ne ndxie ga, ni stib zho biazhdraa zho pe nabdiidz zho lo me.

### ¿Cho xpëed nac Crist?

(Mt. 22:41-46; Lc. 20:41-44)

<sup>35</sup> Sca noseed Jesús miech len yadoo ga, zeeñe bnabdiidz me lo zho, rëb me:

—¿Bay zha nacre rnee grè maistr ley, lo xtii rey David ga grieequia Men ne nacle diidz ga cxeel Dios?

<sup>36</sup> Sac zeeñe bdeed Espiritu Sant guielbiini lo rey David, znu bnee David:

Bnee Dios lo men ne rnabey naa, rëb Dios lo me:

“Cue naa nèz derech, nu bzob,

nieeda lozh gnaz naa grëse zha ne rlèë lo luu, csan naa zho ladznia luu.”

<sup>37</sup> Gase nagon telne nli zha xtii David gac Men ne nole diidz cxeel Dios ga, ¿zha nac dzigo ne lèëque David rnee ne me rnabey David?

Grè miech guizhiu ne ndxie ga noquiaadiag zhi-wseed me, per nli rley zho ron zho zha rnee me.

### Zha run grè maistr ley

(Mt. 23:1-36; Lc. 11:37-54; 20:45-47)

<sup>38</sup> Laa me noseed grè miech co, zeeñe pso me diidz lo zho rëb me:

—Ible tsienalde to miñe run maistr ley goñ. Sac grè zha ne nac maistr ley, rdziladz zho racw zho lar nool haxta zhits ni zho rbiba, rdziladz zho ndooladz yquiaabdiuzh miech zho zeeñe gdzieel zho zho dib ro nèz. <sup>39</sup> Zig nac len yadoow, zha nac zha ne rzob lo xcan zaatne rzob grè zha non, zeeñe tsiegaa zho tib Ini lidz miech, lèëpaaze zha nac zha ne rzob groj mezh zeeñe laa wagw gac. <sup>40</sup> Ni rlozh ga, rio zho rla zho tel pe ncuaane rapse grè wnaa viud; ni parne peet guiabd miech lo zho, xtse rzo zho rzadraa pe lay ne gool zho.

“Sca goñ nac zho, per ib tedsod zeeñe laa grè miech ngoopdoj quizh xfalt, zha nac zha ne mazdraa nroob castigw yгаа.

### Gon ne bdeed tib wnaa viud

(Lc. 21:1-4)

<sup>41</sup> Blozh ga, güey Jesús güeysob me gax zaatne zhoob grë alcancí. Dzese rwi me ran me zha riesan miech gon len grë alcancí co; ndal grë zha ricw rdzin, nroob dimi rsan zho.

<sup>42</sup> Tibaque zeene bdzin tib wnaa viud, tib men prob nac me, ye me laa me psan chop gaay win len alcancí co.

<sup>43</sup> Dzigo bredz Jesús xpëedscuel me, rëb me lo zho: —Gneli naa lo to ganle, mazdraa gon nroob non gon ne bdeed wnaa viud qui, lëdle gon ne bdeed grëraa zha qui. <sup>44</sup> Sac zha, dimi ne riaangle lo zho i rgogon zho; sangue wnaa prob qui gon, centav yeen ne quianiese me mine rnalopaa me gziuu pe gow me, per laa me bloogona.

### ¡Nsin go!so!

(Mt. 24:1-28; Lc. 17:22-24; 21:5-24)

**13** Laa Jesús zieriee len yadoo nroob co grë xpëedscuel me, zeene rëb tib zho lo me:

—Maestro, ¡bui ganle zha niaataa yadoo rii! ¡Zha rnataa grë quie ngol ne niaaw!

<sup>2</sup> Pquiab me rëb me lo zho:

—Nligaa lëe zha niaataaw. Per niicle squitaa gon ran tow niina, dzin dze ne nitlow dib nacsew. Ni stib quie qui guiaanndraa zigne squi zhobxcuaaw i.

<sup>3</sup> Brie me ga, laa me zie gza me zho. Bdzin zho cho Gui Oliv, ga bzob zho grë zho. Nieenpaa ro yadoo co zaatne zob zho ga; dzigo wbig Pedr, Jacob, Juan ni Ndrés lo me, gza tap zho bnabdiidz lo me rëb zho:

<sup>4</sup> —Bzhiguiel bnë lo no dien, ¿pa hor dzigo gac mine bzeet luu ga? ¿Zha nac señ ne tso zeene laaw csilo gac?

<sup>5</sup> Dzigo psilo me bnee me lo zho, rëb me:

—Nsin go!so zeena choot yquidiede to. <sup>6</sup> Sac nzian zha ne grieequia gnë zho zha nac Men ne zëëble diidz cxeel Dios; ni nzian miech ne yquidie zho.

<sup>7</sup> Zeene gon to nëzrii nëzrec noyac di, ib gdziebde to; sac ible none gac grë min co, ni lëdsew ga. <sup>8</sup> Sac garaa csilo grë di!dox, grë guiedz nroob laaw tilnie saguiedz nrooba; grë zha ne rnabey grë guiedz nroob, laa zho tilnie sazha rnabey zho. Nëzrii nëzrec csilo gni grë zhodox, nzian zaatne gan miech gbin. Ni lega loxaque mine rsilosew ga, sac nroobraa guie!në ne gan miech lozh ga.

<sup>9</sup> Zeene laa grë ncuuan rii rsilo noyac, ¡nsin go!so! Sac hor co laa miech tsiezo to lo zha ne rnabey yadoo, ni lëëque len yadoo ga quin zho to; ziezo zho to lo grë zha non, lo grë zha rnabey, loxaque ne no to xnëz naa. Ga nagon gdeeda diidz gnee to Xtidz naa lo grë zha co, <sup>10</sup> sac ib none brieets bliaal!ew lo grëse miech zeene gal dze ne laa guidzliu nitlo. <sup>11</sup> Zeene tsiezo zho to lo wxtis, tsode to zhgab dien pe guiab to lo wxtis; sac Espiritu Sant nac men ne gacnieh to, ni mine csi-aab me guic to min co gnee to.

<sup>12</sup> Len dze co, zio zha ne lëëque zha tsielo bets zho ladznia zha ne gut zho; zio zha ne lëëque zha tsielo xpëed zho ladznia zha ne gut zho; scaquegaa mëëda, zio zha ne lëëque zha gut pxoz zho, lëëque zha gut xniaa zho. <sup>13</sup> Ible ganzed miech to, grëse zho glëe lo to sacne riladz to naa; per scagaa, grëse zha ne dziits so haxta lozh grë guie!në co, ible scaania Dios zho.

<sup>14</sup> Zeene gan to laa ncuuan ziaad gnitlo zo zaatne rieguia!d sow, zigne bzeet profet Daniel (zha ne glaba, none guien zho zha naca), hor co golguib dien zha xoon to. Zha ne no grëraa guiedz ne ngab Judé, none tsie zho dan, ga tsietsolan zho. <sup>15</sup> Zha ne no glaa guic yu, none lëëled xoon zho, ib guiabd zho sëëb zho len yu tsiebee zho ncuuan nacchen zho. <sup>16</sup> Zha ne zogaa dana, ib gund zho ne laa zho tsie ro lidz zho tsixi zho xab zho. <sup>17</sup> ¡Prob grë men wnaa ne lëëtaque len dze co zoney xpëed, men ne quianiegaa mëdyeen ne bii radz! <sup>18</sup> Golnab lo Dios gande to guie!në co len mëë ne rac nal, sac ne nligaa guie!në nrooba. <sup>19</sup> Wlal ne biaan guidzliu haxta lo nadze, gard gan miech tib guie!nedox sca, ni gdzinndragaa dze ne gan zhow stib. <sup>20</sup> Telne csaan Dios nroob dze gac guie!në co, ni stib miech rii guiaanndraa; per na por grë zha ne bzooblo me sëëb xnëz me, gdeete me diidz gaca nroob dze.

<sup>21</sup> Len dze co, tel cho zha gnë lo to: “Golwi ganle, lëe men rii nac Men ne nole diidz ga cxeel Dios”, gnëgaa zho: “Golwi nec ganle, lëe me i”, gliladzde tow. <sup>22</sup> Sac ndal grë zha ne grieequia guiaadquidie miech, no zho gnë zha nac men co, nogaa zho gnë zha ziadteed Xtidz Dios lo miech; ni zun zho grë milagr parne yquidie zho miech, parne yquidie zho haxta grë zha ne ngable lo Dios. <sup>23</sup> ¡Nsin sca go!so! Ib cxende to, benque laa naa nilew lo to.

### Ziaad Jesús stib

(Mt. 24:29-35, 42, 44; Lc. 21:25-36)

<sup>24</sup> Zeene lozhse gan miech grë guie!nedox co, laa lo ngbidz ycow, gziinndraa mëë. <sup>25</sup> Grë mel ne ndziib gbaa, laa ma gliaal; grëraa ncuuan no gbaa, masaque nëzrii nëzrec gaca. <sup>26</sup> Horco bii zan zho ganle, zeene laa Men ne pxeel Dios ziad-zëëb glaa lo xcow con grë guie!ndzon con grë poder ne rap me. <sup>27</sup> Lozh ga laa me gnabey grë xanj! me, tsie zho tsietop zho grëse zha ne ngab lo me, niicle zaatne mazdraa zit lo guidzliuw, mazdragaa zit gbaaw.

<sup>28</sup> Golzoob cuidad zha nac yag guigw. Led nanle to ganle, zeene laa grë zhicwa racnieen, ni rsilo rdzib zhiblaga, gase rlu ne laa mëë nëëg ziaadgaxle. <sup>29</sup> Scaquegaa nagon, zeene gan to laa grë mine rne naa lo to nu rsilo noyac, dzigo nanle to lëe dze co ziaadyoble.

<sup>30</sup> Gneli naa lo to ganle, nzian miech ne mban niina bii zan zho zeene laa grë ncuuan co csilo gac; sac ible ncuuan gaca. <sup>31</sup> Dzin dze nitlo gbaa, nitlo guidzliu, sangue mine rne naa lo to nu, nitloda, ible laaw none gac. <sup>32</sup> Lëëraasi choot nan dien pa dzew, dien pa horgaaw, per ni grë anjl ne no gbaa, per ni naa nan!da; loxaque Pxoze naa nan. <sup>33</sup> Gaxe waa, nsin go!so, golnab lo Dios; sac gon nan!de to dien pa hora.

<sup>34</sup> Nac cuent rii zig nac tib zha ne rree zie tib guiedz zit. Zeene laa zho rree, rсанse zho diidz dien pe gun tib tib moz ne guiaan ro lidz zho, ni rso zho diidz lo zha ne rquianap ro puert nsin so zho, ib gaguiesd zho. <sup>35</sup> Scadaa to nagon nsin goiso, sac zig bizhuan yu co scaquegaa naa nande to pa hor guial naa, yase glanso naa tib bdze dze, tib groi guieel, wxingaa horne rcedz gall, o ziaadyunmbegaa liu. <sup>36</sup> Nsin goiso, zeena ine zobna to zeene laa naa glanso. <sup>37</sup> Miñe rne naa lo to nu, laaw rne naa par grese miech.

#### Bnediidz zho dien zha gnaaz zho Jesús

(Mt. 26:1-5; Lc. 22:1-2; Jn. 11:45-53)

**14** Schop ngbidz runfalt csilo Ini Pascw, Ini ne row zho quietxtil ne riotsd ncobi; gre pxoz nroob ni gre maistr ley, laa zho noguib dien zha ngeetsse gnaaz zho Jesús gut zho me, <sup>2</sup> rnee zho:  
—Laa me no yгаа, per lëëraasi gnaazd ne me mer dze Ini, sac miech guizhiu ne ndxie lo Ini dze co; zrieequia nzian zha ne glisquiw.

#### Pchoob tib wnaa nceit nex guic Jesús

(Mt. 26:6-16; Lc. 22:3-6; Jn. 12:1-8)

<sup>3</sup> Len dze co, laa Jesús no guiedz Betain. Lëëtaaque laa me no mezh lidz Simón ne blan guiedz lepr, zeene bdziñ tib wnaa bdziñnie tiblo nceit nex, nosew tib len ncuaan win niaa niapse quie rbebni, tiblo nceit niazha. Dzigo blë wnaa co ncuaan win co, blozh ga pchoob me nceit co guic Jesús.

<sup>4</sup> Blalaa zha ne zobgre Jesús ga, zeene gon zho sca been wnaa co, blë zho, rëb zho:

—¿Pa rieguiala squi pxin zhlë wnaa qui nceit qui?

<sup>5</sup> Tejne niaca miñe ndow, nguizhpaaz zhow tson gayoo pes plat, nquiinpaa dimi co ngaaza lo gre zha mban ne guieñd pe yquiiñ.

Laa zho nolisquiw lo wnaa co, <sup>6</sup> dzigo rëbchaa Jesús lo zho:

—Gojsaan me. ¿Pe nacte rlisqui tow lo me? Led lega pxind mew, tib guieñzaac nroob i been me lo naa.

<sup>7</sup> Tejne nli rquia zdoo to zha ne guieñd pe yquiiñ, zac ygad to lo zho stib dze, sac tibaque ran to zho; sangue naa zdziñ dze ne gbiche naa lo to, gandraa to naa.

<sup>8</sup> Laa wnaa qui been miñe brieelo lo me, laa me pchoob nceit nex rii guic naa zeena nzhixcuale xcuerp naa gal dze ne laa naa ygueets. <sup>9</sup> Gneli naa lo to ganle, dipse lo guidzliu zaatne cseedtaa miech Xtiidz Dios, ible soladz zho wnaa rii, seet zho miñe been me nu.

<sup>10</sup> Lo gza tsiipchop zha ne nac xpëëdscuel Jesús ga, brieë zha ne lë Judas Iscariot güeyzodiidznie Judas gre zha ne nac pxoz nroob, rëb Judas laa Judas gun me ntregar. <sup>11</sup> Zeene bin zhow, per nli rley zho ni rëb zho zdeed zho dimi lo Judas. Dzigo psilo Judas noguib Judas dien pa hor gdeeda diidz gun Judas me ntregar.

#### Dowxtseenie Jesús xpëëdscuel me

(Mt. 26:17-29; Lc. 22:7-23; Jn. 13:21-30; 1 Co. 11:23-26)

<sup>12</sup> Mer dze ne rsilo Ini Pascw, dze ne rowxtsee zho tib carner, ni rsilo zho row zho quietxtil ne rquiad ncobi lad, dze co bnabdiidz xpëëdscuel Jesús dien pa lo racladz me tsiegunlo zho ncuane gowxtseenie me zho wdze co. <sup>13</sup> Dzigo pxeel me chop zho Jerusalén, rëb me lo zho:

—Gołtsie Jerusalén. Ga gan to tib mgui nzobyan tib re nis, dzigo gołtsienal zhits me. <sup>14</sup> Yu ne gan to sëëb me, gołguiab lo bizhuan yu co: “Znu në maestro: ¿Pa len yu me gneedz luu gac zaatne gowxtseenie me xpëëdscuel me wdze rii?” <sup>15</sup> Dzigo ga glu me tib len yu nroob ne riaan glaa, nzhixcuale lena, grele ncuane yquiiñ no ga; dzigo ga gołgunlo zhixtsee ne.

<sup>16</sup> Laa grop zha co brieë, laa zho zie. Bdziñ zho lad guiedz Jerusalén, nligaa laa zho bdziel yu co zigne rëbse me lo zho ga, dzigo psilo zho beenlo zho xtsee co.

<sup>17</sup> Bdze dzew, laa me bdziñ len yu co gre xpëëdscuel me.

<sup>18</sup> Laa me no mezh noyownie me zho, zeene rëb me lo zho:

—Laa naa gni lo to ganle, lëëque tib zha ne gon noyownie naa nu tsielo naa ladznia zha ne gut naa.

<sup>19</sup> Zeene bin zho sca rëb me, mban rac zho, dzigo psilo zho tibga tibga zho rnabdiidz lo me, rnee zho:

—¿Pe naaw?

<sup>20</sup> Pquiab me rëb me lo zho:

—Ladaque to no zho, zha ne nosëëb xcuan len xquien naa, lëë zho ga. <sup>21</sup> Naa ne nac naa Men ne pxeel Dios, niina laa miech gut naa zigne raquietsew lo Xtiidz Dios; per, iprobsaxe zha ne tsielo naa ladznia zho! ¡Mazd wen nie zho, ib niacd zho miech lo guidzliu!

<sup>22</sup> Laa zho noyow zeene bzhen Jesús tib quietxtil, bdeed me xquizh lo Dios, blozh ga beengroł mew dzi-gon bdiiz mew lo zho, ni rëb me:

—Gołquiina, lëë xcuerp naa i gon.

<sup>23</sup> Ni bzhen me tib cop nroob vin, bdeed me xquizh lo Dios, blozhse bdeed me xquizh, dzigo bdeed me cop co lo zho, grese zho go vin co. <sup>24</sup> Ni rëb me lo zho:

—Lëë xchen naa i, miñe gzhiee par grese miech ne sëëb xnëz Dios, sac lëë stib mod cub nu psan Dios parne sëëb miech xnëz me. <sup>25</sup> Lëë lultm vult nu guie naa vin rii, sac zhaale stib vin cub ne guie naa zeene laa naa gdziñ zaatne rnabey Pxoz naa.

Dzigo psilo me biil me bla salm gza me zho.

#### Bzeet Jesús zha gun Pedr

(Mt. 26:30-35; Lc. 22:31-34; Jn. 13:36-38)

<sup>26</sup> Blozhse biilnie me Dios gre me zho, dzigo laa me brieenie zho ga zienie me zho nëz Gui Oliv.

<sup>27</sup> —Ible saan to naa nawdze rii —rëb me lo zho—, sac scale ziaad lo Xtiidz Dios zaatne rnee: “Zdeed Dios diidz csiwee zho baxtor, lozh ga nëzrii nëzrec gliaal mëcwxiiil.” <sup>28</sup> Sca gun zho naa, per zeene laa naa grieeban glole naa ga Galilé, ga cuëz naa to.

<sup>29</sup> Dzigo rëbchaa Pedr lo me:

—Niicle telne saan grë zha qui luu, sangue naa gon csaand naa luu.

<sup>30</sup> Pquiab me rëb me lo Pedr:

—Gneli naa lo luu ganle, guieel riigazh, gardle grop gall tsonle vuelt rëb luu runbeyd luu naa.

<sup>31</sup> Per tibaque nac xtiidz Pedr, rnee Pedr lo me:

—Niicle tel zaatne guet luu guet naa, per gunscad naa. ¿Pe nacne guiep naa runbeyd naa luu?

Scaque rnee grëraa zho.

### Bzodiidznie Jesús Pxoze me Getsemaní

(Mt. 26:36-46; Lc. 22:39-46)

<sup>32</sup> Bdziñ Jesús zaatne lë Getsemaní gza me zho, dzigo rëbchaa me lo zho:

—Nuse nagon gojsob, laa naa ga gazodiidznie naa Pxoze naa.

<sup>33</sup> Horco psilo mban rac zdoo me, riabguieñe me, dzigo bredz me Pedr, Jacob ni Juan, bzënie me zho palal <sup>34</sup> dzigo rëbchaa me lo zho:

—Mban rac zdoo naa, zootle zig zet naa lo guieñe rii. Nuse nagon gojguiaan, per gojsobna.

<sup>35</sup> Bzë me spalal, dzigo pquitsgzhil me haxta bdziñ lo me lo liu; psilo me bnab me lo Dios ne telne zrieelow mazd tete me grë guieñe ne no gan me, <sup>36</sup> rëbchaa me:

—¡Papá, par luu grëse cos zrieelo gun luuw! ¡Bzhiguiel psilaa naa lo guieñe rii! Per telne grieeloda, miñe gnëtaa luu, sca gaca.

<sup>37</sup> Zeene biire me bdziñ me zaatne biaan gza tson zha co, gon me gzase zho nixguies; dzigo rëbchaa me lo Pedr:

—Simón, ¿nixguies luu lëe? ¿Pe ni palal blëëbd luu nzobna luu? <sup>38</sup> Gojsobna, gojnab lo Dios zeena yquiid mendox to. Niicle ne squi lëbdraa xcuerp to sobna to, per gojnab lo Dios, sac gon min co nac miñe racladz zhiespíritu to.

<sup>39</sup> Dzigo biire güey me stib, güeyzodiidznie me Dios; scaque miñe bnab me glo mincoque bnab me stib.

<sup>40</sup> Zeene bdziñ me lo zho, gon me laa zho bii nixguies. Ni rdzielid zho pe quiab zho lo me.

<sup>41</sup> Laa zeene goc tson vuelt biire me güeynab me lo Dios, rëbchaa me lo zho:

—Lëew nagon, zacle na gaguies to, zacle gdziiladz to. Naa ne nac naa Men ne pxeel Dios, naataa laa hor bdziñ zeene laa grë miech ntseeb rii guiadnaaz naa.

<sup>42</sup> Gojtsieso, zeena zio ne; sac gon laa zha ne glu naa lo zho ziaadle nu.

### Bnaaz zho Jesús

(Mt. 26:47-56; Lc. 22:47-53; Jn. 18:2-11)

<sup>43</sup> Laa Jesús bii quianeeque, zeene laa Judas (tib zha ne nac xpëëdscuel me) bdziñ, bdziñnie Judas tib dzoon zha ne pxeel grë pxoze ne rnabey, grë maistr ley ni grë zha non lo menquiedz Israel. No zho nzhen spad, no-gaa zho nzhen yag. <sup>44</sup> Biaanñiele Judas zho diidz zha glu Judas cho nac Jesús, rëb Judas lo zho:

—Nanle to gon, zha ne gow naa bzhid cuas, lëe me ga; ligier gojso gojxen me, ib csaande to xoon me.

<sup>45</sup> Nligaaw, zigne bdziñ Judas bredz Judas Jesús; blozh ga dow Judas bzhid cuas me. <sup>46</sup> Horco wbig grë zha ne zienał zhits Judas ga bzhen zho me. <sup>47</sup> Lo grë zha ne nacgza Jesús ga, hor co biasaque tib zho bdoz zho zhispad zho pchug zho tib diag xmoz men ne nac pxoze nroob.

<sup>48</sup> Dzigo rëbchaa Jesús lo grë miech co:

—¿Niacxe naa cho ngbaan, zha nac ne squitaa nzhen to spad, nzhen to yag ziadnaaz to naa? <sup>49</sup> Blactaa dze name gon to noseed naa miech len yadoo, ¿pe nacne bnaazde to naa ga? Per ible laa grë ncuuan rii gon noy-ac zeena gac grë miñe raquiet lo Xtiidz Dios.

<sup>50</sup> Grë zha ne nac xpëëdscuel me ga, grëse zho bzhoon, tipse me psan zho ga. <sup>51</sup> Tibaque mgui nguieg bii güeynał zhits me, tib lëse lar nquits mbix mgui; dzigo bnaaz zho mgui gocladz zho ye mgui nienie zho; <sup>52</sup> per znuse brieemgui len lar co, bzhoon mgui coltse mgui.

### Güeynie zho Jesús lo zhiwxtis zha Israel

(Mt. 26:57-68; Lc. 22:54-55, 63-71; Jn. 18:12-14, 19-24)

<sup>53</sup> Ga brieenie zho Jesús bdziñnie zho me lidz men ne nac pxoze nroob. Grë pxoze rnabey, grë zha ne rnabey lo maistr ley ni grë zha non lo menquiedz, laa zho pcaal-sa ga.

<sup>54</sup> Ye Pedr, maase zit zit nał Pedr laa Pedr bdziñ xley men co. Bdziñ Pedr, güeysobga Pedr lo grë zha ne ndxienap, lëëtaque laa zho quiadzë lo gui.

<sup>55</sup> Grë pxoze co, grë zha ne nac zhiwxtis zha Israel, laa zho ndxie nëz len yu co, quiaguib zho dien pe yquiaaqui zho gnab zho guet Jesús, quiaguib zho dien pe dol ne ycaadz zho me; per rdzielid zho dien pew.

<sup>56</sup> Nzian zha ne pquidie rëb zho znu znu nac ncuanea noyue me, per rrieequiad xtiidz zho; sac zhaase zhaase rnee zho. <sup>57</sup> Tibaque zeene guso blalaa zho, bnexuu zho rëb zho:

<sup>58</sup> —Bdzion no gon rëb me laa me ctixche yadoo, lozh ga tsonaone ngbidz gzaalo me stiba; per led miech-draa nzaaw.

<sup>59</sup> Niicle scaw, rzëdaque xtiidz zho tipse.

<sup>60</sup> Dzigo hor co bzoli men ne nac pxoze nroob, bzo me glowtaa lo grë miech co, bnabdiidz me lo Jesús rëb me:

—¿Pe nacne rquiabd luu? ¡Didzli dzigo lëe nac grë miñe rnee zho i!

<sup>61</sup> Dzese zo Jesús ib rquiabd me. Biireque men co bnabdiidz me stib rëb me:

—¿Nligaa cho nac luu? Bnë tel nli Xpëed Dios nac luu, Men ne nacle diidz ga cxeel me lo guidzliu.

<sup>62</sup> Dzigo pquiab Jesús rëb me:

—Nliw, naa nac men co. Naa ne nac naa Men ne pxeel Dios, bii zan to ganle zeene laa naa zoob cue Dios nëz derech, ni zeene laa naa guieet gbaa zialzëeb naa lo xcow.

<sup>63</sup> Horco ptsiez pxoze nroob co xab me, sac blëe me bin me sca rëb Jesús.

—¿Pe mazdraa textigw ne racladz ne? —rëb me—,  
<sup>64</sup> laa to binle ganle zha rzëtaa xtiidz me noguitnie me Dios. ¿Pe gnë to na zha gac me?

Grëse zho pquiab rëb zho, ib rieguia<sup>la</sup> guet me.

<sup>65</sup> Dzigo hor co blalaa zho laa zho psilo notsuc lo me. Pxidoo zho lo me ni rdeed puñet zho me, lozh ga rnee zho:

—Bnë dien, ¿cho ga bdiñ luu?

Ye grë zha ne quianap ga, rgap zho lo me.

### Rëb Pedr runbeyd Pedr Jesús

(Mt. 26:69-75; Lc. 22:56-62; Jn. 18:15-18, 25-29)

<sup>66</sup> Laa Pedr bii zoque ley. Ga zo Pedr, zeene laa tib wnaa ne nac zhicriad men rnbey co bdziñ; <sup>67</sup> gon me laa Pedr zob gax lo gui nodzëë Pedr. Dze rwi me lo Pedr, tibaque zeene rëb me:

—¿Ye luu lëë rzënie Jesús, men Nazaret ne bdziñnie zho i?

<sup>68</sup> Per bneelid Pedr.

—Dieen pe roo<sup>l</sup> luu —rëb Pedr—. Runbeyd naa men co.

Brieega Pedr zie Pedr nëz ro zawan, lëëtaque hor co pcuedz tib gall. <sup>69</sup> Dzeque rwi wnaa co lo Pedr, dzigo rëbchaa me lo grë zha ne ndxie ga:

—¡Lëëw, zha ne rzënie me nac mgui qui!

<sup>70</sup> Biire Pedr rëb Pedr runbeyd Pedr me. Wdzeepaa goca, biire zha ne ndxie ga rëb zho lo Pedr:

—Ne nligaa, ye luu rzënie men co. ¡Zha Galilé name nac luu!

<sup>71</sup> Dzigo psilo Pedr rzeet Pedr Dios rnee Pedr runbeyd Pedr Jesús, haxta rnee Pedr:

—¡Dios zobwi ganle, telne rned naa diidzli, maase cuibdee naa!

<sup>72</sup> Lëëtaaque hor co laa gall pcuedz stib. Dzigoraa psoladz Pedr xtiidz Jesús zeene rëb me lo Pedr: “Gardle grop gall, tsonle vuelte rëb luu runbeyd luu naa.” Dzigo mbanse rac Pedr, psilo Pedr biin Pedr guie<sup>l</sup>ne co.

### Güeynie zho Jesús lo Pilat

(Mt. 27:1-2, 11-14; Lc. 23:1-5; Jn. 18:28-38)

**15** Ziadyiinile liuw, scase bii nchoo<sup>l</sup> rnaw, wbiire pcaalsa grë pxoz non grë zho zha ne rnabey lo maistr ley, grë zha non lo menquiedz ni grë zha ne nac zhiwxtis zho. Blozhse bnediidz zho, laa zho pxidoo Jesús güey<sup>sañ</sup> zho me lo Pilat men ne nac gobernador.

<sup>2</sup> Bdziñ me lo Pilat, bnabdiidz Pilat rëb Pilat lo me:

—¿Pe nli na luu nac zhirey zha Israel?

Pquiab me rëb me:

—Nliw.

<sup>3</sup> Tibaque quia grë zha ne nac pxoz non, rzadraa grë ncuaañe rcaadz zho me. <sup>4</sup> Nacne wbiire Pilat bnabdiidz Pilat lo me, rëb Pilat:

—¿Pe nacne rquiabd luu? Bui ganle zha nactaa grë ncuaañe rcaadz<sup>o</sup>l zho luu.

<sup>5</sup> Bzee zdoo Pilat gon Pilat ible pquiabd me.

### Bnab zho guet Jesús

(Mt. 27:15-31; Lc. 23:13-25; Jn. 18:38-19:16)

<sup>6</sup> Gzobse Ini Pascw rsilaa Pilat tib zha ne no ladzguiib, tel cho zha ne gnabtaa menquiedz laa. <sup>7</sup> Len dze co no tib mgui lë Barrabás ladzguiib, ni zla zha ntseeb ne nacgza me, laa zho no ga sac nzian zha ne beet zho zeene gocntseeb zho lo gobiern. <sup>8</sup> Nacne psilo grë miech co, rnab zho lo Pilat csilaa Pilat tib zha ne no ladzguiib zigne runtaque Pilat grëraa iz.

<sup>9</sup> Dzigo bnabdiidz Pilat lo zho, rëb Pilat:

—¿Cho racladz to csilaa naa? ¿Pe silaa naa men ne rnee zho zhirey to nu?

<sup>10</sup> Sca rëb Pilat lo zho, sac nanle me niapse por rlëë grë pxoz non co ran zho Jesús gane bnabey zho bgaa me güey<sup>sañ</sup> zho me ga. <sup>11</sup> Per lel psilo grë miech co rnab zho csilaa Pilat Barrabás; ni lëëque grë pxoz co pquiil zho. <sup>12</sup> Dzigo rëb Pilat lo zho:

—¿Zha dzigo racladz to gac men rnee zho zhirey to nu?

<sup>13</sup> Pquiab be grë miech co, roptsie zho rnee zho:

—¡Bnabey yquia me lo cruz!

<sup>14</sup> —¿Pe nac falt ne been me? —rëb Pilat—. ¿Pe nacne racladz to yquia me lo cruz?

Biire zho roptsie zho rnee zho:

—¡Bnabey yquia me lo cruz!

<sup>15</sup> Gon Pilat zha rac zho ni racladzaque me guianzi-uu me lo zho, nacne mazd bzoob me xtiidz zho, bnabey me blaa Barrabás; laa Jesús, blozhse bnabey me bdiñ zho Jesús laa me been Jesús ntregar lo grë menquiiib ne tsiequiaa me lo cruz.

<sup>16</sup> Biire grë menquiiib co bzëëbnie zho Jesús nëz len yulow, ga pcaalsa grëraa menquiiib ne nacgrë zho.

<sup>17</sup> Psilo zho rguithnie zho me, bgacw zho me tib lar morad zig rna lar ne racw grë rey, ni bzieecw zho bla lë yag guiets bzoob zhow guic me, zig rzob coron guic grë rey. <sup>18</sup> Dzigo psilo zho nguiedz roptsie zho rnee zho:

—¡Golwi ganle zha ractaa zhirey zha Israel!

<sup>19</sup> Bzhen zho tib goobgui, rdeed zhow guic me, rtsuc zho lo me, rquiaalo zho rquitsgzhib zho lo me zig rqui-itsgzhib zho lo zha non.

### Güeyquiaa zho Jesús lo cruz

(Mt. 27:32-44; Lc. 23:26-43; Jn. 19:17-27)

<sup>20</sup> Blozhse sca bdziitnie zho me, laa zho blee lar morad ne nacw me ga, biire zho bgacw zho me mine nac xab me; dzigo laa zho brieenie me ga zienie zho me zaatne yquia me lo cruz.

<sup>21</sup> Nëz zienie zho me, bdzieel zho tib mgui Ciren lë Simón (lëë pxoz Lejandr ga grop Ruf), znu ziaad me wbire me dan. Dzigo bnabey zho me bi me zhicruz Jesús.

<sup>22</sup> Zeene bdziñnie zho Jesús zaatne lë Gólgota (nac diidz co zig nac ne rnee ne “Gui Beerguic Ngutoo”); <sup>23</sup> ga bdeed zho nziu notsa guizh rmed ne lë mirr, nan zho nie mew, per god mew. <sup>24</sup> Dzigo laa zho pquiaa me lo cruz.

Blozhse pquiaa zho me lo cruz, bzheñ zho tib xab me pchug zhow, biaanñie zho tib lëgaw tib tib zho, laa sti-ba bio zho rif. <sup>25</sup> Zig hor wxeeeren ga pquiaa zho me lo cruz.

<sup>26</sup> Glaa guic cruz ne pquiaa zho me ga, ga pquiaa zho bla lan diidz zaatne rnee pe nacne sca psacsi zho me, rneew: "LËË MENÏ RII QUIA NU, PORNE NAC ME ZHIREY ZHA ISRAEL." <sup>27</sup> Ye chop ngbaan pquiaagza zho me lo cruz, tibga zhiczuz zho bzo tib nëz cho zhiczuz me.

<sup>28</sup> [Ga brieequia miñe raquiet lo Xtiidz Dios, zaatne rnee: "Bloo zho me lad zha ntseeb."]

<sup>29</sup> Grë miech ne rded zaatne quia me lo cruz ga, ruñguzee zho me, rzhidznie zho me, haxta rdzi guic zho rnee zho lo me:

—¡Pe led rëb luu lëë, laa luu ntsi! yadoo ni tsonaque ngbidz nzaalo luuw stib! <sup>30</sup> Nana zho, ¡pe gacd lëëque luu bla luu lo caxtigw qui, biet lo cruz qui!

<sup>31</sup> Scasaque grë pxoz non ni grë maistr ley, rzhidznie zho me; rnee zho:

—Stib miech scataa beenguiac me, stib miech scataa bla me, pe nac dzigo rrieelod me gla me me. <sup>32</sup> ¡Te!ne nli me nac Men ne zëëble diidz ga cxeel Dios, te!ne nli me nac zhirey ne, niinagazh quiet me lo cruz; zeena gliladz ne me!

Ye zha ne quiaagza me lo cruz ga, rbidzgo zho lo me.

### Gut Jesús

(Mt. 27:45-56; Lc. 23:44-49; Jn. 19:28-30)

<sup>33</sup> Go! gro! dzew, tibaque zeene goc tib ncow dipse lo guidzliu, haxta las tres biao biini stib. <sup>34</sup> Horco nguiedz zëëb tsi Jesús, rnee me:

—¡Eloi, Eloi! ¿Lama sabactani?

(Diidz co nac zig nacne rnee ne: ¡Luuse name nac xDios naa! ¿Pe nacne psaan luu naa?)

<sup>35</sup> Grë zha ne ndxie ga, zeene bin zho sca rbedz me, no zho nañ Lí, meñ ne biadteed xtiidz Dios padzeela, meñ co rbedz me. <sup>36</sup> Dzigo rias tib zho güeygadz tib lë zhiil lo nziu bla, bzoob zhow tib guic goobgui pquiaa zhow ro me.

—¡Gotsaa csaan —rnee zho—, nu dziañ ne dien pe ziaad Lí guiaadlit Lí me lo cruz!

<sup>37</sup> Tibaque zeene pquiaa me stib redz nroob, znuse blozh me.

<sup>38</sup> Lëëtaaque laa me nolozh, zeene briez nzoli lar nroob ne quia leñ yadoo, gro!taa goca. <sup>39</sup> Gax lo me ga zo meñ ne rnabey lo grë menñguib co, zeene gon meñ co zha gut me, rëbchaa me:

—¡Ne nligaa, Xpëed Dios nac meñ qui!

<sup>40</sup> Ye blalaa meñ wnaa güeyso ga, zit zo zho rwi zho; lad co no Marí Magdal, Salomé ni Marí ne nac xniaa Jacob niab grop José. <sup>41</sup> Nzianlaa nac zho, lëë grë wnaa co been xyudar me leñ dze ne güeyted me dib xtan zha Galilé; ni zlagaa zha ne güeynal zhits me zeene bdziñ me Jerusalén.

### Bgueets Jesús

(Mt. 27:57-61; Lc. 23:50-56; Jn. 19:38-42)

<sup>42</sup> Lëëtaaque dze co nac vispr dze ne rdziiladz zho lo dziin. Zeene laa dze bdzepaa, dzigo güey José (men Arimaté) lo Pilat bnab me diidzbeñ tsiequeets me Jesús. Glo zoot me tsied me, per tibaque bloo me tib valor güey me; niicle ne tib zha non nac me lad zhiwx-tis zha Israel, ye me quiambëz gdziñ dze ne gnabey Dios.

<sup>44</sup> Bzee zdoo Pilat zeene bin me laa Jesús gutle. Bnabey me gocredz zha ne rnabey lo menñguib ne quianap Jesús; <sup>45</sup> haxta bdziñraa meñ co rëb nliw, dzig-oraa bdeed me diidz tselit José Jesús lo cruz.

<sup>46</sup> Nacne güey José, güeyso me tib lë lar nroob. Zeene blozh blit me Jesús lo cruz pche! me Jesús lar co, dzigo güeyxob me me tib leñ baa ne ndieñ tib cho quie. Blozh ga, psodan me tib quie nroob psioog me ro baa co.

<sup>47</sup> Ga zo Marí Magdal ni Marí xniaa José, gon zho pa lo bgueets me.

### BRIEBAN JESUS

(Mt. 28:1-10, 16-20; Lc. 24:1-53; Jn. 20:1-23)

**16** Bdze dze dze ne rdziiladz zho lo dziin, güey Marí Magdal, Salomé, ni Marí xniaa Jacob güeyso zho grë nceit nex ne tsietëeb zho lad xcuerp Jesús. <sup>2</sup> Laa zeene biini liu, dze ne rzobni zhmal, silgaw loxaque ziaadlan ngbidza laa gza wnaa co brie laa zho zie ro baañ Jesús.

<sup>3</sup> Nëz no zho, rnabdiidzlsa zho dien zha gdiob quie nroob ne nioog ro baa, cho siguiel coba. <sup>4</sup> Ni zeene bdziñ zho, gon zho laa quie co bdiooble.

<sup>5</sup> Laa zho bzëeb leñ baa, zeene gon zho nëz derech laa tib mguig nguiieg zob ga, nacw me tib lar nool, dib nquitsbiese rna lar co. Bdzieb zho gon zho me; <sup>6</sup> dzigo rëbchaa me lo zho:

—Gdziebde to. ¿Jesús lëë, meñ Nazaret ne pquiaa zho lo cruz, meñ co ziaadguib to? Guiendle me nu, ¡laa me brieaban! Go!wi ganle nu nac zaatne pxob zho me. <sup>7</sup> Go!tsie, go!guiab lo Pedr ni lo grëraa xpëedscuel me tsie zho Galilé, ga tsiedzieel zho me zigne rëble me lo zho glo.

<sup>8</sup> Rias gza wnaa co laa zho brie ga, masaque rzhidz zho rdzieb zho. Lo dzeb co ni par gnee zho gacd.

<sup>9</sup> [Dze ne rzobni zhmal ga, sil co brieaban Jesús, ni Marí Magdal nac zha ne gloopaa gon me; lëë Marí co ga beenguiac me zeene beñcxoon me gadz menox ne nosacsi Marí. <sup>10</sup> Dzigo güey Marí güeynie Marí diidz lo grë zha ne bzënie me ga. Lëëtaaque laa zho ndxie mban rac zho, roon zho no zho xquie!në me. <sup>11</sup> Niicle bin zho rëb Marí laa me brieabanle, gonlo Marí me; per bliladz zhow.

<sup>12</sup> Bded ga, brieequia me lo schop xpëedscuel me lëëtaaque no zho nëz zie zho dan. <sup>13</sup> Dzigo güey zho güeynie zho diidz lo grëraa zha ne nacgza zho; per niicle xtiidz grop zha co bliladz zho.



<sup>14</sup> Laa stibtaa vuelt, lëëtaque ndziib zho lo mezh no zho wagw gza tsiiptib zho, tibaque zeeṅe laa me brieequia; dzigo goctox me lo zho sac goṅ me ib bliladzd zho xtiidz me; ni goṅ me scataa nad zdoo zho, sac niicle güey zha ne goṅ me güeynie zho diidz ne nli brieeban me, ni bliladzd zhow. <sup>15</sup> Ni rëb me lo zho:

—Goṷtsie dipse lo guidzliu, goṷtsieseed miech Xtiidz Ndzon Dios. <sup>16</sup> Grëse zha ne dib zdoo gliladza ni chobnis zho, scaania Dios zho; saṅgue zha ne gliladzda, laa zho bnitlole ga. <sup>17</sup> Grë zha ne sca dib zdoo gliladz naa: znee zho stib diidz ne rneed zho. Niicle xeṅ zho grë

meeṷ ntseeb, concuaangaa miech zho, ib peet gacd zho. Ni zeeṅe cxobnia zho guic grë meṅ rzacnë, zuṅguiac zho zho; grë meṅdox ne noguitnie miech, zeeṅe gzeet zho lë naa zuṅcxooṅ zho ma.

<sup>19</sup> Blozhse sca bnee me lo zho, laa me zey gbaa bzob me cue Dios nëz derech.

<sup>20</sup> Dzigo grëse xpëëdscuel me laa zho brieë, brieets bliaaṷ zho zieseed zho miech Xtiidz Dios. Ni me nac meṅ ne noyacnieṅ zho ruṅ zho grë milagr nroob, zeeṅa glu ne nli Xtiidz me nac miṅe noseed zho miech.]

# LUCAS

¡Diuzh Tiöfl!

**1** Nanle luu ganle, nole bla zha ne bioxco pquiaa zho grë ncuaañe goc zeene baaad Jesús meñ ne pxeel Dios ga. <sup>2</sup> Ncuaañe nlipaa goca, grë ncuaañe pquiaa zho ga, laaw pquiaa zho zigne rzodiidzse miecha leñ dze rii, zigne rzodiidzsegaa zha ne bzëniepaa mew, zha ne pso me noneew lo miech.

<sup>3</sup> Yeque naa pquiaa naa wen wen bnabdiidz naa, bleeni naa diidz grëse dien zha psilo grë ncuaañ co; ni niina laa naa rquiaw zigne gocsew laaw rxeñ naa lo luu. Sac rien naa ib nonguieñ gacnañ luuw; <sup>4</sup> zeena lozh gacnañ luu zha nac diidzli rii, wseed ne blu zho lo luu i.

<sup>5</sup> Leñ dze ne nac Herod rey rnabey me dib xtan zha Judé, leñ dze co no tib pxoz lë Zacarí, me nac tib zha ne nacgrë "Zha Abí". Niicle tsiel mew, zha xtii pxoz Aarón ziaad wnaa co, lë me Lisabet.

<sup>6</sup> Zigtaa Zacaríw, zigtaa Lisabeta, noxco me miñe rnabey Dios, mban mew zigne naca, ni tib xley Dios rguitsd me. <sup>7</sup> Meñ gol-le nac me grop me, per ni tib mëed quianied me, sac niaad Lisabet gapd me mëed.

<sup>8</sup> Laa tib dzew bgaa grë zha ne nacgrë Zacarí guñ zho dziin leñ yadoo. <sup>9</sup> Nac xcostumbr grë zha ne nac pxoz, rio zho tib rif dien chopaa yгаа tsielaadz goxyaal leñ yadoo, dzigo bgaa Zacarí. <sup>10</sup> Goxyaal co nolaadz me leñ yadoo, laa grë miech ne ndxie nëz ley nonabgaa lo Dios, <sup>11</sup> tibaque zeene briequia tib xanj Dios bzo cue pcoog nëz derech, zaatne nozëeg me yaal ga. <sup>12</sup> Zeene gon me anjl co bdzieb me, rdzieldraa me zha guñ me lo dzeb co. <sup>13</sup> Dzigo rëb anjl co lo me:

—¡Gdziebd luu! Diidzse zialnie naa lo luu, gacnañ luu ganle miñe bnaab luu lo Dios ga, pquiaadiag mew; gane niina laa tsiel luu gap tib mëëdbgui. Zeene gal win, Juan cueelë to win. <sup>14</sup> Tib guieñbley nroob gac win lo to, niicle lo grëragaa miecha, <sup>15</sup> sac tib meñ nziuu gac win lo Dios. Zeene gac win zha broob, ni tib ro nziuu guied win, per ni vin yquiaarod win; ansraa gal win, laa Espíritu Sant nachiele win. <sup>16</sup> Win gac meñ ne co guic nzian grë zha Israel, gbiire gbig zho lo Dios, meñ ne rnabey zho. <sup>17</sup> Zigne goc Lí, meñ ne baaad pteed xtiidz me padzeela, sca gac win tedner win lo me, nroob poder ne gap win. Win gnee lo grë miech rii, gbiire gleynie zho me zigne goc xmenjol zho zha ne bleynie me; csaan zho grë xquieñtseeb zho, gban zho zigne racladz me; zeena niowse gac zho ycaania zho me.

<sup>18</sup> Pquiab Zacarí rëb Zacarí lo anjl co:

—¡Ncuaañe gacd i gon rnee luu! Zigtaa naaw, zigtaa tsiel naaw, meñgol-le nac no.

<sup>19</sup> Rëbchaa anjl co:

—Bien ganle anjl Gabriel nu quianee lo luu, anjl ne tibaque zo lo Dios. Me pxeel naa zialnie naa diidz rii.

<sup>20</sup> Per ne squi riladzd luuw, na laa luu guiaañ ngop, haxta gal dze ne gac miñe rne naa lo luu nu, dze co glan xtiidz luu stib.

<sup>21</sup> Grë miech ne ndxie quianab lo Dios ga, quiambëz zho Zacarí, rnabdiidzsa zho pe goc me, sac ran zho rried me zaatne ziezëeg me yaal ga. <sup>22</sup> Zeene brie me, gon zho gacdraa gnee me, dzigo bien zho no pe blu Dios lo me ga. Teñ pe racladz me gnee me, niapse señ rlu me.

<sup>23</sup> Bzase dze ne been me dziin leñ yadoo, dzigo laa me zey lidz me. <sup>24</sup> Goca bla ngbidz, laa mëed co pquia-lo zdoo tsiel me.

Dipse leñ gaay mëë bio zhuz co ro yu, ib bried me, rley me rnee me:

<sup>25</sup> —¡Zha wentaa Dios, bneedz me diidz bdziñ dze yquianie naa mëed rii, zeena gzhidzniedraa miech naa!

## Güeynie tib anjl diidz laa Jesús gac mëed

<sup>26</sup> Goc xoop mëë zoney Lisabet mëed, pxeel Dios anjl co stib güey me Nazaret, guiedz ne ndxie xtan zha Galilé. <sup>27</sup> Ga no tib ndzooop nguieg lë Marí, leñ dze co no xtiidz ndzooop co ctsieelna ndzooop tib zha xtii rey David, lë José. <sup>28</sup> Bdziñ anjl co zaatne no ndzooop, pquiaabdiuzh me ndzooop, rëb me:

—¡Dichos luu gon, sac tib zha nziuu nac luu lo Dios! Me quianap luu.

<sup>29</sup> Zeene gon Marí anjl co, ni gon Marí zha rnee me, bzee zdoo Marí, riend Marí dien pe nac scataa rzë xtiidz me. <sup>30</sup> Dzigo rëbchaa me lo Marí:

—¡Gdziebd luu! Laa Dios gon bzooblo luu yгаа luu tib guieñzaac nroob. <sup>31</sup> Zdoo luu yquiaalo tib mëëdbgui, zeene laa win gal, JESUS cueelë luu win. <sup>32</sup> Tib meñ nroob gac win, zien miech ganle Xpëed Dios ro ne no gbaa nac win; ni so me win gnabey win zig bnabey xmenjol win David. <sup>33</sup> Win gnabey lo grëse zha Israel, ni gdziñd dze ne lozh xquieñrnabey win.

<sup>34</sup> Pquiab Marí rëb Marí lo anjl co:

—¿Mëed ye? ¿Per zha grieelo gap naa mëed, ni tib naa zo nu?

<sup>35</sup> Rëbchaa anjl co:

—Niapse por poder ne rap Dios gac miñ co. Zeene laa Espíritu Sant guiaad gacnie luu, hor co laa poder co gacnie luu, laa mëed co yquiaalo zdoo luu; gacxe waa Xpëed Dios guñbey miech win, miñe rnabey Dios miñ co gon win. <sup>36</sup> Ye belyeen luu Lisabet, niina lo

guielgol-le laa tib mëed pquialo zdoo me; zëeb diidz ib grieelod gap me mëed, per na racle xoop mëe zoney me mëed, <sup>37</sup> sac par Dios tsod ncuaaṅe grieelod gac.

<sup>38</sup> Dzigo rëb Marí:

—Tel scaw, miṅe rnee luu i, maase gaca. Laa naa zo nu par guṅ naa miṅe gnabeytaa Dios naa.

Blozhse ga, laa anjl co zey.

### Güeygaṅ Marí Lisabet

<sup>39</sup> Goc bla dzew, brieer Marí ga zie me ziegaṅ me Lisabet tib guiedz win ne ndxie gui glaa ne nac xtan zha Judé. <sup>41</sup> Bdziṅ me, wbig me pquiaabdiuzh me Lisabet. Bdiuzh co bnee me, zeṅe biasoli xpëed Lisabet zdoo Lisabet; dzigo hor co bdeed Espíritu Sant guielbiini lo Lisabet, <sup>42</sup> nguedz bnee Lisabet rëb me lo Marí:

—¡Dichos luu Marí bgaa luu guielnzaac qui! Sac goṅ, lo grëraa no nac no meṅ wnaa, luu bzooblo Dios.

Mëed ne zoney luu i, zha nziuu nac win lo me. <sup>43</sup> ¡Ib guiaaṅladzd naa dze rii, znu biaad luu nac luu xniaa meṅ ne rnabey naa, biaadgaṅ luu naa! <sup>44</sup> Haxta mëed ne zoney naa nu, rley win biasoli win zdoo naa, zeṅe pquiaabdiuzh luu naa. <sup>45</sup> ¡Dichos luu, bin luu miṅe në Dios, ni bliladz luu zuṅ mew!

<sup>46</sup> Dzigo hor co bnee Marí rëb me:

¡Meṅ nroob nac Dios! ¡Gdib zdoo naa rooṅnie naa me!

<sup>47</sup> Rleynie naa me nac me meṅ ne psilaa naa, sac goṅ niicle peet nond naa, tib nguṅdziin winse nac naa lo me,

per laa me bzooblo naa.

Grë miech, zigtaa leṅ dze riiw, zigtaa leṅ dze ne ziaadragaaw,

ziab zho naa nac tib wnaa ne mazdraa dichos.

<sup>49</sup> Ne nligaa zha nactaa guielnzaac rii bneedz me lo naa.

Meṅ ro, meṅ nroob nac me, ¡guienḍraa cho zig me!

<sup>50</sup> Grëse miecha, zha ne rioxco rquiaadiag miṅe rnabey me,

tibaque racnie me zho, ib rsaand me zho.

<sup>51</sup> ¡Golwi gaṅle zha nactaa grë ncuaaṅe ruṅ me!

Grë ncuaaṅe no guic zha niats guṅ zho, bnitlo mew,

<sup>52</sup> ptiche me grë zha ne zob rnabey.

Laa grë zha ndooladz, zha ne rzac miech peet nond, beennon me zho.

<sup>53</sup> Grë zha mban ne guienḍ pe yquiin, nroob guielnzaac ne bdeed me lo zho,

laa grë zha ne rapchen, scase bzonëz me zho.

<sup>54</sup> ¡Pe zhidaa ziyacnie me grë zha ne nac xtii Israel, meṅgol ne goc zig tib nguṅdziin lo me ga! ¡Tibaque rlu me rleynie me zho!

<sup>55</sup> Ib bianaṅladzd me xtiidz me miṅe bnee me lo pxozgol ne Abraham,

zeṅe rëb me gdziṅd dze ne csaan me Abraham, ni grëraa zha ne grieequia lo xtii Abraham.

<sup>56</sup> Maase tsoṅ mëe bianaṅ Marí ga blëz me lo Lisabet, dzigora wbi me ga bdziṅ me lidz me stib.

### Gol xpëed Lisabet

<sup>57</sup> Bdziṅ dzew, laa xpëed Lisabet bza mëe, laa me gop win. <sup>58</sup> Grë zha ne no gax lidz me, grë zha ne nac meṅlidz me, zeṅe bin zho scataa pquia zdoo Dios me bdeed Dios mëed co lo me, rley zho güeygaṅ zho me.

<sup>59</sup> Dze ne goc mëedbgui yeeṅ co xon ngbidz, blalaa zha ne güeynaṅ zhits pxoz win, zhits xniaa win güeynie zho win bio win bey ne rio xpëedbgui zha Israel, parne glu lo Dios ngab win. Tibaque naṅ zho Zacarí nrieelë win, zigne lëque pxoz win, haxta scale nonee zho lo win, <sup>60</sup> per hor co rëb Lisabet, led scad gac lë win, Juan grieelë win.

<sup>61</sup> Dzigo pquiab zho rëb zho:

—¿Pe nacre sca grieelë win? Ni tib meṅlidz to lëd Juan.

<sup>62</sup> Bnabdiidzaque zho lo pxoz win, blu zho seṅ lo me dieṅ zha racladz me gac lë win. <sup>63</sup> Dzigo bnab me bdeed zho tib lë lo zaatne yquiaa me; bzee zdoo zho zeṅe blozh pquiaa me goṅ zho rnee lo co: “Juan grieelë win.” <sup>64</sup> Loxaque blozh dze sca pquiaa me, zeṅe laa me wbiire bnee stib, psilo me rdeed me xquizh lo Dios. <sup>65</sup> Grë zha ne zo ga, zha ne ruṅbey me, zeṅe goṅ zhow, per nli rzee zdoo zho.

(Nëzrii nëzrec bzhoon diidz laa mëed co gol, grëse guiedz ne ndxie gui glaa co gocnaṅ miecha. <sup>66</sup> Zha ne rona, rza zdoo zho rnee zho: “¿Bay cho gac mëdyeen co?” Sac nligaa rlu nacie Dios win.)

<sup>67</sup> Horco bdeed Espíritu Sant guielbiini lo Zacarí, psilo me bnee me rëb me:

<sup>68</sup> ¡Xquizh xquielnzaac meṅ nroob ne rnabey, meṅ ne nac xDios ne nac ne zha Israel!

Sac goṅ laa me ziaad, ziaadgaṅ me ne, ziadbee me ne lo xquielnë ne.

<sup>69</sup> Nasi laa me pxeel meṅ nroob ne ziaadsilaa ne, lëe meṅ co ga no grieequia lo zha xtii David, meṅ ne beenṅ xtsiṅ me ga.

<sup>70</sup> Padzeelale bzeet me cxeel me meṅ co, grë zha ne biaad pteed xtiidz me, bzeet zhow.

<sup>71</sup> Rëb zho, ib sxeel me meṅ ne guiaadsilaa ne ladznia zha ne nosacsi ne, zha ne rlëe lo ne.

<sup>72</sup> Sac ib gdziṅd dze csaan me grë zha xtii pxozgol ne, rquianëpaa zdoo me zho.

Ib guiaaṅladzd me miṅe rëb me lo Abraham,

<sup>73</sup> zeṅe rëb me laa me cxeel meṅ ne csilaa ne,

<sup>74</sup> zeṅa dziodzebdraa ne lo zha ne rlëe lo ne, lo zha ne rsacsi ne;

sinque iṅe tibli gac ne dziuun ne miṅe rnabey me.

<sup>75</sup> Gzataa dze ne gneedz me guielmban lo ne, iṅe mbe zdoo ne, dziuun ne miṅe rleynie me.

<sup>76</sup> Luu goṅ xin, bzooblo Dios ro ne zob gbaa, cteed xtiidz me lo miech,

luu tedner tsienee luu lo zho, laa meṅ co no guiaad.

<sup>77</sup> Luu gnee lo grë zha Israel, guien zho gaṅle zha guṅ Dios zho perdon, parne ycaania me zho.

<sup>78</sup> Ne nligaa rleynie me ne, rquia zdoo me ne,

gane laa me cxeel Xpëed me, meṅ co gac zig tib biini,

<sup>79</sup> Biini co gziini lo grë zha ne mban lo guielcow,

zeena biini co glu nêz lo ne, guio ne nêz ne peet zh-gab, peet dzeb guienđ.

<sup>80</sup> Zigse zie dzew, scase scase zierooob mëdyeen co, ni scaquegaa dib zdoo win rleyne win Dios. Zeene laa win broobpaa, dzigo güey win bio win tib dan zit, haxta bdziñ dze ne laa win psilo pseed miech laa win blulo lo zho.

### Gol Jesús (Mt. 1:18-25)

**2** Lëëtaaque leñ dze co, laa August, rey nroob ne zob Roma, bnabey top lë grëse miech ne no dib dan ne rnabey me, par gacnañ me dien palal zho. <sup>2</sup> Lëë primer vuelt ga ptop zho lë miech, lëë iz co zob meñ ne lë Cirein zobnabey me guiedz Siria.

<sup>3</sup> Bnabey August grëse miech zha ne no stib ladz beñ, laa zho no tsie zaatne nacpaa ladz zho tsiedeed zho lë zho, parne ga ygab zho. <sup>4</sup> Miñ co nagon nacne briece José guiedz Nazaret (xtan Galilé) grop me Marí zie me Belén (xtan Judé). Laa me zie ga, sac ga goc ladz xmenğol me rey David. <sup>5</sup> Gard ctsieelniapaa me Marí, per nole xtiidz me grop me. Leñ dze co ziaadyob-paa gal xpëed Marí.

<sup>6</sup> Bdziñ me Belén, bgaadraa me zaatne nrieelo mbëz me leñ yu, lega nac ti leñ lidz ma bdeed zho blëz me. Lëëtaaque bdziñ me ga, laa mëed co gol. Racse Marí pcheł me win lar, bdiix me win tib leñ yag ne row ma guizh; lëë mëedglo ga lo me.

<sup>8</sup> Guieel co, blalaa zha ne nac baxtor, laa zho ndxie quianap zho xpëcwxiil zho dan, <sup>9</sup> tibaque zeene briece-quia tib xanjł Dios lo zho, dipse zaatne ndxie zho ga biab tib biini nroob. Zeene gon zho anjł co, gon zho bi-ini nroob co, per nli bdzieb zho. <sup>10</sup> Dzigo bnee anjł co, rëb me lo zho:

—¡Gdziebde to! ¡Golgon diidz cub ne ganle zialnie naa lo to nu! ¡Tib guiełbley nroob gac diidz rii lo grëse miech! <sup>11</sup> Meñ ne gon quiambëz to ga guiaad csilaa to, laa me blansole lo guidzliu. Me nac Meñ ne zëëble di-idz ga cxeel Dios, me nac meñ ndzon ne rnabey. Belén, zaatne goc ladz rey David, ga gol me naguieel. <sup>12</sup> Goltsie, zaatne tsiedziel to tib mëedbgui yeen, nrielse win lar zhoob win leñ yag ne row ma guizh, lëë me ga.

<sup>13</sup> Tibaque zeene gon zho laa stib dzoon anjł briece-quia gocgrë anjł ne quianee lo zho ga, psilo grë anjł co roolnie zho Dios, rnee zho:

<sup>14</sup> ¡Haxta zaatne glaaraa gbaa, nozhoobneñ ganle pa lotaa meñ nroob nac Dios!

¡Nasi, grëse miech zrieelo guiaanwen zho lo me; zdoo me rala laa me nobedz zho!

<sup>15</sup> Zeene laa grë anjł co zey gbaa stib, psilo grë baxtor co rnee zho:

—¡Niinaga golgotsaa guio Belén! ¡Gotsaa guiowi ne dien, zeena dzian ne miñe biaadnie anjł co diidz lo ne nu!

<sup>16</sup> Lëëled bio zho nêz laa zho zie. Bdziñ zho zaatne blëz José ga grop Marí, nligaa laa mëdyeen co nix ga, nixse win tib leñ yag ne row ma guizh. <sup>17</sup> Dzigo bzodi-

idz zho grëse zha rëb anjł co lo zho, zeene güeynie me diidz laa win gol.

<sup>18</sup> Grë zha ne bina, per nli rzee zdoo zho; laa Marí nosew zdoo me, tibaque rsoladz mew.

<sup>20</sup> Blozh ga, laa zho bio nêz ziequianap zho xma zho stib. Ine roolnie zho Dios, rdeed zho xquizh lo me sca pxeel me xanjł me güeynie diidz lo zho, rley zho sac brieelo gon zho mëdyeen co.

<sup>21</sup> Dze ne goc xon ngbidz gol win, dze co bio win bey ne rio xpëedbgui zha Israel, par glu xnêz Dios ngab zho; dze coquew bleelë zho win JESUS, zigne rëb xanjł Dios zeene güeynie me diidz ne laa win gac mëed lo Marí.

### Güeynie zho Jesús yadoo

<sup>22</sup> Nac ley ne psan Moisés lo zha Israel, wnaa ne sca rap mëedbgui, zeene rac zho tap zhmal, none tsienie zho chop ma cogon zho leñ yadoo; yase tsienie zho tib nêz coc, tib nêzgaa palom. Ni rnabeya: “Grëse mëedbgui ne rac mëedglo, ib none gdeed zho win gac win tib zha ne guñ xtsiiñ Dios.” Nacne zeene bza dze co, dzigo briece Marí zie me Jerusalén grop me José, zienie me mëdyeen co yadoo csan me win ladznia Dios; lëë nêzle ga zienieque me gon ne no gdeed me ga.

<sup>25</sup> Lëëtaaque dze ne bdziñnie zho win leñ yadoo, laa tib meñ lë Simeón no ga. Meñ Jerusalén nac meñ co, rleyne me Dios, rioxco me mban me zigne rnabey Dios, ni nacie Espíritu Sant me. Quiambëz me gan me Meñ ne nole diidz ga cxeel Dios csilaa zha Israel, <sup>26</sup> sac rëble Espíritu Sant lo me ible laa me no gan meñ co.

<sup>27</sup> Laa dze co, Espíritu Santaque psiaab guic me zie me yadoo. Nacne lëëtaaque no me leñ yadoo, laa zho bdziñnie mëdyeen co ga, ziesan zho win ladznia Dios zigne rnabey ley. <sup>28</sup> Dzigo me wbig bdeedz win, rdeed me xquizh lo Dios, rëb me:

<sup>29</sup> Xquizh xquiełnzaac luu Dios, miñe nê luu lo zhingundziin win luu nu, laaw goc.

¡Nasi zacle nagon guiaad-xi luu naa, haxta gley naa gbi naa lo guidzliu rii!

<sup>30</sup> ¡Meñ ne nacle diidz cxeel luu guiaadsilaa miech lo xtoł zho, grop lo naa laa naa ran me niina!

<sup>32</sup> ¡Grëse miech ne ndxie lo guidzliu, me nac biini ne gziini lo zho!

¡Me csanñziuu zha Israel, ne nac zho zha ne ngab lo luu!

<sup>33</sup> Zeene gon Marí grop José scataa rzë grë diidz ne rnee Simeón rzeet Simeón mëdyeen co, bzee zdoo me.

<sup>34</sup> Dzigo bnab Simeón lo Dios gacnieñ Dios me gza me mëdyeen co. Blozh ga, rëbchaa Simeón lo xniaa win:

—Tib guiełbley nroob ne gac mëed rii lo zha Israel, por win ndal zho griece lo guiełcow ne no zho, laa zho gbig lo Dios. Ni scagaa zrieequia zha ne glëenie win, per lëëque zha csacsi zho ga. Mban gac zdoo luu, nroob guiełnë ne tso luu gan luu zha sac miech win.

<sup>35</sup> Ga glu ganle zha nac zdoo tib tib miech.

<sup>36</sup> Ye tib zhuz gol lë An zo ga hor co. Tibaque no me yadoo, dze guieel roolnie me Dios, rcuan me ni rzodidznie me Dios. Tib zhuz gola, leñ dze co rac tapgal tap

iz biaan me viud. Nguieg me ptsieelnia me, per lox-  
aque gadz iz wbannie me tsiel me. Lëë pxoz me ga  
brieele Fanuel, lëë zhey co ga nac zha xtii Aser. Tib  
meñ ne rteed xtiidz Dios lo miech nac me, <sup>38</sup> dzigo wbi-  
gaque me, psilo me rdeed me xquizh lo Dios; ni bzodi-  
idz me lo grë zha ne ndxie ga, rëb me lëë mëdyeen co  
ga nac meñ ne quiambëz zho ga guiaadsilaa zho.

<sup>39</sup> Blozhse been José miñe rnabey xley Dios grop me  
Marí, dzigo laa me wbi ga. Bdedraa ga, beynie me  
mëed co Nazaret, zaatne nac ladz me. <sup>40</sup> Ga broob win,  
zigse zierooob win scase scase rac macis win, scase ri-  
abiiniraa win. Tibaque nacie Dios win.

### Biaan Jesús len yadoo

<sup>41</sup> Zeene bloozh Jesús tsiipchop iz, dzigo güey José  
grop me Marí güeynie me win lni Pascw, lni nroob ne  
run zho Jerusalén. Gzobse iz rie me grop me, per iz co-  
taa laa me güeynie win, sac nac zhiwseed zha Israel,  
mëëdbgui ne rap lalga iz, zrieelele tsie zho lo lni co.

<sup>43</sup> Zeene laa lni co bded, laa me bio nëz grop me laa  
me wbi ga. Ib biend me biaan win Jerusalén, <sup>44</sup> tibaque  
güeynie guic me lad grëraa miech ne wbire lni, lad co  
ziena win. Laa me no nëz, zeene bdzetaa dzew, laa me  
psilo rguib win, bnabdiidz me lo grë zha lidz me, lo grë  
zha ne runbey me, <sup>45</sup> per ni tib zho choot rdeete win di-  
idz. Nacne wbireque me nëz Jerusalén stib, zieguib me  
win.

<sup>46</sup> Dze ne racle tson ngbidz blozh lniw, dzigora güey-  
dzziel me win len yadoo, laa win zob lo grë zha ne nac  
maistr ley, noquiaadiag win grë zhiwseed zho ni nzian  
grë ncuane rnabdiidz win lo zho. <sup>47</sup> Rzee zdoo zho ran  
zho scataa nixbiini win, niicle zeene rnee wina, zeene  
rtsiregaa win lo xtiidz zho. <sup>48</sup> Zeene gon me laa win zob  
lad grë meñ co, bzee zdoo me; dzigo rëbchaa xniaa  
win lo win:

—Xin, ¿pe nacne squi been luu? Ptseeb luu no gon,  
quia no grop no pxoz luu noguib no luu.

<sup>49</sup> Pquiab win rëb win:

—Nguibde to naa. ¿Pe rande to ib none gon naa xtsi-  
in Pxoz naa?

<sup>50</sup> Ib biend me pe nacne sca rëb win. <sup>51</sup> Dzigo laa win  
ziena zhits me, laa me zeynie win Nazaret; nose grë  
min co zdoo xniaa win.

Tib mëed nguzobdiidz nac win, ron win xtiidz me.  
<sup>52</sup> Zigse zie dzew, laa win riabiiniraa, laa win noroo-  
braa; rleynie Dios win, niiclegaa miecha rleynie zho  
win.

### Psilo Juan Bautist noseed me miech

(Mt. 3:1-12; Mr. 1:1-8; Jn. 1:19-28)

**3** Bdzin dzew, laa Juan psilo pseed miech. Lëë len iz  
co rac tsiin iz zob meñ ne lë Tiber nac me rey, rn-  
abey me grë guiedz ne ngab lo zha Roma. Len dze co  
zob Pilat rnabey me grë guiedz ne ndxie nëz Judé, laa  
Herod zob rnabey grë guiedz ne ndxie nëz Galilé. Len  
dze coque zob bets Herod, meñ ne lë Lip rnabey me  
grë guiedz ne ndxie nëz Ituré ni nëz Traconit; laa Lisian  
rnabey grë guiedz ne ndxie nëz Abilin. Zha ne nac

zhipxoz nroob zha Israel len dze co, nac Anás ni Caifás.  
Len dze copaa nagon güeynee Dios lo Juan (xpëed  
Zacari) dan ngan ne no Juan ga.

<sup>3</sup> Nacne hor co psilo Juan güeyted me grë guiedz ne  
ndxie ro guiubee Jordán, rnee me lo grë miech co,  
csaan zho xquieIntseeb zho gbig zho lo Dios ni chob-  
nis zho, zeena csilaa Dios zho lo grë xto zho. <sup>4</sup> Ga  
brieequia miñe bnee Isá, meñ ne biaad pteed xtiidz  
Dios, zeene znu pquiaa me:

Bii zon miech ganle zeene laa tib tsi meñ zëeb tib dan  
ngan, rnee me:

“Golzhixcuaa nëz ne ted meñ ne rnabey,  
golsaan grë guieIntseeb ne run to.

<sup>5</sup> Zaatne nac len blë, golcodzëew,

grë gui glaa, grë gui las, golsiaablow.

Nëz ne niecw, nëz ne quiaya quiaguiet nac, golzhix-  
cuaaw.

<sup>6</sup> Grëse miech, laa zho gan meñ ne pxeel Dios ga zi-  
aadsilaa zho.”

<sup>7</sup> Zeene ran Juan laa miech rdzin lo me cchoobnis me  
zho, rnee me lo zho:

—iMiech ngoopdo, masaque nac to zig nac mee!  
Nañ to na lëë, loxaque chobnis to laa to laale lo grë  
guieInëdox ne ziaadyob guiaad. <sup>8</sup> Led scada gon, none  
ndzinli gban to zeena glu nlipaa psaan to xquieIntseeb  
to. Ni gacniatsde to guiab to, loxaque por nacse to zha  
xtii Abraham, laa Dios csilaale to; sac gneli naa lo to  
ganle, telne gacladz Dios, haxta grë quie zac gnabey  
me tsaalow miech ne gac zha xtii Abraham. <sup>9</sup> Nanle to  
ganle, grë yag nex ne rquiad nex lo, zeene ran zho sca  
naca, rchug zhow, rzëeg zhow; scadaa nagon sac grë  
zha ne gband zigne racladz Dios, ib tedlaad zho lo gui;  
sac rrieequia laa me nzhenle xquiibyag me, cchug me  
grë yag ne sca nac.

<sup>10</sup> Dzigo rnabdiidz zho lo Juan, pe no gon zho parne  
ygaad zho grë guieInë co. <sup>11</sup> Dzigo rquiab me rnee me  
lo zho:

—Telne quianie to chop lar ne racw to, none gdeed  
to tiba lo zha ne guieñd xab; telne quianiegaa to  
ncuane gow to, none gdeed to palala yquiin zha ne  
quianieda.

<sup>12</sup> Wbigaque bla recaudador ne zie chobnis, rnabdi-  
idz zho dien pe gon zho. <sup>13</sup> Pquiab Juan, rëb Juan lo  
zho:

—Cuandraa to samiech to, miñe rieguialse zho quizh  
zho, min co golnab lo zho.

<sup>14</sup> Ye zla menguib wbig, rnabdiidz zho rëb zho:

—¿Telzhe no waa, pe nac miñe dziuun no?

Rquiab Juan rnee Juan lo zho:

—Ndzinli golgac, ib ctsebde to samiech to par dien  
pe gla to lo zho; zha ne peet xtoId, ib yquiaa quide to  
zho ncuane been zho. None sac zdoo to dimi ne  
quiayazh to.

<sup>15</sup> Nzian grë miech co quiambëznë zho gacnan zho  
dien pe lëële Men ne bzooblo Dios ga cxeel me nac  
Juan. <sup>16</sup> Dzigo rëb Juan lo zho:

—Tib wrobnisse nu rnedz naa lo to, sangue meñ ne  
no guiaad ga Espiritu Sant gdeed me lo zha ne gliladz

me; ni scagaa zha ne gliladzd me, sonöz me zho za-atne nitlo zho. Ne nligaa meñ non nac me, teļ naa peet nond naa, per ni par tib nguñdziin ne glit lab me ni me, raguiaļd naa gac naa. <sup>17</sup> Laa me guiaad zig tib zha ne rbeeguizh zhoxtil, sac zha co, rlozhse rbeeguizh zho zho rgotsow zhow, laa paj rlaaļ zho lo gui, ga re-ca. Per gui ne gžëög grë paj ne guiadbee me ga, gdz-iñd dze guiuuw.

<sup>18</sup> Sca rnee me lo zho, par guiēñ zho zha nac Xtiidz Dios. <sup>19</sup> Tib vult haxta lo rey Herod goctox me, sac lëëque Herodí, wnaa ne nac tsieel bets Herod nonie Herod; grë guiēñtseeb ne quiayuñ Herod, blisqui mew. <sup>20</sup> Per laa ne nion Herod diidz, leļ beēñ me stib guiēñtseeb, bnabey me bgaa Juan bio Juan ladzguiib.

### Brobnis Jesús

(Mt. 3:13-17; Mr. 1:9-11)

<sup>21</sup> Leñ dze ne nochoobnis Juan miech ga, tib dzew laa Jesús bdziñ lo Juan ga, ye me bnab cchoobnis Juan me. Blozhse brobnis me, laa me quiazodiidznie Dios, tibaque zeēne bzhial zhan gbaa, <sup>22</sup> laa meñ ne nac Espíritu Sant biet, rlu me zig rlu tib palom, laa me bdziñ guic Jesús, hor co blu zëëb tib tsi meñ co nēz gbaa, rnee me:

—Xin, rleynie naa luu goñ, nziuu luu lo naa.

### Xmengol Jesús

(Mt. 1:1-17)

<sup>23</sup> Gaļptsii iz rap Jesús, laa me psilo xtsiiñ me pseed me miech. Zha ne ruñbey me, rzoob zho xpëed José nac me,

<sup>24</sup> José co goc xpëed Elí,  
Elí goc xpëed Matat,  
Matat goc xpëed Leví,  
Leví goc xpëed Melqui,  
Melqui goc xpëed Jan,  
Jan goc xpëed José,

<sup>25</sup> José goc xpëed Matatí,  
Matatí goc xpëed Amós,  
Amós goc xpëed Nahúm,  
Nahúm goc xpëed Esli,  
Esli goc xpëed Nagai,

<sup>26</sup> Nagai goc xpëed Maat,  
Maat goc xpëed Matatí,  
Matatí goc xpëed Semei,  
Semei goc xpëed José,  
José goc xpëed Judá,

<sup>27</sup> Judá goc xpëed Joan,  
Joan goc xpëed Resa,  
Resa goc xpëed Zorobabel  
Zorobabel goc xpëed Salatiel,  
Salatiel goc xpëed Neri,

<sup>28</sup> Neri goc xpëed Melqui,  
Melqui goc xpëed Adi,  
Adi goc xpëed Cosam,  
Cosam goc xpëed Lmodam,  
Lmodam goc xpëed Er,  
<sup>29</sup> Er goc xpëed Josué,

Josué goc xpëed Liezer,  
Liezer goc xpëed Jorim,  
Jorim goc xpëed Matat,  
<sup>30</sup> Matat goc xpëed Leví,  
Leví goc xpëed Simeón,  
Simeón goc xpëed Judá,  
Judá goc xpëed José,  
José goc xpëed Jonán,  
Jonán goc xpëed Liaquim,  
<sup>31</sup> Liaquim goc xpëed Melé,  
Melé goc xpëed Mainán,  
Mainán goc xpëed Matata,  
Matata goc xpëed Natán,  
<sup>32</sup> Natán goc xpëed David,  
David goc xpëed Isaí,  
Isaí goc xpëed Obed,  
Obed goc xpëed Booz,  
Booz goc xpëed Salmon,  
Salmóngoc xpëed Naasón,  
<sup>33</sup> Naasón goc xpëed Minadab,  
Minadab goc xpëed Aram,  
Aram goc xpëed Srom,  
Srom goc xpëed Far,  
Far goc xpëed Judá  
<sup>34</sup> Judá goc xpëed Jacob,  
Jacob goc xpëed Isaac,  
Isaac goc xpëed Abraham,  
Abraham goc xpëed Taré,  
Taré goc xpëed Nacor,  
<sup>35</sup> Nacor goc xpëed Serug,  
Serug goc xpëed Ragau,  
Ragau goc xpëed Peleg,  
Peleg goc xpëed Heber,  
Heber goc xpëed Sala,  
<sup>36</sup> Sala goc xpëed Cainán,  
Cainán goc xpëed Rfaxad,  
Rfaxad goc xpëed Sem,  
Sem goc xpëed Noé,  
Noé goc xpëed Lamec,  
<sup>37</sup> Lamec goc xpëed Musalén,  
Musalén goc xpëed Enoc,  
Enoc goc xpëed Jared  
Jared goc xpëed Mahalaleel,  
Mahalaleel goc xpëed Cainán,  
<sup>38</sup> Cainán goc xpëed Enós,  
Enós goc xpëed Set,  
Set goc xpëed Adán.  
Adán goc zig tib xpëed Dios.

### Gocladz mēdox niuñgüet ma Jesús

(Mt. 4:1-17; Mr. 1:12-15)

**4** Zeēne blozh brobnis Jesús guiubee Jordán ga, nacie Espíritu Sant me, dzigo güeynie me Jesús tib dan ngan, zaatne choot miech guiēñd. <sup>2</sup> Ga bio Jesús, ni tib lë peet dowd me; gzase dze pquiānaļ mēdox niuñgüet ma me niuñ me miñe racladz ma. Zeēne goc choo dze no me ga, goñ ma lēbdraa me rcaabedz me, <sup>3</sup> dzigo rēbchaa ma lo me:

—Tejne nli Xpëed Dios nac luu, bnabey tsaalo grë quie rii ncuaaṅe gow luu.

<sup>4</sup> Dzigo pquiab me rëb me lo ma:

—Znu zhobnee lo Xtiidz Dios: “Niapse por xtiidz Dios mban miech, yquiamband zho loxaque guieḷwagwse.”

<sup>5</sup> Blozh ga güeynie ma me glaa tib guic gui, ga znuse blu ma grëse guiedz ne ndxie dib lo guidzliu lo me, <sup>6</sup> rëb ma:

—Bui gaṅle, grëse guiedz ne goṅ raṅ luu i, chen naaw, zrieelo gded naaw lo zha ne racladztaa naa. Grësew, dib guieḷndaan ne no low, znedz naaw lo luu <sup>7</sup> tejne squiitsgzhib luu lo naa, guṅnon luu naa.

<sup>8</sup> —iBiche lo naa nu meṅdox! —rëb me lo ma—. Znu goṅ zhobnee lo Xtiidz Dios: “Diosse nac meṅ ne rnabey, mese none guṅnon luu, lo me rieguiaḷyquiitsgzhib luu; ni miṅe rnabey me miṅ co none guṅ luu.”

<sup>9</sup> Blozh ga güeynieque ma me lad guiedz Jerusalén, ga blep ma me zaatne mazdraa glaa guic yadoo nroob ne zob lad guiedz co, rëb ma lo me:

—Tejne nli Xpëed Dios nac luu, bringaa nu, <sup>10</sup> beṅque led znu rnee lo Xtiidz me: “Znabey Dios grë xanjḷ me yquiaanap luu, <sup>11</sup> zgueedz zho luu, zeeṅa ni tib quie ycaand ni luu.”

<sup>12</sup> Dzigo rëb me lo ma:

—Psoladz gaṅle noque stib zaatne znu rnee lo Xtiidz Dios: “Bieṅ, Dios nac meṅ ne rnabey luu, nodne quitnie luu me gnab luu lo me guṅ me ncuaaṅe nod guṅ me.”

<sup>13</sup> Goṅse ma rdziel zha guṅgüet ma Jesús, dzigo biche ma lo me palal dze.

<sup>14</sup> Blozhse ga, dzigo laa Jesús wbi ga bdziṅ me nëz Galilé, scaque nacie Espíritu Sant me. Znuse beenbey miech me por grëtaa ncuaaṅ ro ne ruṅ me, grëse guiedz ne ndxie nëz co, rzeet zho me. <sup>15</sup> Zaatne rdziṅtaa me, rie me xyadoo zho, rseed me zho Xtiidz Dios, rleynie zho me, rley zho ron zho grë miṅe rnee me.

### Güey Jesús Nazaret

(Mt. 13:53-58; Mr. 6:1-6)

<sup>16</sup> Tib dzew, laa me bdziṅ Nazaret, zaatne broob me. Goḷ dze ne rdziiladz zha Israel lo dziin, güey me xyadoo zho zig ruṅaque me grëraa zaatne ziye me. Zeeṅe goḷ horne rlab zho Xtiidz Dios, dzigo bded me, <sup>17</sup> bdeed zho miṅe pquiaa Isá glab me. Pخال me low, lëetse zaatne znu rnee blab me:

<sup>18</sup> ZhiEspíritu Dios nacie naa,

ible Dios bzooblo naa, gnee naa Diidz Ndzon ne nac xtiidz me lo grëse zha ne rquiinnëw.

Laa me pxeelḷ naa gne naa lo grë zha ne ngadoo lo ncuaaṅe nosacsi zho,

zeeṅa guieṅ zho zha grieec zho lo grë ncuaaṅ co.

Laa me pxeelḷ naa gziini naa lo grë zha ne no lo guieḷcow,

grë zha ne rzac guieṅdraa zha grieec zho lo zhizhgab zho, laa me pxeelḷ naa, naa cuec zho lo zhgab co.

<sup>19</sup> Laa naa zialnie diidz lo miech, gacnaṅ zho pa lotaa noxco Dios guṅlay me grëse zha ne gbig lo me.

<sup>20</sup> Blozhse blab me lo co, ptibëd mew bdeed mew lo zha ne quianapa, dzigo laa me bzob. Grëse zha ne no leṅ yadoo ga, dze rwi zho lo me, <sup>21</sup> dzigo bnee me lo zho, rëb me:

—Grë diidz ne blozh blab naa lo to nu, leṅ dze rii goṅ laaw noyac cumplir.

<sup>22</sup> Grëse zho rleynie zho me, rlozhd gzee zdoo zho ron zho grëtaa diidz ndzon ne rnee me. Rnabdiidzlsa zho rnee zho:

—iBay zha squitaa pseed meṅ qui? iLed lëe xingan José!

<sup>23</sup> Dzigo rëb me lo zho:

—No tib diidz ne rnee: “Zha ne racnie stib miech, none guieṅ zho glo meṅladz zho gacnie zho.” Rienpaa naa goṅ, miṅ co racladz to gnë to lo naa; quiambëz to gaṅ to grë milagr ne ziyon to beṅ naa guiedz Capernaum.

<sup>24</sup> Gneli naa lo to gaṅle: Zha ne riaad rteed xtiidz Dios, ible znu ranzded meṅladz zho zho; gane rrieelod pe guṅ zho. <sup>25</sup> Goḷsoladz gaṅle zeeṅe biaad Lí, bio tib tiemp ne biabd guie tsoṅ iz groḷ, tib gbindow ne goṅ miech Israel nu. Ndal wnaa viud ne nac meṅladz me mban bded zho, guieṅd pe nquiin zho, per brieelod niuṅ me xyudar zho; leḷ xyudar tib wnaa Sarept pxeelḷ Dios me güeyguṅ me, guiedz ne ndxie gax Sidón.

<sup>27</sup> Scaque zeeṅe biaad Liséw, ndal zha Israel rlan guiezdcox ne nac lepr, per ni tib zho beṅguiaed me; leḷ tib zha Siria lë Naamán, meṅ co beṅguiaed me.

<sup>28</sup> Zeeṅe goṅ zho sca rnee me, blëe zho. <sup>29</sup> Gusobe zho, blee zho me lad guiedz, güeynie zho me tib ro yee ne quia glaa guic gui ne ndxie guiedz co. Laa zho nole par ctiix zho me ga, <sup>30</sup> zeeṅe znuse bded me lad zho, ziega me.

### Biac tib mgui ne nosacsi meṅdox

(Mr. 1:21-28)

<sup>31</sup> Ga wbi Jesús, bdziṅ me guiedz Capernaum stib, guiedz ne ndxie nëz Galilé. Gzobse dze ne rdziiladz grë miech co lo dziin, rie me xyadoo zho rieseed me zho.

<sup>32</sup> Rzee zdoo zho ron zho grë zhiwseed me, grëse miṅe rnee me, rlu zha rnabey nac me.

<sup>33</sup> Tib vult, lad grë zha ne noseed me ga no tib mgui ne nosacsi meṅdox; roptsie meṅdox co rnee ma lo me:

<sup>34</sup> —iPsaan no! iPe guṅ luu no Jesús Nazaren? iZiaad luu lëe par gnitlo luu no? iRuṅbey naa luu, luu nac meṅ ndzon ne pxeelḷ Dios!

<sup>35</sup> Dzigo goctox me lo ma, rëb me:

—iPsiog ro luu! iNa zeeṅa psaan meṅ qui!

Horco, squi ndxie grë miech co bron ma mgui co liu, miṅcose beṅ ma, laa ma brieec laa ma zie. <sup>36</sup> Rlozhd gzee zdoo grë miech co, rnabdiidzlsa zho rnee zho:

—iZha nac xtiidz meṅ qui, zha nacie haxta meṅdox rdzieb ma me, rzhoon ma zeeṅe laa me ractox lo ma?

<sup>37</sup> Grëse guiedz ne ndxie gax ga, zigse zie dze rzhoon diidz scataa milagr ne ruṅ me.

**Biac xniadzoop Pedr**

(Mt. 8:14-17; Mr. 1:29-39)

<sup>38</sup> Brieë Jesús len yadoo, zie me nëz lidz Simón. Bdziñ me lëëtaque laa xniadzoop Simón nix rlan xlëë, nzhoorac me; dzigo wbig zha ne been vis laa zhuz co rzacnë, bñab zho lo me guñguiac me me. <sup>39</sup> Nacne bded me zaatne nix zhuz co, goctox me lo xlëë co. Horcogazha laaw blëz, guche zhuz co ga, beenlo me ncuane dow zho.

<sup>40</sup> Laa ngbidz rzëëblew, zeene bdziñ grë miech co lo Jesús, bdziñnie zho grë zhimguidz zho. Zhaase zhaase guiełguidz ne rzac tib tib mguidz co, per grëse zho zigne rxobnia me guic zho laa zho riac. <sup>41</sup> Nzian zho beñcxoon me meñdoh ne nosacsi zho, zeene laa ma rree, nguiedz roptsie ma rnee ma lo me:

—;Rdziuñbey no luu, Xpëëd Dios nac luu!

Dzigo ractox me lo ma, rsaand me gnee ma cho nac me, sac wen wen nañ ma me nac Meñ ne nacle diidz ga cxeel Dios.

<sup>42</sup> Biini liu co, silgaw brieë Jesús lad guiedz co güey me tib zaatne choot miech guieñd. Zeene bnit me lo grë miech co, brieë zho güeyguib zho me haxta bdziel me lo zho; rnab zho lo me Capernaumse ga cuëz me, paat tsiedraa me. <sup>43</sup> Dzigo rëbchaa me lo zho:

—Grieeloda, ib none ga naa grëraa guiedz, gaseed naa miech gacnañ zho zha racladz Dios gban zho; sac ibe min co pxeel me naa zial naa.

<sup>44</sup> Nligaaw, grëse guiedz ne ndxie nëz Galilé ga güeyted me, güey me yadoo ne zob tib tib guiedz co, güeynee me Xtiidz Dios lo grë miech co.

**Nroobdoh meł bгаа**

(Mt. 4:18-22; Mr. 1:16-20)

**5** Tib vuelt miech guizhiu ne pcaalsa lo Jesús ro Nis-doo Genesaret, haxta rtaagw zho me; grëse zho racladz yquiaadiag zho Xtiidz Dios. <sup>2</sup> Gax ga zo chop barcw, blalaa ngooz meł biet leña, laa zho no lo nis ga noguiib zho guix ne rnaaz zho meł. <sup>3</sup> Nacne güey me biep me tib len barcw co, bnabey me Simón psëë Simóna bzëëba lo nis palal; sac lëë xbarcw Simón ga. Dzigo leen co bzob me pseed me grë miech co.

<sup>4</sup> Zeene blozh bnee me lo zho, rëbchaa me lo Simón: —Nana ganle zeeynie barcw rii guionie new zaatne quietlaa nis, zeena gron to guix ne rгаа meł i gnaaz to palal ma.

<sup>5</sup> Pquiab Simón rëb Simón:

—Dib guieel-le bdzio no lo nis rii, per ni tib meł bnaazd no; per lega ne luu rneew, na dieñ laa no grona stib.

<sup>6</sup> Bron zho guix co lo nis, zeene laa zho cueew, ya zig zrieza, biodzëse leña no meł. <sup>7</sup> Horco blunia zho lo grëraa zha ne nacgrë zho no stib len barcw co, parne tsie zho guñ zho xyudar zho. Bdziñ zha co gocgza zho, gropse len barcw co pcodzëë zho grë meł co; ya zig zdedquiew lo nis.

<sup>8</sup> Zeene gon Simón scataa meł taf ne bгаа, pquiitsgzhib me lo Jesús, rëb me:

—Bzhiguieł mazd psaan naa, tib miech ngoopdoł nac naa, rdzieeld so luu lo naa nu.

<sup>9</sup> Zigtaa Simóna, zigtaa zha ne ziegza mew, rzee zdoo zho ni rdzieb zho scataa nac milagr ne gon zho ga.

<sup>10</sup> Scasaque rac Jacob ni Juan (xingan tib meñ lë Zebedé), zha ne nacgza Simón.

—Gdzieebd luu —rëb Jesús lo Simón—. Zigne squi gon rioxco luu riaad luu gooz meł niina, desde nadze laa luu tsoxco guñ luu stib gooz; laa naa cxeł luu tsi-etop luu grë miech ne sëëb xnëz Dios.

<sup>11</sup> Zigne bdziñnie zho barcw co ro nis, bzo zhow ga, laa zho zienal zhits me.

**Biac tib zha ne rlan guiedz lepr**

(Mt. 8:1-4; Mr. 1:40-45)

<sup>12</sup> Laa Jesús no tib guiedz co, tib dzew, bdziñ tib mgui ne rlan guiedzdox ne lë lepr lo me, pquiitsgzhib mgui haxta bdziñ lo mgui liu, rëb mgui lo me:

—Tebaa siguieel luu guñguiac luu naa.

<sup>13</sup> Dzigo pxobnia me guic mgui, rëb me:

—Zunguiac naa luu. ;Niinagazh laa luu guiaañmbe!

Horcogazha laa mgui biaanmbe lo guiedz co. <sup>14</sup> Dzig pso Jesús diidz lo mgui, choot lo gzodiidzd mgui zha biac mgui; ni rëb me lo mgui:

—Bzë, güey lo pxoz, güeysañ gon ne rnabey xley Moisés gdeed luu; zeena gan zho ganle laa luu biacle.

<sup>15</sup> Niicle sca nëd me gacnañ miecha, per znuse rliaal diidz grëtaa milagr ne ruñ me; miech guizhiu ne rdziñ lo me, zha ne zie yquiaadiag zhiwseed me, zha ne zieegaa guñguiac me zho tel pe guiełguidz ne rzac zho. <sup>16</sup> Zhiga, zhiga rbiche me lo miech, rie me zaatne choot guieñd riezodiidznie me Pxoz me.

**Biac tib zha ne gutoo xcuerp**

(Mt. 9:1-8; Mr. 2:1-12)

<sup>17</sup> Stib dzew, miech guizhiu ne ndxie lo Jesús no-quiaadiag zho zhiwseed me. Nzian grë zha farisé, grë maistr ley, zha ne brieë dib nëz Galilé, dib nëz Judé, zha ne brieegaa Jerusalén, ye zho laa zho no lad co no-quiaadiag zho grë miñe rnee me.

<sup>18</sup> Laa grë miech co ndxie ga, zeene bdziñ bla zha bgui, ney zho stib meñ bgui, zhoobse me lo yag, ib gacd së me sac dipse me gutoo. Gocladz zho nzëëbnie zho me len yu ne no Jesús ga, ndziñnie zho me lo me.

<sup>19</sup> Per ib gocd nded zho lad grë miech co. Nacne biepaque zho guic yu, pxal zho tiblë guic co, ga pteed zho meñ rzacnë co dib yag ne zhoob me ga, bdziñ me lo Jesús.

<sup>20</sup> Zeene gon Jesús ne nli dib zdoo zho rnalo zho me, me guñguiac meñ rzacnë co, rëbchaa me lo meñ co:

—Peet tsienied guic luu, niinagazh laa naa guñ perdon grëse xtoł luu.

<sup>21</sup> Zeene bin grë zha farisé co, grë maistr ley co sca rëb me, rneechaa zho gza zho: “¿Cho dzigo rzac mgui qui nac me? ;Falt i gon noyuy me lo Dios! ;Tibaque meñ ne ruñ perdon xtoł miech, ni lëë meñ co nac Dios!”

<sup>22</sup> Bienga Jesús sca quianee zho, dzigo rëbchaa me:



—¿Pe nacne rzac to laa naa quiayun falt? <sup>23</sup> Nli cholze zac guiab laa zho gun perdon xtoł miech, per grielod gunguiac zho zho. Gołwi ganle laa naa gunguiac mgui rii, zeena gacna to naa ne nac naa Mgui ne pxeel Dios, ible rap naa poder par gun naa miech perdon.

Dzigo bnee me lo meñ rzacne co, rëb me:

—iNiinagazh guche i, bi yag ne bzhoob luu i, zeen bzë!

<sup>25</sup> Zigne sca bnee me, laa mgui co bzoli, squi ndxie grë miech co laa me blis yag co, ine roolnie me Dios laa me zey. <sup>26</sup> Psilo zho grëse zho, roolnie zho Dios; lala rzee zdoo zho, lala rdzieb zho, rnee zho:

—iNadzesi, laa ne bdziañ ncuaañe gard dziañ ne!

### Bredz Jesús Leví

(Mt. 9:9-13; Mr. 2:13-17)

<sup>27</sup> Blozh ga, laa Jesús brie ga. Ro nëz zieded me gon me tib meñ lë Leví, zobse meñ co lo mezh ne rietizh zho dimi ne razh lo zha Roma, sac me rtop dimi co. Dzigo bredz Jesús me tsienal me zhits Jesús. <sup>28</sup> Bi-aañaque xmezhe me ga, guso me ga, laa me zienal.

<sup>29</sup> Bded ga, güeynie me Jesús tib wagw lidz me. Grë zha ne run dziin co, ni grëragaa zha ne bdziñ ga, tipse brenie Jesús zho grë xpëedscuel me.

<sup>30</sup> Blalaa zha farisé, ni zla maistr ley, rlëe zho gon zho sca zobnie Jesús grë zha co, bded ga rëbchaa zho lo xpëedscuel me:

—iLëda i gon run to! ¿Pe nacne sca tipse rownie to grë zha ngoopdoł co, grë zha beed ne nac recaudador ga?

<sup>31</sup> Dzigo rëbchaa Jesús lo zho:

—Nanle to ganle, zha ne run rmed, zaatne no zha rzacne ga rquiin zho, ¿niacxe squiin zho zaatne no zha ne ndip ndaan? <sup>32</sup> Scaque naa nagon, zialguibd naa zha wen, sinque laa naa zialguib grë zha ngoopdoł, zeena gbig zho lo Dios.

### ¿Pe nacne rcuand xpëedscuel Jesús?

(Mt. 9:14-17; Mr. 2:18-22)

<sup>33</sup> Bdziñaque bla zha ne bnabdiidz, rëb zho lo Jesús:

—¿Pe nac waa ib rcuand xpëedscuel luu, tibaque quiayow zho, tibaque quiaye zho? Zha xpëedscuel Juan, zha xpëedscuel farisé, rdziañ no tibaque nocuan zho, tibaque nonab zho lo Dios.

<sup>34</sup> Pquiab Jesús rëb me lo zho:

—Zaatne nadien noyac tib guieltsieel, ¿niacxe znabey to ycuand grë zha ne ndxie lo lni, ni ran to laa mgui ne notsieelnia zo lo zho? <sup>35</sup> Per zdziñ dze zeene laa mgui co gbiche, ni zeene laa dze co gdziñ, dzigosi nagon rieguial ycuand zho.

<sup>36</sup> Blozhse sca bnee me, rëbaque me lo zho:

—Zha ne rquiaabdie lar, tsod zha ne ctsiez xab cub cuee zho tib lë lar ne yquiaabdie zho tib xab gox zho. Sac tiba, znitlo zho xab cub zho ga, ni stiba rdzieeld yquia tib lë lar cub lad lar gox. <sup>37</sup> Scaque zha ne rgot-sow vin, tsod zha ne cotsow vin cub tib leñ guid ne padzeelale noquiin, sac stiesz vin cuba; lozh ga zigtaa

vina, zigtaa guid cow, laaw nitlo ga. <sup>38</sup> Gacxe waa, tel vin cuba none leñ tib guid cubaque tsotsowa.

<sup>39</sup> 'Nac cuent rii zig rzac miech vin, zha ne bienle rie vin ne padzeelale notsow, rdziladz zho guie zho vin cub; sac biaanle guic zho rnee miech: "Vin ne padzeela notsow, miñ co nizhraa rdioow."

### Dze ne rdziiladz zha Israel lo dziin

(Mt. 12:1-8; Mr. 2:23-38)

**6** Tib vult, lëetse dze ne rdziiladz zho lo dziina, bded Jesús zaatne zëeb zhobxtil grë xpëedscuel me; psilo zho pchoo zho mzion zhobxtil co, zigse runmbe zho zhob co, scase row zhow. <sup>2</sup> Gon blalaa zha farisé sca no zho, dzigo rëbchaa zho:

—iLëda i gon noyun to! Gołguien ganle dze nda nac dze rii.

<sup>3</sup> Pquiab Jesús rëb me lo zho:

—¿Pe gard glab to zaatne ziaad ganle zha been rey David, tib dze zeene pcaabedz me grë me zha ne ziegza me, ni zienied zho pe gow zho? <sup>4</sup> Rneew, bzëeb me leñ yadoo güeynab me grë guietxtil ne nac gon, downie me grë zha ne ziegza me ga; ni loxaque zha ne nace pxoz, zha cose row guietxtil co.

<sup>5</sup> Ni rëb me lo zho:

—Gacna to ganle naa ne nac naa Mgui ne pxeel Dios, naa rnabey dze rii, nanpaa naa pe nonguiel gac.

### Biac tib mgui ne mband tib nia

(Mt. 12:9-14; Mr. 3:1-6)

<sup>6</sup> Goł stib dze ne rdziiladz zho lo dziin, güey Jesús leñ yadoo win ne zob lad guiedz co, psilo me noseed me miech. Lad grë miech ne no leñ yadoo ga, no tib mgui, mband nia derech me. <sup>7</sup> Blalaa zha farisé, blalaa maistr ley no lad co, quialeets zho Jesús dien pe zunguiac me mgui co, dze co; sac quiambëz zho tel laa me gunguiac mgui, dzigo miñ co yquiaaqui zho tsiezo zho me lo zhi-wxtis zho.

<sup>8</sup> Bien Jesús sca no guic zho, dzigo bredz me mgui co, bnabey me bzo mgui grołtaa lo grë zha ne ndxie ga;

<sup>9</sup> blozh ga rëbchaa me lo zho:

—¿Pe nadien rzac to nonguiel gun ne dze rii? ¿Pe nonguiela gun ne ncuaañe yquiin, te nonguiela gun ne guielntseeb ye? Zig nac samiech ne zha ne noxtseeb xquielmban, ¿pe maase csaan ne guet zho?

<sup>10</sup> Dze rwi me lo zho tib tib zho, dzigo rëbchaa me lo mgui co:

—iBzigaa nia luu!

Zigne bzigaa mgui co nia mgui, laaw biac.

<sup>11</sup> Zeene gon zho sca beenguiac me nia mgui, per nli rlëe zho, psilo zho quianediidz zho dien zha gun zho me.

### Bzo Jesús zha ne tsienee xtiidz me

(Mt. 4:23-25; 10:1-4; Mr. 3:13-19)

<sup>12</sup> Tib vult, güey Jesús tib guic gui, dipse guieel blëz me ga bzodiidznie me Dios. <sup>13</sup> Biini liu co, bredz me grëse zha ne nac xpëedscuel me, dzigo lad co ble me

tsiipchop zho, zha ne tsiepaa tsienee xtiidz me lo miech. <sup>14</sup> Znu lë gza tsiipchop zha co:

Simón (zha ne bleelë me Pedr),  
Ndrés (bets Pedr),  
Juan,  
Jacob,  
Lip,  
Bartol,  
Matew,  
Mazh,  
Jacob (xingan Alfé),  
Simón (zha ne no lad grë zha ne racladz cuee wxtis Roma Israel),  
Judas (bets Jacob),  
ni Judas Iscariot (zha ne güeyto me).

<sup>17</sup> Cho gui co biet me grë xpëëdsuel me, bdziñ zho tib ro lets. Loxaque bdziñ zho ga, laa stib dzoon xpëëdsuel me bdziñaque lo me ga; zhiits co nañ stib dzoon miech, no zho racladz yquiaadiag zhiwseed me, nogaa zho zie ga par guñguiac me zho. Miech guizhiuw, zha ne ziaad nëz Judé, zha ne ziaad nëz Tiro, zha ne ziaad nëz Sidón, zha ne brieegaa Jerusalén.

<sup>18</sup> Nzian grë zha co nosacsi meñdox, grëse zho beenguiac me zho. <sup>19</sup> Rbig be grë miech co racladz zho xeh zho lad xab me, sac ran zho, zha ne rzhen lad xab me, tel pe guieñguidztaa rzac zho, runguiac me zho por grëtaa poder ne rap me.

#### Cho nac zha ne wen zie

(Mt. 5:1-12, 38-48; 7:1-5, 12)

<sup>20</sup> Dzigo dze bui Jesús lo grëse zha ne nac xpëëdsuel me, rëb me lo zho:

—Wen zie zha ne rien none gbig zho lo Dios, sac ib dzziñ zho zaatne rnabey me!

<sup>21</sup> Wëñ zie zho! Sac niicle telne noyan zho gbin, per me gdeed ncuaañe yquiiñ zho; niicle tel no hor mban rac zho roon zho; per dzziñ dze ne gdeed me tib guieñbley nroob lo zho.

<sup>22</sup> Zig nac to, zeñe csilo miech glëënie zho to, guñcxoon zho to, yquiaago zho to, gneenë zho to, sac zho haxta ni lë to gondraa zho, loxague ne nac to zha ne no xnëz Mgui ne pxeel Dios nu, wwen zie to ga!

<sup>23</sup> Nley golco zdoo to dze co, nguieel golgac, sac gon tib guieñnzaac nroob ne gneedz Dios lo to! Golsoladz ganle, scaque been pxozgol zho grë zha ne pxeel me padzeela biadnee xtiidz me.

<sup>24</sup> Sangue grë zha ne rzac grëse ncuaañe rquiiñ zho quianie zho, ib rquiiñ zho gbig zho lo Dios, iprobsaxe zho, sac lo guidzliu riise gac ncuaañ co guieñbley lo zho!

<sup>25</sup> Wëñ Probsaxe zho, sac niicle ne grëw quianie zho niina, per dzziñ dze gan zho ganle zha nac gbin; rlozhd gzhidz zho, rlozhd gley zho niina, per dzziñ dze laa zho gan ganle zha nac guieñnë!

<sup>26</sup> Padzeela, biaad bla zha ne pquidie rëb zho Dios pxeel zho, bio pxozgol to bleynie zho zho, iprobsaxe to telne yguib to sca gleynie miech to!

<sup>27</sup> Golquiaadiaga ganle: Zha ne rlëë lo to, golleynie zho, tel pe nac xliaadz zho golgacnie zho. <sup>28</sup> Zeñe rdz-ibdee zho to, golnab lo Dios gunlay me zho; zeñe rsacsigaa zho to, golnab lo Dios yquia zdoo me zho. <sup>29</sup> Tel gneedz zho tib puñet lo to, gzoobd nia to, golsaan zho maase yquiaa zho stiba.

Zha ne gla xabnañ to, golsaan maase ye biaagw güey zho. <sup>30</sup> Zha ne gnabtaa pe cos lo to, goldeeda; tel scasegaa xeh zhow, ib gnabde tow lo zho. <sup>31</sup> None zaacse gac to lo miech, zeñe scagaa zha, zaacse gac zho lo to.

<sup>32</sup> Sac gon, tel loxaque zha ne ndzieeldiidz to, zha cose rleynie to, jled ncuaañ nroobd ga run to! Haxta grë zha ntseeb run miñ co. <sup>33</sup> Tel loxaque zha ne runsegaa favor lo to, lo zha cosegue run to favor; zeñe rungaa to tib pextad, lo zha ne rgobeyse to zguizh lo to, lo zha cose runxtad to, jni lalnu peet nond ncuaañe run to ga! Sac gon haxta grë zha ntseeb run miñ co.

<sup>35</sup> Golguien sca, none gleynie to zha ne rlëë lo to, none gacnie to zho lo xliaadz zho. Zha ne guiaad tib pextad lo to, goldeed ncuaañe rnab zho, ib guiabde to nend lega scasegun to favor co lo zho. Zha ne gun grë miñ rii, nroob guieñnzaac ne gdeed Dios lo zho, ni ga glu zho ganle nli xpëëd me nac zho; sac gon tel me wen me lo grëse miech, niicle zha ne run falt lo mew, niicle zha ne rien dgaa gdeed xquizh lo me, rsaand me zho. <sup>36</sup> Ndzinli sca golgac, zigne sca wen Pxoz to lo grëse miech, scaque none wen gac to lo zho.

<sup>37</sup> Ib guñde to në gac zdoo to, zeñe ran to ncuaañe nongueid ne run stib miech, sac to tozhal gunquizh zhow; zeñe scagaa Dios gunscad me to. Golguien none gun to samiech to perdon, zeñe scagaa Dios zun me to perdon; <sup>38</sup> sac grëse ncuaañe run miech, miñcoque rcaania zho. Grëse ncuaañe gun to, scaania tow, ni haxta ndziibraa miñe ycaania to. Sac ncuaañe gun to lo samiech to, miñcoque gun Dios to.

<sup>39</sup> Blozh sca bnee me, dzigo rëbchaa me:

—Golwi ganle, zig nac zha ne rold lo, zñiacxe zriello glu zho nëz lo stib zha ne rold lo? Zha ne sca gun, tel griel ni tib zho zaatne nac tib ro blë, ib tedsod grop xcuaa zho tsietsobe ga.

<sup>40</sup> Grë zha ne nac mëëdsuel, tsod zha ne racraa lo zha ne noseed zho; haxta csiaa lraa zho zhiwseed zho, ni telne tsoxco zhow, dzziñ zho medid co.

<sup>41</sup> Wëñ Lëda ga gon tso to lozhd gzee zdoo to dieñ cho pe run, ni nenda mazdraa miñe run to! <sup>42</sup> Wëñ Pe ro to glisqui to miñe run stib zho, ni tel mazdraa nac miñe run to? Wëñ Golguien sca glude to ncuaañe nacde to! Wëñ Goltsoxco ndzinli gac to, dzigo lozh ga zac tsienee to zha gacndzinli stib zho!

#### Nex rlu zha nac tib tib yag

(Mt. 7:17-20, 24-27; 12:34-35)

<sup>43</sup> Tib tib yag rdeedsew xnexa. Grieelod yquia nex ncuaañ tib lo yag ne rdeed nex wen; grieelodgaa yquia nex wen tib lo yag me rquia nex ncuaañ. <sup>44</sup> Tel zha nac nex ne rquia lo yag, gase rlu zha nac yag. Tsod yag

guiets ne yquia guigw lo; ni tsodgaa lbë zarz ne gdeed uv. <sup>45</sup> Scadaa nagon nac miech, zha ne wena, ncuang wen ruñ zho, diidz wen rnee zho, sac desde zdoos zho no guielwen co; laa zha ne ntseeb, niapse ncuang ntseeb ruñ zho, niapse diidz dox rnee zho, sac desde zdoos zho no guielntseeb co. Gacxe waa, tel zha rzë xtiidz tib miech, gase rlu zha nac zdoos zho.

<sup>46</sup> Grielod lega gnee to, naa rnabey to, sac zha ne rneew ib none guñ zho miñe rnabey naa. Nzian zha ne rnee, naa rnabey zho, ni ruñd zho miñe rne naa.

<sup>47</sup> Zha ne rquiaadiag miñe rne naa, ni rioxco zho rban zhow zigne naca, <sup>48</sup> rrieequia nac zho ga zig tib zha ndzielguic ne quiet blee xcimient lidz, psilo zhow haxta zaatne bgaa lo quie. Niicle riab guiedox, peet racd lidz zho, nis naal ne raclor ded zaatne zoba ga, per rbixcheda. <sup>49</sup> Laa zha ne rquiaadiag xtiidz naa, ni rioxcod zho gban zhow, ziaad gac zho zig tib zha nxen ne güeyzoob lidz laglaase lo liu. Znuse bnitlo lidz zho, sac zeñe biab guiedox, lo nis naal ne goclo bded zaatne zoba, znuse bixchew, ni stib lëw biaang.

### Biac tib zha ne rquia dziin tib lo menguiib

(Mt. 8:5-13)

**7** Zeñe blozh bnee Jesús lo grë miech co, dzigo laa me wbi ga, bdziñ me Capernaum. <sup>2</sup> Lëëtaaque len dze co rzacnë tib zha ne ruñ dziin lo tib menñ ne rnabey lo xmennguiib zha Roma, no guiedz co; nzhoos rac zho zootle laa zho guetle. Rleyniedox menñ co zho, <sup>3</sup> zigne bin me laa Jesús bdziñ, lëëlëd pxeel me bla zha ne nac zha non lo mennguedz Israel, güey zho güeynee zho lo Jesús siguiel Jesús tsiegunnguiac Jesús zhingundziin me. <sup>4</sup> Bdziñ zho bnab zho lo Jesús siguiel me tsie me.

—Bzhiguiel beenñ xyudar me —rëb zho—. Tib zha wen nac me, <sup>5</sup> rleynie me menladz ne, haxta bzaa me tib xyadoo no lad guiedz nu.

<sup>6</sup> Dzigo ziana Jesús zhits zho. Zhile gdziñ zho lidz menñ rnabey co, zeñe bdzieelo zho bla zha ne ndzieeldiidz me, zienie tib xtiidz me lo Jesús. Rzë xtiidz me, rëb me:

—Bzhiguiel mazd guiaate luu. Naraa rien naa choot nacd naa, par csodziin naa lo luu guiaad luu haxta ro lidz naa. <sup>7</sup> Nligaa rien naa tib zha winse nac naa par gbig naa lo luu, gane niicle biañd naa nialdzieel naa luu. Nanpaa naa, zaatne ziaad luu i, con tib lan xtiidz luu zac gnabey luu guiac zhingundziin naa. <sup>8</sup> Sca rnee naa, sac tel naa no zha ne rnabey lo naa, zeñe rnabey zho naa none gon naa miñe rnee zho; scaque zhaguiib ne rnabey naa, zeñe rne naa tib lo zho: “Güey nu”, rie zho; zeñe rnegaa naa: “Dë nu”, riaad zho; zha ne nac-gaa zhingundziin naaw, miñe rnabeytaa naa zho, ruñ zhow.

<sup>9</sup> Zeñe bin Jesús sca rzë xtiidz menñ co, bzee zdoos me, ptsire lo me, rëb me lo grë zha ne ziana zhits me:

—Golwi ganle pa lotaa rnalo menñ qui Dios. Lo grë zha Israel gon, ni tib zho gard gan naa squitaa dib zdoos gnalo Dios.

<sup>10</sup> Grë zha ne güey mandad ga, zeñe bdziñ zho gon zho laa ngundziin co biacle.

### Rrieeban xpëed tib wnaa viud

<sup>11</sup> Bded ga, güey Jesús tib guiedz lë Naín grë xpëed-scucl me, miech guizhiu ne ziana zhits zho.

<sup>12</sup> Zeñe bdziñ zho gax ro guiedz co, lëëtaaque bdzieelo zho tib dzoon miech ziequeets xpëed tib wnaa viud; lëëse mëed ga lo wnaa co. <sup>13</sup> Gon Jesús zha rac me, pquia zdoos Jesús me, wbig Jesús rëb Jesús lo me:

—iGoondraa luu!

<sup>14</sup> Dzigo bzhenn Jesús yag ne zhoob ngutoos co. Zeñe gon gza zha ne nxobyan yag cow, hor co bzodze zho; dzigo bnee me lo mëed co rëb me:

—Xin, iguche i!

<sup>15</sup> Horcogazha brieaban niib co, bzobli niib, laa niib psilo bnee.

Rley xniaa niib, pcaania me niib.

<sup>16</sup> Zeñe gon grë miech co sca brieaban mëed co, lala rdzieb zho, lala rdeed zho xquizh lo Dios, rnee zho:

—i Tib menñ nroob ne gon ziadteed xtiidz Dios i, ziaad lo ne! iLaa ne bdziñ niina ganle, laa Dios ziaadgan ne, ziadbee me ne lo xquieñe ne!

<sup>17</sup> Gdipse nëz Judé, ni grëraa guiedz ne ndxie dib gax ga, gocnan miech milagr nroob ne beenñ Jesús ga.

### Zha ne pxeel Juan Bautist

(Mt. 11:2-19)

<sup>18</sup> Bin Juan Bautist grëta milagr ne ruñ Jesús ga, sac rie xpëedscucl Juan riezodiidz zhow lo Juan. Dzigo pxeel Juan chop zho, <sup>19</sup> zienabdiidz lo Jesús, dien pe me nac Menñ ne nole diidz ga cxeel Dios, te dzigora gdziñ menñ co ye.

<sup>20</sup> Bdziñ zho lo Jesús, wbig zho lo me, rëb zho:

—Laa Juan pxeel no ziaadnabdiidz no lo luu, dien pe lëële Menñ ne nacle diidz ga cxeel Dios i nac luu, te naraa guiaad me ye.

<sup>21</sup> Lëëtaaque ndal miech ndxie lo me ga, quiaayunguiac me grë menñ rzacnë. Nzian zho, tel pe guielguiidztaa rzac zho, no zho nosacsi mendox, no zho roñd lo, grëse zho ruñguiac me zho. <sup>22</sup> Dzigo rëbchaa me lo zha ne pxeel Juan ga:

—Grëse miñe bin to rne naa, grëgaa ncuang gon to quiaayun naa, goltsie golzodiidza lo Juan. Ran to ganle, grë zha ne roñd lo, zha ne në ni, zha ne rlan guiedz lepr, zha ne rcuaat, grëse zho laa zho riac, haxta grë mengut, rrieaban. Grësew golzodiidza lo me, golguiab lo me ganle blactaa zha ne rquiin gbig lo Dios, laa zho noquiaadiag xtiidz Dios; <sup>23</sup> ni golguiab lo me: dichos zha ne tiblque riladz cho nac naa.

<sup>24</sup> Zeñe laa xpëedscucl Juan zey, dzigo psilo me bzeet me Juan lo grë miech guizhiu ne ndxie ga, rëb me lo zho:

—Zeñe dien güey to dan ngan ne bio Juan ga, zha güeynie guic to nian to me? iPe rëb to rlu me zig tib goobgui ne nëzrii nëzrec rey me, <sup>25</sup> te rëb to ye masaque grë lar niazh ne racw zha non nacw me? Per nanle to ganle, zha ne scataa racwxab, len grë yu ne rzob zha rnabey, ga rio zho. <sup>26</sup> Nligaa cho güeynie guic

to nac me, ¿te rëb to ye tib meñ ne noteed xtiidz Dios?

‘Gacnañ to ganle, tib meñ ne noteed xtiidz Dios gon nac me, ni me nac tib zha ne mazdraa nroob lo grë zha ne ziyuñ dziin co. <sup>27</sup> Me ga raquiet lo Xtiidz Dios, zaatne znu rnee: “Sxel naa tib zha ne tednerga lo luu, zha co gzhixcuuaa nëz ne ted luu.” <sup>28</sup> Ne nligaa lo grëse mgui ne zieded lo guidzliu, gard grieequia tib zha ne mazdraa non lo Juan Bautist; per zha ne gon winraa zaatne rnabey Dios, nonraa zha co lo me.

<sup>29</sup> Leñ dze ne nochoobnis Juan miech ga, ndal zha ne bin zhiwseed me, haxta grë zha ne rtop dimi ne razh lo zha Roma, bien zho nonguiela guñ zho miñe rnabey Dios, güey zho pchoobnis Juan zho. <sup>30</sup> Sangue grë maistr ley ni grë zha farisé, pe liaadz zho nion zho miñe rnabey Dios, ib güeyd zho nchoobnis Juan zho.

<sup>31</sup> Blozhse sca bnee me, rëbchaa me:

—Nac grë miech rii, ib rienñd zho pepaa racladz zho. ¿Cho ganle ruñ zigne ruñ zho? <sup>32</sup> Lëë zho ruñ miñe ruñ grë mëedlas ne rio wguít dib ro nëz. Niicle rool xcompañer win di nguieel, ried win; niicle roolga zho di ngan, roond win. <sup>33</sup> Sac gon, ziaad Juan, ran zho rowd me grë ncuaañe nac xquielwagw zho, niicle vina ried mew; dzigo rnee zho menñox nacie me. <sup>34</sup> Blozh ga, ziaad Mgui ne pxeel Dios, ran zho row me, rie me, laa zho rneque lega rowcho me, lega riecho me vin; ib rienñd me cho rtsielsa me, haxta grë zha yozh ne rtop dimi ne razh lo zha Roma, haxta grë zha ngoopdol rzënie me. <sup>35</sup> Sca rnee zho, sangue zha ne rgaa guielbiini ne rdeed Dios, rienñ zho cho nac zha ne ziaadgun xtsiin me.

### Güey Jesús lidz tib zha farisé

<sup>36</sup> Tib dze bredz tib zha farisé Jesús güey me tib wagw lidz zho. Bdziñ me, bded me bzob me lo mezh.

<sup>37</sup> Lad guiedz co no tib wnaa ro nëz, bin me laa Jesús bdziñ lidz zha farisé co, dzigo bi me tib bot nceit nex, tiblo nceit niazha, brie me zie me nëz lidz zha co.

<sup>38</sup> Bdziñ me ga, wbig me zaatne zob Jesús, psilo me roon me. Zigse roon me, lëëque nis ne riet lo me ga, bdiib me ni Jesús, ni pcuiidz mew con guits guic me.

Dzigo ptsieelro mew, blozhse ga blee me nceit co bdëëb mew.

<sup>39</sup> Zeene gon zha farisé co sca been wnaa co, bza zdoo zho rëb zho: “Telne niaca miñe nli meñ ne ziadteed xtiidz Dios nac meñ qui, niñ me ganle tib wnaa ngoopdol i, ndeete me diidz squitaa nguëëbnia zho zhits ni me.”

<sup>40</sup> Dzigo bnee Jesús lo zha farisé co yquiaadiag zho chop lan xtiidz me, rëb me:

—Pquiaadiaga ganle Simón: Chop mgui name, quia zho guielqui lo meñ ne blediñ dimi lo zho. Tib zho zëëb gaay mil pes plat, stib zho zëëb gaay gayoow.

<sup>42</sup> Gonse meñ co ni tib zho rdziel zha quizh zho dimi co, dzigo mazd pquia zdoo me zho, beenquizhd me zho xquielqui zho. Bnë nasca dien, lo grop zha co, ¿cho mazdraa sac zdoo miñe been meñ co?

<sup>43</sup> Dzigo pquiab Simón, rëb Simón:

—Par naa, zha ne nroobraa xquielqui ga, zha co sacraa zdoo miñe been me.

—Sca gon —rëb Jesús—. <sup>44</sup> ¡Miñcopaa nagon squi rac wnaa prob qui! Gon ganle zeene bzëëb naa lidz luu, bneedzd luu nis niar ni naa; mazd me gon bdiib me ni naa, maase niicle con nis ne biin me bdiib mew, ni haxta pcuiidz mew con guits guic me. <sup>45</sup> Zeene blanso naa per ni tib bzhid bneedzd luu nquiaabdiuzh luu naa, laa me gon wlal ne blanso me nu tibaque quiat-sieelro me ni naa. <sup>46</sup> Nac costumbr none nchoob luu nceit guic naa, per been luuw; mazd mele gon biaad biadtëëb me nceit nex rii zhits ni naa. <sup>47</sup> Laa me noyñ miñ rii, sacne nlipaa rzac zdoo me ben naa me perdon grëtaa dolñox ne nzëëb me. Zigne rneque ne ga, tel zha ne zhis xtoja, zhi rzac zdoo zho zeene laa zho rac perdon.

<sup>48</sup> Dzigo bnee Jesús lo wnaa co, rëb Jesús peet tsienied guic me, laa Jesús beenle perdon grëse xtol me.

<sup>49</sup> Zha ne zobgza Jesús lo mezh ga, zeene gon zho sca rëb Jesús psilo zho rnabdiidzlsa zho, rnee zho:

—¿Cho dzigo rzac mgui qui nac me? ¿Zha nacne guiab me laa me been perdon xtol wnaa qui?

<sup>50</sup> Horco biire Jesús bnee me lo wnaa co, rëb me:

—Laa naa psilaa luu lo xtol luu, sac dib zdoo luu bna-lo luu naa. Bzë naa, peet tsieniedraa guic luu.

### Güeyseed Jesús miech dipse Galilé

**8** Bded ga, brie Jesús grë xpëëdscuel me güey me grëraa guiedz ne ndxie nëz Galilé ga, zigtaa guiedz nrooba, zigtaa guiedz wina, güey me güeynee me lo miech zha racladz Dios gban zho.

<sup>2</sup> Ye blalaa meñ wnaa güeynañ zhits zho, tel pe ncuaañe quianie grë meñ wnaa co, rdeed zhow ruñ zho xyudar me; sac rzac zdoo zho beenguiac me zho. No zho beenguiac me lo guielguidz, nogaa zho beñcxoon me menñox ne nosacsi zho. Ga güeynañ tib wnaa lë Marí Magdal (lëë wnaa co beñcxoon Jesús gadz menñox ne nosacsi me), ga güeynañ stib meñ lë Zhuan (lëë tsieel Chuz ga, meñ ne quianap grë lo xtsiin rey Herod) ni stib meñ lë Susan.

### Nac Xtiidz Dios zig zhubxtil

(Mt. 13:1-23; Mr. 4:1-20)

<sup>4</sup> Tib dzew, miech guizhiu ne pcaalsa lo Jesús; nzian guiedz ne brie zho bdziñ zho lo me. Laa me noseed zho, zeene bzodiidz me tib cuent rii lo zho, rëb me:

<sup>5</sup> —Tib mgui name, brie zho güey zho gon zhubxtil. Zeene laa zho quialaañ zhob co liu, now bliaañ gax ro nëz, now bliaañ lad quie, nogaaw bliaañ len yag guiets. Miñe bliaañ ro nëz ga, zha ne bded bzëni zhow, blozh ga güeyaque grë mguin dow maw. <sup>6</sup> Miñe bliaañ zaatne nac lad quie, blana per znuse bidza sac guienñd gop ga. <sup>7</sup> Miñe bliaañ len yag guiets co, zigne blana blanaque stib dzoon yag guiets, znuse bnitlo yag guietsa.

<sup>8</sup> Sangue miñe bliaañ zaatne nac niapse lo liu, blana, brooba, ndzon goca, tib tib zhob ne biab liu ga now goc haxta tib gayoo zhob.

Blozhse bzodiidz me cuent co, nguiedz bnee me lo zho rëb me:

—¡Zha ne racladz guiñ miñe rne naa, yquiaadiag zhow!

<sup>9</sup> Dzigo wbig grë zha ne nac xpëedscuel me, bnabdiidz zho lo me dien zha nac cuent co. <sup>10</sup> Rëbchaa me lo zho:

—Tel to, Dioszhal rlu lo to ganle zha rnabey me, nicle ncuane mazdraa ngeetsa; sangue grëraa zha ne squi gard gbig lo me, niapse con cuent rzodiidz naaw lo zho, parne guiñ zhow; per niicle scaw, ib rzoobdiagd zhow, ib rioguicd zho zha naca.

<sup>11</sup> Znu gon nac cuent co: Zhobxtil co nac Xtiidz Dios. <sup>12</sup> Ro nëz ne sca bliaa zhoob co, ga rlu ganle zha rzac zha ne rquiaadiag Xtiidz Dios, per znusaque rdziñ mendox rquiil ma zho gliladzd zhow, zeena laad zho lo dol. <sup>13</sup> Lad quie ne bliaa spalala ga, ga rlu zha rzac zha ne rley rquiaadiag Xtiidz Dios, rley zho rcaania zhow, per rcaaniid zhow dib zdo zho. Nli riladz zhow paladze, per zeene ran zho zha ruñ miech zho, zha rnee miech lo zho, rsaanga zhow. <sup>14</sup> Nogaa zho nac zig leñ yag guiets co. Rquiaadiag zho Xtiidz Dios, per laa ne tsoniew guic zho, leñ rsilo zho grë zhgab ne dien zha gapchen cho, dien zha gdeedguxt xcuerp zho lo guidzliu rii, miñ co rionie guic zho; pa së zho gban zigne rnabey Dios. <sup>15</sup> Laa lo liu naal co, ga rlu ganle zha rzac zha ne nguudz zdo. Zeene rquiaadiag zho Xtiidz Dios, dib zdo zho rcaania zhow, dib zdo zho riladz zhow. Grëse ncuane ruñ zho, ndzinli rrieequiaw; sac tiblque rac zho.

#### Xcuent biini

(Mt. 12:46-50; Mr. 3:31-35; 4:21-25)

<sup>16</sup> Blozh ga, bnee me lo grë miech ne ndxie ga, rëb me lo zho:

—Tsod zha ne yquiaagui tib biini, lozh ga ctoos zho pe cos low, gzolangaa zhow tib zhan lon. Sac biini ne rquia, glaa rzoba par gziiniw leñ yu, zeena guiab biini lo grëse zha ne sëeb leñ yu. <sup>17</sup> Scaque nagon, grë ncuane rac ngeets, grë ncuane rnee miech zhliian, none xoobneña.

<sup>18</sup> Wen wen golquiaadiag miñe rne naa, ni goitsoxcow. Sac zha ne tsoxcow, zdedraa Dios guiebiini lo zho; sangue zha ne tsoxcoda, haxta tel palalse guiebiini ne rzac zho quianie zho, stiche mew.

<sup>19</sup> Dze co, scaque noseed me miech, zeene bdziñ xniaa me ni zha bets me ziegan zho me. Per brielod ndziñ zho haxta lo me, sac miech guizhiu ne ndxie lo me ga. <sup>20</sup> Dzigo rëb tib zho lo me:

—Laa xniaa luu gon, ni zha bets luu bdziñ ley ziaadguib zho luu.

<sup>21</sup> Pquiab me rëb me:

—¿Xnia naa ye, bets naa ye? Grëse zha ne gon rquiaadiag Xtiidz Dios ni rioxco zho mban zhow, lë zha co nac xniaa naa, zha co nac bets naa, zha co nac bzian naa.

#### Pcuëez Jesús tib medox

(Mt. 8:23-27; Mr. 4:35-41)

<sup>22</sup> Tib bdze dze, bzëebnie Jesús xpëedscuel me tib len barcw, rëb me lo zho, tedquia zho stib nëz ro nis co.

<sup>23</sup> Laa zho zie lo nis co zeene laa me gootguies. Tibaque zeene psilo brie tib medox, masaque riasoli lo nis co, zootle laa barcw ne no zho ga yguiitsle leñ nis. <sup>24</sup> Zeene gon zho scataa ntseeb rac lo nis co, lëelëd güey zho güeycuaan zho me.

—¡Maestro! —rëb zho—. ¡Blee mcaallo luu ganle, laa ne nonitlo lo nis rii niina!

Dzigo guche me bnee me lo me co, ni bnee me lo nis co. Zigne bnee me, dzese biac me, dzese bre nis co.

<sup>25</sup> Dzigo rëbchaa me lo zho:

—¿Pe nacre rdzieb to? ¿Niacxe riladzde to Dios dib zdo to?

Ne nligaa rdzieb zho, ni lala rzee zdo zho, rnabdiidzla zho rnee zho:

—¿Bay cho nac me? ¿Zha nacre haxta me, haxta nis ron xtiidz me?

#### Meñ Gadar ne nosacsi mendox

(Mt. 8:28-34; Mr. 5:1-20)

<sup>26</sup> Bdziñ zho stib nëz ro nis co, ga nac xtan zha Gadar. Zo zho ga, nëz dan squi riaan xtan zha Galilé. <sup>27</sup> Laa Jesús bietzde leñ barcw, zeene laa tib mgui ne no nëz co bdziñ lo me. Mban rlu mgui co nosacsi mendox me, niicle xab me nacwdraa me; ib rbëzd me lidz me, niapse grë leñ xpa ngutoo rio me. <sup>28</sup> Zeene gon me Jesús, masaque roptsie me bdziñ me pquiitgzhib me lo Jesús, zëeb tsi me rnee me:

—¡Psaan naa Jesús! Nanpaa naa gon Xpëed Dios nroob ne zob gbaa nac luu. ¡Bzhiguie! csacsid luu naa!

<sup>29</sup> Per mendox co sca rnee, sac hor co laa Jesús bnabeyle ma csaan ma me. Ziele dze sca nosacsi ma me, ntseeb rac me, niicle rzoob zho caden ni me, rzoob zho caden nia me, parne paat tsied me, znuse rchug mew; dzigo rienie mendox co me rquianzë me grë dan ngan, zaatne choot miech guiñd.

<sup>30</sup> Dzigo bnabdiidz Jesús lo ma dien cho lë ma.

Pquiab ma rëb ma:

—Legion lë no.

Sca rëb ma sac nzian nac ma no ma zdo mgui co.

<sup>31</sup> Ni bnab ma lo Jesús gzonëzd me ma lo ncowdoo ne nora ma ne nacgrë ma. <sup>32</sup> Gaxaque ga ndxie tib dzoon nguts notop lag, bnab ma gdeed me diidzbey lose grë nguts co gdziñ ma. Dzigo bdeed me diidz.

<sup>33</sup> Horco laa grë mendox co psaan mgui co, güeysëeb ma zdo grë nguts co. Psilo grë nguts co rquiaa ma corr, güeypix ma tib ro yeedox ne quia ro nis co, bliaa ma haxta lo nis; grëse ma gut.

<sup>34</sup> Grë zha ne quianap nguts co, bzhoon zho, rias zho güeyzodiidz zhow lad guiedz, ni grëraa yu ne zob gax ga. <sup>35</sup> Nacre brie grë miech co ziewi zho. Zeene bdziñ zho, per nli bdzieb zho gon zha laa meñ co zob gax lo Jesús, laa me nacwxable, rlu niinile nac guic me. <sup>36</sup> Psilo grë zha ne gon zha biac me rzodiidz zhow lo grë zha

ne bdziṅ ga. <sup>37</sup> Mazdraa bdzieb grë miech co bin zhow, dzigo mazd bnaab zho lo Jesús siguieḷ me gbi me xtan zho.

<sup>38</sup> Zeene laa Jesús zie sëëb me leṅ barcw par gbi me ga, dzigo wbig mguì co rnab me lo Jesús siguieḷ Jesús tsienal me zhits Jesús; per bzhiguieḷd Jesús nienal me, rëb Jesús lo me:

<sup>39</sup> —;Biaaṅ! Güey, güeyzodiidz lo grë menlidz luu ganle zha nactaa milagr ne been Dios beṅguiac me luu.

Dzigo wbire meṅ co. Güey me lad guiedz, grëse lo miech güeyzodiidz me zha nactaa guieḷnzaac ne been Jesús ga, beṅguiac Jesús me.

### Brieaban tib xpëdwanaa tib meṅ lë Jair

(Mt. 9:18-26; Mr. 5:21-43)

<sup>40</sup> Zeene laa Jesús biire bdziṅ stib nëz ro nis co, miech guizhiu ne quiambëz me ga, rley zho goṅ zho laa me bdziṅ. <sup>41</sup> Loxaque bdziṅ me, laa tib meṅ ne rnabey yadoo lë Jair wbigle pquiitsgzhib lo me. Rnab Jair siguieḷ me tsienal me lidz Jair tsiegunguiac me tib xpëdwanaa win Jair.

<sup>42</sup> Nzhoo rac mëed co, tib mëed tsiipchop iza, ni lëese mëed ga lo me.

Dzigo laa Jesús zie nëz lidz meṅ co. Miech guizhiu ne zienal zhits me, haxta rtaagw zho me. <sup>43</sup> Lad grë miech co zienal tib wnaa rzacnë, gocle tsiipchop iz rlan me tib guieḷguidz, rzac me zigne rzac grë meṅ wnaa gzob mëë; tibaque rlan mew ib rbëzda. Grële ncuaaṅ rap me bloozh me lo grë meṅ ne ruṅ rmed, per ni tib zho ruṅguiacd me. <sup>44</sup> Laa me no lad co, tibaque wbig gax me nëz zhits Jesús, bzheṅ me ni lar ne mbix Jesús; hor cogazha laa me biac. <sup>45</sup> Bien Jesús sca bzheṅ wnaa co lad xab me, dzigo rëbchaa me:

—;Cho ga bzheṅ lad xab naa?

Grëse zho rnee led zhada. Dzigo rëbchaa Pedr lo me: —Maestro, wi ganle zha ndaagwtaa ziaad luu lad grë miech rii, haxta rcheep zho luu, ;zha naṅ luu choot xenḷ lad xab luu?

<sup>46</sup> —Per no cho bzheṅ lad xab naa —rnee me—, sac bienpaa naa beṅguiac naa zho.

<sup>47</sup> Zeene goṅ wnaa co bien Jesús sca bzheṅ me lad xab me, rdzieb me laa me wbig pquiitsgzhib me lo Jesús. Squi ndxie grë miech co, bzodiidz me zha nacne sca been me, ni zha zigne bzheṅ me lad xab Jesús laa me biac. <sup>48</sup> Dzigo rëbchaa Jesús lo me:

—Xin, laa luu biac sacne dib zdoo luu bnalo luu naa. Bzë na, peet tsieniedraa guic luu.

<sup>49</sup> Laa Jesús bii quianeeque lo wnaa co, zeene laa tib zha ne nac mandad ziaad nëz lidz Jair bdziṅ, rëb zho lo Jair:

—Csodziindraa luu lo meṅ qui, laa xpëed luu gutle.

<sup>50</sup> Zeene goṅ Jesús sca rëb zha co, rëbchaa me lo Jair: —Peet tsienied guic luu. Dib zdoo luu bnalo Dios, zeena peet gacd xpëed luu.

<sup>51</sup> Bdziṅ zho lidz Jair, psaandraa Jesús nal grë miech co zhits me ndziṅ zho zaatne nix mëed co. Loxaque Pedr, Jacob, ni Juan, pxoz win ni xniaa win bzëëbnie me

leṅ yu ne nix win. <sup>52</sup> Grë miech ne ndxie ga, roon zho no zho xquieḷnë win; dzigo rëbchaa Jesús lo zho:

—Goonde to; sac goṅ nixguiesse mëedwin rii, gute win.

<sup>53</sup> Psilo zho leḷ rzhidznie zho me, sac naṅpaa zho gutle win. <sup>54</sup> Dzigo wbig me, bzheṅ me nia win, nguiedz bnee me lo win, rëb me:

—;Guche i na, ndzoop yeṅ!

<sup>55</sup> Zigne sca bnee me, laa mëed co brieaban, laa win guche ga; dzigo bnabey me bguiaaṅ zho win.

<sup>56</sup> Zigtaa pxoz wina, zigtaa xniaa wina, per nli rley me. Dzigo pso Jesús diidz lo me, choot lo gzodiidz me zha brieaban win.

### Pxeeḷ Jesús xpëedscuel me güeyseed zho miech

(Mt. 10:5-15; 14:1-12; Mr. 6:7-29)

**9** Tib dze bredz Jesús gza tsiipchop xpëedscuel me, pxeeḷ me zho tsienee zho lo miech gacnaṅ zho zha racladz Dios gban zho; bdeed me poder lo zho guṅcxoon zho grë meṅdox ne nosacsi miech, ni guṅguiac zho grë meṅ rzacnë.

<sup>3</sup> —Goḷtsie —rëb me lo zho—. Per ib güeyde to ncuaaṅ yquiiṅ to nëz. Zig nac dimi, zig nac ncuaaṅ gow to, pe bziuud, pe baxtongaa, güeyde tow; xab tow, miṅe nacwse to miṅcose goḷtsienie. <sup>4</sup> Guiedz ne gdziṅ to, zha ne gneedz zaatne cuëz to, lidz zha co goḷcuëz, haxta gdziṅ dze ne gbi to guiedz co. <sup>5</sup> Per telne gdziṅ to tib guiedz, nëd miech yquiaadiag zho miṅe zienee to, dzigo gollit grë yudie co ni to, goḷrieegazh ga, zeena guieṅ zho ganle doḷ ga been zho lo Dios, nëd zho ycaania zho xtiidz me.

<sup>6</sup> Dzigo laa zho briea, laa zho zie. Grëse guiedz ne ndxie dib gax ga, güey zho güeynee zho Xtiidz Dios lo miech, ni beṅguiac zho grë meṅ rzacnë.

<sup>7</sup> Bin rey Herod rzeet zho Jesús, sac tel pa lotaaw zëëb diidz grëtaa milagr ne ruṅ me. Grë miech co, no zho rzac Juan Bautist ga brieaban, lëë me ga nac Jesús; <sup>8</sup> nogaa zho rnee bod Líw, meṅ ne biadteed xtiidz Dios padzeela, me ziaad stib; zzhisgaa zho rnee no cho stib meṅ biadteed xtiidz Dios padzeelaw, sinque brieaban me gane ziaad me stib.

<sup>9</sup> Zeene ron Herod rnee grë miech co lëë Juan ga, rio me zhgab, rnee me:

—;Bay cho nac meṅ co? Per gacda Juan; naazhal name bnabey pchug zho yaṅ Juan.

Racladz Herod tebaa zha gan me Jesús.

### Bguiaaṅ Jesús gaay mil miech

(Mt. 14:13-21; Mr. 6:30-44; Jn. 6:1-14)

<sup>10</sup> Goc bla dzew, laa grë zha ne pxeeḷ Jesús ga wbire bdziṅ lo me. Blozhse bzodiidz zho lo me grëse tel zha güey zho, dzigo güeynie me zho tib lugar riaaṅ gax guiedz Betsaid.

<sup>11</sup> Zeene bin grë miech co laa me briea, dzigo brieenaḷ zho me, bdziṅ zho lo me ga. Zeene goṅ me zho, rley me pcaania me zho, bnee me lo zho zha racladz Dios gban zho, ni beṅguiac me grë zha ne rzacnë. <sup>12</sup> Laa dze rdzelew, wbig gza tsiipchop xpëed-

scuel me rëb zho lo me, mazd gnee me lo grë miech co gbi zho ga; zeena guiob tsie zho grë guiedz las, grë yu ne riaan gax ga, yguib zho dien pa cuëz zho, yguib zho dien pe gow zho; sac choot miech nod ga.

<sup>13</sup> Dzigo rëbchaa me lo zho:

—To goldeed ncuane gow zho.

Pquiab zho rëb zho:

—Gaayaque quietxtil ni chop me| ziaadnie no nu, jpe rnase ncuane co lo grëtaa miech qui! Niicle niaca miñe gziuu ncuane gow zho, pe zhidaa dimi yquiin, ¿pa guioxí now?

<sup>14</sup> Nligaa miech tafa, zig gaay mil rgaa loxaque zha bguise. Dzigo bnabey me zho güey zho, güeynee zho lo grë miech co sob zho, cue zho gro| gayooga, gro| gayooga zho tib lugar. <sup>16</sup> Laa grë miech co bzob, dzigo bzheñ Jesús gza gaay quietxtil co ni grop me| co, blis lo me nëz gbaa, bdeed me xquizh lo Dios. Blozhse ga, beengro| me gza quietxtil co, me| co ne, dzigo zigse rdeed mew lo xpëedscuel me, scase scase rguizh zhow lo grë miech co. <sup>17</sup> Grëse zho dow haxta zaataa bieltaa zdoo zho; ni zeene blozh dow zho, biodzë tsiipchop chicuid bio grë miñe biaan.

### Bnee Pedr cho nac Jesús

(Mt. 16:13-19; Mr. 8:27-30)

<sup>18</sup> Tib dze biche Jesús lo miech palal, güey me tib zatne güeyzodiidnie me Dios; loxaque xpëedscuelse me güeyna| zhits me. Ga bnabdiidz me lo zho rëb me:

—¿Cho dien ron to rnee miech nac naa?

<sup>19</sup> Pquiab zho rëb zho:

—No zho rnee Juan Bautista, nogaa zho rnee Líw (meñ ne biadteed Xtiidz Dios padzeela); nogaa gro| zho rnee no cho stib meñ ne biadteed Xtiidz Dios padzeelaw, sinque brieaban me gane ziaad me stib.

<sup>20</sup> —¿To waa? —rëb me lo zho—. ¿Cho rzac to nac naa?

Horco pquiab Pedr, rëb Pedr lo me:

—¡Luu nac Meñ ne zëëble diidz ga cxeel Dios!

<sup>21</sup> Dzigo pso me diidz lo zho choot lo gneed zhow.

### Bzeet Jesús zha guñ miech me

(Mt. 16:21-28; Mr. 8:31-9:1)

<sup>22</sup> Tib vult bzeet Jesús lo grë xpëedscuel me zha csacsi miech me. Rëb me, nroob grë ncuane cteed zho me; grë zha non lo menguedz, grë pxoz rnabey, grë zha ne rseed miech ley, ible stsidil| zho me, ni haxta zut zho me; per zeene gac tson ngbidz gut me laa me grieaban.

<sup>23</sup> Ni rëb me lo grë miech ne ndxie lo me ga:

—Zha ne racladz sëëb xnëz naa, none cueeladz zho zho, none lëb zho gzataa dze guiaadna| zho miñe rnabey naa, niicle tel| miñ co yquiaaqui csacsi miech zho. Nodne yquia zdoo zho xquielmban zho, <sup>24</sup> sac zha ne yquia zdoo xquielmban, le| znu nitlo zho; sangue zha ne sca cueeladz xquielmban porne no zho xnëz naa, ib zgaa zho tib guielmban ne gdziñd dze lozh. <sup>25</sup> Zha ne zienie guic loxaque gapchen, ¿pa dien yquiina lo zho, tel| por lëw rsacsi zho zho, tel| lëw yquiaaqui guey

zho gabil|? <sup>26</sup> Naa ne nac naa Mgui ne pxeel Dios, zha ne ctoladz guiab zho laa zho no xnëz naa, ctoladzniegaa zho xtidz naa; scaque naa stoladznie naa zho gal dze ne laa naa guial| stib. Dze ne guialnie naa grë xanj| Pxoza naa, guiallu naa guielndzon ne rap me.

<sup>27</sup> Blozhse sca bnee me, rëbchaa me lo grë miech co:

—Ni gni naa lo to ganle, nzian grë zha ne ndxie nu niina, ib tedsod bii zan zho zeene laa Dios glu zha rnabey me.

### Bdzëëlo Jesús

(Mt. 17:1-8; Mr. 9:2-8)

<sup>28</sup> Goca maase xon ngbidz, güey Jesús tib guic gui gza me Pedr, Jacob ni Juan; laa me zie ga ziezodiidnie me Dios.

<sup>29</sup> Laa me nozodiidnie Dios, zeene laa me bdzëëlo. Masaque biinidoo ne rriee lo me, xab mew, nquitsbie rnaw, haxta rquiabniw. <sup>30</sup> Tibaque briequia Lí grop Moisés bdziñ lo me ga, psilo zho nozodiidnie zho me grë guielnë ne cteed miech me Jerusalén, zeene laa me gbi lo guidzliu. Masaque biinidoo ne riab, ncuane gzee zdoo new.

<sup>32</sup> Laa zha ne ziena| zhits me, rcow zho mcaal| zob zho ga; per zeene biab biini nroob co, hor co bzhal lo zho goñ zho zha rlu me gza me Lí ni Moisés. <sup>33</sup> Laa grop meñ co ziebiche lo Jesús, zeene rëb Pedr lo me:

—Maestro, ¡wena goñ tebaa gbiaaz ne nu! Na maase gzaa no tson yu yag xiid win, tiba cuëz luu, tiba cuëz Moisés, stiba cuëz Lí.

Per niicle Pedr rien daque dien pe nacne sca rnee Pedr.

<sup>34</sup> Laa Pedr bii quianeeque, zeene bre tib xcow zatne zo zho ga; per nli bdzieb zho goñ zho laa zho biaan leñ xcow co. <sup>35</sup> Dzigo bin zho zëëb tib tsi meñ co lo xcow co, rnee me:

—Lëë Xpëed naa i goñ, rleynie naa me. Golgon miñe rnee me.

<sup>36</sup> Zeene blozh bin zho tsi meñ co, goñ zho loxaque Jesússe zo ga.

Grëse miñe goñ zho ga, ib choot lo bneed zhow leñ dze co.

### Biac tib mëed ne nosacsi menodox

(Mt. 17:14-21; Mr. 9:14-29)

<sup>37</sup> Biini liu co, laa Jesús wbi guic gui co gza me zha ne güeynie me ga. Miech guizhiu ne güeydzieelo me.

<sup>38</sup> Lad grë miech co brie tib mgui, wbig me lo Jesús rëb me:

—Maestro, bzhiguiel| bui ganle zha rac xpëed naa. Tibaque mëëdbgui rii nac mëed lo naa, <sup>39</sup> ni na laa menodox nosacsi win. Zeene rdziñ ma rcoptsiedan ma win, rroñ ma win liu, ga nix win runcxidz ma win, ni masaque rdzib mtsiñ ro win; nen rsaan ma win.

<sup>40</sup> Blansonie naa win nu, bnab naa lo xpëedscuel luu guñcxoon zho menodox co, per brieelod zho.

<sup>41</sup> Dzigo rëbchaa Jesús:

—¡Pe nac squitaa miech ntseeb nac to, ib nëde to gnalo to Dios! ¿Pa lal dze ne so naa gne naa lo to?

¡Ncuaane cxe wdraa naa lo to squitaa nac to! Dënie xpëed luu nu —rëb me lo meñ co.

<sup>42</sup> Zeene laa mëed co ziegax lo Jesús, hor co bron meñdox co win liu, nix win ga masaque rzhidz win. Dzigo goctox Jesús lo ma, beñcxoon me ma. Horcogazh biac mëed co, laa me bdeed win lo pxoz win. <sup>43</sup> Grë miech ne ndxie ga, per nli rzee zdoo zho gon zho scataa nroob poder ne rap Dios.

Grëse miech ne ran grëtaa milagr ne run Jesús, rzee zdoo zho.

### Bzeet Jesús stib laa miech csacsi me

(Mt. 17:22-23; Mr. 9:30-32)

<sup>44</sup> Biire Jesús bzeet me lo xpëedscuel me zha gun miech me, rëb me:

—Wen wen golquiaadiag miñe gni naa lo to nu ganle. Naa gon ne nac naa Mgui ne pxeel Dios, ible zielo zho naa ladznia miech.

<sup>45</sup> Per ib rien d zho zha nacne sca rnee me, sac gard gdeed Dios diidzbey hor co guien zho zha naca; niicle par gnabdiidzгаа zho, rdzieb zho gnabdiidz zhow lo me.

### ¿Cho nonraa?

(Mt. 18:1-5; Mr. 9:33-40)

<sup>46</sup> Horco psilo zho noneelsa zho dien cho tib zho gac zha non.

<sup>47</sup> Bien Jesús sca no zho, dzigo bnee me lo zho, bredz me tib mëedbgui win, <sup>48</sup> rëb me:

—Grë zha ne no xnëz naa, zha ne guñcas tib mëedwin zig mëed rii, gleynie zho win, rrieequia naa ga rleynie zho. Ni zha ne gleynie naa, rrieequia meñ ne pxeelle naa ga rleynie zho. Telne racladz to gacnan to dien cho nac zha non, gacnan to ganle, zha ne tsoxco gac zig tib ngundziin lo samiech, zha co nac zha non.

<sup>49</sup> Blozh ga, rëbchaa Juan lo me:

—Maestro, bdziön no tib zha co gon bzeet zho lë luu zeene beñcxoon zho meñdox, nacne nli blisqui now lo zho, sac led yed zho nacgrë ne.

<sup>50</sup> Dzigo pquiab me, rëb me:

—¡Guñscade to! Sac gon zha ne racnie ne, grieelod lëëque zha glëënie ne.

### Ndox Jesús lo Juan grop Jacob

(Mt. 8:19-22)

<sup>51</sup> Len dze ne ziaadyob gbi Jesús lo guidzliu rii, len dze co bio me nëz laa me zie nëz Jerusalén. Tiblique bio guic me, ib pquiad zdoo me, laa me zie. <sup>52</sup> Zeene bdziñ me xtan Samar, pxeel me bla zho bdedner zie zho tib guiedz win ne ndxie nëz co, par dien pa lo gdeed miech co cuëz me. <sup>53</sup> Bdziñ zho guiedz co, choot bzhiguiel d ndeed zaatne mbëz me; sac bien zho nëz Jerusalén tsie me. Nac zha Samar, rlëënie zho zha Israel.

<sup>54</sup> Zeene bin Jacoba grop Jacob Juan, blëe guic zho, rëbchaa zho lo me:

—Maestro, ¡mazd tibaque gotsaa gnab ne gliaa! gui lad grë miech rii, zeena nitlogazh zho!

<sup>55</sup> Biecwaque me, goctox me lo zho rëb me:

—Rien d to lëe zhapaa nac meñ ne nacnie to.

<sup>56</sup> Golguien ganle, naa ne nac naa Mgui ne pxeel Dios, ziald naa par gnitlo naa miech, sinque laa naa zial csi-laa naa zho lo dol.

Ga brie zho güey zho stib guiedz.

<sup>57</sup> Nëz zie zho, zeene wbig tib mgui co rëb me lo Jesús, laa me racladz tsienal me zhits Jesús, tel pa lotaa nac zaatne tsie Jesús. <sup>58</sup> Dzigo pquiab Jesús rëb Jesús lo me:

—Gocnaña ganle, naa ne nac naa Mgui ne pxeel Dios, peet rapd naa nu, mazd zig nac grë mëz, grë mguin, rap ma zhibliee ma, rap ma zhiptsieez ma; per naa per ni zaatne gagues naa quianied naa.

<sup>59</sup> Laa zha ne bredz me tsienal zhits me, pquiab zho rëb zho:

—Sënal naa zhits luu, per bzhiguiel bneedz diidzbey cuëz naa, gangazh naa tsoliu pxoz naa.

<sup>60</sup> Rëbchaa me lo zho:

—Nzian grë zha gut no, psaan tsow tsie samengut zho tsiequeets zho. Sangue luu zhits naa dënal, zeena tsie luu tsienee luu lo miech, gacnan zho zha racladz Dios gban zho.

<sup>61</sup> Pquiab stib zho rëb lo me:

—Maase sënal naa zhits luu, per bneedz diidz ganiegazh naa diidz lo grë meñlidz naa.

<sup>62</sup> Dzigo rëbchaa me:

—Zha ne xen nia rad ni csilo zho gwi zho nëz zhits zho, niacxe zrieelo ygan zho ngon. Scaque zha ne sëeb xnëz Dios, grieelod sëeb zho telne mazdraa rleynie zho grë ncuaan lo guidzliu rii.

### Güey tsongaltsii zha ne güeynee Xtiidz Dios

(Mt. 11:20-24)

**10** Tib dze, ble Jesús stongaltsii zha ne rquiaadiagle zhiwseed me, bnabey me tedner zho lo me tsie zho grë guiedz ne no ted me, pxeel me zho chopga chopga zho.

<sup>2</sup> —Golnab lo Dios —rëb me—, cxeelraa me zha ne gun xtsiin me. Sac ne nligaa ndaldoo miech ne quiambëz yquiaadiag Xtiidz me, zha ne gneew lo zho rgaad. <sup>3</sup> Goltsie sca, per nsin nsin golso. Golguien ganle rrieequia nac to zig cho mëcwxiil yeen, ni laa naa rxe! to zaatne no grë coyot dox. <sup>4</sup> Peet güeyde to, güeyde to dimi, güeyde to ncuaane gow to, lab tow, miñe quise ni to miñcose goltsienie.

‘Miech ne yquiaabdiuzh to nëz, sode to dieen zharaa yquiaabdiuzh to zho. <sup>5</sup> Zeene yguib to zaatne cuëz to, yu ne gdziñtaa to, golnab gunlay Dios grë zha ne no yu co. <sup>6</sup> Telne squiaadiag zho miñe rnee to, zunlay me zho; telne nëdgaa zho yquiaadiag zhow, dzigo toque gunlay me. <sup>7</sup> Zha ne gneedz zaatne cuëz to, lidzse zha co golcuëz, tsiede to stib yu stib yu; guielwagw ne gneedz zho lo to, ctoladzde to golgowa; sac gon zha ne run dziin, ib none ycaa zho miñe non xtsiin zho.

<sup>8</sup> ‘Guiedz ne yquiaadiag miech miñe zienee to, zaacse golgac lo zho, tel pe guielwagw ne gneedz zho, golquiina; <sup>9</sup> golgunguiac grë meñ rzacne ne no ga. Golguiab



lo zho, laa dze ne nolu Dios zha sēēb miech xnēz me, laa dze co bdziñle. <sup>10</sup> Sangue guiedz ne siguiēld miech yquiaadiag zho miñe zienee to, goḷrieē grē ro xnēz zho, <sup>11</sup> ganḷo zho glit to grē yudie co ni to, zeēna guieñ zho ganḷe nēz ne nitlo zho ga zie zho. Goḷguiab lo zho, zha bguiba, sac binpaa zho zha grieelo sēēb zho xnēz Dios ni nēd zho gon zho diidz. <sup>12</sup> Gacnañ zho ganḷe, gaḷ dze ne guñ Dios xquieḷwxtis me, lēētaa gac guieḷñē ne tsieguiaḷ zha Sodom, mazdraa nac guieḷñē ne tsieguiaḷ zho.

<sup>13</sup> Scadaa nac zha Corazín ni zha Betsaid. ¡Probsaxe zho, sac goñ goñpaa zho grē milagr ne ruñ Dios, per ib psaañd zho xquieḷntseeb zho! Teḷ niaca miñe ngaa grē meñ Tiro, grē meñ Sidón, niañ grē milagr ne goñ zho, ib ndedsod mban niac grē zha co nio zho guieḷñē, zēēb nsaan zho xquieḷntseeb zho mbig zho lo Dios.

<sup>14</sup> Gacnañ zho ganḷe, gaḷ dze ne guñ Dios guieḷwxtis, lēētaa caxtigw ne ygaa zha Tiro ni zha Sidón, mazdraa miñe ygaa zho. <sup>15</sup> Scaque zha Capernaum, masaque rzac zho niina zha nziuuraa lo Dios, per gacnañ zho ganḷe haxta quiet leñ gabiḷ ga guey zho.

<sup>16</sup> Blozhse sca bnee me, rēbchaa me lo zho:

—Grēse zha ne yquiaadiag miñe gnee to, rrieequia naa ga rcaania zho. Zha ne nēdga ycaania to, rrieequia naa ga nēd zho ycaania zho; ni zha ne nēd ycaania naa, rrieequia meñ ne pxeel naa ga nēd zho ycaania zho.

### Wbire tsonḡalṡsii zha ne pxeel Jesús ga

(Mt. 11:25-27; 13:16-17)

<sup>17</sup> Zeēne laa gza tsonḡalṡsii zha co wbire, rley zho bdziñ zho lo Jesús. Rēb zho haxta grē meñdox bdzieb ma zho, zeēne bzeet zho lē me.

<sup>18</sup> Dzigo pquiab me rēb me lo zho:

—Haxta ma ne rnabey lo ma, goñpaa naa goñ brinḡgaa ma, biab ma zig riabse tib belye. <sup>19</sup> Laa naa bneedz poder qui lo to, parne gdeete to diidz guñ ma miñe racladz ma; grē meelḡdox, grē meegu ntseeb, niicle gzoobni to ma, peet gacde to. <sup>20</sup> Nli laa to ruñcxoon meñdox niina, per gleyde to por miñ co, sinque mazd goḷley porne laa lē to zhooble lo Dios, laa to ngable lo me.

<sup>21</sup> Horco biaad tib guieḷbley nroob zdoo Jesús, bnee me lo Dios, rēb me:

—Papá, luu nac meñ ne rnabey gbaa, luu nac meñ ne rnabey guidzliu, rnedz naa xquizh lo luu, sac grē miñe noyuñ luu nu niina, bdeete luu diidz niacnañ grē zha raca, sinque laaw blu luu lo grē zha ne nac zig grē mēēdḡlas. Sca quiayuñ luu, sac ib scale racladz luu gaca.

<sup>22</sup> Blozh ga rēb me lo grē miech ne ndxie lo me ga:

—Grēse ncuaañe rañ to quiayuñ naa, Dios meñ ne nac Pxoḡ naa, me bneedz poder rii lo naa; sac ib laa me bzo naa, naa guña. Xpēēd me nac naa, wen wen ruñbey me naa, scagaa naa wen wen ruñbey naa me. Choot ruñbeyd me zigne ruñbey naa me, per zha ne gded naa diidz guñbey me, zuñbey zho me.

<sup>23</sup> Dzigo rēbchaa me lo xpēēdscuel me:

—Dichos to bgaa to noyañ to grē miñ rii. <sup>24</sup> Sac goñ blactaa zha ne biadteed xtiidz Dios padzeela, haxta grē zha ne bnabey leñ dze co, bzoobladz zho niañ zho grē ncuaañe noyañ to, bzoobladz zho nquiaadiag zho grē ncuaañe noquiaadiag to.

### Xcuent tib zha Samar

<sup>25</sup> Tib dze wbig tib zha ne nac maistr ley lo Jesús, bnabdiidz zho lo me, rēb zho:

—Maestro, bnē lo naa dieñ, ¿pe nac miñe guñ naa parne grieelo ygaa naa guieḷmban ndzon ne gdziñd dze lozh?

<sup>26</sup> Pquiab Jesús rēb me:

—¿Zha dieñ zho bnee lo ley? ¿Pe rnabeya?

<sup>27</sup> Rēbchaa maistr ley co:

—Znu rneew: “Dib zdoo luu, dib nacse luu, dib guieḷbiini ne no guic luu, dipse xfuers luu, bleyne Dios; ni bleyne samiech luu, zigne rleyne luu luu.”

<sup>28</sup> —¡Miñ qui nagoñ bioxco guñ luu —rēb Jesús—, zeēna ygaa luu guieḷmban ndzon ne gdziñd dze lozh ga!

<sup>29</sup> Per par glud ne noxcod me guñ me miñe rnabey ley, dzigo pquiaalo me rēb me lo Jesús:

—¿Chopaa dzigo nac samiech naa, zha ne no gleyne naa?

<sup>30</sup> Dzigo bzodiidz Jesús tib cuent lo me, rēb Jesús:

—Tib meñ wladz name brieē me Jerusalén zie me guiedz Jericó. Nēz zie me brieēquia ngbaan, bdiñ ngbaan me, mer niut ngbaan me; grēse ncuaañe ney me, haxta xab me blan ngbaan. <sup>31</sup> Laa me nix ga, zeēne laa tib pxoz bded. Zigne goñ pxoz me, biecwga pxoz bded pxoz tib lad. <sup>32</sup> Wdzeepaaw, zeēne laa tib zha ne ruñaque dziin leñ yadoo ziaad ga; scaque zigne goñ zho me, tib tib bded zho. <sup>33</sup> Sca nix me ga, zeēne laa tib zha Samar bdziñ. Zeēne goñ zho me, wbig gax zho lo me; pquia zdoo zho me goñ zho zha rna me. <sup>34</sup> Gagazh been zho me rmed, blee zho vin bdiib zho lo grē rid ne ney me, bdēēb zho nceita, pxidoo zhow. Blozhse ga, blis zho me bzoob zho me lad xcuay zho laa zho zienie me, haxta bdziñnie zho me tib yu ne rbēz miech ne zo nēz; ga blēznie zho me, pquianap zho me.

<sup>35</sup> Biini liu, zeēne laa zho brieē ga, blee zho palal dimi, lal ne non chop xtse zha ne rie dziin, bdeed zhow lo bizhuan yu co, parne yquiaanap me meñ co, rēb zho: “Peet tsienied guic luu, teḷne nroobraa guñ luu gaxt, na zeēne gbire naa dzigo quizh naaw.”

<sup>36</sup> Blozhse bzodiidz me cuent co, rēbchaa me lo maistr ley co:

—Lo gza tsonḡ zha ne nadiēñ bded zaatne nix meñ co, ¿cho tib zho bien samiech zho ga nac me?

<sup>37</sup> Pquiab maistr ley co rēb me:

—Zha ne bioñ bded gaw, sac zha co pquia zdoo me. Dzigo rēbchaa Jesús lo me:

—Sca nagoñ none guñ luu.

### Blëz Jesús lidz Mart ni Marí

<sup>38</sup> Laa Jesús no nëz gza xpëëdsuel me. Bdziñ me tib guiedz win, ga no tib wnaa lë Mart, dzigo meñ co bdeed zaatne blëz zho.

<sup>39</sup> Bdziñ zho lidz Mart, lëëlëd bzëëb Mart ro tie. Zhix-co ro tie no Mart, laa tib beñ Mart lë Marí zob noquiaa-diag grë zhiwseed Jesús. Goñ Mart rgaadraa nia Mart, dzigo wbig Mart rëb Mart lo Jesús:

—Bzhiguiel bnee lo beñ naa guiaad me guñ me xyudar naa. Bui ganle tipse naa psañ me ro tie.

<sup>41</sup> Pquiab Jesús rëb Jesús lo me:

—Aque luuw nli Mart, squitaa noxco luu dien zha gac xtsiñ ro tie luu. <sup>42</sup> No tib ncuuañe mazdraa none tsox-co luu, ni lëë miñ co nu goñ noyuh Marí; gane grielod ycaa naa miñe quiayuh me.

### Zha none gzodiidznie ne Dios

(Mt. 6:9-15; 7:7-11)

**11** Tib vult, loxaque blozh bzodiidznie Jesús Dios, wbig tib xpëëdsuel me rëb lo me:

—Maestro, bzhiguiel blu lo no dien zha gzodiidznie no Dios, zigne beñ Juan Bautist pseed me xpëëdsuel me zha gzodiidznie zho Dios.

<sup>2</sup> Dzigo rëbchaa Jesús:

—Zeeñe gzodiidznie to Dios, golguiab:

Dios, luu nac Pxoç no, zob luu gbaa;

luuse nac meñ ne mazdraa ndzon.

Luu nac meñ ne gnabey no,

miñe gnabeytaa luu, zigne raca gbaa,

scaque none gaca lo guidzliu nu.

<sup>3</sup> Beñ guieñzaac bneedz ncuuañe dioow no nadze.

<sup>4</sup> Bzhiguiel beñ no perdon grëse dol ne ziodziuh no lo luu,

zigne rdziuh no samiech no perdon grë falt ne run zho lo no.

Gdeete luu diidz yquiil mençox no,

beñ guieñzaac bla no lo ma.

<sup>5</sup> Sca nagon gnee to —rëb Jesús—. Ncuuañe gnab to lo me zneedz mew. Samiechse to name, gzoob ne wxiña, lega nacle glanso tib zha ne ndzieeldiidz to ni guieñd pe gdeed to gow zho. Dzigo tsie to lidz stib zha ne ndzieeldiidz to guiab to lo zho: “Bzhiguiel beñxtad tsonaque xcuuh luu lo naa. <sup>6</sup> Lega nacle blanso tib zha ne runbey naa, na guieñd pe gded naa yquiin zho.”

<sup>7</sup> Segur znë zho: “Gunnëete luu naa nu, dziitsle nioog ro lidz naa, nataa nixguies grë xpëëd naa; grielod gache naa gnedz naa ncuuañe racladz luu.” <sup>8</sup> Per telne sonaad to ga, ganse zho tibaque quianee to, gnid naa zho tsieched zho gneedz zho ncuuañe racladz to. Per gneedzd zhow porne ndzieeldiidz to zho, sinque laa zho gneedza porne goñ zho tibaque quianab tow.

<sup>9</sup> Scaque nagon none guñ to, zeeñe pe gnab to lo Dios. Ncuuañe rquiin to, goñnaba lo me, scagaa me zneedz mew. Golguib tel pe racladz to, me nac meñ ne gacnie to gdziel tow. Golcuedzlä me, scagaa me scaania me to. <sup>10</sup> Sac grëse zha ne rbig lo me rñab zho ncuuañe rquiin zho, rdeed mew. Zha ne rguib ncuuañe racladz

zho, racnie me zho rdziel zhow. Zha ne rbedzlä me, rcaania me zho.

<sup>11</sup> ‘Golguien ganle, zig nac to, zeeñe rñab xpëëd to tib meñ gow win, ¿niacxe ziazh to co to tib meñ nia win? <sup>12</sup> Zeeñe rñabgaa win tib dzit, ¿niacxe zgo to tib meegu nia win? <sup>13</sup> Led rioxco to lëë niapse ncuuañe wen rdeed to lo xpëëd to, niicle ne miech ntseeb nac to. Telne sca rioxco to xpëëd to, peleñ Pxoç to dzigo, meñ ne zob gbaa, tsoxcod me to. Ib tedsod grëse zha ne gnab lo me gdeed me ncuuañe rquiin zho, zdeed mew; haxta zha ne gnab cxeel me Espiritu Sant gacnie zho, zuñ me miñe gnab zho.

### Rëb zho mençox nacie Jesús

(Mt. 12:22-30, 43-45; Mr. 3:20-27)

<sup>14</sup> Tib vult beñcxoon Jesús mençox ne nosacsi tib mgui co. Ib gacd gnee mgui, sac psañ ngop ma mgui. Dzigo zigne beñcxoon Jesús ma, laa mgui psilo bnee. Grë miech ne ndxie ga, bzee zdoo zho goñ zhow. <sup>15</sup> No-gaa zho rnee, Beelzebú ma ne rñabey lo mençox, ma co nacie me gane rrieelo runçxoon me mençox.

<sup>16</sup> Brieequia spalal zho, rñab zho lo me guñ me pe stib milagr, parne gliladz zho nli Dios pxeel me.

<sup>17</sup> Bien Jesús zha rza guic zha ne noneenë me ga, dzigo rëbchaa me lo zho:

—ñNcuuañe gacd goñ rnee to! Tel tib guiedz nadien, csilo miech, lëëque zha tiñie menladz zho, ¿niacxe nitlod guiedz co? Tib diigaa miecha, tel lëëque zha tiñie menlidz zho, led znuse lëë nitlo dii co. <sup>18</sup> Scaque mençox nagon, telne lëëque lëë ma guñcxoon samençox ma, ðpe nale na bnitlo ma! Laa naa rne miñ rii lo to, porne rnee to ma ne rñabey lo mençox nacie naa, gane rrieelo runçxoon naa ma. <sup>19</sup> Nana telne sca rzac to, ¿zha ne nacgrë to dzigo, cho nacie zho ne ye zho runçxoon ma? Gase naganle rlu dolçox i quiayuh to squi rnee to. <sup>20</sup> Sangue tel naa, Dios nacie naa runçxoon naa mençox, ni ga rlu ganle laa Dios pxeelle meñ ne gnabey lo to.

<sup>21</sup> ‘Masaque nac mençox zig tib zha ne no xfuers! Tib zha ne no xfuers, tel tibaque ney zho xquiib zho, ¿cho dien lega sëëb lidz zho gla ncuuañe quianie zho? <sup>22</sup> Per zeeñe rrieequia stib zha ne mazdraa no xfuers, zha cole rtiche zha co, runçxoon zho zho, riañnie zho grë ncuuañe gopchen zho. <sup>23</sup> Golgacnañ sca ganle, zha ne rlëë lo naa, ga rlu nacie zho naa; ni zha ne racnie naa lo xtsiñ naa, paat yquiind zho.

<sup>24</sup> ‘Mençox ne rsacsi miech, zeeñe laa ma rsaan zho, rie ma riequianzë ma dan zaatne choot miech guieñd, rguib ma dien pa cuëz ma; ranse ma rdziel zaatne cuëz ma, rnee ma: “Mazd gbire naa guia naa lidz naa stib.” <sup>25</sup> Dzigo rbire ma, zeeñe rdziñ ma lo zha ne psacsi ma ga, masaque rzac ma zho zig rzac miech tib yu ne griiñ blioob, tib yu ne inë nhixcuua len. <sup>26</sup> Dzigo rie ma riexi ma zgadz samençox ma, ma ne mazdraa ntseeb, rdziñ ma gza ma rzëëb ma zdoo zha co, rsilo ma rsacsi ma zho. ðHorcole mazdraa mban run ma zho!

<sup>27</sup> Sca quianee Jesús, zeene nguiedz bnee tib wnaa ne no lad grè miech ne ndxie lo me ga, rëb wnaa co: —¡Dichos wnaa ne gop luu, wnaa ne bgadz luu!  
<sup>28</sup> Pquiab Jesús rëb me:  
 —¡Mazdraa dichos zha ne gon, yquiaadiag Xtiidz Dios ni tsoxco zho gban zhow zigne naca!

**Zha ne riladzd cho nac Jesús**  
 (Mt. 5:15; 6:22-23; 12:38-42; Mr. 8-12)

<sup>29</sup> Miech guizhiu ne quiadziñraa lo me ga, dzigo bnee me rëb me:

—Nadzpaa ntseeb zdoo to nac to miech ne mban leñ dze rii. Tibaque quia to racladz to gan to pe stib milagr, parne gliladz to Dios pxeel naa, ¿zha rnaraa milagr ne racladz to gan to? Gacnañ to ganle, stibaque milagr gon gan to, tib miñe csoladz to zha goc Jonás. <sup>30</sup> Haxta dzigora nagon guien to nli Dios pxeel naa. Sac tel Jonás, zeene gocnañ zha Nínive zha bzhaac me, dzigo bliladz zho nli Dios pxeel me. <sup>31</sup> Ni gacnañ to ganle, zeene gal dze ne laa Dios guñ xquielwxtis me, zieso wnaa ne goc rein nëz Sabá, steedquie me to. Sac gon pa lo ga brie me, biaad me biadquiaadiag me grè xtiidz Salomón; ni to, lo to nu zo meñ ne mazdraa non lo Salomón, ni nëd to gon to xtiidz me. <sup>32</sup> Scaque grè zha Nínive, steedquie zho to; sac gon zeene güeynee Jonás lo zha Nínive, znuse bin zho diidz psaan zho xquielntseeb zho wbig zho lo Dios; ni to, lo to nu zo meñ ne mazdraa non lo Jonás, ni ib runcasde to me.

<sup>33</sup> Tsod zha ne yquiaagui tib biini, lozh ga ctoos zho pe cos low, gzolangaa zhow zaatne ngeets. Sac biini ne rquia, glaa rzoba par gziiniw leñ yu, zeena guiab biini lo grëse zha ne sëeb leñ yu. <sup>34</sup> Rriequia nac bziaalo miech zig nac tib biini. Telne niapse lo grè ncuaañe ndzinli rwi zho, dzigo gdipse xcuerp zho no lo guielbiini. Laa telne loxaque lo grè ncuaañe nonguielgaa rwi zho, dzigo gdipse xcuerp zho no lo guielcow ga. <sup>35</sup> Golguien sca pa lo rwi to, napaa laa ne tso to lo biini, lel lo guielcow no to. <sup>36</sup> Sac gon, tel dipse xcuerp to no lo guielbiini, ni tib lëw nod lo ncow, zlupaa to; sac masaque nac to ga zig tib zha ne zo gax tib lo biini noob.

**Güey Jesús lidz tib zha farisé**  
 (Mt. 23:1-36; Mr. 12:38-40; Lc. 20:45-47)

<sup>37</sup> Zeene blozhse bnee Jesús lo grè miech co, dzigo bredz tib zha farisé me güeynie zho me tib wagw lidz zho.

Bdziñ me lidz zho, bded me bzob me lo mezh, <sup>38</sup> psilo me dow me, per bdiibd me nia me zigne nacpaa xcostumbr grè zha Israel. Zeene gon zha farisé cow, rlozhd gzee zdoo zho; <sup>39</sup> dzigo rëbchaa me:

—Grè to ne nac to zha farisé, laglaase rlu to miech wen nac to, per zdoo to ntseeb to, sac niapse guielntseeb, niapse guielgbaan run to; masaque nac to gon zig tas, zig plat ne nëz zhitsse mbe rna, laa nëz leña nradraa di beed. <sup>40</sup> ¡Nadzpaa ncow nac guic to! ¿Pe riende to racladz Dios ne laglaase glu miech wen nac to, sinque racladz me desde zdoo to gac to miech

wen? Sac dib nacse to psañ me to. <sup>41</sup> Laa ne squi no to noban to, mazd goldeed ncuaañe nacchenpaa to lo grè zha ne guien pe yquien, zeena gac to miech ne nlipaa wen.

<sup>42</sup> ¡Probsaxe to! Rzac to demas nguzobdiidz to lo Dios, rio to haxta grè guizh bitxtil, grè guizh rud, ni grëragaa guizh ne ran to, rdeed to xdiezm to yadoo; per rioxcode to gban to zigne rnabey Dios, ib rioxcode to gleynie to samiech to. Ible none tsoxco to miñ rii, ni bii scaquegaa tsoxco to gdeed to xdiezm to. <sup>43</sup> ¡Probsaxe to! Rdziladz to gacnon to lo miech, zeene rie to yadoo, zaatne glupaa non to, ga rzob to; scaque ndooladz racladz to gnee miech bdiuzh lo to, zeene rdzieel zho to dib ro nëz. <sup>44</sup> ¡Probsaxe to, lëëtaa rdzieel to grè to maistr ley! Masaque nac to zig nac grè baa ne rludraa pa nac. Tel baa cow, zeene rded zho zaatne ni-aaw, ib rien zho lad grè ncuaañe noyodz ga, noded zho.

<sup>45</sup> Horco pquiab tib maistr ley, rëb zho lo me:

—Maestro, ¿ye no dzigo lëë rzoob luu squi nac?

<sup>46</sup> Pquiab Jesús rëb me:

—Ye to gon. ¡Probsaxe to! Rio to rzadraa ley ne rnabey to gon miech, ni per ni to rioxcode to siquier csilo to gon tow. <sup>47</sup> ¡Probsaxe to! Paat rquiinda gon squi rio to, rlozhd dieen paraa rzhixcuaa to ro xpa grè zha ne biadteed xtiidz Dios padzeela. <sup>48</sup> ¡Igal ntseeb to grè pxozgol to! Sac gon, zha beet grè zha co, laa to no rzhixcuaa to ro baa. <sup>49</sup> Nanle Dios squitaa ntseeb zdoo to, miñe run to ga bnee me, zeene rëb me: “Sxel naa grè zha ne tsieteed xtidz naa lo zho, sxel naa zha ne tsieneew lo zho, per nanle naa gandzed zho zho, haxta zut zho groj zho.” <sup>50</sup> Gacnañ to sca ganle, grè to miech ne mban leñ dze rii, grè to gunquizh Dios xchen grè zha ne pxeel me biadteed xtiidz me wlal ne ndxie guidzliu, <sup>51</sup> desde Abel haxta Zacarí meñ ne beet pxozgol to leñ yadoo zaatne nac gax lo pcoog. ¡Ne nligaa grëse dol co gon, to quizha! <sup>52</sup> ¡Probsaxe to maistr ley squi nac to, ib rneede to diidzli lo miech! Nac diidz to cseed miech guien zho zha nac Xtiidz Dios, per nëde to gliladz tow, ni niicle nëedgaa to gliladz zha ne racladz ycaaniaw.

<sup>53</sup> Blozhse ga, laa me brie ga. Grè zha farisé, grè maistr ley, per nli rlëë zho bin zho sca rëb me. Psilo zho nzian grè ncuaañe rnabdiidz zho lo me, rguib zho dien zha gunglëë zho me, par dien pe cxind me pe tib diidz, zeena miñ co yquiaaqui zho tsiezoob zho xdemand me.

**Grè ncuaañe rac ngeets zhliian**  
 (Mt. 10:19-20, 28-33; 12:32)

**12** Miech guizhiu ne pcaalsa lo Jesús, haxta rcheeplsa zho. Dzigo bnee me lo xpëedscuel me, rëb me:

—Golguien gon, gunde to miñe run zha farisé, tel zha rquiaalose zho miech wen nac zho. <sup>2</sup> Sac grëse ncuaañe sca ngeets rac, grëse ncuaañe rlud miech, dzidz dze ne xoobneña.

<sup>3</sup>Zig nac grë ncuuaṅe zhlianse rnee to lo ncow ni-ina, zdziṅ dze ne gon miecha zobna ngbidz; grë ncuuaṅe rnee to leṅ yuse, zdziṅ dze ne dib lad guiedz gacnaṅ miecha.

<sup>4</sup>Golḡona gaṅle bets: Ib gdziebde to zha ne gacladz gut to. Nli zrieelo gut zho xcuerp to, per peet grieelodraa zho guṅ zho. <sup>5</sup>Golḡuien, Dios nac meṅ ne mazdraa nroob, miṅe rnabey me miṅ co none gon to. Sac teḷ me, zrieelo me gnitlo me miech dib xcuerp zho, ni lozh ga zrieelo me gzonëz me zho nëz leṅ gabiḷ.

<sup>6</sup>Nligaa gdziebde to miech, csaand Dios lega pe gac to. Golwi gaṅle, zig nac grë mguin, niicle ne rzac miech peet nond ma, haxta chop ma rto zho por tib gaay centav; per teḷ Dios, ib rsaanladzd me ma. <sup>7</sup>Peleḷ to dzigo csaan me, haxta guits guic tow, grësew ngaba lo me. Gdziebde to sca, golḡuien gaṅle nonraa to lo tib dzoon mguin.

<sup>8</sup>Ni gni naa lo to gaṅle, zha ne glu lo miech nacie zho naa, scaque naa ne nac naa Mgui ne pxeel Dios, zeṅ gaḷ dze co zlu naa lo grë xanjil Dios, nacie naa zho. <sup>9</sup>Saṅgue zha ne ctoladznie naa lo miech, scaque naa ziep naa lo grë anjl co ruṅbeyd naa zho. <sup>10</sup>No zha ne rneenë naa, per zuṅ Dios zho perdon doḷ co; saṅgue zha ntseeb ne gneenë Espíritu Sant, ib guṅdraa me zho perdon.

<sup>11</sup>Zeeṅe tsiezo miech rii to lo grë zha ne rnabey xyadoo zho, tsiezogaa zho to lo grë zha ne nac wxtis, tsode to zhgab dieṅ pe gnee to; <sup>12</sup>sac zeeṅe sca tsiegala, Espíritu Sant csaab guic to pe nac miṅe gnee to lo zho.

### Zha ne loxaque rapchen

<sup>13</sup>Horco wbig tib zha ne no lad grë miech co, rëb zho lo Jesús:

—Maestro, bzhiguiel bnee lo bets naa glë zho ncuuaṅe psan pxoz no, gneedz zho miṅe raguiäl naa yca naa.

<sup>14</sup>—Aque luuw nli —rëb Jesús—, ḡcho në lo luu laa naa noyuṅ guielwxtis co? Ziaḷd naa gon par quiiz naa ncuuaṅe rap miech.

<sup>15</sup>Dzigo bnee me lo grë miech co, rëb me:

—iGolḡuien gon, gzoobladzde to demas gapchen to! Sac niicle ndziibraa gapchen miech, grieelod por grë ncuuaṅ co ndzon gac lo xquielmban zho. <sup>16</sup>Znu gon bzhaac tib meṅ ne nroob gopchen. Nat liu quianie me, zeṅe rlaap me grë ncuuaṅe ran me, nroob ncuuaṅe rliis me low. <sup>17</sup>Bdziṅ tib dze rgaadraa pa tsotsow grë ncuuaṅ co, dzigo bzob me dieṅ zha guṅ me. <sup>18</sup>Tibaque zeṅe rëb me: “Miṅe naca laa naa guṅ nroob grë yu qui, zeṅa zigtaa grë guielnzaac quiw, grëragaa ncuuaṅe rap naa, ga tsotsowa grësew. <sup>19</sup>iPe zhidaa iz ne lëb grë ncuuaṅ co! Peet tsieniedraa guic naa, iṅe guxt sob naa, gow naa, guie naa ncuuaṅe gacladzttaa naa.” <sup>20</sup>Miṅ co rza guic me, tibaque zeṅe rëb Dios lo me: “Nadzpaa nxen luu. Guieel riigazh gon laa luu guet. iZhaale zha ne guiaṅnie grëtaa ncuuaṅe beenlo luu i!”

<sup>21</sup>Zeeṅe blozh bzodiidz Jesús cuent co, rëbchaa me:

—Sca nagon rzac grë zha ne loxaque dieṅ zha gapchen zho zienie guic zho. Ncuuaṅ cose rionie guic zho, ib rioxcod zho guṅ zho ncuuaṅe non nëz lo Dios.

### Rsaand Dios zha ne no xnëz me

(Mt. 6:19-21, 25-34)

<sup>22</sup>Blozh ga, rëbchaa me lo xpëëdsuel me:

—Gacxe waa, gni naa lo to gaṅle: Tsode to zhgab dieṅ zha gban to lo guidzliu rii, pa griepe pe gow to par gban to, pa gdzielgaa ncuuaṅe gdze xcuerp to. <sup>23</sup>Mazd golconie guic to dieṅ zha gac xquielmban to, dieṅ pa tsiebannie to xcuerp to.

<sup>24</sup>Golwi lo grë nga gaṅle, led yed ma ran, led yed ma rlaap, led yed ma rgotsow pe guielgon, per row ma; sac Dios rdeed ncuuaṅe row ma. iTeḷ to gon, mazdraa non to lo grë mguin co! <sup>25</sup>Ni lalnu paat rquiinda tant tso to zhgab. Teḷne guiab to tso to zhgab dieṅ zha gacnool xtse to spalal yeense, ḡniacxe zrieelo to guṅnool tow? <sup>26</sup>Naṅle to gaṅle led ncuuaṅe grieelod ga. ḡPe nac dzigo tant tso to zhgab ncuuaṅe mazdraa nroob?

<sup>27</sup>Zig nac lar, ḡpe nacne tant tso to zhgab dieṅ pe gacwxab to? Pe rwide to lo grë guiee dzil ne gaṅle zëëb dan, zha rrooba, niow rluw, ni led yeda rio zhgab dieṅ zha gacwxaba; ni gni naa lo to gaṅle, per ni rey Salomón con grë xab niazh me, blud me scataa niow.

<sup>28</sup>Gase na gaṅle golwi, niicxe grë guiee dan co na, zna dze zob nguiaw, ḡzhe widz laaw bidzle, laaw tsecle, ni scataa niow rgacwxab Dios; ḡpe leḷ to dzigo ygacwxabd me, niicle ne squi gard guien to dib zdoo to gnalo to me?

<sup>29</sup>Tsodraa to zhgab sca, guiab to: “iPa griepe pe dioow ne, pa griepe pe dio ne?” <sup>30</sup>Grë miech ne ruṅbeyd Dios, tibaque zhgab co rio zho. Saṅgue to, golḡsoladz gaṅle Pxoz to meṅ ne zob gbaa, naṅle me pe nac grë xliaadz to. <sup>31</sup>Me nac meṅ ne gneedz ncuuaṅe yquiin to, per ib none glo tsoxco to gban to zigne rnabey me.

<sup>32</sup>Nli zhis to, pale tib dzoon win mëcwxiiil yeṅ, per gdziebde to. Sac niicle zhis to, per rley Pxoz to meṅ ne zob gbaa, laa me rneedz grëse ncuuaṅe rap me lo to.

<sup>33</sup>Gacxe waa, laa ne tsonie guic to dieṅ zha gacnroob ncuuaṅe rap to, miṅe quianie to goḷtow, dzigo golḡdeed dimi co yquiin zha ne rappaa liaadz; zeṅa sca nroobraa guielnzaac ne yгаа to gbaa. Guielnzaac cosi, led yeda nitlo, led yeda grë, led yeda tsoxtseeb lo ngbaan, tsoxtseebgaa lo mxil.

<sup>34</sup>Sca golḡun, sac gon guielnzaac ne guṅlo to, zatne guṅlo tow, ga gdziṅ to.

### iNsin goḷso!

(Mt. 5:25-26; 10:34-36; 16:1-4; 24:45-51; Mr. 8:11-13)

<sup>35</sup>Nsin sca goḷso —rëb me lo zho—. <sup>36</sup>Golḡac zig tib nguṅdziin ne rquiambëz gbire meṅ ne rnabey zho zeṅe pa rie me tib lo guieltsieel. Nsin rzo zho, zigne rdziṅ me, rxal zho ro yu rzëëb me.

<sup>37</sup>Dichos zha ne nsin zo zeṅe laa meṅ ne rnabey zho glanso. Ib tedsod, steed me zho nëz leṅ yu, soob me zho lo mezh, csilo me mezhaldz gziib ncuuaṅe gow

zho. <sup>38</sup> Nligaa dichos zha ne sca nsin so, horne glanso-taa me; niicle tel wxina, ziadyiinigaa liuw. <sup>39</sup> Golgan ganle, tel niaca mine gacnan miech laa ngbaan tsieban lidz zho guieel, per nannd zho dien pa horpaaw, zniacxe zaaguies zho? Led sobna zho lëe, nsin nsin so zho parne csaand zho sëeb ngbaan lidz zho. <sup>40</sup> Scaque to nagon, none sca nsin so to, sac gon lega naclew zeene gan to laa Mgui ne pxeel Dios ziaadle.

<sup>41</sup> Zeene blozh sca bnee me, rëbcha Pedr lo me:

—Maestro, mine blozh bnee luu i, zpe par nose naca, te ye par grëraa miecha ye?

<sup>42</sup> Pquiab me rëb me:

—Laaw rne naa, par grëse zha ne zienie guic zaacse gon zho mine rnee men ne rnabey zho. Nligaa nsin none so zho, sac laa zho guiaan zha ne nacgrë zho, zig riaan zha ne ngundziin sangundziin zho parne gdeed zho ncuane gow zho.

<sup>43</sup> Dichos zho, telne ine niowse noyung zho dziin co zeene laa men ne rnabey zho glanso. <sup>44</sup> Zeene gan mew, ib tedsod so me zho, zha gnabey grëse ncuane quianie me. <sup>45</sup> Per tel tsienie wguic guic zho guiab zho gbireniobd me, csilo zho lel csacsi zho grë zha ne bi-aan zho, tso zho loxaque gowcho zho, loxaque gzudz zho, <sup>46</sup> tibaque zeene gan zho laa me zole lo zho; ib tedsod hor cogazh ctiche me dziin co lo zho, gzonëz me zho guey zho zaatne no grëraa zha ne rond diidz. Nroob caxtigw ne cteed me zho.

<sup>47</sup> Sac gon zha ne sca nanle pe nac mine racladz men ne rnabey zho, ni tsoxcod zho gon zhow; ible nroob nac caxtigw ne ted zho. <sup>48</sup> Mazd lëeta caxtigw ted zha ne peet nannd, niicle gund zho mine rnabey me. Grëse zha ne nanle pe nac mine no gon zho, ib none gon zhow; nac cuent rii zig tib zha ne rcaania pe cos, tel palal mine pcaania zho, none haxta nroobraaw ctsire zho.

<sup>49</sup> Niina ne laa naa zial, rriequia zialzobgui naa lo guidzliu. iNi zoot naa gon, tebaa ranle naa laaw quiayazbel! iTebaa psiaalle naa lo dziin ne zialgun naa!

<sup>50</sup> Per na naraa none teed naa tib guie në nroob, ni mbanse gon rac zdoo naa quiambëz naa gdziin dze co.

<sup>51</sup> zMasaque nan to na lëe, laa naa zial loxaque par cuiñ wense miech? Lëda gon, ye zial naa zialgunctil naa zho. <sup>52</sup> Sac desde len dze rii, yu ne no gaay miech, laa zho ctsolsa. Tel sëeb chop zho xnëz naa, laa stson zha ne guiaan ga, ctsidil zho; tel sëebga tson zho, scaque grop zha ne guiaan ga, gandzed zho zho.

<sup>53</sup> Mëed ne gan laa pxoz zho, laa xniaagaa zho bzëeb xnëz naa, gandzed zho pxoz zho, gandzed zho xniaa zho; scaquegaa zha ne quianie mëeda, zeene gan zho laa xingan zho, laa xindzoopgaa zho bzëeb xnëz naa, gandzed zho zho. Zha ne nac nguzhizha, zlëenie xniaa tsieel zho zho; tel xniaagaa tsieel zhow, zlëenie zho me.

<sup>54</sup> Blozhse sca bnee me, rëbcha me lo grë miech ne ndxie ga:

—iPe nlipaa rnee to riende to pe nac grë ncuane noyac len dze rii! Zha zeene ran to rquia xcow nëz ne rzëeb ngbidz, znuse rien to laa guie guiab. <sup>55</sup> Zeene

rangaa to ziaad me nëz ne rzë ngbidz len mëe nal, nanle to laa nëeg gac. <sup>56</sup> iGuie lwquiaalo i lo to gon! Zha zëeb dzigo runbey to grë señ ne rlu zhan gbaa, rlugaa lo guidzliu, laa grë mine quiayan to len dze rii riende to.

<sup>57</sup> iNone guien to tozhal cobey dien pe nac mine nonguie l gon to! <sup>58</sup> Gzoob ne bdilnie to tib samiech to, laa to nole nëz zie to lo wxtis grop to. None guien to, laga no to nëz mazd golguiaan mpas, lëdle tsiezo zho to lo wxtis; sac tel laa to gdziin lo wxtis, ib znabey wxtis zha ne co to ladzguib. <sup>59</sup> Ni nanle to ganle, grieede to ga, haxtaque lozh quizh to tel palal gac mult ne gnab zho lo to.

### Grëse miech, ngoopdo l nac zho

**13** Len dze co, bdziin bla zho lo Jesús bzodiidz zho lo me zha rnabey Pilat gut bla zha Galilé, lëetse zeene no zho len yadoo noyut zho ma ne nogogon zho lo Dios. <sup>2</sup> Dzigo rëbcha Jesús lo zho:

—Segur na lëe, rëb to mazdraa ngoopdo l grë zha co lo grëraa zha ne no nëz Galilé, gane sca bdzieelo zho. <sup>3</sup> iLëda gon! Zigtaa ngoopdo l zha co, scaque to ngoopdo l nac to; telne csaande to xquie lntseeb to gbig to lo Dios, ye to znitlo to. <sup>4</sup> Scaque tsiimtson zha ne bgaadz yuglaa ne bixche Siloé, masaque rëb to nagon mazdraa ngoopdo l zho lo grëraa zha Jerusalén, gane sca gut zho. <sup>5</sup> Per gacnan to ganle, iLëda! iZig rne naa ga, ye to miech ngoopdo l nac to, ni telne csaande to xquie lntseeb to gbig to lo Dios, ye to dzziin dze ne nitlo to!

<sup>6</sup> Dzigo bzodiidz me tib cuent lo zho, rëb me:

—Tib men name, zob tib zhan yag guigw lo xcuua me zaatne quianie me lbë uv. Cad rdziin mëe ne rquia guigw, rie me rieguib me nex low, per ib peet rquiad. Zeene goctaa tson iz, gon me sca rdeetew nex, <sup>7</sup> dzigo rnabey me zha ne quianap liu co cchuggazh zhow, rëb me: “iPchuggazh yag yozh qui, zhlëse zoba i! Nale rac tson iz ziya l naa rguib naa nex low, ni peet nex rneedzda.” <sup>8</sup> Dzigo pquiab zha ne quia dziin lo me ga, rëb zho: “Psaan dien guiaan stibtaa iz rii, na laa naa glë zhana, na laa naa gdziin beeba. <sup>9</sup> Telne yquiadaque nex low iz ne ziaad, maase cchug new dzigo.”

### Biac tib zhuz ne nosacsi men diox

(Mt. 13:31-33; Mr. 4:30-32)

<sup>10</sup> Tib dze ne rdziiladz zha Israel lo dziina, bdziin Jesús len yadoo, psilo me noseed me miech.

<sup>11</sup> Lad grë zha ne noseed me ga, lad co no tib men wnaa nlungw nac zhits, gogle tsiimtson iz sca nosacsi men diox me, ib gacd gacnli me. <sup>12</sup> Zeene gon Jesús me, dzigo bredz me me, pxobnia me guic me, rëb me lo me:

—iNiinagazh gon, laa luu guiac!

<sup>13</sup> iHorcogazh laa zhits me ga gocnli, rley me, psilo me rdeed me xquizh lo Dios! <sup>14</sup> Laa zha ne rnabey yadoo, zeene gon zho sca beenguiac Jesús me dze co, blëe zho, rëb zho lo zha ne ndxie ga:

—Zha ne racladz guiac pe lo guielguidz, pe gacd guiaad zho len dze ne rac dziin, jled tsod zho guiaad zho guiac zho dze nda rii!

<sup>15</sup> Dzigo pquiab Jesús rëb me:

—iNazdpaan tseeb to! Rquiaalo to ib peet dziin runde to dze rii. ¿Pezhe ga waa run to zeene rsilaa to xcon to, rsilaa to xpurr to dze rii rieguie to ma nis?

<sup>16</sup> Zha nac dzigo rzac to, nonguiel da nu ben naa beenguiac naa wnaa rii, dze rii. Golwi ganle zha xtii Abraham nac me, len tsiimtson iz goc sca nosacsi mendox me.

<sup>17</sup> Zha ne rlëe ga, zeene bin zho sca rëb me, ptoladz zho; laa grëraa zha ne ndxie ga, rley zho ran zho grëta milagr ne run me.

<sup>18</sup> Blozh ga, bnee me rëb me:

—¿Zha ganle racnroob lo xtsiin Dios lo guidzliu rii?

<sup>19</sup> Racnrooba gon zig rroob tib midz moxtaz ne ran zho dan rii. Tej midz moxtaza niicle tib midz winsew, zaatne racbniw, rrooba, raca tib yag nroob; haxta rie gre mguin riezhixcuaa ma zhiptsieez ma low.

<sup>20</sup> Ziaadaque gon gaca, zig ncobi. <sup>21</sup> Sac tej ncobiw, niipaquew rcots men wnaa tson lmud rin, ni dib nacse ncob co rzibe.

### Zha ne ycaania Dios

(Mt. 7:13-14, 21-23)

<sup>22</sup> Laa Jesús no nëz zie me nëz Jerusalén. Guidz ne rdedtaa me rseed me miech; zigtaa guiedz nrooba, zigtaa guiedz wina. <sup>23</sup> Tib vuelt bnabdiidz tib zho lo me, dien pe zhis nac miech ne ycaania Dios. Dzigo pquiab me rëb me:

<sup>24</sup> —Nligaa zhis zho, sac masaque naca zig tib puert niase. Goltsoc sca niinasraa golsëeb xnëz me ycaania me to, sac zdziñ dze ne nzian zho gacladz sëeb, per grieelodraaw. <sup>25</sup> Deque laa men ne rnabey csioog ro yu, telne biaan to nëz ley, niicle cuedzraa to me gnab to siguiel me cخال me ro yu sëeb to, per cxaldras mew. “Runbeyd naa to”, gnë me, “nand naa dien cho zha to.”

<sup>26</sup> Niicle guiab to runbey me to, biaadpaan me ladz to pseed me miech, haxta downie to me. <sup>27</sup> “Laa naa nile”, gnë me, “runbeyd naa to. iGunneetraa to naa, ib rdziguendi naa grë miech yozh, miech ngoopdol ne nac to!”

<sup>28</sup> Mban gac to zeene gan to laa Abraham, laa Isaac, laa Jacob ni grëraa zha ne biadteed xtiidz Dios, laa me pcaania zho, laa to biaanse nëz ley. Nligaa mbandox gac to, zoon to, haxta zow lay to lo guielnë co. <sup>29</sup> Ni mazdraaw gon, zeene gan to pa lo guidzliu brie grë miech ne bdziñ ga, ine zobnie me zho lo xmezhe me noyownie me zho. <sup>30</sup> Grë zha ne rzac to niina peet nond, lëetse zha co yгаа guielnzaac co; laa grë zha ne rzac non zho niina, peet ygad zho.

### Bzeet Jesús zha nac zha Jerusalén

(Mt. 23:37-39)

<sup>31</sup> Dze coquew, bdziñ bla zha farisé rëb zho lo Jesús grieeniob me ga, sac laa Herod racladz gut me. <sup>32</sup> Dzi-go rëbchaan me lo zho:

—Goltsie golguiab lo mëz win co cxecw me spalal, nadzese ni gzhe gunguiac naa miech nu, zigtaa zha ne rzacnëw, zigtagaa zha ne nosacsi mendoxa; gal widz guieñdle naa nu. <sup>33</sup> iNligaa nadzesew ni gzhe, widz laa naa gdziñle Jerusalén zaatne za naa! Sac ible Jerusalén, ga rut zho grëse zha ne riadteed xtiidz Dios lo miech.

<sup>34</sup> iAque tow men Jerusalén! ¿Pe nacne squitaa nac to, rut to zha ne ziadteed xtiidz Dios lo to, rgoquie to grë zha ne rxeel me lo to? Blactaa gocladz naa niacnie naa to, nquianaap naa to zig run nguid rguedz ma xpëed ma, per bzhiguielde to. <sup>35</sup> Gacnan to ganle, nadzetaa gon laa lidz to guiaan ngan, sac gandraa to naa, haxta gal dze ne guiab to: “iZha ndzontaa men qui pxeel Dios lo ne!”

### Biac tib men ne rrieet gui

**14** Tib dze ne rdziiladz zha Israel lo dziina, güey Jesús lidz tib zha farisé ne nac zha non, sac bredz zho me tib wagw lidz zho. Bdzinaque tib men bgui, rzacnë me, gdipse me no gui. Grëraa zha farisé ne ndxie ga, quialeets zho Jesús quiambëz zho dien pe zunguiac me mgui co. <sup>3</sup> Dzigo rëbchaan Jesús lo zho, ni lo grë maistr ley ne ndxie ga:

—Golnë dien, ¿pe nonguiela gunguiac naa miech dze rii, te nonguiel da ye?

<sup>4</sup> Ni tib zho pquiabd. Horco pxobnia me guic mgui co, beenguiac me mgui. Blozhse bzonëz me mgui, <sup>5</sup> rëbchaan me lo zho:

—¿Pe nli na peet dziin runde to dze rii? Tej zha tsiet-sobe tib xpëed to, tib xmagaa to tib len guiuu dze rii, zniacxe tsiebeegazhde to xpëed to, tsiebeegazhdgaa to xma to ga?

<sup>6</sup> Loxaque lo zho rac, ib bdziel zho pe nquiab zho.

<sup>7</sup> Grëraa miech ne nodziñ ga, no zho rguib zho dien zha yгаа zho zaatne nzhixcuaaraa sob zho. Gon Jesús zha rac zho, dzigo bnee me lo zho, rëb me:

<sup>8</sup> —Golguien gon, zeene znu cuedz miech to, zig nac tsie to tib wagw zaatne noyac tib guieltsieel, ib gunde tsiesob to zaatne nzhixcuaaraa. Sac gon, nenda glanso tib zha ne nonraa lo to, <sup>9</sup> lozh ga, laa zha ne bredz to lo lni guiaadliso to ga, gnë zho: “Guso i dien sob men rii.” Led tib guielto ga par to, racse to laa to tsieso ga, tsiesob to zaatne rialle ro beel. <sup>10</sup> Mazd ganle, zeene sca pa lo tsie to tib lo lni, ndooladz golgac, tib lad golsob. Zha ne bredzle to lo lni, zeene gan zho laa to zob ga, ziaad zho ziaad-xi zho to tsiesobnie zho to zaatne nzhixcuaa. Zha ne zoble lo mezh ga, zeene gan zhow, zianzuiuu to lo zho. <sup>11</sup> Golsoladz ganle: grë zha ne lëeque zha runnon zho, lel riaanwin zho; laa zha ne riaanwin, runnon miech zho.

<sup>12</sup> Blozh ga, rëbchaan me lo men ne nac lidz ga:

—Scaque luu gon, zeene cuedz luu miech guiaad zho tib wagw lidz luu, tsod luu loxaque zha ne ndzieeldiidz luu, loxaque zha bets luu, zha lidzse luu, lo grëgaa zha ne no gax lidz luu zha ne rapchense, zha cose cuedz luu; sac gon ib tedsod zbedzaque zho luu lo zhilni zho, stsire zho mine been luu ga. <sup>13</sup> Mazd bredz grëse miech, zig nac zha ne guieñd pe yquini, zig nac zha ne

guiend tib nia, zha ne guiend tib ni, zha ne roldga lo; <sup>14</sup> zeeṅa gaḷ dze ne grieeban grē zha ne bioxco wban zigne racladz Dios, iṅe gley luu yгаа luu guiēlnzaac ne tsiēguiaḷ luu gneedz me lo luu.

<sup>15</sup> Lad zha ne zobgrē me lo mezh ga, pquiab tib zho rēb:

—iDichos grē zha ne sca yгаа tsiesob lo mezh, tsi-etownie zho Dios zaatne rnabey me!

<sup>16</sup> Pquiab Jesús rēb me:

—Tib meṅ name, nzian zha ne bredz me tsie tib wagw lidz me. <sup>17</sup> Zeeṅe goḷ dze ne laa guiēlwagw co gac, pxeel me tib zhingundziin me ziēxi grē zha co.

<sup>18</sup> Per pasē zho nie, zhaase zhaase ncuaaṅe pquiaqui zho. Tib zho rēb: “Grieeḷod sē naa, sac laa naa pca tib lē liu, ni lēetse nadze no gaso naa low; bzhiguiēḷ gudz lo me guṅ me naa dispensar.” <sup>19</sup> Stib zho rēb: “Niina wriiṅ pca naa gaay nēz ngon, laa naa no ganie ma dieṅ zha ruṅ ma dziin, gudz lo me yquiambēzd me naa.” <sup>20</sup> Laa stib zho rēb: “Grieeḷod sē naa, sac niina wriiṅ ptsieelnia naa, bzhiguiēḷ gudz lo me gacḷ guial naa.”

<sup>21</sup> Bdziṅ nguṅdziin co bzodiidz zho lo me zha rzē xti-idz grē zha co. Zeeṅe bin mew, wbiṅladz guic me, bn-abey me zho güey zho dib lad guiedz güeyxi zho grē zha ne guiend pe yquiin, grē zha ne guiend nia, zha ne guiend ni, zha ne rold lo, grēse zho bziṅnie zho ga. <sup>22</sup> Blozh ga, rēbchaa zho lo me: “Laa naa wbirele xmandad luu goṅ, per scase nora zaatne cue miech.” <sup>23</sup> Dzi-go pxeel me zho stib, rēb me: “Güey dib ro guiedz, zha ne gdzieeltaa luu, dēnie zho nēz rii, bloo guic zho guiaad zho; ib none tsodzēse miech lidz naa. <sup>24</sup> Sac grē zha ne bredz naa glo ga, ni lalnu racladzdraa naa yгаа zho guiēlwagw rii.”

### Zha ne racladz sēeb xnēz Jesús

(Mt. 10:37-38)

<sup>25</sup> Laa Jesús no nēz zie me nēz Jerusalén, miech guizhiu ne naḷ zhits me. Tibaque ptsire lo me bui me lo grē miech co, rēb me lo zho:

<sup>26</sup> —Lo grē to ne ziaadnaḷ to zhits naa, gacnaṅ to gaṅle zha ne racladz ygab xnēz naa, ib none gleynie zho miṅe rnabey naa. Sac zha ne mazdraa rleynie px-oz, mazdraa rleynie xnāa, mazdragaa rleynie zho tsiēel zho, xpēēd zho, bets zho, bziangaa zho, xquieḷm-ban zhow, rquia zdoo zhow, peet xtsiṅd grē zha co par sēeb zho xnēz naa. <sup>27</sup> Sac ni tib zha ne sca yquia zdoo cueeladz zho zho guiaadnaḷ zho zhits naa, grieeḷod ygab zho lo naa. <sup>28</sup> Antes ne yquiabladz to sēeb to xnēz naa, none wen wen sob to dieṅ pe zlēb to ted to miṅe rieguaḷ to. Zig nacse tib zha ne gzaa tib yu glaa ne gac chop tson xcuaa, led rzobgazh zho rbee zho cuent dieṅ pe zгаа xtimi zho tsaalow. <sup>29</sup> Sac goṅ nenda lox-aque cueeze zhow, ni lozh ga grieeḷod gzaalo zhow. Miech ne gaṅa laa zho gzhidznie zho, <sup>30</sup> guiab zho: “Goḷwi lo zha qui gaṅle, loxaque bleeze zho lidz zho, na blēbd zho nzaalo zhow.” <sup>31</sup> Scaque rey ne no tiḷnie stib rey, led none sobgazh zho gaṅ zho dieṅ pe zlēeb tsii mil xmeṅguiib zho tsietilnie gaḷ mil xmeṅguiib stib rey

co. <sup>32</sup> Teḷne rgobey me lēbd me, laga bii zit ziaad stib rey co, rxeel me bla zha ne tsie tsienēe dieṅ zha gataa cuēz lo xtiḷ zho.

<sup>33</sup> ‘Scaque to nagoṅ none glo gwi to pe nac grē ncuaaṅe no csaan to, parne grieeḷo ygab to xnēz naa. <sup>34</sup> Sac goṅ zed ne nzhid, ḷpa dieṅ yquiina? <sup>35</sup> Per ni par gaca beeb peet xtsiṅda; miṅe ractaaw, laaw rziaab. Zha ne no liaadz guiēṅ zho pe rnee naa, yquiaadiag zhow.

### Zha rzac Dios zha ne zozit lo me

(Mt. 18:10-14)

**15** Zeeṅe rseed Jesús miech, nzian grē zha ne rtop dimi ne razh lo zha Roma, ni grē zha ne rzoob miech nac zha yozh, ye zho rbig zho rquiaadiag zho zhiwseed me. <sup>2</sup> Nacne grē zha farisé ni grē maistr ley, rneenē zho me, rnee zho lēda ga ruṅ me sca rtsieelsa me grē zha co, rownie me zho. <sup>3</sup> Dzigo bnee me lo zho, rēb me:

<sup>4</sup> —Togase nadiēṅ, gzoob ne quanie to tib gayoo mēcwxiil, ni lega naclew rziaab tib ma, ḷzha dieṅ ruṅ to? Led rsaṅ to ma ne ndxie lo to ga lēē, laa to rie rieguib to ma ne bziaab ga, haxta rdziel to ma. <sup>5</sup> Zeeṅe rdziel ma lo to, lo guiēḷbley co haxta rxobyaṅ to ma rdziṅnie to ma ro yu. <sup>6</sup> Lēēlēd rzodiidz tow lo zha ne ndzieeldiidz to, lo zha ne no gax lidz to, sac rley to laa xpēcwxiil to brieēquia. <sup>7</sup> Gni naa lo to gaṅle, scadaa nagoṅ rzac Dios, tib guiēḷbley nrooba lo me, zeeṅe raṅ me laa tib zha ngoopdoḷ rsaan xquieḷntseeb, laa zho rbig lo me. Ne nligaa tib guiēḷbley rac zha co lo me, lēdle zha ne rzac miech wenle nac zho lo me.

<sup>8</sup> Zig rzacgaa tib meṅ wnaa, gzoob ne nzhēṅ me tsii gayoo pes, ni lega naclew rsēeb me tib gayoow, ḷzha dieṅ ruṅ me? Led hor cogazh lēē rquiaa me biini, rsilo me dzega dzega rloob me leṅ lidz me haxta rdziel me dimi co. <sup>9</sup> Zeeṅe rdziel mew, rley me rzodiidz mew lo grē zha ne ndzieeldiidz me, lo grē zha ne no gax lidz me. <sup>10</sup> Zig rne naa ga, scadaa nagoṅ rzac grē xanḷ Dios, tib guiēḷbley nrooba lo zho zeeṅe raṅ zho laa tib zha ngoopdoḷ rsaan xquieḷntseeb, laa zho rbig lo Dios.

<sup>11</sup> Dzigo psilo Jesús bzodiidz me tib cuent lo zho, rēb me:

—Tib meṅ name quanie me chop mēēdbgui. <sup>12</sup> Tib dze, rēb zha ne nac zha niab lo me: “Papá, teḷ pe nac ncuaaṅe no gneedz luu lo no, bzhiguiēḷ niinaga beēṅ-groḷa, zeeṅa gneedz luu miṅe raguiaḷ naa.” Dzigo beēṅgroḷ me ncuaaṅe rap me, bdeed mew lo zho.

<sup>13</sup> Zhisaque goca, pto zha niab co grēse ncuaaṅe biaḷ zho, brieē zho laa zho zie. Bdziṅ zho stib dan, ga beēṅ zho grē guiēlyozh ne gocladztaa zho, grēse xtimi zho pxin zho ga. <sup>14</sup> Tibaque zeeṅe laa xtimi zho blozh, mbanse rac zho guiēṅdraa pe gow zho, ni lēētaque leṅ dze co laa tib gbin psiloque nēz co. <sup>15</sup> Dzigo racse zho güeyguib zho dziin lad guiedz co, ga brieēquia tib meṅ co bree zho, pxeel me zho yquiaanap zho nguts. <sup>16</sup> Lo gbin ne noded zho ga, rzac zho tebaa cho gdeed maase grē duuzhye dan ne row grē nguts co gow zho, per ni miṅ co choot rdeete lo zho.

<sup>17</sup> Sca no zho ga, tibaque zeene biao zho biini psoladz zho nzian zha ne quia dziin lo pxoz zho, grēncuaane raclorow grē zha co, haxta riaana, ni laa zho sca noded ga; rēbchaa zho: <sup>18</sup> “Mazd miñe naca laa naa guia gdziin naa lo pxoz naa stib, guiep naa lo me guñ me naa perdon grētaa falt ne beñ naa lo me, falt ne beñgaa naa lo Dios. <sup>19</sup> Maase sacdraa me naa zig xpēed me, siguiel me ycaania me naa gac naa zig tib zha ne quiaze dziin lo me.” <sup>20</sup> Horco bio zho nēz laa zho zey nēz lidz pxoz zho. Zitraa ziaad zho laa me gonle zho, pquia zdoo me zho gon me zha rac zho; rias me güeydzieelo me zho bnaaz me nia zho, bdeedz me zho.

<sup>21</sup> “Papá”, rēb zho lo me, “rieñ naa nroob falt ne beñ naa lo Dios, beñgaa naa lo luu. Rieguiaidraa sac luu naa zig tib xpēed luu.”

<sup>22</sup> Ni blēzd me nlozh nee zho, lēlēd bredz me zha ne quia xtsiin me, rēb me: “iNa gołtēnie tib nēz lar wen nu gacw xpēed naa! iGołtēnie tib nil wen tso nia me, tib nēz guielguid cub yquia ni me!” <sup>23</sup> Bnabey me zho güeyxi zho tib ngon ne mazdraa ndaan, beet zho, rēb me: “iIb none gac tib lni, none dioow ne, none dio ne! <sup>24</sup> iSac gon guñ naa cuent, brieaban xpēed rii naa! iBnitte me ga, na laa me bdziel!” iLaa lni psilo!

<sup>25</sup> Lni co noyac, zeene laa stib xpēed me zha ne nac zha gol ga, wbire lo dziin dan. Bdziñ zho gax ro yu, rlu rquia di, haxta wiee rlu noyac; <sup>26</sup> dzigo bredz zho tib zha ne quia dziin lo pxoz zho ga, bnabdiidz zho dien pe lni ne noyac. <sup>27</sup> Dzigo rēbchaa zha co: “Bets luu blanso, gane squitaa bnabey pxoz luu noyac lni; rley me gon me mban zho laa zho blanso. Bnabey me gut tib ngon ne mazdraa ndaan.” <sup>28</sup> Blēē zha gol co bin zhow, lo guielblēē co bzēēbd zho ro yu. Nacne brieepxoz zho, bnee me lo zho sēēb zho ro yu. <sup>29</sup> Dzigo rēbchaa zho lo me: “iLēdraaw i gon papá noyūñ luu! Bui ganle blactaa iz ne quiaayūñ naa dziin lo luu, waltaa gard quits naa tib xtiidz luu. Ni zha rna tib dze, siquier tib chiv yeñ ygad luu lo naa, gownie naa grē zha ne ndzieeldiidz naa. <sup>30</sup> Cho dzigo nac zha qui, blozhse güeyloožh zho xtimi luu lo grētaa guielyožh ne beñ zho, na no luu beet luu ngon ne mazdraa ndaan, noyūñ luu zhilni zho.” <sup>31</sup> Dzigo rēbchaa me lo zho: “Nliw xin, ni lalnu gard csaan luu naa, gacxe waa grētaa ncuuañe quianie naa, luu guiaañniew. <sup>32</sup> Per niina ne laa bets luu blanso, ib nonguiela znu dziuūñ ne tib lni gleyne ne me; sac gon bnit me, ni na laa me bdziel. iDziuūñ ne cuent brieaban me nu!”

### Ligier miech par lo guielntseeb

**16** Tib vuelt bzodiidz Jesús tib cuent lo xpēedscuel me, rēb me:

—Tib meñ name nroob rapchen me, quianie me tib zha ne zo lo grētaa ncuuañe rap me; tib dzew, lega nacle bded diag me zhliaan noxiñ zha co xtimi me. <sup>2</sup> Dzigo bredz me zho, rēb me lo zho: “Lēda i gon squi ruñ luu, lega noxiñ luu xtimi naa. Niinaga racladz naa guiaadnie luu cuent nu dien zha quiaayūñ luu dziin; sac grielodraa so luu lo grē ncuuañe rap naa.”

<sup>3</sup> Wbire zho ga, rēb zho: “Zha na ganle guñ naa, telne guiab ne ga naa dziin dan, lēbdraa naa guñ naa dziin co; tel guiaabgaa ne na ga naa gatop naa gon, rtoladz naa gnab naa gon lo miech.” <sup>4</sup> Tibaque zeene biab guic zho rēb zho: “iLaa naa bienle zha guñ naa, zeena tso zha ne guñ xyudar naa zeene laa naa grie lo xtsiin meñ rii!”

<sup>5</sup> Dzigo psilo zho bredz zho zha ne quia guielqui lo meñ ne quia zho xtsiin ga. Bdziñ tib zha co bnabdiidz zho lo zho dien palal nēēb zho lo me. <sup>6</sup> Rēb zha co: “Tib gayoo tamb nceit nac miñe nēēb naa lo me.” Dzigo rēbchaa zho: “Nliw, lalga quia lo tib val ne psañ luu nu. Ledaa val co nu, zac ctsieez luuw; bzhixcuaa stiba, pquiaa lo co, groł tamba zēēb luu.” <sup>7</sup> Bdziñaque stib zha co, bnabdiidz zho lo zho dien palal nac xquielqui zho lo meñ co. Zha co rēb zēēb zho tib gayoo sac zhobxtil. Dzigo rēbchaa zho: “Nliw, lalga raquiet lo val ne psañ luu; per na zac ctsieez luu miñ rii, bzhixcuaa stiba, pquiaa lo co tapgalaque saca zēēb luu.”

<sup>8</sup> Zeene bieñ meñ co zha noyūñ zho, bzee zdoo me gon me scataa ndzielguic zho. Ncuuañe ntoladza, per grēse miech ne zienañ ncuuañ lo guidzliu rii, ndzielguic zho par guñ zho grē guielntseeb. Par miñ co ndziibraa ndzielguic zho lo zha ne no xnēz Dios. <sup>9</sup> Sangue to gzoobladzde to guñ to miñ co, ncuuañe rap to lo guidzliu rii, gołquiina per par guñ to xyudar samiech to. Zeene laa ncuuañ co grē, nenda zacnie zho to, per miñe mazdraa non Diossi ible zacnie me to, zneedz me tib lugar ndzon cuēz to, led yedraa ga pe nitlo.

<sup>10</sup> Zha ne ndzinli ruñdziin tel palal yeense ncuuañe ri-aañnie zho, scaque ndzinli guñdziin zhow zeene guiaañnie zho nrooba. Laa zha ne ndzinlid, miñe guñ zho zeene guiaañnie zho ncuuañ zhis, miñcoque guñ zho zeene guiaañnie zho ncuuañe nroob. <sup>11</sup> Nana zha ne sca gacd ne ndzinlise guñdziin zho ncuuañe no lo guidzliu rii, i zha dzigo grielo guñdziin zho ncuuañe ndzon ne gdeed Dios lo zho zaatne no me? <sup>12</sup> Stiba, tel sca ndzinlide to lo chen beñ, ipe nac zhe ncuuañe guñ to tib ncuuañe chenpaa to? <sup>13</sup> Golgona ganle, grielod gon gleyne to dimi ni gleynieque Dios. Ib none telne Dios rleyne to, me none gleyne to, togo dimigaaw, dimi golleyne.

<sup>14</sup> Grē zha ne nac farisé zeene gon zho sca rnee me, lel rzhidznie zho me, sac tel zhaw rleyniedox zho dimi. <sup>15</sup> Dzigo rēbchaa me lo zho:

—Masaque rzac to nalēē nli miech wen nac to nēz lo Dios, sangue me gon, wen wen nan me zha nac zdoo to. Nli miech ne ran to, zha wen rzoob zho to; sangue Dios ni lalnu rzacd zdoo me miñe ruñ to.

<sup>16</sup> Len dze ne gard guiaad Juan Bautist, niapse xley Moisés ni grē miñe bnee zha ne biadteed xtiidz Dios, miñ co nac miñe güeynañ to. Per zeene psilo Juan pseed me miech, desde hor co laa miech quiaayacnañ stib mod ne grielo yгаа zho zaatne rnabey Dios; gane na nzian zha ne noxco yгаа lugar co. <sup>17</sup> Per guiabde to togo nondraa ley, sac grēse miñe zhobnee lo ley, ijb laaw none gac! iZig nac guidzliu, zig nac gbaa zrieelo nitlow, sangue ley nitloda, tibaque naca!



<sup>18</sup> Gacxe waa, grë zha bgui ne rsëbtsieel niina ni rt-sieelnia zho stib wnaa, zha ne rt-sieelniagaa tib wnaa ne psëëbtsieel, doļ ga quiayun zho; zigtaa doļa padzeela, scaque niina doļa.

### Xcuent tib zha prob lë Lazh

<sup>19</sup> Tib ricw name —rëb Jesús—, niapse grë lar niazh racw me, gzobse dze run me lni lidz me. <sup>20</sup> Zaatne noque me ga, guiedz co no tib zha prob lë Lazh, lala prob me ni rlanaque me guiedz, gdipse lad me noyac-në guiedz co. Riese me riesob me ro lidz zha ricw co, <sup>21</sup> rquiambëz me dien pe grieelod gow me maase ncuaañe rrieengaale lo xmez h meñ co; ga zob me haxta rdziñ grë mëcw rzëëludz ma lo guiedz ne rlan me ga.

<sup>22</sup> Bdziñ dzew laa Lazh gut, dzigo biet xanj Dios beynie zho me lo Abraham, zaatne rdziñ grë zha wen. Goc palal dzew, laa meñ ricw co gutaque, blozhse pquianap zho me, laa zho güeyqueets me; <sup>23</sup> zeene bi-aa me biini laa me nole gabiļ. Lëbdraa me no me lo guieļnë co, lega naclew blis lo me, zit squi gon me Abraham, laa Lazh zobnie Abraham ga. <sup>24</sup> Horco bnab me lo Abraham siguiel Abraham cxeel me Lazh, maase guic mzhugniase Lazh yquiaa Lazh nis tsiegadz Lazh lo ludz me; sac lëbdraa me lo guidox ne no me ga. <sup>25</sup> Dzi-go rëbchaa Abraham lo me: “Xin, psoladz ganle zeene wban luu lo guidzliu, ncuaañe gocladztaa luu pquianie luuw; laa Lazh mbanse bded me. Nagaa na, me nac meñ ne nogaa noyan guieļbley, laa luu bgaa squi no luu lo guieļnë qui. <sup>26</sup> Stiba, zha ne no nëz rii gacd guiaad zho i, niicle zha ne nogaa iw, gacd guiaad zho nëz rii; sac no tib yeedox ne rtse.” <sup>27</sup> “Bzhiguiel sca”, rëb meñ ricw co, “pxeel Lazh tsie me lidz pxoz naa, <sup>28</sup> tsienie me diidz lo zgaay bets naa zha ne biaan, guiab me lo zho ib guñd zho miñe beñ naa, zeena guiaate zho nu yгаа zho lo guieļnëdox rii.” <sup>29</sup> Pquiabchaa Abraham, rëb Abraham: “Tel miñcow, tsow glab zho lo grë ley ne psañ Moisés, lo grë miñe bnee grë zha ne güeyteed xtiidz Dios, beñque lo co zhobnee zha no gban zho.” <sup>30</sup> “Nliw”, rëb me, “per tel squi tib meñ ne gutle tsie tsienee lo zho, rien naa znuse csaan zho xquieļntseeb zho bgig zho lo Dios.” <sup>31</sup> Dziggo rëbchaa Abraham: “Telne rond zho miñe rnabey grë ley ne psañ Moisés, grë miñe bnee zha ne güeyteed xtiidz Dios, scaque gond zho diidz niicle tsie tib zha ne brieebanle tsienee lo zho.”

### Zha ne guñctal xtoļ stib zho

(Mt. 18:6-7, 21-22; Mr. 9:42)

**17** Tib vuelt rëb Jesús lo xpëëdsuel me: —Nac lo guidzliu rii, ib guñfalte ncuaañe rgogui miech guñctal zho xtoļ zho, iper probsaxe zha ne rquiił samiech runctal zho xtoļ zho! <sup>2</sup> Mazd zhi guieļnëw lo zho ygadoo tib quie molin zhobxtil yan zho tsieron zho zho nisdoo, lëdle guieļnëdox ne gan zho; sac gon doļ nroob ga guñ zho yquiił zho zha ndooladz ne no xnëz naa. <sup>3</sup> iGolguien sca ndzinli gol-gac! Tib bets tow, zeene pe tib falt guñ zho lo to,

golnee lo zho guñdraa zhow; telne gnab zho perdon, golgon zho perdon. <sup>4</sup> Niicle telne nzian vuelt sca guñ zho falt lo luu tib dze, beñ zho perdon zeene laa zho rbig r nab zho perdon lo luu.

<sup>5</sup> Stib dzew, rëb zha ne rzënie me lo me:

—Bneedz guieļbiini lo no dib zdooraa no gnalo no Dios.

<sup>6</sup> Pquiab me rëb me:

—Tel niaca miñe gzoob ne rnalole to Dios siquier lal tib midz moxtaz, niicle ncuaañe mazdraa ngañ gnab to lo me, zuñ mew.

<sup>7</sup> iPe ran to ganle, zha nac zha ne run xtsiñ beñ?

Zeene rbire zho dan, yase güey zho gon, güeygaa zho güeyquianap zho ma, pe liaadz meñ ne quia zho xtsiñ ga, guiab me lo zho: “Na bded, bzob, zeena gowxtsee luu.” <sup>8</sup> Miñe run me, gloque rnabey me zho guñlo zho ncuaañe gowxtsee me, gdziib zhow lo me; rlozhraa row me, dzigora rowxtsee zho. <sup>9</sup> Niicle scataa ron zho miñe rnabey me, ni rlozh ga, per ni xquizh rdeete me lo zho. <sup>10</sup> Scaque to nagon, zeene lozh guñ to grë dziin ne pso Dios to guñ to, peet yquiambëzde to, golguien tib nguñdziinse nac to, miñe rieguiaļ to ga, miñ co beñ to.

### Biac tsii zha ne rlan guiedz lepr

<sup>11</sup> Laa Jesús no nëz zie me nëz Jerusalén. Laa me zieded tib guiedz win ne riaañ zaatne ndzieel xtan Samar xtan zha Galilé, <sup>12</sup> zeene brieequia tsii zha ne rlan guiedz lepr. Zit zo zho, <sup>13</sup> nguiedz rbedz zho me, rnab zho lo me yquia zdoo me zho. <sup>14</sup> Zeene gon me zho, rëbchaa me lo zho:

—iGoltsie, goltsielulo lo pxoz, zeena gan zho ganle laa to biacle!

Dzigo laa zho zie. Nëz no zho laa zho biaanmbe lo guiedz co. <sup>15</sup> Lo gza zho, hor co rias tib zho wbire, nguiedz rnee zho:

—iZha ndzontaa Dios! iGolwi ganle laa me beenguiacle naa!

Zigne bdziñ zho lo Jesús, pquiitsgzhib zho lo me, haxta bdziñ lo zho lo liu, rdeed zho xquizh lo me. Tib zha Samara, zha zit nac zho. <sup>17</sup> Dziggo rëbchaa Jesús:

—iYoraazhe grë zha co waa? Conque tsii zho name beenguiac naa. <sup>18</sup> iTibaque zha zit rii dzigo lëe rzac zdoo miñe beñ Dios lo zho?

<sup>19</sup> Dziggo bliso me zha co ga, rëb me lo zho:

—Porne dib zdoo luu gon bnalo luu Dios, gane biac luu. Bzë, peet tsieniedraa guic luu.

### Zeene gbiire guiaad Mgui ne pxeel Dios

(Mt. 24:23-28, 36-41)

<sup>20</sup> Tib dze bnabdiidz zha farisé lo Jesús, rëb zho:

—iPoc dzigo csilo gnabey Dios lo ne?

Dziggo pquiab me rëb me lo zho:

—Gacnañ to ganle, nacd miñ co ncuaañe ganlopaa miech. <sup>21</sup> Grieelod guiab zho laaw psilo nec, laaw psilolegaa nëz rii; sac gon tel niina laa me quianabeyle nu.

<sup>22</sup> Bded ga, rëbchaa me lo xpëëdsuel me:

—Zdziņ dze, gacladz to tebaa zha znu so naa lo to maase tibaque dze, per gacdraaw. <sup>23</sup> Leņ dze co, zio zha ne gnē lo to: “Goltē ganle laa Mgui ne pxeļ Dios bdziņ nu”; gnēgaa zho pa stib lugar none tsie to par gan to naa; tsienalde to, gliladzde to xtiidz zho. <sup>24</sup> Sac zeņe gbiire guial naa, grēse miech gaņa. Zig nac tel guiab tib belye nroob ne glu zhan gbaa desde nēz ne rlan ngbidz haxta nēz ne rzēēb ngbidz, ģniacxe ganđ grēse miecha? <sup>25</sup> Per ansraa ne gac miņ co, ible nroob guieļnē ne cteed miech rii naa, ni lalnu ganđzed zho naa. <sup>26</sup> Leņ dze ne guial naa ga, grē miech ne ndxie lo guidzliu gaļ hor co, zhaa grē ncuaaņe tsonie guic zho. Rsoladz to ganle zha rac miech leņ dze ne biaad Noé, leļ lo grē zhilni zho no zho, zha ne notsieelnia, zha ne nobediņ xpēēd, tibaque zeņe bīaa zho biini laa guiedox co psilole. Laa Noé nole leņ barcw, laa zho bīaaņ grēse zho bnitlo lo nis co. Scadaa nagoņ no miech leņ dze ne guial naa. <sup>28</sup> Zig racgaa miech Sodom leņ dze ne bīee Lot ga. Scaque, loxaque ncuaaņ lo guidzliu rii noxco zho, zha ne no lo zhilni, zha ne no zhiwto, zha ne nozigaa, zha ne quia gon, zha ne quiazhixcuaa-gaa lidz. <sup>29</sup> Lega naclew, zeņe laa Lot bīee, hor co laa tib guidox biēt gbaa, notsa zufr blīaaļa lad guiedz co, grēse miech co bnitlo lo guidox co. <sup>30</sup> Scapaa nagoņ rac miech ne ndxie lo guidzliu leņ dze ne laa naa guial.

<sup>31</sup> Zha ne lēētaque hor co no glaa guic yu, ib guiabđ zho sēēb zho leņ yu tsiebee zho ncuaaņe no leņ lidz zho, zha ne quiagaa lo dziin dana, ib guiabđ zho gbi zho guey zho ro yu. <sup>32</sup> ģGolsoladz ganle zha bzhaac wnaa ne goc tsieel Lot! <sup>33</sup> Grēse miech, zha ne sca rquianē zdoō grē ncuaaņe rap zho, ible znitlo zho xquieļmban zho; sangue zha ne rquiad zdoō grē ncuaaņ co, haxta xquieļmban zho rbeeladz zhow, nitlod zho. <sup>34</sup> Gaļ hor co, zaatne tipse nixguies chop zho, tib zho sēnaļ zhits naa, laa stib zho guīaaņ. <sup>35</sup> Zaatne tipse quīayot chop wnaa, zaatne tipsegaa quia chop mgui lo dziin dana, tib zho sēnaļ zhits naa, laa stib zho guīaaņ.

<sup>37</sup> Dzigo rēbchaā xpēēdscuel me lo me:

—ĶPa lo dzigo gdziņ grē zha co?

Pquīab me rēb me:

—Horco bīi zlu ganle paw. Zig nac grē pech, zaatne nix magut ga rdziņ ma.

### Zha ne r nab lo Dios

**18** Stib dzew, bzodiidz Jesús tib cuent lo xpēēdscuel me, par quieņ zho ib guīaaņđ zdoō zho zeņe racniobđ miņe quīanab zho lo Dios, rēb me:

—Tib guiedz name, no tib meņ co nac me wxtis, ni palal rquiad zdoō me samiech me, per ni Dios rdziebđ me. <sup>3</sup> Guiedz coque no tib zhuz viud, gzobse dze rie zhuz co rienab zhuz guņ me guieļwxtis, cuedz me tib zha co rlēē lo zhuz. <sup>4</sup> Glo ib rquīaadiagd me miņe r nab zhuz co, per zeņe goc palal dze goņ me tibaque quia meņ co quīanab me gac guieļwxtis, dzigotaa rēb me: “Ncuaaņe lēbđraa guic naa lo meņ rii, tibaque squi quia me. Nli rdziebđ naa Dios, niicle nodgaa naa liaadz

pe rzac miech, per parne guīadguņneetraa me naa, miņe naca mazd laa naa guņ guieļwxtis ne r nab me.”

<sup>6</sup> Blozhse bzodiidz Jesús cuent co, rēbchaā me lo zho:

—Telne sca bdziņ dze ne pquīaadiag zha ntseeb co miņe bnab wnaa viud co, <sup>7</sup> Ķpe leļ Dios dzigo yquīaadiagd xtiidz zha ne ngab lo me, tel tibaque gnab zho miņe racladz zho? <sup>8</sup> ĶNligaa, ib tedsod zuņ me miņe r nab zho! Per segur zhis zho quīambēz gac xquieļwxtis me, zeņe laa naa guial stib.

<sup>9</sup> Laa grē zha ne riats, zha ne rzac masaque zha wen nac zho nēz lo Dios, haxta rbix zdoō zho raņ zho grēraa miech, bnee Jesús lo zho, rēb me:

<sup>10</sup> —Chop zha name, bdziņ zho leņ yadoo ziezodiidznie zho Dios. Tib zho nac zha farisé, stib zho nac zha ne rtop dimi ne razh lo rey Roma. <sup>11</sup> Zha ne nac farisé ga, psilo zho rnee zho: “Dios, rnedz naa xquīzh lo luu, sac nacđ naa zigne nac grē miech ngoopđoļ, zig nace zha ne zo i. Wlaltaa ruņđ naa guieļgbaan, ruņđ naa guieļntseeb, niicle rquīangoobđ naa stib wnaa.

<sup>12</sup> Haxta chop vuell rcuan naa tib leņ zhmal, grēse ncuaaņe ruņ naa gan, ruņ naaw tsii lal, rnedz naa tib lal miņe rieguīaļ luu.” <sup>13</sup> Laa zha ne rtop dimi ne razh Roma ga, gaxaque ga zo zho, per nquītsruņse zho liu. Mban rac zho, quīase nīa zho zdoō zho, rnee zho lo Dios: “ĶDios, r nab naa lo luu pquīa zdoō naa znutaa miech ngoopđoļ nac naa!”

<sup>14</sup> Gneli naa lo to ganle —rēb Jesús—, mazdraa goņ wen bīaaņ recaudador co lo Dios, lēdle zha farisé co. Sac zha ne lēēque zha ruņnon zho, racnond zho lo Dios, laa zha ne rīaaņwin, ruņnon me zho.

### Beenlay Jesús mēēdlas

(Mt. 19:13-15; Mr. 10:13-16)

<sup>15</sup> Tib dze, nzian meņ ne bdziņ lo Jesús, bdziņnie zho xpēēdlas zho lo me, parne cxobnia me guic win guņlay me win. Grē zha ne nac xpēēdscuel me, leļ psilo zho ndox zho lo grē zha ne bdziņnie grē mēēdlas co.

<sup>16</sup> Zeņe goņ me sca quīayun zho, dzigo bredz me zho, rēb me lo zho:

—ĶCtsirede to grē mēēdlas yeeņ qui! ĶGolsaan guīaad win lo naa! Sac goņ grē mēēdlas yeeņ qui, ni zha ne nac zig nac win, zha co nac zha ne sēēb ygab lo Dios.

<sup>17</sup> Nligaa zha ne gacndooladz, zha ne gliladzđ dib zdoō, zigne ruņ grē mēēdlas, grieelod gdziņ zho zaatne rnabey Dios.

### Ncuaaņe ruņ dimi

(Mt. 19:16-30; Mr. 10:17-31)

<sup>18</sup> Tib vuell, wbig tib meņ ne nac zha non lo meņguiedz Israel, rēb me lo Jesús:

—Naņ naa luu nac tib meņ ne noseed miech, ni tib meņ wen nac luu, Ķbnē lo naa dien, pe nac miņe guņ naa parne grieelo ygaa naa guieļmban ndzon ne gdziņđ dze lozh?

<sup>19</sup> Pquīab Jesús rēb me:

—Rnee luu lēē tib miech wen nac naa. ĶNligaaw, Diosse goņ nac meņ wen! <sup>20</sup> Telne nli racladz luu ygaa

luu guielmban co, none tsoxco luu gban luu zigne nac Xley Dios. Nanle luu ganle zha naca, rneew:

Tsonied luu zha ne led tsiæld luu,  
gute luu samiech luu,  
cuand luu samiech luu,  
yquiadiidzguizhd luu samiech luu.  
Goṅ pxoz luu, goṅ xnīaa luu, cueed luu xquielto me.

<sup>21</sup> Dzigō rēbchaa meṅ co:  
—Maestro, grēse miṅe bzeet luu i, ni tiba gard quits naa wlal ne nac naa zha nguieg.

<sup>22</sup> Horco rēb Jesús lo me:  
—Stibaque miṅe rquiin guṅ luu. Güey, güeyto grēse ncuaaṅe quīanie luu, dzigo bdiiz dimi co lo grē zha mban ne guiēṅd pe yquiin; sca nroobraa guielnzaac ne ygbaa luu gbaa. Lozh ga, dē, dēnaḷ zhits naa.

<sup>23</sup> Zeēṅe bin meṅ co sca rēb Jesús, mbanse rac me laa me zey; sac nroob ncuaaṅe quīanie me. <sup>24</sup> Dzigō rēbchaa Jesús lo xpēēdsuel me:

—iZha nganṭaa lēē, rzac zha ne squi rapcheṅ sēēb zho xnēz Dios gnabey me zho! <sup>25</sup> Mazd nganṅdse rded tib camell guieer guzh.

<sup>26</sup> Grē zha ne ndxie ga, zeēṅe bin zho sca rēb me, rneechaa zho:

—Telne scataa ngaṅ sēēb miech xnēz Dios, ḷchösezhe dzigo waa nac zha ne zrieelo sēēb xnēz me?

<sup>27</sup> Dzigō rēbchaa Jesús:

—Nligaa par miech, zootle tsod zha ne grielo sēēb xnēz me; saṅgue me naṅ me no zho. Sac tel me, tsod ncuaaṅe grielod guṅ me.

<sup>28</sup> Horco pquiab Pedr, rēb Pedr lo me:

—Tel no, grē ncuaaṅe rdziaapse no psanṅ now, laa no ziaadnaḷ zhits luu.

<sup>29</sup> Pquiab me rēb me:

—Golḡacnaṅa ganle, grēse zha ne psanṅ lidz, psanṅ zho tsiel zho, psanṅ zho xpēēd zho, psanṅ zho pxoz zho, psanṅ zho xnīaa zho, psanṅ zho bets zho, bziangaa zho, porne bzēēb zho xnēz Dios, <sup>30</sup> na lo guielmban riique, mazdraa nroob miṅe ganṅ zho, ni lozh ga ib tedsod zgaa zho guielmban ndzon ne gdziṅdraa dze lozh.

### Bzeet Jesús stib zha csacsi miech me

(Mt. 20:17-19; Mr. 10:32-34)

<sup>31</sup> Ne sca no Jesús nēz zie me nēz Jerusalén, tibaque bredz me gza tsiipchop zha ne rzēniepaa me ga, bzeet me lo zho zha guṅ miech me, rēb me:

—Grēse miṅe bzeetle zha ne biadteed xtiidz Dios padzeela teed naa, niina ne laa ne gdziṅ Jerusalén, laaw gac cumplir. <sup>32</sup> Ga gnaaz zho naa, tsielo zho naa ladznia grē zha ne nacdraa zha Israel, xidznie zho naa, squiaago zho naa, stsuc zho lo naa, <sup>33</sup> zgūiṅ zho naa, ni haxta zut zho naa. Per zeēṅe gac tsonṅ ngbidza, zriebaanaa.

<sup>34</sup> Per ib biēṅd zho dieṅ zha nacne sca rnee me.

### Biac tib zha ne roḷd lo

(Mt. 20:29-34; Mr. 10:46-52)

<sup>35</sup> Laa Jesús bzēēb ro guiedz Jericó, miech guizhiu ne naḷ zhits me. Ro nēz co zob tib meṅ ne roḷd lo, rnab me

gon. <sup>36</sup> Zeēṅe biēṅ me rlu nzian miech noded ga, dzigo bnabdiidz me dieṅ pe nacne scataa ziaad grē miech co ga. <sup>37</sup> Dzigō rēb zho lo me, Jesús, meṅ Nazaret ziaad ga, zhits me ziaadnaḷ grē miech co. <sup>38</sup> Horco psilo me nguiedz rbedz me, rnee me:

—iJesús, meṅ xtii rey David, pquia zdoo naa!

<sup>39</sup> Grē zha ne ner, psilo zho ndox zho lo me parne guioog ro me, per lel hor cole nguiedzraa rbedz me Jesús, rnab me yquia zdoo Jesús me. <sup>40</sup> Nacne zeēṅe bdziṅ Jesús gax zaatne zob me, blēz Jesús, bnabey Jesús güeyxi zho me. Bdziṅ me lo Jesús, rēbchaa Jesús lo me:

<sup>41</sup> —iPe nadiēṅ guṅ luu naa?

Pquiab me rēb me:

—iRacladz naa guiac lo naa!

<sup>42</sup> Dzigō rēbchaa Jesús:

—iNiinagazh goṅ laa luu ganṅ stib! Laa luu biac, sacne dib zdoo luu bnalo luu naa.

<sup>43</sup> Horcogazh laa meṅ co psilo bui, iṅe rley me roolnie me Dios, laa me zianaḷ zhits Jesús. Haxta grē miech ne zianaḷ ga, zeēṅe goṅ zhow, ye zho roolnie zho Dios.

### Güey Jesús lidz tib meṅ lē Zaquew

**19** Guiedz Jericó, ga no tib meṅ ne rnabey lo grē zha ne rtop dimi ne razh lo rey Roma, lē me Zaquew. Zeēṅe laa Jesús zieded lad guiedz co, <sup>3</sup> brieē me, ziewi me, sac racladz me guṅbey me Jesús. Bdziṅ me, pasēse me ganṅ me Jesús, sac lala miech guizhiu ne naḷ zhits Jesús, ni lala ndopse me. <sup>4</sup> Miṅe beenṅ me, rias me bdedner me güeytsep me tib lo yag guigw zob ro nēz co, par gdeeda diidza ganṅ me Jesús, zeēṅe laa Jesús ted ga. <sup>5</sup> Zeēṅe laa Jesús bded ga, blis lo Jesús goṅ Jesús laa me zob ga, dzigo bredz Jesús me, rēb Jesús lo me:

—Zaquew, na zeēṅa biet i. Sac racladz naa, lidz luu cuēz naa nadze.

<sup>6</sup> Rley Zaquew goṅ Zaquew sca rēb Jesús, lēlēd biet me lo yag co, laa me zienie Jesús nēz lidz me.

<sup>7</sup> Zeēṅe goṅ grē miech cow, rlēē zho, rnee zho:

—iPe lēētaa lidz zha ngoopdoḷ qui ziebēz me!

<sup>8</sup> Laa Zaquew, iṅe rley zobnie Jesús. Tibaque bzoli Zaquew, rēb Zaquew:

—Gacnaṅ luu goṅ, lo grē ncuaaṅe rap naa, laa naa gded groḷa ygaaz lo grē zha ne guiēṅd pe yquiin, ni tel nogaa zha ne ndziibraa miṅe beenṅquizh naa zho, naa maase ctsiree naa tap lal miṅe blan naa zho ga.

<sup>9</sup> Horco pquiab Jesús, rēb me lo zha ne ndxie ga:

—I nagoṅ rlu laa meṅ qui wbigle lo Dios, parne ycaania Dios me. Nli zha xtii Abraham nac me, per bzonzi-aab me <sup>10</sup> ni naa ne nac naa Mgui ne pxeel Dios, ible laa naa zial zialsilaa naa grē zha ne zonziaab.

### Zha ne biaaṅnie dimi

<sup>11</sup> Grē miech ne zianaḷ zhits Jesús ga, rzac zho zigne laa me gdziṅ Jerusalén, laa me sob gac me zhirey zho; nacne bzodiidz me tib cuent rii, rēb me lo zho:

<sup>12</sup> —Tib xpëed zha non name, no me tib guiedz win, nacle diidza laa me no tsie zaatne zob meñ nroob ne rnabey, parne gzo zho me gac me rey guiedz ne no me ga. <sup>13</sup> Zeene laa dze co bdziñ, dzigo bredz me tsii zha ne quia xtsiñ me, nroob dimi ne psañ me lo zho tib tib zho, parne guñdziin zhow, mientras gbire me.

<sup>14</sup> 'Nzianlaa zha ladz me, rlëe zho ran zho me, dzigo pxeel zho bla zha ne güey lo meñ ne rnabey ne zie me ga, güey nab zho gdeete meñ co dziin co lo me. <sup>15</sup> Per niicle sca güey grë zha co, peet brielod niuñ zho. Blozhse bzo rey co me, laa me bdziñ ladz me. Zeene bdziñ me, bredz me gza zha ne biaanñie xtimi me ga, par dien palal ziyaca. <sup>16</sup> Bdziñ tib zho, rëb zho: "Laa xtimi luu nu gon, tsii lal miñe psañ luu ga naca niina."

<sup>17</sup> Rley me rëb me lo zho: "iZha squi nagon racladz naal iWen brieequia xtsiñ luu! Niicle zhis ncuaañe psañ naa lo luu, per bien luu niowse beñdziin luuw. Na nagon, laa naa gzo luu, gnabey luu tsii guiedz." <sup>18</sup> Bdziñ stib zho, rëb zho: "Laa xtimi luu nu gon, gaay lal miñe psañ luu lo naa ga naca niina." <sup>19</sup> Scaque rley me. Bzo me zho gnabey zho gaay guiedz. <sup>20</sup> Zeene bdziñta zha tib zho, rëb zho: "Nli beñdziind naa xtimi luu, sac nanle naa zha nac luu, niicle paraa niuñdziin naaw, grëse miñe niuñgan lo luu niaan; gane mazd pquia naaw tib lë lo lar, blootsow naaw, ledaaw nu." <sup>22</sup> Blëe guic me, rëb me lo zho: "iBiche nu, paat rquiind naa miech yozh ne squi nac! Conque nanle luu zha nac naa,

<sup>23</sup> z pex nac dzigo waa bioxcod luu maase mbediñ luu dimi qui, ndziniaaw palal ncaania naaw niina?" <sup>24</sup> Dzigo rëbchaa me lo grë zha ne ndxie ga: "Niinagazh golcob dimi qui nia zha qui, goldeeda lo zha ne ziaadnie tsii lala i." <sup>25</sup> Pquiab zho rëb zho: "Per pe nacne zha coque ycaaniaw, ni nrooblew beenlo zho." <sup>26</sup> "Ib sca no gaca", rëb me, "sac zha ne rien zha guñdziin zho ncuaañe rcaania zho, nroobraa ncuaañe ycaania zho. Laa zha ne squi nac, haxta miñe pcaaniale zho, zdiooba lo zho.

<sup>27</sup> Sangue zha ne sca ptsidiñ niac naa rey, goltsixi zho, niinaga racladz naa ganlo naa gut to zho."

<sup>28</sup> Blozhse bzodiidz Jesús cuent co lo zho, laa zho bio nëz stib, nerse me lo zho. <sup>29</sup> Zeene bdziñ zho gax Gui Oliv, zaatne ndxie guiedz Betfagé ni guiedz Betain, pxeel me chop xpëedscuel me, <sup>30</sup> rëb me lo zho:

—Goltsie guiedz win ne ndxie danse lo ne i. Ga gdziñ to zaatne quiadoo tib burr yeen ne choot gard sob lad, dzigo golxadz ma, gol'tenie ma nu. <sup>31</sup> Tel cho gnabdiidz lo to pe nacne noxadz to ma, golguiab lo zho: meñ ne rnabey ne, meñ co rquiin ma.

<sup>32</sup> Laa zho zie. Bdziñ zho, zaatne quiadoo burr co, <sup>33</sup> nligaa, lëetaque noxadz zho ma, zeene laa bizhuan ma bdziñ.

—iPe gon to xpurr naa? —rëb me lo zho—. iPe nacne noxadz to ma?

<sup>34</sup> Dzigo rëbchaa zho: —Meñ ne rnabey ne, meñ co rquiin ma.

### Bdziñ Jesús Jerusalén

(Mt. 21:1-17; Mr. 11:1-11, 15-19; Jn. 2:13-22; 12:12-19)

<sup>35</sup> Bdziñ zho ma lo Jesús, pxob zho lar ne rbix zho lad ma, bzob me ma. <sup>36</sup> Zigse zie me, no grë miech guizhiu co rta zho xab zho ro nëz rded burr ne zob me ga. <sup>37</sup> Grëse miech co, rley nie zho me. Laa zho xiuxto dze cho gui Oliv, zeene psilo zho nguiedz zëeb tsi zho, rley zho roolnie zho Dios, por grëtaa milagr ne ziyañ zho ruñ Jesús; <sup>38</sup> rnee zho:

—iNasi laa Dios pxeel zhirey ne! iZha ndzontaa Dios! iHaxta gbaa noyac guiebley dze rii!

<sup>39</sup> Blalaa zha farisé ne ziana ga, zeene gon zho zha roolnie grë miech co me, wbig zho lo me, rnab zho gnee me lo zho guioog ro zho. <sup>40</sup> Dzigo rëbchaa me: —iZac guioog ro zho, per hor co dzigo laa grë quie rii csilo gooñiew naa!

<sup>41</sup> Zeene bdziñ me zaatne nieenpaa Jerusalén, psilo biab guieñe me, biin me gon me guiedz co, <sup>42</sup> rëb me: —iProb to meñ Jerusalén! iTebaa ye to niñ niuñbey to meñ ne needz guiebley rii lo to! Per na ib biende tow, masaque rzac to zig zha ne nioog lo. <sup>43</sup> Na nagon laa dze co bdedle. Grë zha ne rlëe lo to, ible ziaad zho ziadsioog corral zho to, ni tib nëz tedlaade to lo zho,

<sup>44</sup> haxta guiab to ladznia zho, grë xpëed to. Znitlo zho ladz to, nëzrii nëzrec glaa zho grë quie ne niaa grë lidz to i; sac squi been to ib pcaaniade to Dios, zeene bi-aadpaa me nsilaa me to lo xto lo to.

<sup>45</sup> Bdziñ me Jerusalén, güey me yadoo, psilo me blee me grëse zha ne noyñ lgui ga, rëb me lo zho: <sup>46</sup> —Znu zhobnee lo Xtiidz Dios: "Zaatne nac lidz naa, ga none guiaad miech gzodiidznie zho naa." Laa to gon, quiayun to lugar rii zig tib zhibliee ngbaan.

<sup>47</sup> Bded ga, gzobse dze rie me rieseed me miech len yadoo ga. Nacne psilo grë pxoz ne rnabey, grë maistr ley, ni grë zha ne nac zha non lo menguiedz, quiaguib zho dien zha gdeeda diidz gut zho me. <sup>48</sup> Per rdzielid zho dien zha gon zho, sac tibaque ndxie miech lo me, grëse zho rquiaadiag zho zhiwseed me.

<sup>49</sup> Bded ga, gzobse dze rie me rieseed me miech len yadoo ga. Nacne psilo grë pxoz ne rnabey, grë maistr ley, ni grë zha ne nac zha non lo menguiedz, quiaguib zho dien zha gdeeda diidz gut zho me. <sup>48</sup> Per rdzielid zho dien zha gon zho, sac tibaque ndxie miech lo me, grëse zho rquiaadiag zho zhiwseed me.

<sup>49</sup> Bded ga, gzobse dze rie me rieseed me miech len yadoo ga. Nacne psilo grë pxoz ne rnabey, grë maistr ley, ni grë zha ne nac zha non lo menguiedz, quiaguib zho dien zha gdeeda diidz gut zho me. <sup>48</sup> Per rdzielid zho dien zha gon zho, sac tibaque ndxie miech lo me, grëse zho rquiaadiag zho zhiwseed me.

### Bnabdiidz zho cho nac Jesús

(Mt. 21:23-27; Mr. 11:27-33)

<sup>20</sup> Len dze ne sca noseed me miech len yadoo, nonee me lo zho zha nac Xtiidz Dios, tib vult bdziñ bla zha ne nac pxoz ne rnabey, grë zho bla maistr ley ni zla meñ ne nac meñ non lo menguiedz, <sup>2</sup> r nabdiidz zho lo me dien cho nac me, cho rnabey me, zha nacne sca quiayun me. <sup>3</sup> Dzigo rëbchaa me lo zho:

—Ye naa laa naa gon tib wnabdiidz lo to. <sup>4</sup> Golñe dien cho pxeel Juan zeene biadchoobnis Juan miech, zpe Dios pxeel Juan, te miechsew ye?

<sup>5</sup> Psilo zho r nabdiidzlsa zho dien zha ctsire zho lo xtiidz me, rnee zho: —Telne dzieets ne Dios pxeel Juan, dzigo laa me grë: "iPex nac dzigo waa bliladzde to miñe bnee Juan?" <sup>6</sup> Tel na dzieetsgaa ne, miechse pxeel Juan, grieequiadaque ne; zgoquie menguiedz ne, sac grëse zho rililadz Dios pxeel Juan.

<sup>7</sup> Dzigo mazd lëe gdib miñe been zho, rëb zho nanñ zho dien cho pxeel Juan. <sup>8</sup> Nacne rëbchaa Jesús lo zho:

—Niicle naagaa nagon, grieelod gni naa lo to cho rnabey naa quiayun naa grë miñ rii.

**Xcuent zha ne pquiapan liu**  
(Mt. 21:33-46; 22:15-22; Mr. 12:1-17)

<sup>9</sup> Blozhse ga, biire psilo me noseed me grë miech co. Bzodiidz me tib cuent rii lo zho, rëb me:

—Tib men name, nroob lbë uv beenbni me lo liun me. Blozh ga blediin me liu co lo bla zha ne ran liu, dzigo laa me brieë ga, zey me stib dan.

<sup>10</sup> Zeene gol mëë ne laa nex co gol, pxeel me tib zha ne quia xtsiin me zie lo zha ne quianap liun me ga, parne gdeed zha co nex ne rieguial me ycaa me. Per lel bnaaz zho zha ne pxeel me ga, bdiñ zho zho, blozh ga scase bzonëz zho zho. <sup>11</sup> Wbiire pxeel me stib zho, scaque peet bdeete zho lo zho, lel ndox zho lo zho, bdiñ zho zho. <sup>12</sup> Pxeelaque me stib zho, goc zho tson, scasaque been zho, haxta psiwee zho zho. <sup>13</sup> Quianie me tib mëëd, rleynie me mëëd co. Zeene gon me sca been zha co, rëbcha me: “Miñe naca laa naa cxel xpëëd naa, zeene gan zho xpëëd naaw, peet gunñ zho me, nend zon zho xtiidz me.”

<sup>14</sup> Pex guien zho cho nac xpëëd me, zeene gon zho men co, rëb zho: “Lëë zha qui nagon guiaanne liu rii! ;Golgotsaa dziuut ne zho, zeena guiaana lo ne!”

<sup>15</sup> Bnaaz zho xpëëd me, güeynie zho me zaatne nac tib lad lo liu co, ga güeygut zho me.

‘Zha sca dien rzac to gunñ bizhuan liu co gza zha ntseeb co? <sup>16</sup> Ib tedsod lëë, zeene gbire me, znitlogazh me zho. Lozhse ga, cuediinga me liun me lo zla zha ne gunñziina.

Zeene bin zho sca rëb me, rneechaa zho:

—;Ib lic Dios qui, dziuunscad no!

<sup>17</sup> Dze bui me lo zho, dzigo rëbcha me:

—Per led znu lëë, zhubnee lo Xtiidz Dios: “Quie ne psëëb zha ne nozaa yu, ni nanñ zho lëëpaa quie co nac miñe rnazdziits yu.”

<sup>18</sup> Ni quie co gon, zha ne tsietsobe low, zac zho zig tib ncuaañe rac tson tap lë; laa tel lëëgaaw tsoe lad zho, zac zho zig tib ncuaañe die die rac.

<sup>19</sup> Grë zha ne nac pxoz ne rnabey, ni grë maistr ley, hor co bien zho miñe nac zho ga, bzeet me lo cuent co. ;Gocladz zho gagazh naaz zho me! Per bdzieb zho, niactseeb grë miech ne ndxie ga. <sup>20</sup> Dzigo miñe been zho, pxeel zho bla zha ne zie ziegungüet me par cxin me tib diidz, dzigo miñ co yquiaaqui zho tsiezo zho me lo zhiwxtis zha Roma. Rquiaalo zha co, no zho liaadz dien zha gzoobdiag zho xtiidz Dios, <sup>21</sup> bdziñ zho lo me, bnabdiidz zho rëb zho:

—Maestro, ndion no niapse diidzli ziena luu, ni sca-gaa zeene rseed luu miech, rguibd luu guianñziuu luu lo zho, sinque niapse miñe nac diidzli, miñe rlu zha sëëb zho xnëz Dios, miñ co rnee luu lo zho. <sup>22</sup> Gane nina, racladz no gnë luu dien pe nonguiela ga rdeed no dimi ne razh lo rey Roma, te nonguiel da ye.

<sup>23</sup> Bienga me racladz zho gunñgüet zho me, dzigo rëbcha me lo zho:

<sup>24</sup> —;Golneedz tib xpes to nu ganle!

Dzigo bdeed zho tib pes lo me. Blozh ga, rëbcha me lo zho:

—;Cho nu? ;Cho lë nu quia lo pes rii?

Pquiab zho rëb zho:

—Lëë rey Roma i, lëë lë me i quia lo qui.

<sup>25</sup> Dzigo rëb me lo zho:

—Miñe rieguial sca ycaa rey Roma, goldeeda lo rey Roma; scaquegaa miñe rieguial ycaa Dios, lo Dios goldeeda.

<sup>26</sup> Bzee zdoo zho gon zho sca ptsire me lo xtiidz zho. Mazd dzese bre zho, sac bdziidz zho zha niungüet zho me; gocladz zho squi ndxie miech nxiñ me pe tib diidz, per brieelod niungüet zho me.

**;Pe nli zrieëban miech?**  
(Mt. 22:23-33; Mr. 12:18-27)

<sup>27</sup> Blozh ga, güeyaque zla zha saducé lo Jesús. Nac zha saducé rliladz zho zdziñ dze grieeban miech; bdziñ zho, rëb zho lo me:

<sup>28</sup> —Maestro, znu psan Moisés diidz: telne glo mgui guet lo wnaa ne nac tsiel mgui, ni gopd wnaa mëëd, dzigo none betsaque zho ctsieelna wnaa co stib, zeena gap wnaa mëëd ne guiaañ xlugar xpëëd zha ne gut ga.

<sup>29</sup> Bio tib dii zha co znu bzhaac, gadz bets nac zho. Ptsieelna zha ne nac zha gol, zeene laa zho gut, bi-aanñ xpëëd zho. <sup>30</sup> Dzigo ptsieelna wnaa co stib bets ngutoo co. Blozh ga, gutaque zha co, pa së zho nsañ mëëd. <sup>31</sup> Ptsieelnaque me stib zho, goc zho tson, niicle zha co psandaque mëëd. Sca sca haxta bza gza gadzse zho ptsieelna me, <sup>32</sup> tibaque zeene yeque me laa me gut. <sup>33</sup> Miñe racladz no gacndion no, ;chopaa dzigo gac tsiel wnaa co, zeene laa zho grieeban, ne sca gza gadzse zho ptsieelna me?

<sup>34</sup> Pquiab Jesús rëb me:

—Tiba, gacnañ to ganle, lo guielmban riise rtsieelna miech. <sup>35</sup> Zeene grieeban zho, zig nac zha ne yгаа guielnaac gdziñ zho zaatne no Dios, led yedraa ga ctsieelna zho. <sup>36</sup> Sac laa zho mbanle ga, gdziñdraa dze guet zho. Masaque laa zho gac zig nac grë xanjil me, mëëd gac zho lo me. <sup>37</sup> Laa stiba, gacnañ to ganle ible zrieëban grë mengut. Golwi ganle, zeene bzeet Moisés zha rëb Dios lo me zeene gon me tib yag zarz ne noy-azbel ga; ga rlu rrieëban mengut. Rëb Dios lo me: “Naa nac Dios ne rliladz Abraham, naa nac Dios ne rliladz Isaac, naa nac Dios ne rliladz Jacob.” Zeene sca rëb me, ga rlu ganle mban zha co. <sup>38</sup> Sac tel me, nacd me xDios mengut, sinque xDios zha mban nac me. ;Par me, grëse zha ne ngab lo me, zha mban nac zho!

<sup>39</sup> Blalaa maistr ley zo ga, gon zho sca rëb me lo zha co, dzigo rëbcha zho lo me:

—Maestro, nli squi naca zigne rnee luu i.

<sup>40</sup> Dzigoataa ni stib zho beendraa pe nabdiidz zho lo me.

**;Cho xpëëd nac Crist?**

(Mt. 22:41-46; 23:1-36; Mr. 12:35-40; Lc. 11:37-54)

<sup>41</sup> Horco bnabdiidz Jesús lo zho, rëb me:

—¿Zha nac dien ne rnee zho tib xpëëdaque rey David gac Meñ ne nacle diidz cxeel Dios ga? <sup>42</sup> Led Davitaque name znu bnee tib lo salm ne pquiaa me:

<sup>43</sup> Bnee Dios lo meñ ne rnabey naa, rëb Dios lo me: “Cue naa nëz derech, nu bzob, nieeda lozh gnaz naa grëse zha ne rlëe lo luu, csan naa zho ladznia luu.”

<sup>44</sup> Gase ganle rlu, led scada; telne nli zha xtii David gac meñ co, ¿zha nac dzigo ne lëëque David rnee ne me rnabey David?

<sup>45</sup> Squi ndxie grë miech co noquiaadiag zho, zeene bnee me lo xpëëdscuel me, rëb me:

<sup>46</sup> —Golguien gon, ib tsienalde to mine run maistr ley. Sac grë zha ne nac maistr ley, rdziladz zho racw zho lar nool, haxta zhits ni zho rbiba, rdziladz zho ndooladz rquiaabdiuzh miech zho zaatne rdzieel zho zho ro nëz. Zig nac len yadoo, zha nac zha ne rzob lo xcan zaatne rzob grë zha non; zeene riegaa zho tib lo lni lidz miech, lëëpaaze zha nac zha ne rzob groj mezh zeene laa wagw rac. <sup>47</sup> Ni rlozh ga, rio zho rla zho tel pe ncuane rapse grë wnaa viud; ni parne peet guiabd miech lo zho, xtse rzo zho rzadraa pe lay ne rool zho. Sca run zho, iper ib tedsod nroob caxtigw ne ygaa zho!

#### Gon ne bdeed tib wnaa viud

(Mt. 24:1-2; Mr. 12:41-44; 13:1-2)

**21** Laa Jesús no len yadoo ga noseed me miech. Ga no me, gon me zha rdziñ grë zha ricw, nroob dimi rsan zho len alcancí ne zob ga. <sup>2</sup> Tibaque zeene bdziñ tib wnaa viud, tib meñ proba, ye me laa me psan chop gaay win len alcancí co. <sup>3</sup> Zeene gon Jesús, rëbcha me:

—Gneli naa lo to ganle, mazdraa gon non gon ne bdeed wnaa viud qui, lëdle grë gon ne psan grë zha qui. <sup>4</sup> Sac tel zha, dimi ne rianle lo zho i rgogon zho; sangue wnaa prob qui gon, centav yeen ne quianiese me, mine rnalopaa me gziuu pe yquii me, per laa me bloogona.

<sup>5</sup> Laa Jesús zieriee ga, zeene psilo bla zha ne nac xpëëdscuel me, rlozhd gwi zho zha niaa yadoo co, rzee zdoo zho ran zho grë quie ne niaaw, grë ncuane ngalguiee lena. Zeene gon mew, rëbcha me lo zho:

<sup>6</sup> —Niicle squitaa gon ran to niaaw niina, per dzdiñ dze ne nitlow, dib nacew. Ni stib quie qui guiaandraa zigne squi zhobxcuaaw i.

#### ¡Nsin golso!

(Mt. 24:3-28; Mr. 13:3-23)

<sup>7</sup> Bded ga, bnabdiidz zho lo me, rëb zho:

—Maestro, ¿poc dzigo gac mine bzeet luu ga? ¿Zha glu zeene laaw ziaadyob gac?

<sup>8</sup> Dzigo rëbcha me lo zho:

—Nsin golso, zeena choot yquidiede to. Sac nzian zha ne grieequia, guiab zho laa dze co bdziñle, guiab zho zha nac Meñ ne zëëble diidz ga cxeel Dios. ¡Ib gliladzde tow! <sup>9</sup> Zeene gon to pa lo ndxiidil tib guiedz, pa lo noyacgaa grë dilidox, ib gdziebde to. Ib none gac grë ncuane co, per lega loxaque mine csilosew ga.

<sup>10</sup> Grë guiedz nroob, laaw tilnie saguiedz nrooba; grë zha ne rnabey grë guiedz nroob, laa zho tilnie sazha rnabey zho. <sup>11</sup> Nëzrii nëzrec csilo gni grë zhodox, nzian zaatne gan miech gbin, zaatne glaangaa zho grë guielguidzdox. Nzian grë ncuane glu zhan gbaa, nzian grë ncuane co, ncuane ctseb miecha. <sup>12</sup> Per an-sraa gac grë ncuane co, stsidil miech to, squiana zho to; znaaz zho to, tsiezo zho to lo wxtis ne rnabey yadoo, zha co co to ladzguiib, ni haxta ziezo zho to lo wxtis ne rnabey guiedz, loxaque porne nac to zha ne no xnëz naa. <sup>13</sup> Ga nagon gdeeda diidz gnee to lo grë zha co, gacnan zho ganle cho nac naa. <sup>14</sup> Ib gunde to tso to zhgab dien pe guiab to lo zho, zeene laa to ct-sire lo mine rquiaqui zho to; <sup>15</sup> sac naa gnedz guielbiini lo to, zeene laa to gnee guien to pe guiab to. Zha ne gona, squiaadiag zhow, per ni gdziel zho pe ctsire zho lo to.

<sup>16</sup> Haxta pxoz to, xniaa to, bets to, grë menlidz to, grë zha ne ndzieeldiidz to, stsidil zho to, lëëque zha tsielo to ladznia zha ne csacsi to. Lo grë to, zio zha ne haxta zet ladznia grë zha co. <sup>17</sup> Grëse miech glëe gan to porne nac to zha ne no xnëz naa. <sup>18</sup> Nli stiche zho xquielmban to lo guidzliu rii, per, jni tib guits guic to, grieelod zho gnitlo zho! <sup>19</sup> Tiblique sca golgac, sozite to lo naa, zeena ygaa to guielmban ndzon ne gnedz Dios.

<sup>20</sup> Zeene gan to igose guiedz Jerusalén ndxienap menguiib, nanle to len dze co laaw nitlo. <sup>21</sup> Grë zha ne no guiedz ne ngab Judé, none xoon zho tsie zho nëz yagui, ga tsietsolan zho. Zha ne no Jerusalén nu, none grieniob zho. Grëgaa zha ne quia dziin dana, ib guiabd zho gbire zho lad guiedz. <sup>22</sup> Tib guielndox ne csiaab Dios gan grë miech rii len dze co, ga gac grë mine raquiet lo Xtiiidz me ted zho. <sup>23</sup> ¡Prob grë meñ wnaa ne lëetse len dze co zoney xpëed, meñ ne quian-iegaa mëed ne bii radz! ¡Mbandox ted miech, guielndox ne csiaab Dios gan zho guiedz rii! <sup>24</sup> Zutxuu miech zho, zha ne tedlaagaa lo guielgut zeyzhoo miech zho, zhaase zhaase dan ne gueynie zho zho. Horco laa grë zha zit co, sëëb gunchen Jerusalén; haxta gdziñ dze ne gnabey Dios griee zho.

#### Ziaad Jesús stib

(Mt. 24:29-35, 42-44; Mr. 13:24-37)

<sup>25</sup> Nzian grë ncuane glu lo ngbidz, glu lo mëe, glu lo mel. Mbanse gac miech, zdziebdox zho zeene gon zho bidox ne tso tsasoli nisdoo. <sup>26</sup> Nzian zha ne haxta scow zho lo dzeb, zeene laa zho gan grëtaa ncuane noyac lo guidzliu len dze co. Grë ncuane no zhan gbaa, nëzrii nëzrec gaca. <sup>27</sup> Horco bii zan zho ganle zeene laa naa zialzëeb tib lo xcw con grë guielndzon, con grë poder ne rap naa. <sup>28</sup> Zeene gan to laa grë ncuane co rsilo noyac, nley golco zdoo to; jsac hor co laa Dios ycaania to!

<sup>29</sup> Golzoob cuidad ganle zha nac yag guigw, beelzegaa pe stib yag. <sup>30</sup> Led ran to ganle, zeene laa grë zhicwa racnieen, laa zhiblaga rsilo rdzib, gase runbey to laa mëe nëeg ziaadgaxle. <sup>31</sup> Scaque nagon zeene

gan to laa grë miñe rne naa lo to nu rsilo noyac, dzigo nanle to laa dze ne csilo gnabey Dios ziaadgaxle.

<sup>32</sup> Gneli naa lo to ganle, nzian grë miech ne mban niina, bii zan zho zeene laa grë ncuaañ co gac; sac ible ncuaañe gaca. <sup>33</sup> Zdziñ dze ne nitlo gbaa, nitlo guidzliu, sangue miñe rne naa lo to nu nitloda; ible laaw none gac. <sup>34</sup> ;Nsin sca gołso, zaacse gołgac! ;Adeł gał dze ne laa naa guial, leł lo grë ncuaañe ndzinlid, leł lo guielgonziu, leł lo grë zhgab ne rac lo guidzliu rii no to, zigne guñ grëraa miech! Sac gon, lega naclew glanso naa. <sup>36</sup> Nligaa nsin gołso. Tibaque gołnab lo Dios, gacnien me to peet gacde to lo grë guielñe co, iñe peet xtołde to zeene laa to gacredz lo naa.

<sup>37</sup> Gzase leñ dze co pseed me miech. Silgaw, miech guizhiu ne rdziñ leñ yadoo, parne yquiaadiag zho zhiwseed me. Guidze sca rseed me zho, laa pcow liu riebez me cho Gui Oliv.

### Bnediidz zho dieñ zha gnaaz zho Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

**22** Ziaadyoble Ini Pascwa, zhiłni nroob meñ Israel, Ini ne row zho quietxtil ne rquiad ncobi lad. <sup>2</sup> Grë zha ne nac pxoz rnabey ni grë maistr ley, leñ dze co laa zho no quiaguib zho dieñ zha gut zho Jesús. Noguib zho tib mod ne glisquid meñguiedza; sac rdzieb zho gactseeb meñguiedz.

<sup>3</sup> Tib dzew, laa meñdox bzëeb zdo Judas Iscariot, tib zha ne rzëniepaa me ga, <sup>4</sup> rias Judas güey Judas lo grë pxoz rnabey co, lo grë meñ ne zo lo zha ne rquiapan yadoo, rëb Judas zha csañ Judas Jesús ladznia zho.

<sup>5</sup> Zeene bin zhow per nli rley zho, nacne biaan zho didz quizh zho Judas. <sup>6</sup> Dzigo desde hor co psilo Judas noguib Judas dieñ zha gdeeda diidz guieñd miech csañ Judas me ladznia zho.

### Dowxtseenie Jesús xpëedscuel me

(Mt. 26:17-29, 31-35; Mr. 14:12-25, 27-31; Jn. 13:21-30, 36-38; 1Co. 11:23-26)

<sup>7</sup> Mer dze ne rsilo Ini Pascwa, leñ dze ne sca row zho quietxtil ne rquiad ncobi lad, ni rut zho carner yeen ne rowxtsee zho. <sup>8</sup> Dze co bnabey Jesús Pedr grop Juan tsiegunlo zho xtsee ne gownie me zho wdze co. <sup>9</sup> Dzi-gon bnabdiidz zho lo me, rëb zho:

—;Pa lo racladz luu guio no guiodziunlo now?

<sup>10</sup> Rëbchaa me lo zho:

—Gołtsie Jerusalén. Zeene sëeb to lad guiedz, ga gan to tib mgui nzobyan tib re nis, gołtsienal zhits me. Yu ne gan to sëeb me, <sup>11</sup> gołguiab lo bizhuan yu co: “Znu në Maestro, ;pa leñ yu me gneedz luu gac zaatne gowxtseenie me xpëedscuel me wdze rii?” <sup>12</sup> Ga glu me tib leñ yu nroob ne riaan glaa, nzhixcuaale leña, dzigo ga gołgunlo zhixtsee ne.

<sup>13</sup> Dzigo laa zho zie. Güey zho zaatne pxeel me zho ga, ga beenlo zho xtsee co.

<sup>14</sup> Wdze co, zeene goł hor xtsee laa Jesús bded lo mezh gza me gza tsiipchop xpëedscuel me. Xtsee co no zho, <sup>15</sup> zeene rëb me lo zho:

—;Blactaa gon pquiambëz naa gdziñ dze rii, znu gowxtseenie naa to nawdze rii, ansraa csacsi miech naa, gut zho naa! <sup>16</sup> Lëë lultm vuelt nu gon teed naa Ini Pascw rii, haxta gdziñ dze ne laa Dios csilo gnabey, dze ne glupaa ganle zha nac xtsee rii.

<sup>17</sup> Dzigo bzhen me tib cop nroob no vin, bdeed me xquizh lo Dios, blozh ga bdeed me cop co lo zho, rëb me:

—Gołquiin vin rii gza to. <sup>18</sup> Gneli naa lo to ganle, lëë lultm vuelt nu guie naa vin rii, haxta gdziñ dze ne laa Dios csilo gnabey.

<sup>19</sup> Ni bzhen me quietxtil, bdeed me xquizh lo Dios, blozh ga beengroł mew bdiiz mew lo zho, rëb me:

—Gołquiina, rriequia gon lëë xcuerp naa i, sac gon znu gon zho xcuerp naa parne csilaa naa to grë to. Zeene gdeedtaaw diidz, gołgun miñ rii parne glu to ganle tibaque rsoladz to naa.

<sup>20</sup> Blozhse dowxtseenie me zho, scaque bzhen me stib cop no vin, blozhse bdeed me xquizh, rëb me lo zho:

—Lëë stib trat cub nu gon riaan Dios grë me miech, rriequia xchen naa nu nac vin rii, ren ne gzhiee xcuent to, ren ne tso firm trat co par glu nona. <sup>21</sup> Ni gacnan to ganle, lo mezhaque nu gon zob zha ne tsielo naa ladznia zha ne gut naa. <sup>22</sup> Naa ne nac naa Mgui ne pxeel Dios, nli, ible none guet naa, parne gac miñe pxeel Dios naa zialgun naa, ;per probsaxe zha ne tsielo naa ladznia zha co!

<sup>23</sup> Horco psilo gza zha ne zobnie me ga, rnabdiidzla zho dieñ cho nac zha ne rzeet me ga; <sup>24</sup> haxta psilo zho nodiidiidz zho dieñ cho gac zha ne gacnon lo zho.

<sup>25</sup> Dzigo bnee me lo zho, rëb me:

—Nli grë zha ne rnabey guiedz ne ndxie lo guidzliu, masaque rnabey zho miech zig nac zeene bzhii zho zho, per zha gunraa miech, lëë gdib rxcw zho, haxta rnee zho nroob quiayun zha co xyudar guiedz.

<sup>26</sup> Sangue to gon, zha ne gnabey lo to, none guieñ zho gac zho zig tib nguñdziin lo to; zha ne racladzgaa gacnon, none guieñ zho guiaanwin zho. <sup>27</sup> Lo guidzliu rii, zha ne rnabey, rzobse zho, zha ne nac nguñdziin, zha co rdziib ncuaañe row zho. ;Sangue lo ne, led scad naca! ;Gołwi ganle, tib nguñdziin nac naa lo to!

<sup>28</sup> Tose goc zha ne tibaque gocnie naa lo grëtaa miñe bdeed naa leñ dze rii. <sup>29</sup> Gane niina, laa naa gneedz tib guielnzaac nroob lo to yгаа to gdziñ to zaatne bneedz Pxoz naa gnabey naa; <sup>30</sup> zeena iñe znu tipse zioob ne lo xmez naa ga, dioow ne, dio ne. Haxta so naa to, to gac zha ne cobey, pe nac miñe been gza tsiipchop dii ne nac meñladz to nu.

<sup>31</sup> Horcoque bnee me lo Pedr rëb me:

—Bina ganle Pedr, racladz Satanás gon ycuiib ma to, zigne run zho zhobxtil. <sup>32</sup> Per laa naa bnable lo Dios, gacnien me luu, csaand me sozitpaa luu lo naa. Gacxe waa, zeene guieñ luu lëda ga been luu, luu gnee lo grëraa zha qui, parne tibaque dib zdo zho gnalo zho naa.

<sup>33</sup> Pquiab Pedr rëb Pedr:

—Niicxe peraa waa gac, csaand naa luu. Tejne co zho luu ladzguiib, ye naa tso ga, itejne gutgaa zho luu, za-atne guet luu, ga guet naa!

<sup>34</sup> —Bina ganle Pedr —rëb Jesús—. ¡Guieel riigazh gon, gardle ycuudz gall, tsonle vuelt rëb luu runbeyd luu naa!

<sup>35</sup> Dzigo bnee me lo zho gza zho, rëb me:

—Led rsoladz to ganle zeene pxel naa to güeyseed to miech, scase güey to, peet dimi bide to, per ni ncuaañe gow to, per ni lab to bide to. ¿Pe beenfald ncuaañe nquiin to hor co?

Pquiab zho rëb zho:

—Beenfaldedew.

<sup>36</sup> Dzigo rëbchaa me:

—Horco nagon peet bide to, sangue niina zha ne quianie dimi, zha ne quianiegaa ncuaañe gow zho, none güey zhow. Niina nagon none laa to yquiin spad. Zha ne quianieda, none maase tib xab zho cto zho, si zho tiba. <sup>37</sup> Sac nataa nagon, laa miech cteed naa miñe zhobnee lo Xtiidz Dios, zaatne rnee: “Bnabey zho gut me, zigne rut zho grë zha ntseeb.” Grëse miñe zhobnee teed naa, ib laaw none gac niina.

<sup>38</sup> Pquiab zho rëb zho lo me:

—¡Bui ganle laa chop spad nule!

Dzigo rëbchaa me:

—¡Mazd peet gnedraa naa lo to!

### Bzodiidznie Jesús Pxoz me Getsemaní

(Mt. 26:36-46; Mr. 14:32-42)

<sup>39</sup> Blozhse ga, laa me brieie zie me nëz Gui Oliv, za-atne rietaque me; zienañaque gza xpëedscuel me zhits me. <sup>40</sup> Bdziñ zho ga, rëbchaa me lo zho:

—Goñab lo Dios gacnieñ me to, zeena yquiild men-dox to.

<sup>41</sup> Bzë me spalal, bdziñ me zig zaatne riab tib quie ne rchel ne nia ne, dzigo ga pquiitsgzhib me, psilo me bnab me lo Dios, <sup>42</sup> rëb me:

—Papá, laa naa rnab lo luu, tejne zala zdoo luu, psila naa lo grë guieñe rii. Per tejne grieeloda, miñe gnëtaa luu sca gaca.

<sup>43</sup> Horco biet tib anjl gbaa bdziñ pchoobladz zdoo me. <sup>44</sup> Mban rac me laa me nozodiidznie Pxoz me, per hor cole mazdraa rnab me lo Pxoz me; lo guieñe ro co haxta rzonis me, masaque zëbdzuuñ grë nis co lo me zootle ren.

<sup>45</sup> Zeene laa me guso ga, bdziñ me zaatne biaan xpëedscuel me, gon me gzase zho laa zho nixguies. Ye zho mban rac zho, lo guieñe co bguudz zho mcaal.

<sup>46</sup> Dzigo pcuaan me zho, rëb me lo zho:

—¿Nixguies to ye? Lëda i gon, ¡goñsobna! Goñab lo Dios, gacnieñ me to, zeena yquiild men-dox to.

### Bnaaz zho Jesús

(Mt. 26:47-58, 67-75; Mr. 14:43-50, 53-54, 65-72; Jn. 18:2-18, 25-27)

<sup>47</sup> Laa Jesús quianeeque, zeene laa Judas bdziñ bdziñnie Judas tib dzoon miech. Zigne bdziñ Judas, wbig Judas lo me, dow Judas bzhid cuas me.

<sup>48</sup> —¡Judas! —rëb me—. ¿Con tib bzhid dzigo lëe glu luu naa lo grë zha qui?

<sup>49</sup> Zeene bien xpëedscuel me, me zienaaz grë miech co, rëbchaa zho lo me:

—Maestro, ¿zha dziuuñ ne? ¿Pe zdeed spad no zho?

<sup>50</sup> Znuse biet tib zho pchel zho tib nia spad, pchug zho diag tib xmoz men ne nac pxoz nroob. <sup>51</sup> Dzigo bnee Jesús lo zho rëb me:

—Goñsaan zho, ndzinli golgac.

Horco wbig me bzhen me diag zha co, beenguiac mew, lëetse miñ derecha.

<sup>52</sup> Lad grë miech co no ndal grë pxoz ne rnabey, grë zha ne zo lo zha ne rquianap yadoo, ni spalal men ne nac zha non lo menquiedz; dzigo bnee Jesús lo zho, rëb me:

—¿Pe nacne squitaa ziaad to, nzhen to yag, nzhen to spad ziadnaaz to naa? ¿Niacxe naa cho ngbaan?

<sup>53</sup> Blactaa dze name gon to no naa leñ yadoo, ni bnaazde to naa ga. Per nole guic to nagon nawdze rii gnaaz to naa; grë miñe racladz to grë to men-dox, niina laaw gac.

<sup>54</sup> Horco wbig be zho bnaaz zho me, laa zho zienie me nëz lidz men nac pxoz nroob. <sup>55</sup> Bdziñ zho lidz men co, bre zho xley me, bzëg zho gui, laa zho no nodzë zho. Ye Pedr maase zit zit nañ Pedr, laa Pedr bdziñ ga; laa Pedr wbig bzob lo zho ga. <sup>56</sup> Zeene gon tib wnaa ne quia xtsiñ men co laa Pedr zob ga, dze rwi me, tibaque rëb me:

—¡Ye mgui qui gon rzënie men ne blansonie to i!

<sup>57</sup> —¿Naa ye? —rëb Pedr—, ¡per ni runbeyd naa men qui!

<sup>58</sup> Wdzeepaaw, laa tib zha ne zo ga, gonaque Pedr, rëb zho lo Pedr:

—¿Segur lëe ye luu nacie men ne bgaa i?

Scasaque bneelid Pedr. <sup>59</sup> Wdzeelaaque goca, zeen laa stib zho brieequia, rëb zho:

—Lëe tib zha ne nacie men qui nu gon. ¡Rlu zha galilé nac zho!

<sup>60</sup> Pquiab Pedr, rëb Pedr:

—¡Rieñd naa gon, pe nacne squi rnee luu!

Gardle lozh griee diidz co ro Pedr, zeene laa tib gall pcuedz. <sup>61</sup> Gall co nocuedz, zeene ptsire lo Jesús, dze bui me lo Pedr; dzigora psoladz Pedr zeene rëb me lo Pedr: “¡Guieel riigazh gon, gardle ycuudz gall, tsonle vuelt rëb luu runbeyd luu naa!” <sup>62</sup> Mbanse rac Pedr. Brieie Pedr ga, psilo Pedr biin Pedr guieñe co.

<sup>63</sup> Grë zha ne zopaa quianap Jesús, nzian grë ncuaañe run zho me, psilo zho noyunguzee zho me.

<sup>64</sup> Pxidoo zho lo me, ni rguin zho me, rlozh ga, rnee zho:

—Luu ne nac luu men ne ziadteed xtiidz Dios, ¿bnë sca dien cho ga bdiñ luu?

<sup>65</sup> Nzian grë ncuaañe rgoredz zho lo me.

### Güeynie zho Jesús lo zhiwxtis zho

(Mt. 26:59-66; Mr. 14:55-64; Jn. 18:19-24)

<sup>66</sup> Zeene biini liu, pcaalsa grë men ne nac zha non lo menquiedz, grë zho pxoz rnabey, ni grë zha ne nac



maistr ley, güey zho güeynie zho Jesús lo zhiwxtis zho. Bdzin me ga, bnaabdiidz zho lo me rëb zho:

<sup>67</sup> —Bnë lo no dien, ¿pe lëë Meñ ne nacle diidz cxeel Dios lo guidzliu ga i nac luu?

Pquiab me rëb me:

—Niicle telne gni naa lo to nli lëë meñ co nu nac naa, gliladzde tow, <sup>68</sup> tel pe gnaabdiidzгаа naa lo to, ctsirede to low; sac gliladzde to miñe nac diidzli. <sup>69</sup> Naa ne nac naa Mgui ne pxeel Dios, zhile laa dze gdzin zeene laa naa sob cue Dios nëz derech, meñ nroob ne rrieelo ruñ grëse ncuaañe racladz me.

<sup>70</sup> Horco grëse zho pquiab, rëb zho lo me:

—¿Xpëed Dios dzigo lëë nac luu?

Dzigo rëbcha me:

—Tozhal name rnee, nli Xpëed me nac naa.

<sup>71</sup> Horco rëb zho:

—¡Pe mazdraa textigw ne racladz ne! ¡Laa ne bdzion-je ganle mezh al rnee Xpëed Dios nac me!

### Güeynie zho Jesús lo Pilat

(Mt. 27:1-2; 11-14; Mr. 15:1-5; Jn. 18:28-38)

**23** Horcogazh pcaanie zho Jesús nëz, bdzinie zho me lo Pilat, meñ ne nac gobernador ne nzoob zha Roma ga. <sup>2</sup> Ga psilo zho nzian grë ncuaañe rquiaqui zho me, rëb zho:

—Laa no bnaaz meñ rii gon ziaadnie no me lo luu, sac bgaa me noquuil me meñladz no gacntseeb zho. Rnee me lo zho nonguiel da gdeed zho dimi ne razh lo zhirey ne, meñ ne zob Roma; haxta rnee me mele nac rey ne gunbey zho, sac Dios pxeel me ziaad me.

<sup>3</sup> Dzigo bnaabdiidz Pilat lo me, rëb Pilat:

—¿Pe nli na luu nac Rey ne rnabey lo zha Israel?

Pquiab me rëb me:

—Nliw, rey nac naa zigne rnee luu i.

<sup>4</sup> Dzigo rëbcha Pilat lo grë zha ne ne nac pxoz rnabey co, ni grë miech ne ziegrë zho ga:

—¡Ni tib dol rapd meñ rii!

<sup>5</sup> —¿Zha gapd me dol? —rëb zho—. Ni zaatne zieetaa me noquuil me miech gacntseeb zho lo zhirey ne. ¡Dible nëz Judé nu güeyted me; desde nëz Galilé brie me ziaad me haxta nu!

<sup>6</sup> Gon Pilat sca rëb zho, dzigo bnaabdiidz me dien pe zha Galilé nac Jesús. <sup>7</sup> Zeene gocnañ me zha nëz co nac Jesús, dzigo pxeel me Jesús lo Herod, sac Herod rnabey nëz Galilé; lëëtaque leñ dze co laa Herod no Jerusalén ga.

<sup>8</sup> Rley Herod zeene gon Herod me, sac ziyon Herod grëtaa miñe ruñ me; quiambëz Herod gdzin dze ganlo Herod me, ganlo Herod gun me pe tib milagr. <sup>9</sup> Psilo Herod nzian grë ncuaañe rnaabdiidz Herod lo me, per ni tib lo wnaabdiidz co ib ptsired me. <sup>10</sup> Zeene gon Herod rquiaabd me, ni gon Herod noque grë pxoz rnabey co, grë maistr ley co, ib rioogd ro zho rzadraa pe yquiaaqui zho me, rnab zho cteed Herod me caxtigw, <sup>11</sup> nacne leñ psilo Herod grë xmenguiib Herod rzhidnie zho me, ruñguzee zho me. Bgacw zho me tib lar ne racw rey, sca nacw me lar co biire pxeel Herod me lo

Pilat. <sup>12</sup> Glo ib rdzieeld xtiidz Herod grop Pilat, laa dze co laa zho psilo bneewen stib.

### Bnab zho guet Jesús

(Mt. 27:15-26; Mr. 15:6-15; Jn. 18:39-19:16)

<sup>13</sup> Dzigo bnabey Pilat pcaalsa grëse pxoz rnabey, grë zha ne nac zhiwxtis zha Israel, ni grëraa menquiedz, <sup>14</sup> rëb Pilat lo zho:

—Laa zho biad-zoob xdemand meñ rii lo naa nu, nac diidz noquuil me miech gacntseeb zho lo zhirey ne. Nacne pquiep naa me, ni blalagaa to gon; par naa peet dol rapd me. <sup>15</sup> Niiclegaa Herod, ye Herod gon ni tib dol rapd me; gane pxeelaque Herod me lo naa. Quiayund me ncuaañe guiab ne rieguial guet me. <sup>16</sup> Miñe gaca, laa naa gnabey ted me tib caxtigw, lozh ga dzigo laa naa csilaa me.

<sup>17</sup> Nac costumbr, gzobse lni Pascw rsilaa zho tib zha ne no xcuent lo wxtis. <sup>18</sup> Per zeene bin grë miech co laa Pilat csilaa Jesús, grëse zho nguiedz roptsie zho, rnee zho:

—¡Csilaad luu meñ qui, bnabey guetgazh me! ¡Barrabás psilaa!

<sup>19</sup> Barrabás lë tib meñ co no ladzguiib leñ dze co, sac bgaa me zo me lo tib dii zha ne noyactseeb lo rey leñ guiedz Jerusalén ga, ni zëëbaque me tib ngutoo.

<sup>20</sup> Bguib Pilat dien zha nrieelo nsilaa me Jesús, <sup>21</sup> per psilo grë miech co nguiedz roptsie zho, rnee zho:

—¡None guetgazh meñ qui! ¡Lo cruz bnabey yquia me!

<sup>22</sup> —Per, ¿pe nacne gnabey naa yquia me lo cruz?

—rëb Pilat stib—. ¿Pe nac falt ne rap me? Laa naa pquieple me, ni tib dol rapd me, parne gnabey naa guet me. Laa naa nile lo to, laa naa gnabey ted me tib caxtigw, lozh ga laa naa csilaa me.

<sup>23</sup> Psiloque grë miech co stib, nguiedzraa roptsie zho, rnab zho yquia Jesús lo cruz; haxta goc miñe racladz zho. <sup>24</sup> Racse Pilat, laa Pilat bdeed diidz. <sup>25</sup> Blozhse bnabey Pilat psilaa zho Barrabás, zha ntseeb ne no ladzguiib ga, dzigo laa Pilat psan Jesús ladznia zho.

### Güeyquiaa zho Jesús lo cruz

(Mt. 27:32-44; Mr. 15:21-32; Jn. 19:17-27)

<sup>26</sup> Horco laa zho brieenie Jesús laa zho zienie me zaatne yquia me lo cruz. Nëz zienie zho me, bdzieel zho tib meñ Ciren lë Simón wbiire lo dziin dan, pcuëz zho meñ co, bnabey zho me bi me zhicz Jesús; nalse me zhits Jesús, laa zho zienie Jesús. <sup>27</sup> Miech guizhiu ne zie ga, ndal grë meñ wnaa psilo zho roon zho no zho xquielñe me, <sup>28</sup> dzigo dze bui me lo zho, rëb me:

—Xin, nac to meñ Jerusalén rii, goonde to xquielñe naa. Mazd golgoon por grëtaa guielñe ne no gan to, por grëtaa guielñe ne no gan xpëed to; <sup>29</sup> sac zeene gal dze co grë meñ wnaa ne quianied mëed, ziaab zho: “Mazd wenaque zie zha ne quianied mëed, zha ne nañd zha radz mëed, zha ne niaadгаа gap mëed.”

<sup>30</sup> Horco grë miech, laa zho gnab tebaa zha pixche grë gui guiaañ zho zhana. <sup>31</sup> ¡Golwi ganle, telne znutaa

mine nodeed naa nac naa zig tib yag nguia, pele! to dzigo ne nac to zig tib yag bidz!

<sup>32</sup> Ye schop zha ne nac ngbaan, zienie zho ga yquiaagza zho me lo cruz. <sup>33</sup> Zeene bdziñ zho zaatne nac "Gui Beerguic Ngutoo", ga pquiaa zho me lo cruz gza me ngbaan co. Tibga zhiczuz zho bzo tib nëz cue zhiczuz me. <sup>34</sup> Lo cruz co quia me, zeene nguiedz bnee me rëb me:

—¡Papá! Ncuaañe quiayuñ grë miech rii nu, bzhiguiel guñquizhd luu zhow; sac riend zho pe ruñ zho.

Gza menñguib ne bdziñ ga yquiaanap me, hor co tib tib zho bzhense zho tib lë xab me, laa stiba bio zho rif. <sup>35</sup> Ndal miech ne ndxie quiawi. Haxta grë zha ne nac wxtis zo ga, no zho rzhidznie zho me, rnee zho:

—Stib miech scataa beenñguiac me, stib miech scataa bla me. ¿Pe rac me na ne riete me i? ¡Güet me i zho, telne nli me nac Men ne zëëble diidz cxee! Dios, telne nli Dios bzooblo me ziaad me!

<sup>36</sup> Wbig menñguib co rdeed zho nziu bla guie me, rzhidznie zho me, rnee zho:

<sup>37</sup> —¡Zhirey zha Israel name nac luu! Psilaa luu lo guie!ñë qui nazho.

<sup>38</sup> Glaa guic zhiczuz me quia choplan diidz ne pquiaa zho, rneew: "LËË ZHIREY ZHA ISRAEL NU."

<sup>39</sup> Grop ngbaan ne quianie me lo cruz ga, psilo tib zho ye zho rzhidznie me, rnee zho lo me:

—¡Led rëb luu lëë, luu nac Men ne zëëble diidz ga cxee! Dios! ¡Blu nazho nli men co nac luu, psilaa ne lo guie!ñë rii!

<sup>40</sup> Horco pquiab stib zha co, rëb zho lo zho:

—¡Psoog ro luu! ¿Pe niicle niina ne laa luu guetle ib rdzieebd luu Dios? <sup>41</sup> Bien ganle, ¡te! ne ible min rii riogua! ne grop ne, nu nodizh ne grë guie!ntseeb ne bdziuuñ ne; sangue men qui, peet dol rapd me!

<sup>42</sup> Dzigo rëb zho lo me:

—¡Bzhiguiel zeene guiaad luu gnabey luu, ib csand luu naa tib lad!

<sup>43</sup> Pquiab me rëb me lo zho:

—Peet tsienied guic luu, nadzegazh laa luu së guioo ne zaatne nac lo xquie!bley Pxoz naa.

### Gut Jesús

(Mt. 27:45-56; Mr. 15:33-41; Jn. 19:28-30)

<sup>44</sup> Go! gro! dzew, tibaque zeene goc tib ncow dipse lo guidzliu. Ni palal rlud xbiini ngbidz, haxta las tres biao biini stib. Horco pquiaa Jesús tib redz nroob, rëb me:

—Papá, laa naa rsañ zhiespíritu naa ladznia luu, luu pcaaniaw.

Diidz co brie ro me, znuse blozh me. Laa me quialozh, zeene laa lar nroob ne quia len yadoo Jerusalén ga briez nzoli, gro!taa goca.

<sup>47</sup> Zha ne rnabey lo zhaguiib ne pquiaa me lo cruz ga, zeene gon zho zha blozh me, bien zho Dios been min co, rëb zho:

—¡Ne nlipagaa tib men peet xtold goc men qui!

<sup>48</sup> Scaque grë miech ne goclo ga, zeene gon zho zha blozh me, biabguie!ñë zho, mbanse rac zho laa zho wbi ga. <sup>49</sup> Laa grë zha ne ruñbey me, zha ne gocie

me, zig nac grë men wnaa ne gocgrë zha ne brieena! zhits me zeene brie me nëz Galilé, grë zho laa zho ndxiese tib lad rwi zho.

### Bgueets Jesús

(Mt. 27:57-61; Mr. 15:42-47; Jn. 19:38-42)

<sup>50</sup> Lad grë zha ne nac zhiwxtis men Israel ga, no tib men guiedz Arimaté lë me José; lëë guiedz co ndxie xtan Judé. Tib miech wen nac me, noxco me mine rnabey Dios, <sup>51</sup> ye me quiambëz gdziñ dze ne csilo gnabey Dios. Zeene bnabey zha ne nacgrë me dziin ga zha gac Jesús, ni lalnu biod me conform mine bnabey zho. <sup>52</sup> Nacne hor co güey me lo Pilat, bnab me diidzbey tsielit me xcuerp Jesús lo cruz. <sup>53</sup> Dzigo güey me, blozhse blit me cuerp co lo cruz, pche! me me tib lo lar nroob, güey me güeyqueets me me tib len baa cub ndieen tib cho quie gax ga.

<sup>54</sup> Lëë bdze dze co no zho xco ne laa dze ne gdziiladz zho lo dziin sëëb. <sup>55</sup> Grë men wnaa ne sca nacgza grë zha ne brieena! zhits me zeene brie me nëz Galilé ga, ye zho güeyna! bgueets me, gon zho pa lo bio me.

<sup>56</sup> Blozhse bgueets me, laa zho zey. Bdziñ zho bzhixcuaa zho, tiblo zënex ne tsietëëb zho lad xcuerp me; dzigo laa zho bdziiladz zigne rnabey ley no gon zho.

### BRIEBAN JESUS

(Mt. 28:1-10; Mr. 16:1-8; Jn. 20:1-10)

**24** Laa zeene go! dze ne rzobni zhma! silgaw laa gza men wnaa co brie, bi zho grë zënex ne bzhixcuaa zho ga, laa zho zie ro baan Jesús.

<sup>2</sup> Bdziñ zho, gon zho laa quie ne bioog ro baan me ga bdiooble; <sup>3</sup> bzëëb zho len baa gon zho, niicle xcuerp me guieñdle ga. <sup>4</sup> Laa zho zo ga, riend zho dien pe nacne sca nialse ro baa co, pe nacne niicle xcuerp me guieñdle leen co. Tibaque zeene gon zho laa chop men bgui zole lo zho ga, masaque riaazbel lad xab grop men co. <sup>5</sup> Horco per nli bdzieb zho, lo dzeb co mine been zho laa zho pquitsgzhiz haxta bdziñ lo zho lo liu. Dzigo rëb grop men bgui co lo zho:

—¿Pe nacne ziaadguib to men mban zaatne rio menñgut? <sup>6</sup> ¡Laa me brieenan! ¡Guieñdle me nu! Go! soladz ganle zha në me lo to len dze ne no me nëz Galilé, <sup>7</sup> në me: "Mgui ne pxeel Dios, ible none guiab me ladznia grë miech ngoopdol, squiaa zho me lo cruz, per zeene gac tson ngbidza, laa me grieeban."

<sup>8</sup> Dzigoraa psoladz zho, nligaa sca bnee me, <sup>9</sup> hor co lëë!ëd güeynie zho diidz lo gza tsiiptib zha ne nac xpëëdscuel me, ni lo grëraa zha ne nacgza zho ga.

<sup>10</sup> Nzianlaa nac men wnaa co, lad co no Marí Magdal, no Zhuan, ni Marí ne nac xniaa Jacob.

<sup>11</sup> Niicle bzodiidz zhow lo xpëëdscuel me, per con rnee zho led ncuuan gacd ga, ni lalnu bliladz zhow.

<sup>12</sup> Tibaque zeene brie Pedr, rias Pedr laa Pedr zie në ro baa. Bdziñ Pedr bdiixlo Pedr len baa co, gon Pedr nligaa, ¡loxaque lar ne brie! me zhoob leen co! Blozh ga, laa Pedr zeyaque, rzee zdoo Pedr gon Pedr nli guieñdle xcuerp me ga.

### Gon̄ zho Jesús n̄z Maús

(Mr. 16:12-13)

<sup>13</sup> Dze co brie chop xp̄ēdscuel me zie zho tib guiedz win l̄ Maús. Gax Jerusalén rian̄ guiedz win co, maase chop hor rz̄ zho rdziñ zho ga. <sup>14</sup> N̄z no zho nozodiidz zho gr̄e miñe pteed miech Jesús ga, <sup>15</sup> tibaque zeñe bien̄ zho laa zho bgaa tib lo men̄ co, gogza me zho laa zho no n̄z, per, jib bien̄d zho l̄ Jesús ga! <sup>16</sup> Rañlo zho laa me ziegza zho ga, per ni lal- nu beñbeyd zho ne mew, sac zig nac zeñ pe tib ncuaañe ptse lo zho. <sup>17</sup> Dzigo r̄eb me:

—¿Pe squitaa nozodiidz to? ¿Pe nac squi rac to, zig nac zeñe pe guieñe no to?

Dzigo bzodze zho. Mban rac zho, haxta lo zho rlu nroob guieñe no zho. <sup>18</sup> Pquiab tib zha ne l̄ Cleof, r̄eb zho:

—¿Niacxe bind luu gan̄le zha nactaa ncuaañe goc Jerusalén leñ dze rii? Gr̄ese zha ne name güey Jerusalén, gocnaña.

<sup>19</sup> —Nligaa —r̄eb me—, ¿pe dieñ goc ga?

R̄ebchaa zho:

—Leñ dze rii psacsi zho men̄ Nazaret ne l̄ Jesús. Tib men̄ ne biadteed xtiidz Dios lo miech nac me, nzian gr̄e milagr nroob ne beñ me; miech guizhiu ne bley pquiaadiag zhiwseed me. Rlu tib men̄ nziuu nac me lo Dios. <sup>20</sup> Per leñ brie gr̄e pxoz rnabey, gr̄e zho zha ne nac wxtis, bnaaz zho me, bnaab zho gut me, pquiaa zho me lo cruz. <sup>21</sup> Tibaque rdzieets no, me niac tib men̄ ne nsilaa zha ladz ne ladznia zha Roma. Pas̄ese miñ co niac, nadzele rac tson̄ ngbidz beet zho me. <sup>22</sup> Per rien̄d no dieñ zha nac cuent co, sac nasil güey bla men̄ wnaa ne nacgr̄e no ro bañ me, <sup>23</sup> zeñe wbire zho bzodiidz zho lo no n̄ zho guieñdle xcuerp me leñ baa, loxaque chop anj̄l briequia lo zho ga, r̄eb anj̄l co mban me. <sup>24</sup> Blozh ga, güeyaque bla zha bgui ne nacgr̄e no, gon̄ zho nligaa guieñdle xcuerp me ga.

<sup>25</sup> Dzigo r̄ebchaa me lo zho:

—¡Nadzpaan̄ cow nac guic to, nadzpaan̄ ndip nac zdoo to! ¿Rliladzde to gr̄e miñe dzigo l̄ bzeet zho padzeela ted Men̄ ne nole diidz ga cxeel Dios? <sup>26</sup> Bzeetle zha co name ible no csacsi miech me, antes ne gbire me lo guieñdzon ne no me.

<sup>27</sup> Dzigo psilo me bnee me lo zho pa lo zhobnee gr̄e miñe bded me ga, psilo me desde gr̄e miñe pquiaa Moisés, haxta gr̄e miñe pquiaa gr̄eraa zha ne biadteed xtiidz Dios. <sup>28</sup> Sca no zho n̄z laa zho bdziñ Maús. Bdziñ zho ga, rac me zig nac zeñe tib ted me, <sup>29</sup> dzigo quia zho rnab zho lo me cūez me ga, sac laa dze bdezele, zhile laa liu ycow. Nacne bl̄ez me.

<sup>30</sup> Laa zho zob lo mezh gowxtsee zho, bzheñ me guieñtxtil bdeed me xquizh lo Dios, blozh beñgroñ mew bdeed mew lo zho. <sup>31</sup> Dzigoraa zig nac zeñe bzhiäl lo zho, laa zho beñbey me. Per par nian̄raa zho me, znuse bnit me lo zho, gon̄draa zho me. <sup>32</sup> Horco per nli rley zho rnee zho:

—Con razon zeñe sca ziaadgza ne me n̄z nonee me lo ne zha raquiet lo Xtiidz Dios, masaque tib guieñbley nroob ne biaadnie xcodiidz me zdoo ne.

Sca rnee zho, sac bien̄ zho bdziñ tib guieñbley nroob zdoo zho, zeñe sca nonee me lo zho. <sup>33</sup> L̄ēlēdaque brie zho ga, bio zho n̄z wbire zho Jerusalén stib. Bdziñ zho lo gza tsiiptib zha ne bz̄eniēpaa me ga, ni gr̄eraa zha ne nacgr̄e zho, <sup>34</sup> r̄ebchaa zha co lo zho:

—¡Tebaa gan̄ to gan̄le nli brieēban xmaistr ne! ¡Laa Pedr gon̄le me!

<sup>35</sup> Psiloque zho grop zho bzodiidz zho zha gon̄ zho me no zho n̄z, per haxta horne no zho xtsee, zeñe laa me beñgroñ quietxtil dzigoraa beñbey zho me.

### Briequia Jesús lo gr̄e xp̄ēdscuel me

(Mt. 28:16-20; Mr. 16:14-20; Jn. 20:19-23)

<sup>36</sup> L̄ēētaaque sca nozodiidz zho, tibaque zeñ gon̄ zho laa Jesús zole lo zho ga, pquiaabdiuzh me zho, r̄eb me lo zho, peet tsieniedraa guic zho. <sup>37</sup> Leñ rdzieb zho, haxta rzhidz zho lo dzeb co, sac r̄eb zho bod ndziin ga ran̄ zho. <sup>38</sup> Dzigo bnee me lo zho r̄eb me:

—¿Pe nacne rdzieb to? ¿Pe nacne rliladzde to naa nu? <sup>39</sup> Golwi leñ nia naa, golwi zhits ni naa gan̄le. Golx- eeñ naa, zeñ gliladz to gan̄le nli naaw; sac tel̄ ndzi- ina, mese naca, gacd xen̄ tow.

<sup>40</sup> Sca quianee me, blu me nia me, blu me ni me lo zho, zaatne biaaz me clav. <sup>41</sup> Per nli rley zho, rzee zdoo zho, per rliladzdaque zho dieñ pe nlipaa l̄ēē me ga. Gon̄ me sca rac zho, nacne bnaab me ncuaañe gow me lo zho. <sup>42</sup> Dzigo bdeed zho tib l̄ meñ bguiee lo me, <sup>43</sup> bnaaz me meñ co, squi ndxie zho gon̄ zho dow me ma. <sup>44</sup> Dzigo r̄eb me lo zho:

—¿Pe ib rsoladzde to nile naa laa gr̄e miñ rii no gac? Led ni naa lo to, gr̄ese miñe bzeet Moisés, gr̄ese miñe bzeet gr̄e zha ne biadteed xtiidz Dios, miñe raquietgaa lo Salm teed naa, ible laaw none gac.

<sup>45</sup> Psilo me clar nonee me lo zho, parne guieñpaa zho zha zhobnee lo gr̄e guits co, <sup>46</sup> r̄eb me:

—Ible lo co zhobnee sca teed naa ne nac naa Mgui ne pxeel Dios, rneew ib no gut miech naa, per zeñe gac tson̄ ngbidza, laa naa grieēban. <sup>47</sup> Rneew, Jerusalén nu, nu csilo gacnañ miech ible none csaan zho xquieñtseeb zho, gnalo zho naa, parne gon̄ Dios zho perdon. <sup>48</sup> Ni to gon̄ gan̄le gr̄ese miñ co, goca. <sup>49</sup> Na leñ dze ne ziaadaque nu, laa naa cxeel Espiritu Sant gacnieñ to, sac ib scale nac xtiidz Pxoz naa. Per guiabde to niinaga grieē to tsienēe to lo miech, Jerusalense nu golcūez, haxta nieeda ygaa to poder ne gneedz Espiritu Sant lo to.

<sup>50</sup> Zeñe gol̄ dze ne laa me guey gbaa, dzigo güey me güeynie me zho n̄z Betain. Bdziñ zho ga, blis me nia me, psilo me noyunlay me zho. <sup>51</sup> Laa me quiayunlay zho, tibaque zeñe laa me bias lo guidzliu, jgon̄lo zho laa me bzoquia gbaa!

<sup>52</sup> Horco pquiitsgzhib zho liu, beñnon zho me, rnee zho gr̄e diidz ndzon lo me; blozh ga in̄e rley zho laa zho wbi ga, bdziñ zho Jerusalén stib. <sup>53</sup> Psilo zho

gzataa dze rie zho yadoo roolnie zho Dios, rdeed zho  
xquizh lo me.

# JUAN

**1** Jesús, men ne nac Diidz Ndzon, nole me zeene bi-aa grëtaa ncuane no; lo Dios no me ni Diosaque nac me. Notaque me, tibaque nac me: me ni Dios. <sup>3</sup> Me bzaa grëtaa ncuane no, tsod ncuane lega scase ni-aan; sac me bzaaw grësew. <sup>4</sup> Ladznia me no guie|mban ne gdziñd dze lozh, nac guie|mban co zig tib biini ne rziini lo miech. <sup>5</sup> Me nac biini ne quiaziini zaatne nac lo guie|cow, ni rriyelod guie|cow ctsew lo biini co.

<sup>6</sup> Bio tib mgui brielë Juan, Dios pxeel Juan biadnee Juan lo miech cho nac Jesús, zeena grëse zho gliladz Jesús. <sup>8</sup> Led Juand nac biini, sinque loxaque biaad Juan biaadlu Juan Jesús, men ne nac biini co. <sup>9</sup> Bdziñ dzew laa Jesús biaad, ni niina me nac men ne noziini lo grëse miech, sac mepaa nac biini co.

<sup>10</sup> Jesús nac biini, me nac Diidz Ndzon co. Me bzaa guidzliu, per zeene biaad me lo guidzliu ib biend miech cho nac me. <sup>11</sup> Per ni menladz me, niicle ne lopaa zho bdziñ me ib gonzed zho me; tib chop zha ne blëzlo me. <sup>12</sup> Ni grë zha ne sca bleynie me, grë zha ne dib zdoo gliladz cho nac me, grëse zha co laa me bzo zho gac zho xpëed Dios. <sup>13</sup> ;Grëse zho, rrieequia gol zho stib! Per guiabd ne togo gol zho zigne ral grë miech guidzliu rii, sinque laa zho gol zigne racladz Dios; gane niina xpëed me nac zho.

<sup>14</sup> Zeene bdziñ dze ne laa men ne nac Diidz Ndzon ga goc miech biaad me lo guidzliu, grop lo no bdziñ no me, ni bzianie no me. Blu me pa lotaa nquialadz me miech, ni niapse diidzli bnee me. Bdziñ no xquie|ndzon me ne nac me tibpaa mëed lo Dios, men ne nac Pxoze ne.

<sup>15</sup> Zeene bzeet Juan Bautist me lo miech, tib vuelt haxta blu Juan me lo zho, rëb Juan: "Lëe men rii ga gon rzet naa lo to zeene rne naa: Iraa ziaad tib men ne mazdraa non lo naa, sac notaque me; nole me zeene blanso naa lo guidzliu."

<sup>16</sup> Nquialadzdox Jesús ne, grëse ne gzataa dze laa ne nogaa grëtaa guie|nzaac ne rsiaab me. <sup>17</sup> Zeene psan Moisés ley, loxaque bnabeya ne; sangue niina ne laa Jesús biaad, laa me biaadnie mine nacpaa diidzli ni biaadlu me ganle pa lotaa nquialadz Dios miech.

<sup>18</sup> Wlaltaa ib choot gard gan Dios; sangue niina ne laa Xpëed me Jesús biaad, men co biaadlu ganle zha nac Dios; sac zaatne no Dios gaque no me.

## Rnee Juan Bautist cho nac Jesús

(Mt. 3:11-12; Mr. 1:7-8; Lc. 3:15-17)

<sup>19</sup> Tib dze pxeel grë zha ne nac zha non Jerusalén, bla zha ne nac pxoz ni zla zha ne rquianap yadoo, zienabdiidz zho lo Juan dien cho nac Juan.

Bdziñ zho bnabdiidz zho lo Juan. <sup>20</sup> Dzigo bneeli Juan lo zho, rëb Juan:

—Golgan ganle, led naad nac Men ne quiambëz to ga cxeel Dios.

<sup>21</sup> —¿Chox nac luu waa? —rëb zho—. ¿Te luu ye nac Lí, men ne biadteed xtiidz Dios padzeela?

Pquiab Juan rëb Juan:

—Lëda, led Lí naa.

Biire zho bnabdiidz zho, rëb zho:

—¿Te luu ye nac men ne bzeet Dios padzeela cxeel me guiadteed xtiidz me?

Pquiab Juan rëb Juan:

—Zhaa men co, led naad nac men co.

<sup>22</sup> —¿Cho dzigo nac luu? —rëb zho—. Bnë dien cho nac luu; sac gon ib none gdziñnie no tib xtiidz luu lo zha ne pxeel no.

<sup>23</sup> Dzigo pquiab Juan, rëb Juan lo zho:

—Naa nac mgui ne bzeet Isá, men ne biadteed xtiidz Dios padzeela, zeene znu bnee me: "Zon to zëeb tsi tib mgui dan rnee me lo miech: ;Golgun nguudz zdoo to, sac gon ile ziaad men ne rnabey ne!"

<sup>24</sup> Horco laa zha ne pxeel zha farisé pquiab, rëb zho lo Juan:

<sup>25</sup> —Telne led luud nac Men ne zëeble diidz ga cxeel Dios, niicle led luud nac Lí, niicle nacdga luu cho stib zha ne pxeel Dios ziadteed xtiidz me, ¿zha nac dzigo ne nochoobnis luu miech?

<sup>26</sup> Pquiab Juan rëb Juan:

—Tel naa niab nis rchoobnis naa miech, per no tib men ne gard gunbey to. <sup>27</sup> Tib men non nac me, per ni par gac naa tib nguñdziin win ne glit lab me ni me raguiald naa; ni merle csilo gun me dziin ne pxeel Dios me gun me.

<sup>28</sup> Betain lë tib guiedz ne riaan gax ro guiubee Jordán, nëz ne rlan ngbidz; ga no Juan nochoobnis me miech zeene scataa pquiep zho me.

## ¿Cho nac Jesús?

<sup>29</sup> Biet stib dzew, laa Jesús bdziñ zaatne no Juan ga. Zeene gon Juan me, rëbchaa Juan lo grë miech ne ndxie ga:

—¡Golwi ganle, lëe men qui gon csilaa miech lo grëtaa xto! zho! ;Me gac zig tib carner yeen ne guet tso-gon lo Dios par guiaanmbe miech lo do! <sup>30</sup> Lëe men rii ga nagon rzet naa lo to zeene rne naa: "Iraa ziaad tib men ne mazdraa non lo naa, sac notaque me; nole me zeene blanso naa lo guidzliu." <sup>31</sup> Len dze co niicle naa

runbeyd naa me; per laa naa nochoobnis miech sac ible laa naa zial par glu naa me lo grë zha Israel.

<sup>32</sup> Dzigo bzodiidz Juan lo zho, zha gonlo Juan biet Espíritu Sant gbaa, rlu me zigne rlu tib palom bléz me guic Jesús.

<sup>33</sup> —Ne nligaa runbeyd naa me —rëb Juan—. Per zeene pxeel Dios naa zialchobnis naa miech, hor co në me lo naa: “Zeene gan luu quiet Espíritu Sant gbaa cuéz me guic tib mguí ne nochoobnis luu, dzigo gonañ lëë meñ co nac meñ ne rxeel Espíritu Sant zdoo miech.” <sup>34</sup> Gonlo naa bléz Espíritu Sant guic me; gane nanween naa ne nli Xpëed Dios nac me.

### Zha ne glopaa goc xpëedscuel Jesús

<sup>35</sup> Biini liu co, laa Juan zoque ga zonie me chop xpëedscuel me. <sup>36</sup> Ga zo me, gon me laa Jesús zieded ga; dzigo rëbchaa me lo zho:

—¡Golwi ganle! ¡Lëë meñ qui gon nac Xcarner yeen Dios!

<sup>37</sup> Zigne bin zhow, laa zho zienañ zhits Jesús. <sup>38</sup> Zeene ptsire lo me, gon me laa zho nal le zhits me; dzigo rëbchaa me lo zho:

—¿Pe nac ziaadnañ to zhits naa?

—Maestro —rëb zho—, laa no racladz gacndion no dien pa rbëz luu.

<sup>39</sup> Dzigo rëbchaa me lo zho:

—Na ganle guio ne, zeena gan to paw.

Nacne güeynañ zho zhits me, gon zho pa lo no me; dzigo bléz zho lo me ga. Ga blozh ptse zho dze, sac ziedzele dze zie zho.

<sup>40</sup> Ndrés lë tib zha ne güeynañ zhits me ga; lëë Ndrés co nac bets Simón Pedr. <sup>41</sup> Dzigo zigne brieë Ndrés ga güey Ndrés güeyguib Ndrés Simón. Bdzin Ndrés rëb Ndrés lo Simón:

—¡Nasi gon laa no bdzion Meñ ne nacle diidz ga cxeel Dios!

<sup>42</sup> Dzigo güeynie Ndrés Simón zaatne no Jesús ga. Zeene gon Jesús Simón, rëbchaa me lo Simón:

—Bina ganle, nli Simón nac lë luu ni xingan Jonás nac luu, sangue niina laa luu grieelë Cef.

(Cef rnee zha Israel quie, laa xtiidz zha Gres rnee zhow Pedr.)

<sup>43</sup> Biet stib dze co, laa Jesús no nëz tsie me nëz Galilé. Laa me zieriee dze ga, zeene bdzieel me tib mguí lë Lip; dzigo rëbchaa me lo Lip:

—Dënañ zhits naa.

<sup>44</sup> Zha Betsaid nac Lip, ni zha coque nac Ndrés grop Simón.

<sup>45</sup> Dzigo güey Lip güeyguib Lip Natanael; rëb Lip lo Natanael:

—¡Laa no bdzion Meñ ne nacle diidz ga cxeel Dios! Meñ ne rzeet Moisés lo libr ley ne psañ me, meñ ne scataa bzeet grë zha ne biadteed xtiidz Dios padzeela. ¡Laa no bdzion me, tib meñ Nazareta, lëë me ga nac Jesús, xingan José!

<sup>46</sup> Pquiab Natanael, rëb Natanael:

—¿Nazaret ye? ¡Gard greequia tib zha non Nazaret!

—Gotsaa guio ne ganle —rëb Lip—, zeena ganzhal luu me.

Dzigo laa zho zie. <sup>47</sup> Squi ziaad Natanael, zeene gon Jesús Natanael rëbchaa me:

—¡Golwi ganle, lëë zha qui gon nac merpaa zha Israel, sac mesi ib rquidied me!

<sup>48</sup> —¿Zha nacne runbey luu naa? —rëb Natanael.

Pquiab me rëb me:

—Gole naa beenbey luu, dzigora bredz Lip luu.

Zeene zob luu tib zhan yag guigw, hor co gon naa luu.

<sup>49</sup> Rzee zdoo Natanael, rëb me lo Jesús:

—¡Nlique nagon luu nac Xpëed Dios! ¡Luu nac zhirey zha Israel!

<sup>50</sup> Dzigo rëbchaa Jesús lo Natanael:

—¿Pe ne binse luu ni naa gon naa zeene zob luu tib zhan yag guigw, pe mincose laa luu bliladz cho nac naa? ¡Naraa ganle gan luu ncuaane mazdraa nroob!

<sup>51</sup> Ni rëb me lo grë zha ne ndxie ga:

—Gneli naa lo to: zanaque to ganle zeene laa zhan gbaa gzhal, zlupaa grë xanjil Dios, zha ne ziad-zëeb zha ne ziequia, quiayun zho dziin lo naa, nac naa Mguí ne pxeel me.

### Güey Jesús tib lo guieltsieel

**2** Goc tson ngbidza, bio tib guieltsieel guiedz Caná, xtan zha Galilé ga. Dzigo bredz zho xniaa Jesús lo lni co, <sup>2</sup> ni bredz zho me; nacne bionañ no zhits me grëse no ne nac no xpëedscuel me.

<sup>3</sup> Laa lni noyac, tibaque zeene laa vin blozh. Dzigo güey xniaa Jesús rëb me lo Jesús:

—Laa xvín meñ rii blozh. ¡Guiendraa pe quiiz zho!

<sup>4</sup> Pquiab Jesús rëb me:

—¿Pe nacne rnee luuw lo naa? Gon ganle naraa gdz-in dze ne gacnañ miech cho nac naa.

<sup>5</sup> Niicle sca rëb Jesús lo me, güey me lo zha ne quiaguiz vin ga rëb me lo zho:

—Míne gnabeytaa me to, golguña.

<sup>6</sup> Lidz meñ co ga ndxie xoop guies ne niaa quie; zaatne rio nis ne rquiin zha Israel riar nia zho, zigne nac grë xcostumbr zho. Tib tib guies co, rio maase xoopga re nis leña. <sup>7</sup> Dzigo bnabey Jesús zha ne rguiz vin ga pcodzëe zho nis leñ gza guies co. <sup>8</sup> Blozhse guiel guiel pcodzëe zhow, rëbchaa me lo zho:

—Golcúee niip nis qui, gołtsieniew lo meñ ne zo lo lni.

Zeene laa zho blee niip nis co tsienie zho, laaw nacle vin. <sup>9</sup> Ni lalnu ib güeynied guic meñ co pa brieë vin co (loxaque zha ne nacse ngundziin ga, zha ne blee nis ga, zha cose gon pa brieew), zeene pquiaaro mew, bredz me mguí ne notsieelna ga, rëb me:

<sup>10</sup> —¡Zha nañ luu naraa cüee luu vin rii! Grëtaa zaatne znu rac lni, glo rgaaz vin niaz, zeene nrooblew noye zho, dzigo rgaaz vin ligase. Laa luu gon leñ naraa bnabey luu brieë vin niaz.

<sup>11</sup> Milagr ne been Jesús guiedz Caná ga, ga glopaa blu me lo miech ganle nli tib meñ nroob nac me. Grëse no ne nac no xpëedscuel me, zeene bdzion now, hor

co bliladz no nli me nac Men ne zëëble diidz ga cxeel Dios.

<sup>12</sup> Zeene blozh guieltsieel co, laa no wbire guiedz Capernaum stib grë no me, xniaa me, ni zha bets me ne. Bdzin no Capernaum, ga bliaaz no blalaa ngbidz.

### Blee Jesús grë zha ne noyū lgui leñ yadoo

(Mt. 21:12-13; Mr. 11:15-18; Lc. 19:45-46)

<sup>13</sup> Leñ dze ne ziaadyob Ini Pascw, Ini nroob ne ruñ zha Israel rsoladz zho zha psilaa Dios zho Egipt, leñ dze co brieë Jesús zie me nëz Jerusalén.

<sup>14</sup> Bdzin me Jerusalén, güey me leñ yadoo nroob ne zob lad guiedz co. Zeene bzëëb me, gon me nzian miech ne ndxie ro yadoo co, zha ne no wto ngon, zha ne no wto mëcwxiiil, zha ne no wto palom ne, haxta zha ne rtsëë dimi ndxie ga. <sup>15</sup> Dzigo bzhixcuua me tib lë doo zig ríaa dooguid ne rcaa ma, bzheñ me doo co beñcxoon me zho ga grë xma zho; blozh ga, ptiixche me xmezha zha ne notsëë dimi ga, nëzrii nëzrec blaal me xtimi zho.

<sup>16</sup> —iNiinagazh gołcuae grë ncuaan qui nu! —rëb me lo zha ne rto palom—. iGołguien ganle lidz Pxoz naa nu! iNacda yu lgui parne tso to wto nu!

<sup>17</sup> Dzigo psoladz no zha ziaad lo Xtiidz Dios, zaatne rnee: “Rbiñladz guic naa, sac ne nligaa racladz naa yquiaanap naa lidz luu.”

<sup>18</sup> Blalaa zha non lo menquiedz Israel, zeene gon zho sca beñcxoon me grë miech co, wbig zho lo me rëb zho:

—iCho nac luu ne squitaa noyū luu grë ncuaan qui? iBeen tib milagr, dzigo zliiladz no men r nabey nac luu!

<sup>19</sup> —Telne racladz to milagr —rëb me—; gołtsil yadoo rii, ni gni naa lo to ganle ngbidz tsona laa naa bzaalolew stib.

<sup>20</sup> Pquiab zho rëb zho:

—iNcuaane gliladzdraa no rnee luu! iLeñ choopxoopraa iz name bíaa yadoo rii! iZhazhe guñ luu, tsonaque ngbidz gzaa luuw stib?

<sup>21</sup> Per zeene sca bnee Jesús lo zho, xcuerp me ga nac yadoo ne bzeet me. <sup>22</sup> Gane zeene brieëban me, hor co psoladz no zeene znu bnee me, dzigo bieñ no ne me ga bzeet me ni bieñ no ne me ga raquiet lo Xtiidz Dios zaatne scaque rnee.

<sup>23</sup> Leñ dze Ini Pascw co, nzian miech zeene gon zho grëtaa milagr ne ruñ me, bliladz zho ne nli me nac Men ne zëëble diidz ga cxeel Dios. <sup>24</sup> Per ib pxend me lo zho, sacne nanwen me zha nac zho tib tib zho.

<sup>25</sup> Pquiind me chopaa niab lo me zha nac zho; sac nanwen me zha nac tib tib miech ni nan me pe rza zdo zho.

### Jesús ni Nicodem

**3** Ziecowle liuw, bdzin tib zha farisé lë Nicodem zaatne rbëz Jesús; tib zha non nac me lo menquiedz Israel. Bdzin me rëb me lo Jesús:

<sup>2</sup> —Maestro, ndion no ible Dios pxeel luu ziadseed luu no. Grë milagr nroob ne ruñ luu, ga rlu ne Dios nacie luu.

<sup>3</sup> —Gneli naa lo luu ganle Nicodem —rëb Jesús—, grëse miech, telne gald zho stib grieelod gdziñ zho zaatne r nabey Dios.

<sup>4</sup> Pquiab Nicodem, rëb Nicodem:

—iGal zho stib ye? iZha grielo gal miech stib? Tib zha ne nacle mençol, iñiacxe zrieelo sëëb zho zdo xniaa zho gbiire gal zho?

<sup>5</sup> Rëbchaa Jesús:

—Ible none gal miech, none gal zho zigne racladz Dios. Sac telne chobnisd zho ni ygaad zho Espiritu Sant, grieelod sëëb zho zaatne r nabey Dios. <sup>6</sup> Grëse miech zeene ral zho glo, miechse nac zho; sangue zeene ral zho stib, Espiritu Santle nac men ne r nabey zho. <sup>7</sup> Gacxe waa, gzeed zdo luu znu rne naa: “Grëse miech, ib none gal zho stib.” <sup>8</sup> Nac cuent rii zig nac me ne rtop xcow, zeene rree me, nëzrii nëz rec zie me, ron luu razh zhoob me; per ranđ luu dien pa nëz zie me dien pa nëz ziaadgaa me. Scaque nagon nac zha ne ral stib, grieelod guien miech zha r nabey Espiritu Sant lo xquielmban zho.

<sup>9</sup> —Rienđ naa zha rnee luu —rëb Nicodem—. iRienđ naa dien zha grielo gac grë miñe rnee luu!

<sup>10</sup> Rëbchaa Jesús:

—iRienđ luu ye zha rne naa? iMen rseed miech name nac luu lo menquiedz Israel! <sup>11</sup> Miñe rne naa nu ncuaane rien naaw, ncuaane gon naaw, ni rienđe to zha naca. <sup>12</sup> Telne rienđ luu zha nac grë miñe rne naa nu zeene rzet naa ncuaane rac lo guidzliu, i zha dzigo guien luu miñe gne naa telne gzet naa grë ncuaane rac gbaa?

<sup>13</sup> iWaltaa gard tso tib zha ne soquia gbaa, per no tib men ne biet gbaa, men cosi soquia me gbaa, sac ga nac zaatne no me; ni lëë men co nu nac naa. <sup>14</sup> Ni zigne pquianga Moisés tib meeł brons tib guic yag zeene nonie me zha Israel dan zit co; scaque none yquianga naa tib lo yag, <sup>15</sup> zeena grëse miech, zha ne gbig dib zdo zho gnalo zho naa, zгаа zho tib guielmban ne gdziñd dze lozh. <sup>16</sup> Sac gon rleyniedox Dios grëse miech ne ndxie lo guidzliu; gane niicle tib naa nac mëëd lo me per laa me pxeel naa lo guidzliu; zeena grëse zha ne gnalo naa, zгаа zho tib guielmban ne gdziñd dze lozh; led yed zho nitlo. <sup>17</sup> Laa Dios pxeel naa lo guidzliu par csilaa naa miech lo doł, zialđ naa par gdziibdoł naa miech. <sup>18</sup> Sac grëse zha ne dib zdo gnalo naa ne naa csilaa zho lo doł, nitlod zho. Sangue zha ne gnalo naa, laa zho bnitlole ga, sac gon Xpëëd Dios nac naa ni bliladz zho naa. <sup>19</sup> Laa zho bnitlole, sac gon biaadpaa biini lo guidzliu ni laa ne nleynie zho biini, leł guielcow bleynie zho, sac guielntseeb nac miñe zienał zho. <sup>20</sup> Grëse zha ne ruñ guielntseeb, rlëë zho ran zho biini. Ib rbigd zho lo biini, sac racladz zho xoobneñ grë guielntseeb ne quiayū zho. <sup>21</sup> Sangue zha ne ruñ miñe r nabey Dios, haxta rley zho rbig zho lo biini, zeena glu ganle zienał zho miñe r nabey me.

### Rzeet Juan Bautist Jesús stib

<sup>22</sup> Ga brieë Jesús güeynie me no nêz xtan zha Judé. Xtselaa bliiaz no ga grê no me, rchoobnis me grê miech co.

<sup>23</sup> Len̄ dze co gard guiab Juan Bautist ladzguiib; dzigo ye me nochoobnis miech zaatne lè Enón gax Salim; sac ga no naal nis. Nzian miech ne rdziñ lo me ga, rchoobnis me zho.

<sup>25</sup> Tib dzew, wbig tib zha Israel lo zla xpëedscuel Juan, psilo zho nodīdiidz zho dien̄ cho zhiwrobnis nonraa; pe zhiwrobnis Jesúsá, te zhiwrobnis Juana ye.

<sup>26</sup> Blozhse bdīdiidz zho, wbig xpëedscuel Juan lo Juan, rëb zho:

—Maestro, meñ ne goñ bzodiidznie luu ro guiubee Jordán ga, meñ ne scataa bzeet luu lo miech, iye me laa me quiachobnis miech niina, ni ndal miech niapse lo me zie zho, ziaatraade zho nêz rii!

<sup>27</sup> Pquiab Juan rëb Juan:

—Ib Dios rdeed diidz zha gun̄ miech tib tib xtsiñ me, gacd ne lega zhal zho gun̄ zho pe cos. <sup>28</sup> Miñe pso Dios naa, laaw beñ naa: laa naa biallu ganle cho nac Meñ ne zëëble diidz ga cxeel Dios. Ni bneeli naa lo to ganle led naad nac meñ co; laa naa zial loxaque par gzet naa me lo miech zeena gunbey zho me. <sup>29</sup> Ible lo me none gdziñ miech. Nac me niina zig tib mgui ne notsieelnia: Mgui ne notsieelnia, iled zha lëe rzobnie ndzooop ne notsieelnia zho! Ni grê zha ne ndzieeldiidz zho, rley zho ran̄ zho laa xamigw zho notsieelnia, rley zho ron zho pe rnee xamigw zho. Scadaa nagon̄ rzaac naa niina: rley naa ron naa grê ncuuañe ruñ me. <sup>30</sup> Zigse zie dze, laa me gacnonraa; scagaa naa, zigse zie dze laa naa guiaañwinraa.

<sup>31</sup> Nêz gbaa ziaad me, miñ co ne mazdraa non me lo grê miech. Teñ naa tib miech guidzliuse nac naa, ni ncuuañe rien̄se tib miech lo guidzliu miñ co rne naa; <sup>32</sup> sangue me, niapse grê miñe bin me, grê miñe goñ me miñ co rnee me lo miech; iñi choot riladzda! <sup>33</sup> Zha ne riladzse xtiidz me, rien̄ zho ganle niapse diidzli rnee Dios. <sup>34</sup> Xtiidz Dios rnee me lo miech; sac Espíritu Sant rdeed guieñbiini lo me, ni Dios nac meñ ne pxeel me. <sup>35</sup> Rleyniedox Dios me, nac me Xpëed Dios; gane grêtaa ncuuañe no gbaa, no lo guidzliu, ladznie me psañ Diosá. <sup>36</sup> Grêse zha ne gnalo me, laa zho bgaale tib guieñmban ne ib gdziñd dze lozh; sangue zha ne gond xtiidz me, gdziñd zho gbaa, zaatne ygaa zho guieñmban co. iGrêse zha co, ible zgaa zho guieñnedox ne csiaab Dios!

### Tib wnaa Samar

**4** Zeene bien̄ Jesús laa zha farisé gocnanle ndalraa miech zianal zhiwseed me, ni ndalraa miech ne quiachobnis me lo Juan <sup>2</sup> (niicle ne led medpaa rchoobnis, sinque zha ne nac xpëedscuel me zha co rchoobnis), <sup>3</sup> nacne brieë me xtan zha Judé ga, wbiere me nêz xtan meñ Galilé stib.

<sup>4</sup> Par gdziñ me Galilé, none ted me xtan meñ Samar. <sup>5</sup> Xtan meñ Samar zieded me, zig groñ dzew, laa me zie gax guiedz ne lè Sicar, <sup>6</sup> dzigo güeyted me zaatne quia guiuu ne rnee zho “Zhibzie Jacob”; lo liu ne psañ Jacob lo xpëed me José padzeela. Rdzag me ziaad-zè me lo nêg co, bdziñ me bzob me ro guiuu co; <sup>7</sup> ga blèz me, laa no zio lad guiedz Sicar zioxi no ncuuañe dioownie no me.

Ro guiuu co zob me bdziñ tib wnaa Samar ziexi nis ga; dzigo rëbchaa me lo wnaa co:

—Bzhiguiel̄ bzoladz niip zhis luu guie naa.

<sup>9</sup> Bzee zdoo wnaa co goñ me bñab Jesús nis lo me, sac rlëëdox zha Judé ran̄ zho zha Samar, per ni rneed zho lo zho.

—iNcuuañe gliladz naa! —rëb me—. iTi zha Judé gnab nis lo ti zha Samar!

Dzigo rëbchaa Jesús:

<sup>10</sup> —Teñ niaca miñe guieñ luu ganle cho rñab nis lo luu, ni guieñ luu zha nactaa ncuuañe rzoladz Dios lo miech, haxta znab luu nis lo naa. Ni naasi goñ, znedz naa nis ne rdeed guieñmban.

<sup>11</sup> Pquiab wnaa co, rëb me:

—Per ni nzheñd luu name pe cuee luu nis, i pa dzigo tsiebee luu nis ne rdeed guieñmban ga? iGoñ ganle, quietdox bie rii! <sup>12</sup> Stiba, iñiacxe mazdraa dzigo nac luu que pxozgol ne Jacob, meñ ne psañ bie rii? Nu name go me nis grê xma me; niicle grê xpëed mew, nuque go zho nis.

<sup>13</sup> —Grêse zha ne rie nis rii —rëb Jesús—, rbiire rñab zhis zho; <sup>14</sup> sangue nis ne rded naa, zha ne guiew gdziñdraa dze gnab zhis zho. Sac nis ne gded naa, masaque gdziba zdoo zho zig rdzib nis tib ro zhlian, ni nis co gded tib guieñmban ne gdziñ dze lozh lo zho.

<sup>15</sup> Dzigo rëbchaa wnaa co lo Jesús:

—Bzhiguiel̄ bneedz nis co guie naa, zeena gnabdraa zhis naa, zeena guiañxidraa naa nis nu.

<sup>16</sup> —Güeygazh —rëb Jesús—, güeyxi tsieel luu, dzigo goñtë grop to.

<sup>17</sup> —Guien̄d tsieel naa —rëb wnaa co—. Gard ctsieelnia naa.

—Nli rnee luu —rëb Jesús—; <sup>18</sup> sac gaay mgui ne zibannie luu, ni tib zho ptsieelniad luu, niicle mgui ne nonie luu niinaw, ptsieelniadaque luu zho. iNli miñe rnee luu i!

<sup>19</sup> Zeene bin wnaa co sca rëb Jesús, rëbchaa me:

—Zootne tib zha ne ziadnee xtiidz Dios lo miech nac luu. <sup>20</sup> Teñ scaw, bzhiguiel̄ bnë dien̄, i zha nacne rnee grê meñ Israel ne len̄ yadoo nroob ne zobpaa Jerusalén, gapaa none tsiegan̄ miech Dios? Sac no ne nac no meñ Samar, rnee no ne ib guic gui ne zob nu, ga none tsiegan̄ miech Dios; sac grê xmengol no ga güeygan̄ zho Dios.

<sup>21</sup> Pquiab Jesús rëb me:

—Bina ganle, zdziñ dze zeene yquiindraa ne goon̄ guic gui riipaa, o Jerusalénpagaa tsie to tsiegan̄ to Dios meñ ne nac Pxoz ne. iNi laa dze co ziaadgaxle! Gacdraaw ne dien̄ pa lo tsie ne tsiegan̄ ne Dios, sinque zha ne nlipaa racladz gleynie me, none dib zdoo zho



gleynie zho me; zigne gdeedse Espíritu Sant guie|biini lo zho.

‘Choot grieelod gan Dios; gacxe waa zha ne gleyne me, none gleyne zho me zigne rdeed Espíritu Sant guie|biini lo zho; ni none dib zdoo zho gleyne zho me. Ni zha ne sca gleyne me, zha co rguib me. Te| to laa to rieganse Dios ni runbeyde to me; sangue no rdziu- unbey no men ne riogan no, sac gon lo xti me| Israel ziaad men ne guiaadsilaa miech lo do|.

<sup>25</sup> —Nenda —rëb wnaa co—, per nan naa ib ziaad Me| ne zëëble diidz ga cxeel Dios, men ne lë Crist; ni zeene laa me guiaad, me gnë diidzli lo no.

<sup>26</sup> Pquiab Jesús, rëb me:

—iNaa gon nac men co! Lëe me nu nonee lo luu.

<sup>27</sup> Lëëtaaque hor co grëse no ne nac no xpëedsuel me laa no bdziñ. Bzee zdoo no bdziñ no laa me no-zodiidznie wnaa co, per ni tib no bnabdiidz lo me dien pe quianabdiidz me, dien pegaa quiazodiidznie me wnaa co.

<sup>28</sup> Laa wnaa co, zoque xche me ga, rias me laa me zie nëz lad guiedz. Bdziñ me, rëb me lo grë miech co:

<sup>29</sup> —iGol|të ganle gunbey to ti men co! iBzeet me grëse zha nac lo xquie|mban naa! iBay pe lëdle Men ne nole diidz cxeel Dios ga?

<sup>30</sup> Horco brieë grë miech co lad guiedz, ziaad zho za-atne gon wnaa co Jesús.

<sup>31</sup> Laa no, quia no rdeed no ncuane gow me, per nëd me.

<sup>32</sup> —Gowd naa —rnee me—. No stib xquie|wagw naa miñe runbeyde to.

<sup>33</sup> Dzigo r nabdiidzlsa no, rnee no:

—Bod no cho biaadnie pe dow me, lal ne bio ne lad guiedz.

<sup>34</sup> Nëchaa me lo no:

—Lëe xquie|wagw naa nac ne gon naa miñe rnabey Dios naa, ni csiaa| naa dziin ne pxeel me naa zialgun naa. <sup>35</sup> To lëe rnee to: “Len stapraa mëe csilo gac wlaap.” iPer go|wi lo grëtaa miech qui ganle, nac zho niina zig grë guie|gon ne go|le gliiap! <sup>36</sup> Gacxe waa, ib none tsie to tsielaap to, tsietop to zho, zeena yгаа zho tib guie|mban ne gdziñd dze lozh. Ni zigne razh zha ne rie wlaap, scaque zguizh Dios to tsietop to zho. iTi guie|bley nrooba, zigtaa par zha ne rana, zigtagaa par zha ne rlaapa! <sup>37</sup> Ible nli diidz ne znu rnee: “Zhaa zha ne rie gon, stible zha ne rie wlaap.” <sup>38</sup> Zig nac niina, laa naa rxel to tsielaap to zaatne ni tib xtsiñ to psëëbde to; zhaa zha ne güey gon, na tole tsie wlaap.

<sup>39</sup> Laga laa me sca quianee lo no, laa grë menladz wnaa co no nëz ziaad zho nëz lo no ga. Nzian grë miech co, zeene bin zho rëb wnaa co bzeet Jesús grë ncuane ziyun me, bliladz zho Jesús. <sup>40</sup> Laa zeene blan-so zho ga, bnab zho lo me cuëz me ladz zho zhis. Dzi-go nacne blëz me lo zho chop ngbidz. <sup>41</sup> Nzianraa grë miech co bliladz me, zeene bin zho grë zhiwseed me.

<sup>42</sup> —Nasi nagon laa no rliladz me —rnee zho lo wnaa co—, sac nozhal bdziñ me, ni bdziñ no grë miñe rnee me. Nliw, ible me nac men ne ziaadsilaa grëse miech lo xto| zho.

### Biac xpëed tib zha ne quia dziin lo rey

<sup>43</sup> Zeene goc chop ngbidz co, laa no brieë ga gza no me, laa no bdzio nëz stib zio no nëz Galilé. <sup>44</sup> Niicle ne bzeetle me: grëse zha ne ziadteed xtiidz Dios, ib ranzded miech zho zaatne nac ladz zho; per <sup>45</sup> zeene bzëëb me grë guiedz ne ngab Galilé, wen pcania grë miech co me. Nzian zho güey Ini Pasew co Jerusalén, gon zho grëtaa milagr ne been me ga.

<sup>46</sup> Nëz no no bdziñ no Caná, zaatne sca bzaalo me nis vin. Ga bdzieelo me tib zha Capernaum, tib zha ne rquia dziin lo rey; lëëtaque len dze co rzacnë xpëed me.

<sup>47</sup> Bin me laa Jesús brieë xtan men Judé, laa me no gdziñ Galilé. Dzigo biaad me biaddzieelo me Jesús ga, bnab me lo Jesús tsienal Jesús zhits me Capernaum, tsiegunguiac Jesús xpëed me; sac nzhoo rac win.

<sup>48</sup> Dzigo rëbchaa Jesús lo me:

—iPe haxta gan to dzigo gon naa milagr, dzigoraaliladz to naa?

<sup>49</sup> —Been tib guie|nzaac gotsaa guioniob ne —rëb men co—, nend znuse lozh xpëed naa.

<sup>50</sup> Rëbchaa Jesús:

—Bzë, tsod luu guie|në. iLaa xpëed luu biacle!

Dib zdoo men co bliladz me xtiidz Jesús, laa me bio nëz laa me zey. <sup>51</sup> Zhilew gdziñ me lidz me, zeene bdzieelo me bla zha ne quia xtsiñ me, rëb zho laa xpëed me biacle. <sup>52</sup> Dzigo bnabdiidz me lo zho, maase pa hor biac win. Rëbchaa zho:

—Nieeg, zig rwe ngbidza, tibaque znuse brieë zhixlëë win.

<sup>53</sup> Dzigo psoladz me zig hor cotaque rëb Jesús lo me, laa xpëed me biacle. Dzigo dib zdoo me bliladz me Jesús, tsieel me, xpëed me, menlidz me ne, grëse zho dib zdoo zho bliladz zho Jesús.

<sup>54</sup> Ga goc brop milagr ne been Jesús lo zha Galilé. Miñ co been me zeene wbiere me nëz Judé.

### Biac tib men ne gacd grial

**5** Goc palal dzew, laa stib Ini nroob rac Jerusalén, dzigo nacne güey Jesús Jerusalén stib.

<sup>2</sup> Ro guiedz Jerusalén, gax zaatne quia puert ne rded mëcwxiil, ga niaa tib pil nis rnee zho Betesd. Igo ro pil co niaa tib nsaap, rap nsaap co gaay arcw.

<sup>3</sup> Lo nsaap co, ga ndxie nzian men rzacnë, no zho ro|d lo, no zho në ni, no zho ib gacd grial [grëse zho laa zho ndxie ga quiambëz zho gni lo nis ne no len pil co, <sup>4</sup> sac nac diidz poc poc riet tib xanj| Dios riesini lo nis co, dzigo zha ne znuse sëëb lo nis co, tel pe guie|guidztaa rzac zho, riac zho].

<sup>5</sup> Ga nix tib mgu, gocle gal|ptsiipton iz rzacnë me.

<sup>6</sup> Laa zeene gon Jesús me, ni bin Jesús scataale nroob dze rzacnë me, rëbchaa Jesús lo me:

—iPe racladz luu guiaac luu?

<sup>7</sup> —Racladz naa —rëb me—, per guiend cho csëëb naa len pil qui zeene laa lo nis rni. Zeene racladz naa sëëb naa, zhaale stib zha ne glo rzëëb.

<sup>8</sup> Dzigo rëbchaa Jesús lo me:

—¡Nasca zeena guche i! ¡Bzoli, bi yag ne bzhoob luu i, zeena bzë!

<sup>9</sup> Zigne sca rëb Jesús, laa meñ co biac. Horcogazh blis me yag co, nzëni me laa me brieë ga.

Ni ne dze co nac tib dze nda lo zha Israel, <sup>10</sup> zeene gonñ zho ney me yag ne bzhoob me, rëbchaa zho lo me:

—¡Pe rienñd luu nda nadze! ¡Lëda i gonñ squi yquianlan luu ncuaañ qui dze riil!

<sup>11</sup> Pquiab me rëb me:

—Meñ ne beenñguiac naa, mezhal në lo naa, güey naaw.

<sup>12</sup> —¿Cho meñ sca në lo luu? —rëb zho.

<sup>13</sup> Niicle me rienñdaque dienñ chow, sac ndaldox miech ne ndxie ga; hor co laa Jesús bzëëble lad grë miech co.

<sup>14</sup> Haxta lenñ yadooraa bdzieel Jesús me, dzigo rëbchaa Jesús lo me:

—Nana gonñ ne squi laa luu biacle, bienñ gunñctaldraa luu xtoñ luu. Sac telñe gond luu diidz, nend dzigole glaan luu tib guieñguidz ne mazdraa ntseeb.

<sup>15</sup> Zeene laa me brieë ga, güey me lo zha ne rnabey lo zha Israel ga, rëb me lo zho Jesús nac meñ ne beenñguiac me. <sup>16</sup> Nacne psilo zho quianañ zho dienñ zha gnaaz zho Jesús pe nacne runñguiac me miech dze nda.

<sup>17</sup> Blisqui zhow lo me, dzigo rëbchaa me:

—Telñ Pxoza naa gzataa dze quiayunñ me dziin; ni minñ-coque nac miñe quiayunñ naa.

<sup>18</sup> Zeene gonñ zho sca rëb me, mazdraa blëë zho lo me rzac zho tebaa zha gutgazh zho me. Rlëë zho, sac zianañd me dienñ pa dze nda; mazdraa zeene rëb me Dios nac Pxoza me, sac ga rlu me ne lalga nac me con Dios.

### Meñ nroob nac Xpëed Dios

<sup>19</sup> Ni rëb me:

—Gneli naa lo to ganñle: peet grielod gunñ Xpëed Dios lega guicse me, sinque ncuaañe ranñ me runñ Pxoza me, minñ co runñ me. <sup>20</sup> Nquialadzdox Dios me, grëtaa dziin ne runñ Dios rlu Diosa lo me; gane zunñ me milagr nroob ne mazdraa gzee zdoo to; ncuaañe palase i gonñ to niina ne biac meñ qui. <sup>21</sup> Sac telñe gacladz me cueeban me tib menñgut, zbeeban me zho, zigne rbee-banaque Pxoza me menñgut. <sup>22</sup> Ni bzo Dios me, me gunñ guieñwxtis, <sup>23</sup> zeena grëse miech guieñ ganñle zigne nonaque Pxoza me, scaque meñ non nac me, ni sca none gunñnon zho me. Sac telñ zha ne gunñnond me, ye le Pxoza me ga (meñ ne pxeel me) runñnond zho.

Ni rëb me:

<sup>24</sup> —Gneli naa lo to ganñle: Zha ne gliladz xtidz naa, ni gliladz zho meñ ne pxeel naa, laa zho bgaale tib guieñmban ne gdzind dze lozh. Led yedraa zho ygaa guieñnëdnox ne ygaa grëraa miech ntseeb; sac laa zho brieële ladznaa guieñgut ga, bdziñ zho lo guieñmban co. <sup>25</sup> Ddziñ dze zeene ye grë menñgut, zon zho xtidz Xpëed Dios; ni grëse zha ne gzoobdiaga, zban zho. ¡Ni lëë dze co bdziñ niina! <sup>26</sup> Sac gonñ, zigne rdeed Dios guieñmban lo miech, scaque zrieelo gdged naa guieñmban lo

miech. <sup>27</sup> Ni bzo me naa, naa gunñ guieñwxtis, gdged naa miñe tsieguiañ tib tib miech.

<sup>28</sup> ¡Gzeed zdoo to! Sac ne nligaa, zdziñ dze, grëse menñgut ne no lenñ baa, laa zho grieeban <sup>29</sup> zeene gonñ zho tsi naa. Grëse zha ne ndzinli wban, hor co laa zho ygaa tib guieñmban ndzon; sangue zha ne beenñ guieñntseeb, hor co laa zho guey lo guieñnëdnox ne rieguiañ zho.

<sup>30</sup> 'Per grielod gunñ naa guieñwxtis naase, ib none gacnanñ Pxoza naaw. Grëse guieñwxtis ne gunñ naa, laaw gunñ naa zigne gnabey Pxoza naa, laaw gunñ naa zigne nongueñla, sac gonñ gunñd naa miñe guiaabtaa guic naa, sinque laa naa gunñ miñe racladz Pxoza naa.

<sup>31</sup> 'Telñe niaca miñe naase rne cho nac naa, zrieëquia zha ne guiab nñlida. <sup>32</sup> Per na, no stib meñ ne rzeet naa lo miech; ni nanñ naa diidzli rnee me. <sup>33</sup> Haxta Juan Bautist, zeene pxeel to bla zha ne güeynabdiidz lo me, grëse miñe rëb me lo zho ga, diidzliw. <sup>34</sup> Laa naa rzet minñ rii lo to, zeena gliladz to cho nac naa, zeena sca laa to lo xtoñ to; sac rquiindpaa dienñ cho miech guidzliu rii gnee cho nac naa. <sup>35</sup> Zeene biaad Juan, goc me zig tib biini bziini me lo to palal dze zeena gunñbey to naa; ni bley to pquiaadiag to miñe bnee me. <sup>36</sup> Nli bnee me cho nac naa; per grë milagr ne runñ naa minñ co quiaxobneñraa ganñle cho nac naa. Pxoza naa rneedz diidz runñ naaw; ni ga rlu ganñle ne me pxeel naa.

<sup>37</sup> Haxta ye me mezhal quialu ganñle cho nac naa, parga nli gard ganñ to me, niicle gard gonñ to tsi me. <sup>38</sup> Ronde to pe rnee me, sac rliladzde to naa; sac gonñ me pxeel naa zialñe naa xtiidz me.

<sup>39</sup> 'Nli rioxco to rseed to grë guits ne ziaad Xtiidz me, sac rienñ to ga ziaad dienñ zha ygaa to guieñmban ne gdziñd dze lozh. Ni niicle ne lo co zhobnee ganñle cho nac naa, <sup>40</sup> per nëde to gbig to lo naa, zeena ygaa to guieñmban co. <sup>41</sup> Nëde to gunñbey to naa, nëde to guieñ to cho nac naa, per peet nacd minñ co; <sup>42</sup> runñbey naa to, ni lalnu rleyñiede to Dios. <sup>43</sup> Sac gonñ, me pxeel naa zialñ naa lo to, ni rlëë to ranñ to naa; mazd zha ne lega ziaadse, zha cosi lëëlëd rcaania to zho. <sup>44</sup> ¡Minñ co gonñ, ib rliladzde to cho nac naa! Sac laa guic to zienie loxaque dienñ zha gunñnon samiech to to, ib rguibde to zha gacnon to lo Dios. <sup>45</sup> Ni guiabde to togo naapaa gazo to lo Pxoza naa, glisqui naa grë ncuaañe runñ to. Moisés gonñ nac meñ ne glisquiw; sac ley ne psanñ me, miñe rnalo to csilaa to lo xtoñ to, lëëw glu ganñle pe nac grëtaa ncuaañe quiayunñ to. <sup>46</sup> Sac gonñ, telñe niaca miñe nli-paa rliladz to grë miñe pquiaa Moisés, zliiladz to dzigo cho nac naa; golganñ ganñle, lo grë guits ne pquiaa me, ga rzeet me naa. <sup>47</sup> Rlu rliladzde to grë miñe pquiaa Moisés ga, gane rliladzde to miñe rne naa lo to.

### Row gaay mil miech

(Mt. 14:13-21; Mr. 6:30-44; Lc. 9:10-17)

**6** Bded ga, tib dzew brieë Jesús bdedquia me nëz danñ ro Nisdoo Galilé (lëëque nisdoo co ga rnee zho Nisdoo Tiberias).

<sup>2</sup> Miech guizhiu ne brieenañ zhits me, sac ziyanñ zho grëtaa milagr ne runñ me, runñguiac me grë meñ rzac-

në. <sup>3</sup> Nzian zho nac zha ne zie Ini Pascw, Ini nroob ne rac Jerusalén gzobse iz.

Grëse no ne nac no xpëëdsuel me, laa no na<sub>l</sub> zhits me. Zeene bdieedquia no ro nis co, dzigo bdzieep no tib cho gui win zob gax ga. Loxaque laa no bzioob ga grë no me, <sup>5</sup> zeene bdzion no miech guizhiu ne ziaadquia cho gui co, laa zho glansole lo no ga. Dzigo rëbchaa me lo Lip:

—Lip, çpa guioziu ne ncuaane gow grëta miech qui?

<sup>6</sup> Per lega scase rëb me lo Lip, par die<sub>n</sub> pe guiab Lip; sac nanle me pe nac ncuaane gu<sub>n</sub> me.

<sup>7</sup> —iNe nligaa pe zhidaa zho! —rëb Lip—. Niicle telne niaca mi<sub>n</sub>e gziuu nzian gayoo quietxtil, ni ygaad ncuaan co ygaa zho tiblë wingaw tib tib zho.

<sup>8</sup> Dzigo pquiab Ndrës, bets Pedr, stib zha ne nacgza no; rëb Ndrës:

<sup>9</sup> —Nu zo tib mëëdbgui win ney gaay quietxtil cebad ni schop me<sub>l</sub> win. çPer pa ygaa ncuaan co lo grëta miech qui?

<sup>10</sup> —Golnee lo zho die<sub>n</sub> —në me lo no—. Golguiab lo zho sob zho.

Ndzon zëëb guizh nguia ga, dzigo laa grë miech guizhiu co bzob lo guizh nguia co (zig gaay mil rgaa loxaque zha bguise). <sup>11</sup> Dzigo bnaaz me gza quietxtil co, bdeed me xquizh lo Dios. Blozhse ga, zigse rneedz mew lo no scase scase rguiz now lo grë miech co; scaque been me grop me<sub>l</sub> co. çGrëse miech co, dow zho zaatne bieltaa zho! <sup>12</sup> Blozhse dow zho, nëchaa me lo no:

—çGoltsietop grëse mi<sub>n</sub>e biaan i, zeena nitloda!

<sup>13</sup> Psilo no ptop no grë quietxtil ne biaan ga, zeene blozh bdopa, çlo gaay quietxtil cebad co, biodzë tsiip-chop chicuid biow!

<sup>14</sup> Zeene gon grë miech co milagr ro ne been Jesús ga, rneechaa zho:

—çNe nlipagaa, lëe men qui ga quiambiaaz ne! çMe nac Men ne zëëble diidz ga cxeel Dios lo guidzliu guidaeed xtiidz me!

<sup>15</sup> Bienga Jesús racladz zho, zhoo tsienie zho me gac me zhirey zho, nacne bzoquia me guic gui win co, tipse me.

### Rzë Jesús lo nis

(Mt. 14:22-27; Mr. 6:45-52)

<sup>16</sup> Rguetsle liuw, bzhiuxto no dan bdzi<sub>n</sub> no ro nisdoo co; ga bliiaz no me. <sup>17</sup> Bdzionse no choot rlansod ni laa liu rcowraa, dzigo mazd laa no bziaab le<sub>n</sub> canó, laa no zio nëz Capernaum.

<sup>18</sup> Laa no zionie canó co lo nis, tibaque zeene psilo rriee me, ntseeb riasoli lo nis co. <sup>19</sup> Maase gaay kilómetro o xoopgaaw goc zio no, tibaque zeene bdzion no laa me ziaad-zë lo nis co, gaxle lo no ga. Zeene bdzion no sca ziaad-zë me lo nis, bdzieeb no.

<sup>20</sup> Dzigo bnee me, në me lo no:

—çGdziebde to! çNaa zia<sub>l</sub> nu!

<sup>21</sup> Dzigoraa rley no bdzion no laa me bzëëb le<sub>n</sub> barcw; tibaque zeene bien no laa no brieequiale zaatne no gdzi<sub>n</sub> no ga.

<sup>22</sup> Biini liu co, grë miech ne biaan stib nëz ro nis co, laa zho bdzi<sub>n</sub> zaatne nac ro nis ga, quiambëz zho gan zho me. Sac gon zho tibaque barcw zo ga, ni zeene wbii no ga, loxaque nose wbii. <sup>23</sup> Gax zaatne bguiaan me zho ga, ga bdzi<sub>n</sub> bla barcw ne ziaad nëz Tiberias; <sup>24</sup> dzigo gonse zho niicle me niicle no ne nac no xpëëdsuel me, choot guiend ga, nacne bzëëbaque zho le<sub>n</sub> barcw ne bdzi<sub>n</sub> ga ziaad zho nëz Capernaum.

### Jesús nac men ne rdeed guielmban

<sup>25</sup> Zeene blanso zho Capernaum, laa Jesús zole lo no ga; dzigo rëbchaa zho lo me:

—Maestro, çpa horzhe waa blanso luu nu?

<sup>26</sup> Dzigo rëbchaa me:

—çNaa lëe ziaadguib to? Per ziaate to porne rien to cho nac naa, sinque laa to ziaad porne gon to bnedz naa ncuaane pquiin to. <sup>27</sup> çGolguien, tsienied guic to loxaque ncuaane gowse to, sac znuse rnitlo grë ncuaan co! Sinque, goltsoxco golgun mi<sub>n</sub>e racladz Dios, zeena ygaa to tib guielmban ne ib gdzi<sub>n</sub>d dze lozh. Ni naa ne nac naa Mgui ne pxeel me, naa gneedz guielmban co lo to; sac ible mi<sub>n</sub> co pxeel me naa.

<sup>28</sup> Dzigo bnabdiidz zho lo me, rëb zho:

—çZha dzigo dziuun no mi<sub>n</sub>e racladz Dios? çPe nac ncuaane dziuun no?

<sup>29</sup> Pquiab me rëb me:

—Mi<sub>n</sub>e racladz Dios gu<sub>n</sub> to: gliladz to cho nac men ne pxeel me.

<sup>30</sup> —Telne scaw —rëb zho—, none dzianlo no gu<sub>n</sub> luu nzian milagr, zeena gliladz no luu. çNligaa peet milagr nroob gard dzian no gu<sub>n</sub> luu! <sup>31</sup> Tel grë pxozgol ne, zeene wban zho grë dan bidz co padzeela, gzobse dze biet tiblo quietxtil zhan gbaa, dow zho; rnee lo Xtiidz Dios: “Moisés rdeed quietxtil co lo zho.”

<sup>32</sup> Pquiab me rëb me:

—Golgacnan ganle led Moisésd bdeed quietxtil co, sinque Pxoz naaw. Ni niina gon laa me quianeedz merpaa quietxtil gbaa lo to. <sup>33</sup> Sac gon, me pxeel men ne biet gbaa ziaddeed guielmban lo grë miech rii; men co nac quietxtil gbaa co.

<sup>34</sup> —Been tib guielnzaac sca —rëb zho—, çgzataa dze bneedz quietxtil co diow no!

<sup>35</sup> Pquiab me rëb me:

—Naa gon nac quietxtil ne rdeed guielmban ga. Grëse zha ne gbig lo naa sëëb zho xnëz naa, gdzi<sub>n</sub>draa dze ne ycaabedz zho; grëse zha ne gliladz cho nac naa, gdzi<sub>n</sub>draa dze ne gnab zhis zho. <sup>36</sup> Laa to gon, zigne bnelegaa naa lo to ga, çniicle ran to naa, per rililadzde to cho nac naa! <sup>37</sup> Grëse zha ne rxeel Pxoz naa, rlanso lo naa; ni tib zho ctsireed naa. <sup>38</sup> Sac gon, laa naa bieet gbaa zialgun naa mi<sub>n</sub>e racladz Pxoz naa (men ne pxeel naa); bieete naa par gu<sub>n</sub> naa mi<sub>n</sub>e gacladztaa naa. <sup>39</sup> Ni mi<sub>n</sub>e racladz me, grëse zha ne bneedz me lo naa, ni tib zho nitlod, sinque cueeban naa zho gal dze ne laa guidzliu nitlo. <sup>40</sup> Sac racladz me: grëse zha ne gbig lo naa ni gliladz zho naa dib zdoo zho, grëse zho ygaa tib guielmban ne ib gdzi<sub>n</sub>d dze lozh, ni cueeban naa zho gal dze ne nitlo guidzliu.

<sup>41</sup> Dzigo psilo grë zha Israel rneenë zho me, loxaque ne rëb me, me nac quietxtil ne biet gbaa; <sup>42</sup> rnee zho: —Men rii ga name rnee zho Jesús, me nac xingan José. Rdziuunbey ne xnгаа me, rdziuunbey ne pxoz me. ¿Zha nac dzigo ne rnee me gbaa biet me?

<sup>43</sup> Dzigo rëbchaa me lo zho:

—Lëëwga na, gołsioog ro to. Nodne squitaa gzee zdoo to miñ co. <sup>44</sup> Laa Pxoza naa pxeel naa ział naa lo guidzliu, per ni tib miech goñ grieelod gbig lo naa telne niaca miñe cuedzd me zho; ni zig rnele naa ga, zha ne gbig, naa cueeban zho gał dze ne laa guidzliu nitlo. <sup>45</sup> Znu rnee lo Xtiaidz Dios, zaatne pquiaa grë zha ne biadteed xtiidz me padzeela, rneew: “Laa Dios cseed grëse miech.” Ni lëë miñ co rac niina; gacxe nagon waa, grëse zha ne rquiaadiag miñe rnee Pxoza naa ni rseed zhow, grëse zha co lo naa rlanso zho. <sup>46</sup> Zha ne rlanso lo naa, guiabde to togo goñlo zho me; ni tib choot gard gañ me, naase nac meñ ne ziyaa me, sac zaatne no me ga brie naa ział naa lo to. <sup>47</sup> Golliladz miñe gni naa lo to nu sca: ¿Grëse zha ne dib zdoo zho gliladz zho cho nac naa, zgaa zho tib guielmban ne gdziñdraa dze lozh! <sup>48</sup> Ne nligaa naa nac quietxtil ne rdeed guielmban ga. <sup>49</sup> Grë pxozgol to, zeene sca bio zho grë dan bidz co, nli dow zho quietxtil ne biet gbaa ga, per bdeetew guielmban lo zho, sac grëse zho gut. <sup>50</sup> Sangue quietxtil ne rne naa lo to, gbaa bieta ni grëse zha ne yquiina zgaa zho tib guielmban ne gdziñd dze lozh. <sup>51</sup> Xcuerp naa nac quietxtil ne biet gbaa, miñe rdeed guielmban ga; grëse zha ne gow quietxtil co, zgaa zho tib guielmban ne gdziñd dze lozh. Lëëw gded naa zeena grieeo ygaa grëse miech lo guidzliu rii stib guielmban.

<sup>52</sup> Psilo grë zha Israel co stib, quianeelsa zho, rnee zho:

—¿Zha nacre squi rnee meñ qui? ¿Zootne rnee me none dioow ne xcuerp me!

<sup>53</sup> —Gneli naa lo to ganle —rëb me—, telne gowde to xcuerp Mgui ne pxeel Dios, ni guiede to xchen me, ygaade to stib guielmban co. <sup>54</sup> Sangue zha ne gow xcuerp naa, ni guie zho xchen naa, ib zgaa zho guielmban ndzon ne gdziñd dze lozh ga, ni naa cueeban zho gał dze ne laa guidzliu nitlo; <sup>55</sup> sac xcuerp naa nac miñe mazdraa rquiin gow miech, ni xchen naa nac miñe mazdraa rquiin guie zho. <sup>56</sup> Grëse zha ne row xcuerp naa, ni rie zho xchen naa, mbannie zho naa, niclegaa naaw mbannie naa zho. <sup>57</sup> Men mban nac Pxoza naa, meñ ne pxeel naa, me nac meñ rneedz guielmban lo naa; ni scaquegaa zha ne gow xcuerp naa, naa gded guielmban lo zho. <sup>58</sup> Naa nac quietxtil ne nlipaa biet gbaa. Grëse zha ne gow quietxtil rii, zgaa zho guielmban; led yed zho guet zig gut grë pxozgol to, zha ne sca dow quietxtil co.

<sup>59</sup> Lëë grë miñ rii bnee Jesús zeene pseed me miech leñ yadoo win ne zob Capernaum.

### Diidz ne rdeed guielmban

<sup>60</sup> Nzian grë zha ne rzënie Jesús, zeene bin zho grë miñe bnee me ga, rneechaa zho:

—Zha ngandoxtaa nac grë diidz ne rnee me i. ¿Cho gnë dien pe bnee me!

<sup>61</sup> Bien Jesús sca nonee zho, dzigo rëbchaa me lo zho:

—¿Pe rlëë guic to bin to miñe rne naa ga? <sup>62</sup> ¿Pe guiabzhe to dzigo zeene gañ to laa Mgui ne pxeel Dios soquia gbaa, gbiire guey me zaatne no me glo? <sup>63</sup> Espiritu Sant rneedz guielmban lo to, telne guieñd espiritu peet nond xcuerp to, sac bëëlse naca. Ni grë diidz ne bne naa lo to, lëëw nac Espiritu, ni lëëw gneedz tib guielmban ne gdziñd dze lozh lo to; <sup>64</sup> sinque to, bii no zla to rliladz cho nac naa.

Sca rëb me sac desde psilo bzënie zho me, rienle me cho nac zha ne ib rliladz me, ni cho nac zha ne tsieto me.

<sup>65</sup> —Runbey naa to —rëb me—, gane ni naa lo to ni tib miech grieelod gbig lo naa sëëb zho xnëz naa, telne niaca miñe cuedzd Pxoza naa zho.

<sup>66</sup> Nzian zha ne rzënie me, hor co laa zho bzozit lo me, bzënedraa zho me. <sup>67</sup> Dzigo bnee me lo no gza tsiipchop no ne nac no xpëëdsuel me, në me:

—To waa, ¿pe led yede to racladz gbiche lo naa?

<sup>68</sup> Pquiab Simón Pedr, rëb Simón:

—¿Per cho lora nadien guio no? Luuse nac meñ ne rseed miech diidz ndzon ne rdeed guielmban ne gdziñd dze lozh. <sup>69</sup> Laa no bliladzle cho nac luu, laa no gocndionle ne luu nac Men Ndzon ne pxeel Dios.

<sup>70</sup> —Nliw —rëb me—, ni naa bzooblo to gza tsiipchop to, per na goñ laa tib to bzëëble xnëz menox.

<sup>71</sup> Zeene sca rëb me, lëële Judas ga bzeet me (zhin Simón Iscariot); sac ye Judas nacgza no lo tsiipchop no ne bzooblo me ga, ni Judas nac zha ne güeyto me.

### Rliladz meñlidz Jesús cho nac me

**7** Bded ga, loxaque grë guiedz ne ndxie xtan zha Galilé, gase rieted Jesús. Sac grë zha Israel ne no xtan zha Judé, zha ne rlëë lo me, racladz zho gut zho me. <sup>2</sup> Laa zeene bdziñ dze ne run zha Israel lni ne rzhixcuuaa zho grë yu guizh, ni rbëz zho leña; <sup>3</sup> rëbchaa zha bets me lo me:

—¿Pe nacre ib rried luu nu? Brie zho, güey dib xtan zha Judé, zeena ye grë zha ne racnie luu ga gañ grëtaa ncuaane run luu. <sup>4</sup> Sac goñ, zha ne racladz gunbeyraa miech zho, grë ncuaane rac zho, run zhow ngueets zhliian zigne run luu. Rac luu name run luu grë milagr nroob, beena zaatne gañ nzian miecha.

<sup>5</sup> Sca rnee zho lo me, sac niicle zha rliladz cho nac me; dzigo rëbchaa me:

—Grieeod ga naa niina, sac gard gdziñ dze co; zhaa nac to, zac tsie to zeene gacladztaa to. <sup>7</sup> Tel to, rlëënie miech to; sangue naa rlëënie zho naa, sac rne naa lo zho pe nac grë guieñtseeb ne run zho. <sup>8</sup> Gołtsie, tedse lni rii dzigo ga naa; sac gard gdziñ dze ne glu cho nac naa.

<sup>9</sup> Dzigo laa me biaan ga. <sup>10</sup> Per loxaque brie zho zie zho, yeque me brie zie me; lëëraasi ngueetsse bdziñ me.

<sup>11</sup> Grè zha Israel ne rlëe lo me, quiaguib zho me lo lni co.

—¿Bay yo meñ co? —rnee zho—. ¿Pe nace ib choot gard dzian me?

<sup>12</sup> Grè zha ne ndxie lo lni, loxaque me rzeet zho. No zho rnee: “Tib miech wen nac me”; nogaa zho rnee: “Pe miech wen na zho gac me, loxaque noquidie me miech.” <sup>13</sup> Per zhlianse rzodiidz zho rzeet zho me, sac rdzieb zho grè zha Israel ne rlëe lo me.

<sup>14</sup> Goc chop tson ngbidz ne noyac lni, tibaque zeene laa me bzëeb leñ yadoo nroob ne zob lad guiedz ga, psilo me pseed me grè zha Israel ne no leñ yadoo ga. <sup>15</sup> Zeene gon zho zha rseed me, rzee zdoo zho rnee zho:

—¿Zha nac squitaa rac meñ qui, ni laa me pseete me grè zhiwseed yadoo?

<sup>16</sup> Pquiab me rëb me:

—Led naad nobeebey grè miñe quiaseed naa miech, sinque laa naa quiaseed zho miñe rnabey meñ ne pxeel naa. <sup>17</sup> Tejne yquiabladz to gon to miñe rnabey me, ga guien to dien pe nli xtiidz Dios rseed naa miech, te miñe riab guic naaw ye. <sup>18</sup> Sac grè zha ne rnee grè miñe riab guicse zho, laa zho runa zeena gacnziuu zho lo miech; sangue zha ne rioxco glu ne non meñ ne pxeel zho, zha cosi niapse diidzli rnee zho, rund zho ne yquidie zho miech. <sup>19</sup> Laa Moisés psan ley lo to, per, ñi tib to gon zienałd miñe rnabeya! ¿Pe nac dzigo racladz to gut to naa?

<sup>20</sup> Pquiab be grè miech co, rëb zho:

—¿Menzable i gon noguitnie guic luu! ¿Chozhe racladz gut luu?

<sup>21</sup> Rëbchaa me:

—Tib vuelte, loxaque gon to beenguiac naa tib meñ rzacne dze ne rdziiladz to lo dziin, na grëga to squitaa rac lo naa. <sup>22</sup> Ni to gon, no hor par gon to miñe rnabey ley run to dziin dze co; zig nac zeene rio tib mëed bey (niicle ne riole pxozgol to bey co, zeene laa ley biaan). <sup>23</sup> ¿Gase na ganle gołwi! Rquia to rgo to tib mëed bey haxta dze ne rdziiladz to lo dziin, loxaque par quiitsde to xley Moisés. ¿Pe nac dzigo ne rlëe to lo naa loxaque ne beenguiac naa tib miech dze co? <sup>24</sup> Gołguien ganle, nonguield ne lega gdziibdoł to tib miech. Gołtsoxco gołtsienal miñe nac diidzli.

### ¿Cho nac Jesús?

<sup>25</sup> Blalaa meñ Jerusalén ndxie ga, dzigo psilo zho rnabdiidzlsa zho rnee zho:

—¿Pe led meñ riid ga zho scataa quiaguib zho gut zho? <sup>26</sup> Pa zotaa me gon quianee me lo grè miech qui, ni choot peet rund me. ¿Pe goon bliladzle zhiwxtis ne naye ne me nac Meñ ne zëëble diidz ga guiaad lo guidzliu? <sup>27</sup> Per gacda meñ qui. Teł meñ quiw, rdziuuñbey ne me, ndion ne cho zha nac me; sangue Meñ ne zëëble diidz guiaad ga, zeene gal dze ne laa me guiaad, choot gacnañd dien cho zha me.

<sup>28</sup> Bin Jesús sca nonee zho. Squi ndxie grè zha ne noquiaadiag zhiwseed me leñ yadoo ga, nguiedz bnee me rëbchaa me:

—Ah, conque runbey to naa dzigo, ñan to pa nëz zial naa! Per led zhaald naa gon zial naa, no tib meñ ne pxeel naa per runbeyde to me; meñ co nac meñ ne rnee niapse diidzli. <sup>29</sup> Sangue naa runbey naa me, sac lo me brie naa, me pxeel naa zial naa lo to.

<sup>30</sup> Dzigo gocladz zho naaz zho me ga, per ni tib zho wbigd nzheñ zho me; sac gard gal dze co.

<sup>31</sup> Grè zha ne ndxie ga, ndal zho bliladz me.

—Tejne led med nac Crist —rnee zho—, niacxe zun me grëtaa milagr nroob ne run me. ¿Tsodraa zha ne gon grëtaa milagr ne run me!

<sup>32</sup> Bin zha farisé nozeet grè miech co Jesús, dzigo bnediidzaque zho grè zho pxoz ne rnabey, pxeel zho bla zhaguiib zie zienaaz me. <sup>33</sup> Bdziñ grè zhaguiib co, rëbchaa me lo zho:

—¿Gołxecw zniip! Zhile dze ne cuëz naa lo to; ib laa naa none gbiire guia naa lo meñ ne pxeel naa. <sup>34</sup> Zguib to naa, per gdziidraa to naa, ni grieelod gdziñ to zaatne guia naa.

<sup>35</sup> Grè zha ne ndxie ga, zeene bin zho sca rëb me, rzee zdoo zho.

—¿Pa naczhe zaatne tsie me? —rnee zho—. ¿Zha nace ib gdzielad ne me? Nend grè zha ladz ne tsieseed me, grè zha ne no stib ladz beñ. <sup>36</sup> ¿Zha nace rnee me, zguib ne me per gdzielad me lo ne, niicle grieelodgaa guio ne zaatne guey me?

### Nis ne rdeed guielmban

<sup>37</sup> Zeene goł dze ne laa lni co lozh (dze co nac dze ne mazdraa nroob), miech guizhiu ne ndxie; dzigo nguiedz bnee Jesús lo grè miech co, rëb me:

—Grëse zha ne racladz guiaanwen zdoo, rzac zho zig nac zeene rnab zhis zho, guiaad zho lo naa, naa gded nis ne guie zho. <sup>38</sup> Sac grëse zha ne dib zdoo gliladz cho nac naa, rnee lo Xtiidz Dios, masaque rrieequia tib nis ndzon ne gdzib zdoo zho, pale tib guiubee nroob; nis co gdeed tib guielmban cub lo zho.

<sup>39</sup> Sca bzeet Jesús Espiritu Sant. Ga bzeet me, grëse zha ne gliladz cho nac me zacnie Espiritu Sant zho. Gard guiaad Espiritu Sant leñ dze co, sac gard gbire Jesús lo guielndzon ne no me gbaa hor co.

<sup>40</sup> Blalaa zha ne ndxie ga, zeene bin zho sca bnee me, rneechaa zho:

—Ne nlipagaa, lëe meñ qui ga no guiaad antes ne glanso Meñ ne nacle diidz cxeel Dios ga.

<sup>41</sup> Rrieequia zla zha ne rnee:

—¿Lëda! ¿Lëëgazh me i! Meñ qui nac Meñ ne zëëble diidz ga cxeel Dios guiaad lo guidzliu.

Rquiab zla zha ne rnee:

—Meñ Galilé nac meñ qui. ¿Niacxe lo xtii grè zha co grieequia Meñ ne cxeel Dios ga? <sup>42</sup> Pe led rnee lo Xtiidz Dios lo xtii rey David, ga grieequia me ni Belén ga gal me, zaatne gocaque ladz rey David.

<sup>43</sup> Zhaase zhaase rnee zho; leł psilo zho nodiidiidz zho dien cho nac me. <sup>44</sup> Brieequia bla zho gocladz naaz me, per ni tib zho wbigd nzheñ zho me.

<sup>45</sup> Grë zhaguib ne zienaaz me ga, scase zho laa zho bdziñ. Zeene gon grë pxoz rnabey co, grë zha farisé co choot bdziñned zho, rëbchaa zho:

—¿Pe nac dzigo ne ziaadniede to me?

<sup>46</sup> Pquiab zho rëb zho:

—¡Waltaa gard dziañ no tib meñ ne scataa ndzon rnee!

<sup>47</sup> Rëbchaa zha farisé:

—¿Pe nlipaa rnee to! ¿Yelaque to dzigo beengüet me?

<sup>48</sup> ¿Pe rwide to, niicle zhiwxtis new, niicle now, ni tib choot rliladz ne me nac Meñ ne zëëble diidz cxeel Dios ga? <sup>49</sup> Grë zha nxen ne rliladz ne nli Dios pxeel me, ¡miech ndziibdeele nac zho, sac gon rienñ zho zha rnee lo ley!

<sup>50</sup> Ga zob Nicodem, meñ ne güeyzodiidznie Jesús ga glo, ye me nacgza grë zha rnabey co, dzigo guso me bnee me lo zho, rëb me:

<sup>51</sup> —Golguien ganle nonguiel da ne lega pe gnee ne. Sac gon, zig nac xley ne, rnabeya none gacndiongazh ne zha nac xtiidz tib miech, dien pe nac miñe quiayun zho, dzigora gac guielwxtis.

<sup>52</sup> Pquiab zho rëb zho:

—¿Zootne ye luu lëë nacgza grë zha Galilé ne rleynie me? ¡Grë zha ne cxeel Dios, ni tib zho grieequiad Galilé! ¡Luuzhal bguiba lo grë guits ne ziaad Xtiidz Dios ganle, zeena gliladz luu!

<sup>53</sup> Blozh ga, grëse zho laa zho wbi, tib tib zho zeysel zho lidz zho.

### Tib wnaa ro nëz

**8** Ga brie Jesús güey me zaatne rnee zho Gui Oliv. <sup>2</sup> Zeene biini liu co, silgaw laa me bdziñ len yadoo co stib. Nzian miech ne goclo lo me ga, nacne bzob me psilo me pseed me zho. <sup>3</sup> Laa me noseed grë miech co, zeene bdziñ bla maistr ley, ni zla zha farisé, bdziñnie zho tib wnaa ne nole tsieel ni bgaanie me stib mgui; dzigo bzo zho wnaa co glowtaa lo grë miech ne ndxie ga.

<sup>4</sup> —Maestro —rëb zho lo Jesús—, laa wnaa rii bгаа nonie me stib mgui. <sup>5</sup> ¿Pe gnë luu dien zha gac me? Sac zig nac ley ne psañ Moisés, rnabeya gdeedquie no grë wnaa ne squi nac, haxta guet zho.

<sup>6</sup> Sca rëb zho, sac laa zho quiaguib dien zha cxin me tib diidz, zeena sca grieelo tsiezo zho me lo wxtis. Per zeene bin me sca rëb zho pquiitsrunga me liu, psilo me con mzhugnia me noquiaa me lo liu.

<sup>7</sup> Rañ zho rquiabd me, wbiire zho bnabdiidz zho lo me stib; haxta blis lo me, rëb me lo zho:

—Peet nacda, goldeedquie me. ¡Lëëraasi, zha ne rien ni tib dol rapd, zha co csilo gdeedquie me!

<sup>8</sup> Blozh ga biire pquiitsrun me, psilo me stib noquiaa me lo liu. <sup>9</sup> Zeene bin zho sca rëb me, mazd miñe been zho laa zho brie ga, sac bien zho miech ngoopdol nac zho. Zha ne nacpaa zha gol lo zho bner, blozh ga zo zo brie zho grë zho; loxaque wnaa cose biaan ga.

<sup>10</sup> Dzigo bzoli me, rëb me lo wnaa co:

—¿Yo grë zha ne scataa baaad-zo luu nu? ¿Ni tib zho lëë beenquizhd luu xtol luu?

<sup>11</sup> —Ni tib zho —rëb wnaa co.

—Niicle naa —rëb Jesús—, gunquizhd naa luu xtol luu. Bzë, per bien gbiiredraa luu gun luu grë ncuaane gunctal xtol luu.

### Jesús nac zig tib biini

<sup>12</sup> Bded ga, tib dze nonee Jesús lo grë zha ne no- quiaadiag zhiwseed me, rëb me lo zho:

—Nac naa zig nac tib biini ne rziini lo miech. Grëse zha ne gbig lo naa, led yed zho sorieñ ni lo ncow, sac naa gziini lo zho zeena ygaa zho tib guieñmban ndzon.

<sup>13</sup> Zeene bin zha farisé sca rëb me, psilo zho nguiedz roptsie zho rnee zho:

—¿Cho gliladz xtiidz luu! ¡Lëëque luu rnee cho nac luu!

<sup>14</sup> Pquiab me rëb me:

—Niicle ne naaque rne dien cho nac naa, per diidzli nac miñe rne naa. Rien naa pa nëz zial naa, pa nëzгаа za naa; sangue to gon peet rienñe to, <sup>15</sup> gacxe waa, rcaadzol to naa ncuaane ni nacd naa; ncuaane rcaadzol to naa, niapse guic to riaba. Teñ naa, zig nac niina noyund naa guielwxtis <sup>16</sup> per zeene gdziñ dze co, tib tib miech miñe been zho miñ co glu dien pe nac miñe tsieguial zho; sac Pxoz naa meñ ne nacnie naa, me gnë zha gun naa guielwxtis. <sup>17</sup> ¿Pe nacne rliladzde to miñe rne naa? Led rnee lo xley to zeene tipse rzë xtiidz chop miech, ga rlu ne diidzli rnee zho. <sup>18</sup> Zig nac niina, naa nac tib zha ne rne cho nac naa, laa stib zho nac Pxoz naa meñ ne pxeel naa; sac gon ye me rnee ganle cho nac naa.

<sup>19</sup> Pquiab zho rëb zho:

—¿Yo Pxoz luu na? ¿Pa no me?

—Runbeyde to me —rëb Jesús—, sac niicle naa runbeyde to naa. Teñe niaca miñe runbey to naa, runbeyle to me na.

<sup>20</sup> Gax zaatne riesañ miech gon len yadoo nroob ne zob lad guiedz Jerusalén, ga zob Jesús zeene sca rëb me; per choot bnaazd me, sac gard gal dze co.

### Grieelod gdziñ to zaatne guia naa

<sup>21</sup> Bded ga, biire Jesús rëb me:

—Laa naa guia nagon. Squiaguib to naa, per lëëque lo xtol to i nitlo to, sac zaatne guia naa grieelod gdziñ to ga.

<sup>22</sup> Grë zha Israel ne ndxie lo me ga, rneechaa zho:

—¿Pe goon lëëque me naye gut me? Zha nacne squi rnee me goon grieelod gdziñ ne zaatne guey me.

<sup>23</sup> —Teñ to —rëb me—, zha nëz lo guidzliu nac to; laa naa gon zha nëz gbaa nac naa. Meñ guidzliu rii nac to, sangue naa nacd naa zha guidzliu rii. <sup>24</sup> Gane ni naa lo to lëëque lo xtol to i nitlo to. Ne nligaa, teñe gliladzde to ne naa nac meñ ne nac naa, ible lëëque lo xtol to nitlo to.

<sup>25</sup> —¿Cho dzigo nac luu? —rëb zho.

Rëbchaa me:

—Blactaale rne naaw lo to. Haxta zeene psilo naa xtsin naa, laa naa rne lo to ganle cho nac naa. <sup>26</sup> Ndal

grè ncuuaṅe zac glisqui naa lo to nu niina, ni ndal ncuuaṅe racladz naa gne naa lo to, per laa naa noyṅ miṅe rnabeyse meṅ ne pxeel naa; ni meṅ co nac meṅ ne rnee diidzli.

<sup>27</sup> Per ib rienḍ zho ne Dios ga rzeet me lo zho. <sup>28</sup> Dzigobnee me lo zho stib, rëb me:

—Nieeda gaḷ dze ne yquiaa to naa tib lo yag, dze co guṅbey to gaṅle ne naa nac Mgui ne pxeel Dios ga, dze co guieṅ to gaṅle led guicd naa riab grè miṅe quiayṅ naa; sinque miṅe pseed me naa, miṅ co rne naa lo to. <sup>29</sup> Dios pxeel naa ni tibaque nacie me naa, ib rsaand me naa, sac tibaque noxco naa ruṅ naa miṅe rdziladz me.

### Zha ne nac xpëed Dios

<sup>30</sup> Grè zha Israel ne ndxie ga, zeṅe bin zho sca rëb me, bliladz zho ne me nac meṅ ne no cxeel Dios ga.

<sup>31</sup> Dzigobnee me lo zho, rëb me:

—Telne racladz to gac to xpëedscuel naa, zha ne nli-paa ygab xnëz naa, none guiaadnaḷ to grëse zhiwseed naa. <sup>32</sup> Sac sca guṅbey to miṅe nacpaa diidzli, ni lëëw glu lo to zha laa to ne squi nac to zig tib nguṅdziin.

<sup>33</sup> Pquiab zho rëb zho:

—iNguṅdziin ye! iTel no, zha xtiipaa Abraham nac no, waltaa gard gac no nguṅdziin lo miech! iPe lo dzigo laa no, ne rnee luu laa xtiidz luu csilaa no?

<sup>34</sup> Dzigobnee me:

—Golquiaadiaga gaṅle: zha ne tibaque noyṅctal xtoḷ, rrieequiacxe waa tib nguṅdziin nac zho lo doḷ ga, sac lëëlew rnabey zho. <sup>35</sup> Ni zha ne nac nguṅdziin lëë, zig ruṅ miech nëz rii, grieelod xoon zho lo meṅ ne rree zho; saṅgue zha ne nac mëed, choot lo ngadood zho.

<sup>36</sup> Gacxe waa, tel csilaa Xpëed Dios to, dzigosi choot lo ngadoodraa to. <sup>37</sup> Nli lo xtii Abraham ziaad to; per laa to quia goṅ quiaguib to dieṅ zha gut to naa, sac racladzde to yquiaadiag to zhiwseed naa. <sup>38</sup> Laa naa rne grè miṅe blu Pxoza naa lo naa, zeṅe no naa lo me; saṅgue to goṅ, laa to zienaḷ miṅe rnabey meṅ ne nac pxoz to.

<sup>39</sup> Pquiab zho rëb zho:

—iNi Abraham goṅ nac pxoz no!

—iNlid ga nagon! —rëb me lo zho—. Telne niaca miṅe nli zhinpaa Abraham nac to, zuṅ to grè miṅe been me. <sup>40</sup> Per na goṅ leḷ racladz to gut to naa, lox- aque ne rseed naa to miṅe nac diidzli, miṅe blu Dios lo naa. iTel Abraham led squid been Abraham! <sup>41</sup> Ni lalnu zienaḷde to miṅe been Abraham, sinque laa to noyṅ miṅe ruṅ zha ne nlipaa nac pxoz to.

Pquiab zho rëb zho:

—iLed-xe mëed ro nëzd no waa! Tibaque meṅ ne nac pxoz no, ni lëë meṅ co nac Dios.

<sup>42</sup> Dzigobnee me lo zho:

—Telne niaca miṅe nli zhin Dios nac to, nleynie to naa, sac goṅ lo me brie naa ziaḷ naa lo to nu. Led zhaald naa ziaḷ naa, me nac meṅ ne pxeel naa. <sup>43</sup> Ib rigucide to zha nac grè miṅe rne naa, ib rienḍe tow, sacne ib nëde to yquiaadiag tow. <sup>44</sup> Golgacnaṅ sca gaṅle, lëë pxoz to ga goṅ nac menḍox, lo ma ngab to,

gacxe waa rdziladz to ruṅ to grè ncuuaṅe ruṅ ma. Tel menḍox, haxta zeṅe biaaṅ guidzli tibaque nonitlo ma miech, ni ib rneed ma miṅe nac diidzli, sac ib naṅd ma zha nac diidzli. Ible lëë xtsiin ma ga nac guielwquidie, gacxe waa ma nac pxoz zha ne rquidie. <sup>45</sup> iMiṅ co nagon, niicle diidzli nac grè miṅe rne naa lo to, per ib rliladzde tow! <sup>46</sup> Ni tib to choot grieelod gnë laa naa noquidie, sac niapse diidzli rne naa. iPe nac dzigo rliladzde to miṅe rne naa? <sup>47</sup> Grëse zha ne nlipaa ngab xnëz Dios, rley zho rquiaadiag zho xtiidz Dios; per to goṅ led xnëzd me ngab to, gacxe waa nëde to yquiaadiag tow.

<sup>48</sup> Horco pquiab zho rëb zho lo me:

—iPsoog ro luu meṅ Samar ngoopdo! iNlique miṅe rnee no ga nagon, ne menḍox noguitnie luu!

<sup>49</sup> —Choot menḍzab noguitnied naa —rëb Jesús—, sinque laa naa noxco xoobneṅ gaṅle pa lotaa meṅ nroob nac Pxoza naa; laa to goṅ leḷ rsaṅwin to naa.

<sup>50</sup> Noguibd naa dieṅ zha guiaaṅnon naa, per Dios goṅ racladz me ne sca gaca; ni mesi naṅ me pe ruṅ me.

<sup>51</sup> Gneli naa lo to gaṅle: iGrëse zha ne gzoob xtidz naa, gdziṅd dze ne guet zho!

<sup>52</sup> Pquiab zho rëb zho:

—iPer nlique nagon menḍox noguitnie luu! Zig nac Abraham name gut me, grè zha ne biadteed xtiidz Dios ne, grëse zho gut zho. iZha nac dzigo rnee luu, zha ne gzoob xtiidz luu, gdziṅd dze guet zho? <sup>53</sup> iPe mazdraa dzigo nac luu lo pxozgol ne Abraham, lo grë-gaa zha ne biadteed xtiidz Dios ga? iCho rzac luu nac luu?

<sup>54</sup> Rëbchaa me:

—Telne lëëque naa noyṅnon naa, nlid miṅe rne naa dzigo. Per na goṅ, Pxoza naa, meṅ ne nac Dios ne rnee to rliladz to, me rlu gaṅle ne nli meṅ non nac naa.

<sup>55</sup> Tel naa ruṅbey naa me, ni ruṅ naa miṅe rnabey me; saṅgue to goṅ, nlid ruṅbey to me. Tel gni naa ruṅbeyd naa me, yele naa ga dzigo noquidie zigne rquidie to.

<sup>56</sup> Pxoza to Abraham, bley me zeṅe gocnaṅ me laa naa znu guiaḷ lo guidzli rii. Ni zeṅe bdeed Dios diidz goṅ me naa, mazdraa bley me.

<sup>57</sup> Zeṅe bin zho sca rëb me, rëbchaa zho:

—iGoṅ luu Abraham ye? iNi chooptsii iz name rapd luu! iZha dzigo goṅ luu Abraham!

<sup>58</sup> —Gneli naa lo to gaṅle —rëb me—, notaque naa; nole naa zeṅe gol Abraham.

<sup>59</sup> Horco ptop zho quie laa zho gdeedquie me, per znuse bded me lad zho brie me len yadoo, goṅdraa zho me.

### Biac tib mgui ne roḷd lo

**9** Zieded Jesús tib lugar co, goṅ me tib mgui ne rcow lo, scale nac lo meṅ co zeṅe gol me. <sup>2</sup> Dzigobnabdiidz xpëedscuel Jesús rëb zho:

—Maestro, iḷbay zha nacie squi golnie meṅ qui guieḷnë qui? iPe no pe xtoḷ mew, te xtoḷ xmengol mew ye?

<sup>3</sup> —Lëda —rëb Jesús—, led por xtoḷd zhow; sinque squi gol me, zeṅa zeṅe laa me guiac, ga gaṅ miech

ganle zha nactaa grë ncuaañe ruñ Dios. <sup>4</sup> Zhile laa liu ycow. None dzioxcò ne dziuun ne xtsiin meñ ne pxeel naa laga nasraa bii zob ngbidz, sac deque ycow liu choot grieelodraa guñ dziin. <sup>5</sup> Laga bii no naa lo guidzliu rii, naa nac zig tib biini ne rziini lo grë miech rii.

<sup>6</sup> Blozhse sca bnee me, ptsuc me lo liu, bzhixcuua me niip beñ, dzigo bdëeb mew zhits guidlo mgui ne rcow lo ga; <sup>7</sup> blozh ga, rëbchaa me:

—Güey na, güeytiib lo luu ro pil Siloé.

(Siloé nac zig nacte rnee ne Pxeel zho zho.)

Dzigo güey mgui co güeytiib me lo me, zeene laa me wbire laa me ranle.

<sup>8</sup> Grë zha ne no gax zaatne no me, ni grë zha ne runbey me; zeene gon zho me, rneechaa zho:

—¿Mgui rii ga lëe rzob gdib i r nab gon?

<sup>9</sup> No zho rnee mew, nogaa zho rnee led meda.

—Squidaa rlu me —rnee zho—, per led med i.

Nacte pquiab me mezhal rëb lo zho:

—Naaw, naa nac mgui co.

<sup>10</sup> Dzigo bnabdiidz zho zha biac lo me. Rëbchaa me:

<sup>11</sup> —Meñ ne rnee zho lë Jesús, meñ co bzhixcuua niip beñ dzigo bdëeb mew zhits guidlo naa, blozh ga pxeel me naa biatiib naa lo naa ro pil Siloé; zeene laa naa wbire laa lo naa biacle.

<sup>12</sup> —¿Yo meñ co niina na? —rëb zho.

—Dieenda —rëb me—, nañd naa dieñ yo me.

<sup>13</sup> Dzigo güey zho güeynie zho me lo grë zha ne nac zha farisé; <sup>14</sup> sac lëetse dze ne rdziiladz zho lo dziin, lëetse dze co sca beenguiac Jesús lo me.

<sup>15</sup> Grë zha farisé co, biire zho bnabdiidz zho lo me dieñ zha biac me; dzigo bzodiidz me lo zho zha bdëeb Jesús niip beñ lo me, blozh ga güeytiib me lo me, zeene laa me wbire laaw biacle.

<sup>16</sup> Blalaa zha farisé ne ndxie ga, psilo zho rnee zho:

—Nlid ne Dios pxeel meñ co, gacxe waa niicle runbeydraa me pa dze nac dze nda.

Pquiab zla zho rnee:

—Tel cholze miech ngoopdol nac me, ¿niacxe zrieelo guñ me grë milagr qui?

Zhaase zhaase rnee zho.

<sup>17</sup> Dzigo wbiire zho bnabdiidz zho lo me, rëb zho:

—Luu waa, ¿cho rzac luu nac meñ ne beenguiac lo luu ga?

Pquiab me rëb me:

—Ible Dios pxeel me. Tib meñ ne ziadteed xtiidz Dios lo miech nac me.

<sup>18</sup> Per ib rliladz grë zha wxtis co ne biac lo me, sac rliladz zho ne rold lo me glo; dzigo bnabey zho gocredz pxoz me, gocredz xniaa me. <sup>19</sup> Bdziñ grop mengol co, rëbchaa zho:

—¿Pe nli xpëed to nac meñ rii? ¿Pe nli na rold lo me zeene gol me? Tel nli rold lo me, ¿zha biac lo me ne laa me ran niina?

<sup>20</sup> —Nli xpëed no nac me —rëb grop mengol co—. Ni nli rold lo me zeene gol me; <sup>21</sup> per ndiond no dieñ zha biaca ne laa me ran niina, niicle ndiondgaa no dieñ pe no cho beenguiaca. Benque zha gol-le nac me, mazd lo me goñabdiidz, mezhal gnë dieñ zha biac lo me.

<sup>22</sup> Sca rëb grop mengol co, sac rdzieb zho gree zho xyadoo zho. Biaanle grë zha rnabey co diidz: zha ne guiab Jesús nac Meñ ne zëeble diidz ga cxeel Dios lo guidzliu; csaandraa zho sëeb zho yadoo.

<sup>24</sup> Wbiire zho bredz zho meñ ne biac lo ga, rëb zho:

—Bieñ ganle Dios zobwi, bnë diidzli lo no; sac tel no ndion no cholze miech ngoopdol nac meñ co.

<sup>25</sup> —Dieenda —rëb me—. Nañd naa dieñ pe miech ngoopdol nac me, te meñ wena ye. Per me gon beenguiac lo naa, sac rold lo naa glo.

<sup>26</sup> Dzigo biire zho bnabdiidz zho stib dieñ zha beenguiac Jesús lo me. <sup>27</sup> Pquiab me rëb me:

—Ledaaw nile naa lo to, per ib rliladzde tow. ¿Zha nac dzigo ne racladz to gonaque tow stib? ¿Te racladz to ye, ye to sëeb xnëz me?

<sup>28</sup> Dzigo psilo zho ndox zho lo me, rëb zho:

—Luuzhe tel xnëz me no luu, sangue tel no zhiwseed Moisés, miñ co zionañ no. <sup>29</sup> Sac tel Moisés, ndion no nli Dios pxeel Moisés, per mgui co ni ndiond no dieñ pa brie me.

<sup>30</sup> Pquiab me rëb me:

—iNcuuañe gzeegaa zdoo ne i runbeydaque to cho nac me, ni ron to me beenguiac lo naa! <sup>31</sup> Ndieñ ne ganle rquiaadiagd Dios xtiidz cholze miech ngoopdol, sinque laa me rquiaadiag xtiidz zha ne rien ne nli meñ nroob nac me, ni ruñ zho miñe rnabey me. <sup>32</sup> Stiba, waltaa gard dzion ne cho zha beenguiac lo tib miech ne znu gol rold lo. <sup>33</sup> Telne niaca miñe nacdied Dios meñ co, nrieelod me niunguiac me lo naa.

<sup>34</sup> —iPsioog ro luu! —rëb zho lo me—. iB racladz no guiaad tib ngoopdol nu guiadseed no!

Horco wbig zho, blee zho me ga.

### Zha ne rold lo

<sup>35</sup> Bin Jesús sca blee zho me ga, dzigo zeene bdzieel Jesús me, rëbchaa Jesús lo me:

—¿Pe rliladz luu meñ ne nac Xpëed Dios?

<sup>36</sup> Pquiab me rëb me:

—Bzhiguiel bnë lo naa dieñ cho nac meñ co, zeena gliladz naa me.

<sup>37</sup> —Gonle luu me —rëb Jesús—. Naa gon nac meñ co, lëe me nu nozodiidznie luu niina.

<sup>38</sup> Dzigo pquiitsgzhib me lo Jesús, ni rëb me:

—Dib zdoo naa rliladz naa ne nli Xpëed Dios nac luu.

<sup>39</sup> Blozh ga rëbchaa Jesús:

—Laa naa ziañ lo guidzliu rii, zeena glu dieñ cho rap dol, dieñ chogaa rapd dol; sac zha ne rzac miech peet rien, laa zho tsaa biini; laa zha ne rzoob zho niini, laa xquielrien zho ycow, guiaan zho zig tib zha ne rold lo.

<sup>40</sup> Blalaa zha farisé zo ga, zeene bin zho sca rëb me, rëbchaa zho lo me:

—¿Rzë diidz qui na lëe ye lo no rold?

<sup>41</sup> Dzigo pquiab me rëb me lo zho:

—Tel niaca miñe nlipaa zha ne rold lo nac to, grielod gni naa rap to dol. Per na, ne masaque rzac to roñraa lo to, gane grëse ncuuañe quiayun to xtol to noyaca, to zëeba.



## Mëcwxiiil ni zha ne rquianap ma

10 Ni rëb Jesús:

—Golquiaadiaga ganle: grëse zha rded stib nëz zeene rzëëb zho leñ lidz mëcwxiiil, laa ne ted zho nëz ro puert, gase rlu ngbaan ga nac zho; <sup>2</sup> sac tel meñ ne noyañ maw, nëz ro puert nëz co rzëëb me. <sup>3</sup> Zha ne rquianap ro lidz ma, ga rxal zho rded me; niicle magaw, zeene ron ma tsi me, grëse ma rdziñ lo me; dzigo rbedz me ma, rneelë me ma tib tib ma, laa me rbee ma ga. <sup>4</sup> Rlozhse rbee me grë ma ne nac xma me, laa me rner lo ma; grëse ma laa ma rnal zhits me sacne runbey ma tsi me. <sup>5</sup> Rienald ma zhits stib miech, zeene ran ma zho znuse rzhoon ma; sac runbeyd ma tsi zho.

<sup>6</sup> Grë zha ne ndxie lo me ga, ib bienñd zho zha nac godiidz co; <sup>7</sup> dzigo wbiire me bnee me lo zho, rëb me:

—Golquiaadiaga ganle: Naa gon nac zig ro Puert, zaatne rded mëcwxiiil ga. <sup>8</sup> Grëse zha ne biaad glo rnee zho zha nac Meñ ne nacle diidz cxeel Dios ga, grëse zha co ngbaan ga nac zho, loxaque psacsi zho par grieelo cuan zho; ni grëse mëcwxiiil ne nacpaa xpëcwxiiil naa, güeynaid ma zhits zho. <sup>9</sup> Sangue naa, laa naa nile lo to ganle: Naa nac zig ro Puert, zaatne rded mëcwxiiil ga. Grëse zha ne gbig lo naa, zlaa zho, peet lo tsoxtseebdras zho; pale grë mëcwxiiil ne zozëëb zoríee ro lidz, ni rdziel ma guizh nguia, guizh ndzon row ma. <sup>10</sup> Zha ne nac ngbaan, zeene riaad zho loxaque rban zho ni rut zho; sangue naa, laa naa zial zeena yгаа to tib guielmban ne mazdraa ndzon, tib guielmban ne gdziñd dze lozh.

<sup>11</sup> Naa nac Baxtor ne nquialadzpaа xpëcwxiiil. Sac zha ne nquialadzpaа xpëcwxiiil, rquiad zdoo zho xquielmban zho, rsilaa zho ma lo guielxtseeb ne notaa ma.

<sup>12</sup> Per tel noyac-wree zha ne noyañ ma, rquiad zdoo zho ma, zigne ran zho palo ziaad tib coyot ntseeb, ndxieque mëcwxiiil ga laa zho rzhoon; sac led chenñd zho ma, led zhad nac xbaxtor ma. Zeene rdziñ coyot, nëzrii nëzrec rtsieets coyot ma, nogaa ma rgaa lo coyot.

<sup>13</sup> Rzhoon zho, sac dimise nonie guic zho, peet liaadz nod zho ma. <sup>14</sup> Naa nac Baxtor ne nquialadz xpëcwxiiil. Zigne runbey Pxoз naa naa ni runbey naa me, sca runbey naa grëse xpëcwxiiil naa, niicle magaw runbey ma naa. Grëse ma, rleynie naa ma, laa naa rbeeladz xquielmban naa totsaque cuee naa ma lo guielxtseeb ne no ma.

<sup>16</sup> No spalal xpëcwxiiil naa, ma ne ngabd leñ corral rii; grëse ma co, ible zon ma tsi naa sac laa naa no gaxi ma, zeena tipse gac ma grë ma yquianaap naa ma.

<sup>17</sup> Meñ ne nac Pxoз naa, rleynie me naa sac laa naa rbeeladz xquielmban naa; per ible zriebaan naa.

<sup>18</sup> Naazhal rbeeladz xquielmban naa, choot grieelod lega ctiche xquielmban naa. Rap naa poder gded naa xquielmban naa, ni rap naa poder gbire gban naa stib. Dios bneedz diidzbez co lo naa.

<sup>19</sup> Grë zha Israel ne ndxie ga, zeene bin zho sca rnee me, laa zho goc chop dii stib. <sup>20</sup> No zho rnee:

—Yase menñox noguitnie guic meñ qui, o rzhinlegaa guic me. ¿Pe nacte rquiaadiag to xtiidz me?

<sup>21</sup> Rquiab stib zho rnee:

—Niini rzë xtiidz meñ qui, led squid rac zha ne noguitnie menñox. Stiba, ¿niacxe zrieelo menñox gunñuic ma tib lo zha ne rold lo?

## Rnee Jesús Xpëed Dios nac me

<sup>22</sup> Leñ mëe ne rac nañ, leñ dze co noyac tib Ini Jerusalén, Ini ne run zho rsoladz zho dze ne glopaa psilo quiaquiiñ yadoo. Ye Jesús bdziñ Jerusalén leñ dze co. <sup>23</sup> Laa me zieded tib leñ nsaap ne quia cho yadoo co, nsaap ne rnee zho zhiNsaap rey Salomón; <sup>24</sup> zeene wbig bla zha ne rnabey Israel, bnabdiidz zho lo me rëb zho:

—¿Poc dzigo gdziñ dze ne gnë luu diidzli lo no? Telne nli luu nac Meñ ne zëëble diidz ga cxeel Dios guiaad lo guidzliu, niinagazh bnëw lo no.

<sup>25</sup> Pquiab Jesús rëb me:

—Blactaale zine naaw lo to, per riladzde tow. Stiba, pe zhidaa milagr ne ziyañ to run naa, gase rlu ganle cho nac naa; sac Dios meñ ne nac Pxoз naa, meñ co racnieñ naa run naaw. <sup>26</sup> Ib riladzde tow, sacne led yede to ngab lo naa. <sup>27</sup> Tel zha ne ngab lo naaw, runbey zho naa; niicle naagaaw runbey naa zho, ni zhits naa rzënal zho. <sup>28</sup> Grëse zho, rded naa tib guielmban ne gdziñd dze lozh lo zho, ni gdziñd dze nitlo zho. Choot grieelod ctiche zho lo naa, <sup>29</sup> sac meñ nroob nac Pxoз naa meñ ne pxeel zho lo naa; choot grieelod cuee zho lадznia me. <sup>30</sup> Ni tibaque nac no grop no me.

<sup>31</sup> Zeene bin grë zha rnabey co sca rëb me, psilo zho ptop zho quie ran zho ngoquie zho me. <sup>32</sup> Dzigo rëbchaa me lo zho:

—Lo grëtaa milagr ne quiyacnieñ Pxoз naa naa quiyayun naa lo to. Goññe dieñ, ¿pa miñ rlisqui to ne laa to racladz gneedzquie to naa?

<sup>33</sup> Pquiab zho rëb zho:

—¿Coquiedaxe no luu waa por grë milagr ne run luu, sinque laa no coquie luu por grë diidz ne rnee luu i, quiaquie luu Dios! ¿Tib miech benñe name nac luu, ni rnee luu laa luu nac Dios!

<sup>34</sup> Dzigo rëbchaa me lo zho:

—¿Lo xlibr ley to name zhoobnee zha rzac Dios zha ne pcaania xtiidz me, rëb me dios nac zho! <sup>35</sup> Ni ndioñ ne ganle, grëse miñe rnee lo Xtiidz Dios, diidzliw; gacxe waa tel sca rëb me lo zha ne pcaania xtiidz me ga, <sup>36</sup> ¿niacxe rguitnie naa me ga, zeene rne naa Xpëed me nac naa, ni mezhaz bzooblo naa pxeel me naa lo guidzliu rii? <sup>37</sup> Telne runñd naa milagr ne rlu Dios pxeel naa, ib gliladzde to naa. <sup>38</sup> Per telne ran to rlu ne me nacie naa, maase gliladzde to naa totsaque golliladz ne me nacie naa; tsow guieñ to ganle ne tibaque nac no grop no me, zigtaa nacie me naa, scaque nacie naa me.

<sup>39</sup> Horco gocladz zho stib naaz zho me, per znuse brie me nia zho. <sup>40</sup> Dzigo brie me ga güey me ro guiubee Jordán, zaatne bio Juan pchoobnis Juan miech; ga blëz me palal dze. <sup>41</sup> Nzian miech ne güey lo me ga, rnee zho:

—Nli beenḡ Juan ni tib milagr nroob, per grēse miḡe bnee me zeene bzeet me meḡ rii, zigne bneese me laaw norieequia niina.

<sup>42</sup> Nzian grē miech ne güeyquiaadiag zhiwseed me ga, dib zdoo zho bliladz zho ne me nac Meḡ ne zēēble diidz ga cxeel Dios.

### Gut Lazh

**11** Leḡ dze co blanguidz tib mgui ne no guiedz Betain, lē Lazh; no chop bzian Lazh tib zho lē Mart stib zho lē Marí. <sup>2</sup> (Lēē Marí rii pchoob tiblo nceit nex ni Jesús, ni pcuudiz mew con guitsguic me.) <sup>3</sup> Dzigo pxeel grop wnaa co diidz lo Jesús, gacnaḡ me laa Lazh rzac-nē, sac naḡ zho rleyniedox me Lazh.

<sup>4</sup> Zeene blanso diidz, nēchaa me:

—Peet tsienied guic to, niicle teḡ blanguidz me per nacda par guet me, sinque par glu gaḡle pa lotaa meḡ nroob nac Dios. Ga glu gaḡle pa lotaa meḡ nroob nac Xpēed me.

<sup>5</sup> Zigtaa Maríw, zigtaa Marta, zigtagaa Lazha, nquialadz Jesús zho gza zho, <sup>6</sup> per ib biobladz me; leḡ blēz me schop ngbidz zaatne no me ga. <sup>7</sup> Dzigoraa nē me lo no:

—Laa ne guio nēz xtan meḡ Judé stib.

<sup>8</sup> Dzigo rdzieets no:

—Maestro, ¿racladz luu tsie luu nēz co stib ye? Pense name goc bla ngbidz ga gocladz zho ngoquie zho luu ga.

<sup>9</sup> Nēchaa me:

—Tsiipchopraa hor name rziini ngbidz, ni laga niini rna zac tibliladz zia ne, noxtseebd ne lega pa griel ni ne; <sup>10</sup> loxaque pcow liu, noxtseeb pa griel ni ne; sac ncow rna.

<sup>11</sup> Blozh ga nē me:

—Laa xamigw ne Lazh nixguesle, per na laa ne guio zeena gabee naa zhimcaalo me.

<sup>12</sup> Tibaque ndionḡ no nli nixgues Lazh, dzigo rdzieets no lo me:

—Teḡne raaguesle me, zac-wen me sca.

Ib bienḡ no ne gutle Lazh, gane sca rnee me. <sup>14</sup> Dzigoraa clar bnee me lo no, nē me:

—Laa Lazh gutle. <sup>15</sup> Ni rley naa goḡ ne guiend naa ga dze co, zeena sca grielo lozh gliladz to gaḡle cho nac naa. Golgotsaa guio ne nēz lo me ga niina sca.

<sup>16</sup> Laa Mazh, zha ne rnee zho “Mēēdgrop”, zeene bin Mazh sca nē me, rneechaa Mazh lo no:

—Guiend rson, golgotsaa cchoob zdoo ne guionaḡ ne zhits me dien. Teḡ gut zho me, maase gut zho ne.

### Jesús rbeeban ni me rdeed guielmban

<sup>17</sup> Gax Jerusalén riaaḡ Betain. Zha ne rrie Jerusalén, maase groḡ hor ruḡ zho nēz rdziḡ zho Betain. Nzian grē zha Jerusalén rdziḡ riequiaabdiuzh zho Marí grop Mart, riechoobladz zho zdoo me lo xquielnē me ga.

Dze ne rac tap ngbidz bioliu Lazh, dzigoraa laa Jesús bdziḡ.

<sup>20</sup> Goḡ Mart pa lo ziaad Jesús, dzigo brie me biaadinēz me Jesús; laa Marí biaan ro yu.

<sup>21</sup> —Jesús —rēb Mart—, teḡne niaca miḡe nu no luu segur niete bzian naa; <sup>22</sup> sac naḡ naa, grētaa ncuaaḡe rnab luu lo Dios, ruḡ me miḡe rnab luu.

<sup>23</sup> —Peet tsienied guic luu —rēb Jesús—, ible zrieeban bzian luu.

<sup>24</sup> Pquiab Mart, rēb Mart:

—Nliw, naḡpaa naa ible zrieeban me gaḡ dze ne laa guidzliu rii nitlo, zeene grēse meḡgut, laa zho grieeban.

<sup>25</sup> Dzigo rēb Jesús:

—Naa nac meḡ ne rbeeban grē meḡgut, ni naa nac meḡ ne rdeed guielmban lo grē miech. Grēse zha ne dib zdoo gliladz naa, niicle guet zho zig ret grēraa miech rii, zdziḡ dze ne gban zho stib. <sup>26</sup> Sac grēse zha ne dib zdoo rililadz naa, laa zho bgaale tib guielmban ndzon ga, guiaaḡd zho ladznia guielgut. ¿Led rililadz luu lēē Mart, ne sca gaca?

<sup>27</sup> —Rililadz naaw —rēb Mart—. Rililadz naa ne luu nac meḡ ne bzooblo Dios ga, luu nac Xpēed Dios, Meḡ ne zēēble diidz ga cxeel me guiaad lo guidzliu.

<sup>28</sup> Blozhse ga, wbire Mart zie Mart zietsedz Mart Marí. Bdziḡ Mart zhlianse bredz Mart Marí (sac nzian zha ne ndxie ga ziequiaabdiuzh Marí) rēb Mart:

—Niinapaale blanso Maestro, na laa me rbeed luu.

<sup>29</sup> Zigne bin Marí sca rēb Mart, brie nguzhoḡ Marí laa Marí zie nēz co. <sup>30</sup> (Bdziḡ Marí, laa Jesús bii zo zaatne güeydzieel Mart me ga; gase blēz me, bzēēbd me lad guiedz.) <sup>31</sup> Grē meḡ Israel, zha ne ndxie lidz Marí ga ziechoobladz zdoo me, zeene goḡ zho sca lēlēd brie me, naḡaque zho zhits me; sac naḡ zho bod ro xpaabzian me ziegon me.

<sup>32</sup> Zigne bdziḡ me zaatne zo Jesús ga, pquiitsgzhib me lo Jesús.

—Jesús, luu ne nac luu meḡ ne rnabey —rēb me—, teḡne niaca miḡe nu no luu zeene blanguidz bzian naa, niete me.

<sup>33</sup> Psilo Marí roon Marí. Zeene goḡ Jesús, niicle Maríw, niicle grē zha Israel ne bdziḡ ga, mban rac zho, grēse zho roon, dzigo ye me biab guielnē me. <sup>34</sup> Bnabdiidz me rēb me:

—¿Pa lo pqueets to me?

—Dē gaḡle —rēb zho—, zeena gaḡ luu pa lo bgueets me.

<sup>35</sup> Horco psilo Jesús biin me. <sup>36</sup> Grē zha Israel co, zeene goḡ zho roon me, rneechaa zho:

—¡Golwi gaḡle, blactaa nquialadz me Lazh!

<sup>37</sup> Laa zla zho rnee:

—Led me name beḡnguiac lo mgui ne roḡd lo ga, ¿pe nriee lod zha niuḡ me, zeena niete Lazh?

### Brieeban Lazh

<sup>38</sup> Zeene laa Jesús bdziḡ ro baaḡ Lazh, biire biab guielnē me.

Zig nac tib bliee niaa baa co; rna tib quie nroob ntse zaatne rsēēb zho ngutoo; <sup>39</sup> dzigo bnabey Jesús cob zho quie co.

Pquiab Mart, bzian ngutoo co rëb me:  
—¡Mazd gdiobda! ¡Nadze rac tap ngbidz gut me, mbanle na rlaa me!

<sup>40</sup> Dzigo rëbchaa Jesús:

—Led laa naa nile lo luu, telne dib zdo luu rliladz luu naa, bii zañ luu ganle zha nactaa grë ncuaañe ndzon ne ruñ Dios.

<sup>41</sup> Zeene blozh bdozh zho quie co, dzigo blis Jesús lo me nëz gbaa, ni rëb me:

—Dios, luu ne nac luu Pxoza naa, xquizh xquieñzaac luu sac rquiaadiag luu miñe rne naa. <sup>42</sup> Nañ naa tibaque rquiaadiag luu miñe rnee naa, per laa naa rze-ta niina, zeena grëse miech ne ndxie nu gliladz zho ganle ne nli luu pxeel naa.

<sup>43</sup> Dzigo nguiedz bredz me, rëb me:

—¡Lazh, brieel!

<sup>44</sup> Zigne sca bnee me, laa ngutoo co brieel ga, scase nriegl lar dib nia me, dib ni me ne, ni nioog stib lë lar lo me. Dzigo rëb Jesús:

—¡Golxadz grë lar ne nriegl me i, zeena guey me!

### Rguib zho dien zha ygaa Jesús

(Mt. 26:1-5; Mr. 14:1-2; Lc. 22:1-2)

<sup>45</sup> Grë men Israel ne güeynal zhits Marí ga, zeene gon zho sca bleeban Jesús Lazh, nzian zho bliladz ne nli Dios pxeel me. <sup>46</sup> Nogaa zho lel güey zho güeyzodidz zho lo grë zha farisé zha bleeban me Lazh. <sup>47</sup> Horco lëllëd pcaalsa grë pxoz ne rnabey, ni grë zha farisé, rëb zho:

—¿Pe gnë to dien zha gaca? ¿Zha dziuun ne mgui ne rnee zho Jesús ga, sac gon pe zhidaa milagr ne quiayun me? <sup>48</sup> Telne squise csaan ne me, mbe grëse miech sëeb xnëz me; lozh ga, zeene gacnañ men rnabey ne zob Romaw, laa me cxeel grë xmenquib me guiaadnitlo zho xyadoo ne, guiaadnitlo zho ladz ne.

<sup>49</sup> Dzigo pquiab Caifás, men ne nac pxoz nroob len iz co, rëb me lo zho:

—¡Ni lal nu lëe peet riende to! <sup>50</sup> ¿Pe riende to mazd wena ygaa tib zha guet zho, zha quizh par gdb guiedz, lëdle grëse zha ladz ne nitlo?

<sup>51</sup> Zeene sca rëb Caifás men ne nac pxoz nroob ga, ga bzeet me ible no guet Jesús par csilaa me grëse miech lo dol; per led guicd me biaba, sinque Dios psi-aaba guic me. Ga goquiet ne laa Jesús guet, par csilaa me grëse zha Israel, <sup>52</sup> ni grëragaa zha ne no dipse lo guidzliu, zeena tipse gac grëse zha ne nac xpëed Dios.

<sup>53</sup> Dzigo grëse zha ne nac wxtis ga, laa zho biaan didz ne ible no ygaa Jesús gut zho me. <sup>54</sup> Nacne briedraa Jesús ne nenlo nian zho me; dzigo mazd laa me brieenie no xtan zha Judé, güeynie me no zaatne wzhi no miech, bdziñ no tib guiedz win lë Efraín, ga bliaaz no grë no me.

<sup>55</sup> Len ngbidz co, ziaadyob Ini Pascw. Nzian grë miech ne no grë guiedzlas ne ndxie dib ga, laa zho rsilo quiariee zie zho nëz Jerusalén; sac ansraa csilo Pascw nzian zho rie yadoo ruñ zho grëse miñe rnabey ley par guiaañmbe zho lo xtol zho. <sup>56</sup> Grëse zha ne rdziñ, len

yadoo no zho rnabdiidzlsa zho dien pe zdziñ Jesús lo lni; sac grëse zho racladz gan me.

<sup>57</sup> Laa grë pxoz ne rnabey, ni grë zha farisé, laa zho rnabeyle, zha ne ganñaa Jesús, tsienie zho diidz parne tsie zha ne tsienaaz me.

### Pchoob tib wnaa nceit nex guic Jesús

(Mt. 26:6-13; Mr. 14:3-9)

**12** Sxoop ngbidz gdziñ dze lni Pascwa, güey Jesús guiedz Betain, zaatne no Lazh, men ne bleeban me ga. <sup>2</sup> Sac grëse menlidz Lazh, beenlo zho tib xtsee, gownie zho me.

Mezh no zho, laga laa Lazh zobnie me, laa Mart nodziib ncuaañe gowxtsee zho lo mezh, <sup>3</sup> tibaque zeene bzëeb Marí bzëebnie Marí tib lo nceit nex ne rrie guiee ne lë nard, tib lo nceit niazha, rgaaw maase groñ boté. Zigne bdziñ Marí bdëeb Marí nceit co ni Jesús, blozh ga con guitsguic Marí puiidz Marí ni me. Dipse len yu zëbxxlaa nceit co.

<sup>4</sup> Laa Judas Iscariot, tib zha ne nacgza no (zha ne bded ga pto me) zeene gon Judas sca bdëeb Marí nceit co ni Jesús, rneechaa Judas:

<sup>5</sup> —Mazd tebaa zha ndo nceit qui. Nguizhpaa zhow maase tson gayoo pes plat, dzigo needz zho dimi co ngaaza lo grë zha mban ne guienpe yquiin.

<sup>6</sup> Sca rnee Judas, per nlid ne rquia zdo Judas zha ne guienpe yquiin, sinque laa Judas rguib dien zha cuan Judas dimi co, sac Judas ngotsow bziuud ne no dimi; zigse raclo dimi len bziuud co, zhlianse rbee Judas dimi co.

<sup>7</sup> Dzigo rëbchaa Jesús:

—Psaan me. Ib laa me bdëeb nceit qui ni naa, zeena nzhixcuaale xcuerp naa gal dze ne laa naa ygueets.

<sup>8</sup> Telne racladz to gon to xyudar zha ne guienpe yquiin, tibaque ranlsa to grë to zho, zac tsow ygad to lo zho; sangue naa zdziñ dze gandraa to naa.

<sup>9</sup> Ndal grë zha Israel, zeene bin zho laa Jesús no guiedz Betain, bio zho nëz güey zho lo me ga, ni güeyso zho lo Lazh, men ne bleeban me ga.

<sup>10</sup> Zeene gon grë pxoz rnabey cow, nacne bneditzaque zho ye Lazh none gut zho; <sup>11</sup> sac por Lazh, nzian grë zha non, laa zho rbig nëz lo Jesús, laa zho rliladz ne nli me nac Men ne zëeble diidz ga cxeel Dios.

### Bzëeb Jesús Jerusalén

(Mt. 21:1-11; Mr. 11:1-11; Lc. 19:28-40)

<sup>12</sup> Biini liu co, dipse lad guiedz Jerusalén zhoob diidz laa Jesús gdziñ ga dze co. Grë miech guizhiu ne bdziñ ga zie lni Pascw, <sup>13</sup> psilo zho brieel zho ziaad-xinëz zho me; tib tib zho nzhense zho tib lë zin. Lo guiebley co, zeene gon zho me, psilo zho nguiedz roptsie zho, rnee zho:

—¡Zha men nroobtaa nac Dios! ¡Zha ndzontaa men rii pxeel Dios ziaad lo ne! ¡Lëe men rii gnabey Israel!

<sup>14</sup> Laa Jesús, zobse me lad tib burr yeen, zigne raquiet lo Xtiidz Dios zaatne rnee:

<sup>15</sup> Grëse to men Israel, gdziebde to.

¡Golwi ganle, laa men ne rnabey ladz to ziaad i,

zobse me lad tib burr yeen!

<sup>16</sup> Grëse no ne nac no xpëedscuel me, ni tib no biend hor co ne grëse ncuaañe noyac ga, raquietlew lo Xtiidz Dios; sinque haxta zeyle me gbaa, dzigoraa psoladz no nzian grë ncuaañe raquiet lo Xtiidz Dios ga, gonlo no goca; ni bien no Jesús raquiet ga.

<sup>17</sup> Lad grë miech guizhiu co no nzian zha ne gon zha bleeban me Lazh, dzigo nguiedz rzodiidz zhow lo grë miech co. <sup>18</sup> Ni nzian grë miech co, laa zho blanso ga ziaad-xinèz zho me, sac bin zho zha been me milagr nroob co. <sup>19</sup> Grë zha farisé, zeene gon zho grë miech guizhiu co, rneechaa zho:

—¡Pe zhidaa grë miech qui racnie men qui! ¡Peraa nadien dziuun ne!

### Rguib bla zha Gres Jesús

<sup>20</sup> Lad grë miech ne bdziñ Jerusalén ga, ziegan Dios len ngbidz Pascw co, lad co no blalaa zha zit ne nacd zha Israel, <sup>21</sup> dzigo bnee zho lo Lip (zha Betsaid nac Lip) rëb zho:

—Bzhiguiel bnë dien pa lo no Jesús, laa no racladz dzian no me.

<sup>22</sup> Dzigo güey Lip rëb Lipa lo Ndrés, blozh ga güey zho grop zho güeynie zho diidz lo Jesús.

<sup>23</sup> Dzigo rëbchaa me lo zho:

—Naa ne nac naa Mgui ne pxeel Dios, niinataa nagon laa dze bdziñ zeene laa naa gbire guia gbaa stib. <sup>24</sup> Goiquiaadiaga ganle: Tib zhoxtil, telne tsoda liu tibaque zho naca; per zeene laa zho co rio liu, nzian raca. Scaque naa nagon, none guet naa, none tsoliu naa, zeena gacnzian zha ne ygab xnèz naa.

<sup>25</sup> Sac zha ne rquia zdoo xquielmban, znitlonie zhow; sangue zha ne cueeladz xquielmban, zha cosi zgaa zho tib guielmban ndzon ne ib gdziñd dze lozh. <sup>26</sup> Zha ne racladz sëeb xnèz naa, none gun zho mine rnabey naa; ni zaatne gdziñ naa yeque zho no gdziñ ga. Ni grëse zha ne sëeb xnèz naa ni gon zho xtidz naa, zunnon Pxoz naa zho. <sup>27</sup> Mban rac zdoo naa niina. Per lëda ga gun naa, telne guiep naa lo Pxoz naa csilaa me naa lo grëtaa guielnë ne no teed naa. ¡Sac par mincopaa zial naa lo guidzliu rii!

<sup>28</sup> 'Dios, luu ne nac luu Pxoz naa —rëb me—. Blu lo grë miech rii ganle ne men nroob nac luu.

Dzigo bin zho zëeb tib tsi men co gbaa, rëb me:

—Laaw blule naa, ni niina laa naa gbire gluw stib.

<sup>29</sup> Nzian grë miech ne ndxie ga, zeene bin zho tsi men co, bzhaac zho nguziw; zha ne bien led nguzida, rnee zho:

—Xanj! Dios ga gon bnee lo me.

<sup>30</sup> Dzigo rëbchaa me lo zho:

—Laa to bin ganle laa Pxoz naa bnee, ni por to gon bnee me, zeena gon to tsi me ni gliladz to ne me pxeel naa. <sup>31</sup> Laa dze nagon bdziñ zeene laa Dios gunquizh naa xtol grëse miech guidzliu rii; lëe dze bdziñ zeene laa mendox piche gnabeydraa ma lo guidzliu rii zigne rnabey ma niina. <sup>32</sup> Sac zeene laa naa quia glaa lo cruz, ga cuedz naa grëse miech zeena sëeb zho xnèz naa.

<sup>33</sup> Ga bzeet me zha gut miech me. <sup>34</sup> Grë miech ne ndxie ga, zeene bin zho sca rëb me, rëbchaa zho:

—¿Guet luu ye? Lo Xtiidz Dios name rnee, ib guete Men ne cxeel Dios ga. ¿Zha nac dzigo ne rnee luu laa luu guet? ¿Chopaa dzigo nac luu?

<sup>35</sup> Dzigo pquiab me rëb me lo zho:

—Naa nac zig tib biini ne noziini lo miech; ni ngabse dze ne cuèz naa lo to. Laga noziini naa lo to, gojsëni zaatne riab biini zeena ygaade to guielcow; sac zha ne rzë lo ncow riend zho palo zie zho. <sup>36</sup> Niina ne rdeeda diidz gojliladz cho nac naa, zeena gac to zha ne nlipaa no lo biini.

Blozhse sca rëb me laa me biche ga, blulodraa me lo zho. <sup>37</sup> Niicle gonlo zho nzian milagr ne been me, per ib rliladz zho ne nli Dios pxeel me. <sup>38</sup> Ni ib scalegaa no gaca, sac ga briequia mine bzeet Isá (tib men ne biadteed xtiidz Dios) zeene znu rëb me:

Dios, bui ganle ni tib choot nëd gliladz xtiidz luu, niicle ran zho grëtaa milagr ne run luu.

<sup>39</sup> Ni nligaa ib brieelod nlliladz zho me; sac zeene pquiaa Isá, znu rëb me:

<sup>40</sup> Ncow psan Dios lo zho, ni beenndip me zdoo zho; zeena gand zho me, niicle guieñdga zho zha gbig zho lo me csilaa me zho lo xtol zho.

<sup>41</sup> Zeene znu bnee Isá, ible Jesús ga bzeet me; sac gon me grëtaa guielndzon ne rap Jesús. <sup>42</sup> Ndal zho sca ib bliladz me, per noquegaa zha ne bliladz me; zig nac grë zha ne rnabey lo zha Israel, ndal zho bliladz ne nli Dios pxeel me, per ib pxobneñd zhow; sac rdzieb zho cuee zha farisé zho yadoo. <sup>43</sup> Ni stiba rdziladzraa zho guiaaannon zho lo miech, laa ne guiaaannon zho lo Dios!

<sup>44</sup> Len dze co, tib vult nguiedz bnee Jesús, rëb me:

—¡Grëse zha ne rliladz naa, yele Pxoz naa ga rliladz zho! <sup>45</sup> ¡Ni zeene rwi zho lo naa, yele men ne pxeel naa ga ran zho! <sup>46</sup> Naa nac zig tib biini ne rziini lo miech, ni grëse zha ne dib zdoo gliladz cho nac naa, zriee zho lo guielcow ne no zho. <sup>47</sup> Grëse zha ne gon Xtidz naa, ni gband zho zigne rnabeya, led naad gunquizh zho dol co; sac ziald naa par gdziibdol naa miech, sinque laa naa zial par csilaa naa zho lo dol. <sup>48</sup> Xtidz naa gac ley ne gunquizh zhow; zigtaa zhaw zigtagaa grë zha ne nëd gunbey naa, grë zha ne nëd yquiaadiag xtidz naa. <sup>49</sup> Sac grëse ncuaañe pseed naa miech, led guicd naa biaba, sinque Pxoz naa men ne pxeel naa, men co rnabey naa pe nac mine cseed naa zho. <sup>50</sup> Ni nappaa naa, grëse diidz ne rnabey Pxoz naa naa rne naa, lëew rlu zha yгаа miech tib guielmban ndzon ne gdziñd dze lozh; gacxe waa, grëse mine rnabey me gne naa, zigne racladz me scase rne naaw lo to.

### Rguib Jesús ni xpëedscuel me

**13** Guieel ne rsilo lni Pascw; wdze co pcaalsanie Jesús no grëse no ne nac no xpëedscuel me, laa no nodiowxtsee. Rienle me ne gataa laa dze co bdziñ, zeene laa me gbi lo guidzliu rii gbire me lo Pxoz me stib. Grëse zha ne ngab lo me, rleynie me zho; ne nligaa rleynie me zho haxta bdeed me xquielmban me psilaa me zho. <sup>2</sup> Rien me grëtaa ncuaañe no, ladznia

me psan̄ Pxoz mew; lo Pxoz me brie me ziaad me lo guidzliu, ni lo Pxoz me gdziñ me niina ne laa me gbi lo guidzliu.

Laa no zioob no no mezh, tibaque zeene guso me blee me lar ne mbix me, bdziñleñ me tib lë lar nool. Par hor co, laa men̄dox pquii-le Judas, zhin Simón Is-cariot, parne tsieto Judas me. <sup>5</sup> Dzigo blaas me nis tib leñ bandej laa me psilo noguiib me ni grë zha ne nacgza no, zigse rlozh rguuib me ni tib zho scase rcuiidz mew con lar ne ndxie leñ me ga. <sup>6</sup> Zeene laa me zie quuib me ni Simón Pedr, rëbchaa Simón lo me:

—¡Lëda i gon̄! ¿Pe nacne le! luu quuib ni naa?

<sup>7</sup> Pquiab me rëb me:

—Grieelod guien̄ luu niina, pe nacne quuib naa ni luu; haxta tedraa nu dzigo gan̄le guien̄ luuw.

<sup>8</sup> —¡Nend scaw! —rëb Pedr—. ¡Per naasi gon̄ gnedzd naa diidz quuib luu ni naa!

Dzigo rëbchaa me:

—Grieelod sca ygab luu xnëz naa, telne siguiel̄d luu quuib naa ni luu.

<sup>9</sup> Horco pquiab Simón, rëb Simón:

—Bzhiguiel̄ sca, niinagazh bdiib ni naa, per led lox- aque nidse naa, sinque dib nia naa, dib guic naa bdiib.

<sup>10</sup> Dzigo rëbchaa me:

—Zha ne gozle, nise zho riar; sac mbele zho. Scaque to nagon̄, mbele to grë to. Grë to rne naa, niicle ne led gzadpaa to mbe.

<sup>11</sup> Sca rëb me, sac rienle me cho tsieto me.

<sup>12</sup> Blozhse bdiib me ni no, wbiire wbix me xab co me, bzob me lo mezh; dzigo në me lo no:

—¿Pe bien to na pe nacne znu bdiib naa ni to?

<sup>13</sup> Golwi gan̄le: To lëe, Maestro rnee to lo naa, ni rnee to naa nac men̄ rnabey; ni nonguiel̄a gon̄, sac ne nli- gaa scaw. <sup>14</sup> Golgan̄ sca, niicle ne maistr naa, niicle ne naa nac men̄ ne rnabey, per laa naa bdeed zig tib ngundziin win bdiib naa ni to. Nana sca, scaque gol̄gac lo samiech to. <sup>15</sup> Laa naa blule lo to zha gon̄ to, nana sca gol̄tsienal̄ miñ co. <sup>16</sup> Gneli naa lo to gan̄le, lo grë zha ne nac ngundziin, tsod zha ne nonraa lo zha ne rn- abey zho; scaque grë zha ne rie mandad, tsod zha ne nonraa lo zha ne rxeel̄ zho. <sup>17</sup> Laa to nan̄lew nasca. Gacxe waa, telne tsienal̄ to wseed rii, zaacse gac lo xquiel̄mban to.

<sup>18</sup> 'Gol̄quiaadiag gan̄le, grëse miñe none naa nu, led par grëde tow. Naa bzooblo to, nan̄ween naa zha nac to tib tib to, ni nan̄ween naa zha rnee lo Xtiiidz Dios, rneew: "Lëeque tib zha ne rownie naa, griequia tsielo naa ladznia zha ne gut naa." <sup>19</sup> Laaw rnegazh naa lo to niina, zeena zeene gaca, gliladz to gan̄le ne nli naa nac men̄ ne rne naa nac naa. <sup>20</sup> Ni gol̄gona gan̄le, grëse zha ne ycaania Espíritu Sant, men̄ ne cxe! naa, naale ga nocaania zho; ni zha ne rcaania naa, ye le men̄ ne pxeel̄ naa ga rcaania zho.

### Rëb Jesús ne Judas nac zha ne tsieto me

(Mt. 26:20-25; Mr. 14:17-21; Lc. 22:21-23)

<sup>21</sup> Horco psilo rlupaa mban goc zdoos Jesús, dzigo bneeli me lo no në me:

—Gneli naa lo to gan̄le, lëeque tib to gon̄ tsielo naa ladznia zha ne gut naa.

<sup>22</sup> Zeene bdzion no sca rnee me, psilo no rwilolsa no, rien̄d no dien̄ cho nac zha ne rzeet me ga.

<sup>23</sup> Cuepaa me, ga zoob naa (rleynie me naa niicle ne raguiald naaw); <sup>24</sup> dzigo blunia Pedr lo naa, gnabdiidz naa lo me dien̄ cho nac zha ne rzeet me ga. <sup>25</sup> Nacne wbig gax naa, bnabdiidz naa lo me.

<sup>26</sup> Dzigo nëchaa me:

—Laa naa cobie tib lë quietxtil, ni lo zha ne gan̄ luu gded naa quietxtil co, lëe zho ga.

Dzigo bzheñ me tib lë quietxtil, blozhse bloobie me quietxtil co, laa me bdeeda lo Judas. <sup>27</sup> Zigne bnaaz Ju- das quietxtil co, laa men̄dox bzëeb zdoos Judas. Dzigo rëbchaa Jesús lo Judas:

—Miñe no guic luu gon̄ luu, na zeene nawdzegazh beena.

<sup>28</sup> Zigne blozh dow Judas quietxtil co, lëelëd brie Ju- das ley; pcowle liuw.

Lo grë no ne zioobnie no me lo mezh ga, ni tib no bien̄d pe nacne sca rëb me lo Judas. No zho nan̄ bod no pe ncuaañe rquiin lo lni co, rxeel̄ me Judas tsiesi Ju- das, o nogaa pa tsiesañ Judas palal dimi lo grë zha ne guien̄d pe yquiin; sac Judas nac zha ne ngotsow bzui- ud win ne no dimi.

<sup>31</sup> Gon̄se Jesús laa Judas brie ley, dzigo nëchaa me lo no:

—Niina nagon̄ bdziñ dze zeene glu gan̄le zha nroob- taa guie!ndzon ne rap Mgui ne pxeel̄ Dios, ni ga glu gan̄le pa lotaa nac guie!ndzon ne rap Dios. <sup>32</sup> Ni scaque Dios, zlu me gan̄le pa lotaa nac guie!ndzon ne rap Mgui ne pxeel̄ me ga. <sup>33</sup> Xin yeeña, ¡zhile cuëz naa lo to nu! Squiaguib to naa, per zigne rep naa lo grë zha Israel co, laaw rneque naa lo to niina: Grieelod sënäl̄ to zaatne ga naa. <sup>34</sup> Gane laa naa rsan̄ tib diidz cub rii, ni laa naa rnabey to gon̄ tow: Tib tib to, gol̄leynie zha ne nacgrë to, gol̄gantzi zho. Zigne rleynie naa to, sca gol̄leynie zho. <sup>35</sup> Zeene gan̄ miech, ne nligaa dib zdoos to rleynie to samiech to, dzigo zien̄ zho xpëedscuel naa nac to.

### Ible ziaab Pedr run̄beyd Pedr Jesús

(Mt. 26:31-35; Mr. 14:27-31; Lc. 22:31-34)

<sup>36</sup> Dzigo bnabdiidz Pedr lo Jesús, rëb Pedr:

—Maestro, ¿pa dzigo nac zaatne tsie luu?

Dzigo rëbchaa me:

—Zaatne ga naa, grieelod sënäl̄ luu niinagazh; per ib laa luu no guiaadnal̄.

<sup>37</sup> Pquiab Pedr, rëb Pedr:

—¿Per pe nacne grieelod sënäl̄ naa zhits luu niina? ¡Sënäl̄ naa zhits luu gon̄, niicxe maase gut zho naa waa!

<sup>38</sup> Dzigo rëbchaa me:

—¿Goon̄ csaand luu naa ye Pedr, niicle gut zho luu? Nlid ga gon̄. Gneli naa lo luu gan̄le, zeene laa gall ycuedz tson̄le vuel̄t rëb luu run̄beyd luu naa.

## Niapse por Jesús gdziñ miech lo Dios

**14** <sup>1</sup>Tsode to zhgab, tsode to guieInë. Tiblique golgun guic to, zigne dib zdoo to rliladz to Dios, scaque dib zdoo to goliladz cho nac naa. <sup>2</sup> Golgona ganle: Zaatne nac lidz Pxoz naa, ndaldoo zaatne cuëz miech no ga, tel niaca miñe guieñd zaatne cuëz to, nile naaw lo to na. Gacxe waa, niina laa naa ga, gazhixcuaa naa zaatne cuëz to ga. <sup>3</sup> Ni zeene lozh gzhixcuaa naa zaatne cuëz to, hor co laa naa gbire guial stib, dzigosi laa to sënal zhits naa; zeena tibaque zaatne gbiaaz ne. <sup>4</sup> Laa to nanle nasca pa lo ga naa, ni nanlegaa to nëz ne.

<sup>5</sup> Pquiab Mazh rëb Mazh lo me:

—Maestro, peleI nëz na gacndion no, ni per ni zaatne tsie luu ndiond no.

<sup>6</sup> Dzigo rëbchaa Jesús:

—Naa nac nëz co, naa rseed miech miñe nac diidzli, ni naa rded tib guieImban ndzon ne ib gdziñd dze lozh. Lo grëse miech, zha ne gliladz cho nac naa, zha co gdziñ lo Pxoz naa; guieñdraa stib mod ne gdziñ zho lo me. <sup>7</sup> Telne runbey to naa, dzigo runbeyaue to Pxoz naa. Ni runbeylegaa to me, sac tibaque ran to me.

<sup>8</sup> Dzigo rëbchaa Lip lo me:

—BzhiguieI mazd blu Pxoz luu lo no. Totsaque dzian no me, lëëlew ga dzigo.

<sup>9</sup> Pquiab Jesús, rëb me:

—Blactaale dze ga name Lip no naa lo to, ni gardaque ye gunbey luu naa. ¡Grëse zha ne ran naa, lëëque Pxoz naa ga ran zho! ¿Zha nac dzigo ne racladz luu glu naa me lo to? <sup>10</sup> ¿Niacxe rliladz luu dzigo ne tibaque nac no grop no Pxoz naa? Grëse miñe rseed naa to, led guicd naa riaba; grëse ncuaane run naa, me rnabeya, me runa sac tibaque nac no grop no me. <sup>11</sup> Goliladz sca ne tibaque nac no grop no Pxoz naa. Telne goon rliladzdgaa tow zigne rnee naa lo to nu, siquier lo grë dziin ne nodziuun no, ga golgan ganle ne nli tibaque nac no grop no me.

<sup>12</sup> Ne nligaa, gneli naa lo to ganle: Grëse zha ne rliladz cho nac naa, ye zho zun zho grë milagr ne run naa, ni haxta nroobraa ncuaane gun zho; sac tel naa, laa naa no guia zaatne no Pxoz naa. <sup>13</sup> Ncuaane gnabtaa to lo Pxoz naa, totsaque glu to ne nli rliladz to naa, zun naaw; zeena ga gan miech ganle me nac men ne mazdraa nroob, me nac men ne mazdraa non. <sup>14</sup> Ne nligaa, telne rnalo to naa, ncuaane gnabtaa to zun naaw.

## Sxeel Jesús Espíritu Sant

<sup>15</sup> Telne nli rleyne to naa, golgun grë miñe rnabey naa to sca. <sup>16</sup> Scagaa naa, laa naa gnab lo Pxoz naa cxeel me tib men ne tibaque gacnieñ to, tibaque cchoobladz zdoo to; ib gdziñd dze ne csaan me to. ¡Lëë men co ga nac Espíritu Sant, men ne rlu pa miñ nac diidzli; ni ible sxeel Pxoz naa me! <sup>17</sup> Zha ne ngabd xnëz naa, grielod ycaania zho me, sac ran d zho me niicle

runbeyd zho me; sangue to, runbey to me sac me quianap to niina, ni zbëzga me zdoo to.

<sup>18</sup> Ib csaanladz naa to, zbire naa guial naa lo to stib.

<sup>19</sup> Nli zhilew, zeene gandraa grë miech naa, sangue to gon bii zan to naa; sac zriebaana naa, ni scaquegaa to zga to tib guieImban ndzon ne gdziñd dze lozh. <sup>20</sup> Gal dze co, zeene gan to laa naa grieeban, ga gliladz to ganle ne nli tibaque nac no grop no Pxoz naa, zigne tibaque nacie naa to ni naciegaa to naa. <sup>21</sup> Zha ne runbey zha nac grë miñe rnabey naa, ni rban zhow zigne naca, ga rlu ne nli rleyne zho naa; ni zigne rleyne zho naa, scaque Pxoz naa zleyne me zho; niicle naagaaw zleyne naa zho, ni zlu naa lo zho ganle cho nac naa.

<sup>22</sup> Dzigo pquiab Judas (zhaa Judas Iscariot), rëb Judas lo me:

—¿Pe nac waa lose no glu luu cho nac luu? ¿Telzhe grëraa miech waa?

<sup>23</sup> Pquiab me rëb me:

—Zha ne run miñe rnabey naa, lo zha co glu naa cho nac naa; sac rlu zho ne nli rleyne zho naa. Ni haxta ziaad no grop no Pxoz naa gbannie no zho; sac zigne rleyne zho naa, scaque zleyne me zho. <sup>24</sup> Sangue zha ne run d miñe rnabey naa, ¿zha dien glu naa lo zho cho nac naa? Sac rlu rleyne zho naa. Golsoladz ganle: grëse diidz ne ron to rne naa, led guicd naa riaba, xtiidz Pxoz naaw. <sup>25</sup> Laa naa rne grë miñ rii, laga bii zo naa lo to nu, <sup>26</sup> per zeene laa Pxoz naa cxeel Espíritu Sant men ne guiaad cchoobladz zdoo to (men co guiaad xcuent naa), men co lozh cseed to, ni guncsoladz me to grëse miñe bne naa lo to.

<sup>27</sup> Laa naa guia, per laa naa rsan tib guiebley zdoo to, zeena zigne tibliladz rac zdoo naa, scaque tibliladz gac zdoo to. Sac guiebley ne rnedz naa lo to nu, nacda zig nac guiebley ne runbey grëraa miech guidzliu rii. Tsode to zhgab sca, niicle gdziebde to. <sup>28</sup> Laa to binle ganle, laa naa no guia lo Pxoz naa per zbire naa guial naa lo to stib. Telne nli rleyne to naa ine nley golgac, niina ne ron to laa naa guia lo me, sac gon men nroobraa nac me lo naa. <sup>29</sup> Laa naa rne grë miñ rii lo to niina, zeena zeene gaca, ga lozh guieñ to ganle cho nac naa.

<sup>30</sup> Led nroobdraa sodiidznie naa to, sac ile ziaad mendox, men ne rnabey lo guidzliu rii. Peet grielod gun mendox naa, <sup>31</sup> per ible none gon naa xtiidz Pxoz naa men ne pxeel naa, zeena gan miech ganle ne nli rleyne naa me. ¡Goltsieso nasca, zeena zio ne!

## Jesús nac zig tib lbë uv

**15** <sup>1</sup> Naa nac zig tib zhan lbë uv, laa to nac zhicwa, laa Pxoz naa nac zig tib zha ne quianapa. <sup>2</sup> Grëse zhicw lbë co miñe rquiad nex lo, rchug mew; laa grë miñe rquia nex lo, ine rsanmbe me low, rbelaan me low zeena yquiaraa nex low.

<sup>3</sup> Zig nac to gon, laa Dios psanmbele to sacne zianal to grë xtidz naa miñe pseed naa to. <sup>4</sup> Gbichede to lo naa sca, sinque tibaque golgacnie naa zigne nacie naa to. Golgan ganle, zig nac tib zhicw lbë uv, peet nex

griee lod yquia low telne tibnëzle nixa; scaquegaa to nagon, griee lod gun to grë ncuaañe rdziladz naa, telne nacdiede to naa. <sup>5</sup> Golsoladz ganle: Naa nac zig nac lbë co, laa to nac zhicwa. Zha ne tibaque gacnie naa, grëse ncuaañe gun zho zdziladz Diosa; <sup>6</sup> sac tel piche zho lo naa, laa zho nacle zig tib zhicw lbë co miñe nixle tib nëz, laaw nixle ga, ga gbidza; lozh ga laaw tsec. <sup>7</sup> Telne tibaque gacnie to naa, ni tibaque tsoxco to grë miñe pseed naa to, dzigosi ncuaañe gacladzttaa to golinaba, ni scagaa scaania tow.

<sup>8</sup> Golllu sca ne nli xpëëdsuel naa nac to, golsañnon Pxo naa, niapse ncuaañe rdziladz me miñ co golgun.

<sup>9</sup> Ne nligaa rleyndox naa to. Golwi ganle, zigne rleynie Pxo naa naa, scaque rleynie naa to. Golguien sca tibaque golgun miñe rnabey naa. <sup>10</sup> Sac gon, zha ne gun miñe rnabey naa, gzataa dze zleynie naa zho; sac sca rleynie Pxo naa naa ne run naa miñe rnabey me. <sup>11</sup> Laa naa rzet miñ rii lo to, zeena guiaad tib guiebley zdoo to. Ne nligaa, zeena guiaad tib guiebley nroob zdoo to; ni naa gnedz guiebley co lo to.

<sup>12</sup> Laa naa rnabey to, laa naa rnab lo to: ¡Golleynie samiech to, zigne rleynie naa to! Tel naa, golguien ganle pa lotaa rleynie naa to, <sup>13</sup> sac led lega gdeedse tib zha xquieľmban zho par csilaa zho samiech zho, sinque ga rlu zho ganle pa lotaa rleynie zho zho.

<sup>14</sup> Ni to gon, telne gon to grë miñe rne naa lo to, dzigosi nli rleynie to naa. <sup>15</sup> Led yedraa niina nac to zig tib ngundziin, sac zha ne nac ngundziin nañd zho pe run men ne rnabey zho. Ne nligaa rleynie naa to, sac grëse miñe rnabey Pxo naa, grëse zigne rnee me, laaw bzodiidzle naa lo to. <sup>16</sup> Golguien ganle, led tod gon bzooblo naa, sinque, ¡naa bzooblo to! Ni laa naa bzooblo to zeena gun to niapse ncuaañe rdziladz Dios; dzigosi ncuaañe gnabtaa to lo Pxo naa, ne nac to zha ne no xnëz naa, zneedz mew. <sup>17</sup> Laa naa rso diidz lo to: Golleynie samiech to. <sup>18</sup> Niicle rlëë zho ran zho to, golsoladz ganle, desde naa squi rlëë zho ran zho. <sup>19</sup> Rlëë zho ran zho to, sac laa naa bleele to lad zho, zienal-draa to ncuaañe rleynie zho; laa telne nagon bii nac to zigne nac zho, dzigosi zëeb gleynie zho to. <sup>20</sup> Golsoladz ganle, zeene znu ni naa lo to: ¡Tsod ngundziin ne ndzi-ibsráa non lo zha ne rnabey zho! Tel naa, pquiana miech naa, ¿pe le! to dzigo gandze zho? Nana, zigne brieequiagaa palal zha ne bliladz xtiaz naa, scaque zrieequia zha ne yquiaadiag miñe gnee to.

<sup>21</sup> Ible squiana miech to ne nac to zha ne ngab xnëz naa, sac runbeyd zho Dios men ne pxeel naa. <sup>22</sup> Tel nica miñe niald naa, niicle ned naa lo zho, zac guiab ne peet xto!d zho, sac rienñd zho pe run zho. Per na gon, guienñd pe yquiaaqui zho; sac bial naa bne naa lo zho. <sup>23</sup> Zha ne rlëë ran zho naa, ye! Pxo naa ga rlëënie zho. <sup>24</sup> Ne nligaa telne niaca miñe nianñd zho grëtaa milagr nroob ne run naa, zac guiep naa peet xto!d zho; per na gon, blactaa milagr ne gon zho ben naa, ni laa zho bii rlëë ran zho no grop no Pxo naa. <sup>25</sup> I nagon norieequia miñe raquiet lo Xtiidz Dios, zaatne znu rnee: "Peet guieľntseeb quiaayñd naa lo zho, per rlëënie zho naa."

<sup>26</sup> Laa naa nile lo to ganle, ible sxe! naa Espiritu Sant gacnie to, niapse diidzli rnee me. Lo Pxo naa griee me guiaad me, me cchoobladz zdoo to, ni me gneedz guieľbiini lo to lozh guien to cho nac naa. <sup>27</sup> Ni scagaa to, ye to laa to none sodiidz lo grëraa miech gacnañ zho cho nac naa; sac gon tibaque bzënie to naa desde ne psilo naa xtsin naa.

**16** Laa naa rne grë miñ rii lo to zeena peet tsienied guic to, tibaque dib zdoo to gnalo to naa. <sup>2</sup> Sac gon zunxoon zho to, zbee zho to yadoo; ni zdziñ dze haxta zut zho to, sac masaque sac zho lëë miñe racladz Dios ga noyñ zho. <sup>3</sup> Laa zho gun grë miñ co, sac niicle Pxo naaw, niiclegaa naaw, runbeyd zho no.

<sup>4</sup> Laa naa rzodiidz grë miñ rii niina, zeena zeene gal dze ne laaw noyac, csoladz to ganle grësew bzodiidzle naaw lo to. Bzodiidz naaw lo to glo, sacne hor co laa naa bii zo lo to. <sup>5</sup> Laa niina nagon laa naa gbiche lo to, laa naa gbire guia lo men ne pxeel naa, per ran naa ni tib to zienied guic gnabdiidz dien pa nac zaatne ga naa, dien pe nacgaa ne laa naa ga. <sup>6</sup> Lëë gdib miñe run to, riab guieľñe to ron to grë miñe rne naa nu.

<sup>7</sup> Gneli naa lo to ganle: Mazd wen gon tsie to zeene laa naa guia lo men ne pxeel naa, sac telne cuëz naa nu, griee lod guiaad men ne guiadchoobladz zdoo to ga. Sañgue telne guia naa, dzigo naazhal cxe! me. <sup>8</sup> Ni zeene laa me guiaad, me gunquien miech ganle grëse zho zha ngoopdo! nac zho, me gunquien zho zha laa zho lo do! co guiaañwen zho lo Dios, ni guien zho ne nli zdziñ tib dze zeene laa Dios gun xquieľwxtis me. <sup>9</sup> ¿Pe nacne nac zho miech ngoopdo! Miech ngoopdo! nac zho, sacne riladzd zho cho nac naa. <sup>10</sup> ¿Zha griee lo laa zho lo do! co guiaañwen zho lo Dios? Zrieelow, miñcocxe waa nacne bial naa, ni na laa naa guia zaatne zob Pxo naa, gandraa to naa. <sup>11</sup> ¿Zha rlu ne nli zun Dios guieľwxtis? Nli zun mew, sac gon laa me bnabeyle zha nac grë guieľñedox ne yгаа menñox, men ne quianabey lo guidzliu rii.

<sup>12</sup> ¡Nzianraa ncuaañe racladz naa sodiidz naa lo to! Per rien naa griee lod tsoguc to zha naca niina.

<sup>13</sup> Zeene guiaad Espiritu Sant, me gneedz guieľbiini lo to guien to grëraa ncuaañe no gacnañ to, ni grëgaa ncuaañe naraa gac. Niapse diidzli gnee me, sac led guicd me guiab grë miñe gnee me, sinque miñe nac xtiidz Pxo naa, miñ co gnee me. <sup>14</sup> Ga glu me lo miech ganle ne nli men nroob, men non nac naa. <sup>15</sup> Rne naa ga glu me, sac grëtaa ncuaañe rnabey Pxo naa, yeque naa rnabeya. <sup>16</sup> Zhilew zeene laa naa gbiche lo to gandraa to naa; per gacdaquew xtse zeene laa to gbiire-laque gan naa stib.

<sup>17</sup> Zeene bdzion no sca rnee me, blalaa no psilo no rnabdiidzlsa no rnee no:

—¿Bay zha nacne squi rnee me? ¿Zha nacne rnee me, zhilew dzianñdraa ne me, per gacdaquew xtse laa ne dzianñlaque lo me stib? Ni rneeque me laa me guey lo Pxo me.

<sup>19</sup> Bien me racladz no gnabdiidz no lo me, dzigo në me lo no:

—¿Racladz to lëë gacnañ to zha nacne znu rne naa?  
<sup>20</sup> Goiquiaadiaga sca ganle: Zeene gdziñ dze co, laga noyon to no to guie|ñe ne laa naa biche lo to, laa grëraa miech haxta zley zho ne laa naa wbiche lo zho. Nli nroob guie|ñe ne tso to, per zeene laa to gan naa stib, guie|bley nroob ne tso to. <sup>21</sup> Nac cuent rii zig rzac tib meñ wnaa ne ral xpëëd. Glo yoob ro, yoobdox ne rquia me, per deque laa mëëd co ralse, ni rsoladzdraa me yoob co; sac mazdraa nroob nac guie|bley ne rio me ran me laa xpëëd me blanso lo guidzliu. <sup>22</sup> Scadaa nagon rzac to, nli mban rac to niina, per zeene laa to gan naa stib, dzigosi tib guie|bley nroob ne tso to, ni choot grielod ctiche guie|bley co lo to.

<sup>23</sup> Zeene ga| dze co, yquiindraa to pe gnabdiidz to lo naa. Ncuaañe gnabtaa to, lo Pxoza naa gnab tow, ni zneedz mew, sac xnëz naa ngab to. <sup>24</sup> Haxta lo nadze peet gard gnab to, niicle ne xnëz naa ngab to; laa niina laa naa rne lo to ncuaañe rquiin to go|naba lo me, ni ible zneedz mew gon. Nroob guie|bley ne tso to hor co. <sup>25</sup> Nzian grë ncuaañe zine naa lo to, rned naaw clar; per laa dze bdziñ zeene grëse ncuaañe gne naa, clar gne naaw lo to, zig nac zeene gzet naa Pxoza naa. <sup>26</sup> Ni zig nile naa ga, hor cosi ncuaañe gnabtaa to lo me, zneedz mew, sac xnëz naa ngab to. Yquiindpaa gne naa lo me gneedz me ncuaañe gnab to lo me, <sup>27</sup> sac ye me rleynie me to. Rleynie me to, sac gon rleynie to naa ni riladz to ne nli lo me brie naa bia| naa lo guidzliu. <sup>28</sup> Ni nligaa, lo me brie naa bia| naa lo guidzliu; ni niina ne laa naa gbi, loque me gdziñ naa.

<sup>29</sup> Dzigo rdzieets no lo me:

—¿Nasi nagon rien no zha rnee luu! Sac clar rnee luu, rneedraa luu zigne rnee luu glo. <sup>30</sup> Nasi rien no grëse ncuaañe nan luu, sac zig nac niina pquiindpaa nabdiidz no lo luu. Gacxe waa, nasi nagon riladz no ne nli lo Dios brie luu.

<sup>31</sup> Pquiab me, në me:

—¿Wen ga telne riladz to niina cho nac naa! <sup>32</sup> Per lëë hor co nagon bdziñ; ni niina, grëse to laa to csaan naa, tib tib to zhaase zhaase nëz ne xen to. Per guiaand naa loxaque naase, sac tibaque nacie Pxoza naa naa. <sup>33</sup> Grëse ncuaañe bne naa lo to nu, laaw bne naa zeena peet tsienied guic to, beñque nanle to ganle tibaque nacie naa to. Parga nli, laga no to lo guidzliu rii, nzian grë guie|ñe ne ted to, per gdziebde to; sac gon naa rnabey, ladznia naa no grëtaa ncuaañe no lo guidzliu.

#### Rnab Jesús gacnieñ Dios xpëëdsuel me

**17** Blozhse sca në me lo no, blis lo me bui me nëz gbaa.

—Dios, luu ne nac luu Pxoza naa —rëb me—, niina nagon laa dze co bdziñ. Blu ganle meñ nroob nac naa ne nac naa Xpëëd luu, zeena ga glu naa lo miech ganle pa lotaa meñ nroob nac luu. <sup>2</sup> Zigne psañ luu grëse miech ladznia naa, ni gdeed naa tib guie|mban ndzon ne gdziñd dze lozh lo grëse zha ne bneedz luu ngab xnëz naa; scaque niina blu ganle meñ nroob nac naa. <sup>3</sup> Lëë guie|mban co ygaa grëse zha ne gunbey luu, ne nli luuse nac Dios nguia mban, ni guien zho cho nac

naa, ne pxeel luu naa bia| naa lo guidzliu rii. <sup>4</sup> Grëse ncuaañe bnabey luu naa, laaw noyuu naa; ni ga rlu naa lo grë miech rii ganle pa lotaa meñ nroob nac luu. <sup>5</sup> Scagaa luu ne nac luu Pxoza naa, niina ne laa naa glanso lo luu, blu ganle meñ nroob nac naa; sac desde mazd glo zeene gard tsa grëtaa ncuaañe no, tibaque nac lo guie|ndzon ne bdzio ne haxta dze ne blanso naa lo guidzliu rii.

<sup>6</sup> Grëse zha ne ble luu lad grë miech rii bneedz luu lo naa, laa naa pseed zho gunbey zho luu; ni scagaa zha, bliladz zho xtiidz luu. Chen luu zho per laa luu bneedz zho lo naa. <sup>7</sup> Zig nac niina, grëse ncuaañe bneedz luu lo naa, nanle zho ne luu bneedza, <sup>8</sup> sac pseed naa zho grëse wseed ne bneedz luu lo naa, ni bliladz zhow. Wen wen gocnañ zho ne lo luu i brie naa zia| naa lo guidzliu rii, ni riladz zho ne luu pxeel naa. <sup>9</sup> Laa naa rnab lo luu gacnieñ luu zho. Rnab naa par grëse miech guidzliu rii, sinque laa naa rnab por grë zha ne bneedz luu lo naa; sac gon chen luu zho, <sup>10</sup> ni zha glu ganle pa lotaa meñ nroob nac naa. Grëse zho chen luu zho; sac grëse ncuaañe nacchen naa, chen luuw; ni grësegaa ncuaañe nacchen luu, chen naaw. <sup>11</sup> Rien naa, led nroobdraa cuëz naa lo guidzliu rii, laa naa gbile guia| naa lo luu i; per zha, laa zho guiaaque nu. Gane niina, luu ne nac luu Pxoza naa, luu ne nac luu tib meñ ne guieñd xto|, laa naa rnab lo luu: pquianap zho ne nac zho zha ne bneedz luu lo naa, zeena ni tib zho nitlod, sinque tibaque gac zho gza zho zigne tibaque nacie grop ne. <sup>12</sup> Len dze ne blëz naa lo zho nu, zigne racladz luu sca pquianaap naa zho. Ni scagaa ni tib zho britlod; zha ne britlo ga, nole ne sca nitlo zho, zeena sca grieequia miñe raquiet lo Xtiidz luu.

<sup>13</sup> Zhilew laa naa glanso zaatne no luu i; per len dze ne blëz naa lo zho nu, nzian grë ncuaañe bne naa lo zho, zeena ye zho tso guie|bley nroob ne no naa. <sup>14</sup> Pseed naa zho miñe nac xtiidz luu; per na rlëë grëraa miech ran zho zho, sacne ziena|draa zho grë ncuaañe ndzinlid ne rac lo guidzliu rii. Nac zho zigne nac naa, rleynie naa grë ncuaañ co. <sup>15</sup> Per rnab naa cuee luu zho lo guidzliu rii, sinque laa naa rnab csaand luu gun zho ncuaañe racladz menodox. <sup>16</sup> Sac niicle zhaw, niicle naaw, choot ziona|d grë ncuaañe ndzinlid ne rac lo guidzliu rii. <sup>17</sup> Bzhiguie| sca bdeed guie|biini lo zho guien zho zha nac Xtiidz luu, sac Xtiidz luu nac didzli; zeena dib zdoo zho tsoxco zho gban zho zigne rnabey luu. <sup>18</sup> Sac gon, niina laa naa rxe| zho lo grëraa miech guidzliu rii, zigne ne pxeelaque luu naa. <sup>19</sup> Ni niina, dib zdoo naa laa naa gun miñe rnabey luu, zeena ye zho guien zho none dib zdoo zho gun zho miñe rnabey luu.

#### Rnab Jesús por grë zha ne ygabaa xnëz me

<sup>20</sup> Laa naa rnab gacnieñ luu zho, ni gacnieñ luu zha ne naraa gliladz naa, zeene laa zho tsieseed zho; <sup>21</sup> zeena tibaque gac zho, zigne tibaque nac ne grop ne. Ni scaquegaa gacnie zho ne, zeena gliladz grëraa miech ganle ne nli luu pxeel naa. <sup>22</sup> Laa naa psañnon zho zigne psañnonaque luu naa, ni tipse gac zho zigne



tibaque nac ne grop ne. <sup>23</sup> Zigne nacie luu naa, scaque nacie naa zho. Bzhiguiel gocnieng zho, tibaque gac zho grése zho, zeena gan grëraa miech ganle ne nli luu pxeel naa, ni guien zho ganle zigne rleynie luu naa, scaque tibaque rleynie luu grése zha ne ngab lo naa. <sup>24</sup> Papá, grése zha ne bneedz luu lo naa nu, racladz naa ye zho guiaad zaatne glanso naa i, zeena gan zho lo grëtaa guielndzon ne no naa. Lo guielndzon ne bneedz luu lo naa, sac rleynietaque luu naa haxta zeene gard tsaa guidzliu.

<sup>25</sup> Papá, luuse nac men ne rapd ni tib dol, niicle ne runbeyd grë miech rii luu, sangue naa runbey naa luu; ni scaquegaa grë zha ne bneedz luu lo naa nu, nanle zho ne luu pxeel naa. <sup>26</sup> Laa naa pseedle zho gocnan zho cho nac luu ni bii seedragaa naa zho, guien zho ganle pa lotaa rleynie luu naa; zeena scaque guien zho gleynie zho samiech zho, ni gacnie zho naa.

### Bnaaz zho Jesús

(Mt. 26:47-58; Mr. 14:43-50, 53-54; Lc. 22:47-54)

**18** Zeene blozh bnaab Jesús lo Dios, laa me brieenie no ga bdieedquia no nëz dan ro psë ne rnee zho Psë Cedrón. Ga no tib zaatne zëëb niapse yag nex, dziog ga bliaaz no gza no me.

<sup>2</sup> Judas zha ne pto me ga, wen wen runbey Judas lugar co, sac nzian vuelt ziyenie me no ga. <sup>3</sup> Dzigo zeene laa Judas blanso ga, laa Judas blansoniele tib dzoon menguiib, ni zla zha ne rquianap yadoo; no guierbel nia zho blanso zho ga, zha ne nzhen yag, zha ne nzhen gaa spad. (Lëë grë zha co pxeel grë pxoz rnabey, ni grë zha farisé.) <sup>4</sup> Loxaque blanso zho, laa Jesús brieequiale, rëb me lo zho:

—¿Cho rguib to?

Sca rëb me sac rienle me pe nacne zie zho ga, nanle me pe nac grëtaa ncuaane ted me.

<sup>5</sup> Pquiab zho, rëb zho:

—Men Nazaret ne lë Jesús, men co ziaadguib no.

Dzigo rëb me:

—Naa nac men co, tel me ziaadguib to.

<sup>6</sup> Zeene bin zho rëb me: “Naa nac men co”, wbire rzhitsaque zho, grése zho biab liu. Ye Judas no lad co.

<sup>7</sup> Wbiire Jesús bnabdiidz me lo zho, rëb me:

—¿Cho zho rguib to?

Pquiab zho rëb zho:

—Men Nazaret ne lë Jesús, men co rguib no.

<sup>8</sup> —Laa naa nile lo to —rëb me—. Naa nac men co.

Telne naa ziaadguib to, goisaan sca guey grë zha ne zo lo naa nu.

<sup>9</sup> Ga brieequia xtiidz me zeene rëb me: “Lo grë zha ne bneedz luu lo naa, ni tib zho bnitlod.”

<sup>10</sup> Laa Simón ney tib spad, hor co bdobaque Simón spad co psilaa me tib niaw, bliengaa me diag derech tib mgui lë Malcw. (Lëë mgui co quia xtsiin men ne nac pxoz nroob.) <sup>11</sup> Zeene gon Jesús, rëbchaa me:

—iBlootsow spad qui Pedr! iBien ganle Pxoz naa rnabey znu teed naa! ¿Niacxe gond naa miñe rnabey me naa dzigo?

<sup>12</sup> Horco laa grë menguiib co, grë zho zha ne rnabey lo zho, ni grë zha ne rquianap yadoo ga, laa zho wbigbe bnaaz zho me. Blozhse bzobdoo zho me, laa zho zienie me.

<sup>13</sup> Sca nzobdoo me, laa zho bdziñnie me lidz men ne lë Anás, pxozdzoop Caifás. Caifás nac pxoz nroob len iz co, <sup>14</sup> ni me ga rëb lo grë men non lo zha Israel, ne mazd wena tibaque zha ne ygaa guet, quizh zho par dib guiedz.

### Rëb Pedr runbeyd Pedr Jesús

(Mt. 26:69-70; Mr. 14:66-68; Lc. 22:55-57)

<sup>15</sup> Zhiits co, ga nal no grop no Pedr. Ni ne runbey naa Caifás men ne nac pxoz nroob ga, zeene bdziñ no ro lidz Anás, loxaque naa brieelo bzëëb nëz ley. <sup>16</sup> Laa Pedr, zaatne nactaa ro yu par gdziñ zaatne nac ley, gataa biaan Pedr. Nacne brieque naa bnee naa lo wnaa ne zonap ro yu, dzigora bdeed wnaa co diidz bzëëb Pedr. <sup>17</sup> Dzigo rëbchaa me lo Pedr:

—¿Bod ye luu dzigo lëë nac xpëëdscuel men ne bdziñnie zho i?

—Coo, led yed naa —rëb Pedr.

<sup>18</sup> Grë zha ne quia xtsiin men co ni grë menguiib ne ndxie ga, laa zho bzëëgle gui. Grése zho, laa zho ndxiedzëë lo gui ga, sac rac nal. Ye Pedr bdziñ lo zho ga nodzëë Pedr.

### Rquiep Anás Jesús

(Mt. 26:59-66; Mr. 14:55-64; Lc. 22:66-71)

<sup>19</sup> Laa nëz len yu, laa Anás psilo noquiep Jesús dien yo grë xpëëdscuel me, ni dien pe nac grë wseed ne nolu me lo miech. <sup>20</sup> Dzigo pquiab Jesús, rëb me:

—Grése miech, nanwen zho ganle pe nac zhiwseed naa. Sac zeene pseed naa zho, ben naa ne ngueets zhliian nseed naa zho; sinque zaatne rcaalsa nzian miech, ga bne naa lo zho. No hor pseed naa zho len grë yadoo win, nogaa hor pseed naa zho len yadoo nroob ne zob lad guiedz nu. <sup>21</sup> Nana bod rieguialda ne lo naa rnabdiidz luu. Mazd lo grë zha co ganle bnabdiidz, zha bin grëtaa ncuaane bne naa.

<sup>22</sup> Loxaque blozh sca pquiab Jesús, zeene bias tib menguiib ne rquianap yadoo zo gax ga, bdap me lo Jesús.

—iBien ganle! —rëb me—. iLed squid gon none yquiab luu lo men ne nac pxoz nroob!

<sup>23</sup> Dzigo rëbchaa Jesús:

—Telne rzac luu ben naa falt, bnë dien pe nac diidz ne pxin naa. ¿Te wal rdziladz luu ye, rguin luu zha ne rnee diidzli?

<sup>24</sup> Blozh ga scaque nzobdoo Jesús pxeel Anás me lo Caifás, men ne nac pxoz nroob.

### Rnee Pedr stib runbeyd Pedr Jesús

(Mt. 26:71-75; Mr. 14:69-72; Lc. 22:58-62)

<sup>25</sup> Horco laa Pedr bii zodzëëque lo gui nëz ley. Dzigo wbiire zho bnabdiidz zho lo Pedr, rëb zho:

—¿Bod xpëëdscuel men ne blansonie zho i lëë nac luu?

Laane neeli Pedr, leḷ pquiab Pedr rëb Pedr:  
 —¡Lëda! ¡Zha gaczhe naa xpëëdsuel meḷ qui!  
<sup>26</sup> Ye tib zhalidz Malcw, zha ne pchug Pedr diag ga, laa zho zodzëë lo gui ga, sac ye zho quia xtsiḷ p xoz nroob co; dzigo rëbchaa zho:  
 —Ni goḷ naa name, ye luu no lad zha ne zonie me leḷ yag oliv ga.  
<sup>27</sup> Wbiire Pedr rëb Pedr ruḷbeyd Pedr me, ni lëëtaque hor co laa tib gall pcedz.

**Güeynie zho Jesús lo Pilat**  
 (Mt. 27:1-2, 11-14; Mr. 15:1-5; Lc. 23:1-5)

<sup>28</sup> Ziadyiinile liuw, zeḷe laa zho brieenie Jesús lidz Caifás, zienie zho me zaatne nac xyulow Pilat, meḷ ne nac gobernador. Zeḷe bdziḷ zho, ni tib zho bzëëbd leḷ yulow, sac racladz zho quiits zho miḷe rnabey xley lay zho; parne grielo yquiin zho guieḷwagw ne row zho lni Pascw co. <sup>29</sup> Nacne briece Pilat bnabdiidz Pilat lo zho, rëb Pilat:  
 —¿Pe nacne ziaadnie to meḷ qui nu? ¿Pe rquiaqui to me?  
<sup>30</sup> Pquiab zho, rëb zho:  
 —¡Por grëtaa guieḷntseeb ne noyuḷ me, gane ziaadnie no me! ¡Teḷne niac me meḷ ndzinli, niacxe lega guiaad-zo no me lo luu!  
<sup>31</sup> Dzigo rëbchaa Pilat:  
 —Goḷsënie me, tose goḷguḷquizh me miḷe beḷ me; zigne nac xley to.  
 —Racladz no guetgazh me —rëb zho—. Ni naḷe luu gaḷe, no ne nac no meḷ Israel, grielod ne nose gnabey guet tib miech.  
<sup>32</sup> Ga briequia miḷe bnee Jesús, zeḷe bzeet me ible zut miech me. <sup>33</sup> Dzigo bzëëb Pilat leḷ yulow, bnabey me gocredz Jesús. Dzigo bnabdiidz me lo Jesús, rëb me:  
 —¿Pe nli luu nac zhirey meḷ Israel?  
<sup>34</sup> —Ne squi rnee luu —rëb Jesús—. ¿Pe guic luu baba, te no cho nëw lo luu ye?  
<sup>35</sup> Pquiab Pilat, rëb Pilat:  
 —Naḷe luu gaḷe led zha Israeld naa. ¿Pe nac sca ne ziaadnie zho luu nu? ¿Pe beḷ luu? Sac goḷ zha ladzaque luu grë zho zha ne rnabey lo zhipxoz zho, zha biaadsaḷ luu nu.  
<sup>36</sup> Dzigo rëbchaa Jesús:  
 —Nli rey nac naa, per led lo guidzliu riida, teḷne niaca miḷe lo guidzliu riiw, dzigosí grëse zha ne nacnie naa niacntseeb zho, nsaand zho naaz zha Israel naa. Per na, zhaa zaatne nac naa rey.  
<sup>37</sup> Pquiab Pilat, rëb Pilat:  
 —¿Rey luu dzigo lëë?  
 —Scaw goḷ —rëb Jesús—, nli rey naa; zigne rnee luu i. Ible miḷ co nacne bial naa gol naa lo guidzliu rii, ni bial naa bialseed naa miech guḷbey zho miḷe nac diidzli. Ni zha ne zienaḷ miḷe nac diidzli, zha co ngab lo naa.  
<sup>38</sup> —¿Diidzli ye? —rëb Pilat.

**Bnabey Pilat tsiegut zho Jesús**  
 (Mt. 27:15-31; Mr. 15:6-20; Lc. 23:13-25)

Zigne blozh sca rëb Pilat, briece Pilat ga güeynee Pilat lo grë zha ne bdziḷnie me ga, rëb Pilat lo zho:  
 —Ni tib doḷ goḷ rapd meḷ rii. <sup>39</sup> Per gzobse lni Pascw rii, rnab to rlaa cholze tib zha ne no ladzguiib. ¿Pe gnë to sca, mazd csilaa naa meḷ ne nac zhirey to nu?  
<sup>40</sup> Pquiabbe zho, rëb zho:  
 —¡Csilaad luu me! ¡Mazd psilaa Barrabás! Ni laa Barrabás tib ngbaan nac Barrabás.  
**19** Zeḷe goḷ Pilat sca rac zho, dzigo bnabey Pilat bla meḷguiib, bdeed dooguid zho Jesús.  
<sup>2</sup> Bzieecw zho bla lë yag quiets bzoob zho guic me, ni bgacw zho me tib lë lar nizhnie nlaan. <sup>3</sup> Dzigo psilo zho ruḷnguzee zho me, nguiedz roptsie zho rnee zho:  
 —¡Bley na gaḷe, laa luu nacle zhirey zha Israel! Ni rgap zho lo me.  
<sup>4</sup> Wbiire Pilat briequia Pilat zaatne ndxie grë miech co, rëb Pilat lo zho:  
 —Goḷwi gaḷe laa naa cuee me, glu naa me lo to, per gacnaḷ to gaḷe rieguiaḷd guet me; laa naa pquieple me rlu ni tib guieḷntseeb beḷd me.  
<sup>5</sup> Zeḷe laa Jesús briequia, nzobguicse me coron yag quiets co, ni nacw me lar nizhnie co.  
 —Goḷwi na gaḷe —rëb Pilat—, lëë me nu.  
<sup>6</sup> Grë p xoz ne rnabey, ni grë meḷguiib ne rquianap yadoo, zeḷe goḷ zho me, psilo zho nguiedz roptsie zho rnee zho:  
 —¡None guet me! ¡Bnabey yquia me lo cruz! Dzigo rëbchaa Pilat:  
 —¡Goḷtsienie me sca! ¡To goḷquiaa me lo cruz! Sangue naa, grielod yquia naa me lo cruz; sac laa naa goḷe peet guieḷntseeb beḷd me.  
<sup>7</sup> Pquiab zho rëb zho:  
 —¡Rdziaap no xley no! Ni ley co rnabey ib none guet me, sac rquidie me rnee me laa me nac Xpëëd Dios.  
<sup>8</sup> Zeḷe bin Pilat sca rëb zho, mazdraa bdzieb me.  
<sup>9</sup> Dzigo bzëëbnie me Jesús leḷ yulow stib, bnabdiidz me lo Jesús, rëb me:  
 —¿Bnë dieḷ cho meḷpaa nac luu? ¿Pa nac ladz luu? Per ib pquiabd Jesús lo xtiidz Pilat. <sup>10</sup> Dzigo rëb Pilat:  
 —¿Pe nacne rquiabd luu? ¿Goḷ gaḷe naa rnabey, zrieelo csilaa naa luu, o gnabeygaa naa yquiaa luu lo cruz?  
<sup>11</sup> Pquiab Jesús, rëb me:  
 —Nli luu nac zha rnabey niina, per teḷne niaca miḷe needzd Dios guieḷrnabey qui lo luu, grielod ne luu gnabey zha gac naa. Miḷcocxe waa, zhi nac xtoḷ luu, mazdraa nac xtoḷ zha ne biaadlo naa nia luu.  
<sup>12</sup> Dzigo gocladz Pilat nsilaa me Jesús, per bzhiguieḷd grë zha ne güeysaḷ me ga.  
 —Teḷne laa luu csilaa mgui qui goḷ —rëb zho—, rriequia dzigo ye luu rlëënie César. Sac goḷ, grëse zha ne racladz gac rey, lo César ga racndaan zho.  
<sup>13</sup> Zeḷe bin Pilat sca rëb grë miech co, bnabey Pilat briece Jesús nëz ley stib. Dzigo güeysob Pilat lo xcan ne zo ley co, zaatne rzob me ruḷ me guieḷwxtis. (Dipse ley

co, niapse quie lag now; gane rnee zha Israela Gaba-ta.)<sup>14</sup> Lëë dze vispr Ini Pascw co ga nagon, zig grolle dzew noyac grë miñ co. Dzigo rëb Pilat lo zho:

—Laa zhirey to nu gon. ¡Go!sënie me!

<sup>15</sup> Psilo zho stib, nguiedz roptsie zho, rnee zho:

—¡Beetgagh meñ qui! ¡Bnabey yquia me lo cruz!

Rëbchaa Pilat:

—Zhirey to nac me, ¿ni racladz to ye gnabey naa yquia me lo cruz?

Pquiabbe grë pxoz ne rnabey rëb zho:

—¡Tibaque meñ ne nac zhirey no, ni lëë meñ co nac César!

<sup>16</sup> Dzigotaa mazd laa Pilat bloo Jesús nia zha ne tsiequiaa me lo cruz.

### Pquia Jesús lo cruz

(Mt. 27:32-44; Mr. 15:21-32; Lc. 23:26-43)

<sup>17</sup> Zeene laa Jesús brie ga, rna tib cruz nroob ney me; laa zho zienie me. Bdziñnie zho me ro guiedz, za-atne rnee zho “Gui Beerguic Ngutoo”;<sup>18</sup> ga pquiaa zho me lo cruz. Ni pquiaa zho schop zha ntseeb, tibga zhicruz zho bzo cue zhicruz me.

<sup>19</sup> Bnabey Pilat pquia bla lan diidz guic zhicruz me, rneew: “LËË JESUS MEN NAZARET NU, MEN NE NAC ZHIREY ZHA ISRAEL.” Pquiaw xtiidz zha Israel, xtiidz zha Roma ni xtiidz zha Gres. Nzian zha Israel gon sca quia guic zhicruz me, sac gaxpaa ro guiedz nac zaatne pquiaa zho me lo cruz ga.<sup>21</sup> Nacne güey grë pxoz rnabey, güeylisqui zhow lo Pilat, rëb zho:

—¿Pe nacne pquiaa luu guic zhicruz mgui co, ne me nac zhirey zha Israel? Pe gacd nquiaa luu: “Rnee me, me nac zhirey zha Israel.”

<sup>22</sup> Pquiab Pilat rëb Pilat:

—Miñe pquia naa, laaw pquiale ga. Ni sca none guiaaṅa.

<sup>23</sup> Laa grë menquiib ne pquiaa Jesús lo cruz ga, zeene blozh pquiaa zho me lo cruz, bzheñ zho xab me been zhow tap lë, tib lëgaw biaañnie zho tib tib zho. Laa lar ne rbix me, tiblagaque naca, ndiibda;<sup>24</sup> dzigo rëbchaa zho:

—Miñritaa nagon dziuungrold ne. Miñe naca gotsaa dzio new rif, dzigo zha ne griequia zha co guiaañniew.

Ga briequia miñe raquiet lo Xtiidz Dios, zaatne rnee: “Xab naa, miñe racw naa nzian lë been zhow bgaaza lo zho; laa miñe rbiix naa, bio zhow rif.” Ni scadaa been gza menquiib co.

<sup>25</sup> Gax zaatne zo zhicruz Jesús ga, zo blalaa men wnaa. Ga zo xniaa Jesús, zo tib bel xniaa me, zo Marí tsieel Cleof, ni Marí Magdal.<sup>26</sup> Gaxaque ga zo naa. Zeene gon Jesús xniaa me, ni gon me naa, rëbchaa me lo xniaa me:

—Been cuent nagon lëë xpëed luu i zo i.

<sup>27</sup> Laa lo naa në me:

—Been cuent lëë xniaa luu i gon. Bzhiguiel luu gan me.

Dzigo desde dze co, pcaania naa xniaa me bianie naa me lidz naa, pteedlo naa me.

### Gut Jesús

(Mt. 27:45-56; Mr. 15:33-41; Lc. 23:44-49)

<sup>28</sup> Rienle Jesús ne gataa laa me psiaa! dziin ne pxeel pxoz me me gon me, ni par griequia grëse zigne rzeet lo Xtiidz Dios ted me, hor co bredz me rëb me:

—Rnab zhis naa.

<sup>29</sup> Gax lo grë menquiib ne quianap me ga, ga zo tib cant win no nziu bla. Zeene bin zho sca rëb me, rias tib zho bgadz zho tib lë zhiil lo nziu co, bzoob zhow guic tib goobgui nool güeyquiaa zhow ro me.<sup>30</sup> Zeene bdziñ nziu co ro me, pquiin me niipa, dzigo rëbchaa me:

—Lëew nagon, nataa laaw bza.

Zeene blozh sca bnee me, znuse pquianruñ guic me; laa me blozh.

<sup>31</sup> Guini liu co nac tib dze ne mazdraa nda lo zha Israel. Nacne güey grë zha ne rnabey lo menquiidz güeynee zho lo Pilat, gnabey Pilat tsietiits zho gzhibni Jesús ni zha ne pquiagza me lo cruz ga, zeena guietgagh zho lo cruz dze co; sac racladz zho scaque quia zho lo cruz zeene laa dze nda co gdziñ.

<sup>32</sup> Dzigo pxeel Pilat bla menquiib. Zeene bdziñ zho, glose güeytiits zho ni tib zha ne quiagza Jesús lo cruz ga; blozh ga, güeytiitsaque zho ni stib zho.<sup>33</sup> Zeene bdziñ zho zaatne zo zhicruz Jesús, gon zho laa me gutle; nacne bdiitsd zho ni me.

<sup>34</sup> Horco wbig tib menquiib co, bliz zho xlanz zho ro xcuxti me. Zeene bdoob zho lanz co, nis ne, ren ne brie ga.

<sup>35</sup> Naazhal gon znu been zho me. Laaw rne naa lo to zigne gocsew. Golliladza, sac ne nligaa diidzliw.<sup>36</sup> Ga briequia miñe raquiet lo Xtiidz Dios, zaatne rnee: “Ni tib dzit ne no me quiitsd zho.”<sup>37</sup> Ni stib lugar, zaatne rnee: “Bii zanaque zho ganle cho nac meñ ne bliz lanz zho ga.”

### Bgueets Jesús

(Mt. 27:57-61; Mr. 15:42-47; Lc. 23:50-56)

<sup>38</sup> Laa José, tib meñ Arimaté, zeene bin me laa Jesús gutle, dzigo güey me lo Pilat güeynab me diidzbey par grielo tselit me xcuerp Jesús lo cruz. Ye me xpëed-sciel Jesús nac me, per pxobneñd me ne ye me nacgza Jesús; sacne rdzieb me grë meñ Israel ne rlëe lo Jesús. Dzigo bdeed Pilat diidzbey.

<sup>39</sup> Nicodem, meñ ne güeyzodiidznie Jesús ga tib pcow liu, ye me güeyna! zhits José; güeynie me zig galptsiip-tap kil tiblo zënex ne riaa yaal ne lë mirr ni yaal ne lë áloe.<sup>40</sup> Zeene blozh biet Jesús lo cruz, psilo zho bdëeb zho zënex co xcuerp me; blozh ga, pchel zho me tib lar nquits; sac sca rqueets grë meñ Israel zhingutoo zho.

<sup>41</sup> Gax zaatne pquia Jesús lo cruz ga, niaa tib corral no niapse yag nex. Len corral co, ga ndieen tib baa tib cho quie, ni tib ngutoo gard ygueets len baa co;<sup>42</sup> dzi-go nacne gase güeyqueets zho me, sac zhile runfalt sëeb dze nda co, ni baa cose nac miñe riaañ gax ga.

## BRIEEBAN JESUS

(Mt. 28:1-10; Mr. 16:1-8; Lc. 24:1-12)

20 Goḷ dze ne rzobni zhmalá, silgaw, scase bii ncow rnaw, brieé Marí Magdal zie me ro baañ Jesús. Zeene bdziñ me, goñ me laa quie ne nioog ro baa co bdioble, laaw zole tib nëz.

<sup>2</sup> Horco lëëled wbiere nguzhoon me, biaad me zaatne no no grop no Pedr, biaadnie me diidz lo no, në me laa zho güeybeele Jesús leñ baa, dieen palo güeyšan zho me.

<sup>3</sup> Dzigo lëëled, brieé no grop no Pedr, zioso no ro baa. <sup>4</sup> Zeene bdziñ naa ro baa, blëz naa niip, dzigo bdiixlo naa leñ baa goñ naa laa lar ne brieḷ me zhoob ga; per bzëëbd naa. Laa naa blozhdze bdiixlo leñ baa, zeene laa Pedr blanso. <sup>6</sup> Zigne blanso Pedr bzëëb Pedr leñ baa, goñ Pedr nligaa laa lar co zhoob ga, <sup>7</sup> niicle lar ne brieḷ guic mew, laaw zhoobaque ga; ndibëdsew, zhooba tib lad.

<sup>8</sup> Nacne bzëëbaque naa. Zeene goñ naa zha zhoob lar co, dzigoraá bliladz naa ne nli brieéban me. <sup>9</sup> ¡Sac hor co, bii gard tsogüic naa zha rnee lo Xtiidz Dios; sac ga raquiet ne ible zrieéban me!

## Goñ Marí Magdal Jesús

(Mr. 16:9-11)

<sup>10</sup> Ye Marí biire blanso ro baa ga stib. Zeene wbii no ga grop no Pedr, laa Marí bii zo ro baa ga.

<sup>11</sup> Ga name zo Marí roon me. Sca roon me, tibaque zeene bui me nëz leñ baa co, <sup>12</sup> goñ me laa chop anjl zob leen co. Dib nquitsbiese rna xab grop anjl co, tib me zob nëz ne bzhoob guic Jesús, stib me zob nëz ne bio ni me; <sup>13</sup> dzigo rëbchaa me lo Marí:

—¿Pe nacne roon luu?

—Roon naa —rëb Marí—, sac laa zho biadbee xcuerp Jesús nu, na dieen pa güeyšan zho me.

<sup>14</sup> Loxaque blozh sca bnee me, zeene ptsire lo me goñ me laa tib meñ co zo gax zhits me. ¡Per ib beenbeyd me ne Jesúsá!

<sup>15</sup> —¿Pe nacne roon luu? —rëb Jesús—. ¿Cho rguib luu?

Leḷ güeynie guic Marí rëb me bod meñ ne rquianap gaw, dzigo rëbchaa me:

—Bzhigüel, telne luu biadbee me nu, bnë dieñ pa lo güeyšan luu me; zeena ga naa gaxi naa me.

<sup>16</sup> Horco bneelë Jesús Marí, bredz me me. Zeene bin Marí lë me, lëëled biecw me; dzigoraá beenbey me Jesús.

—¡Maestro! —rëb me—. ¡Mod luu i!

Laa me zie gbig me lo Jesús. <sup>17</sup> Dzigo rëbchaa Jesús:

—¡Xeend luu naa! Sac gard guia naa lo Pxoñ naa gbaa. Miñe naca, güey güeynie diidz lo grë zha ne bzënaḷ zhits naa; gudz lo zho: Laa naa nole nëz guia naa lo meñ ne nac Pxoñ ne, meñ ne nac Dios ne rdziuuñbey ne.

<sup>18</sup> Horco lëëled wbi Marí ga, ziaadnie me diidz lo no. Blanso me bzodiidz me zha goñ me Jesús, ni në me lo no zigne rëbse Jesús lo me ga.

## Brieequia Jesús lo xpëëdsuel me

(Mt. 28:16-20; Mr. 16:14-18; Lc. 24:36-49)

<sup>19</sup> Pcow liu dze dmingw co, grëse no ne nac no xpëëdsuel me laa no pcaalsa; loxaque Mazh ruñfalt. Dziits nquiaa no yag yu, sac rdzieeb no grë zha Israel ne rlëënie me. Laa no ndxie ga, tibaque zeene brieequia me bzo me glowtaa lo no; pquiaabdiuzh me no.

<sup>20</sup> Blozhse pquiaabdiuzh me no, dzigo blu me leñ nia me lo no, zaatne biaaz clav zeene pquia me lo cruz, ni blu me ro xcuxti me. ¡Grëse no per nli rley no zeene bdziñ no ne nli mew! <sup>21</sup> Blozh ga, në me lo no:

—¡Laa naa rnedz tib guieḷbley zdoo to, zeena peet tsienied guic to! Zigne pxeel Pxoñ naa naa biaḷ naa, scagaa niina laa naa rxel to.

<sup>22</sup> Dzigo blub me lo no grëse no.

—Goḷcaania Espíritu Sant —në me—. <sup>23</sup> Ni zeene goñ guñ to tib miech perdon, scaque Dios zuñ me zho perdon; laa telne sigüelḷd zho guñ to zho perdon, laa zho biaanle lo xtoḷ zho ga.

## Goñ Mazh Jesús

<sup>24</sup> Zeene bdziñ no Mazh (Mazh ne rnee zho “Mëëd-grop” ga), bzodiidz now lo Mazh, per bliladz Mazha, rnee Mazh:

—Rliladz naa miñe rnee to i goñ. Zliladz naaw, per haxta ganlo naa me, haxta gan naa leñ nia me zaatne biaaz clav, ni cteed-xug naa ga; ni csëëbnia naa ro xcuxti me zaatne biaaz lanz ga.

<sup>26</sup> Goc xon ngbidza, laa no pcaalsaque leñ yu co stib; hor cosi yele Mazh ndxiegrë no ga. Scaque dziits nsioog no ro yu, per tibaque zeene bdziñ no laa Jesús bzëëb leñ yu ga stib, bzo me glowtaa lo no, pquiaabdiuzh me no. Blozhse pquiaabdiuzh me no, <sup>27</sup> rëbchaa me lo Mazh:

—Wbig na Mazh, bui leñ nia naa, psëëb mzhugnia luu nu. Dieñ nia luu nu, psëëbnia ro xcuxti naa. Gac-chopdraa guic luu, sinque bliladz ganle ne nli mban naa.

<sup>28</sup> Dzigoraá bliladz Mazh ne nli mban me.

—Nasi rliladz naa mban luu —rëb Mazh—. Luu nac meñ ne rnabey naa, luu nac xDios naa.

<sup>29</sup> Pquiab Jesús rëb me:

—Laa luu rliladz niina, lëëcxe laa luu gonle naa waa. ¡Dichos zha ne gliladz ne nli mban naa, niicle ranḷd zho naa!

## ¿Pe nacne pquia grë diidz rii?

<sup>30</sup> Lo lal ne bzënie Jesús no, ndaldoo milagr ne bdziñ no been me, led grëda raquiet lo guits rii.

<sup>31</sup> Miñe pquiasé naa nu, laaw pquia naa zeena zeene glab tow, güey to ganle ni gliladz to: Jesús nac meñ ne baaadsilaa ne lo xtoḷ ne, Dios bzooblo me biaad me, ni Xpëëd Dios nac me; sac zha ne dib zdoo gliladz cho nac me, zgaa zho tib guieḷmban ndzon ne gdziñd dze lozh.

### Gon̄ zho Jesús Galilé

**21** Bded ga, wbiire briequia Jesús lo no stib, zatne nac ro nisdoo nroob ne rnee zho Tiberias. <sup>2</sup>Tib bdze dzew, tipse ndxie no gza no Simón Pedr, Mazh, Natanael (meñ ne nac meñ Caná ga), bets naa Jacob ni schop zha ne nacgza no. <sup>3</sup>Tibaque zeeñe nē Pedr, laa Pedr tsie gooz meļ. Dzigo rdzieets no:  
—Yeque no sca zia guio ne.  
Dzigo bziaab no tib leñ barcw win gza no, laa no zio. Dipse guieel bdzionie no barcw co lo nis, per ni tib meļ bgaad. <sup>4</sup>Laa liu ziaadle lozh guini, zeeñe bdzion no laa tib meñ co zo ro nis, per ni tib no bdziunbeyd me. <sup>5</sup>Dzigo bnee meñ co lo no, nē me:  
—Yo to dien̄ xin, ¿pe bгаа ma?  
Pquiab no rdzieets no lo me:  
—Choot ma bgaad.  
<sup>6</sup>Dzigo nēchaa me:  
—Gol̄ron̄ guieñ ne rgaa ma i nēz derech gan̄le, znaaz to ma.  
Dzigo bron̄ no guieñ co nēz derech. Zeeñe laa no cueew lo nis, ib lēbd no glis now; ndaldoo meļ ne biodzē leña.  
<sup>7</sup>—¡Pedr! —rep naa—. ¡Bina gan̄le, xmaistr ne i gon̄! Zeeñe bin Pedra, lēlēd wbix Pedr xab Pedr, biab Pedr lo nis; psilo Pedr bzhoobnis Pedr briequia Pedr ro nis. <sup>8</sup>Laa no biaan̄ leñ barcw ga; nole bdziñniew zatne nac ro nis. Maase tapgałtsii metr sca bdioobniu no guieñ co lo nis.  
<sup>9</sup>Zeeñe brieē no leñ barcw, bdzion̄ no laa gui noyecle, laa tib meļ zhooble lo gui co, ye quietxtil ne. <sup>10</sup>Dzigo nē Jesús lo no:  
—Gol̄tēnie bla meļ ne blozh bnaaz to i nu dien̄.  
<sup>11</sup>Dzigo güey Pedr biep me leñ barcw, güeyxadz me guieñ ne no meļ ga; dzigo bdoobniu mew bdziñnie mew haxta zaatne nacpaa ro nis. Meļ tafa, niapse ma mbeew, zeeñe bgab ma rgaa ma tib gayoo chooptsi-iptson̄ lo grē ma; niicle scataa nzian ma, per blēb guieñ co, briezda.  
<sup>12</sup>Blozh ga, bredz me no, nē me:  
—¡Gol̄tē na, zeeña gowxeren to!  
Ni tib no bnabdiidzd lo me dien̄ pe nli mew; sac, ¡rien̄paa no ne nli mew!  
<sup>13</sup>Dzigo wbig me bdiiz me quietxtil co lo no, bzhen̄ me meļ ne, bneedz me ma lo no.  
<sup>14</sup>Ga bion̄ vuelt briequia me lo no wlal ne brieēban me.

### Bzodiidznie Jesús Pedr

<sup>15</sup>Blozhse bdioowxeren no, bredz Jesús Pedr, psilo zho bzē zho grop zho; dzigo rēb me lo Pedr:  
—Simón (xingan Jonás), ¿pe nli dzigo rleynieraa luu naa que grē zha qui?

—Nquialadz naa luu —rēb Pedr—, ni nan̄legaa luuw gan̄le.

—Pteedlo grē xpēcwxiiil win naa sca —rēb me.

<sup>16</sup>Wbiire me, rēb me lo Pedr:

—Simón (xingan Jonás), ¿pe nlipaa dzigo rleynie luu naa?

—Nquialadz naa luu —rēb Pedr.

Dzigo rēb me:

—Pquianap xpēcwxiiil naa sca.

<sup>17</sup>Wbiireque me stib rēb me lo Pedr:

—Simón (xingan Jonás), ¿pe nlipaa nquialadz luu naa?

Zeeñe bin Pedr sca rēb me, mban goc zdoo Pedr; sac gale rac tson̄ vuelt zinabdiidz me lo Pedr, dzigo rēb Pedr:

—Luu nac meñ ne rnabey, luu naña grēsew, nañ luu gan̄le nquialadz naa luu.

Dzigo rēb me:

—Tel̄ne nli nquialadz luu naa, yquiaanap luu xpēcwxiiil naa sca.

<sup>18</sup>Zeeñe gon̄ bii nguieg luu, led rsoladz luu gan̄le lu-uzhal racw xab luu, rrieelo rie luu zaatne racladztāa luu; per zeeñe gon̄ laa luu gac meñgolraa, loxaque nia luu glis luu zhaale zha ne ygacwxab luu, ni zienie zho luu zaatne ni racladzd luu.

<sup>19</sup>Zeeñe znu rēb me lo Pedr, ga bzeet me zha nac guiełgut ne yгаа Pedr, ni ga glu Pedr gan̄le pa lotaa meñ nroob nac Dios. Blozhse ga, rēbchaa me:

—¡Dēnaļ zhits naa!

<sup>20</sup>Dzigo naļaque naa zhits me grop me Pedr. Zeeñe ptsire lo Pedr, gon̄ Pedr laa mēēdscuel ne scataa rleynie me ga, laa zho naļ ga, zha ne zobpaa cue me ga lo xtsee co, zha ne wbigpaa bnabdiidz lo me dien̄ cho nac zha ne tsielo me ladzania zha ne gut me; dzigo rēbchaa Pedr lo me:

<sup>21</sup>—Tel̄zhe zha rii waa, ¿pe nac miñe ted zho?

<sup>22</sup>Rēbchaa me:

—¿Pe nadien̄ gun̄ luu ne racladz luu gacnañ luuw? Tel̄ne gacladz naa, zrieelo gnabey naa gban mgui haxta leñ dze ne guiaļ naa stib. Led xcuenta luu ga. ¡Na zeeñ dēnaļ zhits naa!

<sup>23</sup>Zeeñe gocnañ grēraa zha ne riladz Jesús sca bnee me, grēse zho tibaque güeynie guic zho gdziñdraa dze guet naa. Per led scada, sinque znu naca, rēb me: ¡Pe gun̄ Pedr! Tel̄ne gacladz me, zrieelo gnabey me gban naa haxta gaļ dze ne guiaad me stib.

<sup>24</sup>Grēse miñe pquia naa nu gon̄, grop lo naa gon̄ naaw, grēse zha ne nacgrē no nan̄paa zho gan̄le ne di-izli rne naa.

<sup>25</sup>Ndallooraa grē ncuaaņe nroob ne been̄ Jesús, tel̄ niaca miñe yquiw grēsew, ni ygaad dib lo guidzliu tsotsow grē guits ne yquiw ga.

# HECHOS

¡Diuzh Tiöfl!

<sup>1</sup> ¿Yose luu dien bets? Naa gon nac Luc, laa naa rxel stib guits rii lo luu. Miñe pxel naa lo luu glo ga, lo co pquia naa grëse miñe been Jesús, grëse wseed ne blu me lo miech zeene psilo me xtsiin me <sup>2</sup> haxta gol dze ne psan me diidz pe nac ncuane gun grë zha ne bzooblo me tsie tsienee Xtiidz me. Espiritu Sant bdeed guielbiini lo zho bien zho zha racladz me; lëe dze co ga zey me gbaa.

<sup>3</sup> Nli psacsi miech me, beet zho me, per brieegan me. Ni par glu ganle ne nli brieegan me, dipse len choo ngbidz brieequia me lo grë zha ne sca bzooblo me tsienee Xtiidz me. Gzataa zeene rrieequia me lo zho, rnee me lo zho zha rnabey Dios.

<sup>4</sup> Tib vult ndxie zho grë zho me, dzigo pso me diidz lo zho ible grieed zho lad guiedz Jerusalén, haxta quiet Espiritu Sant gdeed guielbiini lo zho zigne nacle xtiidz Pxoze me; ni biire rëb me lo zho:

<sup>5</sup> —Gol soladz ganle laa naa nile lo to: nli laa Juan pchoobnis, per niab nisa; sangue to zгаа to guielbiini ne gneedz Espiritu Sant, rrieequia Espiritu co chobnis to; ni zhile gdziñ dze ne laa miñ co gac.

<sup>6</sup> Len ngbidz ne sca nolulo me lo zho, tib vult bnabdiidz zho lo me, rëb zho:

—Ndion no men rnabey nac luu. ¿Pe niina na so luu gnabey luu, zeena cuee luu zha Israel ladznia zha Roma?

<sup>7</sup> Dzigo pquiab me rëb me lo zho:

—Dios, men ne nac Pxoze naa, ncuane gun me rieguialde to gacnan tow, mese nan dien pa dzew, dien pa horgaaw; sac mese nac men ne grieelo gūa. <sup>8</sup> Sinque to, zeene laa Espiritu Sant gneedz guielbiini lo to, hor co laa to yгаа poder ne rap me, laa to csilo gnee lo grë zha Jerusalén cho nac naa; tsie to dib xtan zha Judé, dib xtan zha Samar, ni lo grëragaa miech, tsienee tow.

<sup>9</sup> Blozhse sca bnee me lo zho, zowique zho lo me, dzega, dzega laa me bzoquia gbaa. Glaale ziequia me zeene znuse bdop tib xcow, laa me biongueetsse len xcow co, gon draa zho me. <sup>10</sup> Laa zho bii quiawique zhan gbaa zaatne gon zho biongueets me ga, tibaque zeene bdziñ chop mgui zaatne zo zho ga, dib nquitsbiese rna xab grop mgui co; <sup>11</sup> rëb me lo zho:

—¿Pe nacre squitaa quiawi to zhan gbaa? Zigne gon to i nagon zey me gbaa niina, squique quiet me gbaa gal dze ne laa me guiaad stib.

<sup>12</sup> Blozh ga dzigo laa zho wbi guic gui co (lëe Gui Oliv ga). Zhisaque bzë zho laa zho bdziñle Jerusalén, lalse ne rzë zho dze ne rdziiladz zho lo dziin. <sup>13</sup> Bdziñ zho za-

atne rbëz zho, biep zho len yu ne riaan glaa; sac len yu glaa co ga no zho. Ga rbëz Pedr, rbëz Ndrës, Jacob, Juan, Lip, Mazh, Bartol, Matew, ni Jacob ne nac xingan Alfë; Simón Zelot, ni Judas menlidz Jacob. <sup>14</sup> Grëse zho tibaque rcaalsa zho rzodiidznie zho Dios grë zho zha bets Jesús, xniaa me Marí, ni grëraa men wnaa ne nacgrë zho.

## Bzo zha ne gun dziin ne psaan Judas

<sup>15</sup> Tib dze pcaalsa maase tib gayoo gal zho, dzigo guso Pedr bnee me lo zho, rëb me:

<sup>16</sup> —Grëse to bets, grëse to bzian, golgacnan ganle, miñe been Judas zeene sca güeyto me Jesús, nole ne sca gaca. Lo Xtiidz Dios zhobneew, lëe miñ co pquiaa rey David zeene psiaab Espiritu Santa guic me. <sup>17</sup> Ye Judas gocgza no, ye me nac diidz niun dziin ne nodziun no niina.

<sup>18</sup> 'Ni nligaa laa ne niun me dziin co, lel been me guielntseeb pto me Jesús, ni blozh ga lëëque lo liu ne bziuu dimi ne bdiizh zho me ga, ga güeytsobe me bzob guic me lo liu, wbilgazh me, nëzrii nëzrec bliaal len me. <sup>19</sup> Miñ co nacre zeene laa grë zha Jerusalén gocnana, dzigo bleelë zho liu co "Liu Ren".

<sup>20</sup> 'Zigne rneque naa ga —rëb Pedr—, ible lo Xtiidz Dios sca zhobnee; ni lëe miñ co ga raquiet zaatne znu rnee:

Ible ziaandets lidz zho,

ni stib choot gbandraa zaatne bio zho.

Ni rneequew:

Zhaale zha ne guiaanne dziin ne no niun zho.

<sup>21</sup> 'Miñ co nagon, ible nonguiela so tib zha ne guiaan xlugar Judas, gacgza zho no guioxobnen no ne nli brieegan Jesús. Nana sca, lo grë zha ne nacgrë no psilo bzianie no me zeene pchoobnis Juan me, haxta gol dze ne laa me zey gbaa, lad co golgotsaa cue ne tib zha ne so gacgza no.

<sup>23</sup> Dzigo ble zho tib men ne lë José Barsabás (lëëque me ga rnee zho Just), ni stib men ne lë Matí.

<sup>24</sup> Blozh ga, bnab zho lo Dios, rëb zho:

—Dios, ndion no luu nac men ne rnabey no; ndion no luuse nac men ne runbey zdoo tib tib miech, gane niina laa no rnab lo luu, luu blu dien cho tib zha rii racladz luu so <sup>25</sup> gun dziin ne psaan Judas; sac laa Judas zeyle zaatne rieguial Judas.

<sup>26</sup> Blozhse bnab zho lo Dios, laa grop zha co bio rif. Nacre brieequia men ne lë Matí ga, dzigo dze cota laa me gocgza stsiptib zha poxtl co.

## Biaad Espíritu Sant

2 Zeeṅe goc gadz zmal gut Jesús, lëëtaque dze co runṅ grë zha Israel Ini ne rnee zho Pentecostés. Dze co grëse zha ne no xnëz Jesús, laa zho pcaalsa.

<sup>2</sup> Laa zho ndxie grë zho, tibaque zeeṅe bio tib bi nroob zhan gbaa, zig nac zeeṅe rriee tib medox, haxta leṅ yu ne ndxie zho ga pquiab; <sup>3</sup> ni brieequia nzian biini, rluw zig nac ludz miech, tibga tibga biini co blëz guic zho grëse zho. <sup>4</sup> Horco grëse zho pcaania guieḷbiini ne bdeed Espíritu Sant, psilo zho rnee zho grë xtiidz stib miech miṅe rsiabtaa me guic zho.

<sup>5</sup> Leṅ dze co nziandoo grë zha Israel ne no stib ladz beṅ bdziṅ Jerusalén, grë zha ne bii zianaḷ xley Dios.

<sup>6</sup> Laa zeeṅe bio bi co, ye zho no lad grë miech guizhiu ne bdopbe zaatne zob yu co; tib tib zho zeeṅe bin zho laa grë zha ne pcaania guieḷbiini co nonee xtiidz zho, per nli rzee zdoo zho. <sup>7</sup> Rlozhd gwi zho rnee zho:

—iPe nli diidz rii! ¿Zha rrieelo rnee grë zha qui xtiidz ne, ni led zha Galilé nac zho? iTib tib ne ndxie ne nu, zhaase zhaase diidz ne rnee ne! <sup>9</sup> Nu ndxie grë meṅ Part, meṅ Media, meṅ Elam, meṅ Mesopotam, meṅ Judé, meṅ Capadós, meṅ Pont, meṅ Asia, meṅ Frij, meṅ Panfil, meṅ Egipt, haxta grë meṅ ne ziaad nëz África, delant guiedz Ciren; grë meṅ Cret, meṅ Arab, grë zha Israel ne ziaad nëz Roma, grë meṅ Roma, zha ne zianaḷ zhiwseed zha Israel.

<sup>11</sup> Pe zhidaa ne —rnee zho—, ni diidz ne rneepaa ne tib tib ne laa ne nodzion rnee zha qui grëtaa milagr nroob ne runṅ Dios.

<sup>12</sup> Grëse zho per nli rzee zdoo zho, rdziieldraa zho zha guṅ zho, rnabdiidzlsa zho rnee zho:

—¿Bay pe i? iNcuaaṅe gard dziaṅ ne!

<sup>13</sup> Laa nogaa zho rzhidznie, rnee zho:

—Rzudz grë zha qui, gane squi rzë xtiidz zho.

## Bdeed Pedr tib lban

<sup>14</sup> Dzigo bzoli Pedr gza me stsiiptib zha ne nac poxtl ga, psilo me nguiedz bnee me lo grë miech ne ndxie ga, rëb me lo zho:

—Grëse to, zigtaa zha Jerusaléna, zigtagaa zha ne blanso Jerusalén nuw, goḷgona gaṅle. <sup>15</sup> No bla to quia-nee rëb to rzuudz no, per led rzuudzd no. Griiṅpaale name blan ngbidz, niicle niaca zha ne riepaa nziu, ni-acxe gooṅ nale laa zho gzudz. <sup>16</sup> Led rzuudzd no, sinque niina nagoṅ noyac grë miṅe bzeet Joel padzeela (tib meṅ ne biadteed xtiidz Dios), zeeṅe znu rëb me:

<sup>17</sup> Znu rnee Dios:

Zeeṅe wzhile runṅfalt gaḷ dze co, laa naa cxeḷ zhiEspíritu naa zdoo grëse miech;

grë xingan zhow, grë xindzoo zhow, laa zho cteed xtidz naa,

grë zha nguieg, nzian grë ncuaaṅe glulo lo zho, grë meṅgol, nzian grë ncuaaṅe glu mcaaḷ lo me.

<sup>18</sup> Leṅ dze co,

grëse zha ne nguzobdiidz lo naa,

niicle mguiw, niicle wnaaw laa naa cxeḷ zhiEspíritu naa zdoo zho,

dzigo grëse zho cteed xtidz naa.

<sup>19</sup> Nzian grë ncuaaṅe gzee zdoo to glu naa zhan gbaa, scaque lo guidzliu, zaṅ to ren, zaṅ to bel, zaṅ to grë goxdoo.

<sup>20</sup> Zeeṅe zhile gdziṅ dze ne guiaad meṅ ne rnabey ne, laa lo ngbidz ycow, laa mëë gna nizhnie zig rna ren.

Dze ne guiaad me ga,

dze co gac tib dze ne mazdraa nroob, tib dze ne mazdraa ndzon.

<sup>21</sup> Grëse zha ne dib zdoo gnab lo Dios yquia zdoo me zho,

grëse zha co scaania me zho.

<sup>22</sup> iGrëse to, goḷquiaadiaga sca gaṅle! Led naṅwen to gaṅle Dios pxeeḷ Jesús, meṅ Nazaret ne biaad lo guidzliu rii, Dios bnabey beṅ me grë milagr nroob, beṅ me grë ncuaaṅe bzee zdoo to; ga blu gaṅle ne nli Dios nacnie me. <sup>23</sup> Laa zeeṅe laa Dios bdeed diidz biab me ladznia to (sac ible xtiidzle Dios naca, naṅle me zha nac ne sca ted Jesús), laa to bnaaz me, bzobdoo to me, bnabey to gut me. Led to goṅ bloo me ladznia grë zha ntseeb ne sca psacsi me pquiaa zho me lo cruz. <sup>24</sup> Per bleeban Dios me, psilaa Dios me ladznia guieḷgut; sac lëbd guieḷgut ne lëw gnabey lo me.

<sup>25</sup> Zeeṅe bzeet David Jesús, znu rëb me:

Meṅ ne rnabey naa, raṅ naa tibaque quianap me naa; tibaque zo me cue naa nëz derech, ¿pe nac nadien ne lega pe gac naa?

<sup>26</sup> Gacxe waa, nley no zdoo naa,

niicle ludz naaw, rleya rooḷnie naa me.

Ni gane tibliladz rac naa;

<sup>27</sup> sac naṅ naa niicle guet naa,

ib csaand me guiaaṅ naa leṅ baa,

ib gdeete me diidz xiṅ xpëel naa.

Naa nac tib ngundziin lo me, ni rleynie me naa.

<sup>28</sup> Me blu lo naa zha grieelo ygaa naa guieḷmban,

ni tib guieḷbley nroob ne ygaa naa zeeṅe laa naa gdzi-ṅ lo me.

<sup>29</sup> Bets, bzian, to ne nac to meṅladz naa, goḷgona gaṅle: led miṅe bdeete pxozgol ne David bnee me nu;

sac goṅ, zeeṅe gut me güey zho güeyqueets zho me, ni haxta lo nadze laa xpaa me bii niaa. <sup>30</sup> Sinque miṅe bdeed Jesús ga bzeet me, sac goṅ tib zha ne biadteed xtiidz Dios goc me. Gocnaṅle me ne lo xtii me grieequia Meṅ ne nacle diidz ga cxeḷ Dios, ni meṅ co sob gnabey zigne bnabey me; sac scale rëb Dios lo me, ni haxta bzeet Dios lë Dios parne glu ne yquidied me.

<sup>31</sup> Dzigo zig nac zeeṅe raṅle me grëtaa miṅe ted Jesús, nacne bzeet me ne ib zrieaban Jesús, rëb me guiaaṅd xcuerp Jesús zaatne rbëz grëraa meṅgut, niicle xindgaaw.

<sup>32</sup> Jesús ga goṅ bzeet me, sac zig nac Jesús grop lo no bdioṅ no bleeaban Dios me, <sup>33</sup> ni niina gbaa zob me cue Dios nëz derech, sac me nac meṅ rnabey. Ni zigne nacle xtiidz Dios meṅ ne nac Pxoṅ me, laa me pxeeḷ Espíritu Sant lo no; ni niina grëse ncuaaṅe noyaṅ tow, grëse ncuaaṅe noyongaa tow, xtsiṅ Espíritu Santow.

<sup>34</sup> Laa naa rbire rne lo to stib ganle, led miñe bdele David ga bzeet David; sac gon, zeene gut David guëysobd David gbaa. Davitaque goc zha ne znu rëb: Rëb Dios lo meñ ndzon ne rnabey naa:

“Cue naa nëz derech, nu bzob,

<sup>35</sup> nieeda lozh gnaz naa grëse zha ne rlëë lo luu, csañ naa zho lадznia luu.”

<sup>36</sup> Grëse to meñ wladz, golgona sca ganle: Jesús gon, meñ ne pqiiaa to lo cruz ga, lëë meñ co nac meñ ne rnabey. Dios bzo me, ni Dios pxeel me biaad me lo guidzliu.

<sup>37</sup> Zeene bin grë miech ne ndxie ga sca bnee Pedr, biab guieñne zho, psilo zho rnabdiidz zho lo Pedr ni lo grëraa zha ne nacgza Pedr ga, rëb zho:

—Bets, nana, ¿pe nac ncuaaņe dziuñ no?

<sup>38</sup> Dzigo rëb Pedr lo zho:

—Tib tib to, golsaan xquieñntseeb to, golbig lo Dios, ni none chobnis to zeena guiaaņmbe to lo xtol to; sca-gaa ible xxeel Dios Espiritu Sant gacnie to. <sup>39</sup> Sac psañle Jesús diidz ne ible sxeel me Espiritu Sant gacnie grëse zha ne cuedz me sëëb xnëz me; zigtaa tow, zig-taa xpëed tow, zigtagaa grëraa meñzita.

<sup>40</sup> Nzianraa grë ncuaaņe bzodiidz Pedr lo zho, ni pso me diidz lo zho csaan zho grëtaa guieñntseeb ne run miech lo guidzliu rii. <sup>41</sup> Lo grë zha ne bzoobdiag grë miñe pseed me zho dze co, rgaazho maase tson mil; blozh ga, grëse zho brobnis, laa zho gocgrë grë zha ne riladzle Jesús ga.

### Niowse mban zho

<sup>42</sup> Grëse zha ne riladz Jesús ga, dib zdoo zho zienal zho grë miñe rseed grë zha poxtl co zho, tibaque rcaal-sa zho rzodiidznie zho Dios, ni row zho quietxtil zigne psañse Jesús diidz gon zho. <sup>43</sup> Grëraa zha ne zo stib lad, rdzieb zho; laa grë zha poxtl co, nzian grë milagr nroob ne run zho.

<sup>44</sup> Tipse rnee zho, rdeedlsa zho ncuaaņe rquiin zha ne nacgrë zho; zha ne quianie liu, tel pe grëragaa ncuaaņe quianie zho, haxta rto zhow, dzigo rguiz zho dimi co lo grë zha ne guieñd pe yquiin.

<sup>46</sup> Gzataa dze rcaalsa zho len yadoo; rlozh ga, rcaal-saque zho lidz grë zha ne nacgrë zho row zho quietxtil zigne psañ Jesús diidz ga; iñe nley, iñe ndooladz rbe zho grë zho rquiin zho guieñwagw ne runlo zho, <sup>47</sup> ni rley zho roolnie zho Dios. Grëse miecha, rley zho ran zho sca niowse mban zho; ni zigse zie dzew, scase scase laa Dios rbedzraa grë zha ne rzëëb xnëz Jesús, laa zho racnzianraa.

### Biac tib meñ ne në ni

**3** Tib dze zig rbixwe ngbidza, brieed Pedr grop Juan zie zho yadoo nroob ne zob Jerusalén, sac lëë hor co nac horne rie zho yadoo riezodiidznie zho Dios.

<sup>2</sup> Gax ro yadoo co quia tib puert rnee zho Puert Nd-zon, ga rzob tib zhey gol ib gacd së, sac nële ni me zeene gol me. Gzobse dze, rie zha ne riezooob me ga rnab me gon lo grë zha ne rzëëb yadoo. <sup>3</sup> Laa dze co,

zeene gon me laa Pedr grop Juan zieded ga ne laa zho sëëb yadoo, zëëb nia me rnab me gon lo zho. <sup>4</sup> Dze rwi zho lo me, tibaque rëb Pedr:

—Lo no bui.

<sup>5</sup> Dzigo blis lo me bui me lo zho, nañ me bod no pe dimi ne gdeed zho lo me. <sup>6</sup> Wbiire bnee Pedr lo me, rëb Pedr:

—Quianied naa dimi ygad naa lo luu. Ncuaaņe grielose gnedz naa, laaw gnedz naa niina, jniapse por Jesús (meñ Nazaret), laa naa rnab lo luu, niinagazh gu-so i zeen bzëni!

<sup>7</sup> Dzigo bzheñ Pedr nia derech me bliso Pedr me, hor cogazh laa grop ni me ga bdaan, <sup>8</sup> laa me psilo bzë. Rley me laa me bzëëb len yadoo gza me zho, lo guieñb-ley co haxta rias me, ni roolnie me Dios.

<sup>9</sup> Grë miech ne no len yadoo, zeene gon zho laa me rzële, ni scataa rley me roolnie me Dios, <sup>10</sup> bzee zdoo zho; sac runbey zho me, nañpaa zho rzëd me glo, tibaque ran zho me rzob me zaatne quia Puert Ndzon ga rnab me gon.

<sup>11</sup> Zeene laa Pedr grop Juan brieed len yadoo nroob co, yeque me nal zhits zho ib rsaand me zho, laa zho bdziñ stib nëz cho yadoo co zaatne quia tib nsaap nroob ne rnee zho zhiNsaap Salomón. Nalaque grë miech co, rlozhd gwi zho, rlozhd gzee zdoo zho. <sup>12</sup> Dzig rëbchaa Pedr lo zho:

—¿Pe rac to? ¿Pe nacne squitaa rzee zdoo to, squitaa rwi to lo no, zig nac zeene no bdziuñguiac meñ rii, zig nac zeene por nguzobdiidz no lo Dios gane brieelo psëë no me? <sup>13</sup> Golgacnañ ganle led scada; sinque Dios meñ ne bliladz Abraham, meñ ne bliladz Isaac, meñ ne bliladz Jacob, meñ ne bliladz grëraa xmengol ne, meñ co blu lo to niina ne nli meñ nroob nac Xpëed me Jesús. Lëë Jesús co ga gon bnaaz to, bloo to me ladznia zhiwxtis ne, ni zeene gocladz Pilat nsilaa Pilat me, pe li-aadz to ndeed to diidz. <sup>14</sup> Bdeete to diidz nlaa meñ ne nac meñ ndzon, meñ ne peet xtol; lel bnab to blaa tib zha ntseeb ne nzëëb ngutoo. <sup>15</sup> Laa me, pqiiaa to haxta beet to me, ni me nac meñ ne rdeed guieñmban. Per bleeban Dios me, ni mban me niina; sac grop lo no bdziñ no me.

<sup>16</sup> Ni niina meñ ne ran to biac nu, niapse por Jesús biac me; led runbeyle to me nañle to ganle rzëd me glo. Ne dib zdoo no riladz no Jesús, gane brieelo bnab no beenguiac Jesús me.

<sup>17</sup> Grëse to bets, ne nac to menladz naa, rgobey naa niicle to ni niiclegaa grë zha ne nac zhiwxtis ne, lega laa to bnabeyse bgaa Jesús beet to me, niicle to bien-daque dieñ pe nacne sca beñ to. <sup>18</sup> Laa Dios bneedz diidz beñ to grë guieñntseeb co, sac sca goc grëse miñe bzeet grë zha ne biadteed xtiidz Dios padzeela, zeene bzeet zho zha nac grë guieñne ne ted Jesús, Men ne nacle diidz cxeel Dios guiaad lo guidzliu.

<sup>19</sup> Dol nroob ga gon beñ to, gacxe nana gon waa golsaan xquieñntseeb to, golbig lo Dios; zeena csañmbe me to lo xtol to. Me gneedz guieñbley lo to stib, <sup>20</sup> ni zbiire cxeel me Jesús lo to stib, guiaadsilaa me to. <sup>21</sup> Gbaa no me niina, ni ga cuëz me nieeda gal



dze ne laa Dios blozh bnabey goc grëse ncuaaṅe none gac, zigne bzeetse grë zha ne pxeel me padzeela, biadteed xtiidz me. <sup>22</sup> Zig nac Moisés bzeet me laa Jesús guiaad, rëb me lo grë pxoz gol ne: "Dios meṅ ne rnabey ne, ible znabey me ne lo xtii to grieequia tib meṅ ne gac zig nac naa lo to niina. Zeṅe laa me guiaad, golgon xtiidz me; <sup>23</sup> sac zha ne gond xtiidz me, ib ted-sod znitlo zho." <sup>24</sup> Scaque Samuel, ni grëraa zha ne biadteed xtiidz me, grëse zho bzeetle zho grë ncuaaṅe noyac leṅ dze rii.

<sup>25</sup> Grëse to, xmengol to nac grë zha co, ye to ga rëb Dios guṅlay me zeṅe znu biaan me diidz grop me Abraham, rëb me: "Niapse por tib meṅ ne grieequia lo xtii luu, laa naa guṅlay grëse miech ne ndxie gdibdoose lo guidzliu." <sup>26</sup> Ni niina ne laa Dios bleeban Jesús, gloque lo to pxeel me me, guṅlay me to, zeṅa csaan to xquieṅtseeb to.

### Güeyzo zho zho lo wxtis

**4** Laa Pedr grop Juan bii noneeque lo grë miech co, zeṅe laa bla zha ne nac pxoz bdziṅ ga, bdziṅnie zho tib zha non ne quianap yadoo co ni zla zha ne nac grë zha saducé. <sup>2</sup> Zigne bdziṅ zho bnaaz zho Pedr grop Juan, güeysëeb zho zho ladzguib; ni ne bdzele dzew, ga biaan zho dipse guieel co. Rlëë grë zha co, sacne laa Pedr grop Juan quianee lo grë miech co zha bleeban Dios Jesús; ni rnee zho grëse mengut, scaque grieeban zho.

<sup>4</sup> Niicle ne scataa rlëë grë zha rnabey co, per nzian zha ne ndxie ga bliladz Jesús; zig gaay mil rgaa lox- aque zha bgui.

<sup>5</sup> Zeṅe biini liu co, grëse zha non, grëse zha ne rnabey lo menguedz, laa zho pcaalsa. <sup>6</sup> Ga bdziṅ Anás meṅ ne nac pxoz nroob ne rnabey, ga bdziṅ Caifás, bdziṅ Juan, bdziṅ Lejandr ni grë zha ne nac menlidz pxoz ne rnabey ga. <sup>7</sup> Dzigo bnabey zho gocredz Pedr grop Juan, bzo zho zho glowtaa, bnabdiidz zho lo zho, rëb zho:

—Goṅnë nadien, ḷcho rnabey to, cho pxeel to ne squi no to?

<sup>8</sup> Horco laa Espíritu Sant bdeed guieṅbiini lo Pedr, pquiab Pedr rëb Pedr lo zho:

—Grëse to ne nac to zha ne rnabey lo menguedz, grëse to ne nac to zha gol ne non xtiidz. <sup>9</sup> Telne miṅe rliquis to nac ne dien zha bdziuuṅ no meṅ rii ne laa ni me biac, <sup>10</sup> goṅsiguieṅ goṅquiaadiaga ganle, zeṅa gacnaṅ tow ni gacnaṅ grëragaa menguedza. Jesús goṅ, meṅ Nazaret ne bnabey to gut lo cruz ga, meṅ ne bleeban Dios ga, meṅ co beṅguiac meṅ rii; ni laa to rangaa me laa me zo lo ne nu. <sup>11</sup> Lëë Jesús ga raquiet lo Xtiidz Dios zaatne znu rnee: "Quie ne psëëb zha ne nozaa yu, ni naṅd zho lëëpaa quie co nac miṅe rnazdziits yu." Ni scapaa nagon bzhaac to me. <sup>12</sup> Loxaque me zrieelo csilaa ne lo xtoṅ ne, sac bzodraa Dios cho stib zha ne niaad lo guidzliu niadsilaa miech.

<sup>13</sup> Zeṅe goṅ grë zha wxtis co, scataa peet dzeb nod lo Pedr grop Juan, bzee zdoo zho; sac ruṅbey zho Pedr, ruṅbey zho Juan, nacd zho cho zha ne güey wseed

nroob. Ga goṅ zho, pa lotaa guieṅbiini ne bgaa Pedr grop Juan ne bzënie zho Jesús.

<sup>14</sup> Peet brieelod nliquis grë zha co, sac nligaa laa meṅ ne biac ga zo lo zho ga. <sup>15</sup> Dzigo mazd bnabey zho brieed Pedr ley grop me Juan; laa zho biaan bzodiidz zho dien zha guṅ zho zho, <sup>16</sup> sac rien zho tib milagr nroob ga sca biac ni meṅ co; niicle ne racladz zho yqueets zhow, per grële menguedz bina. <sup>17</sup> Nacne biaan zho diidz, ctseb zho zho gbiiredraa zho cseed zho miech zhiwseed Jesús; zeṅa lozhd gacnaṅ grëraa miech zha biac meṅ co.

<sup>18</sup> Dzigo bredz zho Pedr stib, grop me Juan, goctox zho lo zho.

—Laa no rso diidz lo to goṅ —rëb zho—, gbiiredraa to cseed to miech zhiwseed meṅ ne rnee to Jesús ga.

<sup>19</sup> Pquiab Pedr grop Juan, rëb zho:

—Zha dien rzac to, ḷpe nonguieṅa ga laa ne dziuuṅ no miṅe rnabey Dios, leṅ miṅe rnee to i dziuuṅ no?

<sup>20</sup> Grieelod goṅ dziuuṅ no miṅe rnee to i, sac grëse ncuaaṅe bdziṅ no, grëse ncuaaṅe bdziṅgaa no ib none gnee now, zeṅa gacnaṅ grëse miecha.

<sup>21</sup> Dzigo wbiire grë zha rnabey co, ntseeb rac zho lo zho pso zho diidz cseetraade zho miech; blozhse ga laa zho psilaa zho. Bdeetew diidz nsacsi zho zho, sac ndal miech ne rlynie Dios, rdeed zho xquizh lo me ne beṅ me milagr <sup>22</sup> beṅguiac me meṅ co, ni choole iz rac sca gacd së me.

### Bnab zho lo Dios

<sup>23</sup> Zeṅe laa Pedr grop Juan bdziṅ lo grë zha ne nac grë zho, bzodiidz zho grëse tel zha rëb grë zha rnabey co, zha rëb pxoz non co. <sup>24</sup> Grë zha ne nacgrë zho ga, zeṅe bin zhow grëse zho psilo zho bnab zho lo Dios, rëb zho:

—Dios, luu nac meṅ ro ne rnabey grëtaa ncuaaṅe no, luu bzaa gbaa, luu bzaa guidzliu, luu bzaa nisdoo, luu bzaa grëraa ncuaaṅe no. <sup>25</sup> Padzeela zeṅe bdeed Espíritu Sant guieṅbiini lo pxozgol no David, meṅ ne beṅ xtsiṅ luu hor co; znu bnee me:

ḷPe nacne squitaa rac grë miech ne nacd zha Israel rlëënie zho Dios?

Racladz zho guṅ zho ncuaaṅe ni grieelod lo zho.

<sup>26</sup> Grëse zha non ne rnabey grë guiedz,

tipse rac zho laa zho ractseeb lo Dios rlëënie zho me,

ni rlëënie zho meṅ ne bzooblo me pxeel me lo guidzliu.

<sup>27</sup> Ni nligaa na scase goca. Guiedz Jerusalén nu, nu bиаad rey Herod, bиаad Pons Pilat, pcaalsa zho grë zho menladz no ni grë menzit, tipse bnediidz zho psacsi zho Jesús, meṅ ndzon ne bzooblo luu pxeel luu bi-aadguṅ xtsiṅ luu lo guidzliu nu. <sup>28</sup> Grëse zigne psanle luu diidz, scase beṅ zho. <sup>29</sup> Ni scaque niina, bui ganle zha racladz zho ctseb zho no parne peet gneedraa no; luu nac meṅ ne gocniēn no ne nac no zha ne rdziuuṅ xtsiṅ luu, zeṅa gdzieebd no cseed no miech xtiidz luu. <sup>30</sup> Laa no rnab lo luu, beṅguiac grë meṅ rzacnë, beṅ grë milagr nroob, blu grë ncuaaṅe gzee zdoo

miech; zeena gañ zho ganle meñ nroob, meñ ndzon nac Xpëed luu Jesús.

<sup>31</sup> Zeene blozh bzodiidznie zho Dios, masaque bzhidz zaatne ndxie zho ga; hor co grëse zho laa zho bgaaraa guie|biini ne bdeed Espíritu Sant lo zho; peet rdzieb-draa zho laa zho zieseed miech Xtiidz Dios.

<sup>32</sup> Leñ dze co, grëse zha ne rliiladzle Jesús ga, tibaque nac zho, tibaque rnee zho, tibaque nac miñe zienie guic zho. Nod zha ne guiab lose zho yquiin ncuaañe rap zho; sinque grëse ncuaañe quianie zho chen grë zho naca. <sup>33</sup> Grë zha poxtl co, zeene rseed zho miech zha brieaban Jesús, nzian zha ne rliiladz me; r|lupaa ne Dios nacie zho.

<sup>34</sup> Ne nligaa tipse nac zho grë zho, nod zha ne guiab ne guiend pe yquiin, sac grëse zha ne quianie liu, zha ne quianie nzian yu, rto zhow dzigo rdeed zho dimi co rguiz grë zha poxtla lo zha ne rquiina. <sup>36</sup> Sca been tib meñ ne nacgrë zho lë José. (Zha xtii Leví nac me, gol me tib lo guidzliu win ne no lo nisdoo lë Chipr; zha poxtl-le bleelë me Bernabé. Bernabé, nac zig nac ne rnee ne: Zha ne rchoobladz zdoo miech.) <sup>37</sup> Pto me tib lë liuñ me, dzigo bdeed me dimi co lo zha poxtl, bdiiz zhow.

### Znu bzhaac Ananí grop Safir

**5** Tib mgui lë Ananí, laa tsiel me lë Safir; ye me pto tib lë liuñ me. Goñlo tsiel me, tel palal dimi ne bdo liu co, bzhennga me zhis. Zeene laa me ziesañ miñe biaan ga, lo poxtl, rëb me lëe grë dimi ne bdo liuñ me ga. <sup>3</sup> Dzigo rëbcha Pedr lo me:

—Ananí, ¿pe nacne bdeed luu diidz bzëëb menodox zdoo luu? Menodox i goñ noquiil luu nañ luu yquidiee luu Espíritu Sant, rnee luu lëe grë dimi ne bdo liuñ luu nu. <sup>4</sup> Bien ganle chen luu liu co. Dimi ne bdiizh zhow, chen luuw, niac niuñ luuw zigne niac|adztaa luu, ¿pe nac dzigo ne racladz luu yquidiee luu? Goñ ganle led nod noquidiee luu, Dios i gocladz luu nquidiee luu.

<sup>5</sup> Loxaque sca bin Ananí bnee Pedr, znuse biab Ananí liu, gagazh gut Ananí. Grëse miech ne bina, bdzieb zho. <sup>6</sup> Dzigo güey bla zha nguieg pchel zho ngutoo co lar, blis zho me ga laa zho ziequeets me.

<sup>7</sup> Wdzeelaaque goca zeene laa tsiel me bdziñ, ni lalnu güeynied guic me ne laa tsiel me gutle. <sup>8</sup> Bnabdiidzaque Pedr lo me, rëb Pedr:

—Bnë dien, ¿pe nli lëe grë dimi ne bdo liuñ to nu? Pquiab wnaa co, rëb me:

—Nliw, lalgui pto now.

<sup>9</sup> —¿Pa brieer pensar qui lo to grop tsiel to? —rëb Pedr—. Ne squi tipse bnee to nañ to yquidiee to Espíritu Sant; do| nroob i goñ been to lo Dios. Laa zha ne güeyqueets tsiel luu blansole ro yu nu, ni niina goñ laa zho güeyaque luu.

<sup>10</sup> Diidz co blozh brieer ro Pedr, znuse biab wnaa co liu, guchedraa me ga. Zeene laa gza zha nguieg co bzëëb leñ yu, laa me nixle ga; goñ zho gutle me, dzigo blis zho me güey zho güeyqueets zho me cue xpaat tsiel me. <sup>11</sup> Grëse zha ne goñ sca goc meñ co grop

me, zha ne bingaaw, zigtaa zha ne rliiladz Jesús a zigtagaa grëraa miecha, per nli bdzieb zho.

<sup>12</sup> Grë zha poxtl co, tibaque rcaalsa zho tib lo nsaap ne quia cho yadoo ga rnee zho zhiNsaap Salomón; nzian grë milagr ne rdeed Dios diidz ruñ zho. <sup>13</sup> Grëse miech ne rcaalsa ga, rleynie zho grë zha poxtl co, nzian zho rliiladz miñe rseed zho, per rbigd zho gacgrë zho zho.

<sup>14</sup> Zigse zie dze, scase racndalraa miech ne rzëëb xnëz Jesús, mguisaque wnaasaque laa zho rliiladz me dib zdoo zho. <sup>15</sup> Zhoob diidz scataa milagr ne ruñ grë zha poxtl co. Dzigo psilo miech rbee zho grë meñ rzacnë, rguix zho me ro nëz, no me zhoobse lo xlon me, no me zhoob lo yag ne ney zho me; rquiambëz zho maase zhimlëse Pedr guiab lad grë meñ co zeene laa Pedr ted. <sup>16</sup> Haxta grë guiedz win ne ndxie gax Jerusalén ga, rrieer grë miech rdziñnie zho grë meñ rzacnë, no grë meñ co noguitnie menodox; grëse zho ruñguic zha poxtl co zho.

### Bio grë zha poxtl ladzguiib

<sup>17</sup> Zeene goñ meñ ne nac pxoz nroob ne rnabey, ni grë zha saducé, scataa racnie miech grë zha poxtl co, per nli blëe zho, <sup>18</sup> bnabey zho bgaa zho psëëb zho zho ladzguiib stib. <sup>19</sup> Pcow liu co, guieela bdziñ tib xanj| Dios pxal me ro ladzguiib, blee me zho ga; dzigo rëb me lo zho:

<sup>20</sup> —Go|tsie leñ yadoo, grëse miech ne ndxie ga go|nee lo zho, zeena gacnañ zho zha ygaa zho guie|m-ban ndzon ne nodeed Dios niina.

<sup>21</sup> Biinigazh liu, silgaw laa zho bdziñle leñ yadoo; psilo zho laa zho noseed grëse miech ne ndxie ga.

Laga laa zho noseed miech leñ yadoo, laa meñ ne nac pxoz nroob ga, grë me zha ne nacie me, bnabey zho ycaalsa zha ne nac wxtis ni grë zha non lo mennguedz.

Zeene laa grë zha co pcaalsa, dzigo pxeel zho zha ne ziebee grë zha poxtl co ladzguiib. <sup>22</sup> Bdziñ zho ro ladzguiib, ni tib choot guiend leñ co; rzhitsaque wbire zho güeynie zho diidz, <sup>23</sup> rëb zho:

—¡Choot guiend leñ ladzguiib! Dziits niooga bdziñ no, ga zo zha ne quianap; per zeene bzhiäl ro ladzguiib bziaab no, bdziñ no choot guiend leñ co.

<sup>24</sup> Grë pxoz ne rnabey, ni meñ ne zo lo mennguiib ne rquianap yadoo, zeene bin zhow, rdzieldraa zho zha guñ zho. <sup>25</sup> Lëëtaaque sca no zho, zeene bdziñ tib zho rëb:

—Zha ne goñ bloo to ladzguiib ga, laa zho nolaque leñ yadoo noseed zho miech.

<sup>26</sup> Lëälëd brieer meñ ne zo lo grë mennguiib ne rquianap yadoo, brieenie me bla xaguiib me, güey zho niapse wen diidz güeyxi zho zha poxtl co leñ yadoo; sac rdzieb zho ngoquie grë miech co zho. <sup>27</sup> Zeene bdziñnie zho zho lo grë zha wxtis co, dzigo rëb meñ ne nac pxoz nroob ga lo zho:

<sup>28</sup> —¿Pe nacne ronde to diidz? Led pso no diidz lo to csetraade to miech zhiwseed mgui ne nac Jesús ga.

Ni na goṇ dible lad guiedz nu nozhoobneṇ zhiwseed to i, haxta rcaadzdoḷ to no ne no bdziut me.

<sup>29</sup> Dzigo pquiab Pedr rëb Pedr:

—Rdzion no miṇe rnabey samiech no, per glo none dziuun no miṇe rnabey Dios no. <sup>30</sup> Meṇ co bliladz grë pxozgol ne, ni meṇ co goṇ bleeban Jesús, meṇ ne sca psaci to beet to lo cruz. <sup>31</sup> Ni meque zeynie Jesús gbaa, bzoob me Jesús cue me nëz derech; sac Jesús nac meṇ ne rnabey, meṇ ne rsilaa miech lo doḷ. Ni Jesús goṇ, gdeed guieḷbiini lo grëse meṇ Israel gbiire gbig zho lo Dios stib; zeeṇa guṇquizhd me zho xtoḷ zho.

<sup>32</sup> Miṇe rnee no lo to nu diidzliw, nozhal bdzionṇa, ni led loxaque nodsegaa; sinque ye Espíritu Sant meṇ ne rxeel Dios racnieṇ grë zha ne ron xtiidz me, ye meṇ co quianee gaṇle ne nliw.

<sup>33</sup> Zeeṇe bin zho sca rëb Pedr, blëëye zho, rzac zho tebaa gagazh gut zho gza zha poxtl co.

<sup>34</sup> Lad zha wxtis co no tib zha farisé lë Gamaliel, ye me rseed miech Xley Dios, tib zha non nac me lo menṅuiedz; dzigo guso me bnabey me brieë grë zha poxtl co nëz ley, <sup>35</sup> bnee me lo grëraa zha ne ndxie ga, rëb me:

—Grëse to menṅuiedz, laa naa rso diidz lo to, goḷcobey goṇ dieṇ pe guṇ to zha qui. Goḷguieṇ gaṇle, nonguieḷda ne lega miṇe gacladztaa to guṇ to zho.

<sup>36</sup> Goḷsoladz gaṇle, padzeela squi bio tib meṇ ne brieelë Teudas, rëb me laa me niac tib zha ne nabey, ndal zha ne wbig lo me, goclo zho zig tap gayoo. Ni pasë me nabey, zeeṇe laa me gut nëzrii nëzrec bliaal grë zha ne gocnie me ga. <sup>37</sup> Laa leṇ iz ne nodop lë miech, scaque brieëquia tib meṇ Galilé brieelë Judas. Ndal zha ne gocnie me, per zeeṇe laa me gut scasaque nëzrii, nëzrec bliaal grë zha ne gocnie me; brieelodaque pe niuṇ me. <sup>38</sup> Gane nagoṇ rne naa lo to, mazd peet guṇde to zha qui, goḷsaan zho squise goḷsilaa zho. Tsow glu teḷne guicse miech biab wseed ne ziaadnie zho i, zdziṇ dze ne nitlow. <sup>39</sup> Laa teḷne nligaa Dios rsiaab guic zho squi rseed zho miech, niacxe zleb to gnitlo to wseed ne ziaadnie zho. ¡Teḷne guiab to gnitlo tow, naṇde to nend Dios ga tiḷnie to!

<sup>40</sup> Grëse zha wxtis co bzoobdiag zho xtiidz Gamaliel, bieṇ zho ne scataa nonguieḷ gaca. Dzigo biire bredz zho grë zha poxtl co, bdiṇ zho zho, ni biire pso zho didz lo zho gbiiredraa zho cseed zho miech zhiwseed Jesús. Blozhse ga, dzigo laa zho psilaa zho.

<sup>41</sup> Zeeṇe laa zho wbi ga, rley zho por grëtaa miṇe pteed grë zha non co zho loxaque ne rliladz zho Jesús.

<sup>42</sup> Ib psaaṇd zho zhiwseed Jesús, gzobse dze rie zho yadoo ni rieque zho stib yu stib yu, rnee zho lo miech ne nli lëë Meṇ ne zëëble diidz cxeel Dios lo guidzliu ga nac Jesús.

### Bzo gadz zha ne guṇ xyudar poxtl

**6** Ni ne leṇ dze co quiayac nzianraa miech ne rzëëb xnëz Jesús, dzigo psilo grë zha Gres rlisqui zho, rnee zho rdiooṇd grë wnaa viud ne nac zha ladz zho

zaacse; zeeṇe rgaaz ncuaaṇe row zho, rgaad zho lal miṇe rgaaz grë wnaa viud ne nac zha Israel.

<sup>2</sup> Dzigo nacre bredz gza tsiipchop poxtl co grëse zha ne nole xnëz Jesús ga, bnee zho lo zho rëb zho:

—Gacnaṇ to gaṇle, grielodraa ne noque so dzian no dieṇ zha ygaaz ncuaaṇe yquiiṇ to, sac goṇ nonguieḷda csaan no miṇe nac xtsiṇ no, ib none guioseedraa no miech Xtiidz Dios. <sup>3</sup> Miṇ co nagon, mazd goḷzo gadz zha bgui ne guṇ dziin co, lëëraasi goḷguieṇ cho gzo to; goḷguib zha ne ndzinli, zha ne nixbiini, zha ne nacie Espíritu Sant; <sup>4</sup> zeeṇa sca guiob lo no gzodiidznie no Dios, gnab no lo me, ni cseed no grëraa miech Xtiidz me.

<sup>5</sup> Grëse zho rëb, wen sca gaca. Horcogazh psilo zho ble zho zha ne so guṇ dziin co. Bzo zho tib meṇ lë Lip, tib meṇ lë Prócoro, tib meṇ lë Nicanor, tib meṇ lë Timon, tib meṇ lë Parmen, tib meṇ lë Xteb, rlupaa dib zdoe me rliladz me Dios ni nacie Espíritu Sant me; ni tib meṇ Antioquí lë Nic, mazd glo Nic goc tib zha ne bleyniedox grë zhiwseed zha Israel. <sup>6</sup> Dzigo güeynie zho gza zha co lo zha ne nac poxtl. Blozhse bnab poxtl lo Dios gacnieṇ me zho, dzigo pxobnia poxtl guic zho, bnab zho lo Dios gdeed me guieḷbiini lo zho.

<sup>7</sup> Zigse zie dze, laa Xtiidz Dios quiagaazraa dib Jerusalén. Nzian grë zha ne rzëëb xnëz Jesús, haxta grë meṇ ne nac pxoz, nzian zho laa zho bliladz me dib zdoe zho.

### Bnaaz zho Xteb

<sup>8</sup> Goc palal dzew, nzian grë milagr nroob ne ruṇ Xteb, sac tibaque sca dib zdoe me rliladz me Jesús, ni nacie Espíritu Sant me.

<sup>9</sup> Laa tib dze, brieëquia bla zha ne rie tib xyadoo win zha Israel, lë “Esclavos Libertados” gocladz zho ndiḷdiidznie zho Xteb. Brieëque zla zha Israel ne ziaad nëz Ciren, nëz Alejandrí, nëz Cilis, ni nëz Asia, ye zho gocgza zha co rlëë zho lo Xteb. <sup>10</sup> Goṇse zho rlëbd xtiidz zho lo Xteb, sac niapse Espíritu Sant rdeed guieḷbiini lo me, rien me pe rnee me lo zho; <sup>11</sup> dzigo bdiizh zho bla zha ne ptsieets diidz, pquidie zho rëb zho bin zho laa Xteb noneenë Moisés ni rneenë me Dios.

<sup>12</sup> Zeeṇe bin menṅuiedza, blëë zho; nacre bnabeyaque zha ne rnabey lo menṅuiedz bgaa Xteb güeyzo zho me lo wxtis. <sup>13</sup> Ni güeynie zho bla zha ne lega bnexuu, rëb zho:

—Nliw, rtsidiḷ mgui qui xyadoo ne, rtsidiḷ me xley ne.

<sup>14</sup> Bdzionpaa no goṇ quianee me laa Jesús meṇ Nazaret ne quizeet zho dib i ctsiḷ yadoo rii, ni ctsëë me ley ne psan Moisés lo xmeṅgol ne.

<sup>15</sup> Horco zeeṇe laa grë zha wxtis co ni grëraa zha ne ndxie ga bui lo Xteb, goṇ zho tib biini nroob ne riab lo me, masaque rlu me zig rlu tib xanjḷ Dios.

**7** Dzigo bnabdiidz meṇ ne nac pxoz nroob ga lo Xteb, rëb me:

—¿Bnë dieṇ pe nli quiayun luu grë ncuaaṇe rnee zho i?

<sup>2</sup> —Grëse to ne nac to meṇladz naa —rëb Xteb—, laa naa rzaac to zig bets naa, zig pxozgaa naa. Goḷsiguieḷ

golquiaadiag chop tson lan diidz ne gne naa lo to nu ganle: Padzeela, zeene bii no pxozgol ne Abraham dan ne lë Mesopotam, briequia Dios ndzon ne no gbaa lo me, rëb Dios<sup>3</sup> gree me ga, csañ me grë menlidz me, tsie me nëz ne glutaa Dios lo me.

<sup>4</sup>Nacne brie me xtan zha Caldé ga, bey me nëz Harán, ga wban me zhis. Laa zeene laa pxoz me gut, dzigo laa Dios biaadnie me nëz rii, zaatne mban ne nu niina. <sup>5</sup>Niicle ne laa me blanso lo liu rii, ni tib lë win zatne so ni me bdeete Dios lo me; per rëb Dios ib grë zha xpëed me guiaañniew. ¡Ni laa me quianied mëed len dze co! <sup>6</sup>Rëbgazh Dios lo me, ib zieban grë zha xpëed me ga ladz beñ dipse len tap gayoo iz, ga csacsi miech zho gunçun zho zho dziin. <sup>7</sup>“Per ib tedsod sacsi naa zha ne csacsi zho ga”, rëb Dios, “ni ga gree zho glanso zho nu, nu goolnie zho naa.”

<sup>8</sup>Ni parne glu ib zac miñe bnee Dios lo Abraham ga, dzigo psañ me diidz grëse mëedbgui ne griequia lo xtii Abraham none tso tib bey lad zho. Miñ co nagon, zeene laa xpëed me Isaac goc xon ngbidz, laa me bloo Isaac bey co. Scaque beñ Isaac xpëed me Jacob, ni scaque beñ Jacob gza tsiipchop zha ne goc xpëed Jacob; lëe gza tsiipchop zha co nagon goc pxozgol ne.

<sup>9</sup>Ziese pxozgol ne ga, blëenie zho bets zho zha ne lë José, pto zho José lo men ne zie wto nëz Egipt. Ni ne nacie Dios José, <sup>10</sup>psilaa me José lo grëtaa guieñë ne bded José, ni gocniñ me José beñbey rey Egipt José. Ib psaand me José, bdeed me guieñbiini lo José. Zeene gon rey co scataa men nixbiini nac José, dzigo bnabey me bzo José goc me tib men non ne bnabey dipse Egipt; haxta grë ncuaañ non ne no lidz rey, me bnabeya. <sup>11</sup>Lëëtaaque len iz ne nac me dziin, biaad tib gbin; dipse xtan zha Egipt, dipse xtan zha Canaán mban bded miech. Grë zha ne goc pxozgol ne ga, guieñdraa pe gow zho. <sup>12</sup>Laa zeene bin Jacob laa zhobxtil bii no Egipt, dzigo pxeel me zho güeyxi zho zhob ga.

<sup>13</sup>Zeene goc chop vult ziexi zho zhob Egipt, dzigo-  
raa gocnañ zho bets zho ga rnabey Egipt; niiclegaa rey cow, hor coraa beñbey me bets José. <sup>14</sup>Dzigo bnabey José güeyxi zho pxoz me Canaán, güeyxi zho tsiel zho, güeyxi zho xpëed zho. Lo grë zho rgaa zho tson-  
gañ tsiin, laa zho bdziñ Egipt.

<sup>15</sup>Sca nacne laa Jacob bey Egipt. Ga gut me, dzigo güeyqueets zho me Siquem, tib len baa ne bzhii Abraham lo Hamor; scaque grë xpëed me zha ne goc pxozgol ne ga, ga gut zho. <sup>17</sup>Grë zha ne briequia lo xtii zha gol co, zha ne na guiab ne nac menladz ne, ndal iz ne bio zho Egipt ga, ni ndaldoo goc zho. Laa zeene ziaadyob cuee Dios zho ga zigne rëble me lo Abraham glo, <sup>18</sup>laa men ne nac rey Egipt len dze co, psilo ptsidil zho; sac rsoladzdraa me grëtaa dziin ne beñ José lo menladz me. <sup>19</sup>Psacsi me zho, beñ me zho zigne go-cladztaa me, haxta bnabey me grëse mëedbgui ne ral ganndraa zho win parne guet win.

<sup>20</sup>Len dze copaa nagon gol Moisés, tib mëed niow nac win. Tson mëe bloolan xniaa win win, <sup>21</sup>laa zeene brieelodraa ngolan me win, dzigo güeysañ me win tib

ro guiubee Egipt, ga bdziel tib xindzoo rey win. Wnaa co gon win, biaan win lo me zig tib xpëed me; <sup>22</sup>haxta bioxco me grëse wseed ne rac zha Egipt, pseed win. Zeene laa win broob, tib men nixbiini goc win, niicle ne gnee wina, niicle ncuaañe gunçaa wina.

<sup>23</sup>Choo iz rap Moisés, zeene biab guic me güeyted me lo menladz me. <sup>24</sup>Dzigo gon me laa tib zha Egipt quiaquin tib zha Israel; nacne bzëëbaque me bla me zho, beet me zha Egipt co.

<sup>25</sup>Sca beñ Moisés, nañ me niñ grë zha Israel ne Dios bzo me gacnie me zho, csilaa Dios zho ladznia zha Egipt; per biend zho ne scaw. <sup>26</sup>Biini liu co, gon me laa chop zha Israel nodil, zie me nla me lo xtil zho, bnee me lo zho nongueid ga til zho, guieñ zho ganle menladzaque zho. <sup>27</sup>Dzigo biasaque tib zha ne no-  
quiaaw ga pcheep zho me, ntseeb rac zho rëb zho lo me: “¿Cho bzo luu guiaadnabey luu no, guiaadlisquigaa luu dieñ pe nodziuuñ no?” <sup>28</sup>¿Te racladz luu ye gutaque luu no zigne beet luu zha Egipt co nieeg?”

<sup>29</sup>Zeene bin Moisés sca rëb zha co, hor co bzhoon me bey me nëz xtan zha Madián. Nëz co ptsieelnia me, ga gop tsiel me chop mëedbgui.

<sup>30</sup>Choo iz goc no me nëz xtan zha Madián, tib dze no me cho gui Sinaí, tibaque zeene gon me laa tib anj zo grołtaa tib lo yag zarz, masaque rso bel lo yag co.

<sup>31</sup>Bzee zdoo me, lëëtaque laa me zie gbiggax me, zeene bin me tsi Dios rëb Dios lo me: <sup>32</sup>“Naa nac Dios ne bliladz pxozgol luu Abraham, pxozgol luu Isaac, pxozgol luu Jacob.”

Zeene bin Moisés tsi Dios, per nli bdzieb me; lo dzeb co per ni blisdraa me lo me nwi me. <sup>33</sup>Dzigo bnee Dios stib, rëb me lo me: “Blit lab luu, sac gax lo naa i zo luu.

<sup>34</sup>Laa dze nagon bdziñ ne laa naa csilaa grë zha Israel ladznia zha Egipt; sac ran naa zha nactaa grë guieñë ne noded zho ga, ron naa blactaa roon zho nosacsi zha co zho. Ni luu bzooblo naa tsiebee zho ga.”

<sup>35</sup>Dzigo laa Dios pxeel Moisés ziesilaa me zha Israel; niicle ne glo rëb zho lo me: “¿Cho bzo luu guiaadnabey luu no, guiaadlisquigaa luu dieñ pe nodziuuñ no?” Per me bzo Dios bnabey lo zho, blee me zho Egipt.

<sup>36</sup>Nzian grë milagr, nzian grë ncuaañe nroob ne gzee zdoo ne beñ Moisés blee me zho ga; zigtaa len guiedz Egiptow, zigtaa lo Nisdoo Nizhniew, zigtagaa grë dan bidz ne bio zho dipse len choo iz ne bzënie me zho ga.

<sup>37</sup>Moisés ga bzeet lo pxozgol ne, ne laa Dios gnabey lo xtii zho griequia tib men ne cxeel me guiadteed xtiidz me, zigne pxeel me Moisés.

<sup>38</sup>Zeene nonie Moisés zho grë dan bidz co, Anj ne bnee lo me guic gui Sinaí, me pteed xtiidz Anj co lo zho; me pcaania ley ne biaan lo ne ga, diidz ne rap guieñmban. <sup>39</sup>Per ib bind zho xtiidz me, leñ gocladz zho mbiire ney zho Egipt stib, <sup>40</sup>bnabey zho Aarón rëb zho: “Bzaa tib mdio tedner lo no gacniñ no laa no guioo Egipt stib; sac loxaque biadbee Moisés no ga, na choot nañ dieñ yo Moisés.”

<sup>41</sup> Dzigo bzaa zho tib ngon yeeṅ goc zhimdio zho, haxta beet zho grè ma ne bloogon zho lo mdio co; bleynie zho ncuaaṅe bzaania zho. <sup>42</sup> Nacne wbiṅladz Dios, psaan me zho; psilo zho bleynie zho grè ncuaaṅe raṅ zho zhan gbaa. Been zho zigne bzeetse zha ne bi-adteed xtiidz me padzeela, zeeṅe rëb zho:

Goṅsoladz gaṅle,  
laa ne nleynie to naa dipse leṅ choo iz ne bio to grè dan bidz co,

laa ne niut ma ne ngogon to lo naa,  
<sup>43</sup> leṅ grè mdio ne bzaa to, mdio co bleynie to, lo mdio co pquiiṅsgzhib to.

Mdio ne rnee to Moloc,  
zaatne zieetaa to tibaque ney to lidza,  
zhmel mdio ne rnee to Renfán, pa csaan to ma.  
Miṅcocxe waa, laa naa cuee to ladz to,  
gzonëz naa to guey to grè dan ne riaan zitraa lo guiedz Babiloin.

<sup>44</sup> Leṅ dze ne sca bio pxozgol ne grè dan bidz co, tib yu larse goc xyadoo zho, ga biotsow quie ne quia xley Dios. Dioszhal blu lo Moisés zha tsaa yu co. <sup>45</sup> Goc bla iza, zeeṅe blozh bnitlo Dios grè guiedz ne briṅ nu glo, laa Josué blansonieque yu co. Haxta leṅ dze ne goc David rey, bii lëëw nac xyadoo zho.

<sup>46</sup> David goc tib rey ne gocnziuu lo Dios, bleynie Dios me, dzigo gocladz me nzaa me tib yadoo nroob zaatne mbëzlo zho Dios. <sup>47</sup> Per brielod nzaa mew, Salomón-raa goc rey ne bzaaw. <sup>48</sup> Nli laa yadoo co baa, per teṅ Dios, meṅ nroob nac me, led yed me cuëz leṅ grè yu ne rzaa miech. <sup>49</sup> Zigne zhobneeque lo Xtiidz me, zeeṅe znu rëb me:

Gbaa nac zaatne zoob naa,  
laa lo guidzliu nac zaatne rzo ni naa.  
¿Zha nadien nac yu ne naṅ to gzaa to cuëz naa?  
¿Pa nadien guiab to gzaa to zaatne gdziiladz naa?  
<sup>50</sup> ¿Niacxe led naad bzaa gbaa?, ¿niacxe led naad bzaa guidzliu?

<sup>51</sup> 'Goṅgona sca gaṅle —rëb Xteb—, zigne beṅaque grè pxozgol to ga padzeela, scadaaque goṅ quiayuṅ to niina. Miech nad, miech ntseeb zdoonac to; ib ronde to miṅe rnee Espiritu Sant. <sup>52</sup> Teṅ pxozgol to, nëlṅe gonḍze zho grè zha ne pxeel Dios biadnee xtiidz me; haxta beet zho grè zha ne bzeet ne laa Dios cxeel tib meṅ peet xtoṅd ne bzooblo me guiaad lo guidzliu. Ni niina ne laa Dios pxeel meṅ co, scasaque been zho, pt-sidiṅ to me, bnabey to bga me beet to me. <sup>53</sup> Tibaque squi quia to quiaguiits to Xley Dios; xanjlpaa me biaad-saṅa lo to, ni ruṅde to miṅe rnabeya.

### Beet zho Xteb

<sup>54</sup> Zeeṅe bin zho sca rëb Xteb, blëëye zho haxta rowye ro zho rwi zho lo me. <sup>55</sup> Laa me, ne nacie Espiritu Sant me, zeeṅe blis lo me bui me nëz gbaa, goṅ me lo guieṅdzon ne no Dios, goṅpaa me laa Jesús zo cue Dios nëz derech. <sup>56</sup> Dzigo bnee me, rëb me:

—Raṅpaa naa niina goṅ nzhialse gbaa, laa meṅ ne pxeel Dios biaad lo guidzliu ga, laa me zo cue Dios.

<sup>57</sup> Miṅe been zho ptse zho diag zho, ni nguiedz ropt-sie zho parne gondraa zho pe rnee me; laa zho wbigbe bnaaz zho me, güeynie zho me tib lad ro guiedz. <sup>58</sup> Zha ne goc textigw ga, blee zho lar ne mbix zho, bdziṅ zhow tib lo mgui nguieg lë Saul, mgui co pquianapa; laa zho psilo bdeedquie me.

<sup>59</sup> Sca nodeedquie zho me, laa me rnab lo Dios rnee me:

—Jesús, luu ne nac luu meṅ ne rnabey, luu pcaania zhiespíritu naa.

<sup>60</sup> Dzigo pquiiṅsgzhib me, ni pquiaa me stib redz nroob bnab me lo Dios, rëb me:

—Dios, luu ne nac luu meṅ ne rnabey, doṅ ne quiayuṅ miech rii, laa naa rnab lo luu guṅquizhd luu zhow.

Loxaque blozh sca bnee me, laa me gut. Ye mgui ne lë Saul ga, bdeed diidz sca beet zho me.

**8** Dzigo pcaalsase bla zha bgui ne noxco rleynie Dios, güey zho güeyqueets zho Xteb; mban rac zho, bio zho xquieṅnë me.

Leṅ dze co, psilo zha ne sca rlëenie zha ne riladz Jesús, ptsidiṅ zho grëse zha ne riladz me; dipse leṅ guiedz Jerusalén pquianaṅ zho zho. Grëse zho bzhoon, zha ne zie grëraa guiedz ne ndxie nëz Judé ga, zha ne zieegaa nëz Samar; loxaque zha ne nacse poxtl biaan Jerusalén. <sup>3</sup> Ntseeb rac Saul, rzac me tebaa zha gnit-logazh me grëse zha ne riladz Jesús. Stib yu stib yu zie me, riebezhoo me zho lidz zho, mgui wnaasaque rey me riesëëb me zho ladzguuib.

### Bdziṅ Xtiidz Jesús nëz Samar

<sup>4</sup> Laa grè zha ne bzhoon Jerusalén ga, zaatne zieetaa zho rnee zho Xtiidz Jesús lo miech. <sup>5</sup> Zig nac Lip, zeeṅe bdziṅ me tib guiedz nëz Samar, psilo me bnee me Xtiidz Jesús lo grè miech co. <sup>6</sup> Ndal zho rquiaadiag miṅe rnee me, rzee zdoonac zho raṅ zho grëtaa milagr ne ruṅ me. <sup>7</sup> Ndal grè zha ne noguitnie meṅdox, riac zho, rquiaadan grè meṅdox co redz zeeṅe laa ma rzhoon; grè zha ne gutoo, grè zha ne nde ni, ruṅguiac me zho. <sup>8</sup> Grëse miech ne no guiedz co, rley zho.

<sup>9</sup> Ga no tib meṅ ne rooṅ diidz dox, lë Simón. Ye me rzee zdoonac miech grè ncuaaṅe ruṅ me. Nzianle iz sca noquidie me zho, grëse meṅguiedz ruṅbey me, haxta niats rac me rnee me quiṅdraa cho zig me. Grëse zho, haxta grè zha non rbig lo me, rzac zho lëë poder ne rap Dios ga nacie me.

<sup>12</sup> Laa zeeṅe bnee Lip lo grè miech co gocnaṅ zho diidz ndzon ne nac Xtiidz Dios, bin zho zha racladz Dios gban zho, bin zho cho nac Jesús; grëse zha ne bliladza, mgui wnaasaque, laa zho brobnis. <sup>13</sup> Dzigo yequ meṅ ne lë Simón ga bliladz Jesús, ye me laa me brobnis; za-atne zieetaa Lip naṅ me zhits Lip, rzee zdoonac me raṅ me grëtaa milagr nroob ne ruṅ Dios.

<sup>14</sup> Grè zha poxtl ne no Jerusalén, zeeṅe gocnaṅ zho scataa ndal zha Samar nocaania zhiwseed Jesús, dzigo pxeel zho Pedr grop Juan zie nëz co. <sup>15</sup> Laa zho zie gnab zho lo Dios ygaa grè zha ne bliladzle Jesús ga guieṅbiini cheṅ Espiritu Sant; <sup>16</sup> sac zeeṅe bliladz zho

Jesús, loxaque brobnisse zho, gard yгаа zho guie|biini co. <sup>17</sup> Bdzin zho pxobnia zho guic grë meñ co, bnab zho lo Dios; dzigo grëse meñ co laa me bgaa guie|biini ne rdeed Espíritu Sant.

<sup>18</sup> Zeene gon meñ ne lë Simón ga, ne loxaque rxobnise zha poxtl co guic grë miech co laa zho rgaa guie|biini ne rdeed Espíritu Sant, dzigo laa me rdeed dimi, <sup>19</sup> rëb me:

—Go|needz poder qui lo naa; zeena ye naa zha ne cxobniataa naa guic yгаа zho guie|biini ne rdeed Espíritu Sant.

<sup>20</sup> Pquiab Pedr rëb Pedr lo me:

—iBieñ ganle pe rnee luu! iPa bin luu ye xpoder Dios zac si miech? iTebaa niinagazh nitlo luu grë xtimi luu i!

<sup>21</sup> Ni lalnu rieguia|d luu guñ luu dziin rii, ni gdziñdгаа dze guñ luuw; sac mbed zdoo luu, zienied guic luu guñ luu miñe rnabey Dios. <sup>22</sup> Blee zhgab yozh qui guic luu, bnab lo Dios zeena togo squia zdoo me luu, guñquizhd me luu do| ne squi bza zdoo luu i; <sup>23</sup> sac rlu niapse guie|ntseeb nonie guic luu, ni lëëque luu gon nosacsi luu ne squitaa noyunctal luu xto| luu.

<sup>24</sup> Pquiabse me rëb me:

—Go|guñ guie|nzaac, go|nab lo Dios yquia zdoo me naa, zeena ygaad naa grë guie|nëdox ne rnee to i.

<sup>25</sup> Blozhse bzodiidznie Juan grë miech co grop me Pedr, blozhse pseed zho zho Xtiidz Dios, laa zho wbire zey zho Jerusalén stib. Guiedz ne rdedtaa zho dib xtan zha Samar ga, rnee zho Xtiidz Dios lo grë miech co.

### Bzodiidznie Lip tib meñ Etiopí

<sup>26</sup> Laa Lip no Samar ga, tib dze brieequia tib xanj| Dios lo Lip, rëb me tsie Lip nëz ne rriee Jerusalén zie nëz Gaza.

<sup>27</sup> Dzigo güey Lip nëz co. Tib dan ngana, lëëtaque laa tib meñ ne nac dziin lo rein ne lë Candás zie ga, dziin nroob nac me lo rein co, sac me ngotsow grëtaa dimi ne no Etiopí. <sup>28</sup> Zobse me tib leñ carret nroob zie me ga; znu wbirele me Jerusalén güeygan me Dios. Laa me zob leñ co quialab me lo Xtiidz Dios miñe pquiaa Isá, meñ ne biadteed xtiidz Dios padzeela.

<sup>29</sup> Dzigo bnabey Espíritu Sant Lip tsie Lip yгаа carret co lo Lip. <sup>30</sup> Zeene bgaa carret co lo Lip, bin Lip pa lo nolab meñ co; nacne rëbchaa Lip lo me:

—iPe rien luu cho raquiet zaatne nolab luu i?

<sup>31</sup> —Rieñd naaw —rëb me—, rquiin tib zha ne gnë lo naa dien zha naca.

Dzigo bredz me Lip biep Lip leñ carret co, güeysob Lip cue me.

<sup>32</sup> Znu rnee zaatne nolab me ga:

Zigne racse mëcwxil yeen zeene rnaaz zho ma rut zho ma,

scadaa ndooladz goc me,  
peet been d me zeene laa zho zienie me.

Ni zigne roptsied ma zeene rtsiib zho ma, scaque ni tib diidz ptsired me lo zho.

<sup>33</sup> Niicle ne gon zho scataa ndooladz me, per psacsi zho me.

iPa lotaa bdzin guie|ntseeb ne been grë menladz me!

Sac gon, ptiche zho xquie|mban me lo guidzliu.

<sup>34</sup> Dzigo rëbchaa meñ co lo Lip:

—Bzhiguie| bnë lo naa dien, cho nu znu rzeit Isá lo rii. iPe me bded miñ rii, te stib zhow ye?

<sup>35</sup> Dzigo rëb Lip lo me Jesús raquiet ga, ni bnee Lip grëraa miñe nac zhiwseed Jesús. <sup>36</sup> Laa zho no nëz, tibaque zeene bdzin zho tib lugar co no nis; rëbchaa me lo Lip:

—iBui ganle laa nis no nu! Mazd bzhiguie| pchoobnizgazh naa.

<sup>37</sup> [—Zaca —rëb Lip—, totsaque dib zdoo luu rliladz luu Jesús.

—Rliladz naa me —rëb meñ co—, rliladz naa ne nli Xpëed Dios nac me.]

<sup>38</sup> Dzigo bnabey me blëz carret co ga. Biet me leen co grop me Lip bzëeb zho lo nis co, ga pchoobnis Lip me.

<sup>39</sup> Blozhse ga, laa Espíritu Sant blis Lip gon draa me Lip; per rley me laa me bio nëz stib, laa me zie.

<sup>40</sup> Zeene laa Lip brieequia, laa Lip nole guiedz ne lë Azot. Ga psilo me zigse zie me, guiedz ne rdedtaa me rnee me Xtiidz Dios lo grë miech co. Sca bio me nëz, haxta bdzin me guiedz Cesarea.

### Gon Saul Jesús

**9** Laa mgui ne lë Saul ga, per nli ntseeb rac me, tibaque ne laa guic me zienie gut me grëse zha ne rliladz Jesús. Güey me lo meñ ne nac pxoz nroob, <sup>2</sup> bdeed pxoz co ti xtiidz me guey lo grë zha ne zo lo xyadoo zho nëz Damasc, parne gacnie zho Saul gnaaz zho grëse zha ne rliladz Jesús; zha ne ygaataa niicle mguiw niicle wnaaw, gzobdoo zho zho tsiesan zho ladzguiib Jerusalén.

<sup>3</sup> Laa Saul bio nëz, laa Saul zie. Zhile gdzin me guiedz Damasc, tibaque zeene brieequia ti biinidoo zhan gbaa biab zaatne zie me ga. Gro|taa lo biinidoo co bi-aan me, biabgazh me liu. <sup>4</sup> Liu nix me, bin me zëeb ti tsi meñ co rnee lo me:

—Saul, Saul, ipe nacre quiana| luu naa?

<sup>5</sup> —Been guie|nzaac —rëb me—, bnë dien cho luu. Dzigo pquiab meñ co, rëb me:

—Naa nac Jesús meñ ne squi quiatsidil luu. [Lëëque luu gon nosacsi luu i, rzac luu zigne rzac ngon ne rcaan ni, ni lëëque lo guib lots ne rtseb zho ma riecaan ni ma.

<sup>6</sup> Rdzieb Saul, rzhidz me lo dzeb co rëb me:

—Bzhiguie| bnë dien, ipe racladz luu guñ naa niina?]

Rëbchaa Jesús lo me:

—Guche i, güey Damasc, ga gnë zho ganle pe nac miñe no guñ luu.

<sup>7</sup> Zha ne ziegza Saul ga per nli bdzieb zho, haxta ni gacdraa gnee zho; loxaque tsi meñ co ron zho zëeb, per choot ran d zho.

<sup>8</sup> Laa Saul guche ga. Zeene laa me pxal lo me gwi me ran draa me, i|laa lo me pcowle! Zha ne ziegzale me ga bzhen nia me bdzin me Damasc. <sup>9</sup> Tson dze sca brielod nian me, gzase dze co dowd me, niicle peet god me.

<sup>10</sup> Guiedz Damasc ga, ga no ti mgui ne riladz Jesús lë Ananí; dzigo goṇ me Jesús, bredz Jesús me. Pquiab me, <sup>11</sup> dzigo rëbchaa Jesús lo me:

—Güey nëz ne lë Derech, zaatne nac lidz ti mgui lë Judas; ga bnabdiidz meṇ Tars ne lë Saul. Zeene quia-zodiidznie me naa, <sup>12</sup> blu naa lo me laa tib zha lë Ananí bdziṇ rxobnia guic me, zeene gbiire gaṇ me stib.

<sup>13</sup> Pquiab Ananí rëb Ananí:

—¿Saul ye? Ziyon naa name zha nac grëtaa ncuaaṇe noyuṇ me Jerusalén, notsidiṽ me grë zha ne riladz luu. <sup>14</sup> Haxta pxoz nroob ne rnabey bdeed diidzbey gnaaz me grëse zha ne no nëz rii.

<sup>15</sup> —Güey —rëb Jesús lo Ananí—, sac laa naa bzooblome me, ib me tsie grë guiedz zit tsieseed me miech xtidz naa, me gneew lo grë zha rnabey, ni lo grëgaa zha Israel. <sup>16</sup> Na naa glu lo me gaṇle zha nac grë guieṽnë ne gaṇ me, zeene laa me quiayunle xtsiṽ naa.

<sup>17</sup> Dzigoraa güey Ananí zaatne no Saul ga. Bdziṇ me, pxobnia me guic Saul, rëb me lo Saul:

—Saul, bina gaṇle bets, laa Jesús goṇ, meṇ ne rnabey, meṇ ne brieequia lo luu zeene ziaad luu nëz ga, laa me pxeel naa ziaṽ naa nu; zeena gnab naa lo me guṅguiac me bziaalo luu, ni ycaania luu guieṽbiini ne rneedz Espíritu Sant.

<sup>18</sup> Zigne sca bnee Ananí, laa lo Saul biacgazh; lega zigne nac xmed meṽ nac grë ncuaaṇ co briece lo me. Horcogazh laa me brobnis. <sup>19</sup> Blozh ga laa me dow stib, zhiga zhiga laa me wbire pcaa fuerz.

Goc bla dze no Saul lo grë zha ne riladz Jesús Damasc ga, dzigo briece me <sup>20</sup> güey me grë yadoo win ne no ga, rnee me lo grë miech co cho nac Jesús, rnee me lo zho ne nli Xpëed Dios nac Jesús.

<sup>21</sup> Rzee zdoo grëse miech co raṇ zho sca rnee me, rneechaa zho:

—¿Led lëe meṇ qui ga name scataa ntseeb rac Jerusalén, notsidiṽ me grë zha ne riladz Jesús? Conque nac diidz miṇ co ziaad me nu, ziadnaaz me zho tsiesan me zho lo grë pxoz ne rnabey.

<sup>22</sup> Per zigse zie dze, mazdraa rac Saul tibaque ne rnee me lo grë miech co, lëe meṇ ne zëeble diidz cxeel Dios lo guidzliu ga, nac Jesús. Grë zha Israel ne no ga, rienndraa zho dieṇ pe gliladz zho.

<sup>23</sup> Goc bla dze no me ga, laa grë zha Israel ne no ga blëe lo me; bnediidz zho rëb zho laa zho gut me. <sup>24</sup> Dze guieel riesobnap zho gzaase zaatne rap biedz nroob ne ndze igo guiedz co nëz, riequiambëz zho ted me, gut zho me. Per gocnaṇ mew, <sup>25</sup> nacne goṽ ti pcow liu pcaalsa grë zha ne bliladz miṇe bnee me, bloo zho me ti leṇ chicuid nroob, bzoob zho doow dzigo blit zho me cho biedz nroob ne sca ndze igo guiedz co. Sca bdeeda diidz briece me ga.

### Bdziṇ Saul Jerusalén

<sup>26</sup> Zeene bdziṇ Saul Jerusalén gocladz me ndziṇ me lo grë zha ne riladz Jesús ga, per leṽ bdzieb zho zeene goṇ zho me, sac riladz zho ne nli yele me bzëeb xnëz Jesús. <sup>27</sup> Dzigo güeynie Bernabé me lo grë zha ne nac

poxtl, bzodiidz Bernabé lo zho zha goṇ me Jesús zeene no me nëz zie me Damasc, zha rëb Jesús lo me; ni zha bdziebd me bnee me lo grë miech cho nac Jesús, leṇ dze ne blëz me Damasc. <sup>28</sup> Dzigoraa pcaania zho me. Laa zho gocgza me, zaatne zietaa zho zieseed zho miech, ib rdziebd me rnee me cho nac Jesús.

<sup>29</sup> Brieequia bla zha Israel ne rnee xtiidz zha Gres bdiṽdiidznie zho me. Zhisaque goca, laa zho gocladz ni-ut zho me. <sup>30</sup> Zeene gocnaṇ grë zha ne riladz Jesús gaw, dzigo güeysaṇ zho me guiedz Cesarea; ga briece me laa me zie nëz Tars, zaatne nac ladz me.

<sup>31</sup> Leṇ dze co, grëse miech ne no xnëz Jesús, zigtaa zha ne no Judé, zha ne no Galilé, zha ne nogaa Samar, nguieel rac zho peet lo guieṽxtseeb nodraa zho; zigse zie dze riogucraa zho zha nac Xtiidz Dios. Grëse zho ri-oxco zho mban zho zigne rnabey me, tibaque nacnie Espíritu Sant zho. Ni scagaa, zigse zie dze ndal grë miech ne rzëebraa rcaania Xtiidz Dios.

### Rieted Pedr lo grë zha ne riladz Jesús

<sup>32</sup> Leṇ ngbidz coque, zie ziaad Pedr rieted me lo grëse zha ne riladz Jesús. Nacne güeyted me lo grë zha ne no Lida. <sup>33</sup> Guiedz co, beenbey me ti mgui lë Ené, gocle xon iz nix mgui co, ib gacd së me sac dipse me gutoo. <sup>34</sup> Dzigo rëbchaa Pedr lo me:

—¡Ené, niinagazh goṇ laa Jesús guṅguiac luu! Na zeen guche i blis xta luu.

Zigne sca bnee Pedr laa meṇ co biac, laa me guche ga. <sup>35</sup> Grëse meṇ Lida, grëse meṇ Sarón zeene goṇ zho sca biac meṇ co, grëse zho bliladz Jesús.

<sup>36</sup> Gaxaque Lida riaaṇ ti guiedz lë Jop. Jop ga no ti wnaa ne riladz Jesús, lë Tabit (laa xtiidz zha Gres rnee zho me Dorc). Nquialadz me miech, grë zha ne guieṇd pe yquiin, ruṇ me xyudar zho. <sup>37</sup> Lega nacle blanguidz me, laa me gut.

Zha ne riladz Jesús ga, laa zho noxco dieṇ zha ygueets me. Bgaz zho me, blozhse ga güeyxob zho me sti leṇ yu ne riaaṇ nëz glaa. Xco co no zho, <sup>38</sup> zeene bin zho laa Pedr no Lida. Pxeelaque zho chop zha bgui zienie diidz lo Pedr tsieniob Pedr Jop.

<sup>39</sup> Zigne bdziṇnie zha co diidz, zienaṽgazh Pedr zhits zho. Bdziṇ zho lidz meṇ co, zolinëz güeynie zho Pedr zaatne zhoob me. Nzian grë wnaa viud ndxie ga, wbigbe zho lo Pedr, roon zho rlu zho grë lar ne bdib me. <sup>40</sup> Dzigo bnabey Pedr briece zho ley grëse zho, laa me bianaṇ ga, pquiitsgzhib me bnab me lo Dios. Blozhse ga wbig me lo ngutoo co, bnee me lo me rëb me:

—Guche i, Tabit.

Zigne sca rëb Pedr laa lo ngutoo co bzhiäl, zeene goṇ me laa Pedr zo ga, laa me bzobli. <sup>41</sup> Bzheṇ Pedr nia me, bliso Pedr me, dzigo bredz Pedr grë zha ne riladz Jesús ga, ni grë wnaa viud co; goṇ zho laa me briecebanle.

<sup>42</sup> Dipse lad guiedz co bzhoob diidz sca brieceban wnaa co; grë zha ne bina, ndal zho bliladz Jesús dib zdoo zho.

<sup>43</sup> Nzianlaa dze biaan Pedr ga, blöz me lidz Simón ti meņ ne rcuudz grē guid ma.

### Güeyzodiidznie Pedr Cornel

**10** Guiedz Cesarea, ga no ti meņ lē Cornel, rnabey me lo ti partid meņguiib lē partid Italian. <sup>2</sup> Zigtaa mew, zigtaa grē meņlidz mew, dib zdoos zho rlladz zho Dios, noxco zho mban zho zigne racladz Dios. Tibaque nonab zho lo Dios, ni nroob ncuane rgad zho lo grē zha ne guieņd pe yquii.

<sup>3</sup> Tib dze, bdzele dzew tibaque zeene goņ me laa ti xanj Dios bdziņ zaatne zo me, bredzlē anjl co me.

<sup>4</sup> Dze rwi me lo anjl co, rdzieb me laa me pquiab. Dzigo rēbchaa anjl co lo me:

—Gocnaņ gaņle grēse miņe r nab luu lo Dios ron mew, ni raņ me grētaa yudar ne squi quiaayū luu lo grē zha ne guieņd pe yquii. <sup>5</sup> Gacxe waa, laa naa zialnie diidz lo luu: pxeel bla zha ne tsie guiedz Jop tsixi zho ti meņ ne lē Simón Pedr. <sup>6</sup> Gax zaatne nac ro nisdoo, ga no ti meņ lēque Simón, rcuudz me grē guid ma; lidz meņ co ga rbēz me; ga tsieguib zho me.

<sup>7</sup> Zeene laa anjl co zey, dzigo bredz me chop zha ne quia dziin lidz me, ni bredz me ti zhaguiib ne nacgrē zhaguiib ne zopaa gax lo me; dib zdoos zhaguiib co rlladz zho Dios. <sup>8</sup> Blozhse bzodiidz me lo gza zha co zha bzhaac me, dzigo laa me pxeel zho ziexi zho Pedr Jop.

<sup>9</sup> Biini liu, zig rwe ngbidza gaxle Jop zie zho. Lēetaaque hor co laa Pedr biep nēz glaa guic yu ne rbēz me ga. Rcaabedz me, dzigo laga noyaco ncuane gow me laa me biep guic yu co ziezodiidznie me Dios.

<sup>11</sup> Dios nozodiidznie me, tibaque zeene goņ me laa ti lar nroob ziad-zēeb zhan gbaa, nzhidoo gzatap nēza laaw bdziņ lo me. <sup>12</sup> Grē lose ma no lo lar co, ga no ma ne rzē gza tap ni, no grē ma ne rzē zigne rzē meel, ni no grē ma ne rsiibe. <sup>13</sup> Horco bin me ti tsi meņ co, rēb lo me:

—Pedr, ma ne racladztaa luu gow luu zac gut luu ma.

<sup>14</sup> Pquiab me rēb me:

—iMiņ cogaa nagoņ grielod! Wlaltaa gard gow naa grē ma beed qui.

<sup>15</sup> Rēbchaa meņ co lo Pedr:

—Grē ncuane beenlayle Dios, nodne gnee luuw ncuane beed.

<sup>16</sup> Blulo lar co tib, bluloquew stib, laa zeene bioņtaa goņ mew dzigo laaw biire bzoquia nēz gbaa.

<sup>17</sup> Lēetaaque laa Pedr no zhgab dieņ pe nacie sca goņ me lar co, laa zha ne pxeel Cornel ga bdziņ ro yu ne rbēz me ga, <sup>18</sup> rnabdiidz zho me.

<sup>19</sup> Zhgab co no Pedr, zeene rēb Espiritu Sant lo Pedr:

—Laa tsoņ zha bgui goņ ziaadguib luu. <sup>20</sup> Biet, bnee lo zho. Ib peet tsienied guic luu güeynaļ zhits zho, sac naa bnabey ziaad-xi zho luu.

<sup>21</sup> Dzigo laa Pedr biet ga, bdziņ me lo zha ne pxeel Cornel ga, rēb me lo zho:

—Naa nac Simón Pedr. ¿Pe nac mandad ne ziaad to?

<sup>22</sup> Pquiab zho rēb zho:

—Laa no ziaad xmandad Cornel, ti meņ ne rnabey lo meņguiib Cesarea. Laa me pxeel no ziaad-xi no luu, sac ti xanj Dios rēb lo me cxeel me zha ne guiaad-xi luu tsie luu lidz me, tsienee luu lo me. Ti miech wen nac me, dib zdoos me rlladz me Dios, grēse zha Israel rleynie zho me.

<sup>23</sup> Dzigo bredz Pedr zho bded zho nēz leņ yu; ga biaan zho wdze co. Biiniraa liu zienie zho me, ye palal zha Jop, zha ne rlladz Jesús zienaļ zhits me.

<sup>24</sup> Dze ne rac chop ngbidz brieē zho Jop, laa zho bdziņ Cesarea. Laa Cornel bredzle grē meņlidz me, grē zha ne ndzieeldiiz me; ndal nac zha ne ndxienie me lidz me, quiambēz me Pedr. <sup>25</sup> Zeene laa Pedr bdziņ, brieē me güeydzieelo me Pedr, pquiitsgzhib me lo Pedr naņ me niuņ me Pedr zigne riegaņ me Dios. <sup>26</sup> Dzigo bliso Pedr me, rēb Pedr lo me:

—iGuso i, nodne yquiitsgzhib luu lo naa! Bien gaņle samiechaque luu nac naa.

<sup>27</sup> Dzigo laa meņguiib co guso ga. Nozodiidz zho laa zho bzēeb leņ yu. Zeene bdziņ zho zaatne ndxie grē miech co, <sup>28</sup> psilo Pedr bnee me lo zho, rēb me:

—Naņle to gaņle zha Israel naa, ni ib lo xley no rnabey nodne ziaab no lidz grē zha zit, per ni ctsieelsad no zho; per laa niina laa Dios blu lo naa, grēse miech ne beenlayle me nod pe nacie gbix zdoos naa gaņ naa zho. <sup>29</sup> Gacxe waa, zigne gocnaņ naa laa to rbedz naa, zialnaļgazh naa zhits zha ne pxeel to. Nana sca, goļnē dieņ pe nacie bredz to naa.

<sup>30</sup> Dzigo bzodiidz Cornel zha bzhaac me, rēb me:

—Nadze rac tap ngbidz ga, zig znaw goņ, no naa lidz naa nu nocuan naa, ni nonab naa lo Dios. Tibaque zeene goņ naa laa ti mgui zole lo naa, masaque riaazbel xab me, <sup>31</sup> nē me: “Gocnaņ gaņle grēse miņe r nab luu lo Dios ron mew, ni raņ me grētaa yudar ne squi quiaayū luu lo grē zha ne guieņd pe yquii. <sup>32</sup> Gacxe waa, laa naa zialnie diidz lo luu: pxeel bla zha ne tsie guiedz Jop tsixi zho ti meņ ne lē Simón Pedr. Gax zaatne nac ro nisdoo, ga no ti meņ lēque Simón, rcuudz me grē guid ma; lidz meņ co ga rbēz me; ga tsieguib zho me.” <sup>33</sup> Sca nagoņ nē meņ co lo naa, nacie bnabey naa biaan-xi zho luu; ni xquizhgaa luu ne laa luu ziaad. Dios zobwi gaņle, grēse no laa no ndxie nu par yquiaadiag no miņe bnabey me luu gnē luu lo no.

<sup>34</sup> Dzigo rēbchaa Pedr:

—iNaraa rieņ naa, led yed Dios cue miech dieņ cho nac zha Israel, cho nacgaa zha zit! <sup>35</sup> Sinque grēse miech lo guidzliu, tel pa guiedztaa nac zho, rcaania me zho totsaque ron zho miņe rnabey me, ni rioxco zho zaacse rban zho. <sup>36</sup> Rgobey naa ziyonle to Diidz Ndzon ne pxeel Dios lo meņladz naa niina wriiņ. Lo Diidz Ndzon co rnee, ne zac guiaanwen miech lo Dios, totsaque gliladz zho cho nac Jesús, meņ ne zēēble diidz ga cxeel me (ni Jesús goņ bzaa grētaa ncuane no). Zig nac dib Judé, desde ne psilo Juan pseed me miech Galilé, laa zho gocnaņa. <sup>38</sup> Ni naņaxe to gaņle, bdeed Dios poder lo Jesús, pxeel me Espiritu Sant gocnie Jesús. Zaatne bdedtaa Jesús, quia zdoos me miech, grē zha ne nosacsi meņdow psilaa me zho ladzna ma; sacne nli



Dios nacie me. <sup>39</sup> No ne nac no zha ne bzanie me, grop lo no bdzian no grëtaa milagr ne been me, zigtaa Jerusaléna zigtagaa dib Judéw. Jerusalénpaa ga beet zho me pquiaa zho me lo cruz, <sup>40</sup> per zeene goc tson ngbidza laa Dios bleeban me, ni bneedz Dios diidz bire bdzian no me. <sup>41</sup> Led grëdraa miech gon me, lox- aque nose bdzian me; sac ib Dios bzooblo no dzian no grë dziin ne been me. Haxta bdioownie no me, bdionie no me, <sup>42</sup> ni pxeel me no gnee no lo miech gacnan zho ganle laa Dios bzo me, me gon guie|wxtis gal dze ne laa Dios cuedz grëse miech, zigtaa zha guta zigtagaa zha mbana. <sup>43</sup> Me ga bzeet grë zha ne biadteed Xtiidz Dios lo miech padzeela, zeene rnee zho: "Grëse zha ne gliladz cho nac me, silaa Dios zho lo dol."

<sup>44</sup> Laa Pedr bii quianeeque, zeene laa grë zha ne no- quiaadiag ga bgaa guie|biini ne bdeed Espiritu Sant lo zho. <sup>45</sup> Grë zha Israel ne ziegza Pedr ga, zeene gon zho laa grë zha co psilo quianee stib diidz, ni rdeed zho xquizh lo Dios, bzee zdoo zho gon zho ye grë menzit rgaa guie|biini ne rdeed Espiritu Sant. <sup>47</sup> Dzigo rëbchaa Pedr:

—¿Peraa nadien gbiaaz ne, ne cchoobnigazhd ne zha rii? Laa ne bdzianle ganle zigne rdeed Espiritu Sant guie|biini lo zha Israel, scaque bdeed me guie|biini lo zho.

<sup>48</sup> Dzigo bnabey Pedr brobnis zho, laa zho bzëëb xnëz Jesús.

Blozh ga bnee Cornel lo Pedr cuëz me ga ti bla dze.

#### Bzodiidz Pedr zha güey me lidz Cornel

**11** Grë zha poxtl ne no Jerusalén, ni grëraa zha ne riladzle Jesús zha ne no Judé, bin zho sca bliladz gza menzit co Xtiidz Dios. <sup>2</sup> Dzigo zeene laa Pedr bdzin Jerusalén güey bla zho güeyti|diidznie zho Pedr, <sup>3</sup> blisqui zho lo Pedr pe nacie güey Pedr lidz menzit, pe nacie güeytownie Pedr zho.

<sup>4</sup> Dzigo psilo Pedr bzodiidz me lo zho zha nacie güey me lidz men co, rëb me:

<sup>5</sup> —Guiedz Jop no naa, tib dze lëëtaque nozodiidznie naa Dios, tibaque zeene gon naa laa ti lar nroob ziad- zëëb zhan gbaa, nzhidoo gzatap squina laaw ziaad nëz lo naa. <sup>6</sup> Zeene bdixlo naa bui naa dien pe quia lo lar co, gon naa niapse ma no lo co, grë ma ntseeb, grë ma ne rzë gzatap ni, grë ma ne rzë zig rzë meel, ni grë ma ne rsiibe. <sup>7</sup> Lo grë ma co nowi naa, zeene bin naa ti tsi men co, në lo naa: "Pedr, ma ne racladztaa luu gow luu, zac gut luu ma." <sup>8</sup> Dzigo pquiab naa rep naa: "Min cogaa nagon grieelod, wlaltaa gard gow naa grë ma beed qui." <sup>9</sup> Nëchaa me lo naa: "Grë ncuaañe beenlayle Dios, nodne gnee luuw ncuaañe beed."

<sup>10</sup> Tson vuelt sca gon naa lar co. Blulow tib, blulow- quew stib, zeene biontaa gon naaw dzigo laaw biire zey gbaa.

<sup>11</sup> Loxaque blozh gon naa lar co, laa tson zha bgui blanso ro lidz men ne blëz naa ga, pxeel men Cesarea co zho ziaadguib zho naa. <sup>12</sup> Ni laa Espiritu Sant bneeque lo naa, no gana| naa zhits zho, niicle ne zhaz-

it nac zho; nacie biana| naa. Ye gza xoop zha ne zi- a|nie naa nu bzë bio no.

<sup>13</sup> 'Bdzin no lidz men co, psilo me bzodiidz me lo no zha bzhaac me, në me len yu no me, zeene gon me ti xanj| Dios, rëb anj| co lo me cxeel me bla zha ne tsie Jop tsixi zho naa <sup>14</sup> zeena gane naa lo me zha grieele csilaa Dios me lo dol grë menlidz me.

<sup>15</sup> 'Laa naa psilo quiane lo me grë menlidz me, zeene grëse zho laa zho pcaania Espiritu Sant, ni bgaa zho grë guie|biini ne rdeed me zigne bgaaque new. <sup>16</sup> Ga nagon psoladz naa xtiidz Jesús men ne rnabey ne, zeene znu në me lo ne: "Nli nisse pchoobnis Juan miech, sangue to zгаа to guie|biini ne rneedz Espiritu Sant." <sup>17</sup> Sca nagon pcaania zho Espiritu Sant, laa zho bgaa guie|biini ne rdeed me zigne bgaaque new. ¿Cho nac naa nadien ne glisqui naa mine run Dios?

<sup>18</sup> Zeene blozh bin zho grë min bnee Pedr ga, peet rëbdraa zho. Psilo zho rleynie zho Dios, rdeed zho xquizh lo me; sac hor coraa bien zho ye grë menzit zrieele gbig zho lo Dios, gdeed me ti guie|mban ndzon ne gdziñd dze lozh lo zho.

#### Bliladz zha Antioquí Xtiidz Dios

<sup>19</sup> Zeene sca pquiana| zho grë zha ne riladz Jesús len dze ne beet zho Xteb ga, nëzrii nëzrec bliaa| zho. No zho bdzin haxta Fenicia, no zho bdzin Chipr, nogaa zho bdzin nëz Antioquí. Zaatne bdziñtaa zho bnee zho cho nac Jesús, per loxaque lo grë menladz zho bnee zhow. <sup>20</sup> Niicle ne scaw, lëëque grë zha Israel ne no Chipr, zha ne no Ciren, zeene laa zho bliladz Jesús güey zho guiedz Antioquí, bnee zho lo grë zha zit co cho nac Jesús. <sup>21</sup> Ni ne nacie Dios zho, ndal grë miech co bzëëb xnëz Jesús.

<sup>22</sup> Grë zha ne no Jerusalén, zeene gocnan zhow pxeelaque zho Bernabé güey Antioquí. <sup>23</sup> Zeene bdzin Bernabé Antioquí, rley me gon me scataa quiayunlay Dios grë miech co; dzigo pso me diidz lo zho ib csaand zho zhiwseed Jesús.

<sup>24</sup> Ti men dib zdoo riladz Dios nac Bernabé, nacie Espiritu Sant me, ti miech wen nac me; gane zeene laa me bdzin ga nzianraa zha ne bliladz Jesús.

<sup>25</sup> Goc palal dzew, dzigo güey Bernabé guiedz Tars güeyxi me Saul, bdziñnie me Saul Antioquí. <sup>26</sup> Dipse ti len iz blëz zho ga grop zho, blozh pseed zho grë zha ne bliladz Jesús. Ga gloopa psilo ne laa grë zha ne riladz Jesús brieelë CRISTIAN.

<sup>27</sup> Len iz co blalaa zha ne noteed xtiidz Dios no Jerusalén. Dzigo brie zho ga güey zho Antioquí. <sup>28</sup> Lad co no tib men lë Agab, psiaab Espiritu Sant guic me bnee me laa ti gbin dox gan miech nëz Israel. (Ni nli- gaa scase goca, lëë gbin co biaad len iz ne zobnabey men ne lë Claud.)

<sup>29</sup> Grë zha ne riladz Jesús Antioquí, zeene bin zho sca rëb Agab, nacie bnediidz zho grë zho, tel palalaa ncuaañe rgaa lo zho tib tib zho gdeed zhow gaclo ti gon cxeel zho lo zha Judé. <sup>30</sup> Dzigo ptop zho gon co, zeene laaw goclo, pxeel zho Bernabé grop Saul

güeyšana lo grë zha rnabey ne zo lo zha ne riladz Jesús nëz Judé.

### Bio Pedr ladzguiib

**12** Len dze co psilo rey Herod notsidil me grë zha ne riladz Jesús. <sup>2</sup> Bnabey me bgaa Jacob bets Juan, beet zho Jacob lo spad.

<sup>3</sup> Zeene gon Herod rley grë zha ne rnabey lo menquiedz Israel ran zho zha rsacsi me grë zha ne no xnëz Jesús ga, dzigo bnabeyaque me bgaa Pedr bio Pedr ladzguiib; lëëtaque len dze co noyac Ini Pascw.

<sup>4</sup> Laa Pedr no ladzguiib, bnabey me bzo xon nëz menquib quianap Pedr. Quiambëz me tedse Ini co, laa me cuee Pedr gan grë menquiedz zha csacsi me Pedr.

<sup>5</sup> Grë zha ne riladz Jesús, zeene gocnan zho scataa ndxienap menquib Pedr no Pedr ladzguiib, psilo zho tibaque quianab zho lo Dios gacnieñ me Pedr.

<sup>6</sup> Nacle diidz pa dze cuee Herod Pedr. Wdze ne guiini liu co, laa Pedr nixguesse len ladzguiib; tib ga caden zob ti nia me, tibga menquib tib nëz cue me, ni zhaaque zo zla zha ne quianap ro ladzguiib. <sup>7</sup> Tibaque zeene biab ti biinidoo len ladzguiib, laa ti xanj Dios bdziñ ga. Bdziñ me, pcaañnia me cue Pedr, pcuaan me Pedr, rëb me:

—¡Na zeen guche !

Zigne sca bnee anjl co, lega zhal caden ne zob nia Pedr ga bzhihala brieew nia Pedr; <sup>8</sup> dzigo rëbchaa anjl co lo Pedr:

—¡Pxidoo len luu, pquiaa lab luu ni luu!

Blohse pxidoo Pedr len Pedr, ni pquia lab Pedr; rëbchaa anjl co:

—¡Wbix xab luu na, zeen dëna! zhits naa!

<sup>9</sup> Na!se Pedr zhits anjl co laa Pedr brieew ga. Riend Pedr ne nli nosilaa anjl co Pedr, masaque rzac me nonixquieel mew. <sup>10</sup> Bded zho chop len yu zaatne ndxie menquib ne quianap, laa zho bdziñ zaatne quia puert guib ne rrie ro nëz. Zigne bdziñ zho, zhal puert co bzhihala; laa zho brieew. Bzënie anjl co Pedr spalal, zeene go! zho zaatne rdedlsa nëz co, dzigo laa anjl co psan Pedr ga.

<sup>11</sup> Dzigoraa bien Pedr led nonixquieel Pedr, nli Dios pxeel xanj me güeysilaa Pedr ladznia Herod, zeena gleyd zha Israel nian zho grë guieñe ne nded Pedr.

<sup>12</sup> Dzigo laa Pedr zie nëz lidz Marí, xniala Juan Marcw; lëëtaque hor co nzian zho ndxie ga quianab zho lo Dios. <sup>13</sup> Zeene bdziñ Pedr pcaañnia Pedr ro yu. Brieew ti ndzoop ne quia dziin ga lë Rode, zieso ndzoop dien chow.

<sup>14</sup> Zeene beenbey ndzoop co tsi Pedr, rley ndzoop. Lo guiebley co niicle pxaldaqe ndzoop ro yu, rias ndzoop zienie ndzoop diidz lo grë zha ne ndxie ga; rëb ndzoop laa Pedr bdziñ ro yu ga. <sup>15</sup> Per bliladzd zhow.

—¡Dieen pe rool luu! —rëb zho—. ¡Ncuane gliladzd ne rnee luu!

—¡Coo, nli lëë mew! —rnee ndzoop—, laa me zo ga.

—¡Led meda, —rnee zho—, bod anjl ne quianap mew!

<sup>16</sup> Sca no zho, laa Pedr bii nocaañnia ro yu. Zeene güey zho pxal zho ro yu, bzee zdoo zho gon zho nli Pedra, laa Pedr zo ga. <sup>17</sup> Dzigo blunia Pedr lo zho gnee nguiedzd zho; laa zho bzëëbnie Pedr len yu. Ga psilo Pedr bzodiidz Pedr lo zho zha güeybee xanj Dios Pedr len ladzguiib; ni pso Pedr diidz lo zho sodiidz zhow lo Jacob, ni lo grëraa zha ne nacgrë zho. Blozhse ga, laa Pedr brieew ga.

<sup>18</sup> Zeene biini liu, grë menquib ne pquianap Pedr len ladzguiib ga, rdziendraa zho zha gun zho; sac ib biend zho dien yo Pedr. <sup>19</sup> Zeene laa Herod pxeel zha ne ziebee Pedr ladzguiib, pa sële Pedr. Dzigo güey zho güeynie zho diidz lo Herod; nacne bnabey Herod gocredz grë zha ne pquianap Pedr ga, pquiep Herod zho; blozhse ga, bnabey Herod gut zho gzase zho. Bded ga, laa Herod brieew Judé zey me Cesarea.

### Dow mziog Herod

<sup>20</sup> Len dze co, pcaalsa menquiedz Tir ni menquiedz Sidón güeynee zho lo Herod; sacne rlëënie Herod zho. Lëëque ti men ne nac dziin lo Herod lë Blast güeynie zho bnee lo Herod, bnab zho tijniedraa me zho, niicle zhagaaw laa zho gbig lo me; sac grëse ncuane rquiin zho, grë guiedz ne rnabey me ga rrieew.

<sup>21</sup> Dzigo bzo Herod ti dze ne tsie zho tsiezodiidznie zho me. Zeene go! dze co, got me lar niazh ne racw rey; bdziñ me bzob me lo zhixcan me, psilo me bnee me lo grë miech co. <sup>22</sup> Goc palo quianee me, psilo zho rleynie zho me, nguiedz roptsie zho rnee zho:

—¡Led miechdraa i gon! ¡Ti diosle i nac men qui quianee lo ne!

<sup>23</sup> Laa me bii quianeeque, zeene biet tib xanj Dios bdiñ me, psilo dow mziog me, gagazh gut me. Sca gut me, sac beenbeyd me ne Dios nac men ne non, men ne rnabey. <sup>24</sup> Laa Xtiidz Dios, zigse zie dze laaw quia-gaazraa lo miech; ndal zha cub ne nozëëb xnëz me.

<sup>25</sup> Jerusalén ga no Bernabé grop Saul len dze co; zeene bialse xtsiñ zho, laa zho brieew ga laa zho zie nëz Antioquí zienie zho Juan Marcw.

**13** Lo grë zha ne riladz Jesús Antioquí, nzian zha ne noteed Xtiidz Dios, nzian zha ne rseed miech Xtiidz Dios no lo zho. Lad grë zha co no Bernabé, no ti mgui lë Simón ne rnee zho “Men Yaas”, no ti men Ciren lë Lus, gaque no Saul, ni ti men lë Manaén, bets pchoob Herod.

<sup>2</sup> Laa ti dze lëëtaque ndxie zho noyoolnie zho Dios ni nocuan zho, zeene laa Espiritu Sant bnee lo zho, rëb me:

—Go!cueextso Bernabé i grop Saul, zeena csilo zho lo dziin ne gded naa gun zho.

<sup>3</sup> Blozhse pcuan zho, blozhse bzodiidznie zho Dios, dzigo pxobnia zho guic Bernabé grop Saul, bnab zho lo Dios gacnieñ me zho; bnee zho lo zho, laa zho zie.

### Güey Saul Chipr grop me Bernabé

<sup>4</sup> Ga brieew Bernabé grop Saul zienie Espiritu Sant zho bdziñ zho guiedz Seleucia, Seleucia bzëëb zho barcw

laa zho zie nëz Chpr (ti guidzliu win ne no lo nisdoo).

<sup>5</sup> Ye Juan Marcw zienie zho guñ xyudar zho.

Bdziñ zho ro guidzliu win co zaatne ndxie guiedz Salamin, biet zho barcw güey zho grë leñ xyadoo meñ Israel ne no ga, güeyseed zho miech Xtiidz Dios. <sup>6</sup> Ga brieë zho güeyted zho dipse lo guidzliu co bdziñ zho guiedz Pafos; guiedz ne bdedtaa zho bnee zho Xtiidz Dios lo miech. Pafos, ga beenbey zho ti meñ Israel lë Barjesús (laa xtiidz zha Gres rnee zho me Elim). Rquidie me rnee me xtiidz Dios noteed me lo miech, per didz dox rool me.

<sup>7</sup> Guiedz co ga no ti meñ lë Sergio Paul, meñ co zob rnabey guidzliu co; dzigo lo meñ co ga no Barjesús. Ti meñ nixbiini nac meñ ne lë Sergio ga, no me liaadz gacnañ me zha nac Xtiidz Dios; dzigo bnabey me gocredz Bernabé grop Saul. <sup>8</sup> Zeene bdziñ zho psilo Barjesús quiaguib me dien pe yquiaaqui yquiaadiagd meñ rnabey co Xtiidz Dios.

<sup>9</sup> Dzigo buitapaque Pabl lo Barjesús (Pabl nac sti lë Saul), ni ne nacie Espíritu Sant Pabl <sup>10</sup> rëb Pabl lo me: —¡Biche nu zhin meñdox! Zhin meñdox goñ nac luu, squitaa noquidiee luu miech, notsidil luu diidzli. ¿Zha rna dze ne csaan luu miñe nac luu i, squi notsidil luu Xtiidz Dios? <sup>11</sup> Goñ ganle, ¡laa Dios csiabzi luu, ninagazh laa lo luu ycow, ni spalal xbiini ngbidz ganndraa luu!

Zigne sca rëb Pabl laa lo meñ co pcow, nëzrii nëzrec zie me racladz me dien cho gnaaz nia me.

<sup>12</sup> Zeene goñ meñ rnabey co sca pcow lo Barjesús, hor co bliladz me Xtiidz Dios, bzee zdoo me goñ me scataa poder ne ziaadnie zhiwseed Dios.

### Bdziñ zho guiedz Antioquí

<sup>13</sup> Bded ga, laa Pabl gza Bernabé ni Juan bzëeb barcw stib, laa zho zie nëz xtan zha Panfil. Bdziñ zho guiedz Perg laa zho brieë leñ barcw, ga ptso Juan lo zho, laa Juan zey nëz Jerusalén; <sup>14</sup> laa zho bio nëz zie zho nëz xtan zha Písid, bdziñ zho sti guiedz lë Antioquí.

Zeene goñ dze ne rdziiladz miech lo dziin, güey zho xyadoo zha Israel. <sup>15</sup> Blozhse bded zha ne blab lo guits ne pquiaa Moisés, ni blab zho miñe pquiaa grëraa zha ne biadteed xtiidz Dios padzeela, dzigo laa meñ ne rnabey yadoo co bnee lo Pabl grop Bernabé, rëb me lo zho:

—Telne racladz to gnee to chop lan xtiidz to, zac gnee tow niina.

<sup>16</sup> Dzigo guso Pabl, blunia me lo grë zha ne ndxie ga cuedze zho, rëb me lo zho:

—Grëse to ne ndxie to nu, zigtaa tow ne nac to menladz naa, zigtaa togaaw ne nac to zha stib guiedz zha ne noxco gban zigne rnabey Dios; goñquiaadiag chop lan xtidz naa ganle gne naa lo to:

<sup>17</sup> Dios ne riladz no nac no meñ Israel, ib me bzooblo grë pxozgol no laa zho bgab lo me. Me gocniën zho zeene bio zho ladz meñ Egipt, ni me güeysilaa zho ga, blu me ganle ne nli meñ nroob nac me.

<sup>18</sup> Dipse leñ choo iz ne bio zho grë dan bidz ne bded zho ga, pxcw me grëtaa xquieñntseeb zho. <sup>19</sup> Blozh ga,

bnitlo me gadz guiedz nroob ne ndxie xtan zha Canaán, bdeed me liu co lo zho. <sup>20</sup> Ni dipse leñ tap gayoo groñ iz, me bzooblo grë zha ne bzo bnabey lo zho; lëe lultm zha ne bzo me ga bnabey lo zho goc profet Samuel. <sup>21</sup> Blozh ga, laa zho bnab so ti rey gnabey lo zho, nacne bzo me Saúl, bzob Saúl choo iz goc me zhirey zho. Lëe pxoz Saúl ga brieelë Cis, meñ ne ziaad lo xtii pxozgol no Benjamín. <sup>22</sup> Zeene laa Dios ptiche dziin co lo Saúl, dzigo bzo me David goc rey. Lëe David ga rzeet Dios zaatne znu rnee: “Rleynie naa xingan Isaí zha ne lë David, laa naa gonle ib zuñ David miñe gnabey naa.” <sup>23</sup> Ni lo xtii David co nagon brieequia Jesús, meñ ne pxeel Dios lo guidzliu biaadsilaa miech lo doñ, zigne psanle me diidz lo xmengol no padzeela.

<sup>24</sup> Leñ dze ne merle xoobneñ cho nac Jesús, leñ dze co bnee Juan Bautist lo grë meñ Israel: csaan zho xquieñntseeb zho gnab lo perdon lo Dios, zeena chobnis zho. <sup>25</sup> Laa zeene zhile gdziñ dze ne gut zho Juan, dzigo bnee me lo miech rëb me: “Golgacnañ ganle, led naad nac meñ ne quiambëz to ga cxeel Dios. Merle guñbey to me, ti meñ non nac me, per ni par gac naa ti nguñdziin win ne glit lab me ni me raguiald naa.”

<sup>26</sup> ‘Golgacnañ sca ganle bets: zigtaa tow ne ziaad lo xtii Abraham, zigtagaa tow ne nac to miech stib guiedz zha ne riladzle Dios, ib laa Dios pxeel Jesús csi-laa me ne lo xtoñ ne grëse ne. <sup>27</sup> Grë zha Jerusalén ni grë zha ne rnabey lo zho, ib bieñd zho cho nac Jesús, niicle ne scataa gzobse dze ne rdziiladz zho lo dziin, rlab zho lo grë guits ne pquiaa zha ne biadteed xtiidz Dios padzeela; haxta bnab zho gut me zigne bneese grë zha co. <sup>28</sup> Niicle ne goñ zho peet xtoñd me, niicle ne brieequiad doñ ne pquiaaqui zho me, per bguib zho bdeeda diidz bnabey Pilat gut me.

<sup>29</sup> Blozhse psacsi zho me, pteed zho me grëse zigne bzeetle grë zha ne biadteed xtiidz Dios ga, dzigo güey zha ne blit me lo cruz, güeyqueets zho me. <sup>30</sup> Per bleeban Dios me. <sup>31</sup> Grë zha ne güeynal zhits me zeene brieë me Galilé bdziñ me Jerusalén, nzian zho goñ me; ni niina grëse zho laa zho quianee lo miech ganle cho nac me.

<sup>32</sup> ‘Scaquegaa no grop no Bernabé, laa no ziaadnie diidz lo to gacnañ to ganle niina ne laa Dios bleeaban Jesús, laa me been miñe bnee me lo pxozgol ne padzeela. <sup>33</sup> Lëe Jesús ga raquiet lo Salm brop, zaatne rnee: “Xpëed naa nac luu. Desde nadze laa zho guñbey ne Xpëed naa nac luu.” <sup>34</sup> Ni bzeetle Dios ne laa me cueeban Jesús, bzeetle Dios xiñd xcuerp me leñ baa; miñ co ga raquiet lo Xtiidz me, zaatne rnee: “Zuñlay naa luu, zigne bnese naa lo David guñ naa.” <sup>35</sup> Laa stib lo Salm ne pquiaa David rnee: “Gdeete luu diidz xiñ xcuerp naa leñ baa.” <sup>36</sup> Rlu led Davite raquiet ga, sac zeene bza dze ne goc me dziin lo menladz me laa me gut, ni zaatne pqueets zho me, ga bnitlo xcuerp me.

<sup>37</sup> Led meda, zhaa meñ ne raquiet ga; gacxe na rneew waa peet gacd xcuerp meñ co, zbeeban Dios me.

<sup>38</sup> ‘Grëse to bets, goñgacnañ sca ganle! ¡Jesús nac meñ ne rsilaa miech lo doñ! Zha ne riladztaa me dib

zdoo zho, tel pe nactaa grë xtoꝛ zho, sanmbe me zho. Miñe wlaṭaa brielod ngaa to, niicle ne zienaꝛ to xley Moisés; sac niicle guñ tow grëse zigne naca, csañmbe-da to lo doꝛ.

<sup>40</sup> ¡Golguien sca gacnroladzde to! Zeena ygaade to miñe bzeet zha ne biadteed xtiidz Dios padzeela, zeene znu bnee zho:

<sup>41</sup> Grëse to ne rzhidznie to miñe nac diidzli, bii zañ to gañle laa naa guñ ti milagr nroob ne gzee zdoo to;

per znitlo to, sac gliladzde tow niicle guiaad zha ne gzodiidza lo to.

<sup>42</sup> Blozh bnee Pabl; laa zeene laa Pabl griee ga grop Pabl Bernabé bñab grë miech co lo zho, siguiel zho quiet sti zħmal co biire tsie zho tsieseed zho zho.

<sup>43</sup> Zeene brie zho leñ yadoo co, nzian grë zha Israel, nzian grë zha stib guiedz zha ne rliladzle Dios zienaꝛ zhits zho. Nèz no zho bnee zho lo grë miech co tiblique tso guic zho tsienal zho zhiwseed Dios, guien zho gañle pa lotaa noxco me zho.

<sup>44</sup> Biet sti zħmal co, miech guizhiu ne goclo leñ yadoo co, zootle zig grëse miech guiedz co pcaalsa ga ziequiaadiag zho Xtiidz Dios. <sup>45</sup> Zha ne rnabey lo grë zha Israel ne no ga, zeene goñ zho scataa ndal miech ne goclo ga, blëe zho lo Pabl, ndox zho lo me, rëb zho led diidzlid nac miñe rseed me.

<sup>46</sup> Niicle Pabla, niicle Bernabéw bdziebd zho, dzigole bnee zho lo zho rëb zho:

—Nli to glo rieguaꝛ yquiaadiag Xtiidz Dios ne nac to zha Israel. Per ne squi ruñ to guielntseeb nëde to ycaania tow par yгаа to guielmban ndzon ne rneedz Dios; na laa no guioseed grë zhazit. <sup>47</sup> Ni scalegaa rnabey Dios gaca, sac znu rnee me:

Laa naa bzole luu tsienee luu Xtiidz naa lo grë menzit, luu gac zig ti biini ne gziini lo grë miech ne ndxie lo guidzliu;

zeena guien zho zha laa zho lo doꝛ.

<sup>48</sup> Grë zha ne nac zhazit, zeene bin zho sca rëb Pabl, per nli rley zho, rdeed zho xquizh lo Dios scataa ndzon nac Xtiidz me. Grëse zha ne nole yгаа guielmban ndzon ne gdeed Dios ga, grëse zho dze cogazh laa zho bliladz Jesús. <sup>49</sup> Dipse dan co, gocnañ miech Xtiidz Dios.

<sup>50</sup> Grë zha Israel ne rlëe lo Pabl ga, psilo zho pquiiil zho grë men wnaa ne nac diidz noxco Xtiidz Dios, ni güey zho güeynee zho lo grë zha ne nac men non lad guiedz co; zeena ctsidil zho Pabl grop Bernabé, guñcxoon zho zho dan co. <sup>51</sup> Zeene bin Pabla grop Bernabé, par glu ne nonguiel sca been zha co zho, beenmbe zho grë yudie co ni zho laa zho brie ga, laa zho zie nëz Icon. <sup>52</sup> Grë zha ne bliladz Jesús ga, nguieel rac zho, rdeed Espíritu Sant guielbiini lo zho.

#### Bdziñ Pabl Icon grop me Bernabé

**14** Zeene bdziñ Pabl Icon grop me Bernabé, güey zho tib xyadoo zha Israel zob lad guiedz co, bnee zho Xtiidz Dios lo grë zha ne pcaalsa ga. Zigtaa zha Israela, zigtagaa zha lad guiedz cow, nzian zho

bliladza. <sup>2</sup> Laa grë zha Israel ne bliladzda, psilo zho bloo zho diidz lo grëraa miech guiedz co glëenie zho Pabl grop Bernabé. <sup>3</sup> Niicle sca been grë zha co per wbid zho, bii blëz zho ga, peet dzeb nod lo zho rie zho rienee zho Xtiidz Dios lo miech; scagaa Dios, nzian grë milagr ne bdeed me diidz ruñ zho par glu ne nli Xtiidz me nonee zho.

<sup>4</sup> Dzigo grë miech ne no lad guiedz co goc zho chop dii, groꝛ zho racnie grë zha Israel ne rlëe ga, zgroꝛ zho racnie grop zha poxtl co. <sup>5</sup> Zha ne rlëe ga, zigtaa zha Israela zigtagaa zha guiedz cow, bñediidz zho grë zho wxtis laa zho tsie tsiedeedquie zho Pabl grop Bernabé.

<sup>6</sup> Zeene bin Pabla grop Bernabé, mazd laa zho brie ga, laa zho zie nëz xtan zha Licaon. (Güey zho Listr, güey zho Derb ni grëraa guiedz ne ndxie gax ga; güeynee zho lo grë miech co zha nac Xtiidz Dios.)

<sup>8</sup> Guiedz Listr ga goñ zho ti mgui në ni, wlaṭaa lo xquielmban me ib gard së me; sac scale në ni me zeene gol me. <sup>9</sup> Zeene goñ Pabl dze zob me rquiaadiag me miñe nonee Pabl lo grë miech co, dzigo dzeque bui Pabl lo me, goñ Pabl dib zdoo me rliladz me nli zrieelo guñguiac Dios me; <sup>10</sup> dzigo nguiedz bnee Pabl lo me, rëb Pabl:

—¡Beenli ni luu, zeena bzoli!

Zigne sca bnee Pabl, znuse guso nguzhoon me, bzoli me laa me psilo bzë. <sup>11</sup> Zeene goñ grë miech co sca biac me, psilo zho con xtiidz zho nguiedz rnee zho:

—¡Diosle i goñ, nasi zig rlu miech rlu me laa me biet gbaa ziaadgañ me ne!

<sup>12</sup> ¡Masaque rzac zho lë xdios zho ga! Rnee zho Bernabé nac dios Júpiter, laa Pabl nac dios Mercur, sac Pabl nac zha ne ndziibraa rnee. <sup>13</sup> Ro guiedz co ga zob xyadoo zhimdio zho Júpiter, dzigo brie pxoz ne no yadoo co grë me miech lad guiedz, zienie zho ngon, zienie zho guiee, nañ zho gut zho ngon co cogon zho ma lo Pabl grop Bernabé. <sup>14</sup> Zeene bien Pabla grop Bernabé wbiñladz guic zho. Ptsiez zho xab zho, bzëeb zho lad grë miech co, nguiedz rnee zho lo zho:

<sup>15</sup> —¡Ndzinli goꝛgac! ¿Pe nacre squi rac to? ¡Golgañ gañle miech guidzliuque nac no, tibaque nac ne grë ne! Laa no ziaad lo to ziadseed no to wseed cub ne nac Xtiidz Dios, zeena guien to csaan to grë ncuaane paat rquiind ne ruñ to i, gbiire gbig to lo Dios men ne nli-paa mban. Me bzaa gbaa, me psañ guidzliu, me psañ nisdoo, grëse ncuaane no gbaaw, ncuaane no lo guidzliuw, ncuaane no lo nisdoo, me bzaaw grësew. <sup>16</sup> Niicle ne glo bdeed me diidz been miech grë ncuaane gocladztaa zho, <sup>17</sup> per psaanladz me zho. Gocnie me zho zigne racnieque me ne niina, rsiaab me nisguie rac xcuaa ne, rneedz me ncuaane rdioow ne gzataa dze, rneedz me guielbley lo ne.

<sup>18</sup> Niicle sca rnee grop zha poxtl co, nen bin grë miech co diidz beete zho ngon co ngogon zho ma lo zho.

<sup>19</sup> Leñ dze co, blalaa zha Israel ne ziaad nëz Antioquí ni nëz Icon bdziñ Listr ga. Psilo zho bloo zho diidz lo grë miech co gocntseeb zho lo Pabl; güey grë miech co bdeedquie zho Pabl.

Masaque bzhaac zho gutle Pabl, bdoobniu zho me güeyron zho me tiblād ro guiedz. <sup>20</sup> Grē zha guiedz co zha ne rliladzle Jesús, zeene bin zhow, güey zho zaatne nix me ga. Lēētaaque ndxie zho lo me, zeene laa me guche; ga guche me laa zho zeynie me nēz leŋ guiedz. Biini liu, pcaa me nēz grop me Bernabé laa zho zie nēz Derb.

<sup>21</sup> Bdzin zho Derb, psilo zho bnee zho Xtiidz Dios lo grē miech co; ndal grē zha ne bliladza. Blozh ga, laa zho wbi ga biire güeyted zho nēz Listr, güeyted zho Icon, ni güeyted zho Antioquí, <sup>22</sup> güeynee zho lo grē zha ne rliladz Jesús ga, pchoobladz zho zdoo zho, pso zho diidz lo zho, niicle nroob guieŋnē ne noded zho per none tibaque gac guic zho tsienal zho Xtiidz Dios; sac ible sca nzian ncuaaŋe ted zho laga gdziŋ dze ne gdziŋ zho zaatne rnabey Dios.

<sup>23</sup> Tib tib guiedz co, bzose zho grē zha ne so gnabey lo grē zha ne rliladz Jesús ga; rlozhse rcuan zho grē zho zho ni rzodiidznie zho Dios, dzigo laa zho rsaŋ zha co ladznia me yquianap me zho.

### Bdzin Pabl grop Bernabé nēz Siria stib

<sup>24</sup> Nēz no Pabl grop Bernabé bded zho dib xtan zha Pisis, bzēeb zho xtan zha Panfil, bdzin zho guiedz Perg. <sup>25</sup> Blozhse bnee zho Xtiidz Dios lo grē miech co, dzigo laa zho brie ga, bdzin zho guiedz Atalia.

<sup>26</sup> Atalia ga bzēeb zho barcw bdzin zho sti guiedz ne lē Antioquí, gataa laa zho psiaal viaj co. Guiedz coque ga brie zho grop zho güey zho grē guiedz co güeynee zho Xtiidz Dios lo miech; zeene sca bna grē zha ne rliladzle Jesús ga lo Dios gacnieŋ me zho tsiegun zho xtsiin me.

<sup>27</sup> Zigne bdzin zho Antioquí ga, bnabey zho pcaalsa grēse zha ne rliladz Jesús, bzodiidz zho lo grē miech co grēse zha gocnieŋ Dios zho güeygun zho xtsiin me, ni zha rquia zdoo Dios zha ne nacd zha Israel rbedz me zho ye zho rzēeb xnēz me.

<sup>28</sup> Xtselaa bio Pabl ga grop me Bernabé, blēz zho lo grē zha ne rliladz Jesús ga.

### Pcaalsa zho Jerusalén

**15** Ga no Pabl grop Bernabé zeene bdzin bla zha ne ziaad nēz Judé, psilo zho noseed zho grē zha ne rliladzle Jesús ga, rnee zho lo zho ib none tso zho bey zigne rnabey xley Moisés, niicle ne rliladzle zho Jesús; zeena sca csilaa Dios zho lo xtol zho.

<sup>2</sup> Zeene gon Pabl sca noseed zha co miech, nacdne bdidiidznieque Pabl zho grop Pabl Bernabé. Dzigo mazd bnediiz grē zha ne rliladz Jesús ga, bzo zho zla zha ne gacgza Pabl grop Bernabé tsie zho Jerusalén tsienabdiidz zho lo zha poxtl ni lo grē zha ne rnabey lo zha ne no ga, dieŋ pe guiab zho.

<sup>3</sup> Nacdne brie zho zie zho. Nēz no zho bded zho xtan zha Fenicia, xtan zha Samar; zaatne notaa zha ne rliladz Jesús, rzodiidz zho lo zho grēse zha nobedz Dios grē zha ne nacdrea zha Israel, rsaan zho grē zhiwseed

xmengol zho laa zho rliladz Jesús. Rley grē miech co ron zhow. Sca bio zho nēz, laa zho bdziŋ Jerusalén.

<sup>4</sup> Zeene bdziŋ zho Jerusalén, pcaalsa grē zha poxtl, grē zha ne rliladz Jesús ga, ni grē zha ne rnabey lo zho. Dzigo ga bzodiidz Pabl grop Bernabé grēse zha gocnie Dios zho, zeene güeyted zho grē dan co güeynee zho Xtiidz me lo miech. <sup>5</sup> Miŋ co quianee zho zeene guso bla zha ne glo goc farisé rēb zho, grē zha ne nacd zha Israel zeene laa zho rliladz Jesús ib none tso zho bey, ni none gun zho grēse miŋe rnabey Xley Moisés. <sup>6</sup> Dzigo nacdne bnabey grē zha poxtl co ni grē zha rnabey co, ycaalsa zho stib dieŋ zhapaa gaca, pe nonguielā tso grē zha zit bey co.

<sup>7</sup> Zeene pcaalsa zho, goc pa lo quianee zho zeene guso Pedr rēb Pedr lo zho:

—Grēse to bets, golquiaadiag miŋe gne naa lo to nu ganle. Led rsoladz to, zeene griŋpaa psilo quiagaaz Xtiidz Jesús lo miech, ible Dios bzooblo naa pxeel me naa gaseed naa grē zha ne nacdrea zha Israel gliladz zho me. <sup>8</sup> Ni megaa ne runbey me zdoo tib tib miech, laa me blu ganle, niicle ne zha zit nac zho laa me pcaania zho; pxeel me Espiritu Sant nacdne zho, zigne pxeelque Espiritu Sant nacdne ne. <sup>9</sup> Gotsaa gwi ne ganle, led yed Dios rbe dieŋ cho nac zha Israel cho nacdrea zha zit; zigtaa zhaw, zigtagaa new, laa me pcaania ne porne dib zdoo ne bliladz ne me. <sup>10</sup> ¿Zha nac dzigo ne racladz to gnabey to grē zha co gun zho grē miŋe nac xley ne? ¿Pe niacxe rieŋraa ne lo Dios dzigo? ¿Niicxe ne name, niicxe xmengol ne brieelod niuŋa zigne naca!

<sup>11</sup> Golguien ganle, zigtaa zhaw zigtagaa new laa me csilaa ne lo dol grē ne, per nacdā por ncuaaŋe rdziunŋ ne; sinque laa me csilaa ne porne nquialadz me ne.

<sup>12</sup> Zeene blozh sca bnee Pedr, dzese biac zho grē zho; dzigo laa Pabl grop Bernabé psilo bzodiidz grētaa milagr ne blu Dios lo grē menzit zaatne güeynee zho Xtiidz me lo grē miech co. <sup>13</sup> Blozhse bnee grop zha co, laa Jacob gusoque rēb me:

—Grēse to bets, golquiaadiaggaa chop lan xtidz naa naganle gne naa lo to. <sup>14</sup> Laa Pedr bzodiidzle lo ne ganle zha psilo bredz Dios grē zha zit, bzooblo me zho ye zho gac zha ne sēeb xnēz me. <sup>15</sup> Ga nagon goca zigne zhobneese lo Xtiidz me, miŋe pquiaa grē zha ne pxeel me padzeela, rneew:

<sup>16</sup> Tedse nu ganle,

laa naa cuedz grēse miech ne ygab lo naa; grē zha xtii David zha ne bzozit, laa zho gbig stib.

<sup>17</sup> Horco grēse zha zit, laa zho gon ganle cho nac naa, zeena grielo sēeb zho xnēz naa.

<sup>18</sup> Znu nac xtiidz Dios, ni padzeelale bzeet me ne laa me gun miŋ co.

<sup>19</sup> Miŋ co nagon grē zha zit ne rliladzle Jesús, ib nonguielā ga gnabey ne zho gun zho miŋe nac xley ne. <sup>20</sup> Sinque mazd yquia tib diidz cxeel ne lo zho gon zho, grē ma ne rut miech rgogon zho lo grē zhimdio zho, ib gowd zho bēel co; grē ma ne rxieed ren zeene ret ma, gowd zho ma; ni niicle grēragaa ma ne gut zho, ib gowd zho xchen ma. Grē zha bgui, nodne tsonie zho wnaa ne nacd tsieel zho; niicle wnaagaaw,

nodne tsonie zho mgui ne nacd tseel zho. <sup>21</sup> Niicle mazd padzeelaw, tibaque quiayon miech guṅd zho miṅ co; sac desde hor co tib tib guiedz bzoše Moisés tib zha ne gneew lo miech leṅ xyadoo zho, dze ne rdziiladz zho lo dziin.

<sup>22</sup> Blozhse ga, dzigo biaan zho diidz so chop zha ne tsie Antioquí tsienal zhits Pabl grop Bernabé, tsiesan zho ti diidz ne guey lo zha co. Nacne bzo zho Judas xingang Barsabás, ni bzo zho Silas; grop zha co, zha rien nac zho lo gréaa zha ne rliladz Jesús ga. <sup>23</sup> Pquia ti guits güey zho, rnee lo guits co:

“Zigne nose no Jerusalén nu, zigtaa zha ne nac poxtla, zha ne rnabeya ni gréaa zha ne rliladz Jesús nuw, grè no laa no rquiaabdiuzh to grése to bets ne nac to zha ne no guiedz Antioquí, ni gréaa guiedz ne ndxie nëz Siria i, ni nëz Cilis.

<sup>24</sup> Niina ne gocdion no laa bla zha ne nacgrè no nu biaad lo to i, biaadcots zho guic to dieṅ peraa no guṅ to. Gacnaṅ to ganle led nod pxeel zho, <sup>25</sup> gane niina bzodiidz no grè no bzo no Judas ni Silas ziaadnal zhits Pabl grop Bernabé, laa zho ziaad i ziaadgaṅ zho to. Zha nziuu nac Pabl grop Bernabé lo no, sac goṅ rbeeladz zho xquielmban zho quiayuṅ zho xtsiṅ Jesús.

<sup>28</sup> Lo godiidz ne bdziuuṅ no, laa no bdziaṅle nonguielṅda ne dieṅ peraa gnabey no to guṅ to, ni niclegaa Espiritu Sant scaque rnee me. Rquiind ne peraa guṅ to, lèlèw ga totsaque tsoxco to <sup>29</sup> gowde to xpèel grè ma ne rgogon miech lo grè zhimdio zho; grè ma ne rxieed ren zeṅe ret ma, gowde to ma; ni niicle gowdgaa to xchen grè ma ne gut to. Grè zha bgui, nodne tsonie zho wnaa ne nacd tseel zho; niiclegaa wnaaw, nodne tsonie zho mgui ne nacd tseel zho. Miṅ rii nagoṅ nac miṅe no tsoxco to.

‘Guiaaṅnie Dios to sca.’

<sup>30</sup> Gza tap zha co laa zho brieer Jerusalén, laa zho zie nëz Antioquí. Zeṅe bdziṅ zho ga, bnabey zho pcaalsa grése zha ne rliladz Jesús, dzigo bdeed zho guits co lo zho. <sup>31</sup> Zeṅe gocnaṅ grè zha co zha rnee low, rley zho sacne pchoobladza zdoo zho. <sup>32</sup> Blozhse ga, psilo Judas grop Silas pseed zho grè miech co Xtiidz Dios, zeṅa dib zdooraa zho gnalo zho Dios; sac bdeed me guielbiini lo Judas grop Silas rteed zho xtiidz me lo miech.

<sup>33</sup> Xtselaa blèz Silas ga grop Judas, laa zeṅe gol dze ne laa zho grieer gbiire zho nëz Jerusalén stib, iṅe güeyzonèz grè zha co zho, rdeed zho xquizh lo zho. <sup>34</sup> [Laa zho nole nëz, tibaque zeṅe rëb Silas laa Silas guiaaṅaque ga spalal dze.] <sup>35</sup> Laa Pabl grop Bernabé ible laa zho biaan ga been zho xyudar grè zha ne noseedle miech ga.

### Ptso Pabl grop Bernabé

<sup>36</sup> Goc palal dze no Pabl guiedz Antioquí ga grop me Bernabé, zeṅe rëb me lo Bernabé laa zho gbiire tsie grè guiedz ne güeynee zho Xtiidz Dios lo miech ga, par gacnaṅ zho dieṅ yo grè zha co. <sup>37</sup> Dzigo gocladz Bernabé ye Juan Marcw nienie zho; <sup>38</sup> per bzhiguielṅd Pabl, sac zeṅe güeynie zho Juan glo, psanaque Juan zho

guiedz Panfil, laa Juan biire zey Jerusalén, güeynalṅd Juan nlozh nsiaaṅ zho lo dziin co.

<sup>39</sup> Miṅ co pquiaqui bneelsa Bernabé grop Pabl, nrooblaa güey lo xtiidz zho; nacne gataa laa zho ptso. Pcaa Bernabé nëz grop Bernabé Juan bzëëb zho barcw zie zho nëz lo guidzliu win ne no lo nisdoo lè Chipr; <sup>40</sup> laa Pabl goc grop Silas. Blozhse bnab grè zha co lo Dios gacnieṅ me Pabl grop Silas, laa zho brieer ga <sup>41</sup> güeyted zho grè guiedz ne ndxie nëz xtan zha Siria, grè guiedz ne ndxie nëz Cilis, güeynee zho lo grè miech ne rliladz Jesús nëz co, güeychoobladz zho zdoo zho.

### Beenbey Pabl Timoté

**16** Leṅ dze co güey Pabl grop Silas güeyted zho Derb ni güeyted zho Listr. Listr ga beenbey zho tib zha nguieg ne rliladzaque Jesús lè Timoté, ti meṅ Israel ne rliladzle Jesús nac xniaa me, laa pxoz me nac meṅ Gres.

<sup>2</sup> Grése zha Listr, zha Icon, zha ne rliladz Jesús tibaque rzeet zho Timoté rnee zho ti miech ndzinli nac me, nacne bnee Pabl lo me tsienal me zhits Pabl. <sup>3</sup> Ni ne nod me bey ne rio zha Israel sac led zha Israeld nac pxoz me, dzigo bloo Pabl me bey co, zeṅa tsod pe glisqui grè zha Israel ne no nëz co.

<sup>4</sup> Laa me zienal zhits Pabl. Guiedz ne rdedtaa zho rnee zho lo grè zha ne rliladz Jesús ga, tsoxco zho guṅ zho grè miṅe pso zha poxtl ga diidz, grè zho zha rnabey ne no Jerusalén. <sup>5</sup> Zeṅe ron grè zha cow, dib zdooraa zho rnalo zho Dios, zigse zie dze racnzianraa zha ne rliladz Jesús.

<sup>6</sup> Blozh ga, tibbdeed zho xtan zha Frij ni xtan zha Galás, sac bdeete Espiritu Sant diidz nienee zho Xtiidz Dios lo miech grè guiedz ne ndxie nëz Asia ga. <sup>7</sup> Zeṅe bdziṅ zho zaatne rsilo xtan zha Misia gocladz zho nie zho nëz xtan zha Bitin, scaque bdeete Espiritu Sant diidz nie zho nëz co. <sup>8</sup> Dzigo tibbdeed zho dib xtan Misia bdziṅ zho ti guiedz ne ndxie ro nisdoo lè Troas.

<sup>9</sup> Guieel co blulo ti mgui Macedon lo Pabl, rnab me guṅ Pabl guielnzaac tsie Pabl nëz co, tsiegun Pabl xyudar grè miech co.

<sup>10</sup> Nacne hor cogazh bzhixcuaa no, sac bien no ible Dios racladz guio no nëz co guionee no Xtiidz me lo miech.

<sup>11</sup> Dzigo brieer no ga bziaab no ti leṅ barcw bdziṅ no ti lo guidzliu win ne no lo nisdoo lè Samotras. Biini liu brieer no ga bdziṅ no Neápolis, ga bliiaz no wdze co.

<sup>12</sup> Biini sti liu co brieer no Neápolis bziani no bdziṅ no Filip. Lèè guiedz co riaan zaatne rsilo xtan zha Macedon, niapse meṅ Roma no ga; nzianlaa ngbidz bliiaz no ga.

<sup>13</sup> Laa tib dze ne rdziiladz miech lo dziin, brieer no bio no tib lad ro guiedz co, gax ti ro guiubee, zaatne bdzion no rcaalsa zha ne rienab lo Dios. Bdziṅ no nzianlaa meṅ wnaa ndxie ga, dzigo psilo no bnee no lo zho cho nac Jesús. <sup>14</sup> Lad co no ti wnaa Tiatir lè Lidia, rto me grè lar nizhnie nlaan miṅe nac lar niazh; ye me dib zdoo me rliladz me Dios. Laa me noquiaadiag

miñe nonee Pabl ga, zeene psiaab Dios guic me bliladz mew.

<sup>15</sup> Dzigo hor cogazh brobnis me grë menlidz me; blozh ga, bredz me no guiobiaaz no lidz me, nëchaa me lo no:

—Tejne rzac to nli dib zdoo naa rleyne naa Dios, gojtë sca cuëz to lidz naa.

Rzoobguic me lo no, nacne biobiaaaze no lidz me.

### Bio Pabl ladzguiib grop Silas

<sup>16</sup> Tib dze, lëëtaque zio no zaatne riozodiidznie no Dios, bdzieelo no ti ndzooop nguieg noguitnie menḁox. Zëëb diidz grëse tel pe rnabdiidz miech lo ndzooop, rnee menḁox cow; nroob dimi ne riab nia zha ne rnabey ndzooop. <sup>17</sup> Naḁ ndzooop zhits no, nguiedz roptsie ndzooop rnee ndzooop:

—iXtsiñ Dios ndzon ne zob gbaa gon noyūñ gza mgui rii! iLaa zho ziadseed to zeena gacnañ to zha csilaa Dios to lo xtoḁ to!

<sup>18</sup> Nzian dze zaatne rdzieeltaa no ndzooop tibaque sca rnee ndzooop. Zeene bieedtaa guic Pabl, biireque me bnee me lo menḁox ne noguitnie ndzooop ga, rëb me:

—Jesús nacie naa, ni laa naa rnabey luu gon ni-inagazh psaan ndzooop qui.

Zigne sca rëb Pabl laa menḁox co bzhoon.

<sup>19</sup> Gza zha ne rnabey ndzooop ga, zeene gon zho runḁdraa ndzooop guieḁnsin co gdziniāa ndzooop dimi, bnaaaze zho Pabl grop Silas güeyzo zho zho lo wx-tis, rëb zho:

<sup>20</sup> —iGolwi ganle pe nac ncuaane noyūñ grop zha Israel rii lad guiedz nu! iNogodiḁ zho miech, laa zho quiaseed miech ncuaane nonguiēdraa dziuñ ne nac ne zha Roma!

<sup>22</sup> Pcaalsa grëse miech co, grëse zho ntseeb rac zho lo Pabl grop Silas. Dzigo bnabey wxtis co brieexab zho grop zho bdeed bar zho zho, nroob bdiñ zho zho.

<sup>23</sup> Blozhse bdiñ zho zho laa zho psëëb zho ladzguiib, bnabey zho men ne quianap ladzguiib ga tibaque yquianap me zho, sac tel laa zho xoon me tsietizha.

<sup>24</sup> Zeene bin men co sca rëb zho, güeyaque me güeysëëb me zho stib leña miñe riaañ caañraa, ga psëëb me ni zho lad chop lë yag nroob.

<sup>25</sup> Wdze co, zig groḁ guieela laa Pabl grop Silas bii noyooḁnie Dios, ni rnab zho lo me gacnieñ me zho. Grëse zha ne no ladzguiib ga, ron zho sca no Pabl grop Silas. <sup>26</sup> Tibaque zeene bni ti zhodox, psiniw dib nase ladzguiib co, grëse ro ladzguiib co bzhiāl, guiib ne no nia grë zha ne no ga, wbiḁa.

<sup>27</sup> Lëëled brieemcaallo men ne quianap ga, zeene gon me grëse ro ladzguiib co zonial, masaque güeynie guic me bzhoonle grë zha ne no ga, bdobaque me spad ne ney me laa me zie gut me me. <sup>28</sup> Horco broptsie Pabl lo me, rëb Pabl:

—iGute luu luu! iGrë no ndxie no, choot bzhoonḁ!

<sup>29</sup> Lëëled bnab me biini, bzëëb nguzhoon me leñ ladzguiib, masaque rhidz me dzeb pquitsgzhib me lo Pabl grop Silas. <sup>30</sup> Blee me zho ga, rëb me lo zho:

—Golnë lo naa, ipe nac miñe gon naa zeena csilaa Dios naa lo grëtaa xtoḁ naa?

<sup>31</sup> —Dib zdoo luu bliladz Jesús, men rnabey ne pxeel Dios lo guidzliu —rëb zho—, dzigo silaa me luu lo doḁ, silaa me menlidz luu ne.

<sup>32</sup> Dzigo güeynie me zho lidz me, bnee zho Xtiidz Dios lo me grë menlidz me. <sup>33</sup> Guieel co no me bdiib me zhits zho, zaatne brëë bar ne bloobar zho zho; blozhse ga, laa me brobnis grë menlidz me. <sup>34</sup> Bnabey me goclo ti guieḁwagw downie me zho, rley me, niicle grëgaa menlidz mew rley zho ne laa zho bliladz Jesús.

<sup>35</sup> Biini liu, pxeel wxtis zha ne güeynie diidz lo me cuee me Pabl ladzguiib grop Pabl Silas. <sup>36</sup> Dzigo güey me güeynee me lo Pabl rëb me:

—Laa wxtis pxeel diidz cuee naa to ladzguiib; zacle nasca grieet to, peet tsieniedraa guic to.

<sup>37</sup> Dzigo rëbchaa Pabl lo zha ne bdziñnie diidz ga:

—iZha ndzielguictaa zhiwxtis to gon! Squi ndxie menḁuiedz bdiñ zho no, ni gardle gacnañ zho dieñ pe nli no pe falt ne rdziaap no. Bnabey zho bio no ladzguiib, ni zha Roma nac no; nana racladz zho zhlianse grieet no. iLëda ga gon! iGoltsie goḁguiab lo zho, lëëzhal zho guiaad guidaabe zho no nu!

<sup>38</sup> Dzigo güey zha co güeynie zho diidz lo wxtis.

Zeene bin wxtis zha Roma nac Pabl, bdzieb zho;

<sup>39</sup> lëëled güey zho ro ladzguiib güeynab zho dispensar lo Pabl grop Silas. Blee zho zho ladzguiib, ni bnab zho lo zho siguiel zho mazd gbi zho guiedz co.

<sup>40</sup> Ga brieex zho güey zho lidz wnaa ne lë Lidia ga, bnee zho lo grë zha ne pcaalsa ga, zha ne rliladz Jesús, pso zho diidz lo zho tiblique gac zho tsienal zho xtiidz me. Blozhse ga, dzigo laa zho brieex guiedz co.

### Güey Pabl Tesalónica grop me Silas

**17** Brieex Pabl guiedz Filip grop me Silas, güey zho güeyted zho guiedz Anfípolis ni guiedz Apolonia, bdziñ zho guiedz Tesalónica. Lad guiedz co zob ti xyadoo zha Israel, <sup>2</sup> dzigo güey Pabl güeynee me Xtiidz Dios lo grë zha ne rcaalsa ga, zigne runaque me grëraa guiedz ne zieded me.

Blëz zho ga tsoñ zhmal, gzobse dze ne rdziiladz miech lo dziin güey Pabl güeyzodiidznie Pabl grë zha co, <sup>3</sup> bzeet me lo zho grë zaatne raquiet grëtaa ncuaane ted men ne cxeel Dios lo guidzliu ga, ni zha grieeban me; ni blu me lo zho gacnañ zho ganle lëë men co ga nac Jesús.

<sup>4</sup> Ndal zha ne pquiaadiag xcodiidz Pabl, bien zho ne nli sca naca, laa zho bliladz Jesús, ndal zho nac zha nëz Gres, zha ne noxcole miñe rnabey Dios, ye blalaa men wnaa ne nac men non lad guiedz co. Laa zha Israel ne rnabey yadoo co, zeene gon zho scataa ndal zha ne bliladz Jesús, blëë zho; güey zho güeytop zho grë zha yozh ne quianzë lad guiedz co, ti ruid ne been zho lad guiedz. Güey zho güeysëëb zho lidz Jasón nañ zho niebee zho Pabl ga grop Silas, ngo zho zho ladznia grë miech co.

<sup>6</sup> Zeene gon zho bgaad grop zha co lo zho, bnaaaze zho Jasón ni zla zha ne rliladz Jesús, bdo-

niu zho zho bdziñnie zho zho lo wxtis, roptsie zho rnee zho:

—iGolgan ganle laa zha ne sca quianzè nocots guic grè miech, laa zho blansole nu! <sup>7</sup> Ni Jasónpaa rdeed za-atne rbèz zho. Racladzdraa zho guñ zho miñe rnabey rey César, sac rnee zho no sti zhirey zho lè Jesús.

<sup>8</sup> Grè zha wxtis co ni grè menquiedz ne pcaalsa ga, zeñe bin zho sca rnee grè zha co, rienndraa zho zha guñ zho. <sup>9</sup> Miñe been zho beenquizh zho Jasón ti mult gza Jasón zla zha co, dzigo laa zho wbi ga.

<sup>10</sup> Pcow liu co, wxiña laa grè zha ne rliladz Jesús ga bleese Pabl ga grop me Silas, pxeel zho zho nèz Beré. Zigne bdziñ zho Beré, gloque ti xyadoo zha Israel güey zho.

<sup>11</sup> Grè zha Israel ne no Beré ga, rley zho rquiaadiag zho miñe rnee Pabl grop Silas, gzobse dze rlab zho lo Xtiidz Dios rwi zho dien pe nli miñe rnee zho ga. Ndal zha Israel co bliladz Jesús, ndal zha Gres ne, zigtaa mguiw zigtaa wnaaw; blalaa meñ wnaa co zha non nac zho guiedz co. Tibliladz nac grè miech co, gocntseebd zho zigne gocntseeb zha Tesalónica.

<sup>13</sup> Laa zeñe gocnañ zha Israel ne no Tesalónica laa Pabl nolaque guiedz Beré, güeyaue zho güeyquiiil zho grè miech co glèenie zho Pabl. <sup>14</sup> Dzigo lèlèd briece bla zha ne rliladz Jesús ga, zienie zho Pabl nèz ro nis; laa Silas grop Timoté biaan ga. Güey zha co güeysañ zho Pabl guiedz Aten; laa zeñe laa zho wbi, pxeel Pabl diid lo Silas grop Timoté tsieniob zho Aten.

### Leñ dze ne no Pabl Aten

<sup>16</sup> Laga quiambèz Pabl gdziñ Silas grop Timoté güey me güeyted me lad guiedz co, wbiñladz guic me gon me led zhid grè mdio ne riegan grè miech co. <sup>17</sup> Nacne bioxco me bnee me Xtiidz Dios lo zho, güey me xyadoo grè zha Israel ne no ga, bzodiidznie me zho grè zho zha guiedz co zha ne rliladzle Dios. Gzobse dze rie me leñ guiedz rienee me lo grè miech ne rdziñ ga. <sup>18</sup> Tib dze bdzieelo me bla zha rac ne zianañ zhiwseed ti men lè Epicur, ni zla zha ne zianañ wseed ne rnee zho estoic; psilo me bzeet me Jesús lo zho, bnee me zha brieceban Jesús. Zeñe bin zho zha rnee me, no bla zho rzhidznie me, rnee zho:

—iDieñ pe riab guic men qui rnee me, ziaadquidie me miech!

Zlagaa zho rnee, nend cho zhiwseed sti Dios ne rliladz miech stib dan zienie Pabl, gane sca rnee Pabl; <sup>19</sup> dzigo rëb zho lo Pabl:

—Bzhiguiel mazd, sè luu guio ne lozh sodiidz luu lo no dien zha nac wseed ne ziaadnie luu, <sup>20</sup> sac wlataa gard zcion no grè ncuaañe rnee luu i.

<sup>21</sup> No zho liaadz gacnañ zho pe rnee Pabl, sac sca nac grè zha Aten, niiclegaa grè zha ne quiadziñ ga, rdziladz zho rded-dze zho rzodiidz zho dien zha nac grè diidz cub ne griiñ ron zho.

<sup>22</sup> Bdziñ zho ti guic gui win ne rnee zho Areópago, bzo Pabl glowtaa zaatne rcaalsa zho ga, bnee me lo zho rëb me:

—Grèse to ne nac to men Aten, ran naa ne nligaa ri-oxco to rleyne to grè men ne rzac to nac Dios; <sup>23</sup> sac len dze rii biateed naa zaatne zob grè xdios to, haxta no zaatne niaa ti lo pcoog quia chop lan diidz ne znu rnee: “MIÑ RII NIAA PAR DIOS NE RDZIUUNBEYD NE.” Golgacnañ sca ganle, Dios ne runbeyde to ga, runbey naa me ni lè zhiwseed me none naa lo miech len dze rii.

<sup>24</sup> Dios co bzaa guidzliu, me bzaa grètaa ncuaañe no lo guidzliu; gacd ne guiab miech zha gzaa ti zaatne cuèz me, sac men nroob men rnabey nac me, me rnabey gbaa, me rnabey guidzliu. <sup>25</sup> Niicle rquiindgaa me dien zha yquianap zho me, sac grèse ne ne nac ne miech, me rneedz guielmban lo ne, me rneedz grètaa ncuaañe rquiin ne. <sup>26</sup> Lo tib nèzaque miech ne bzaa me ga, bnabey me briecequia grèse dii miech ne ndxie lo guidzliu niina, bdeedse me zaatne biaan tib tib dii co ni dien palal dze ne gban zho zaatne biaan zho. <sup>27</sup> Laa me psañ zho parne yguib zho me, tsoxco zho guien zho ganle zha nac me haxta gdziel me lo zho. Ni led zite ga zo me lo ne grè ne, <sup>28</sup> sac gon, niapse por xoder me laa xcuerp ne niaa zigne naca, laa ne mban, laa ne rriel. Lèew ga bnee bla menladz to, zha rac ne znu rëb: “Xtii Dios nac ne.”

<sup>29</sup> Gase na ganle gotsaa gwi ne, conque xtii Dios name nac ne, pe nac dzigo gliladz ne lè Dios ga nac grè cho mdio or, cho mdio plat, cho mdio quie ne riab guic miech rzaa zho; <sup>30</sup> ni ib sca rliladz miech. Laa Dios gop zho paciens hor co sac runbeyd zho me; sangue niina laa me quiabedz zho, laa me rnab lo zho csaan zho grè ncuaañe bliladz zho ga gbig zho lo me, mese gleyne zho; <sup>31</sup> sac laa me bzole tib dze ne gacredz grèse miech lo me ygaa zho miñe tsieguial zho tib tib zho, tel zha wban zho. Ni laa me blule ganle cho nac men ne gon guielwxtis co, lè men co ga gon bleeban me.

<sup>32</sup> Zeñe bin zho bzeet Pabl no ti men ne brieceban, nzian zho rzhidznie Pabl, zla zho rëb:

—Na dien pa sti dze lozh yquiaadiag no miñe rnee luu i.

<sup>33</sup> Gataa pcuèez zho lo xcodiidz Pabl, laa Pabl wbi lo zho ga. <sup>34</sup> Briecequia blalaa zha Aten bliladz Jesús, lè tib zho ga nac mguie ne lè Nich (men ne nacgrè zha ne nac wxtis) ni ti wnaa lè Dámaris.

### Güey Pabl guiedz Corint

**18** Briece Pabl Aten bdziñ me guiedz Corint. <sup>2</sup> Ga beenbey me ti men Pont lè Aquil, ti zha xtii zha Israel nac Aquil. Roma no me glo, wriiñ bdziñ me Corint ga grop tsieel me; sac bnabey rey Claud briece grèse zha Israel ne no Roma. <sup>3</sup> Dzigo güey Pabl blèz Pabl lo zho ga, sac ye zho rzhixcuua grè lar nroob ne rquia ncal, tipse pquia zho dziin ga gza zho.

<sup>4</sup> Gzobse dze ne rdziiladz miech lo dziin rie Pabl xyadoo grè zha Israel ne no ga, riezodiidznie me grè zha ne rcaalsa ga; zigtaa zha Israela, zigtagaa zha guiedz cow rnee me lo zho tso guic zho gliladz zho Jesús. <sup>5</sup> Zeñe laa Silas grop Timoté bdziñ Corint, dzigo



laa Pabl psilo gzobse dze güey me güeynee me Xtiidz Dios lo grë zha Israel ne no ga, rnee me lo zho cho nac Jesús. <sup>6</sup> Laa zeene gonṭaa me rond zho diidz, leṭ ntseeb rac zho lo me haxta rneenë zho Jesús, dzigo bdzib me xab me lo zho, rëb me:

—¡Laa naa bialṭ bialṭne naa lo to per pquiaadiagde to miṇe rne naa; xṭolle to nasca teṭ laa to nitlo! Gbiiredraa naa gne naa Xtiidz Dios lo to, na laa naa csilo ganew lo grë zha ne nacd zha Israel.

<sup>7</sup> Dzigo laa Pabl psilo güey lidz ti meṇ ne no gaxaque zaatne zob yadoo co lë me Just, dib zdo me rliidz me Dios. <sup>8</sup> Leṇ dze co ndal zha Corint bliladz Jesús zeene bin zho miṇe rnee Pabl, haxta ti meṇ ne rnabey xyadoo zha Israel lë Crisp, grë meṇlidz me bliladz Jesús, dzigo grëse zho laa zho brobnis.

<sup>9</sup> Ti wdze blulo Dios lo Pabl, rëb me lo Pabl:

—¡Gdziebd luu! ¡Ib ycuëëzd luu lo dziin ne noyṇ luu i, bnee xtidz naa lo grë miech qui! Ndal grë miech rii no sëëb xnëz naa. <sup>10</sup> Peet tsienied guic luu, choot grieelod lega pe guṇ luu sac naa quianaap luu.

<sup>11</sup> Nacne blëz Pabl ga stib iz groṭ, pseed me grë miech co Xtiidz Dios.

<sup>12</sup> Laa zeene bzob meṇ ne lë Galiön zobnabey me xtan Acay, grë zha Israel ne no Corint ga bnediizd zho grë zho bnaaz zho Pabl güeyzo zho me lo Galiön <sup>13</sup> rëb zho:

—Laa no ziaadnie mgui rii lo luu, sac laa me quiagui-its xley no, quiago me guic miech tsieganṭ zho Dios sti mod miṇe ni nacdraa ley.

<sup>14</sup> Laa Pabl zie gnee, zeene pquiab Galiön rëb me lo grë zha co:

—Teṭne niaca miṇe no pe ti falt, pe ti guieṭntseeb ne quiayṇ me, dzigosi naa raguialṭ guṇ guieṭwxtis. <sup>15</sup> Per teṭne laa to ziaadnie me nu porne rdziladzde to miṇe quiaseed me miech, rdziladzde to teṭ cho rzeet me, sac led scad nac xley to, tsow golganṭ dieṇ pe guṇ to. Nodaque xtiṭ to guic naa.

<sup>16</sup> Bleega Galiön zho nëz ley.

<sup>17</sup> Dzigo bnaaz zha guiedz co ti meṇ lë Sóstenes, meṇ ne rnabey xyadoo zha Israel ga; gonṭo Galiön bdiṇ zho me, per peet rëbd Galiön.

### Biire bdziṇ Pabl guiedz Antioquí

<sup>18</sup> Goc spalal dze no Pabl Corint ga, dzigo bnee me lo grë zha ne rliidz Jesús ga laa me gbi; ye Aquil ni Priscil wnaa ne nac tsieel Aquil nole guic tsienalṭ zhits me.

Nacne zeene laa me brieë, ye zho bzëëbgza me barcw, laa zho zie nëz Cencre. Lëëtaaque leṇ dze co noxco Pabl guṇ me teṭ pe nac ncuaaṇe rëb me lo Dios guṇ me, dzigo zeene bdziṇ zho Cencre bnaabey me liu liu ptiisib guic me.

<sup>19</sup> Cencre bzëëb zho barcw stib, zie zho nëz Efés. Bdziṇ zho Efés, güey Pabl xyadoo grë zha Israel ne no ga güeynee me Xtiidz Dios lo zho. <sup>20</sup> Dzigo bnaab zho mbëz me lo zho ga ti blalaa dze, per brieelod mbëz me <sup>21</sup> sac laa guic me no gdziṇniob me Jerusalén ygaa me lni ne ziaadyob leṇ dze co, rëb me:

—Na teṭne zneedz Dios diidz, bii zialṭteedaque naa dieṇ yo to.

Gataa biaanṭ Aquil grop Priscil, laa me bzëëb barcw stib zie me nëz Cesarea. <sup>22</sup> Cesarea brieë me barcw, laa me zie nëz Jerusalén. Bdziṇ me güeyquiaabdiuzh me grë zha ne rliidz Jesús ga; biireraa me ga bdziṇ me Antioquí.

<sup>23</sup> Goc palal dze no me Antioquí, laa me brieëque ga güeyted me grë guiedz ne ndxie dib xtan zha Frij, dib xtan zha Galás, güeynee me lo grë zha ne rliidz Jesús ga dib zdo zho gleyne zho Dios.

<sup>24</sup> Leṇ dze co bdziṇ ti meṇ xtiṭ zha Israel guiedz Efés, ti meṇ Alejandríw lë me Apol. Ti zha rac nac me, rien me zha gnee me Xtiidz Dios lo miech. <sup>25</sup> Güey me xyadoo zha Israel ne no ga, nguieeṭ rac me, peet dzeb guieṇd lo me psilo me nonee me lo zho grëse miṇe bnee Juan Bautist zeene bzeet Juan Jesús; sac loxaque miṇ co bin me zeene gocnaṇ me cho nac Jesús.

Lad co co no Aquil ni Priscil, zeene gonṭ zho zha rnee me, dzigo blozhse ga, bredz zho me blozh bnee zho lo me zharaa nac zhiwseed Jesús.

<sup>27</sup> Grë zha ne rliidz Jesús ga, zeene gocnaṇ zho laa guic me no tsie me nëz Gres, dzigo ye zho rëb wen tsie me, pquiaa zho ti cart pxeelṭ zho lo zha ne no nëz co za-ace ycaania zho me. Zeene bdziṇ me nëz co, pseed me grë zha co. Rley zho blozh gocnaṇ zho cho nac Jesús; <sup>28</sup> sac squi ndxie miech rsioog me ro grë zha Israel, rnee me lo zho lëële meṇ ne quiambëz zho cxeelṭ Dios ga nac Jesús, ni rlu me lo zho pa lo zhobneew lo Xtiidz Dios.

### Biire güey Pabl Efés

**19** Leṇ dze ne no Apol Corint, laa Pabl bdziṇ Efés. Blozhse güeyted Pabl grë guiedz ne ndxie nëz xtan zha Galás, laa me bdziṇ ga. Ga bdzieel me blalaa zha ne rliidz Jesús, <sup>2</sup> dzigo bnaabdiidz me lo zho, rëb me:

—¿Pe bgaa to guieṭbiini ne rneedz Espiritu Sant, zeene bliladz to Jesús?

Pquiab zho rëb zho:

—¿Guieṭbiini ye? Gard gonṭ dzion no rdeed Espiritu Sant guieṭbiini.

Dzigo rëbchaa Pabl:

<sup>3</sup> —¿Pezhe waa pseed to zeene brobnis to?

—Zhiwseedse Juan Bautist gocndionṭ no —rëb zho.

<sup>4</sup> Dzigo bnee Pabl lo zho zha nac wrobnis ne biaadnie Juan. Rëb me lo zho nacse wrobnis co par glu miech ne laa zho csaan guieṭntseeb, laa zho sëëb xnëz Dios; per grëse zha ne bgaa wrobnis co ib none gliladz zho Jesús, meṇ ne bzeet Juan ga zeene rëb Juan ile ziaad me.

<sup>5</sup> Miṇ co bin zho nacne brobnis zho stib zigne psan Jesús diidz. <sup>6</sup> Zeene laa Pabl pxobnia guic zho bnaab me gdeed Espiritu Sant guieṭbiini lo zho, hor co psilo zho nzian lo diidz ne rnee zho; ni bnee zho teṭ pe nac miṇe racladz Dios gacnaṇ miech. <sup>7</sup> Lo gza zho rgaa zho tsiip-chop, niapse zha guiw.

<sup>8</sup> Tson mëë blëz Pabl ga, tibaque rie me xyadoo grë zha Israel ne no ga, ible rdziebd me rnee me lo zho zha nac Xtiidz Dios, ni rguib me rgo me guic zho gliladz zho cho nac Jesús. <sup>9</sup> Per zeeñe goñ me no palal zho ib rond diidz, leḷ psilo zho squi ndxie miech rneenë zho Jesús, nacne bleextsoque me grë zha ne rliladzle Jesús, güeynie me zho zaatne nac xyuscuel ti meñ lë Tiran; ga rcaalsa zho gzobse dze rieseed me zho.

<sup>10</sup> Dipse leñ chop iz blëz me ga pseed me grë zha co; nacne grëse miech ne no dib nëz Asia ga, zigtaa zha Israela zigtagaa grëraa miech cow, bin zho zha nac Xtiidz Dios. <sup>11</sup> Bdeed Dios diidz been me grë milagr nroob ne zree zdoo miech; <sup>12</sup> sac haxta lar ne rzëse nia me, lar ne rbixse me rzhoob lad meñ ne rzacnë laa zho ri-ac, niicle grëgaa menox ne noguitnie miecha, rzhoon ma.

<sup>13</sup> Ga quianzë gadz xpëed ti zhipxoz zha Israel lë Esc-ev, stib guiedz stib guiedz rie zho riegũcxooñ zho menox ne noguitnie miech. Ti vuelte, nañ zho na ye zho cuedz lë Jesús gacnieñ me zho guñcxooñ zho menox; bdziñ zho zaatne guñcxooñ zho ma, rëb zho: —jZig zobwi Jesús ne rzeet Pabl, laa no rnabey to goḷrieegazh i niina!

<sup>15</sup> Pquiabaque ma rëb ma lo zho:

—Wen wen ruñbey naa Jesús ni nañgaa naa cho nac Pabl, sañgue to goñ ni lalnu ruñbeyd naa to.

<sup>16</sup> Znuse bias meñ ne noguitnie menox co, bnaaz me gza zha co bdiñ me zho. Ib blëbd zho lo me, masaque dib brëe rna zho, ni xab zho nacwdraa, laa zho bzhoon.

<sup>17</sup> Grë miech ne no Efés, zigtaa zha Israela, zigtagaa grë zha guiedz cow, zeeñe bin zhow per nli bdzieb zho; grëse zho bien zho ne nli meñ non, meñ rnabey nac Jesús.

<sup>18</sup> Haxta ye grë zha ne rliladzle Jesús, hor co laa zho bleero pe nac grë ncuaañe ndzinlid ne bliladz zho glo. <sup>19</sup> Nzian zha ne biḷ diidz dox güeyxi zho grë xquits zho, squi ndxie miech laa zho bzëega grësew. Zeeñe biobey palal goconon grëtaa guits co, biirew zig chooptsii mil pes plat. <sup>20</sup> Ga blu poder ne nacie Xtiidz Dios, sac grë zha ne bina bdzëe lo xquieḷmban zho.

<sup>21</sup> Bded ga, biab guic Pabl tsieted me nëz xtan zha Macedon, xtan zha Gres, gbiire me ga laa me tsie Jerusalén stib; haxta rnee me Jerusalén griee me tsie me Roma. <sup>22</sup> Nacne ptedner me Timoté grop Rast (zha ne noyũñ xyudar me leñ dze co) zie zho nëz Macedon, laa me bii biaan nëz Asia ga.

### Gocntseeb zha Efés

<sup>23</sup> Leñ dze co briequia palal zha Efés ptsidiḷ zho zha ne rliladz Xtiidz Dios. <sup>24</sup> Guiedz co no ti meñ ne ruñdzi-in guuib plat lë Demetr, rzaa me grë yadoo yeeñ zig ni-aada xyadoo xnaxnash zho Dian; nroob dimi ne rial me grë me zha ne ruñnie me dziin co; <sup>25</sup> bnabey me pcaalsa grë zha ne quia dziin lo me, ni grëragaa zha ne ruñaque dziin co, rëb me lo zho:

<sup>26</sup> —Rieñ naa ziyonle to, ziyangaa to ganle laa mgui ne rnee zho Pabl quianzë lad guiedz nu, rnee me nlid

Dios ga nac grë mdio ne rzaa miech. Pe zhidaale miech quialiladz zhiwseed me nu; ni led loxaque nud-segaa, dible Asia quialiladz miecha. ¿Pe gnë to zha dzi-uũñ ne? <sup>27</sup> Golguien ganle noxtseeb guiabdraa xtsiũñ ne, ni nañwen to ganle lëe xtimi ne nu. Ni tebaa miñ-cosegaaw, miñe mazdraa noxtseeb nend grëse miech csaanladz xyadoo nazhnash Dian, nend grëse miech ne rleynie me dib Asia, diibgaa lo guidzliuw con guiaanladz zho me.

<sup>28</sup> Zeeñe goñ grë zha co sca rëb Demetr, rlëe zho, roptsie zho rgo zho xviv Dian. <sup>29</sup> Wdzeepaaw grëse menquiedz laa zho pcaalsa, güey zho bnaaz zho Gay ni Aristarco chop zha Macedon ne rzënie Pabl, bdoñni zho zho bdziñnie zho zho ro yulow.

<sup>30</sup> Nacne gocladz Pabl nie me nienee me lo grë miech co, per psaand grë zha ne rliladz Jesús ga. <sup>31</sup> Haxta bla zha wxtis ne ndzieeldiiz Pabl, pxeel zho diidz lo me tsied me.

<sup>32</sup> Zhaase zhaase rnee grë miech co ndxie zho ro yulow ga, no zho haxta ni rieñd pe nacie zie zho ga.

<sup>33</sup> Blalaa zha Israel, zeeñe goñ zho scataa rac grë miech co, bdoñ zho zhiw ti meñ lë Lejandr gocladz zho nee me chop lan xtiidz zho. Laa meñ co blis nia me parne cuedze zho gnee me; <sup>34</sup> zeeñe goñ zho zha Israel nac me, psilo zho stib grëse zho nguiedz roptsie zho, rgo zho xviv Dian rnee zho:

—jMeñ ndzondoo nac Dian! jMeñ ndzon nac xnaxnash ne!

Zig chop hor bre zho ga sca roptsie zho.

<sup>35</sup> Dzigo brie meñ ne zobnabey ga, blunia me lo zho cuedze zho; zeeñe laa zho bredze, psilo me bnee me lo zho rëb me:

—Golgona ganle, grëse miech lo guidzliu nañ zho guiedz rii zob nazhnash Dian, nañ wen zho gbaa biet me zob me nu; <sup>36</sup> tsod zha ne guiab led scada. ¿Pe nac nadien ne squitaa rac to? Golguien ganle nonguielḷda i squi lëelëd dieen pe rzhixcuaa to. <sup>37</sup> Golwi ganle, laa to ziaad-zo grop zha rii nu, ¿pe nadien been zho? Nacd zho cho zha ne quiaguitnie yadoo, cho zha ne nozhidzniegaa xnaxnash ne. <sup>38</sup> Nana, telne racladz Demetr pe glisqui me grë me zha ne rquianie me dziin, gacxe na no yulow waa. Niac niaad zho niaadnab zho guielḷwxtis, ni zogaa zha ne yquiaadiaga. jGa glisqui zho pe ruñ tib, pe rungaa stib! <sup>39</sup> Laa telne nor-agaa pe racladz zho glisqui zho, dzigo niac niacredz grëse zha ne nac wxtis, zha ngobey dien zha niaca. <sup>40</sup> Sac goñ ne squi been to nadze, noxtseeb glisqui zha Romaw lo ne; ni pe nadien dzieets ne telne laa zho glisquiw.

<sup>41</sup> Blozhse sca bnee me laa me wbi lo zho ga, niicle zhagaaw laa zho zey.

### Güey Pabl nëz Macedon ni nëz Gres

**20** Zeeñe laa ruid co blëz, dzigo bredz Pabl grëse zha ne rliladz Jesús, bnee me lo zho zaacse gac zho. Blozhse bnee me lo zho, laa me brie ga zie me nëz xtan zha Macedon; <sup>2</sup> güeynee me lo grë zha ne rliladz Jesús nëz co, pso me diidz lo zho zaacse gac

zho. Něz co brie me bdziñ me něz Gres. Ga blěz me tsoñ mēē.

<sup>3</sup> Laa zeene laa me gbi ga tsie me něz Siria, laa me ziele sēēb me barcw zeene gocnañ me laa zha Israel ne no ga bnediidz pa tsietñ zho me, nacne güeydaque me barcw, mazd bio me něz güeyted me něz Macedon.

<sup>4</sup> Blalaa zha ne bzēnañ biogza no me, bzē ti meñ Beré lē Sópater xingan ti meñ lē Pirr; bzē chop zha Tesalónica, Aristarco ni Segund; ti zha Derb lē Gay, Timoté, ni schop zha něz Asia, Tíquico ni Trófimo. <sup>5</sup> Goñ no Filip laa zho bner, per biaan no diidz Troas cuěz zho no; <sup>6</sup> laa no bliaaz ga, ga bdieed no lni Pascw. Zeene bded lni co laa no bziaab barcw, laa no brie ga. Goc gaay ngbidz no no lo nis laa no bdziñ lo zho Troas, dzigo bli-aaz no Troas ga gadz ngbidz.

<sup>7</sup> Zeene goñ dze dmingw, bio no yu ne rcaalsa zha ne rliladz Jesús ga. Ti yu tsoñ xcuaaw, laa no pcaalsa par dziuun no xtsee ne psañ Jesús diidz ga guñ grē zha ne rliladz me. Laa no ndxie grē no, dzigo psilo Pabl pseed me no; nzian ncuane nonee me lo zho sac guini liu co laa me griee ga; goñ goñ guieela rsiaañdaque me. <sup>8</sup> Nzian nac biini ne noquia leñ yu co; zaatne nac ro ventan ga zob ti niib lē Tic. Wdzeelaaw rsiaañdaque Pabl, tibaque bzheñ mcaañ niib co, wbix niib ga biab niib něz ley; ni glaaw, leñ yu ne riaan glaaraa ga ndxie no. Zeene güeylis zho niib laa niib gutle.

<sup>10</sup> Biet Pabl, bdziñ me lo niib bdeedz me niib.

—iGdziebde to! —rēb me—. iZrieaban niib!

iNi nligaaw brieaban niib! <sup>11</sup> Grēse zho per nli rley zho. Blozh ga bdzieep no glaa stib bdziñ no leñ yu co, dzigora bdiiz Pabl guietxtil pquiin no. Blozhse bdiizuun no xtsee co, laa Pabl psilo bnee lo zho stib, quia-neeque Pabl laa liu biini.

### Bdziñ Pabl Milet

<sup>13</sup> Lban co psiaañ Pabl, laa me wbi ga laa me zie něz Ason nzēni me; laa no bziaab barcw bdiednieer no lo me. Bdziñ no Ason ga bliaaz no me zigne biaan no diidz. <sup>14</sup> Zeene blanso me lo no, laa no bziaab barcw gza no me bdziñ no guiedz Mitilen. <sup>15</sup> Biini liu brie no Mitilen, bdieed no gax Quío, bietraa stib dze co bdziñ no Samos, ga bliaaz no; bzia no lo nis co zig sti dze dzigora bdziñ no Milet.

<sup>16</sup> Biotieete no Efés, sac laa guic Pabl no gdziñniob me Jerusalén, zeena ygaa me lni Pentecostés. <sup>17</sup> Nacne zigne bdziñ no Milet pxeel me diidz Efés bredz me grē zha ne zo lo zha ne rliladz Jesús ga. <sup>18</sup> Zeene blanso zho, bnee me lo zho rēb me:

—Wen wen runbey to naa, nanle to ganle zha noxco naa noyuun naa xtsiñ Jesús meñ ne rnabey ne. Wlal ne psilo ziañ naa něz Asia nu, <sup>19</sup> blactaa biin naa lo grē miñe bdeed naa, blactaa lo guieñtseeb ne ziyo naa, tibaque quianañ grē zha Israel quiñ zho naa. <sup>20</sup> Per gon to ganle, tibaque bioxco naa bialseed naa to miñe nac diidzli, zigtaa pseed naa to zaatne rcaalsa tow, zigta-gaa pseed naa to stib yu stib yu. <sup>21</sup> Grēse miecha, tibaque miñe pseed naa zho, miñe bne naa lo zha Israel miñcoque bne naa lo miech stib guiedz; grēse zho

bnee naa lo zho none csaan zho xquieñtseeb zho dib zdoo zho gnalo zho Jesús, zeena gbig zho lo Dios.

<sup>22</sup> Scaque niina ne laa Espíritu Sant rnabey ga naa Jerusalén, nanñ naa dieñ peraa nac ncuane gdzieelo naa ga; <sup>23</sup> per nanpaa naa ible zgo zho naa ladzguiib, ible sacsi zho naa, sac guiedz ne gdziñtaa naa miñ co rnee Espíritu Sant teed naa. <sup>24</sup> Lo guieñtseeb co no naa per rquiad zdoo naa xquieñmban naa; miñe nziuu-raa lo naa laga gdeeda diidz ib laa naa no gne lo miech pa lotaa rleyne Dios zho, zeena iñe gley naa csi-aañ naa dziin ne bzo Jesús naa nu quiayuñ naa. <sup>25</sup> Rien naa lo grē to ne nac to zha ne bialseed naa gocnañ to zha nac xněz Dios, ganndraa to lo naa lo guidzliu rii.

<sup>26</sup> Laa naa pseedle to grēse miñe nac Xtiidz Dios, ib peet pqueetsd naa lo to; gacxe waa, tel cho tib to nitlo, led xtoñdraa naa ga. <sup>28</sup> Goñguieñ sca, i goñquianap to, ni scagaa goñquianap grē zha ne zo to lo! iGoñwi ganle xněz Dios no zho, haxta lo cruz gut Xpēēd me bdiizh me xtoñ zho! Ni stiba, iib Espíritu Sant bzo to yquianap to zho zigne rquianap baxtor xpēcwxiiil zho!

<sup>29</sup> iNsin goñso! Sac rienle naa zeene laa naa gbiche lo to, ib zrieequia grē zha ne guiaad guiaadquidie to, zguib zho zha gnitlo zho to zigne run grē coyot mēcwxiiil. <sup>30</sup> Haxta lad to, zrieequia bla zha ntseeb ne ctsēē Xtiidz Dios, squiil zho to tsienañ to zhiwseed zho.

<sup>31</sup> Gacxe waa laa naa rne lo to, iñsin goñso! Goñsoladz ganle tsoñraa iz, dze guieel pseed naa to, blactaa biin naa pso naa diidz lo to tib tib to zaacse gac to. <sup>32</sup> Dios nac meñ ne gacnieñ to, laa naa rsañ to ladznia me grēse to; Xtiidz Ndzon me miñe rnee ganle zha nquial-adztaa me to, lēw lozh quix biini to dib zdoo to gnalo to me, zeena ygaa to zaatne gneedz me cuěz to grē to zha ne noraa xněz me.

<sup>33</sup> iWaltaa ib rzobladd naa dimi, ib rzobladd naa lar, guiep naa tebaa zha yquianie naa grē ncuane co.

<sup>34</sup> Leñ dze ne blěz naa lo to, gon to ganle niapse nia naa bdziniaa naa ncuane pquiin naa, ncuane pquiin-gaa grē zha ne bzēnie naa. <sup>35</sup> Ga blu naa lo to ganle, ib none dziuun ne dziin zeena grieeo dziuun ne xyudar zha ne guieñd pe yquiin. Ib riaanladz naa xtiidz Jesús meñ ne rnabey ne, zeene znu bnee me: "Mazdraa nroob guieñbley ne rgaa zha ne rgad, lēdle zha ne rad."

<sup>36</sup> Zeene blozh bnee Pabl lo zho, laa me pquitsgzhib ga grē me zho bzodiidznie zho Dios. <sup>37</sup> Blozhse ga, tibga tibga zho wbig bnee zho lo me, bnaaz zho nia me, bdeedz zho me. <sup>38</sup> Mban rac zho psilo zho roon zho, rsoladz zho rēb me ganndraa zho lo me. Blozh ga, güey zho güeyzoněz zho me zaatne sēēb me barcw.

### Biire güey Pabl Jerusalén

**21** Blozhse bzheñ no nia grē zha Efés co, laa no bziaab barcw, laa no zio bdziñ no ti lo guidzliu win ne no lo nisdoo co lē Cos. Biini liu brie no ga bdziñ no lo sti guidzliu win co lē Rodas. Rodas brie no bdziñ no guiedz Pátara. <sup>2</sup> Guiedz Pátara, ga bziaab no ti barcw ne zie něz xtan zha Fenicia. <sup>3</sup> Zeene zieded barcw co ngali zaatne riaan guidzliu win ne lē Chipr, bui no něz revés rlupaa guidzliu co. Laa no zio haxta

bdziñ no guiedz Tir, xtan zha Siria, ga blëz barcw co bi-et grë yo ne neya.

<sup>4</sup> Zigne bdziñ no ga bdzieet no barcw bziaab no lad guiedz co, biodziel no grë zha ne rliladz Jesús ga; bli-aazaque no lo zho ga ti zhal. Dzigo psiaab Espíritu Sant guic zho rnee zho lo Pabl, tebaa siguiel me mazd tsied me Jerusalén.

<sup>5</sup> Zeene laa no brieë ga, grëse zha ne rliladz Jesús grë tsiel zho grë xpëed zho biaad-zonëz zho no ro nis co; dzigo lo yuzh co ga pquitsgzhil no grë no, bziodi-idzni no Dios. <sup>6</sup> Blozhse bzhieen no nia zho, laa zho wbi ga.

<sup>7</sup> Brieë no Tir bdziñ no guiedz Tolemaid, ga bio no bioquiaabdiuzh no grë zha ne rliladz Jesús ga, bliaaz no lo zho tib dze. <sup>8</sup> Biini liu brieë no ga bdziñ no guiedz Cesarea, ga biobiaaz no lidz ti men ne noneeque Xtiidz Dios lo miech, lë Lip. Lë Lip co ga gocgza sloop zha ne bzo been xyudar zha poxtl. <sup>9</sup> Quianie me tap nd-zoop no gard ctsieelnia, gzase zho bdeed Dios guielbiini lo zho rnee zho tel pe nac miñe racladz Dios gacnañ miech.

<sup>10</sup> Nzianle dze goc no no lidz Lip, zeene blanso ti men ne ziaad nëz Judë lë Agab, biadquiaabdiuzh me no. (Ye me rnee tel pe nac miñe racladz Dios gacnañ miech.)

<sup>11</sup> Zigne blanso me lo no ga, bzhen me lar ne rbe len Pabl, pxidoo mew nia me ni pxidoo mew ni me, në me: —Znu gon rnee Espíritu Sant gzobdoo zha Israel bizhuan lar rii, co zho me ladz zha Roma zeene laa me gdziñ Jerusalén.

<sup>12</sup> Grë zha ne rliladz Jesús ga, zeene bin zho sca rëb men co, rnab zho lo Pabl tsied me Jerusalén, yeque no sca rnee lo me. Mban rac no rdzioon no. <sup>13</sup> Pquiaabaque me në me lo no:

—¿Pe nac dzigo roon to? Tel naa laa naa bleeladzle naa maase gzobdoo zho naa Jerusalén, niicxe haxta gut zho naa waa porne rleyne naa Jesús. ¡Loxaque rsi-aab guielnë to naa i gon squi rac to!

<sup>14</sup> Bdziñse no lidz yquiaadiag me xtiidz no, dzigo mazd psaan no, rdzieets no:

—Golgotsoo csaan ne, Diostaa nan dien zha gaca.

<sup>15</sup> Bdedse ga bzhixcuua no laa no brieë ga, laa no zio nëz Jerusalén; <sup>16</sup> blalaa zha ne rliladz Jesús Cesarea ga bzënal zhits no, bzënie zho ti men Chipr lë Mnasón. Izle rliladz me Jesús, lidz me biobiaaz no zeene bdziñ no Jerusalén.

<sup>17</sup> Grë zha ne rliladz Jesús Jerusalén, rley zho zeene gon zho laa no bdziñ, blëzlo zho no.

<sup>18</sup> Biini liu co güeynie Pabl no lidz Jacob bioquiaabdiuzh no me, lëëtaque laa grë zha rnabey ne zo lo grë zha ne rliladz Jesús Jerusalén ga, ndxie ga. <sup>19</sup> Blozhse pquiaabdiuzh Pabl grë zha co, dzigo psilo me bzodiidz me lo zho grëse zha gocniën Dios me güeyseed me grë miech stib guiedz. <sup>20</sup> Zeene bin zhow per nli rley zho, rdeed zho xquizh lo Dios; dzigo rëbchaa zho lo me:

—Bets, ye zha Israel gon ndaldoo zho zililadz Jesús; per racladz zho tibaque tsienal zho miñe rnabey Xley Moisés. <sup>21</sup> Grë zha ne no nu bin zho laa luu güeyseed

grë men wladz ne no guiedz zit, nac diidz blu luu lo zho tsienal draa zho Xley Moisés, codraa zho xpëed zho bey, niicle tsienal draa zho grë zhiwseed xmengol ne.

<sup>22</sup> ¿Zha ganle dziuun ne? Sac zeene gon zho laa luu blanso, ible ziaadguib zho luu. <sup>23</sup> No tap bets ne nu ziaadyoble gon zho miñe bnee zho lo Dios; miñe gaca güey <sup>24</sup> güeynie zho yadoo, golgon grë miñe rnabey ley, bdiizh ctsiib guic to gza to; zeena ga gan grë zha rii ganle lidz grë miñe rnee miech luu ga.

<sup>25</sup> Sangue grë miech stib guiedz zha ne rliladz Jesús, laa no pxeelle diidz lo zho zigne bzodiidz ne nu: grë ma ne rut miech rgogon zho lo zhimdio zho, gowd zho bëel co; grë ma ne rxieed ren zeene ret ma, gowd zho ma; ni niicle grëgaa ma ne gut zho, ib gowd zho xchen ma; grë zha bguí, nodne tsonie zho wnaa ne nacd tsiel zho; niicle wnaagaaw, nodne tsonie zho mguí ne nacd tsiel zho.

### Bnaaz zho Pabl

<sup>26</sup> Laa Pabl zienie gza zha co. Biini liu güey me gza me zho güeygon zho miñe rnabey ley; blozh ga güey zho yadoo güeynie zho diidz pa dze gza miñe quiayun zho ga, zeena gal dze co laa zho tsienie gon ne gdeed zho tib tib zho. <sup>27</sup> Laa zeene merle gza gadz ngbidz ne quiayun me miñe rnabey ley ga gza me zha co, lega naclew gon bla zha Israel ne ziaad nëz Asia laa me no len yadoo. Nacne wbig zho <sup>28</sup> bzhen zho zhicw me, roptsie zho rnee zho:

—¡Grëse to menguedz! ¡Golgon xyudar no gnaaz ne men rii! Sac lëë me ga quianzë quiaseed me zha wladz glëënie zho ladz zho, rnee me lo zho gundraa zho grë miñe rnabey ley, gapdraa zho respet yadoo rii; haxta grë zha zit zizëëbnie me nu. ¡Noguitniele me lugar nda rii!

<sup>29</sup> Sca rnee zho, sac gon zho Pabl len guiedz Jerusalén ga ziegrop me ti zha Efés lë Trófimo, dzigo rzac zho güeynie me zha co len yadoo.

<sup>30</sup> Pe ga bin grë menguedz, grëse zho bdziñ wbigbe zho lo Pabl bdozni zho me blee zho me len yadoo, zigne blee zho me ga lëëled psioog zho ro yadoo; psilo zho noguin zho me, nan zho gut zho me.

<sup>31</sup> Zeene gocnañ men ne rnabey lo menguiib ne ndxie ga laa ruid co noyac, <sup>32</sup> lëëled brieenie me grë xmenguiib me ni grëraa zha ne rnabey lo zho. Zeene gon grë zha ne noguin Pabl ga, laa grë menguiib co bdziñ, dzigoraa blëz bdiñ zho me.

<sup>33</sup> Dzigo wbig men rnabey co, bnabey me grë zhaguiib co bzoob zho Pabl chop caden. Bnabdiidz me lo grë miech co dien cho nac Pabl, pe quiayun me ne scataa rlëënie zho me. <sup>34</sup> Psilo zho nguiedz roptsie zho, zhaase zhaase ncuuañe rcaadzdoñ zho me. Gonse men rnabey co rlud dien pepaa rlisqui zho, nacne bnabey me grë menguiib co ziesañ zho Pabl yu ne rbëzpa zho.

<sup>35</sup> Laa grë menguiib co csilo soquianie Pabl lo scaler ne rdziñ ro yu co, gataa mazd bzoobyan zho me, sac ntseeb rac grë miech co; <sup>36</sup> nalbe zho, roptsie zho rnee zho:

—¡Golnitlogazh meṅ qui! ¡Niinagazh golgut me!  
<sup>37</sup> Laa grē meṅguib co csēēble me leṅ yu co, zeene bnee me lo meṅ rnabey co, rēb me:

—¿Pe zrieelo gne naa ti xtidz naa lo luu?

Dzigo rēb meṅ rnabey co:

—¿Mod rac luu rnee luu xtiidz zha Gres? <sup>38</sup> ¿Led luud ga dzigo nac ti zha Egipt ne psilo racntseeb lo gobiern leṅ dze rii? Nac diidz, tap mil zha ntseeb nacie zho, laa zho ziese nēz dan.

<sup>39</sup> —Led naada —rēb Pabl— meṅ Israel nac naa. Guiedz Tars gol naa, lēē guiedz co nac miṅe nroobraa lo grē guiedz ne ngab Cilis. Na laa naa rnab lo luu, beenṅ guieṅzaac bneedz diidz gne naa chop lan xtidz naa lo grē miech qui.

<sup>40</sup> —Zaca —rēb meṅ co.

Lo scaler co zo Pabl blunia me lo grē miech co cuedze zho. Zeene laa zho biacdze, dzigo psilo me bnee me xtiitsē me grē me zho, rēb me:

**22** —Grēse to meṅ wladz, laa naa rzaac to zig ti bets naa zig pxozgaa naa, golquiaadiag miṅe gne naa nu gaṅle zeene gacnaṅ to quiayund naa miṅe rquiaqui to naa.

<sup>2</sup> Zeene goṅ zho xtiidz zho rnee me, grēse zho dzese bre zho; dzigo rēb me:

<sup>3</sup> —Meṅ Israel nac naa, guiedz Tars xtan Cilis ga gol naa, per Jerusalén nu broob naa, nu bio naa wseed, maistr Gamaliel goc meṅ ne pseed naa. Pseed me naa grēse zigne nac xley xmeṅgol ne, grēse zigne nac zhiwseed zho; pseed me naa tibaque noxco naa runnon naa lē Dios zigne noxcoque tow. <sup>4</sup> Miṅe been to nu nadze, ye naa blactaa squi beṅ naa ptsidiṅ naa grē zha ne rliladz Jesús, pquianaṅ naa yгаа zho guet zho; mgui wnaasaque razobdoo naa zho lidz zho rasanṅ naa zho ladzguiib. <sup>5</sup> Meṅ ne nac pxoz nroob ni grē meṅgol ne goc wxtis guiedz rii leṅ iz co, zha co nanṅpaa gaṅle nli sca beṅ naa; sac zha bneedz ti xtiidz zho bi naa ndzignie naa lo zha ne rnabey xyadoo grē meṅ wladz ne no Damasc, zeene niacnie zho naa nianaz naa grēraa zha ne no ga rliladz Jesús, nialnie naa zho Jerusalén nu nded zho caxtigw.

<sup>6</sup> Miṅ copaa nagonṅ brie naa nu za naa nēz co. Zhile gdziṅ naa Damasc, zig rwe ngbidza tibaque zeene ziaad ti biinidoo nēz zhan gbaa biab lo naa. <sup>7</sup> Biabgazh naa liu, ga nix naa bin naa ti tsi meṅ co rnee me lo naa: “Saul, Saul, ¿pe nacne quianaṅ luu naa?” <sup>8</sup> “¡Beenṅ guieṅzaac bnē dieṅ cho luu!” rep naa. Dzigo nē meṅ co lo naa: “Naa nac Jesús meṅ Nazaret ne squi quiatsidiṅ luu.”

<sup>9</sup> Grē zha ne zanie naa ga, bdzieb zho goṅ zho biini co, per biend zho pe rnee meṅ co lo naa. <sup>10</sup> Dzigo rep naa lo me: “Bzhiguiel bnē dieṅ, ¿pe racladz luu goṅ naa niina?” Nēchaa me: “Guche i, güey Damasc ga gnē zho gaṅle pe nac miṅe no goṅ luu.”

<sup>11</sup> Dzigo bzheṅ zha ne zanie naa ga nia naa, bdziṅnie zho naa Damasc; sac lo biinidoo co pcow lo naa. <sup>12</sup> Ga no ti mgui lē Ananí, zēēb diidz rioxco me grē miṅe rnabey ley, grēse meṅ wladz ne no ga nanṅpaa zho ti meṅ wen nac me; <sup>13</sup> dzigo biaad me zaatne blēz naa ga, nē

me lo naa: “Saul, niinagazh goṅ bets laa luu gbiire gwi stib.” Zigne sca bnee me laa lo naa biac, gongazh naa me. <sup>14</sup> Dzigo nēchaa me lo naa: “Dios meṅ ne bililadz grē pxozgol ne, ib meṅ co bzooblo luu gacnaṅ luu pe nac miṅe racladz me gac, me bzooblo luu goṅbey luu meṅ ne nacle diidz ga cxeel me lo guidzliu, ni gon luu tsi meṅ co. <sup>15</sup> Ib laa me bzo luu tsienee luu lo miech miṅe bzhaac luu ga, miṅe bin luu ga. <sup>16</sup> Guso i sca, zeene chobnigazh luu. Dib zdoo luu bredz Jesús, bnab lo me csanmbe me luu lo xtoṅ luu.”

<sup>17</sup> Zeene laa naa blanso Jerusalén nu, tib dze lēē-taque no naa yadoo nozodiidznie naa Dios, <sup>18</sup> tibaque blulo me lo naa nē me: “Na zeene biobladz briece Jerusalén nu, sac ib gliladz grē miech rii miṅe gnee luu zeene gnee luu xtidz naa lo zho.” <sup>19</sup> “Per runbey zho naa waa”, rep naa lo me, “nanṅpaa zho scataa ra naa grē yadoo raxizhoo naa grē miech ne rliladz luu, rnabey naa rguinṅ zho zho ni rio zho ladzguiib, <sup>20</sup> niicle zeene beet zho Xteb meṅ ne bnee xtiidz luu ga, ye naa bded diidz beet zho me, haxta pquianaap naa xab grē zha ne bdeedquie me.” <sup>21</sup> Dzigo nē me lo naa: “Na zeene pcaaniob nēz briece nu, sac goṅ laa naa cxeṅ luu stib dan tsienee luu xtidz naa lo grē meṅzit.”

<sup>22</sup> Zeene bin zho sca rēb me bdeetraa zho diidz nee me, psilo zho nguiedz roptsie rnee zho:

—¡Ib rieguielṅdraa gban meṅ qui! ¡Golnitlogazh me!

<sup>23</sup> Nguiedz zēēb tsi zho, ib rioogd ro zho, masaque rdzib zho xab zho ni rchoonṅ zho yudie laglaa.

<sup>24</sup> Dzigo psēēb meṅ rnabey co Pabl leṅ yu co, ni rnabey me grē meṅguib co quinṅ zho Pabl, zeene cueero Pabl dieṅ pe nac ncuaaṅe beenṅ Pabl, zha nac ne scataa rac grē miech co lo Pabl. <sup>25</sup> Laa zho blozhle pxidoo me, laa zho csilo quinṅ me, zeene rēb me lo sti zha ne rnabey lo grē zhaguiib co:

—¿Pe nonguiela dzigo ne lega quinṅ to ti zha Roma, ni gardle gac guielwxtis dieṅ pe nliṅpaa no xfalt zho?

<sup>26</sup> Zeene bin zha co sca rēb Pabl, lēēléd güeynie zho diidz lo meṅ ne rnabey zho ga, rēb zho:

—¿Zha goṅ goṅ luu? Sac zha Roma me nac mgui co.

<sup>27</sup> Dzigo güey meṅ rnabey co rēb me lo Pabl:

—Bneeli lo naa, ¿dieṅ pe nli na meṅ Roma nac luu?

—Nliw —rēb Pabl—, zha Roma nac naa.

<sup>28</sup> Rzedz yanṅ meṅ rnabey co rēb me:

—¡Naasi zha Roma nac naa, ni nroob dimi bdizh naa bgab naa lo zha Roma!

Dzigo rēbchaa Pabl:

—Sanguie naa, desde gol naa bgab naa lo zha Roma.

<sup>29</sup> Grē zhaguiib ne bzo nguinṅ Pabl ga parne cueero me, lēēléd wbiche zho lo me, niicle meṅ rnabey cow bdzieb me zeene goṅ me nli zha Roma nac Pabl, sac nrooble nac falt ne niunṅ me ga lega nabey me nguinṅ zho ti zha Roma.

### Bnee Pabl lo wxtis Israel

<sup>30</sup> Zeene biini liu, bnabey meṅ rnabey co pcaalsa grē zhipxoz non zha Israel ni grē meṅ ne nac zhiwxtis zho, sac racladz me gacnaṅ me dieṅ pepaa nac ncuaaṅe

rquiaqui rlëenie grë miech co Pabl. Dzigo pxadz me Pabl, blee me Pabl bzo me Pabl lo zho.

**23** Dze bui Pabl lo grë zha wxtis co, dzigo psilo Pabl bnee me rëb me lo zho:

—Laa naa rneli lo to nu ganle, mbe zdoo naa, Dios zobwi ganle zanaŀd naa ncuaane rdziguiend me.

<sup>2</sup> Zeene gon Ananí (meñ ne nac pxoz nroob) sca rëb Pabl, bnabey me zha ne zo gax lo Pabl, rëb me:

—¡Goŀcap ro zha qui!

<sup>3</sup> Dzigo rëbchaa Pabl lo me:

—¡Tebaa squique cap Dios ro luu! ¡Nac luu gon zig ti lidz nguts loxaque nëz zhitssew stib rna! ¿Pa rquiin ne laa luu zob i? Led luu zo par cobey luu teŀ no pa ti ley ne zaguits naa, na leŀ luule noguiitsa bnabey luu bdiñ zho naa.

<sup>4</sup> Pquiabbe zha ne ndxie ga rëb zho:

—¡Bieñ ganle lo pxoz nroob i, lo meñ ne quiayuñ xtsi- in Dios i noquiabro luu!

—Goŀgun dispensar —rëb Pabl—. Nañd naa lëe pxoz nroob i, teŀ niaca miñe nañ naaw ne scad naa; sac zhobnee lo Xtiidz Dios: “Gneenëd luu zha ne rnabey ladz luu.”

<sup>6</sup> Zeene bieñ Pabl groŀ zha wxtis co zianaŀ zhiwseed zha saducé, zgrol zho zianaŀ zhiwseed zha farisé, dzigo psilo me nguiedz bnee me rëb me lo zho:

—¡Grëse to bets, goŀgona ganle, zha farisé nac naa, niiclegaa pxoz naaw farisé goc me! ¡Ni porne rliladz- paa naa gon zrieeban zha ne ret, miñ co gane znu zo naa lo to nu!

<sup>7</sup> Zeene sca rëb Pabl, psilo zho bdiŀdiidz zho. Goc zho chop dii, <sup>8</sup> rriee zha saducé rnee nlid grieeban zha ne ret, nlid no anjl, nlid no espíritu; laa zha fariségaa na rnee zrieeban miech, no anjl ni no espíritu. <sup>9</sup> Nguiedz zëeb tsi zho noneelsa zho, dzigo gusoque bla maistr ley ne nacgrë zha farisé, rëb zho:

—Laa ne bdzianle ganle, ¡ni ti falt rapd mgui qui! ¿Pe nadien dziuun ne? Nend ti espíritu ga, ti xanjlgaa Dios ga sca bnee lo me.

<sup>10</sup> Zeene gon meñ ne rnabey lo menŀguiib ga, laa lo xtiŀ zho noyac nroobraa, bdzieb me rëb me nend znuse gzhiih zho Pabl; bnabeyaque me gocredz menŀguiib güeyxi zho Pabl biire güeyan zho me leñ yu ne rbëz zho ga.

<sup>11</sup> Goŀ guieel co, blulo Dios lo Pabl rëb me:

—Gdziebd luu, zigne bnee luu xtidz naa lo miech Jerusalén nu, scaque none tsienee luuw lo grë zha ne no Roma.

#### Gocladz zho niut zho Pabl

<sup>12</sup> Zeene biini liu, ndziibsræa choo zha Israel bnediidz rëb zho gowd zho, ni tib ro peet guied zho haxta gut zho Pabl; teŀne guñd zho miñe rnee zho maase csi- aabzi Dios zho. <sup>14</sup> Dzigo güey zho lo pxoz ne rnabey, lo grë zha ne nac zha non lo menŀguiedz, bzodiidz zho miñe no guic zho ga, ni rëb zho:

<sup>15</sup> —Nana gon, goŀnab lo meñ ne rnabey lo menŀguiib cxeel me Pabl lo to gzhe, goŀquiaalo nora pe lozh

yquiep to Pabl; laa no nsinle zioombiaaz. Zeene laa zho tednie Pabl, ga dziuut no Pabl.

<sup>16</sup> Dieen zha bin ti xingan bzian Pabla, nacne lëelëd güey win yu ne rbëz menŀguiib ga güeynie win diidz lo Pabl. <sup>17</sup> Dzigo bredz Pabl ti zha ne rnabey lo menŀguiib co, rëb Pabl lo zho:

—Bzhiguiel güeynie mëed rii lo meñ ne rnabey to, sac laa win no tsienie ti diidz lo me.

<sup>18</sup> Bzhen meñ rnabey co nia mëed co, güeynie me win lo meñ nroob ne rnabey zho, rëb me:

—Laa naa ziaŀnie mëed rii nu me, dieñ pe nac diidz ne ziaadnie win lo luu; Pabl ne no ladzguiib ga bnab lo naa guiaŀnie naa win.

<sup>19</sup> Dzigo bzhen meñ rnabey co nia win, güeynie me win stib nëz, bnabdiidz me lo win dieñ pe nac diidz ne zienie win lo me. <sup>20</sup> Dzigo rëbchaa win:

—Laa zha Israel gon bnediidz gnab zho cxeel luu px- ey naa Pabl lo zhiwxtis zho gzhe, yquiaalo zho gnë zho nora pe yquiep zho me. <sup>21</sup> Bzhiguiel gliladzd luu xtiidz zho, sac ndziibsræa choo zha ne nacgrë zho rëb zho laa zho tsiesoblan nëz gutgazh zho me zeene laa me ted. Biaan zho diidz grë zho, gowd zho, ni tib ro peet guied zho haxta gut zho me; haxta rëb zho teŀ laa zho guñd miñ co maase gdzibdee Dios zho. Ible zuñ zhow, lox- aque quiambëzse zho dieñ pe guiab luu.

<sup>22</sup> Blozhse ga dzigo bzonëz me win, ni pso me diidz lo win choot lo gneed win ne laa win güeynie diidz lo me.

#### Güey Pabl lo gobernador Wech

<sup>23</sup> Lëelëd bredz meñ rnabey co chop zha ne zo lo menŀguiib, rëb me:

—Laa zhaguiib gon none griee nagueel tsie zho Ce- sarea, na zeen goŀzo zha ne tsie; none tsie chop gayoo zha ne sëni, tsongaŀ tsii zha ne sob guay, schop gayoo zha ne güey lanz. Nagueielgazh, zig rlozh xtsee none griee zho nu; <sup>24</sup> sac laa zho none tsiesan Pabl Cesarea. Ni goŀcoxab ti guay ne sob Pabl, sac none ndip ndaan me gdziñnie to me lo gobernador Wech Cesarea.

<sup>25</sup> Dzigo pquiaa me ti guits ne güey zho gdziñnie zho lo gobernador, rneew:

“¡Diuzh Gobernador Wech!

‘Naa nac Claud Lisias, laa naa rxeŀ guits rii lo luu gzodiidz naa ganle zha nacne bnabey naa ziaadsan zho meñ qui zaatne zob luu i.

<sup>27</sup> ‘Zha Israel bnaaz me gocladz zho niut zho me, laa zeene gocnan naa zha Roma nac me nacne pxeelaque naa zhaguiib güeyla me lo zho. <sup>28</sup> Gocladz naa niacnan naa dieñ zha nacne rlëenie zho me, dzigo bianie naa me lo zhiwxtis zho. <sup>29</sup> Ga gon naa led ncuaane rnad rlëenie zho me; teŀ zha nac xley zho ncuaan co rlisqui zho; nacda ncuaane guiab ne rieguiaŀ guet me, tso- gyugaa me ladzguiib. <sup>30</sup> Zeene gocnan naa laa palal zho bnediidz gut zho me, nacne bnabeyaque naa zi- aadsan grë menŀguiib qui me lo luu i. Niiclegaa zha ne rlëenie mew, laa naa rep lo zho guiaad zho lo luu i, zeena i gnë zho dieñ zha nacne rlëenie zho me. ‘Lëed bii gdieel ne sca dieñ.”

<sup>31</sup> Zeene laa liu pcow, zig rlozh xtseew laa grë mennguiib co pcaanie Pabl nêz; dib guieel bio zho nêz bdziinne zho me guiedz Antípatris. <sup>32</sup> Biini liu, loxaque zha ne zob guay ga pcaa nêz zienie zho me Cesarea, laa grëraa mennguiib co wbire bdziñ Jerusalén stib.

<sup>33</sup> Zeene bdziñ zho Cesarea, bdeed zho guits ne zienie zho ga lo men ne nac gobernador, dzigo laa zho psañ Pabl ga.

<sup>34</sup> Blozhse blab me lo guits co, dzigo bñabdiidz me lo Pabl dien pa guiedz gol Pabl. Dzigo rëbchaa Pabl lo me, zha Cilis nac Pabl.

<sup>35</sup> —Nasca —rëb me—, zeene laa zha ne rlëenie luu glanso nu, dzigo yquiaadiag naa dien zhapaa nac xtił to.

Dzigo bnabey me, pquianap mennguiib Pabl zaatne nac len xyulow Herod.

### Gocredz Pabl lo gobernador Wech

**24** Zeene goc gaay ngbidza, laa Ananí men ne rnabey lo pxoz bdziñ ga, gza me blalaa zha ne nac zha non lo mennguedz Israel, zienie zho ti licenciad lë Tértulo; grë zho laa zho zie zienie zho diidz lo gobernador pe nacne rdilnie zho Pabl.

<sup>2</sup> Dzigo bnabey gobernador gocredz Pabl. Zeene laa Pabl bdziñ, psilo licenciad co bzeet me grë ncuaane rquiaqui zho Pabl, rëb me:

—Xquizhdoo luu gon gobernador, ne squitaa ndzielguic luu rien luu zha gnabey luu, gane zaacse mban menladz no niina, blactaa ncuaane yquiiin lo no noyuy luu. <sup>3</sup> Rzac zdoo now, tel pa lotaa zo no rsoladz no luu nac luu men ne rnabey no. <sup>4</sup> Nli nonguielđa dziunneed no luu, per been ti guielnzaac pquiaadiag ganle pe nac ncuaane rlisqui no quiayuy mgui ne zo lo ne nu.

<sup>5</sup> Masaque nac me lo no zig nac ti guielguidz dox ne rded, grëse guiedz quianzë me noyungüet me menladz no gacndaan zho lo men ne rnabey no. Lëe me ga zo lo grë zha ne rnee zho nazaren. <sup>6</sup> Zeene bgaa me, lëetaque laa me no len yadoo ro ne zob Jerusalén quiayuynguzee me xyadoo no. Nacne gocladz no gagazh nguizh me falt co zigne rnabey xley no; <sup>7</sup> per biaad Lisias grë xmennguiib me ntseeb rac zho biaadla zho me lo no. <sup>8</sup> Na nagon zac luuzhal yquiep me, zeena gan luu ganle nli quiayuy me grë miñe rnee no nu.

<sup>9</sup> Grë zha Israel ne zienal ga, pquiabbe zho rëb zho nli quiayuy me grë miñ co.

<sup>10</sup> Dzigo blunia men ne nac gobernador ga lo Pabl gnee Pabl; nacne psilo Pabl bnee me rëb me:

—Nanle naa ziele iz zob luu nu rquiaadiag luu grë ncuaane rac xtan no nu, gane rley naa zial naa lo luu par yquiaadiaggaa luu ganle zha nac xtidz naa.

<sup>11</sup> Na rac tsiipchop ngbidz ga bdziñ naa Jerusalén, biagan naa Dios len yadoo nroob ne zob ga (niicle tel niaca miñe grieë diidz ganle). <sup>12</sup> Laa naa bia Jerusalén biagan naa Dios, choot biatilnied naa ga; niicle len grëragaa yadoo wina, ro nêzgaaw, wlalaa noquiiid naa miech cho lo gacntseeb zho. <sup>13</sup> Grëse miñe

rquiaqui grë zha qui naa grieelod glu zho nliw, sac led ncuaane gocda.

<sup>14</sup> Miñe nac diidzli, niina wriiñ psañ Dios ti Wseed Cub dien zha guiaanwen miech lo me, zha qui rzac led zhiwseete Diosa, sañgue naa dib zdoo naa zanał naaw, dib zdoo naa quiayuy naa dziin lo Dios men ne bliladz pxozgol no; ni scaquegaa, noxco naa grëse miñe nac ley. Rliladz naa grëse miñe bnee grë zha ne biadteed xtiidz me. <sup>15</sup> Rliladz naa dzziñ dze ne cueeban Dios grëse miech, zigtaa zha wena zigtagaa zha ntseeba, ni haxta zha ye zho rliladz miñ co. <sup>16</sup> Ni miñ copaa nagon gane tibaque noxco naa guiaanmbe zdoo naa, guntal-draa naa xtoł naa zigtaa lo Diosa zigtagaa lo samiech naaw.

<sup>17</sup> Nod naa Jerusalén tibaque, blale iz goc no naa ladz menzit; dze ne bdziñ naa Jerusalén ga, laa naa bia porne zasañ ti gon lo menladz naa ni zanie naa ti gon ne gded naa lo Dios. <sup>18</sup> Miñ co nagon nacne no naa len yadoo zeene gon grë zha qui naa. Blozhle ben naa grë miñe rnabey xley no rdziuy no zeene sca riosañ no gon, zeene laa bla zha Israel ne no nêz Asia blanso lo naa ga; per choot miech taf ndxienied naa ga, niicle choot noquiiidgaa naa. <sup>19</sup> Zha co nagon rieguial niaad nu, nlisqui zho tel pe ncuaane rzac zho nonguielđ noyuy naa ga. <sup>20</sup> Zha ne ndxieggaa nu niina, zac gnë zho telne brieequia falt ne rquiaqui zho naa zeene gocredz naa lo wxtis Jerusalén. <sup>21</sup> Te goon falt ga naye ben naa, lëe gdib nguiedz bne naa lo zho rep naa: “Laa naa racredz lo to, zig nac zeene falt ga rap naa loxaque ne rliladz naa dzziñ dze ne grieeban miech.” Scase nagon naca.

<sup>22</sup> Nanle gobernador co led ncuaane gund zha ne rliladz Jesús ga rquiaqui zho Pabl, dzigo bnee me lo zho cuëz zho nieeda gdziñ Lisias, dzigo dien zhapaa guiaan xtił zho. <sup>23</sup> Bñabey me zha ne zo lo mennguiib yquianap zho Pabl, ni pso me diidz zaacse gac zho lo Pabl, gdeed zho diidz ted grë zha ne ndzieeldiiz Pabl tsiegan zho Pabl.

<sup>24</sup> Goc blalaa ngbidza, bnabey gobernador co gocredz Pabl lo me grop tsieel me Drusil, ti wnaa Israel. Laa me bredz Pabl, sac racladz me yquiaadiag me dien zha nac zhiwseed Jesús. <sup>25</sup> Zeene bzeettaa Pabl, zha nac guielwxtis, zha none tsoxco miech gund zho miñe ri-aabtaa guic zho, ni zha gdziñ dze ne gun Dios guielwxtis, dzigotaa laa me bdzieb, rëbchaa me lo Pabl:

—jLëelewga na nadien! Na zeene guioba, dzigo naazhal cuedz luu guiaad luu ziodiiz ne stib.

<sup>26</sup> Zhiga zhiga rbedz me Pabl, sac quiambëz me dien pe gdziibd Pabl dimi csilaa me Pabl.

<sup>27</sup> Zeene goc chop iz sca no Pabl ladzguiib ga, laa Wech brieë guielgobnador, bzëeb ti men lë Pons Fest. Niicle brieë Wech per psilaad me Pabl, sac racladz me dien zha guianziuuraa me lo grë zha Israel.

### Güeyzo zho Pabl lo gobernador Fest

**25** Zeene goc tson ngbidz bdziñ Fest Cesarea pcaania me guie|gobrador, laa me briece güey me Jerusalén.

<sup>2</sup> Grè zha pxoz non ni grè zha ne rnabey lo men|guedz Israel, zeene bin zho laa Fest bdziñ Jerusalén lèlèd güey zho lo me güeyxob zho xdemand Pabl; ni <sup>3</sup> bñab zho lo me cxeel me Pabl Jerusalén. Laa zho rnab miñ co sac laa zho bñediidzle, nèz tsiesoblan zho, yquiambèz zho ted Pabl gut zho Pabl. <sup>4</sup> Per bdeete Fest diidz, rëb me laa Pabl nole ladzguiib ga, tel zha ne zrieelo tsie, ga glisqui zho tel pe nac falt ne rquiaqui zho Pabl; beñque zlase dze laa me gbiire guey nèz co dzigo zac tsienal zho zhits me.

<sup>6</sup> Ndziibsràa ti zhmal blèz me Jerusalén ga, dzigo laa me biire zey Cesarea. Zna dze bdziñ me biinigazh liu co güey me yulow, bnabey me gocredz Pabl. <sup>7</sup> Laa grè zha Israel ndxiele ga, wbig zho lo Pabl ndal grè falt nroob ne rcaadzdo| zho me, per loxaque diidzsew, guieñd zha glu zho ne nlipaa goca. <sup>8</sup> Dzigo pquiab Pabl rëb Pabl:

—Grètaa miñe rquiaqui zho naa i, ni tiba nliid. Wlaltaa gard quits naa xley no, gard quitnie naa xyadoo no, niicle gardgaa gacntseeb naa lo zhiwxstis zha Roma.

<sup>9</sup> —¿Pe racladzga luu tsie luu Jerusalén? —rëb Fest—. Ga gbiire yquiaadiag naa xti| to i zeena glu dien chopaa rap do|.

Sca rëb me, sac racladz me dien zha guianzuiuu me lo grè zha Israel. <sup>10</sup> Dzigo rëbchaa Pabl:

—¿Gad naa! ¡Nod pe nac ga naa ga, to rieguial guñ guie|wxtis rii! Beñque nan wen luu ganle peet falt nzèèbd naa lo zha Israel. <sup>11</sup> Tel niaca miñe nli ziyun naa pe guie|ntseeb ne raguial naa guet naa, maase guet naa. Per na nanpaa naa ni ti ncuaane rquiaqui zho naa i nliid, ¿pe nac dzigo cho co naa ladznia zho gut zho naa? Laa naa racladz, mazd go|needz diidz tibaque ga naa lo zhiwxstis nroob ne, men ne zob Roma.

<sup>12</sup> Dzigo bzodiidz Fest grè me men rac ne nacie me dziin; blozhse ga rëbchaa me lo Pabl:

—Guiend rson sca. ¡Tel lo César racladz luu tsie luu, na maase tsie luu!

### Gocredz Pabl lo Agrip

<sup>13</sup> Zeene goc bla zhmalà, laa rey Agrip grop wnaa ne lè Berenis bdziñ Cesarea ga güeyquiaabdiuzh me Fest. <sup>14</sup> Nzianlaa ngbidz blèz me ga, dzigo bzodiidz Fest lo me laa Pabl sca no ladzguiib ga, rëb Fest:

—Leñ dze ne bii nac Wech dziin biab ti mgui ladzguiib nu, <sup>15</sup> laa leñ dze ne bia naa Jerusalén biaad grè zhipxoz non zha Israel, grè zha non ne rnabey lo zho, biaad-xob zho xdemand me lo naa ga, rnab zho lo naa gnabey naa guet me. <sup>16</sup> Dzigo rep naa lo zho led scad run zha Roma guie|wxtis, ib none gacredz me gnee me chop lan xtiidz me lo grè zha ne rzoob xdemand me, ga glu telne nli miñe rquiaqui zho me togo

nliidgaaw; <sup>17</sup> nacne biaad zho nu. Zna dze blanso zho, biinigazh liu co bnabey naa gocredz me. <sup>18</sup> Tibaque ni naa bod no pe ti falt nroob ne rquiaqui zho me, per zeene biaad zho yulow gon naa <sup>19</sup> lèè gdib tel zha nac grè ncuaane riladz zho miñ co rlisqui zho, ni rlisqui zho pe nacne zienal me zhiwseed ti mgui lè Jesús, gutle men co ni laa me rnee mban me.

<sup>20</sup> Zeene gon naa grè ncuaan co rquiaqui zho me nli riend naa zha gon naa, dzigo rep naa lo me, telne racladzga me zac tsie me Jerusalén ga dien zha guiaan lo xti| zho. <sup>21</sup> Per bñèd me, le| bnab me tsie me lo César; gane niina laa me bii no i, nieeda gne naa lo César dien pa hor grieelo cxe| naa me nèz co.

<sup>22</sup> Dzigo rëb rey Agrip:

—Racladz naa gon tebaa zha yquiaadiag naa dien zha nac xtiidz mgui co.

—Na zho ganle —rëb Fest—, gzhegazh gnabey naa gacredz me.

<sup>23</sup> Biini liu, ti lni nroob ne rac laa Agrip ni Berenis bdziñ leñ yu ne rac guie|wxtis ga, grè zha non ne rnabey lo men|guiib, grè zha non lo men|guedz, nal zho zhits me. Dzigo bnabey Fest gocredz Pabl, zeene laa Pabl bdziñ <sup>24</sup> laa Fest psilo bnee, rëb me:

—Niina ne laa luu ziaad nu rey Agrip, scagaa to ne nac to men ne ndxiegrè ne nu nadze, go|wi ganle lèè men rii nagon rlèènedox zha Israel, racladz zho guet me; zigtaa Jerusaléna zigtagaa nuw ziyadnab zho lo naa gnabey naa guet me. <sup>25</sup> Sangue naa gonle naa rapd me falt, par guiab ne rieguial guet me; per laa me bnab tsie me lo César, na laa naa no cxe| me nèz co.

<sup>26</sup> Nli riend naa dien pe nac diidz ne cxe| naa lo César, ne squi lega ncuaane nliid rquiaqui zho me. Miñ co nagon bnabey naa gocredz me lo to nu, ni laga laa luu ziaadgaa nu rey Agrip, bzhiguiel pquiaadiag ganle zha rzè xtiidz me; zeena togo zdiel naa pe nac diidz ne cxe| naa gal dze ne laa me tsie nèz co. <sup>27</sup> ¡Sac nonguiel|d ga gon naa telne sobdoo me cxe| naa me, ni tel cxe|d naa diidz dien pe nac xfalt me!

### Bnee Pabl lo Agrip

**26** Dzigo rëb rey Agrip lo Pabl, mezhal gnee dien zha naca. Nacne blis nia Pabl psilo Pabl bnee Pabl rëb Pabl:

<sup>2</sup> —Rley naa gon rey Agrip ne laa naa zial lo luu nadze, zeena gzodiidz naa lo luu gacnan luu ganle nliid grè ncuaane rquiaqui grè menladz naa naa. <sup>3</sup> Rley naa sac nan naa nanpaa luu zha nac grè xcostumbr no, grè ncuaane riladz no. ¡Rnab naa lo luu sca, guieete luu yquiaadiag luu grè miñe gne naa!

<sup>4</sup> Grèse zha Israel nan wen zho ganle zha mban naa, sac mèèdlas naa bdziñ naa Jerusalén, ga broob naa. <sup>5</sup> Nanpaa zho zha farisé goc naa, ni zha farisé nac zha ne rioxcoraa run grèse miñe riladz zha Israel. <sup>6</sup> Per mazd gon, laa zho rlèè lo naa porne dib zdoo naa riladz naa laa Dios beenle miñe psan me diidz lo grè pxozgol no. <sup>7</sup> Grèse zha Israel, zigne ziaad zho lo gza tsiipchop dii ne psan xmen|gol no, grèse zho dze guieel



bii quiambëz zho gac miñ co. ¡Masaque rzac zho dol ga quiayun naa rililadz naa laaw gocle! <sup>8</sup> Haxta to, zeene rzet naa zrieeban miech, rzhidz to ron tow, ¿pe rzac to naa grieelod Dios guñ me miñ co?

<sup>9</sup> Glo nli ptsidiñ naa grë zha ne rililadz Jesús meñ Nazaret, masaque rzaac naa lëew ga quiayun naa.

<sup>10</sup> Pe zhidaa zha ne blo naa ladzguiib Jerusalén, haxta grë pxoz non bneedz diidz beñ naa grë miñ co; ni zeene rnabey zho ret grë zha co, ye naa rded diidz ret zho. <sup>11</sup> Nzian grë yadoo win bia naa, biasacsi naa zho haxta gneenë zho Jesús. Blëeniedox naa zho, haxta grë guiedz zit bia naa biaguib naa zho.

<sup>12</sup> Miñ copaa nagon brie naa za naa guiedz Damasc, masaque grë pxoz rnabey bneedz ti xtiidz zho bi naa laa naa za. <sup>13</sup> Tel gan luu ganle rey Agrip zha bzhaac naa: Zig rwe ngbidza, tibaque zeene ziaad ti biinidoo nëz zhan gbaa biab lo naa, ni lo grë zha ne zanie naa ga, nroobraa nac biini co lo xbiini ngbidz. <sup>14</sup> Grëse no biab liu, dzigo bin naa ti tsi meñ co rnee me xtiidz no, bredz me naa në me: “Saul, Saul, ¿pe nacne quianañ luu naa? Lëëque luu gon nosacsi luu i, rzac luu zigne rzac ngon ne rcaañni, ni lëëque lo guuib lots ne rtseb zho ma riecaañni ma.” <sup>15</sup> Dzigo rep naa: “Been guieñnaac bnë dieñ cho luu.” Nëchaa meñ co: “Naa nac Jesús, meñ ne squi quiatsidiñ luu. <sup>16</sup> ¡Na zeena guche i, bzoli! Laa naa bredz luu zeena guñ luu xtsiñ naa, tsiezodiidz luu lo miech miñe blozh bzhaac luu nu, ni grëragaa miñe naraa gan luu. <sup>17</sup> Peet tsienied guic luu, naa yquianaap luu, niicle zhaladz luuw niiclegaa zha zita peet grieelod guñ zho luu. Sac laa naa cxel luu grë guiedz zit <sup>18</sup> tsienee luu lo miech gacnañ zho miñe nacpaa diidzli, zeena griee zho lo ncow gbig zho nëz lo biini, griee zho lадznia mendox ygab zho lo Dios. Dib zdoo zho gliladz zho naa zeena guñ Dios zho perdon, ni ygaa zho zaatne gdziñ grëse zha ne mbe zdoo.”

<sup>19</sup> Miñ co nagon rey Agrip nacne bioxco naa beñ naa miñe në meñ co lo naa ga. <sup>20</sup> Glose Damasc psilo naa bne naa lo miech, ga brie naa bdziñ naa Jerusalén, bia naa dib Judé ni grë guiedz zit, bne naa lo miech csaan zho grë xquieñntseeb zho gbig zho lo Dios.

<sup>21</sup> Miñ co nagon nacne rlëenie zha Israel naa, biadnaaz zho naa leñ yadoo ro ne zob Jerusalén, gocladz zho niutgazh zho naa. <sup>22</sup> Gocnieñ Dios naa, gane laa naa bii zo nu quiane naa Xtiidz me zigtaa lo grë zha wina zigtagaa lo grë zha nona. Noseete naa miech stib wseed, sinque laa naa rne miñe bzeetaque Moisés ni grëragaa zha ne biadteed xtiidz Dios padzeela. <sup>23</sup> Tel zha, bzeetle zho ib sacsi miech meñ ne cxeeñ Dios ga, ni me gac meñ ne gloopaa grieeban, me gac zig ti biini ne gziini lo grëse miech, zigtaa zha Israela zigtagaa grë menzita.

<sup>24</sup> Tibaque nguiedz bnee Fest rëb me lo Pabl:

—¡Bod rzhinle guic luu gon Pabl! ¡Ne tibaque nagon rio luu wseed gane squi riots xtiidz luu!

<sup>25</sup> —Coo, gobernador Fest —rëb Pabl—, led rzhinñ guic naa. Niapse miñe nac diidzli miñ co none naa, <sup>26</sup> laa rey Agrip zob i, me nañ ganle nli grë miñe rne naa nu. Tibliladz naa none naaw lo me, sac nañpaa

naa nañ me nli miñe rnee naa, nacda ncuaañe goc ngueets zhliaan. <sup>27</sup> ¿Led nli lëe rey Agrip rililadz luu miñe bzeet grë zha ne biadteed xtiidz Dios padzeela? Nañpaa naa rililadz luuw.

<sup>28</sup> Pquiab rey Agrip, rëb me lo Pabl:

—¡Zlalaque nu gon laa luu cole guic naa ye naa sëeb xnëz Jesús!

<sup>29</sup> Dzigo rëbchaa Pabl:

—¡Nend zhilew o nroobragaaw, per rnab naa lo Dios led loxaque luudse sëeb xnëz me, sinque ye grëraa zha ne noquiaadiag miñe none naa nu niina; zeena ygaa to miñe bgaa naa nu, per led znud sob caden rii nia to!

<sup>30</sup> Gataa laa Agrip guso, gusoque Fest, gusoque Berenis ni grëraa zha ne zobnie zho, laa zho briece ga.

<sup>31</sup> Grëse zho rnee peet xtold Pabl, rapd me falt ne guiab ne rieguiañ guet me, rieguiañgaa tso me ladzguiib.

<sup>32</sup> —Niacpaa nsilaa ne me —rnee Agrip lo Fest—, telne nabd me tsiepaa me lo César.

### Pxeeñ zho Pabl nëz Roma

**27** Bdziñ dzew, laa Fest bnabey tsie Pabl nëz Roma, dzigo laa zho psañ Pabl lадznia ti meñ ne rnabey lo menñguiib lë Jul, gza Pabl zlalaa zha ne no ladzguiib ga. Lëe Jul co rnabey lo tib dii menñguiib ne rnee zho “Augusto César”.

<sup>2</sup> Ye no zionañ zhits Pabl grop no Aristarco, laa no bzi-aab ti xbarcw zha Adramit zie grë guiedz ne ndxie ro nis nëz Asia, laa no pcaa nëz laa no zio.

<sup>3</sup> Biini liu co laa no bdziñ guiedz Sidón. Zeene bdziñ no ga, wen goc Jul lo Pabl bdeed me diidz güey Pabl güeyquiaabdiuzh Pabl grë zha ne runbey Pabl ga, grëse zho rleynie zho me blëzlo zho me.

<sup>4</sup> Ga briece no bdieed no tib ro guidzliu win ne lë Chipr, psaac guidzliu co palal, sac psilo rriece me rtsire me barcw ne zio no ga. <sup>5</sup> Laa no zio, bdieed no gax ro guidzliu ne nac xtan zha Cilis ni xtan zha Panfil, bdziñ no ti guiedz ne ndxie xtan Licia lë Mira; <sup>6</sup> ga bdzieet no barcw ne zio no ga. Lëëtaaque noguib Jul sti barcw ne guio no, laa ti xbarcw zha Alejandrí no griee ga tsie nëz Italia, dzigo bziaab no barcw co laa no zio stib.

<sup>7</sup> Tsow ga zie barcw co, nzian dze goca, nen dzigoraa bdziñ no gax guiedz Gnid; ib rbëzdaque me, nacne bguib zho dieñ pa nëz zhi rcaañ me, dzigo güeynie zho barcw co nëz Cret. Tib ro guidzliu win co zio no bdieed no Salmon; <sup>8</sup> nen bdziñ no zaatne rnee zho Buenos Puertos, gaxle ga riaan ti guiedz lë Lasé. <sup>9</sup> Nrooble dze goc no no lo nis, leñ dze co laa mëe nañ psilole ni zëeb diidz gacd së barcw leñ mëe co, nacne bnee Pabl lo grë zha ne zienie no ga, <sup>10</sup> rëb me lo zho:

—Golgona ganle, telne laa ne griee nu leñ dze rii, rgobey naa ib znitlonie ne barcw rii lo nis.

<sup>11</sup> Laa ne niacnie Jul Pabl niac miñe rëb Pabl ga, leñ mazdraa bliladz me xtiidz zha ne rsëe barcw ni meñ ne nac bizhuana. <sup>12</sup> Stiba, zaatne nac Buenos Puertos ga rapda zaatne zaacse cuëz miech leñ mëe nañ, nacne nzian zho rëb mazd gdziñ guiedz Fenice, ga zac gbiaaz

no gdipse leŋ mēē naļ. Ro guidzliu win co riaan Fenice, nligaa zhi rcaan me ga.

<sup>13</sup> Zeene laa ti me win ne znu ziaadquia psilo briece lo nis co, zootle na nli grieedraa me. Nacne lēēlēd bnabey zho bziaab no barcw, blisglaa zho lar nroob ne rcaan me rzēw, laa no zio, gax gax ro guidzliu co zienie zhow. <sup>14</sup> Zhisaque goca zeene laa ti me dox ne rnee zho Nordest psilo briece, laa me co psilo rtsire barcw.

<sup>15</sup> Niicle racladz zho tsienie zhow nēz ne no guio no ga, per rsaand me; gonse zho led ncuaaŋe gacda, mazd psaan zho zienie mew nēz ne racladztaa me.

<sup>16</sup> Scale zienie me barcw ne no no ga, biotieed no gax ro guidzliu win ne lē Clauda, ga nē nē brieelo blis zho grē canó win ne naļ zhits barcw ga bzēēba nēz leŋ barcw; <sup>17</sup> dzigo blibdoo zho barcw co zeena gbiļda, ni blit zho lar nroob ne rcaan me rzēw, sac rdzieb zho rēb zho teŋe scaquia lar co nend tsieniezho mew nēz ro nis, pa tsiesobnagwa lo yuzh.

<sup>18</sup> Zeene biini sti liu co mazdraa rriece me, ni guieexo ne ziaadnie me, nacne blee zho grē yo ne no leŋ barcw blaal zhow lo nis. <sup>19</sup> Goc bioŋ ngbidz scataa zo guie dox co, bnabeyaque zho blee no grēse ncuaaŋe ruŋxtsiŋ zho leŋ barcw blaal now lo nis.

<sup>20</sup> Goc bla ngbidza rbēzdaque guie dox co, rludraa lo mel per ni lo ngbidz rludraa, dzigotaa rdzieets no nlidraa griequiaa no. <sup>21</sup> Niicle wagw choot rsoladzdraa, dzigo bnee Pabl lo grē zha ne ziogrē no ga, rēb me:

—Tebaa nion to xtidz naa nagoŋ nzhiguiel to nried ne Cret, zeena ndzieelod ne grē ncuaaŋe nodziaŋ ne nu, niicle nlaaldgaa ne grē yo co lo nis. <sup>22</sup> Per laa ne znule bzhaac zha dziuŋraa ne. ¡Gdziebde to! ¡Peet gacd ne! Niicle nitlo barcw rii, per choot peet gacd.

<sup>23</sup> Led naŋle to gaŋle, xnēz Dios no naa ni xtsiŋ me noyŋ naa, nieewdze pxeel me ti xanj me <sup>24</sup> nē lo naa: “Gdziebd luu goŋ Pabl, peet gacd luu, sac ib none laa luu gdziŋ lo rey ne zob Roma. Niicle grē zha ne ziadgrēē luu leŋ barcw i peet gacd zho, sac bin me miŋe rnab luu.” <sup>25</sup> Gane rne naa lo to peet tsienied guic to, naŋle naa csaand Dios ne, ible zac miŋe nē anj co lo naa. <sup>26</sup> Ib tedsod, no pa ti lo guidzliu win ne no lo nis rii tsiezo me rii ne.

<sup>27</sup> Zeene goc tsiida ngbidz sca nēzrii nēzrec zienie me no, laa no no lo Nisdoo Adriático. Wdze co, zig groļ guieela, bien grē zha ne rsēē barcw ga gaxle ti ro guidzliu ga nonie barcw no; <sup>28</sup> dzigo ptiix zho dieŋ palal quiet nis ga, goŋ zho loxaque gaļ yas guieta. Bzē zho spalal biire ptiix zhow stib, gale guieta loxaque tsiiptib yas. <sup>29</sup> Gataa laa zho bdzieb rēb zho nend pa tsiecaan barcw lo quie, dzigo psilēē zho lo doo ne zob gza tap guiib cruz nroob ne quia nēz zhits barcw, bron zho gza guiib co lo nis, zeena tsowga sē barcw; rzac zho tebaa laa liu biinile.

<sup>30</sup> Grē zha ne ruŋ dziin leŋ barcw, gocladz zho nzhoon zho, psilo zho noxadz zho grē canó win ne ney barcw, rquiaalo zho zig nac zeene guiib cruz nroob ne ney barcw nēz quiaaw qualit zho csēēb zho leŋ nis.

<sup>31</sup> Zeene goŋ Pabla, rēbchaa me lo Jul ni lo grē xmenguiib Jul:

—¡Laa grē zha rii goŋ racladz xoon! Csaande to, sac teļne laa zho xoon nlidraa griequia to lo nis rii.

<sup>32</sup> Dzigo pchug grē menġuiib co doo ne zob grē canó win co, bron zhow lo nis.

<sup>33</sup> Silgaw, bii ncow rnaw laa Pabl bnee lo zho gow zho, rēb Pabl:

—¡None gow to! Goļwi gaŋle nale gac tsiŋ ngbidz ga ni ti lē peet gard gow to, ni squique raguiesde to zacse. Peet tsienied guic to, ni tib to peet gacd.

<sup>35</sup> Blozhse sca bnee Pabl lo zho, bzheŋ Pabl ti quietxtil, squi ndxie zho grē zho bdeed me xquizh lo Dios, dzigo beengroļ me quietxtil co laa me psilo wagw.

<sup>36</sup> Dzigoraa peet ġueyniedraa guic zho, ye zho laa zho psilo dow. <sup>37</sup> Lo grē no zig zio no leŋ barcw co rgaa no chop gayoo tsonġaltsiimtib.

<sup>38</sup> Blozhse bdioow no, dzigo laa zho blee grē zhoxtil ne zie leŋ barcw ga blaal zhow lo nis, zeena gnitnē barcw spalal. <sup>39</sup> Zeene laa liu blozh biini, goŋ grē zha ne rsēē barcw ga laa ti lē ro guidzliu rlu gax ga, per rieŋd zho dieŋ paw. Natlaa nac ro guidzliu co, rlu zac gdziŋ barcwa, nacne rēb zho dieŋ pe grieelod gdziŋnie zho barcw ga. <sup>40</sup> Dzigo pchug zho doo ne zob guiib cruz nroob ne no leŋ nis ga, baaŋse guiib co ga. Psilēē zho doo ne naaz yag nlag ne rchug nis rzē barcw, ni blisglaa zho lar nroob ne rcaan me rzēw; zeena csēē mew gdziŋa gax ro guidzliu co.

<sup>41</sup> Per ziese zho, lēētse lo yuzh ne zobli leŋ nis co ġueytsiba, loxaque ġueysēēbguica ga laa nēz zhitsa psilo nobilaque, sac grēse nis ne rias riecaan choo co.

<sup>42</sup> Dzigotaa laa grē menġuiib co gocladz niut grē zha ne zie ga guey ladzguiib, rēb zho nend znuse xoobnis zho xoon zho. <sup>43</sup> Per bdeete meŋ ne rnabey lo zho didz, sac racladz me gut zho Pabl. Mazd bnabey me zha ne rac rzhoobnis, zac ner zho xoobnis zho griequia zho ro nis co; <sup>44</sup> laa grē zha ne gacd xoobnis, zac maase grē yag biats ne nobiļ barcw xoobnisnie zho. Sca bdeeda diidz briequia no ro nis grēse no.

### Blēz zho Malt

**28** Zeene bdziŋ no ga, dzigoraa gocndioŋ no lēē guidzliu win ne lē Malt ga. <sup>2</sup> Grē miech ne no ga pquiadox zdoo zho no, bzēēg zho gui bredz zho no bdzēē no, sac lala rac naļ ni scataque bgaa no guie.

<sup>3</sup> Ye Pabl ġuey ġueytop chop lē yag ne cuib lo gui. Lēētaaque laa me nodziiba lo gui, tibaque bias ti meel ne zizhoon lo zhindzēē gui co, pquiaalay ma nia me, quiatague ma ga. <sup>4</sup> Grē miech ne no ga, zeene goŋ zhow rneechaa zho:

—¡Ise nagoŋ rlu, nzēēb meŋ qui ngutoo! Niicle blaa me lo nisdoo, per no guieļwxtis ne quianab guet me.

<sup>5</sup> Znuse bdzib Pabl nia me bron me meel co lo gui.

<sup>6</sup> Grēse zho rwi quiambēz zho dieŋ pa hor sigui me, te tibaque tsobe me liu ye guet me. Wdzeelaaw peet racd me. Laa zeene goŋ zho peet racd me, dzigo psilo zho rnee zho no cho ti dios nac me.

<sup>7</sup> Gaxaque ga quia tib lē liuŋ meŋ ne rnabey lo guidzliu win co lē Publ, dzigo bneedz me zaatne bliiaz no ga tsoŋ ngbidz ni bneedz me ncuaaŋe bdioow no.

<sup>8</sup> Lëëtaaque leṅ dze co laa pxoz me nix rlan xlëë ni yoochen. Dzigo güeynee Pabl lo me, bñab Pabl lo Dios guiac me; blozhse bñab Pabl lo Dios, pxobnia Pabl guic me, laa me biac. <sup>9</sup> Zeene bin grë miech cow, zha ne rzacnëtaa riaadnie zho zho lo Pabl, runguiac Pabl zho. <sup>10</sup> Dzigo rleynie zho no, nroob grë ncuaaṅe bgad zho lo no. Zeene goḷ dze ne laa no wbii ga, scasaque nroob ncuaaṅe yquiiin no nëz bneedz zho.

<sup>11</sup> Tson mëë bliiaz no lo guidzliu co, dzigo laa no brieë ga bziaab no ti leṅ xbarcw zha Alejandrí, ti barcw ne blëz ga dipse leṅ mëë naḷ co. Guic barcw co quia chop mdio, mdio ne rnee zho Cástor ni mdio ne rnee zho Pólux. <sup>12</sup> Bdzin no guiedz Siracús, ga bliiaz no tson ngbidz. <sup>13</sup> Siracús brieë no, gax gax ro guidzliu zio no bdzin no guiedz Regio; biini liu iṅe zhoob ti me ne ziaadquia lo nis co, dzigo laa no brieë Regio laa no zio. Biiniraa sti liu bdzin no guiedz Puteoli, <sup>14</sup> ga bdzin no lo blalaa zha ne rliladz Jesús. Bñab zho lo no gbiaaz no, nacne bliazaque no lo zho ga ti zmal. Garaa brieë no bdzin no Roma.

<sup>15</sup> Grë zha ne rliladzle Jesús Roma, zeene bin zho laa no gdzin ga, brieë zho bñaad-xinëz zho no. Zhis zho bi-addzieel no zaatne lë Foro de Apio, szhis zho bñaad zaatne lë Tres Tabernas. Zeene gon Pabl scataa bñaad-xinëz zho no, rley me rdeed me xquizh lo Dios.

#### Bdzin Pabl Roma

<sup>16</sup> Zeene bdzin no lad guiedz Roma, bdeed zho diidz Pablzhal bguib ti yu ne blëz me grop me menḡuiib ne quianap me, blood zho me ladzguuib.

<sup>17</sup> Goc tson ngbidz bdzin no ga, dzigo bredz Pabl grë zha ne nac zha non lo zha Israel ne no ga. Blozhse pcaalsa zho, rëbchaa me lo zho:

—Laa naa bredz to nu gon bets, gacnaṅ to ganle laa grë zha ladz ne bñaaaz naa Jerusalén, güeyzo zho naa lo zhiwxtis zha Roma rñab zho guet naa, per gneli naa lo to ganle, peet beṅd naa lo zho, ni ti zhiwseed xmenḡol ne bditd naa. <sup>18</sup> Niicle wxtisgaaw, blozhse pquiep zho naa gon zho raapd naa falt, nacd naa zha ne rieguaḷ guet; dzigo gocladz zho nsilaa zho naa.

<sup>19</sup> Per zeene gon naa nëd menḡladz ne csilaa zho naa, nacne bnabaque naa ziaadnie zho naa lo César nu. Miṅ co nagon nacne ziaḷ naa nu, ziaḷd naa cto naa menḡladz ne o cteedquiegaa naa zho. <sup>20</sup> Wen ne laa naa beenbey to nagon, ni beenbeygaa to naa; gacnaṅ to sca ganle laa caden rii zob nia naa, per nacda por pe

falt ne rap naa, sinque laaw zob nia naa porne rliladz naa laa Dios pxeelle menḡ ne quiambëz menḡladz ne ga.

<sup>21</sup> Dzigo pquiab zho rëb zho lo Pabl:

—iWaltaa, ni ti guits ib gard cxeel menḡladz ne lo no zaatne gzeet zho luu! Niiclegaa grë zha wladz ne zilan-so nuw, rneed zho laa luu noyuṅ pe guieḷntseeb. <sup>22</sup> Per na laga laa luu ziaad nu, siguiel luu sodiidz luu lo no dienḡ zhapaa nac wseed ne rliladz luu i, sac blactaa zidzion no, zaatne notaa zha ne rliladza rlëënie miech zho.

<sup>23</sup> Dzigo pso zho ti dze ne tsie zho.

Zeene goḷ dze co, nzian zho pcaalsa zaatne rbëz Pabl ga. Dzigo psilo Pabl bzodiidz me lo zho zhapaa racladz Dios gban miech, ni rnee me lo zho gliladz zho lëële menḡ ne nac diidz cxeel Dios ga nac Jesús; blu me lo zho grëse zaatne zhoobneew, zigtaa lo grë miṅe pquiaa Moisésa, zigtagaa lo grë miṅe pquiaa grëraa zha ne bi-adteed xtiidz Dios. Dipse dze sca bzodiidznie me zho grë miṅ co.

<sup>24</sup> Brieequia bla zha ne bliladz grë miṅe bnee me ga, ni scaquegaa brieequia zha ne bliladzda. <sup>25</sup> Grë zha ne riod zdoo miṅe rnee me ga, laa zho psilo norieë, nacne rëb me:

—Ib lëëpaa miṅe nac to i ga nagon bzeet Espíritu Sant, zeene psiaab me guic profet Isá znu rëb Isá <sup>26</sup> lo grë xmenḡol to:

Niicle peraa gon to, niicle peraa gon to,  
per peet guieṅde to;

<sup>27</sup> sac gocntseeb zdoo to.

Zob diag to, ni peet ronde to;

zob lo to, ni peet ranḡe to.

Ncow nac guic to,

gane peet ronde to, peet ranḡe to;

niicle rioxcodgaa to gbig to lo naa zeena csilaa naa to lo xtoḷ to.

<sup>28</sup> Goḷgacnaṅ sca ganle, miṅ co gane laa Xtiidz Dios quiagaaz lo grë miech stib guiedz, ni zhasi gon noliladz zhow.

<sup>29</sup> [Zeene gon zho sca rëb Pabl mazdraa blëë zho, nodiḷdiidzlsa zho laa zho zey.]

<sup>30</sup> Dipse leṅ chop iz blëz Pabl ga, ga bree me ti leṅ yu ne bio me. Ga rdzin grë miech ne zienee lo me, <sup>31</sup> zha ne zietaa, rnee me lo zho zhapaa racladz Dios gban miech, ni rnee me lo zho gliladz zho cho nac Jesús. Dipse leṅ dze co, ib biod zha ne ntsidiḷ pe nacne sca noseed me miech.

# ROMANOS

¡Diuzh to grëse to!

**1** Naa nac Pabl, naa nac tib nguñdziin win quiayun naa xtsiin Jesús. Dios bredz naa pxeel me naa none naa Xtiidz Ndzon me lo miech.

<sup>2</sup> Padzeelale bnee Dios ne laa me cxeel Diidz Ndzon rii lo ne, lëew ga bzeet grë zha ne bиаad padzeela biadteed xtiidz me lo miech, lëew ga raquiet lo guits ne zhobnee Xtiidz me. <sup>3</sup> Lëew ga rnee ganle cho nac Jesús (men ne briequia lo xtii rey David ne laa me goc miech lo guidzliu; <sup>4</sup> sangue Espiritu Sant, pxobnen me ganle Xpëed Dios nac me; miñ co gane brieaban me).

<sup>5</sup> Zeene bиаad Jesús, ga pxobnen me ganle tibaque noxco Dios ne; ni niina Diosaque bzooblo naa rxeel me naa none naa Xtiidz me lo grëse miech, zeena gliladz zho me, gon zho diidz gban zho zigne rnabey me. <sup>6</sup> Zig nac to, glo lo guiełcow ga ngab to; sangue niina laa me bredz to laa to ngab xnëz Jesús.

<sup>7</sup> Laa naa rxeel guits rii lo to, grëse to ne no to guiedz Roma i. Golgacnan ganle rleyne Dios to, gane laa me bredz to ygab to lo me, gban to zigne no gban zha ne ngab lo me. Me ne nac me Pxoze ne, ni Jesús men ne rnabey, tibaque noxco me to, me nac men ne gacniñ to zeena peet zhgab ctsebde to.

<sup>8</sup> Nanle to nasca ganle xtsiin Dios quiayun naa, dib zdoo naa quiaseed naa miech Diidz Ndzon ne nac zhiwseed Xpëed me.

Nu ne laa naa rsilo rne lo to, gloque rded naa xquizh lo Dios ni lo Jesús por miñe quiayun to grëse to, sac gon tel pa lotaa zëeb diidz ne nlipaa dib zdoo to rliladz to me. Me zobwi, me nan ganle zeene rnabtaa naa lo me, ib riaanladz naa to, tibaque rnab naa lo me gacniñ me to; <sup>10</sup> ni tibaque rnab naa telne zneedz me diidz gdziñ tib dze ne grieelo guial naa i guialgan naa to. <sup>11</sup> Ne nlipaa rquiabladz naa ganlo naa to, guialzhaal naa gnedz naa rson lo to guien to zha ycaaniaraa to guiełbiini ne rneedz Espiritu Sant; zeena tiblque gac guic to dziitsraa so to. <sup>12</sup> Ni scagaa tipse gac ne ziodiidz ne zha nac Xtiidz Ndzon Dios, miñe rliladz ne; zeena tipse gac ne sodziits ne low.

<sup>13</sup> Bets, bzian, tel gan to ganle blactaa vuelt ziyacladz naa guial naa i guialgan naa to, per haxta lo nadze gon rrieelodaque guial naa. Ib laa guic naa no guial naa lo to i, zeena gacndalraa miech ne sëeb gliladz Xtiidz Dios, zigne ziyacndal zho grëraa zaatne ziyateed naa. <sup>14</sup> Sac ible naa ragual cseed miech Xtiidz Dios, grëse zho niicle zha nona, niicle zha mbana; niicle zha raca, ni niicle grëgaa zha ne peet rienđa. <sup>15</sup> Miñcocxe waa, tibaque laa naa racladz ye nëz qui guial naa

guialne naa Xtiidz Ndzon Dios lo to, ne nac to zha ne no guiedz Roma i.

## Poder ne rap Xtiidz Ndzon Dios

<sup>16</sup> Tel naa, ib rtoladz naa gne naa Diidz Ndzon rii lo miech, sac ncuaan ro ne run Dios zeene rquiaadiag miecha. ¡Grëse miech ne gliladza, ib zlaa zho lo xtoł zho! Laa guiełnzaac co no niina par grëse miech. Glose lo zha Israel bdziña, laa niina laaw quiazziñ lo grëraa miech, zeena grëse zho gbig sëeb xnëz Dios. <sup>17</sup> Sac gon, lëe Diidz Ndzon rii rlu zha rbiire rcaania Dios miech, rsañmbe me zho lo dol rbiire riaanwen zho lo me: totsaque nli dib zdoo zho gliladz zho miñe nac Xtiidz me. Sca zhobnee lo Xtiidz me, zaatne rnee: "Zha ne biaanwenle lo Dios, ib zrieelo gbannie zho me, sacne dib zdoo zho rliladz zho miñe nac Xtiidz me."

## Xtoł miech

<sup>18</sup> Ndionle ne ganle no guiełnë ro ne csiaab Dios ygaa grëse miech ntseeb, miech ne nëd gac-wen, ni desde gbaa cxeel me guiełnë ne ygaa zho; sac por xquiełntseeb zho rsaand zho gacnan grëraa miech miñe nac diidzli.

<sup>19</sup> Grë zha ntseeb, nanle zho zha nac Dios, sac mezhal blu lo miech zha grieelo gunbey zho me. <sup>20</sup> Niicle ne grieelod ganlo ne Dios, per de lo grëtaa ncuaane bzaa me, grëtaa ncuaane run me, gase rlu ganle cho nac me. ¡Gase rlu ne nli me nac Dios, ni gdzind dze ne lozh xpoder me!

Gacxe waa grë zha ntseeb, ib tedlaad zho lo guiełnë ne csiaab me ga; <sup>21</sup> sac gon niicle nanpaa zho me nac Dios, ni ib rond zho xtiidz me. Nëd zho gunbey zho me zigne rieguała, niicle xquizh nanđ zho gdeed zho lo me. Laa ne rzac zho na rien zho pe run zho, leł pcow xquiełrien zho; rzac zho na lëew ga, gun zho ncuaane guiaabtaa guic zho. <sup>22</sup> Niicle ne rzac zho zharieñ zharac nac zho, per zha nac miech ne quialoozhraa lo xquiełnxen; <sup>23</sup> sac gon laa ne gunbey zho guiełndzon ne rap men ne nacpaa Dios nguiamban, leł rsilo zho rzaa zho grë mdio ne niaa zigne rlu samiech guidzliu zho, grë mdio ne niaa zigne rlu grë ma ne rsiibe, grë ma ne rzë tap ni, grë ma ne rzelen lo liu; leł grë ncuaan co ziegān zho laa ne gleyne zho men ne nacpaa Dios.

<sup>24</sup> Miñcocxe nagon waa, rsaanladz Dios zho laa zho zienal grë ncuaane ndzinlid ne rzoobladztaa zho. Grë ncuaane ntoladzdox ne run zho, lëeque zha runn-guzee zho rguitnie zho xcuerp zho. <sup>25</sup> Sac laa ne

gleynie zho diidzli miñe rnabey Dios, leḷ miñe rnee zha ne rquidie rleynie zho; leḷ grè ncuaañe bzaale Dios, ncuaañe psanle me, ncuaañ co ziegañ zho, lo grè ncuaañ co ziequitsgzhìb zho; laa ne yquitsgzhìb zho, gleynie zho meñ ne nac Dios mban, meñ ndzon ne psan grètaa ncuaañe no. ¡Diosse rieguiaḷ guñnon miech, meñ co rieguiaḷ tibaque goolnie zho! Sca rieguiaḷa.

<sup>26</sup> Ne sca nagon nac zho, gane psaan Dios zho laa zho ruñ grè guielyozh, ncuaañe ngubeeguieḷto ne rieguiaḷdraa guñ miech. Grè wnaa laa ne gdeed zho didz gnee tsieel zho lo zho, leḷ lèèque sawnaa zho rquiangob zho, laa zho zienaḷ grèraa guielyozh; <sup>27</sup> grè-gaa mgui, laa ne gnee zho lo wnaa ne nac tsieel zho zigne biaan no gaca, leḷ lèèque sabgui zho rzoobladz zho. Ncuaañe mbixladz ruñ zho, rquiangob zho lèèque sabgui zho; ni ne sca ruñ zho grè ncuaañ co, lèè miñe rdziniiaa zho nac grè guielguidz yozh ne riaan lad zho; ndzinlidraa nac zho.

<sup>28</sup> Scataale nac zho, ni bii rzoliaadz zho gbig zho lo Dios, gane niicle megaa rlozh rsaanladz me zho, laa zho biaan lo grè zhgab yozh ne no guic zho, no zdoo zho, miñ co ne scataa nac zho. <sup>29</sup> Nroobdoo nac xtoḷ zho, sac:

rsacsixuu zho samiech zho,  
rzoobladz zho ncuaañe quianied zho,  
racntseeb zho lo samiech zho,  
nè rac zdoo zho ran zho stib noded samiech zho,  
rut zho samiech zho,  
rtsidiḷ zho samiech zho,  
rquidie zho samiech zho,  
rquiadiidzguizh zho samiech zho,  
miech yozh nac zho,  
<sup>30</sup> rneenè zho samiech zho,  
rquiabro zho lo samiech zho,  
racniats zho lo samiech zho,  
rlu zho ncuaañe rapd zho, ncuaañe nacd zho;  
rlèènie zho Dios,  
rio zho rbeebey zho grè guielntseeb,  
rond zho xtiidz pxoz zho,  
rond zho xtiidz xniaa zho,  
<sup>31</sup> racladzd zho gon zho diidz,  
ruñd zho miñe rnee zho,  
rleynied zho samiech zho,  
ruñd zho samiech zho perdon,  
rquiad zdoo zho samiech zho.

<sup>32</sup> Niicle ne nanpaa zho zha rnabey Dios none gban miech, niicle ne nanpaa zho grèse zha ne ruñ guielntseeb, ib tedsod znitlo zho; ni laa zho bii quiaayuna, ni haxta rley zho ran zho cho grèraa zha ne ruñ grè miñe ruñ zho.

### Xquielwxtis Dios

**2** Ib tedsod no to gnè: “¡Zha ntseebtaa miech ne sca ruñ!” ¡Per gni naa lo to ganle, zigtaa zhaw, zigtaa tow, lalga ntseeb to grè to! Sac ye to gon ruñ grè guielntseeb co, gacxe waa, zha ne rzac rieguiaḷ zha co yгаа zho guielnè ne csiaab Dios, ye zho rieguiaḷ miñ

co. <sup>2</sup> Ndion ne ganle Diossi zeene laa me guñ guielwxtis, grèse zha ne sca zienaḷ guielntseeb, ib tedsod zunquizh me zhow.

<sup>3</sup> Zha ne sca rlozhd gzee zdoo pe quiaayun stib zho, haxta rlisqui zho miñe quiaayun zha co, ni yeque zho quiaayuna; masaque nan zho nagon zdedlaa zho zeene laa Dios guiaadgun xquielwxtis me, masaque nan zho zha cose nitlo, laa zho tedlaa. <sup>4</sup> None guien zho ganle pa lotaa nquialadz Dios zho, pa lotaa noyap me zho paciens noxecw me grètaa ncuaañe ruñ zho; sac laa me quiambèz csaañ zho xquielntseeb zho, yguudz zdoo zho gban zho zigne rnabey me. <sup>5</sup> Teḷne tibaque squi ndip gac zdoo zho, gond zho miñe rnabey me; gacnan zho ganle, quiaayunloraa zho grè guielnèdox ne yгаа zho gaḷ dze ne laa me guñ guielwxtis. Ni xquielwxtissi me, zigne rieguiaḷ gaca sca guñ mew.

<sup>6</sup> Gaḷ dze co, laa me gdeed miñe rieguiaḷ yгаа tib tib miech teḷ zha wban zho. <sup>7</sup> Grèse zha ne güeynaḷ beenon zho lè me, pxobnen zho xquielndzon me, güeynaḷd zho grè ncuaañe rnitlo, lo zha co gdeed me tib guielmban ne gdziñd dze lozh. <sup>8</sup> Sangue grè zha ne güeynaḷ loxaque grè zhixco zho, güeynaḷ zho grè guielntseeb, laa ne nienaḷ zho miñe nac diidzli; zha co yгаа grèse zhian ne csiaab me.

<sup>9</sup> Ga nagon, grèse zha ne ruñ guielntseeb, zigtaa zha Israela, zigtagaa zha stib guiedza, ible zгаа zho tib guielnèdox; <sup>10</sup> sangue grè zha ne rban zaacse, zigtaa zha Israela, zigtagaa zha stib guiedza, ible zгаа zho lo xquielndzon me, zunnon me zho. Ni led yedraa ga pe zhgab ctseb zho.

<sup>11</sup> Grèse zha ne gunctal xtoḷ, teḷ chotaa nac zho zunquizh Dios zhow; sac teḷ me, led yed me cue. Zig nac grè zha ne beenbeyd xley me, zunquizh me zho grè xtoḷ zho; sac niicle ne gocnanpaa zho zha naca, per len zdoo zho, guic zho, nanpaa zho pa miñ nac guielntseeb, pa mingaa nac guielwen. Rrieequiacxe waa ruñbeyle zho xley Dios ga. Scaquegaa zha Israela, ne nac zho zha ne ruñbeypaa xley Dios, zunquizhaque me zho grè xtoḷ zho; sac niicle ne ruñbeypaa zho xley me, per teḷ lozh ga mband zhow. Nanpaa zho pa miñ wen, ni teḷ lozh ga rond zho diidz guñ zhow; sac gon, led-xe por ne gacnanpse ne ley waa laa Dios ycaaniale ne, sinque none gban new.

<sup>16</sup> Zdziñ tib dze, zeene laa Dios cxeel Jesús, gunquizh me miech grèse doḷ ne been zho tib tib zho, niicle miñe mazdraa rzac zho ngeets zhlian been zho; sac sca rnabey Dios gaca, ni miñ co noseed naa miech.

### Zha Israel ni xley Moisés

<sup>17</sup> To ne nac to zha Israel, rzac to zienaḷpaa to xley Moisés, niats rac to, rzac to tose non lo Dios.

<sup>18</sup> Nanwen to zha racladz Dios gban to, nanpaa to pa miñ wen sac pseed to xley me. <sup>19</sup> Miñ co masaque rzac to to cseed zha ne no lo ncow, grè zha ngoopdoḷ.

<sup>20</sup> Masaque rzac to to rienraa zha cseed to grè zha ne peet gacd, to rienraa zha quixbiini to grè zha ne peet rienḷ; sac rzac to ne nan to ley, tose nac zha ne ndzi-ibbraa nixbiini, tose nan miñe nacpaa diidzli.

<sup>21</sup> Nana, tel scataa rien to zha cseed to stib miech, ¿pe nac dzigo rwide to miñe run to?

Conque to name rnee lo miech cuand zho, ni rlozh ga toque quiaban. <sup>22</sup> Rseed to miech rnee to, tib zha ne nole tseeel, nodne yquiangob zho stib zha ne led tseeeld zho; ni rlozh ga toque noyur miñ co. Rnee to, rdziguende to grè mdio, ni rio to rieben to yadoo ne zob grè mdio co.

<sup>23</sup> Rlozhd gacniats to rzac to quiayunnon to lè Dios ne nan to ley, ni nande to gon, lel quiaguitnie to lè me ga, sac mbande to zigne nac ley. <sup>24</sup> Miñe noyurpaa to i ga gon raquiet lo Xtiidz Dios, zaatne rnee: "Por xtol to, grè zha zit laa zho rneenè Dios."

<sup>25</sup> Tel to, rzac to porne nacse to zha Israel non to lo Dios, per ne squi mbande to zigne nac xley me, nacaque to zigne nac grè zha zit ne runbeyda. <sup>26</sup> Nana, zha zit ne rioxco rban zigne nac xley me, ¿niacxe rieguald dzigo guianziuu zho lo Dios? Sanziuu me zho gon. <sup>27</sup> Golgacnan sca ganle, glole zha zit co gon guianziuu lo Dios, lèdle to ne nanpaa to zha racladz Dios gban to, nanpaa to miñe psan Dios diidz yгаа to, ni rbande to zigne rnabey me.

<sup>28</sup> Golgacnan sca ganle, led porne nacdse to zhin zha Israel, porne bio to xbey zho, laa to nziuule lo Dios.

<sup>29</sup> Led scada gon, sinque zha ne nli dib zdoo rioxco miñe rnabey Dios, zha co nziuu lo me. Sac tel Dios, rwidaxe me waa dien cho pe bey ne no, sinque laa me rcaania zha ne nlipaa dib zdoo, dib guic, rban zigne racladz me. Grèse zha ne znu nac, nziuu zho lo Dios, niicle telne rzac to peet nond zho.

**3** Nana, ¿pa lugar nadien ne riaanon zha Israel lo grèraa zha stib guiedz? ¿Pa rquiin ne scataa rio zho bey? Zootle lèè lalaquew tel niaca miñe niacd zho zha Israel. <sup>2</sup> Per led scada, no pe nacne non zho. Sac gon, ible lo zho psan Dios xtiidz me mazd padzeela.

<sup>3</sup> Nli ndal zho rond xtiidz me, per led mincod ctsèè me xtiidz me, miñe bneele me lo zho. <sup>4</sup> Niicxe tel zharaa quiayunctal miech xtol zho, sangue Dios ctsèèd me xtiidz me. Zigne zhobneeque lo Xtiidz me, zaatne rnee: "Miñe rnee Dios, diidzli naca; niicle zha ne gacladz, guien pe ncuane glisqui zho lo me."

<sup>5</sup> Sca nac Dios, gacxe waa rnee me grèse zha ne runctal xtol, rieguald yгаа zho guielnè ne cxeel me. Ga nagon, rlu ne miñe nac diidzli, miñ co run me. Nana, ¿pe zhab ne nonguiel d miñe run me ga? <sup>6</sup> Miñe nonguiel ga gon run me, sac tel gdziguen me grè zha ne runctal xtol, ¿zha naczhe guielwxtis ne dzigo gun me?

<sup>7</sup> Nana, nogaa zho gnè, ¿per pe nacne glisqui Dios dol ne rdziun ne, ni tel por lèew rlu ne diidzli nac miñe run me? <sup>8</sup> Per telne sca naca, rrieequia dzigo ib none gunctal ne xtol ne parne yquiaraa zdoo me ne. Ni nzian zha ne nobee xquielto naa, rnee zho ib miñ co noseed naa miech. Ni zha ne sca rnee, ib tedlaad zho lo guielnèdox ne rieguald zho.

### Grèse miech, ngoopdol nac zho

<sup>9</sup> Nana, ¿pe dzieets ne dzigo ne nac ne zha Israel, nziuuraa ne lo grèraa miech stib guiedz? ¿Led scada gon! Niina blozh bzeet naa lo to, grèse ne ngoopdol nac ne, zigtaa zha Israela, zigtagaa zha stib guiedza.

<sup>10</sup> Zigne zhobneeque lo Xtiidz Dios, zaatne rnee:

¿Guiend miech ne zienalpaa miñe racladz Dios!

¿Ni tib zho guien!

<sup>11</sup> Guiend zha ne niini guic;

guiend zha ne tsoxco yguib xnèz Dios.

<sup>12</sup> Grèse zho laa zho zie nèz ne nitlo zho;

niapse guientseeb zienal zho.

¿Guiend zha ne zienal miñe racladz Dios!

¿Ni tib zho guien!

<sup>13</sup> Ro zhow,

masaque been cuent naca zig nac len grè baa ne noy-odz nguto;

niapse diidz ne rquidie zho zhoob lo ludz zho.

Grè diidz ne rnee zho,

masaque naca zig nac xvenen grè mee! dox;

<sup>14</sup> niapse grè diidz dox, niapse grè diidznè rrieche ro zho.

<sup>15</sup> Ni zhow,

masaque zombèzlew dien pa tsiegut zho samiech zho;

<sup>16</sup> loxaque guielnè, loxaque guielzi rsan zho zaatne rded zho.

<sup>17</sup> Ib nan d zho ne zaacse gbannie zho samiech zho;

<sup>18</sup> per ni Dios rdziebdraa zho.

<sup>19</sup> Gacxe waa nroob nac guielnèdox ne yгаа grè zha ne runbey ley ni mband zho zigne naca, lel run zho grètaa guientseeb zig nac grè miñe goquiet nu. Ni niicle grèraa miech ne runbeyd ley, scaque ngoopdol nac zho, ni ro zho guien pe guiab zho lo Dios. <sup>20</sup> Golgan sca ganle, grielod guiaanmbe ne lo Dios, niicle paraa yquia ne gun ne miñe rnee ley; sinque par guien ne ganle ne ngoopdol nac ne, gane biaan ley.

### Silaa Dios miech zeene gnalo zho me

<sup>21</sup> Sangue niina, tib ladle biaan ley, laa Dios bneedz stib mod ne guiaanwen ne lo me. Ni lo grèque guits ne ziaad ley, lo grè guits ne pquiaa zha ne biadteed Xtiidz Dios padzeela, ga raquieta. <sup>22</sup> Grèse miech tel chotaa nac zho, tel petaa been zho, ib ziaanwen zho lo Dios totsaque dib zdoo zho gnalo zho Jesús, dib zdoo zho gliladz zho me. Zha ne gliladztaa me, sac led yed Dios rbe.

<sup>23</sup> Zigne rne naa ga, grèse ne miech ngoopdol nac ne lo Dios, ni palal rdzieeld gdziñ ne lo xquielndzon me.

<sup>24</sup> Per niina laa me blu ganle pa lotaa noxco me ne, gola zdoo me pxeel me Jesús bdiizh grèse xtol ne, laa ne biaanwen lo me. <sup>25</sup> Laa me been miñ co parne glu run me guielwxtis, sac niicle bdizhd ne xtol ne, per pxeel me tib men ne bzhee xchen bdiizha xcuent ne, lèè men co nac Jesús; gane niina grèse zha ne gnalo men co, zun me zho perdon grètaa dol ne pxcw me been

zho. <sup>26</sup> Ni tib doĵ rapd me, ni scaque grê zha ne dib zdoo gnalo Jesús, sañmbe me zho lo xtoĵ zho.

<sup>27</sup> Sca nagon psilaa Dios ne lo doĵ. ¿Cho nadien gacniats ga? Ni tib choot gacd gacniats, sac led por miñe bdiuunnd new, sinque por grêtaa miñe bded Jesús.

<sup>28</sup> Gocndion ne sca ganle: Niapse por dib zdoo miech gliladz zho Jesús, laa Dios ycaania zho; nacda por tso zho guñ zho miñe rnabey ley.

<sup>29</sup> Nana, ¿pe zha Israelse sca ycaania me? ¡Lêda gon! Grêse miech, sca ycaania me zho. <sup>30</sup> Sac gon tibeyse ran Dios ne grêse ne; zigtaa zha Israela, zigtagaa zha stib guiedza, sañmbe me ne lo grê xtoĵ ne, totsaque dib zdoo ne gnalo ne Jesús.

<sup>31</sup> Nana, ne znu rcaania Dios ne, no zho sac rquiindraa ley. ¿Zha yquiind-zhew? Niinale ne znu dib zdoo ne rliladz ne Jesús, rienraa ne pa rquiina.

### Dib zdoo Abraham bnalo me Dios

**4** Zig nac pxozgoldoo ne Abraham, ¿pe been me ne laa Dios pcaania me? <sup>2</sup> ¿Pe por guielwen ne been mew? ¡Lêda! Telne scaw, nrieelo niacniats me (niicle ne nêz lo Dios ni palal rieguiald niacniats me). <sup>3</sup> Sac gon rnee lo Xtiidz Dios, ne dib zdoo me bliladz me Dios gane pcaania Dios me zig tib zha ne peet xtoĵd.

<sup>4</sup> Zig nac tib zha ne run dziin, dimi ne razh zho ible rieguiald zhow, rate zhow ga. <sup>5</sup> Sangue Dios zdoo me ral rcaania me miech, zha ne dib zdoo rnalo me, nacda por pe guielwen ne guñ zho par guiab ne laa zho rieguiala. <sup>6</sup> Ye rey David bzeet guielbley ro ne rgaa zha ne sca rcaania Dios, <sup>7</sup> rêb David:

¡Wen zie zha ne run Dios perdon!

Niicle nroob guielntseeb ne been zho;

tel pe nactaa xtoĵ zho, glisquidraa mew.

<sup>8</sup> ¡Wen zie zho sac guñquizhdraa me zho grê xtoĵ zho!

<sup>9</sup> Nana, ¿pe loxaque grê zha ne nose bey zrieelo yгаа guielbley co, te ye grê zha ne noda ye? Nacda por bey, laa ne blozh bzeet ganle niapse ne dib zdoo Abraham bnalo me Dios, miñ co ne pcaania Dios me zig tib zha ne peet xtoĵd; <sup>10</sup> sac gon gard pe bey ne tso me zeene pcaania Dios me. <sup>11</sup> Pcaaniale Dios me dzigora bio me bey. Lega laa me biose bey co, zeena glu ne laa Dios pcaaniale me porne dib zdoo me bnalo me Dios. Miñcocxe waa, Abraham nac dad lo grêse zha ne nod bey, ni dib zdoo zho rnalo zho Dios; ni scagaa Dios, rcaania me zho zig tib zha ne peet xtoĵd. <sup>12</sup> Ni meque nac dad lo grê zha ne no bey ni dib zdoo zho rnalo zho Dios, zigne bnalo me Dios zeene gard tso me bey co.

### Zha goc miñe bnee Dios lo Abraham

<sup>13</sup> Psañle Dios diidz lo Abraham ne me guiaannie guidzliu, grê me zha ne grieequiaraa lo xti me; guiabd ne togo porne been me miñe nac xley zha Israela, sinque ne dib zdoo me bnalo me Diosa. <sup>14</sup> Nana, tel naca zha ne gunse miñe nac ley, zha cose yгаа miñ co, rriequia dzigo zhlêse ga bnalo Abraham Dios, niicle diidz ne psañ Dios lo me ga, nondaquew. <sup>15</sup> Sac nac ley gon, zha ne gunda zigne naca, laa Dios csiabzi zho;

laa zaatne guienḡgaa ley, gacd guiab zho cho noguiit-sa.

<sup>16</sup> Ne scacxe waa nac ley, gane niina lêese miñe no guñ ne nac dib zdoo ne gnalo ne Dios par yгаа ne miñe psañle me diidz ga. Grêse ne yгаа miñ co, per nacdraaw dien cho zienal ley, cho zienaldgaaw, sac miñe nonraa, dib zdoo ne gnalo ne Dios zigne bnalo Abraham me. Miñcocxe waa, rriequia Abraham nac pxoz ne grêse ne, <sup>17</sup> zigne rêb Dios lo Abraham: "Laa naa bzo luu, luu gac dad lo nzian dii miech." ¡Lêe Dios co nagon bliladz Abraham, me rbeeban grê mengut, ni niicle haxta grê ncuaane guienḡ, saa mew!

<sup>18</sup> Ndaldox rêb Dios gac lo xti Abraham, ni bliladz Abraham miñe rêb Dios ga. Niicle ne zootle led ncuaane gacda, per me dib zdoo me bliladz me ne zaca, ni scagaa bdiñ dze ne laaw goc. <sup>19</sup> Tibaque bnalo me Dios, niicle ne lala ziele xtse me (zig tib gayoole iz me), ni lala tsieel me Sar, nacd me wnaa ne gap mêed.

<sup>20</sup> Ib goc chopd guic me niab me bod nlid niac miñe bnee Dios ga, sinque dzigole dib zdooraa me bnalo me Dios; haxta rdeed me xquizh lo Dios, <sup>21</sup> sac nañpaa me meñ nroob nac Dios zuñ me miñe psañ me diidz ga. <sup>22</sup> Ne sca nagon dib zdoo me rnalo me Dios, gane pcaania Dios me zig tib zha ne peet xtoĵd.

<sup>23</sup> Zhobnee lo Xtiidz Dios sca pcaania me Abraham, ni laaw zhobnee zeena gacndion ne <sup>24</sup> ye ne scaania me ne zig tib zha ne peet xtoĵd, totsaque dib zdoo ne gnalo ne Jesús, meñ ndzon ne rnabey ne; <sup>25</sup> meñ ne gut ga bdiizh me xtoĵ ne, meñ ne brieeban ga, par glu me nli psañmbe me ne nêz lo Dios.

### Jesús rsañmbe miech lo doĵ

**5** Nasi laa ne nacle zig zha ne peet xtoĵd, laa ne baañwenle lo Dios porne dib zdoo ne rnalo ne Jesús, meñ ndzon ne rnabey ne. <sup>2</sup> Sac por grêtaa miñe bded Jesús, laa ne bgaa guielnzaac rii nacie me ne, ni ib csaand ne me. Tib guielbley nrooba lo ne, sac ndionpaa ne ib zгаа ne lo guielndzon ne no me.

<sup>3</sup> Ni scaquegaa nagon none gley ne zeene pe guielnê ne nodzian ne; sac ndion ne ganle, ga cseed ne lêb ne dziits so ne lo miñe rliladz ne. <sup>4</sup> Ni zeene sca dziits so ne, zliiladzraa ne dib zdoo ne; ni zeene dib zdoo ne rliladz ne, zacnañpaa ne ib zгаа ne miñe rliladz ne. <sup>5</sup> Ni ndionpaa ne zгаа new, sac blu Dios rleyne me ne, pxeel me Espiritu Sant nacie ne.

<sup>6</sup> Lêetaaque zeene rdzielraa miech zha guñ zho par guiaañmbe zho lo doĵ, hor co laa Dios pxeel Jesús, bi-aad me gut me bdiizh me xtoĵ ne nac ne miech ngoopdoĵ.

<sup>7</sup> Ndion ne ganle, niicle tib miech ne peet xtoĵda, tib miech ne mazdraa wena, led lega grieequiad tib zha ne cueeladz xquielmban guet por zha. <sup>8</sup> Sangue Dios gon, niicle ne miech ngoopdoĵ nac ne, blu me ganle pa lotaa nquialadz me ne, pxeel me Xpêed me Jesús, meñ co bleeladz xquielmban gut me xcuent ne.

<sup>9</sup> Gotsaa gwi ne ganle, zha nactaa guielnê ne bded Jesús psañmbe me ne lo xtoĵ ne, psañwen me ne lo Dios; ni scaque nagon, ible me csilaa ne lo grêtaa

guielñedox ne csiaab Dios ygaa grë miech ntseeb. Ne nligaa, csaand me dziañ ne guielñe co; sac gon, tel scataa miñe been me por ne zeene nac ne tib miech ngoopdol, zeene scataa ntseeb goc ne blëenie ne Dios, ¿pe lel na dzigo ne laa ne biaanwenle lo Dios, laa ne biaanle zig tib zha ne peet xtoïd? <sup>11</sup> Gacxe waa, niina ne psañwen Jesús ne lo Dios, none iñe gley ne ne laa ne ngable lo Dios.

### Zha nacne biaan dol

<sup>12</sup> Znu gon nacne laa dol biaan: por miñe been Adán bind me xtiidz Dios, miñ co nac ne biaan. Ni por lëew pquiacui laa guielgut biaanque, blozh ga grëse miech laa zho ret, sac grëse zho, tsod zha ne guñctald xtoï. <sup>13</sup> Desde hor co biaan ruñctal miech xtoï zho. Grëse miech ne bre lo guidzliu, desde Adán haxta len dze ne laa Moisés pcaania ley, beenctal zho xtoï zho, niicle ne guiendpaa tib ley hor co nlu ne doïa. <sup>14</sup> Gacxe waa ye zho, grëse zho gut; niicle ne bdiitsd zho merpaa xtiidz Dios zigne been Adán.

<sup>15</sup> Nli tib guielñe ga psañ Adán, per niinagaa mazdraa nroob guielñzaac ne rneedz Dios lo ne. Por falt ne been Adán, biaan grëse ne ne nac ne miech laa ne no guet; per niina ne biaad stib men ne been ni tib falt, por miñ co laa Dios rquia zdoo ne grëse ne, laa me rneedz tib guielmban ndzon lo ne; lëe men co nac Jesús. <sup>16</sup> Tibaque nac dol co been Adán, per grëse miech biabzi; sangue Jesús zeene laa me biaad, grëse ne ne nac ne miech psilaa me ne lo grëtaa xtoï ne, psañwen me ne lo Dios. <sup>17</sup> Dol ne beense Adán ga, miñ co pquiacui grëse ne ne nac ne miech, laa ne biaan ladznia guielgut; sangue niina ne biaad Jesús, zrieelo ygaa ne tib guielmban ndzon. Guielmban ne ral zdoo Dios gdeed me lo grëse zha ne gbig lo me guñ me zho perdon. <sup>18</sup> Sca nagon naca: por falt ne been Adán ga, grëse ne ne nac ne miech laa ne biabzi, per zeene laa Jesús biaad, pquia zdoo me ne masaque me bdiizh grëse caxtigw ne rioguaï ne ga, laa me psañwen ne lo Dios parne grieelo ygaa ne tib guielmban ndzon.

<sup>19</sup> Golgan ganle, porne bdiits Adán xtiidz Dios, grëse ne ne nac miech laa ne goc zha ngoopdol; per scagaa, por bzoob Jesús grëse xtiidz Dios, zha ne gacladztia, zrieelo guiaanwen zho lo me.

<sup>20</sup> Ible laa ley biaan, par glu ganle pa lotaa nac grë falt ne noyuh miech lo Dios. Per niicle scataa nac grë dol co, per blu Dios ganle mazdraa rquia zdoo me miech. <sup>21</sup> Masaque bnabey dol miech, pxeela zho nëz ne nitlo zho; sangue zeene laa Jesús biaad, psañwen me ne lo Dios, gane niina zha ne gnalotaa Jesús zgaa zho tib guielmban ndzon.

### Zha ne mbanniele Jesús

**6** Laa ne bdziañle ganle zha noxcotaa Dios ne. Nana, ¿pe dzieets ne dziuñctalraa ne xtoï ne zeena tsoxcoraa me ne? <sup>2</sup> ¡Lëdraaw ga gon! Nodraa ne dziuñ ne dol, sac gon, laa ne nacle niina zig tib zha ne gutle nëz lo dol.

<sup>3</sup> Golgan ganle, zeene laa ne bziaab xnëz Jesús ni brobnis ne, rrieequia gut ne ga zigne gut me. <sup>4</sup> Zeene brobnis ne rrieequia bioliu ne ga, zigne bioliu Jesús. Ni zigne brieaban Jesús (por poder ndzon ne rap Dios), scaque ne rrieequia brieaban ne, stible guielmban ne rdziaap ne.

<sup>5</sup> Ni zigne sca rrieequia gut ne zeene gut Jesús, scaquegaa ndionpaa ne zbeeban me ne zigne brieaban me. <sup>6</sup> Ndion ne ganle, miech ne goc ne glo zeene scataa bionaï ne guielntseeb, rrieequia ye miech co pquianie me lo cruz. Ga bnitlo miñe goc ne ga, zeena ygadoodraa ne lo dol; <sup>7</sup> sac gon, deque bnitlo grë miñe goc ne glo, grieelodraa gnabey dol ne.

<sup>8</sup> Nana, telne scale gutnie ne Jesús, ndionpaa ne ib zbannie ne me.

<sup>9</sup> Ndion ne ganle brieaban Jesús, ni gdziñdraa dze guet me. Grieelodraa pe guñ guielgut me.

<sup>10</sup> Tibaque vuelt gut me bdiizh me xtoï grëse miech, sangue niina mban me ni Dios mbannie me. <sup>11</sup> Scagaa to nasca, golguien ganle laa to gutle lo dol, nodraa gnabey dol to stib, sinque laa to mbanle niina par guñ to miñe rnabey Dios. Golguien ganle, Jesúsle nacie to.

<sup>12</sup> Nana sca, gdeetraa to diidz gnabey dol xcuerp ben to i, tso to guñ to grë ncuaane ndzinlid ne racladz xcuerp to. <sup>13</sup> Ib gdeete to diidz guiab to lo dol stib, guñ to grë guielntseeb; sinque golsan to ladznia Dios, iñe golgun grë miñe racladz me. Golguien ganle, laa to gutle lo grë dol, Diosle mbannie to niina; <sup>14</sup> zeena scagaa gnabeydraa dol lo to, zigne beena to zeene scataa bioxco to miñe rnabey ley. Sac gon rnabeydraa ley to niina, laa Dios blule ganle pa lotaa nquialadz me to biadsilaa me to.

Nli nquialadz Dios ne, rnabeydraa ley ne. <sup>15</sup> Per nana, ¿pe ne rnabeydraa ley ne, pe ne nquialadz Dios ne dzieets ne dziuñ ne grëtaa ncuaane guñctal xtoï ne? ¡Lëda ga gon! <sup>16</sup> Nanle to ganle, tib zha ne nanle cho lo yquia zho dziin, lo zha co ngadoo zho ni miñe rnee zha co none guñ zho. Zig nac zha ne ngadoo lo dol, niapse dol ruñ zho ni miñe tsieguaï zho laa zho nitlo; sangue zha ne ruñ miñe rnabey Dios, scaania Dios zho zig tib zha ne peet xtoïd. <sup>17</sup> Nli glo lo dol ngadoo to, per xquizh Dios zeene laa zho biadseed to Xtiidz me gonañ to zha laa to lo dol, laa to bliladza ni noxco to mban tow niina. <sup>18</sup> Ni zeene laa to brieeladznia dol, laa to bgab lo Dios; zeena miñe rnabeyle me miñcole guñ to. <sup>19</sup> Znu bzet naa grë miñ rii lo to, zeena guien to zha naca.

Nana sca, zigne scataa bio to ladznia dol been to grëtaa guielyozh, grëtaa guielntseeb, scagaa niina golsan to ladznia Dios, golban zigne rnabey me, zeena lozh guiaanmbe to zigne racladz me. <sup>20</sup> Zeene scataa ngadoo to lo dol, ib wbande to zigne rnabey me.

<sup>21</sup> ¿Pe nadien needz dol lo to? Lëe gdib miñe ngaa to laa to nitlo. Zig nac niina, haxta rtoladz to zeene rso-ladz to grë ncuaane been to hor co. <sup>22</sup> Sangue niina, ne laa to brieeladznia dol laa to ngab lo Dios, ible zi-



aanmbe to zigne racladz me ni zgaa to tib guie|mban ne gdziṅd dze lozh.

<sup>23</sup> Sac gon, zha ne runctal xto|, lëë gdib miṅe tsieguia| zho laa zho nitlo; saṅgue zha ne gbig lo Jesús, miṅe ral zdoo Dios ygad me lo zho nac tib guie|mban ne gdziṅdraa dze lozh.

**7** Bets, bzian, to ne nac to zha ne runbey Xley Dios, nanwen to ganle, zeene zombanse miech dzigo rrieelo rnabey ley co zho.

<sup>2</sup> Zig nac tib mgui ne rtsieelnia, rnabey ley ne mguise gbannie wnaa ne nac tsiel mgui. Per te| gzoob ne glo mgui guet, dzigo gacdraa gnabey ley ne mguipaa gbannie wnaa co; te|ne gacladz zho ctsieelnia zho stib mgui, zaca. <sup>3</sup> Nli nonguiel|da ga guṅ wnaa ctsieelnia zho stib mgui laga bii zomban tsiel zho; laa zeene gutle tsiel zho, led do|draaw yguib zho stib zha ne ctsieelnia zho.

<sup>4</sup> Bets, bzian, scadaa nagon bzhaac to. Zeene sca gut Jesús, rriequia ye to gut ga gane niina ngadoodraa to lo ley, niicle lëëgaaw grielod gnabeya to. Jesús, meṅ ne brieenan ga, mele nac tsiel cub to niina. Niinasi, zrieelole gban to zigne racladz Dios; <sup>5</sup> sac glo (zeene scataa bdziunctal ne xto| ne, bdziunṅ ne grëtaa ncuaaṅe nonguiel|draa niicle ne ndionṅpaa ne pe nac miṅe zhubnee lo ley no dziunṅ ne), niapse grë ncuaaṅe nxeel ne zaatne nitlo ne, ncuaaṅ co bdziunṅ ne. <sup>6</sup> Blactaa bgadoo ne lo ley, saṅgue niina rriequia gutle ne nëz lo ley, laa ne mbanle zigne rnabey Espíritu Sant.

#### Rca do| gac miṅe rnabey ley

<sup>7</sup> Nana, ¿pe zdieets ne dzigo por leypaa rdziunctal ne xto| ne? ¡Coo, led scada! Te| naa gon, ib niacnaṅd naa pe nac do| te|ne guieṅd ley. Niacnaṅd naa ne do| ga gzoobladz ne chenṅ benṅ, te|ne niacnaṅd naa ne rnee lo ley: "Gzoobladz luu chenṅ benṅ." <sup>8</sup> Zeene gocnaṅ naa zha nac ley, dzigora a bienṅ naa niapse do| nac miṅe noyṅ naa; sac zeene guieṅd ley, rlud pe nac do|.

<sup>9</sup> Glo zeene rieṅd naa zhapa a nac ley, tibaque rzaac naa ib peet do| rapd naa; per zeene gocnaṅ naa zha nac ley, bienṅ naa ne ib raguia| naa nitlo naa, sac do| quiayunṅ naa. <sup>10</sup> Nli laa ley biaanṅ zeena guieṅ ne zha grielo yгаа ne guie|mban, per le| blu w ne raguia| naa nitlo naa sac ngoopdo| nac naa. <sup>11</sup> Ne nligaa bdziitnie do| naa, miṅe rsopaa ley diidz nod guṅ miech miṅcopaa benṅ naa; ni blozh ga, lëëque ley blu ne ib raguia| naa nitlo naa. <sup>12</sup> Niicle ne scaw, per Dios psana ni rquiin grë miṅe zhubnee low.

<sup>13</sup> Nana dzieets ne: conque te|ne wen nac ley, ¿zha nac dzigo ne lëëpaaw rlu ne riogua| ne guet ne? ¡Coo, led scada! Sinque znu naca: do| pteedquie ne lадznia guie|gut. Ga rlu ganle zha nactaa do|, sac gon lëëque ley pquiin do| pteedquiew ne lo guie|gut. Ga blu ley ganle zha ntseebtaa nac do|. <sup>14</sup> Gotsaa gwi ne ganle wen ley, led leyd rxinṅ sinque ne rxinṅ; sacne rriequia ngadoo xcuerp ne lo do|.

<sup>15</sup> Te| naa, rieṅd naa pe nacne znu rac naa, niicle ne racladzpaa naa guṅ naa ncuaaṅe nonguiel| per nëda,

le| ncuaaṅe rzoobladz naa miṅ co runṅ naa. <sup>16</sup> Grë ncuaaṅe runṅ naa, now rienṅpaa naa nonguiel|da; haxta guic naa, zdoo naa, rieṅ naa wen ley sinque naa quia-guits miṅe rnabeya. <sup>17</sup> Nana, niicle ne rieṅ naa scaw per gacd pe guṅ naa, sac ngadoo xcuerp naa lo do|, masaque do| rcheep naa runṅ naa ncuaaṅe ndzinlid.

<sup>18</sup> Rieṅ naa miech ngoopdo| nac naa, ni palal ncuaaṅe ndzinli gacd guṅ naa; niicle ne racladz naa gac-wen naa, per rrieeloda. <sup>19</sup> Zeene racladz naa guṅ naa ncuaaṅe rquiin, per rrieelod guṅ naaw; laa zeene ni naa guṅdraa naa ncuaaṅe ndzinlid, le| miṅcole runṅ naa. <sup>20</sup> Ni ne znu le| grë ncuaaṅe racladz naa, miṅ co runṅ naa, gase rlu ne led naadse quiayunṅ grë ncuaaṅ co; sinque do| quianabey xcuerp naa runṅ naaw. <sup>21</sup> Rieṅ naa niicle ne racladzpaa naa guṅ naa ncuaaṅe wen, per le| guie|ntseeb runṅ naa. <sup>22</sup> Zdoo naa, guic naa, rleynie naa Xley Dios, racladz naa gban naa zigne rnabey me; <sup>23</sup> per dzigo rtse do| lo naa, rrieelod guṅ naa ncuaaṅe nonguiel|. Masaque do| rnabey xcuerp naa, racladz naa guṅ naa ncuaaṅe rnabey Dios; sac ngadoo xcuerp naa lo do|.

<sup>24</sup> ¡Probsaxe naa, znutaa nac xcuerp ngoopdo| naa nu! ¿Cho samiech ne dieṅ grielo csilaa naa low; sac ncuaaṅe gnitlo naa miṅ co mazdraa rdziladza?

<sup>25</sup> ¡Xquizh Dios pxeel me Jesús biadsilaa me ne lo do|!

¡Jesús nac meṅ ne psilaa naa!

(Znu nagon rzac naa: rieṅ naa nonguiel| guṅ naa miṅe nac Xley Dios, per xcuerp naa le| laaw ziena| miṅe rnabey do|.)

#### None gban miech zigne racladz Espíritu Sant

**8** Laa ne gocndionṅ nasca ganle, zha ne ngab lo Jesús ndziibdo|draa zho, <sup>2</sup> sac zha ne ngab xnëz me, laa Espíritu Sant psilaale zho lo do|, laa me psilaale zho ladznia guie|gut, laa me bdeedle tib guie|mban cub lo zho.

<sup>3</sup> Wlaltaa ib brieelod ley nsilaaw ne lo do|, gane mazd laa Dios pxeel Xpëed me biadsilaa ne. Brieelod ley, sac grëse miech laa ne tsiena| zho miṅe rnabey ley, mazdraa ziena| zho ncuaaṅe runctal xto| zho. Gane zeene pxeel Dios Xpëed me, goc me miech (lëëraasi ni tib do| beṅd me), meṅ co gut bdiizh grëse xto| ne, dzigo ga laa me psilaa ne ladznia do|.

<sup>4</sup> Gacxe waa, niinasi zrieelo dziunṅ ne grë miṅe rnabey ley, per none gdeed ne diidz guiona| ne miṅe rnabey Espíritu Sant, ni lalnu gdeete ne diidz gac miṅe racladz xcuerp ne nu.

<sup>5</sup> Grëse zha ne mban zigne racladz xcuerp ngoopdo| zho, loxaque grë miṅ co rioxco zho; laa zha ne mban zigne racladz Espíritu Sant, miṅe rnabey Espíritu Sant rioxco zho.

<sup>6</sup> Zha ne sca rioxco loxaque miṅe racladz xcuerp ngoopdo| zho, nëz ne nitlo zho ga zie zho; saṅgue zha ne rioxco miṅe racladz Espíritu Sant, laa zho zie nëz ne yгаа zho tib guie|mban; peet dzeb, peet zhgab ctsebdraa zho. <sup>7</sup> Ni stiba, zha ne rioxco loxaque miṅe racladz xcuerp ngoopdo| zho, rlëenie zho Dios ga, sac

nëd zho gban zho zigne rnabey xley me; ni niicle gacladzgaa zho, grieelod zho. <sup>8</sup> Miñcocxe waa, ib rzacd zdoo Dios grë ncuaañe ruñ zho.

<sup>9</sup> Sañgue to, mbandraa to zigne racladz xcuerp to, sinque laa to mban zigne racladz Espíritu Sant. Sca mban to, sac Espíritu Sant nacie to. Nañle to ganle zha ne nacie Espíritu Sant, nliid xnëz Jesús no zho.

<sup>10</sup> Ni to ne nac to zha ne nole xnëz Jesús, ible zgaa to tib guiełmban ndzon, sac laa Dios psilaale to lo doł. Nli zig nac xcuerp to, ncuaañe nitlo naca, sac por doł bi-aañ sca no gaca; sañgue zhiEspírituw, nitloda. <sup>11</sup> Dios bleeban Jesús, ni scagaa telne nli nacie to zhiEspíritu me, meque cueeban to.

<sup>12</sup> Bets, bzian, nodne dziuun ne ncuaañe racladz xcuerp ngoopdoł ne, zig nac zeene pe nzëeb ne low.

<sup>13</sup> Sac telne grë ncuaañ co tsienal to, ible znitlo to; sañgue telne gnab to gacniñ Espíritu Sant to csaan tow, dzigo ible zgaa to tib guiełmban. <sup>14</sup> Sac grëse zha ne zienal zigne racladz zhiEspíritu Dios, ga rlu ne nli-paa xpëed Dios nac zho.

<sup>15</sup> Golguiñ ganle, laa Dios bneedz zhiEspíritu me lo to, sac xpëedle me nac to niina. Tsode to sca gdziebd to me, zig nac zeene cho tib nguñdziin win nac to lo me. Xpëed me nac ne, gacxe waa zac tibliladz gnee ne lo me guiab ne: "¡Papá yeen!" <sup>16</sup> Ni Espíritu coque ruñquiñ ne ne nli xpëed me nac ne.

<sup>17</sup> Nana ne laa ne nac xpëed Dios, scagaa dzigo ye ne ible zgaa ne grëtaa ncuaañe bdeed me lo Jesús.

Nli zgaa ne lo grë guiełndzon ne no Jesús ga, per scagaa none dziañ ne grë guiełnë niina ne laa ne ngab lo me.

### Guielndzon ne naraa guiaad

<sup>18</sup> Guielñë ne dziañ ne lo guidzliu rii, loxaque ne ngab ne lo Jesús, led ncuaañe rmad ga; mazdraa nroobdoo nac lo guiełndzon ne naraa dziañ ne. <sup>19</sup> Zig nac grëtaa ncuaañe bzaa Dios, masaque quiambëznëw gdziñ dze zeene laa grë zha ne nac xpëed Dios ygaa lo guiełndzon co; <sup>20</sup> sac gon, gal dze co laa guidzliu guiaañmbe lo grëtaa ncuaañ paat rquiind, lo grëtaa guiełntseeb ne no low niina. Dios bdeed diidz biaan grë ncuaañ co low, per zeene gal dze co, zeene laa grë zha ne nac xpëed Dios laa lo grëtaa guiełntseeb, yew laaw laa.

<sup>22</sup> Laga quiambëz grë ncuaañ co gdziñ dze co, masaque mban raca, rzaca zig rzac tib meñ wnaa ne quiayal xpëed. <sup>23</sup> Ni ndion ne ganle, haxta ne, ne nac ne zha ne nacie Espíritu Sant (zeena glu ne ible zgaa ne grëtaa ncuaañe gneedz me), mban rac ne quiambi-aaz ne gdziñ dze co, zeene laa Dios ctsëë xcuerp rii ne ni ycaania me ne zig xpëedpaa me.

<sup>24</sup> Ndion ne ible zbee Dios ne lo grëtaa ncuaañe rac lo guidzliu rii, per nana laa ne quiambiaaz dziañpaa ne gaca. Tib ncuaañe lëë ranle ne noyac, nod pe nacie yquiambëzraa new, <sup>25</sup> per zeene quiambëz ne tib ncuaañe naraa gac, dzigo nodne guieed ne, sinque inë tiblique gac ne yquiambëz new.

<sup>26</sup> Ni scagaa zeene lëbdraa ne, rienndraa ne zha guñ ne, Espíritu Sant nac meñ ne gacniñ ne. Zig nac

zeene gzodiidznie ne Dios, tel nesew nañd ne zhapaa nonguiel gnee ne lo Dios, dzigo Espíritu Sant ruñcnee ne grë diidz ne riennd ne zha nac. <sup>27</sup> Ni Dios ne nac me meñ ne nañpaa pe rza zdoo miech, rien me pe rnee Espíritu Sant, sac miñe racladz Dios gac miñ co rnab me.

### Tsod ncuaañe yquiaaqui csaanladz Jesús ne

<sup>28</sup> Ndion ne ganle, zha ne nli dib zdoo rleynie Dios, zha ne rioxco gac grë miñe racladz me, grëse ncuaañe rded zho, led lega rdete zhow, sinque no zaatne rqui-ina lo zho. <sup>29</sup> Ni ndion ne ganle, zha ne nañle me ygab xnëz me, desde mazd glow, pso me zho gac zho zig nac Xpëed me Jesús. Lo grë zha ne nac xpëed me, Jesús nac meñ nroob. <sup>30</sup> Ni grë zha co, laa me quiabedz zho, quiasilaa me zho lo doł, laa zho noyaañwen lo me; zeena ygaa zho lo guiełndzon ne no me.

<sup>31</sup> ¡Zha nactaa ncuaañe lëë ruñ Dios! Nana, tel scataa racnie Dios ne, zcho nadiñ grieele lega pe guñ ne?

<sup>32</sup> Golgotsaa gwi ne ganle, haxta xpëed me bdeed me gut xcuent ne, grëse ne ne nac ne miech. Nana, zpe leł grë pe stib cos dzigo yquia zdoo me gneedz me lo ne?

<sup>33</sup> Ible Dios bzooblo ne, gacxe waa, ¡choot rieguałd glisqui gnë lëda nodziuun ne! Sac gon, Dioszhal psañmbe ne lo doł. <sup>34</sup> ¡choot rieguałd ycaadzdoł ne! Sac gon laa Jesús gutle bdiizh me xtoł ne; per brieeban me, ni na laa me zob cue Dios zaatne rieguał me nac me meñ non. Ga no me quianab me lo Dios por ne.

<sup>35</sup> ¡Tibaque rleynie Jesús ne! Zeene nodziañ ne guiełnë, zeene mban rac ne, zeene rtsidił miech ne, ib guiabd ne togo bod rleynie me ne. Niicle zeene guiełndgaa pe gow ne, guiełnd pe gacwxab ne, o noxtseebgaa ne guet ne, ib guiabd ne togo psaanladz me ne. ¡Tibaque rleynie me ne! <sup>36</sup> Ni zig nac xcuent guiełgut, laaw raqui-etaque lo Xtiidz Dios, zaatne rnee:

Grëse no ne nac no zha ne ngab lo luu,

tibaque noxtseeb no lo guiełgut;

masaque rzac miech no zig rzac zho grë mëcwxiił ne gołle guet.

<sup>37</sup> Niicxe peraa waa dieed ne, zdziuun ne gan low ni palal csañwinda ne, sac Jesús nacie ne; ni rleyniedox Jesús ne.

<sup>38</sup> Nañween naa tsod ncuaañe yquiaaqui csaanladz Dios ne:

per ni guiełgut,

per ni guiełmban,

per ni anjł,

per ni meñdox,

per ni grë ncuaañe noyac niina, grëgaa ncuaañe naraa gaca.

<sup>39</sup> Niicle grë ncuaañe no glaa zhan gbaaw,

niicle grë ncuaañe no quietraa zhan guidzliuw,

niicle grëragaa ncuaañe bzaa Dios.

¡Ni tiba ycada, sac tibaque rleynie Dios ne! Ni laaw blule me ganle, zeene pxeel me Jesús (meñ ne rnabey ne), meñ ne gut bdiizh grëse xtoł ne.

### Ible Dios bzooblo zha Israel

9 Bets, bzian, ¡blactaa racladz naa guien grëraa zha Israel cho nac Jesús! Rquianë zdoo naa zho nac zho menladz naa, tibaque mban rac zdoo naa rsoladz naa zho. Haxta Jesús, haxta Espíritu Sant nañ ganle rquiad zdoo naa naa niicle maase gdzibdee miech naa, maase nitlo naa guia naa zaatne gandraa naa Dios, telne niaca por miñ co laa zho guien zha gbig zho lo Dios.

4 Blactaa quiayacniën Dios zho, ni rond zho xtiidz me. Bzooblo me zho gac zho zha ne ygab lo me, haxta bzënie me zho, gon zho ganle men ndzon nac me; bii aañ zho diidz grë zho me zha mod gunlay me zho. Psañ me ley lo zho zeena guien zho zha gban zho, ni psañ me diidz lo zho zha gleynie zho me. Nzian grë ncuaane bnee me gdeed me lo zho. 5 Lëë pxozgoldoo zho ga goc Abraham, goc Isaac, goc Jacob, ni lo dii co ga briequia zha ne bded zig menlidz Jesús. Me nac Dios, me rnabey grëtaa ncuaane no, ni me rieguiäl gacnon gzataa dze. Ible sca rieguiälä.

6 Nana, no zho guiab godcaque grë miñe bnee Dios ga ygaa zha Israel. Per led scada. Sinque lëë miñ co rgaa zha ne nlipaa rnalo Dios, sac zha co nac zha ne nlipaa nac zha Israel. 7 Nacda ne loxaque ziaad zho lo xtii Abraham, laa zho nacle merpaa zha Israel; sac gon, niicle ne nzian mëed pquianie Abraham, per rëb Dios loxaque Isaac gac cuent zig xpëed Abraham. 8 Gase naganle rlu, zig nac niina, grë zha ne ziaad lo xtii Abraham, led grëd zho ngab lo Dios; sinque zha ne bzooblöle me zigne bzooblo me Isaac, zha co ngab lo me. 9 Sac zig nac Isaac, ible Dios bnee lo Abraham grop Sar, ne laa Isaac gac mëed lo zho.

10 Ni scasaque xpëed Isaac. Bdziñ dze, zeene laa Isaac ptsieelnia wnaa ne lë Rebec, dzigo gop Rebec tibnëz mëedbgui. 12 Bii zoney Rebec grop mëdyeen co, laa Dios bzooblöle win ne brieelë Jacob rëb me, ne ible Jacob gac zha non lo Esaú, win ne glo gal. 13 Laaw zhobneeque lo Xtiidz Dios, zaatne znu rëb me: "Ible Jacob bzooblo naa beenlay naa, bzoblod naa Esaú." Gard gal grop mëed co, per ni gard gacnañ win zha nac guieñtseeb, zha nacgaa guieñwen, laa me bzooblöle tib win. Ga nagon, blu Dios ne mese nac men ne rieguiäl rzooblo tel cho zha ne ygab lo me, nacda por pe ncuaane noyün zho.

Nana, ¿pe dzdieets ne guieñtseeb ga sca run Dios? ¡Led guieñtseebda! Tib vult rëb me lo Moisés: "Zha ne gacladz naa yquia zdoo naa, squia zdoo naa zho."

16 Ga nagon, zha ne runlay me, nacda porne zha rquiaguiba, o rioxcogaa zho ygaa zhow; sinque laa zho rgaaw, porne me rquia zdoo zho. 17 Gotsaa gwi ne ganle zha beenndip me zdoo rey Egipt. Lo Xtiidz me zhobnee zeene rëb me lo rey co: "Ible laa naa bzo luu nac luu rey, luu yguib glu naa poder ne rap naa, zeena dib lo guidzliu guien miech ganle naa nac Dios."

18 Ga nagon rlu, zha ne gacladz me yquia zdoo me, rquia zdoo me zho; ni scagaa, zha ne gacladz me gunndip me zdoo, runndip me zdoo zho. 19 Nana, no

zho gnë: "Telne scaw, ¿pe nac dzigo rlisqui Dios miñe run miech, tel mezhaz rnabey zha nac zho tib tib zho?" 20 Per nana, ¿cho nac ne par glisqui ne miñe run Dios? Zig nac tib guies beñ, niacxe zlisquiw lo men ne bzaaw, guiaba: "¿Pe nacne znu bzaa luu naa?" 21 Led zha ne run dziin co, zrieelo gzaa zho tib guies zigne gacladz-taa zho; tib lë beñ ne xen zho, zac gzaa zhow tib guies niow, o gzaagaa zhow tib guies beelze.

22 Scaquegaa nagon rzac Dios miech. Grë zha ne psañle me nitlo, ible rap me derech csiaabzhian me zho, glu me poder ne rap me; per laa me bii quiayap zho paciens nieeda gdziñ dze co. 23 Grëgaa zha ne bzooblo me ygaa lo guieñndzon ne no me, zigtaa new ne nac ne zha Israel, zigtagaa zha stib guiedza; ible rap me derech bzooblo me ne, sac rquia zdoo me ne. 25 Goñsoladz ganle zha bzeet Osé, men ne biadteed xtiidz Dios padzeela. Bzeet me ible zbedz Dios grë zha ne nacd zha Israel ygab zho lo me, zeena gleynie me zho niicle ne rleynd me zho glo. 26 Laa stib lugar bzeet Osé, zha bnee Dios lo zho, rëb me: "Ngabde to lo naa, per dzziñ dze ne laa to gac xpëed naa, ne nac naa Dios nguiamban."

27 Laa Isá stib men ne biadteed xtiidz Dios padzeela, zeene bzeet me zha Israel rëb me: "Niicle ne ndaldoo nac zha Israel pale yuzh ne ndxie ro nisdoo, per zhis zho gac zha ne ycaania Dios; 28 sac ziaadyoble gun Dios xquieñwxtis me lo guidzliu, zigne bnee me."

29 Miñ co ga bzeet Isá mazd glo, rëb me: "Telne niaca miñe yquiad zdoo Dios zha Israel, znitlo me zho grëse zho zigne bnitlo me zha Sodom ni zha Gomorr."

### Zha ne nacd zha Israel laa zho wbig lo Dios

30 Nana guiab ne: ¿Zha nac dzigo ne rcaania Dios zha zit? Laa me rcaania zho niina sac dib zdoo zho rnalo zho me, niicle ne waltaa ib bioxcod zho dien zha nsi-laa me zho lo dol. 31 Laa zha Israel, niicle ne rioxcod zho run zho grë miñe rnabey ley parne csilaa me zho, per ib laad zho lo dol sca. 32 Laad zho, sac zienied guic zho gnalo zho Dios, rzac zho por grë ncuaane gunse zho laa zho laa lo dol. Miñcocxe waa, zeene laa Jesús bii-aad, bzhaac zho me zig tib quie ne rrieñ ni ne riab ne liu. 33 Lëë miñ co ga zhobnee lo Xtiidz Dios, zaatne rnee:

Sxel naa tib men lo zha Israel, me gac zig tib quie ne grieñ ni zho; sangue zha ne dib zdoo gnalo me, tsod dze ne tso zho guieñne, guiab zho pe nacne bna-lo zho me.

10 Bets, bzian, ne nlipaa rzaac naa tebaa zha laa grëse zha Israel lo dol, tibaque rnab naa lo Dios guien zho gbig zho lo me, zeena laa zho lo grë xtoñ zho.

2 Parga nli ran naa noxco zho gbig zho lo me; per rund zho miñe no gun zho. 3 Ib riend zho zdoo Dios ralsilaa me miech lo dol, laa zho rzac por miñe gun zho laa me csilaa zho. Ib nëd zho gun zho miñe racladz Dios. 4 Sac gon, laa Dios racladz Jesús gnalo zho zeena

guiaanbe zho lo grëse xtoꝫ zho; sac Jesússe nac men ne brieelo been grëse miñe rnabey ley.

<sup>5</sup> Bzeet Moisés rëb me, zha ne gnalo ley ne lëew csilaa zho, none guñ zho grëse miñe rnabeya; <sup>6</sup> sangue zha ne gnalo Jesús ne me csilaa zho, nacda dien peraa guñ zho. Nacda ncuane tso zho guiab zho, tebaa zha tsie zho lo me gbaa, gnab zho csilaa me zho (ncuane gacda ga, dzigo rreequia racladz zho quiet me ga stib); <sup>7</sup> o guiaabgaa zho tsie zho zaatne noliu grë ngutoo, tsienab zho lo me csilaa me zho (ncuane gacdaque ga, ni stiba led gad no me, laa me brieebanle). <sup>8</sup> Rquiind paraa tsieguib zho csilaa me zho, zig rzac zho zdoo zho, zig rzac zho ro zho, sca gax lo zho zo me quiambëz me csilaa me zho. Miñ co nac miñe noseed no miech, rnee no lo zho: <sup>9</sup> Zha ne cueero guiab zho Jesús nac men ne rnabey lo xquieꝫmban zho, ni dib zdoo zho gliladz zho nli bleeban Dios me, dzigo silaa me zho lo grë xtoꝫ zho. <sup>10</sup> Sac none dib zdoo ne gliladz ne, dzigo sanbe Dios ne lo doꝫ; ni none cueero ne pe nac miñe rliladz ne, dzigo scaania me ne. <sup>11</sup> Rnee lo Xtiidz me: "Zha ne dib zdoo gliladz Jesús, quitnied me zho."

<sup>12</sup> Grëse miech, niicle zha Israela, niiclegaa zha stib guiedza ible sca ycaania me zho, sac led yed me rbe; me rnabey zho grëse zho, ni grëtaa ncuane rap me, zdeed mew lo zha ne gnaba lo me. <sup>13</sup> Rnee lo Xtiidz me: "Grëse zha ne gnab lo Dios csilaa me zho lo doꝫ, ible silaa me zho."

<sup>14</sup> Nana, no zho gnë: ¿Per zha gnab zho lo me, ni runbeyd zho me? Nli guñbeyd zho me, tel niaca miñe gard cho cxeel zha ne tsienee Xtiidz me lo zho, parne gon zho cho nac me. Ni miñ co rzeet Isá, zeene rëb me: "¿Zha wentaa ziaad zha ne ziaadnie Xtiidz Ndzon Dios!"

<sup>16</sup> Rgaaz Xtiidz Dios, per led grëd zho rzoobdiaga, zig rbiireque Isá, rnee me: "Dios, bui ganle choot nëd gliladz Xtiidz luu, miñe rne naa." <sup>17</sup> Sac gon, parne dib zdoo ne gnalo ne Dios, ib none yquiaadiag ne Xtiidz me ganle cho nac Jesús.

<sup>18</sup> Zig nac zha Israel, ¿niacxe gard gon zho Xtiidz Dios? ¿Binle zhow! Blactaa zha ne ziyadnee Xtiidz me, haxta zaatne mazdraa zita, laa miech quiayacnaꝫ Xtiidz me. <sup>19</sup> No hor rne naa: ¿Pe ib rienꝫ zha Israel, telne gbigd zho lo me csilaa me zho, laa me csilaa miech stib guiedz? ¿Per rienle zhow! Sac bzeetle Moisésa padzeela, zeene rëb Dios laa me ycaania miech stib guiedz, zha ne ib peet rienꝫ; zeena tednë zdoo zha Israel, togo ziaa zho biini. <sup>20</sup> Miñcoque ga pquiaa Isá, zeene rëb Dios:

Grë miech ne ni zienied guic yguib zho naa, laa zho beenbey naa.

<sup>21</sup> Laa zha Israel, blactaa bzëëb nia naa lo zho ni naa niacnie naa zho, per pa nion zho xtidz naa, lel gocntseeb zho lo naa.

### Zha Israel ne wbig lo Dios

**11** Per guiabd ne togo psaanladzle Dios zha Israel. Golgan ganle, zha Israelacxe waa nac naa, zha

xtii Benjamín, zha xtií Abraham nac naa; <sup>2</sup> dzigo led psaanladz Dios zho (nac zho zha ne padzeelale bzooblo me ygab lo me).

Golꝫsoladz ganle, zha rëb Dios lo Lí, men ne biadteed xtiidz Dios padzeela, zeene bzodiidznie Lí Dios <sup>3</sup> grëtaa ncuane noyũ zha Israel, ptsiꝫ zho zaatne riegã grë miech me, beet zho grë zha ne pxeel me noteed xtiidz me, ni laa zho quianaꝫaque gut zho Lí. Rzac Lí guienꝫdraa zha ne ron xtiidz me, <sup>4</sup> dzigo hor co rëb me lo Lí: "Led tibt luu riaan, no zgadz mil zha ne gard yquitsgzhib lo Baal, naa bzooblo zho ygab zho lo naa."

<sup>5</sup> Scaquegaa niina nagon led grëd zha Israel psaanladz Dios, no palal zha ne pquia zdoo me ble me zho ygab zho lo me. <sup>6</sup> Rne naa pquia zdoo me zho, sac guiabd ne togo por demas wen zho gane ble me zho; sac gon, tel por wen zhow, nliid dzigo ne rquia zdoo me zho.

<sup>7</sup> Znu nagon naca: Zha Israel ne bzooblöle me, zha cose guiaanwen lo me. Laa los demas zho, lel lozh gacndip zdoo zho, <sup>8</sup> zigne zhobneeque lo Xtiidz me, zaatne rnee: "Beenndip Dios zdoo zho, rienꝫ zho zha gbig zho lo me; niicle ne zob lo zho, per rac zho zig rac zha ne ranꝫ; niicle zob diag zho, per rac zho zig rac zha ne peet rond. Ni scataque nac zho haxta lo nadze."

<sup>9</sup> Miñcoque bzeet rey David, zeene rëb me:

Lëëque grë zhiłni zho, lëëque grë ncuane row zho, gac zig len doo ne, len guieꝫ ne tsietsobe zho; zeena ygaa zho guieꝫne ne rieguaꝫ zho.

<sup>10</sup> Guiaan zho zig tib zha ne roꝫd lo,

guiaan zho zig tib zha ne blozh blengw zhits.

### Psilaa Dios zha ne nacd zha Israel

<sup>11</sup> Grë zha Israel ne sca gocndip zdoo, guiabde to togo laa zho bnitlöle ga. ¿Lëda! Sinqe laa me bdeed didz sca goc zho, zeena gbig grë zha stib guiedz lo me csilaa me zho lo xtoꝫ zho; ni tednëgaa zdoo zho gan zho laa me rcaania zha stib guiedz. <sup>12</sup> Nana, telne scataa guieꝫnzaac ne bgaa miech stib guiedz ne znu racndip zdoo zha Israel, ¿pe lelgue dzigo zeene laa zho gbiire guiaanwen lo Dios stib? ¿Zha naczhe grëraa guieꝫnzaac ne ygaa miech!

<sup>13</sup> To ne nac to miech stib guiedz, led nanle to ganle, ible Dios bzo naa none naa Xtiidz me lo to. Scagaa naa, dib zdoo naa rioxco naa run naaw, <sup>14</sup> zeena togo soobladz palal zha ladz naa ye zho squi gbig lo Dios csilaa me zho lo xtoꝫ zho. <sup>15</sup> ¿Que talzhe ndzona zeene laa zho gbiire gbig lo Dios stib! Nli laa Dios psaan zho, laa grëgaa miech stib guiedz laa zho biaanwen lo me. Gacxe waa, ¿tib guieꝫbley nrooba zeene laa me ycaania zha Israel stib! Sac gon, rreequia grieeban zho ga.

<sup>16</sup> Zigne pcaania Dios xmenꝫol zha Israel bgab zho lo me, scaquegaa scaania me xpëed zho; sac gon, zig nac tib zhan yag, zeene ndaan low miñe naaza len liu, ndaanaque zhicwa. Scaque nagon, zeene bzooblo Dios xmenꝫol zha Israel, yele zho ga bzooblo me.

Nana, gzoob ne nac zha Israel zig tib zhan yag oliv: low nac xmenꝫol zho, laa zho nac zhicwa. <sup>17</sup> Bdziñ dze brug palal zhicwa, dzigo ga bguiid zhicw yag oliv dan;

lëe yag oliv dan co nac to ne nac to miech stib guiedz. Sca nac ne laa Dios pcaania to zigne pcaania me xmengol zha Israel; ye to laa to nogaa guieInzaac co. <sup>18</sup> Lëëraasi, guiabde to togo nonraa to lo zha ne nac zhicwa miñe brug ga. Golguien ganle, por lo yag ndaan zhicwa.

<sup>19</sup> Nana, nend guiab to: "Per rioguaI now, gacxe waa no biaan xlugar zhicwa, miñe brug ga."

<sup>20</sup> ;Golgap cuidad gon! Nli lëe biche zho, laa to biaan xlugar zho, porne bnëd zho nalo zho Dios zigne bien to rnalo to me; per golguien gacniatsde to. <sup>21</sup> Golgan ganle, niicxe zha name zhicwpaaa yag co nac zho ni ptiche me zho, ipeleI to dzigo!

<sup>22</sup> Golwi ganle zha wentaa Dios, per scagaa rdziladz me gats xtiidz me. Miñcocxe waa gonðzed me grë zha co, laa to gon wen goc me lo to. Lëëraasi none gon to miñe rnabey me, sac gon telne gonde tow, scaque ganðzed me to.

<sup>23</sup> Nana, zig nac zha Israel ga, telne gbiire gbig zho lo me, ible squiid me zho lo yag co stib. ;Golgan ganle meñ nroob nac Dios! <sup>24</sup> Niicxe to na, nac to zig yag oliv dan, pquia zdoo me to pquid me to zhicw yag oliv wen co, ipeleI zha Israel dzigo yquiad zdoo me, gbiire yquid me zho lo yag ne nacpaa zho!

#### Scaania Dios zha Israel ne bzoit lo me ga

<sup>25</sup> Bets, bzian, laa naa gni lo to ganle zha nac miñe no guic Dios gun me. Niicle ne rienð miecha niina, per racladz naa gacnan tow, zeena gacniatsde to ne squi bzooblo me to: Nli ndal zha Israel racndip zdoo zozit zho lo me niina, per zeene laa grë miech stib guiedz blozh wbig lo me, <sup>26</sup> hor co grëse zho, laa zho gbiire gbig lo me stib ycaania me zho. Zigne bzeetle zha ne biadteed xtiidz me, zeene rëb zho:

Guiedz Sión, ga gree meñ ne cuee zha Israel lo xquieIntseeb zho.

<sup>27</sup> Dzigo laa Dios csilaa zho lo grëtaa xtoI zho, zigne psanle me diidz lo zho.

<sup>28</sup> Len dze rii rlëe zha Israel ron zho none gnalo zho Jesús, par laa zho lo doI. Znu rac zho zeena gdeeda diidz gbig to lo Dios, nac to zha stib guiedz; sangue Dios rleyne me zho, sac scale rëb me lo grë pxozgol zho.

<sup>29</sup> Me bzooblo zho, dzigo ible scaania me zho; sac gon, led yed me ctsëe xtiidz. <sup>30</sup> Glo to nac zha ne ib bind xtiidz Dios, laa niinagaa na zha Israel nëd gon xtiidz me. Per zigne rquia zdoo me to niina, scaquegaa dzin dze ne yquia zdoo me zho. <sup>32</sup> Grëse miech, zigtaa zha Israaela, zigtagaa tow ne nac to miech stib guiedza, laa Dios bneedz diidz sca gocntseeb to lo me, zeena grieelo glu me ganle ne lalga rquia zdoo me ne.

<sup>33</sup> ;Gotsaa gwi ganle zha meñ nroobtaa nac Dios! ;Pa lotaa rac me, pa lotaa rien me! ;Pa lotaa rioxco me miech! ;Cho grieelo guien pe nac miñe no guic me gun me, pe nacgaa gun mew? <sup>34</sup> Zigne zhobneeque lo Xtiidz me, zaatne rnee: "iChoot nañd pe no guic Dios gun me! ;Choot grieelod guiab lo me, znu znu been! <sup>35</sup> Wlaltaa choot gard pe gdeed lo Dios, par guiab ne laa Dios zëeb." <sup>36</sup> ;Peet gon nzëebd Dios lo miech! Sac

grëtaa ncuaane no, me psana, me naaza, ni me rnabeya.

;Mese nac meñ ndzon, tibaque gotsaa dziuunnon ne me! Sca rieguiaIa.

#### Golban zigne rdziladz Dios

**12** Bets, bzian, laa to gocnanle ganle pa lotaa nquialadz Dios to. Nana sca, dib nace to golsan to ladznia me, gac to zig tib gon mbe, tib gon ne gley me ycaania me. Sca glu to ne nli rleyne to me.

<sup>2</sup> Ib tsienaldras to grë ncuaane ndzinlid ne noyac lo guidzliu rii, grëse zhgab ne paat rquiind, golcueew guic to; zeena gban to zigne racladz me, ni guien to ganle zha wentaaw zeene zienal ne miñe rnabey me.

<sup>3</sup> Ne znu nac naa zha ne pquia zdoo Dios noyun naa dziin rii, nligaa laa naa rso diidz lo to, ndzinli golgac, ib glude to ncuaane ni nace to, sinque golguien cho nac to, zha rnalo to Dios. <sup>4</sup> Golgan ganle zha niaa xcuerp ne: nzian lë niaaw, ni tib tiba nose zaatne rquiina; scaque nagon nac grë zha ne ngab lo Jesús, nzian nac ne, per tib tib ne nose zaatne rquiin ne, tsod zha ne yquiind. Grëse ne none gnalolsa ne grë zha ne nacgrë ne.

<sup>6</sup> Tib tib ne bneedzse Dios guieIbiini lo ne, par grieelo dziuun ne dziin ne pso me ne dziuun ne lo me. Gacxe waa,

zha ne pso me cteed xtiidz me, none gnee zhow zigne csiaab mew guic zho;

<sup>7</sup> zha ne pso me gun ncuaane yquiin lo grëraa miech, none gun zhow.

Zha ne pso me cseed miech, none min co gun zho;

<sup>8</sup> zha ne pso me gdeedlban miech, none lban gdeed zho.

Zha ne pso me ygad, none dib zdoo zho ygad zho; zha ne pso me so gnabey, none ndzinlise gnabey zho; zha ne pso me cchoobladz zdoo zha ne mban noded, none nley gac zho tsienee zho lo miech.

<sup>9</sup> Dib zdoo to golleyne samiech to. Ganðzede to grë ncuaane ntseeb, niapse ncuaane rquiin goltsienal.

<sup>10</sup> Ine niowse golleyne grë zha ne nacgrë to, gacnguizhde to, quitniede to zho.

<sup>11</sup> Nguieel golgac, gacmbechde to, dib zdoo to goltsoxco golgun miñe nac xtsiin Dios.

<sup>12</sup> Nley golgac lo guieImban rii, golsoladz ganle zha nactaa grë ncuaane no gneedz Dios lo to; golxecw lo grë guieInë ne gan to; tibaque golzodiidznie Dios.

<sup>13</sup> Goltsoxco xliaadz grë zha ne nacgrë to ngab to lo Dios; zaacse golcuézlo zha ne ziaadted lidz to.

<sup>14</sup> Grë zha ne rtsidil to, laa ne gdzibdee to zho, golnab gunlay Dios zho.

<sup>15</sup> Zha ne no guieIbley, golgacnie zho lo xquieIbley zho; zha ne nogaa guieInë, golgacnie zho lo xquieInë zho.

<sup>16</sup> Gacniatsde to. Grë zha ne rzac miech peet nond, goltsieelsa zho; guiabde to to nac zha ne racraa.

Niowse golbannie zha ne nacgrë to.

<sup>17</sup> Zha ne csacsi to, gunde to ne yeque to csacsi zho. Goltsoxco wen golgac lo grëse miech. <sup>18</sup> Tilniede to

samiech to, gołtsoxco tibaque wen gołbannie zho.  
<sup>19</sup> Gołguien, zha ne csacsi to, ib guiabde to ne tozhal  
 ctsire guielnē co, sinque gołsaņa ladznia Dios, metaa  
 naņ zha guņ me xquielwxtis me; zigne ziaad lo Xtiidz  
 me zeene rēb me: “Naa raguiał guņ guielwxtis, naa  
 guņquizh miech tel pe nac doł ne zēēb zho.”<sup>20</sup> Gacxe  
 waa, zha ne rlēē lo luu, zeene gaņ luu mban rac zho  
 rcaabedz zho, mazd bdeed ncuaaņe gow zho; gangaa  
 luu mban rac zho rnab zhis zho, bdeed ncuaaņe guie  
 zho. Sac zeene sca guņ luu, stoladz zho csoladz zho  
 miņe been zho luu; rrieequia gui ga cuib guic zho.”  
<sup>21</sup> Gołguien sca, niapse guielwen gołtsienal, zeena sca  
 ycuēēz to lo guielntseeb. Gdeete to diidz ne ye to guņ  
 guielntseeb.

### Gołgon miņe rnabey wxtis

**13** Grēse to none gon to xtiidz zha ne nacpaa wx-  
 tis. Sac grēse zha ne nac wxtis, ible Dios rdeed  
 diidz ne laa zho rac dziin co. <sup>2</sup> Gacxe waa, zha ne racn-  
 daan lo wxtis, rrieequia ye lo Dios ga racndaan zho; ni  
 zha ne racndaan, lēēque zha rguib ted zho caxtigw ga.  
<sup>3</sup> Gołgaņ gaņle, ible laa wxtis zo, par zha cobey caxtigw  
 ne tsieguiał zha ntseeb. Telne racladzde to sca  
 tsoxtseeb to lo wxtis, zaacse gołgac; scagaa zha, tsod  
 pe nacne ygaal zho to. <sup>4</sup> Dios psan rzo zho ni zha  
 rteedlo to, ni scagaa, telne pe guielntseeb ne guņ to,  
 zhaque gnabey pe caxtigw ne yгаа to; sac goņ, ible laa  
 Dios bzo zho guņ zho guielwxtis. <sup>5</sup> Gacxe waa, ib none  
 gon to miņe rnabey zho, zeena tsoxtseebde to lo zho,  
 ni scagaa niicle nēz lo Diosa iņe tiblise no guic to.  
<sup>6</sup> Scaque dimi ne no gdeed to lo zho, gołdeeda; sac  
 rquiin dimi co parne grieelo guņ zho tel pe nac dziin  
 ne no guņ zho. <sup>7</sup> Gołguien sca, dimi ne no gdeed to lo  
 zho, gołdeeda; miņe rnabey zho to guņ to, gołguņa.  
 Gołleynie zho, quitniede to zho, gołguien zha non nac  
 zho.

### Gołleynie samiech to

<sup>8</sup> Grē ncuaaņe rieguiał to guņ to, gołgungazha zeena  
 bdedgaw; saņgue samiech to, none tibaque gleynie to  
 zho. Zha ne rleynie samiech, grēle miņe zhobnee lo  
 Xley Dios ga quiayun zho. <sup>9</sup> Sac telne rleynie to  
 samiech to zigne rleynie to to, nod pe nacne csacsi to  
 zho; guiab to:  
 laa to yquidie zho,  
 laa to gut zho,  
 laa to cuan zho,  
 laa to tsonie tsieel zho,  
 gzoobladzгаа to grē ncuaaņe quianie zho.  
 Gacxe waa, zha ne rleynie samiech zigne rleynie zho  
 zho, grēle miņe zhobnee lo Xley Dios ga quiayun zho.  
<sup>10</sup> Zha ne rleynie samiech, rsacsidraa zho zho; ni miņ  
 co rnabey Dios. Gacxe waa, grēse ne none gleynie ne  
 samiech ne.  
<sup>11</sup> Ib none gban ne zigne racladz Dios, gołle na tsaa  
 ne biini; sac goņ, laa dze ne ycaania Dios ne bii zi-  
 aadgaxraa, lēdle zeene psilo rnalo ne me. <sup>12</sup> Dziuun ne

cuent laa guieel lozhle ted, laa biini ne guini liu dze nd-  
 zon co ziaadle; gacxe waa, ni lalnu guionald ne miņe  
 racladz menđox, sinque miņe racladz Dios, miņ co goł-  
 gotsaa dziuun ne. <sup>13</sup> None ndzinli gban ne:  
 dziuunđ ne guielgonziu,  
 dziuunđ ne grē lni yozh,  
 yquiangobd ne zha ne led tsieeld ne,  
 dziuunđ ne grē guielyozh ne racladz xcuerp ne,  
 diłnied ne samiech,  
 glēēnied ne zho zeene stib noded zho.  
<sup>14</sup> Gołgotsaa gnab ne lo Jesús sca, zig zie dze lozh  
 csaņmbe me xquielrien ne, csaņmbe me zdoo ne, gac  
 ne zigne racladz me. Dziuunđraa ne grē ncuaaņe  
 ndzinlid ne racladz xcuerp ne.

### Gzeed zdoo to miņe ruņ zha ne nacgrē to

**14** Gołcaania zha ne gard tsoguičpaa zha nac Xtiidz  
 Dios. Telne no palal miņe riladz to zhaa rzac  
 zho, glisquide tow lo zho. <sup>2</sup> Gzoob ne, no to rzac peet  
 nacda gow to grē lose guielwagw, laa zha ne na gard  
 tsoguičpaa Xtiidz Dios, rzacгаа wena telne scuaan  
 guizhyese gow zho; <sup>3</sup> ga nagoņ, ni stib ni stib nod pe  
 nacne glisqui dien cho pe row, dien cho pe rowdгаа;  
 sac goņ grēse to, Dios bzooblo to ngab to lo me.  
<sup>4</sup> Nana zig nac zho, lo Dios ngab zho, led lode tow;  
 ųcho nac to dzigo tso to glisqui to dien pe ruņ zho?  
 Dios nac men ne naņ telne lēēw o lēdгааw ga quiayun  
 zho; men nroob nac Dios, me gdeed guielbiini lo zho  
 guien zho gban zho zigne racladz me.  
<sup>5</sup> Scaque, no zho zienal dien pa dzepaa none gleynie  
 zho Dios, nogaa zho rnee zac tel pa dzetaa gleynie zho  
 me. Per peet nacd ga, zac tib tib zho guņse zho miņe  
 rzac zho rdziladz me. <sup>6</sup> Tel pa dzetaa wena, totsaque  
 ruņ zhow par guņnon zho me. Scaqueгаа guielwagw,  
 wena zha ne gow grēlosew; niicle zha ne ncueegaa  
 ncuaaņe gow, wenaquew, totsaque ruņ zhow par glu  
 zho ne rleynie zho me, ni rdeed zho xquizh lo me.  
<sup>7</sup> Sca nagoņ naca, per led miņ cod dzieets ne dziuun  
 ne miņe gacladztaa ne. Grēse ne ne nac ne zha ne  
 ngab lo Dios, laa ne mban par dziuun ne miņe rnabey  
 Jesús, ni zeene guetгаа ne, lo me none gdziņ ne.  
 Gacxe waa, niicle niina ne zomban new, niicle zeene  
 gutlegaa new, ladznia me no ne. <sup>9</sup> Sac goņ, tel Jesús  
 gut me ni brieeban me; gacxe waa, me rnabey ne  
 grēse ne, zigtaa zha mbana zigtagaa zha guta.  
<sup>10</sup> Jesús rnabey ne tib tib ne. Gacxe waa, nonguielđa  
 glisqui to lo zha ne ruņd miņe ruņ to; nonguielđa por  
 miņcose sac to zho zig zha ne peet nond, tso to gnee-  
 draa to lo zho. Ni stiba, gał dze ne laa Dios guņ  
 guielwxtis, grēse ne laa ne none gacredz lo me.  
<sup>11</sup> Zigne raquietaque lo Xtiidz me, zaatne rnee me:  
 Naa nac Dios mban, gneli naa lo to gaņle:  
 grēse miech, ible squiitsgzhib zho lo naa,  
 cueero zho ne nli naa nac Dios.  
<sup>12</sup> Sca nagoņ gaca, tib tib ne ib laa ne no cueero lo me  
 tel zha wban ne.

### Csaṅde to zdoo zha ne nacgrë to

<sup>13</sup> Nana sca, zha ne sca ruṅd grë miṅe ruṅ to, ible glisquidraa tow lo zho. Golguien, guṅde to ncuaaṅe rgobey to yquiaaqui guṅctal zho xtoḷ zho, o csaangaa zho Xtiidz Dios. <sup>14</sup> Teḷ naa, naṅpaa naa led doḷda gow ne grë lose guieḷwagw; sac niicle Jesúsa scaque nac xtiidz me. Saṅgue zha ne rzac doḷa, mazd gowd zhow; sac teḷ laa zho gowa, xtoḷ zho ga guṅctal zho. <sup>15</sup> Zig rne naa ga led doḷda, per teḷne xtsiinpaa row to tib ncuaaṅe rquiaaqui rsaṅ to zdoo stib zho, ga rlu to ne rleyniede to zho. ¡Golguien sca, gowde to ncuaaṅe yquiaaqui sozit zho lo Dios! Sac gon, blactaa guieḷnë ne bded Jesús psilaa me zho.

<sup>16</sup> Ib guṅde to grë ncuaaṅe yquiaaqui gneenë miech to, niicle ne naṅpaa to led doḷda. <sup>17</sup> Zha ne ngab lo Dios, miṅe none tsienie guic zho nac ne ndzinli gban zho, tiḷnied zho samiech zho, iṅe nley gac zho (miṅ co nac miṅe rdeed Espíritu Sant); led tsod zho dieṅ pe zac gow zho, pe zac guie zho, pegaa gacda. <sup>18</sup> Sca rdziladz Jesús, ni zha ne sca gban, zleynie Dios zho, niiclegaa grë miecha zleynie zho zho.

<sup>19</sup> Goltsocxo sca, guṅde to ncuaaṅe codiḷ to grë zha ne nacgrë to; zeena tipse gac to lozh tsoguc to zha racladz Dios gban to. <sup>20</sup> Ib guṅde to, ne por tib guieḷwagw codiḷ to grë zha ne ngable lo Dios. Zig rnele naa ga, grëlose guieḷwagw mbew, peet nacda gow new; sinque miṅe nonguielḷda, nacte gow ne miṅe naṅpaa ne yquiaaqui csaṅ ne zdoo stib zho. <sup>21</sup> Miṅ-cocxe waa, mazd gowde to pe scuaan bëël, guiede to nziu, teḷne miṅ co yquiaaqui guṅctal to xtoḷ zho; ni teḷ pe grëraa ncuaaṅe naṅ to tsod zdoo zho, guṅde tow.

<sup>22</sup> Niicle ncuaaṅe naṅpaa to doḷda guṅ tow, niiclegaa nëz lo Diosa led doḷda; per mazd guṅde tow zeene zo zha ne rzac doḷa. ¡Wen zie zha ne sca niicle naṅpaa zho doḷd nac miṅe guṅ zho, per ruṅd zhow, parne guṅc-tald zho xtoḷ zho!

<sup>23</sup> Saṅgue zha ne racchop guic rienḷd zho dieṅ pe zow zho tib guieḷwagw, ni lozh ga row zhow, ruṅctal zho xtoḷ zho ga; sac beenḷd zho miṅe rzac zho rdziladz Dios. Grëse ncuaaṅe rzactaa zho wend ni guṅ zhow, xtoḷ zho ga guṅctal zho.

### Golgacnie zha ne nacgrë to

**15** Golguien sca, to ne nac to zha ne dziitsle zo lo Xtiidz Dios, golgacnie grë zha ne gard sodziits lo Xtiidz me. Golguṅ ncuaaṅe tso zdoo zho, ncuaaṅe yquiin lo zho, zeena lozh guieṅ zho zha gnalo zho Dios; led tsode to guṅ to ncuaaṅe yquiinse lo to.

<sup>3</sup> Golgaṅ gaṅle, niicle Jesúsa bguibḷd me niac ncuaaṅe nquiin lo me. Zigne raquetaque lo Xtiidz Dios, zaatne rnee: "Grëtaa diidznë ne rnee zha ne rlëë lo Dios, grësew pcon zho me."

<sup>4</sup> Grëse miṅe raquiet lo Xtiidz Dios, padzeela pquiaw; ni ib laaw pquia zeena gacndioṅ ne zha no gban ne. Lëew rnee none nley gac ne, lëew rnee guieete ne yquiambiaaz ne ygaa ne grë miṅe bzeetle Dios. <sup>5</sup> Dios

meṅ ne rneedz guieḷbley co, meṅ ne racnieṅ ne guieete ne, me gacnieṅ to niowse gbannie to grë zha ne nacgrë to. Golleynie zho zigne rleynie Jesús to, <sup>6</sup> zeena grëse ne tipse gac ne dziooḷnie ne Dios, Pxoḷ Jesús, meṅ ndzon ne rnabey ne.

### Grëse miech noyon Xtiidz Ndzon Jesús

<sup>7</sup> Golguien sca, grëse zha ne nacgrë to, golcaania zho zigne pcaania Jesús to. Sca golguṅ, zeena xoobneṅraa lë Dios.

<sup>8</sup> Golsoladz gaṅle, zeene biaad Jesús nroob ncuaaṅe been me lo zha Israel, me biaadguṅ grëtaa miṅe bzeetle Dios padzeela. Ga blu Jesús grëse miṅe rnee Dios, ib ruṅ mew. <sup>9</sup> Ni golsoladz gaṅle, ye grë miech stib guiedz biaadsilaa me, gane niina grëse zho rooḷnie Dios, ne scataa pquia zdoo me zho. Miṅ co raquiet lo Xtiidz me, zaatne rnee:

Zooḷnie naa luu,

ni zlu naa lo grë zha stib guiedz ne meṅ non nac luu.

<sup>10</sup> Stib lugar rnee:

To ne nac to miech stib guiedz,

iṅe nley golgac grë to zha Israel!

<sup>11</sup> Ni no stib zaatne rnee:

Grëse to ne nac to miech stib guiedz,

¡golleynie Dios! ¡Golsaṅnziuu lë me!

<sup>12</sup> Miṅcoque ga bzeet Isá, zeene znu pquiaa me:

Zrieequia tib meṅ lo xtii Isá;

meṅ co gnabey lo grëse miech stib guiedz,

ni me gnalo zho grëse zho.

<sup>13</sup> Miṅcocxe waa, to ne nac to miech stib guiedz, rnab naa lo Dios (meṅ ne psanle diidz pe nac grë ncuaaṅe ygaa ne ga) gneedz me guieḷbley lo to, gacnie me to peet zhgab ctsebde to niina ne laa to rliladzle me. Rnab naa lo me, gacnieṅ Espíritu Sant to iṅe gley to yquiambëz to gac grë miṅe psanle me diidz ga.

<sup>14</sup> Bets, bzian, naṅle naa zha wen nac to, nacte to zha ne csaṅ zdoo stib zho; rienle to zha racladz Dios gban to, rienle to zha cso to diidz lo grë zha ne nacgrë to; <sup>15</sup> per lo guits rii gon nziān ncuaaṅe rso naa diidz lo to. Guiabde to togo ndox naa lo to, sinque laaw beṅ naa zeena guiaaṅladzde tow. <sup>16</sup> Ne nquialadz Dios naa, laa me bzooblo naa noyuṅ naa xtsiin Jesús, none naa Xtiidz Ndzon me lo grë miech stib guiedz, zeena csaṅmbe Espíritu Sant zho; lozh ga gded naa zho lo Dios zig tib gon ne gley me ycaania me.

<sup>17</sup> Gacxe waa, teḷ niina rley naa sac noyacnieṅ Jesús naa noyuṅ naa dziin ne pso Dios naa. <sup>18</sup> Me noyacnieṅ naa none naa Xtiidz me lo grë zha stib guiedz, zeena gban zho zigne racladz me. Ni laa zho nobig lo me, sac raṅ zho grëse miṅe rne naa mban naaw zigne naca, <sup>19</sup> ni raṅ zho zha racnieṅ Espíritu Sant naa ruṅ naa grë milagr, grë ncuaaṅe rzee zdoo zho. Sca nagon none naa Xtiidz Jesús lo zho, brie naa Jerusalén brieequia naa haxta nëz xtan zha Ilir. Guiabde to togo rtix naa diidz. <sup>20</sup> Ni laa naa noxco za naa zaatne waltaa gard gon zho cho nac Jesús, zeena gasëëbd naa zaatne ziyele zha ne güeynee Xtiidz me. <sup>21</sup> Laa naa zanaḷ zigne zhobnee lo Xtiidz Dios, zaatne rnee: "Grë zha ne waltaa

gard gon cho nac me, zeene gan zho grëtaa ncuaañe run me, laa zho gunbey me.”

### Racladz Pabl tsie Pabl Roma

<sup>22</sup> Nzian vuelt gocladz naa nialgan naa to, per ib bdeetew diidz, sac laa naa bia grë dan co biaseed naa miech. <sup>23</sup> Izle ga na tibaque sca no guic naa, laa niina ne laa naa psiaal lo xtsiñ naa, nataa nagon ible zial naa. <sup>24</sup> Laa naa no ga Spañ, dzigo lëë nëzle ga teed naa Roma i guialgan naa to. Tib guiebleya lo naa guialquiabdiuuzh naa to, dzigo lozh ga siguiel to gun to xyudar naa grieelo ga naa nëz Spañ.

<sup>25</sup> Laa niina, laa naa no ga Jerusalén gasan naa tib gon lo grë zha bets, zha bzian ne no ga; <sup>26</sup> sac grë zha bets, zha bzian, ne no nëz Macedon, ni nëz Acay, laa zho bnediidz beenlo zho palal dimi cxeel zho yquii grë zha prob ne no nëz co. <sup>27</sup> Niapse zdoo zho gol ptop zho gon co, sac rzac zdoo zho grëtaa miñe been zha Jerusalén lo zho; sac gon, zha co güeynee Xtiidz Ndzon Jesús lo zho. Laa niina, laa zho rxeel palal ncuaañe rgaa lo zho yquii zha Jerusalén.

<sup>28</sup> Zigne lozh nagon gasan naa gon co Jerusalén, dzigo laa naa teed guialgan naa to i zigne nile naa ga. <sup>29</sup> Rien naa nroob guieñzaac ne gneedz Dios lo to zeene laa naa guial.

<sup>30</sup> Bets, bzian, golguien ganle Jesús rnabey ne grë ne; ni rleynie ne zha ne nacgrë ne, sac Espiritu Sant nacnie ne. Gane niina, laa naa rnab lo to, golgotsaa gnab ne lo Dios gacnieñ me naa; <sup>31</sup> golnab lo me, csilaa me naa ladznia grë zha Israel ne gard guien cho nac Jesús. Golnab lo me, iñe gley grë zha bets ne, zha bzian ne, ycaania zho gon ne gasan naa lo zho nu; <sup>32</sup> zeena iñe nley no zdoo naa glanso naa lo to, iñe gdziiladz naa len dze ne cuëz naa lo to i. Sca nagon no guic naa, totsaque gneedz Dios diidz gaca. <sup>33</sup> Ni me ne nac me men ne rbee miech lo grëse zhgab, lo grëse guiełtseeb, me gacnieñ to. Sca gaca.

### Bdiuzh

**16** Bets, bzian, len dze rii laa Feb, tib wnaa ne run xtsiñ Dios guiedz Cencre, laa me guiaad nëz lo to i. <sup>2</sup> Laa naa rso diidz lo to, zeene glanso me i niowse golcaania me, golcaania me zigne rieguial ycaania ne zha ne ngab lo Dios. Golsiguiel goldeed grë ncuaañe yquii me; sac gon, tel me ndal grë zha ne ziyacnie me lo xliaadz zho, haxta naa blactaa ziyacnie me naa.

<sup>3</sup> Ni rnab naa lo to, golsiguiel goldeed zhibdiuzh naa lo grë zha qui.

Goldeed tib zhibdiuzh naa lo Aquil i, grop tsieel me Priscil. Blactaa ziyacnie zho naa zidziuuñ no xtsiñ Jesús, <sup>4</sup> haxta bdedlaa zho niet zho psilaa zho naa lo guielgut. Rzadox zdoo naa miñe been zho ga, niicle grëragaa zha zit ne nacgrë new, rzac zdoo zhow.

<sup>5</sup> Ni scagaa, grë zha ne rcaalsa lidz zho riegoolnie Dios, goldeed zhibdiuzh naa lo zho. Goldeed zhibdiuzh naa lo Epenet, rley naa rsoladz naa me; lëë me nac zha Asia ne gloopaa bzëeb xnëz Jesús.

<sup>6</sup> Goldeed zhibdiuzh naa lo Marí, blactaa noyuuñ me xtsiñ Jesús lo to.

<sup>7</sup> Goldeed zhibdiuzh naa lo Andrónic, lo Junias, grop menladz naa zha ne no i; gzapaa no zho bdzio ladzgui-ib. Glo zho bliladz Jesús lo naa, zha nziuu nac zho lo grë zha ne pxeel Dios nonee Xtiidz me.

<sup>8</sup> Goldeed zhibdiuzh naa lo Ampliat, lëë stib zha ne rdzieel xtidz naa ga; <sup>9</sup> lo Urban, rsoladz naa me, tipse bdziuuñ no xtsiñ Jesús grop no; lo Staquis, stib zha ne nziuu lo naa, goldeed zhibdiuzh naa lo zho; <sup>10</sup> lo Apel, ye me blactaa ncuaañe bded me blu me ganle ne nli dib zdoo me rnalo me Jesús; lo grë zha ne no lidz Ris-tob ne.

<sup>11</sup> Goldeed zhibdiuzh naa lo Herodion, ye me menladz naa nac me; lo grë zha ne no lidz Narcis, zha ne riladzle Jesús; <sup>12</sup> lo Trifen, lo Trifós, ni lo Pérsida, gza men wnaa rii blactaa noyuuñ zho xtsiñ Jesús.

<sup>13</sup> Goldeed zhibdiuzh naa lo Ruf, zëeb xtiidz me lo grë zha ne nacgrë ne; goldeed zhibdiuzh naa lo xniaa me ne, run naa cuent lëë stib xnia naa ga, blactaa pteedlo me naa. <sup>14</sup> Goldeed zhibdiuzh naa lo Asintric, lo Flegon, lo Hermes, lo Patrob, lo Hermas ni lo grëragaa zha bets ne nacgrë zho.

<sup>15</sup> Goldeed zhibdiuzh naa lo Filólogo, lo Jul, lo Nerew grop bzian me, lo Olimp ni lo grëraa zha bets ne nacgrë zho.

<sup>16</sup> Grëse to bets, grëse to bzian, golcaania zhibdiuzh naa. Grëse zha ne riladz Jesús nëz rii, laa zho rxeel bdiuzh lo to.

<sup>17</sup> Nu ne laa naa csiaalle lo guits rii, laa naa rso diidz lo to, nsin golso lo grë zha ne ziaad loxaque dien zha codil zho to, dien zha gungüet zho to, rlu zho miñe ni nacdraa Xtiidz Jesús; yquiaadiagde to zhiwseed zho.

<sup>18</sup> Grë zha co, led xtsiñdraa Jesús ga run zho, sinque laa zho noxco ncuaañe gdeed guxt xcuerp zho. Diidz nex, diidz ndooladz rnee zho; grë miech ne beelze pe riladz, znuse rquidie zho zho. <sup>19</sup> Sangue to, zëeb diidz ne ib rsaande to miñe nac Xtiidz Dios, ziena to miñe rnabey me.

Rley naa ron naa squitaa nguzobdiidz to. Racladz naa tibaque squi niini gac to, zeena guien to niapse ncuaañe yquii gun to, ni lalnu tsode to lo guiełtseeb. <sup>20</sup> Scagaa Dios men ne rtiche grëse zhgab, grëse dzeb, merle quixdze me Satanás, zeena peet grielodraa gun ma. Jesús, men ndzon ne rnabey ne, me gacnieñ to.

<sup>21</sup> Golcaania zhibdiuzh Timoté, men ne quianie naa xtsiñ Jesús, laa me rxeel bdiuzh lo to; scaque zha ladz naa Lus, Jasón ni Sosípater, laa zho rxeel bdiuzh lo to.

<sup>22</sup> (Naa nac Ters, naa noquia guits rii, ye naa laa naa rxeel zhibdiuzh naa lo to i. Rleynie naa to, sac ye to ngab lo Jesús. <sup>23</sup> Golcaania zhibdiuzh Gay, men ne rbëz naa lidz, laa me rxeel bdiuzh lo to. Lidz me nu rcaalsa grë zha ne riladz Jesús nëz rii. Ye Rast, men ne nac wx-tis quianap xtimi guiedz rii, ni bets ne Cuart, laa zho rxeel bdiuzh lo to. <sup>24</sup> Jesús men ne rnabey ne, me gacnieñ to grëse to. Sca gaca.)



<sup>25</sup> Laa naa rsaṅ to ladzniã Dios, me gacnieṅ to lozh sodziits to lo Xtiidz me, miṅe none naa lo miech. Haxta zeeṅe gard tsaã guidzliu, znu no guic Dios csilaa me grë miech lo xtoḷ zho, per choot gocnaṅda, naraa laaw bzhoobneṅ. <sup>26</sup> Laa niina, nzian zaatne nogaaz Xtiidz me, zeeṅa grëse zho guieṅ Jesús none gnalo zho, ni miṅe rnabey me miṅ co no guṅ zho. Grë zha ne biad-

teed xtiidz Dios padzeela, bzeetle zho ne znu gaca, ni ible Dios rnabey ne znu gaca. <sup>27</sup> ¡Mese nac Dios, mese nac meṅ ne nlipaa rien! ¡Tibaque sca golgotsaa dziu-uṅnon ne me, grëse ne ne nac ne zha ne ngab lo Jesús! Sca rieguiaḷa.

Pabl

# 1 CORINTIOS

¡Diuzh to grëse to!

**1** Naa nac Pabl, ible Dios bzooblo naa znu quiayun naa xtsiin Jesús. Grop no bets ne Sóstenes rquiaa guits rii xreeĭ no lo to.

<sup>2</sup> Laaw ziaad lo to i, grëse to ne nac to zha ne ngable xnëz Dios no to guiedz Corinth i, nac to zha ne bredz Dios ngab lo me, psanmbe me to zeene laa to bliladz Jesús; zigne psanmbeque me grëse miech ne no dib lo guidzliu, zha ne bliladz Jesús, men ne rnabey ne grëse ne.

<sup>3</sup> Dios men ne nac Pxoze ne, ni Jesús men ne rnabey ne, me gacnieĭ to, me glu lo to ganle pa lotaa noxco me to; zeena peet tsienied guic to.

<sup>4</sup> Gzataa zeene rzodiidznie naa Dios, rded naa xquizh lo me por grëtaa ncuane zineedz me lo to, niina ne laa to rililadz Jesús. <sup>5</sup> Sac gon porne rililadz to Jesús, blactaa ziyunlay me lo xquielmban to, noyacnieĭ me to quiayogucraa to zha nac zhiwseed me, rien to zha gnee tow lo miech. <sup>6</sup> Rlu zianaĭ to mine nac Xtiidz Jesús, zigne binse tow, <sup>7</sup> gacxe waa bneedz Dios grëtaa guielbiini lo to, zeena guien to zha gban to, laga quiambëz to gdziĭ dze ne guiaad Jesús men ne rnabey ne. <sup>8</sup> Ni Dios nac men ne gacnieĭ to tiblique gac to lo Xtiidz Jesús, zeena ni tib falt rapde to gal dze co. <sup>9</sup> Sca nac xtiidz me, ni mesi gon ctsëed me mine rnee me, ible laa me bredz to gacnie to Xpëed me Jesús, men ndzon ne rnabey ne.

<sup>10</sup> Gacxe waa bets, bzian, laa naa rso diidz lo to niowse golgac, tsodildraa to. Ine tipse golgac grë to, tel pe nac dziin ne gun to, tel pe rzac to, tipse golnee. Ne nligaa golgona, zig nac zeene Jesússhal noso diidz rii lo to. <sup>11</sup> Sac gon në tib zhalidz Cloé lo naa nodiĭlsa to i; <sup>12</sup> no to dieĭ cho xnëz ngab to. No to rnee: "Xnëz Pabl no naa"; riasaque zha ne rnee xnëz Apol no zho, rrieequiagaa zha ne rnee xnëz Pedr no zho; haxta no zho rzac zhase nac zha ne nlipaa no xnëz Jesús. <sup>13</sup> Ne squi rac to, ¿pe rzac to dzigo squi nzian lë nac Jesús? Zha ne rnee xnëz Pabl no zho, ¿pe niacxe naa pquia lo cruz gozh xtoĭ zho?, ¿te brobnis zho ye par ygab zho lo naa?

<sup>14</sup> Xquizh Dios led naad pchoobnis to grë to, lëese chop zha ne pchoobnis naa nac Crisp ni Gay! <sup>15</sup> Zeena tsop pe nacne guiab to xnëz naa ngab to, sac naa pchoobnis to. <sup>16</sup> Ah, ni naaque gon pchoobnis grë menlidz Stef. Bod lëese zha ne pchoobnis naa ga, <sup>17</sup> sac gon pxeel daxe Jesús naa waa cchoobnis naa miech, sinque laa me pxeel naa cseed naa zho gacnan zho zha grieelo laa zho lo dol. Haxta bod ligase bzhaac to mine bialne naa lo to, sac ib zanaĭd naa pe guielrac,

pe diidz ngan ne gne naa; sac nacda gleynie miech zha rnee naa, sinque gliladz zho cho nac Jesús, pe nacne gut me lo cruz.

## Diosse nac men ne rien

<sup>18</sup> Miĭ co nagon noxco naa, maase niicle no grë zha ne rzac ncuane paat rquiind ga been Jesús gut me lo cruz, per lëe zha co nole nëz ne nitlo zho; sangue ne ne nac ne zha ne psilaale me lo dol, ndion ne ganle ga blu pa lotaa nac poder ne rap Dios. <sup>19</sup> Noyaca zigne zhobneeque lo Xtiidz Dios, zeene rëb me:

Znitlo naa grë guielrac ne rzac zho csilaa zho, niicle rzac zho mazdraa zhooba guic zho, ni lalnu yquiinda.

<sup>20</sup> Ni nligaaw, grë zha rac, grë zha rien, grë zha ne rzob dieĭ cho nroobraa rac, ib blud grë zhiwseed zho ga lo zho zha csilaa Dios zho, chogaa nac Dios. Ga blu Dios ganle lega nacse grë guielrac ne no lo guidzliu rii.

<sup>21</sup> ¡Diosse nac men ne rien! Bien me grieelod gunbey miech me por xquielrac zho, nacne bnabey me zha ne dib zdoo gliladz xtiidz me, zha co csilaa me; niicle ne rzhidznie miecha, rzac zho ncuane paat rquiinda.

<sup>22</sup> Zig nac grë zha Israel, grë zha Gres ncuane paat rquiinda rzac zho. Grë zha Israel, racladz zho ganlo zho grë milagr nroob par glu ne diidzliw; laa zha Gres na zianaĭgaa gaca zigne nac zhiwseed zho, sac laa zho zianaĭ guielrac ne no lo guidzliu rii. <sup>23</sup> Gacxe waa zeene rnee no lo zho Jesús men ne pquia lo cruz, men cose csilaa miech, rlëe zha Israel ron zhow; laa zha Gres, rzhidznie. <sup>24</sup> Sangue ne, ne nac ne zha ne bredzle Dios bzëb xnëz me, zigtaa zha Israela, zigtagaa grëraa miecha, ndion ne ganle Jesús nac men ne biaadlu pa lotaa nac poder ne rap Dios, me biaadlu pa lotaa nac xquielrac Dios. <sup>25</sup> Miĭne rzac miech paat rquiind ga been Dios, ni nanĭ zho ndziibguicraa nac miĭ co lo grë xquielrac zho; zha ne rzacgaa cholze cho men nsis ga sca gut lo cruz, ni nanĭ zho lëe men co mazdraa ndip lo grëse miech guidzliu.

<sup>26</sup> Bets, bzian, golgan ganle lo grë to ne nac to zha ne ngab xnëz Dios, led grëde to nac zha rien nëz lo miech, led grëde to nac zha non, zha ne ziaadgaa lo grë dii ne nziuu lo zho. <sup>27</sup> Per ib laa Dios nobedz grë zha ne rzac miech peet rienĭ, grë zha ne rzac zho nac zha nsis, parne gunctoladz me grë zha ne rzac zho nac zha rac, zha non. <sup>28</sup> Laa me nobedz grë zha ne sca rzac miech paat rquiin, zha ne rzac zho peet nond, parne guioog ro grë zha ne rzac zho nac zha non, zha nziuu. <sup>29</sup> Ga rlu me ganle ni tib choot grieelod gacniats lo me.

<sup>30</sup> Golwi ganle, niapse por me laa ne nacie Jesús, grë guie|rac, grë guie|rien ne rdziaap ne, Jesús bneedza, ni Jesús nac meñ ne psilaa ne lo grëtaa xto| ne, meñ ne psanmbe ne laa ne bziaab xnëz Dios. Dios bnabey sca goca. <sup>31</sup> Gacxe waa choot grielod gacniats, zigne zi-adaaque lo Xtiidz me zaatne rnee: "Zha ne racladz gacniats, mazd gunnon zho Dios por grëtaa ncuaañe run me."

### Xtiidz Jesús bnee Pabl

**2** Gacxe waa te| naa, golsoladz ganle bets, bzian, len dze ne bia|seed naa to Xtiidz Dios, bned naa dien pe diidz nroob, dien pe diidz ndzielguic lo to. <sup>2</sup> Bënd naa dien peraa nseed naa to, sinque miñe nac zhiwseed Jesús miñ co bia|ne naa, zeena gacnañ to cho nac me ni pe nac ne pquia me lo cruz. <sup>3</sup> Lega gzhe gzhe rac naa, haxta rzhidz naa, rdzieeb naa no naa lo to. <sup>4</sup> Zeene laa naa psilo bne Xtiidz Dios lo to i, gon to ganle ib bned naa zigne rnee grë zha ne nac zha rac lo guidzliu rii; per blu Espiritu Sant ganle nacda beelze pe wseed, ni blu ganle pa lotaa poder ne rap Dios. <sup>5</sup> Sca bne naa lo to, sac laa naa racladz zha ne gbig sëeb xnëz Dios, me gnalo zho, gnalod zho grë miñe nac xquie|rac miech.

<sup>6</sup> Parga nli no zaatne rnee no grë diidz nroob, diidz ndzielguic, per laa miñ co rnee no lo grë zha ne rienraa zha nac Xtiidz Dios, ni nacdgaaw zigne nac grë xtiidz ndzielguic grëraa miech, grë diidz ne rleyne grë zha rnabey ne no lo guidzliu rii; sac zigtaa zhaw, zigtagaa zhiwseed zhow, ncuaañe tibrded naca. <sup>7</sup> Grë diidz ne rnee no, ndzielguic naca, sac zhiwseed Dios, lëe xquie|rac me ga. Ndzielguica, sac ga rlu me zha no guic me csilaa me miech gdziñ zho lo guie|ndzon ne no me; gocnañd miecha padzeela, per nolew zeene bzaa me guidzliu. <sup>8</sup> Grë miech ne no len dze rii, rioguidz zho zha nac xquie|rac Dios; sac te|ne nioguidz zhow nabeyd zho nquia meñ ndzon ne nac Jesús ga lo cruz. <sup>9</sup> Zigne zhobneeque lo Xtiidz Dios, zaatne rnee:

Ncuaañe waltaa gard guien miech, nac grë miñe quianiele Dios gdeed me lo grë zha ne nlipaa gbig lo me gleyne zho me.

Ncuaañe choot gard gana, ncuaañe choot gard gona.

<sup>10</sup> Sangue no laa no ndionlew, sac pxeel me zhiEspiritu me blu lo no zha naca, meñ co nañ grëse miñe no guic me.

<sup>11</sup> Zig nace tib miech, grielod gacnañpaa ne dien pe nac miñe no guic zho, pe nacgaa miñe rza zdoo zho, loxaque zhiEspirituse zho naña; scaque Dios, loxaque zhiEspiritu me nañ grëse miñe no guic me gun me. <sup>12</sup> Ni te| no, Espiritu co nacie no (nacie no Espiritu ne quianzë lo guidzliu rii), ni ible laa Dios pxeel me lo no zeena gacndion no zha nactaa grë ncuaañe nole guic Dios gneedz me lo ne. <sup>13</sup> Zeene rzeet no grë guie|nzaac co, laa no rneew zigne rneedz zhiEspiritu me guie|biini lo no, rneed now zigne riab guic grë zha rac ne no lo guidzliu rii. Laa no rnee grë miñ co zigne rlu zhiEspiritu mew, ni ible laaw nac par grë zha ne rioguidz zha racladz Espiritu co.

<sup>14</sup> Grë zha ne nacie zhiEspiritu Dios, cholze miech nac zho, grielod tsoguidz zho zha nac grë miñe rlu Espiritu co lo no. Rzac zho ncuaañe paat rquiind naca, sac grielod guien zhow ne zhase. <sup>15</sup> Sangue zha ne rioguidz zha racladz Espiritu co, rien zho pe nac miñe rlu me.

<sup>16</sup> Ni nligaa zha guien zhow, zigne zhobneeque lo Xtiidz Dios, zaatne rnee: "Choot grielod gacnañ pe nac miñe no guic Dios gun me, choot grielod glu lo me pe nac miñe no gun me." Per no, ndion now, sac grë ncuaañe nañ Jesús, bneedz me diidz lo no ye no gocndiona.

### Gnalod zho samiech zho

**3** Bets, bzian, ne nligaa gard grielo gne naa lo to zigne rne naa lo grë zha ne rioguidz zha nac miñe racladz zhiEspiritu Dios, sinque tibaque laa naa rne lo to zigne rne naa lo grëraa miech guidzliu, sac rrieequia bii mëdyeen nac to lo zhiwseed Jesús. <sup>2</sup> Niapse ncuaañe ligase ziseed naa to, laa ne cseed naa to ncuaañe ndzielguic. Rrieequia nidzse nonedz naa quiaze to, laa ne gow to grë ncuaañe row zha gol. Haxta niinagaa gard tsoguidz zho zha nac grë miñe ndzielguic, <sup>3</sup> sacne laa to bii ziena| miñe run miech guidzliu, laa ne gun to miñe racladz Dios. Golguien ganle zha rac to, no to rlozhd glëlsa to, rlozhd til|sa to. ¡Led squid gon no gac zha ne nole xnëz Dios! <sup>4</sup> Pe i na rriee bla to rnee: "Te| no xnëz Pabl no no", rrieequegaa zla zha ne rnee: "Te| no xnëz Apol no no." Gase rlu ganle ziena|de to miñe racladz Dios, sinque laa to ziena| miñe no guic to.

<sup>5</sup> Nana, ¿cho nac Pabl, chogaa nac Apol parne no yquiaaqui tsodil to? Nli no biadseed to Xtiidz Dios, per tib ngundziin winse nac no lo me, bdziun no miñe rnabey me no. <sup>6</sup> Nac cuent rii zig nac tib guie|gon, naa blo bni liu, laa Apol bgaala; per Dios nac meñ ne bnabey blana ni me pchooba. <sup>7</sup> Golwi sca ganle Diosse nac meñ non, sac me pchoob bni co, te| no peet ncuaañe nroob bdziun no, lëe gdib tib bloo bni liu, stib bgaala. <sup>8</sup> Zigtaa zha ne bloo bni liuw, zigtagaa zha ne bgaala, lal nac zho grop zho; ni Diosse nac meñ ne gdeed miñe rieguia| zho tib tib zho por dziin ne been zho. <sup>9</sup> Tib ngundziin winse nac no lo Dios grop no Apol; laa to nac zig tib lë liu ne quiaayan Dios, zig tib yu ne quiazaagaa me.

<sup>10</sup> Pa lotaa wen Dios, sac bzooblo me naa naa psilo yu co, ni blu me lo naa zhapaa none tsaaw. Nli naa bgaale blee xcimienta, per niina zhaale zha ne nosoquiaaw. Tib tib zha ne nosoquia yu co, none guien zho zaacse gzhixcuua zhow, tsiena| zho zigne nace xcimienta ga, <sup>11</sup> sac gon nod pe nace csëeb zho stib cimient, tibaque cimient no, lëe cimient co nac Jesús.

<sup>12</sup> ¡Laa cimient co nole! Nana no zho gzaa yu co niapse guiib or, niapse guiib plat, no zho gzaaw grë quie niaz, no zho gzaaw yag, nogaa zho gzaaw grë pe guizh, pe yag xiidgaa. <sup>13</sup> Zeene gdziñ dze ne laa Jesús gun guie|wxtis, ga glu dien zha nac xtsiñ zho; sac gal dze co grësew laaw none ted lo gui, ga glu dien

pa miñ lëbraa. <sup>14</sup> Zha ne pquiin ncuuañe rlëb lo gui, ib tedsod zgaa zho miñe rieguial zho gdeed Dios lo zho; <sup>15</sup> laa zha ne pquingaa grë ncuuañe znuse rec, mbe scase nitlo xtsiin zho. Peet ycaaniad zho, haxta zha pense tel zha laa zho lo gui co, zigne rzac zha ne rec lidz.

<sup>16</sup> Golgacnan ganle xyadoo Dios gon nac to, sacne zdoo to rbëz zhiEspiritu me. <sup>17</sup> Tel xyadoo Dios, tib yadoo mbe, tib yadoo nda naca; gacxe waa, zha ne gnitlow ib tedsod znitlo Dios zho. <sup>18</sup> Golguien sca zacse gulgac, tel no zha ne rzac nroob rac zho wseed lo guidzliu rii, gnalod zho miñ co; nend lel lo co no zho, ygaad zho miñe nacpaa guielrac, guielrac ne rneedz Dios. <sup>19</sup> Sac gon grë guielrac ne no lo guidzliu rii, ncuuañe beelze naca nëz lo Dios. Zigne raquetaque lo Xtiidz me zaatne rnee: "Grë zha rac ne no lo guidzliu rii, lëëque lo grë guielrac ne zienal zho, ga rlu Dios ganle paat rquiinda." <sup>20</sup> No stib zaatne rnee: "Nanle Dios grë zhgab ne nonie guic grë zha rac, ncuuañe paat rquiinda." <sup>21</sup> Tsoode to sca lozhd gacniats to dien cho xnëz miech guidzliu rii no to, golguien ganle grë-taa ncuuañe no, laa Dios psana par yquiina lo to. <sup>22</sup> Zig nac guidzliu, guielmban, guielgut, ladznia to now, nicle ncuuañe no niinaw, ncuuañe naragaa ziaada, chen tow; haxta Pabl, Apol, Pedr, ib laa no zo nu par dziuun no xyudar to. <sup>23</sup> Grëse to tibaque xnëz meñ ne no to, lëë meñ co nac Jesús, meñ ne pxeel Dios.

#### Zha rzac zha ne rienee xtiidz Dios

**4** Golguien sca tib moz winse nac no lo Jesús, laa me bzoo no noseed no miech xtiidz me miñe gocnannd miech padzeela. <sup>2</sup> Ni zha ne gon znu run tib dziin, ible none nguzobdiidz gac zho lo meñ ne rnabey zho. <sup>3</sup> Gacxe waa tel zha rzac to naa, tel zha rzacgaa grëraa miech naa, peet zienied guic naa. Haxta ni miñe rzaac naa nac naa, peet nonda, rieguiald guiep naa znutaa znutaa nac miñe noyuu naa. <sup>4</sup> Nli peet dzeb nonied guic naa guiep naa nend cho pe glisqui lo naa, per led miñcod gni naa ni tib dol rapdraa naa; loxaque Dios nan zha nac naa, me gneedz miñe gagual naa. <sup>5</sup> Gacxe waa, gunde to ne glole to guiab dien cho nac zha ne wenraa; sac miñ co gun meñ ne rnabey ne gal dze ne laa me guiaad. Gal dze co, me cxobnen ganle zhapaa nac ne tib tib ne, haxta grë miñe rza guic ne, miñe no zdoo ne, laaw glu me; grë no ne nodziuuun no xtsiin me, dze co laa me gneedz miñe riogualpaa no tib tib no.

<sup>6</sup> Bets, bzian, niina ne nozet naa no lo to nu grop no Apol, quiayunnon naa naa, niicle nosanwindgaa naa me. Ga sca ganle golwi, zeena cseed to gban to zigne nac Xtiidz Dios, tsoode to lozhd dien cho non, chogaa nond. <sup>7</sup> Stiba, zcho nadien në lo to ne gunnon to to? Grë ncuuañe rap to, grë ncuuañe rac to, zniacxe led Diosd bneedza lo to? Dios name bneedza lo to, zpe nac dzigo no to rlozhd gacniats to zig nac zeene por xquiefliger to bgaa tow? <sup>8</sup> Niats rac to, masaque rzac to grële zhiwseed Dios nan to, gaxle zo to lo me, haxta rzac to tole nac zha rnabey, paat rquiindraa no. Wen-

zhe tebaa nligaa zha rnabeyle nac to, zeena haxta ye no zley no.

<sup>9</sup> No hor rzaac naa, diunavez win psan Dios no ne nac no zha ne nonee xtiidz me, loxaque lo no rwi miech, rwi grë anjl dien zha rac no; zig run miech rieso zho lo zha ne rnabey zho ret. <sup>10</sup> Ne znu quiadziuuun no xtsiin Jesús, masaque zha yozh nac no lo miech, laa to gon xquizh me zha rien nac to lo zho. Zha nsis, zha zozhidzle rzoob zho no, laa to zha ndaan, zha ndip nac to. Masaque zha nziuu nac to lo zho, laa no rzac zho ni gand zho lo no. <sup>11</sup> Haxta lo nadze blactaa zaatne retgbin no, zaatne retnis no, per ni lidz no, per ni lar ne dziaacw no guiend, rdib rdzaag no rdziuuun no dziin rdziniaa no ncuuañe rquiin no. <sup>12</sup> Ni rlozh ga rrieque miech rsacsi zho no. Rriequia zha ne rdzibdee no, per rdziuuunnd no gdzibdeequ no zho, sinque mazd rnab no lo Dios gunlay me zho; zha ne rtsidil no, rdziuuuncasd no zho. <sup>13</sup> Rriequia zha ne në rnee lo no, per no, diidz wen rtsire no lo zho. Masaque rzac miech no, zig rzac zho grë ncuuañe paat rquiindraa, zig rzac zho grë ncuuañe nole lo guizh.

<sup>14</sup> Laa naa rzet grë miñ rii lo to, per nacda par gunc-toladz naa to, sinque laa naa rzeta zeena guien to zacse gac to, golguien ganle rleyne naa to, rzaac naa to zig tib xpëed naa. <sup>15</sup> Niicle niaca miñe ndal zha ne guidseed to i, niicxe guiaad nzian mil zho waa, per led grëd zho tsoxcopaa to zig rioxco tib dad xpëed zho. Zigne rne naa ga, xpëed naa nac to, rriequia pxoz to nac naa, sac gon naa glo bialne xtiidz Dios lo to, laa to bzëeb xnëz Jesús. <sup>16</sup> Goltsoxco sca, golban zigne mban naa. <sup>17</sup> Ni ible miñcopaa gon laa naa rxe! Timoté ziaad lo to i, lëë stib xpëed naa i, ne nligaa rleyne naa me, tib zha nguzobdiidz nac me lo meñ ne rnabey me. Laa me ziaad i, me gzodiidz lo to ganle zigne rseed naa miech grëse zaatne ziyateed naa, scagaa noxco naa mban naaw.

<sup>18</sup> Rien naa no bla niats ne nac to i, rzac nlidraa guial naa lo to i stib. <sup>19</sup> Gacnan zho ganle, gneedzse Dios didz, ible laa naa none guialniob, dzigo bii zdziañ ne dien pe nli na nacnie zho xpoder Dios, te loxaque rnee zho ye. <sup>20</sup> Sac gon zha ne ngab xnëz Dios, grë miñe rnee zho none glu nacnie zho xpoder me, nacda loxaque diidzse. <sup>21</sup> zTo nadien zha racladz to? zPe rdziladz to guial naa guialgactox naa lo to i, te mazd wen ye niapse diidz ndooladz, diidz nex guialne naa lo to?

#### Zha ne runctal xtol

**5** Zëeb diidz gon, lad to i no tib zha bgui ne quiayun tib dol nroob; per ni grëraa miech ne gard gliladz Xtiidz Dios runnd miñ co. Bin naa lëëque xniaa pchoob zho quiangob zho. <sup>2</sup> ;Yo na ne rzac to grële zhiwseed Dios nan to, gaxle zo to lo me! ;Laa ne ctoladz to, laa ne tso to guielnë, cuee to zha qui lad to, lel no to rlozhd gacniats to!

<sup>3</sup> Niicle ne zozhaald naa lo to i, per zeene bin naaw tibaque nonie guic naa zha gaca. Nu laa naa gni lo to ganle zha rieguial gac zha co: <sup>4</sup> Grë to ne nac to zha ne ngab lo Jesús, rnab naa lo to ycaalsa to zigne rnabey

me. Ndionle ne ganle zeene laa to ycaalsa, ga zo Jesús lo to, scagaa naa, golgun cuent lo to i zo naa. <sup>5</sup>Squi ndxie to grè to, golzonèz zha co, golcueegazh zho lo to i, tsie zho tsietsobe zho ladznia menox, ga tednè xcuerp zho guien zho ganle pe noyun zho; nannd new togo zzhixcuaa zho stib, zeena ycaania Jesús zho gal dze ne laa me gbiire guiaad.

<sup>6</sup>XLèse gon squitaa racniats to rzac to zha mbe nac to, ni rannde to zha ne quiayun dolldox qui! iPe riende to telne glisquide to miñe quiayun zho, ib tedsod zrieequiaraa zha ne squi gunctal xto! <sup>7</sup>Zha ne squi nac, masaque nac zho zig nac grè guielguidzdox ne znuse rded; golcueegazh zho sca, zeena iñe mbe gac to nèz lo Dios, tete to guielguidz qui. Golguien ganle laa Jesús psanmbele ne, miñcopaa gut me, goc me gon nèz lo Dios zig carner yeen ne rgogon zho lo me Ini Pascw. <sup>8</sup>Golgotsoo gban ne zigne racladz Dios, grèse tel zha wban ne glo, grèse guielyozh, grèse guielntseeb ne bdziun ne, none csaan new grèsew. Ndzinli sca golgac, goltsienal miñe nac diidzli; none mbe gac to nèz lo Dios, zig quietxtil ne notsd ncobi.

<sup>9</sup>Lo stib guits ne pxel naa lo to ga, laa naa psole diidz lo to ganle ctsieelsade to grè miech yozh ne ndzinlid mban. <sup>10</sup>Zeeñe sca pso naa diidz lo to, guiabde to togo naca parne ctsieelsadraa to grè zha ne gard gliladz Xtiidz Dios, zha ne rquiangob zha ne led tseield, grè zha ne zienal loxaque gunlo dimi, grè zha ne run guielg-baan, grègaa zha ne rnalo grè mdio. Led zha coda, sac laga mban ne lo guidzliu rii, ible zanlsa ne grè ne zho. <sup>11</sup>Sinque zha ne bzet naa ga ctsieelsade to, nac zha ne nacle diidz xnèz Dios no zho, ni noque zho quiayunctal zho xto! zho, no zho rquiangob zha ne led tseield zho, no zho zienal loxaque gunlo dimi, zhiga zhiga laa ne gleynie zho Dios lel zhaa ncuane rleynieraa zho, no zho rquiadiidzguizh samiech, no zho rzudz, nogaa zho run guielg-baan. Ne nligaa zha ne sca nac, per ni tib guielwagw gowniede to zho. <sup>12</sup>Tel grèraa zha ne gard gliladz Xtiidz Dios, led ned riogual glisqui miñe quiayun zho, Dios nac men ne gunquizh zhow.

<sup>13</sup>Sangue zha ne nacgrè ne, zeene noyun zho tib ncuane ndzinlid, ib riogual glisqui new lo zho. Gacxe nana sca, zha ne squi quiayunctal xto! i, golcueegazh zho lad to, ni spalal ganndzedraa to zho.

### Zha none gac guielwxtis

**6** Laa to gocnanle ganle, to riogual glisqui tel pe nac ncuane nonguield run zha ne nacgrè to. Lèda i gon run to, zeene pe tib dil rap to, lèlèd zie to lo wxtis laa ne gbig to lo zha ne nacgrè to, zha csiooglo lo xtil to. <sup>2</sup>iNiacxe nannde to zha ne ngab xnèz Dios, zha co cobey zha nac xto! grèraa miech zeene gal dze ne laa Dios gnabeya? iPe nac dzigo grielod tose csiooglo lo tel pe dil win ne rap to? <sup>3</sup>Haxta grè anj name, ne gon cobey pe nac grè miñe quiayun zho. Gacxe waa, grè dil ne rac lo guielmban rii, ne riogual cobey zha guiooglo low. <sup>4</sup>Sca gon gon to, led node to, rnadse pew laa to ziele lo wxtis. <sup>5</sup>iPe ni tib lè guielto guien lo to? Lo grè to, i niacxe goon guien zha ne

grielo gnee lo to, cuèz lo xtil to? <sup>6</sup>Nazdpaa rdziladz to dil, ipe i na lèèque zha ne nacgrè to quiadiñie to, ni rlozh ga zieque to zienie to xtil to lo zha ne riladz Dios? <sup>7</sup>Pe riende to tib guielto doxle i squi no to lèèque to quiadiñsa. Mazd golxecw tel cho pe run to.

<sup>8</sup>Mazdraa gon mbana squi no to rsacsi to miech, ni haxta zha ne nacgrè to rsacsi to. <sup>9</sup>Nanle to ganle zha ne squi run guielntseeb, grielod gdziñ zho zaatne rnabey Dios. Tsieniewguite guic to sca. Golsoladz ganle grèse zha ne run guielyozh:

zig nac zha ne rquiangob zha ne led tseield zho,  
zig nac zha ne rquiangob zha ne nole tseiel,  
zig nac zha ne nac mrash,  
zig nac zha ne rnalo grè mdio laa ne gnalo zho Dios,  
ni tib zho grielod gdziñ zaatne rnabey Dios. <sup>10</sup>Scaque:  
zha ne nac ngbaan,  
zha ne zienie guic loxaque dieñ zha gunlo dimi,  
zha ne nac ngonziu,  
zha ne rzhixcuaa diidzguizh,  
zha ne runguet miech par cuan zho zho;  
ni tib zho ygaad guielnzaac co. <sup>11</sup>Blalaa to bio lo grè dol co glo, sangue niina miech mbele nac to nèz lo Dios, laa Jesús ni Espiritu Sant psanle to zig tib zha ne peet xto!d, laa me psanwenle to nèz lo Dios.

### Gunctald zho xto! zho

<sup>12</sup>Nli ndal ncuane zac gon ne, gunctalda xto! ne, ni-icle choot rcadgaaw, per led grèda rquiin. Tel naa, ni-icle no ncuane zrielo gon naa, per runnd naaw; sac racladz naa guien naaw, lozh ga lèew gnabey naa.

<sup>13</sup>Zèeb diidz rnee zho: "Laa guielwagw biaan par gow miecha, scagaa zdoo zho laaw biaan par tsodzèw guielwagw." Nli scaw, per guiabd ne togo por min co lega gowcho ne. Pa rquiin ne lega tedso gow ne, sac gon zigtaa zdoo new, zigtagaa guielwagwa, zdziñ dze ne gnitlo Dios. Guielwagw ga na, sangue grè guielyozh nerun miech rquiangob zho zha ne led tseield zho, biaan ne par dziun ne min co, sinque laa ne biaan par gban ne zigne rdziladz Dios, sac me rnabey ne.

<sup>14</sup>Tel new nitlod ne, sac gon zigne bleeban Dios Jesús con poder ne rap me, scaque zbeeban me ne zeene laa dze co gdziñ.

<sup>15</sup>Golgacnan ganle, rrieequia lèe tiblè xcuerp Jesús nu gon nac ne tib tib ne. Nana, ipe nonguielda ga dzigo gdzieel tib lè xcuerp me ga xcuerp tib wnaa ro nèz?

iNonguielda gon! <sup>16</sup>Sac gon zha ne raanie tib wnaa ro nèz, rrieequia tibaque rac zho ga grop zho wnaa co. Rnee lo Xtiidz Dios, par me: "Zeene laa mgui racgrop tib wnaa, tibaque miech rac zho ga grop zho." <sup>17</sup>Sca-gaa zha ne rzèeb xnèz Jesús, tibaque rac zho grop zho me, zhiEspiritu me racnie zho.

<sup>18</sup>Gacxe waa, gunde to guielyozh yquiangob to zha ne led tseelde to. Lo grè dol ne no, min riise nac miñe xcuerppaa miech rguitnie zho. Sac gon zha ne run guielyozh co, masaque rsanbeed zho zho ga.

<sup>19</sup>Golguien ganle, zha ne nole xnèz Dios, masaque zha nac zig tib yadoo zaatne rbèz Espiritu Sant, Espiritu ne rdeed Dios rbannie zho. Led nedraa rnabey xcuerp ne,

<sup>20</sup> Diosle rnabeya, sac gon bzhiiile me ne ni nroob gocnon ne lo me. Gacxe waa, zigtaa xcuerp new, zigtaa xpensar new, gotsaa yquiin new par cxobnen ne ganle pa lotaa men nroob nac me.

### Rtsire Pabl lo zhiwnabdiidz zho

**7** Lo guits ne pxeel to lo naa, nzian ncuane rnabdiidz to, nu ganle laa naa ctsire lo wnabdiidz co: nli wena, telne niaca mine grieelow ctsieelniad ne. <sup>2</sup> Per parne tsod pe yquiaaqui cho gon guelyozh, tsonie zho zha ne led tsieeld zho, mazd wena zigtaa mguiw, zigtaa wnaaw ctsieelnia zho, tib tib zho gbanniese zho tsieel zho zigne rieguiala.

<sup>3</sup> Zha ne ptsieelniale, zig nac mgui none gnee zho lo tsieel zho zeene racladz me, scaquegaa wnaa zeene racladz tsieel zho gnee lo zho none siguiel zho. <sup>4</sup> Sac gon wnaa ne rtsieelnia, led zhadraa rnabey xcuerp zho, sinque tsieel-le zho rnabeya; scaquegaa mgui zeene laa zho rtsieelnia, tsieel-le zho rnabey xcuerp zho. <sup>5</sup> Golguien sca, niicle mguiw niicle wnaaw nodne yca zho xcuerp zho lo tsieel zho. Laa telne rzacgaa zho none yquind zho tsieel zho tib blalaa dze, sac rquiabladz zho gzodiidznie zho Dios, wena totsaque guiaan zhow diidz grop zho. Per zigne ted ga, gbi-ireque gnee zho lo tsieel zho, sac gon zha ne grieelod cxcw, nend ccheep mendox zho gon zho guelyozh.

<sup>6</sup> Ne znu rne naa lo to, guiabde to nagon togo rne naa nopaa ctsieelnia to. <sup>7</sup> Tel naa, rzac naa wena tebaa grese to znu ctsieelniad, zigne nac naa; per na ncuane gacd ga, sacne zhaase zhaase nac ne tib tib ne. No zho pso Dios ctsieelnia, nogaa zho pso me ctsieelniad, per rley zho mban zho zigne nac zho. <sup>8</sup> Zig nac gre zha ne bii tib, gregea zha ne gutle tsieel, wena tebaa grieelo scase guiaan zho, <sup>9</sup> per telne rien zho lebd xcuerp zho, dzigo mazd ctsieelnia zho. Mazd wena ctsieelnia zho, ledle so zho tib zho ni tel rec rdzu zho.

<sup>10</sup> Sangue zha ne ptsieelniale, laa naa rso diidz lo zho csaand zho tsieel zho, ni nacda xtidz naa, sinque ible sca rnabey Dios. <sup>11</sup> Laa tel zha ne guiaabgaa csaan zho tsieel zho, zaca, per leeraasi grieelodraa gbiire ctsieelnia zho, mazd mine naca telne zrieelow ycatsieel zho stib, o guiaangaa zho tipse zho.

<sup>12</sup> Nu na ganle laa naa gnegaa chop lan xtidz naa lo zha ne led yed tsieel rliladz Xtiidz Dios; tib diidzse naca gni naaw, nacda mine rnabeypaa Dios. Zha bgui ne mbannie tib wnaa ne rliladz Xtiidz Dios, per telne rio guic wnaa gbannie wnaa zho, nodne csaan zho wnaa.

<sup>13</sup> Scaquegaa wnaa ne mbannie tib mgui ne rliladz Xtiidz Dios, nod csaan zho mgui co telne riopaa guic mgui gbannie mgui zho. <sup>14</sup> Zigtaa mguiw, zigtagaa wnaaw, zha ne sca mbannie tib zha ne rliladzle xtiidz Dios, ye zho runlay Dios ga, nenda haxta zio dze ne ye zho gliladz xtiidz me. Sac telne ctso zho, laa ne gbigraa xpeed zho lo Dios, lel znu sozit meed. <sup>15</sup> Nana, telne zhalgaa zha ne rliladz Xtiidz Dios ga, rnab csaanisa zho, peet nacda maase ctso zho, nod pe nacne gzoobguicpaa tsieel zho lo zho cuetz zho. Sac gon zha

ne rliladzle Xtiidz Dios, laa me bredz zho parne zaacse gban zho, bredzd me zho par tsodil zho; <sup>16</sup> stiba, nand zho dien pe zdzin dze ne gliladz tsieel zho Xtiidz Dios.

<sup>17</sup> Mine naca tib tib to goltsoxco gon to mine rdziladz Dios. Zigtaa zha ne pso me ctsieelnia, zigtagaa zha ne pso me scase guiaan, sca none gac to; scagaa zha ne ncaatsieel-le zeene rliladz zho xtiidz me, none sca guiaan zho niicle telne rliladz tsieel zho xtiidz me. Grese zha ne ngab lo me, diidz rii rso naa lo zho. <sup>18</sup> Zig nac gre zha ne nole bey xcuerp zeene laa zho rzeeb xnhez me, sca no zho bey co gund zho ne yqueets zhow. Zha ne na nodgaa bey co zeene rzeeb zho xnhez me, scaque nod pe nacne tsopaa zho bey co. <sup>19</sup> Mine mazdraa non lo me, gban zho zigne rdziladz me, guienndraa ne dien cho no bey, chogaa noda.

<sup>20</sup> Zigne rneque naa ga, grese zha ne rzeeb xnhez Dios, tel zha nac zho zeene laa me bredz zho, scase none guiaan zho. <sup>21</sup> Zig nac zha ne nac ngundziin lo ben, peet tsienied guic zho guiab zho dien zha grieel zho ladznia zha ne rnabey zho; per telne gdeeda diidz, zac tsoxco zho dien zha grieel zho lo zha co. <sup>22</sup> Zha ne sca nac ngundziin lo ben zeene bzeeb zho xnhez Dios, guien zho ganle rriequia zonlaale zho, sac gon laa Jesus psilaale zho lo gretaa dol ne bio zho. Zha ne nacdgaa ngundziin lo ben zeene bzeeb zho xnhez Dios, guien zho ganle tib ngundziinle nac zho lo Jesus niina, me rnabey zho. <sup>23</sup> Golguien ganle, grese to laa Dios bzhiiile to ni nroob gocnon to, gacxe waa mele rnabey to; ni toгаа, lo me none gon to dziin, gdeete to diidz lega gnabey miech to. <sup>24</sup> Sca nasca gon bets gaca, tib tib to zigne nacse to zeene bzeeb to xnhez Dios scase no gban to, ine gleynie to me.

<sup>25</sup> Stib wnabdiidz ne run to ga dien zha gac zha ne gard ctsieelnia, gneli naa lo to ganle, guiennd tib xley Dios mine gnabeypaa dien zha gac zho. Per golquiaadiag mine gne naa nu ganle zha rzaac naa, nanle to ganle, zha ne znu rquia zdoo Dios rbedz me, mine rquiin min co rnee zho. <sup>26</sup> Gre ne ne nac ne zha ne rliladz Xtiidz Dios len dze rii, nligaa ngan nac lo xquielmban ne, gane zoot naa wena zha ne sca gard ctsieelnia, maase guiaantib zho. <sup>27</sup> Zha bgui ne na ptsieelniale, grieelod gni naa guiaantib zho; sca mbannie zho tsieel zho; per tel zha ne gard ctsieelnia, mazd sobd guic zho ctsieelnia zho. <sup>28</sup> Zha ne racladzpagaa ctsieelnia, zigtaa mguiw zigtaa wnaaw, led dol ga gon zho telne laa zho ctsieelnia; per gacnan zho ganle, zeene laa zho pcatsieel-le, ib tedsod nroob guienne ne gan zho por gre mine noyac len dze rii.

<sup>29</sup> Mine none guien to: zhisle nac dze ne so ne lo guidzliu rii, led nroob nac ngbidz ne grieelo dziuun ne xtsiin Dios; gacxe waa, zha ne nole tsieel, mazd sac zho zho zig tib zha ne guiennd tsieel. <sup>30</sup> Zha ne quianie dimiw, zha ne no guiebleya, zha ne nogaa guiennew, gdeete zho diidz yca gre ncuuan co lo zho par gon zho xtsiin me. <sup>31</sup> Zha ne bienle runfalte gretaa ncuane rquiin zho, gdeete zho diidz ctse gre ncuuan co lo zho,

sac zigtaa guidzliuw, zigtaa grë ncuuañe no low, zdziñ dze ne nitlow.

<sup>32</sup> Miñe racladz naa peet zhgab ctsed lo to. Golwi ganle, zha bgui ne tib, tiblque zienie guic zho ruñ zho miñe rdziladz Dios, miñe nac xtsiñ me. <sup>33</sup> Laa zha ne no tsiel, grielodraa sca gac zho, sac laa guic zho zienie zha gbannie zho tsiel zho, zha grielo guñ zho miñe rdziladz me, miñ co rionieraa guic zho. <sup>34</sup> Scaque grë meñ wnaa, zha ne tib, rioxcoraa zho ruñ zho miñe rdziladz Dios, dib nacse zho rbeeladz zho zho lo xtsiñ me. Laa zha ne ptsieelniale, xco ne dieñ zha gbannie zho tsiel zho, dieñ zha grielo guñ zho miñe rdziladz tsiel zho, xco co rioraa zho.

<sup>35</sup> Laa naa rne miñ rii lo to, per guiabde to togo rca naa ctsieelnia to, sinque laaw rne naa parne guieñ to zha guñ to, zeña grielo zaacse gac to guñ to miñe rnabey Dios. <sup>36</sup> Zha ne quianie wnaa nguieg, telne rzac zho nonguielida ga scase ted lo xquielnguieg xpëed zho, sinque none ctsieelnia zho, peet nacda, led doñd ga ctsieelnia zho. <sup>37</sup> Laa telne rzacgaa zho, wenraaw ctsieelnia xpëdwanaa zho, ible scale pquiabladz zho guiaañ mëed, wenaque ga telne sca rzac zho. <sup>38</sup> Wen ga guñ zha ne sca gdeed diidz ctsieelnia xpëdwanaa, per mazdraa wen ga guñ zha ne rzac mazd ctsieelnia xpëed.

<sup>39</sup> Nana, wnaa ne retgaa tsiel, nli zeñe mban tsiel zho rnabey ley ne tsielse zho gbannie zho; per zeñe laa tsiel zho ret, zac ctsieelnia zho tel cho stib mgui ne racladz zho, totsaque zha ne noque xnëz Diosa.

<sup>40</sup> Per tel naa, rzac naa mazdraa wen gban zho telne tsodraa guic zho ctsieelnia zho stib; sca nagon rzaac naa wena, ni led xtiidzde naaw sac rien naa led tibd naa, Espíritu Sant nacie naa.

### Bëel ne rgogon zho lo mdio

**8** Stib wnabdiidz ne ruñ to ga, dieñ zha nac guielwagw ne rgogon zho lo grë mdio, pe zrieelo gdiowa, te grieloda ye. Zootle na grële to nan miñ co; per no hor zeñe squi rzac ne grëlew nan ne, lel racniats ne, laa ne gacndooladz ne gnee ne lo grë zha ne nacgrë ne dieñ zha guñ zho parne tsoquicraa zho Xtiidz Dios. <sup>2</sup> Zha ne rzac grëlew rac zho, ga rlu zho ganle peet rienñ zho. <sup>3</sup> Tel Dios runbey me tib tib miech, nanpaa me cho nac zha ne rlynie me.

<sup>4</sup> Zhapaa dzigo gaca, ¿pe wena dioow ne xpëel grë ma ne rgogon zho lo mdio ga, te wenda ye? Ndionle ne ganle grë mdio ne riegañ miech led Diosd ga, tibaque meñ ne nac Dios no. <sup>5</sup> No zho rzac nziandox Dios, nziandox meñ rnabey no, no me no gbaa, nogaa me no lo guidzliu, <sup>6</sup> sangue ne ndion ne ganle tibaque Dios no, lëe meñ co nac Pxoze ne, me psañ grëtaa ncuuañe no, me psañ ne parne dziuunbey ne me. Ni scaquegaa, tibaque meñ ne rnabey ne, lëe me ga nac Jesús, me bzaa grëtaa ncuuañe no, me nac meñ ne rneedz xquielmban ne. <sup>7</sup> Per no zha ne riladzle Xtiidz Dios, bii gardaque guieñ zho ne tibaque Dios no. Tibaque rzac zho mban mdio, gane zeñe rquiin zho bëel ne rgogon zho lo mdio racchop guic zho, lëeque

zha runctal xtoñ zho ga sca ruñ zho. <sup>8</sup> Golguien sca, tel Dios rwid me dieñ cho pe row. Guiabd ne togo por gow ne o gowdgaa ne bëel co laa ne guianziuu lo me.

<sup>9</sup> Laa to nanle nasca, peet nacda yquiiin to guielwagw co, per scagaa golcobey adel miñ co yquiaaqui guñctal to xtoñ tib zha ne squi bii racchop guic. <sup>10</sup> Sac gon, nenda tibliladz to zob to zaatne riegañ grë miech mdio no-quiiin to bëel co, ni gan tib zha ne bii racchop guica. Zeñe gan zho to, nend yeque zho gbig gow zhow, per zeñe lozh ga tibaque laa guic zho tsienie lëda ga been zho. <sup>11</sup> Zha ne sca guñ, niicle ne nli rien zho peet nacd ncuuañe noyuuñ zho ga, per por zha laa zha co guñctal xtoñ. Guñscade to, golguien ganle ye zho ga psilaa Jesús zeñe gut me lo cruz; <sup>12</sup> gacxe waa, telne sca guñ to por to yquiaaqui guñ zho tib ncuuañe rzac zho nonguielid, lole Jesús ga quiayuñ to falt. <sup>13</sup> Miñ co nagon, tel naa mazd maase gowd naa bëel co, telne por miñ co yquiaaqui guñctal naa xtoñ tib zha ne nole xnëz Dios; sac lëda ga guñ naa gac naa zig tib quie ne griel ni zho.

### Miñe rieguañ zha ne ruñ xtsiñ Dios

**9** Zigne nagon zac guñ to grë ncuuañe wen ne racladz to, scaquegaa naa, zac gnab naa ncuuañe wen ne racladz naa. Tel naa gonlo naa Jesús meñ ne rnabey ne, Dioszhal bzo naa pxeel me naa none naa Xtiidz me. Ne squi ptsëe Dios lo xquielmban to zeñe bialseed naa to, i rlu ganle me nacie naa.

<sup>2</sup> No zha ne rzac nliid Dios pxeel naa, sangue to nanwen to ganle me pxeel naa, sac gonlo to miñe ben naa, miñe blu naa; ni scagaa niina, lo xquielmban to i rlu ganle ne nli xtsiñ me quiayuñ naa. <sup>3</sup> Grë zha ne sca rzac nliid Dios pxeel naa, rzac zho peet raguiald naa, gacnañ zho ganle: <sup>4</sup> ¡Raguiañ naaw gon! Ni grëragaa zha ne rdziuungza no xtsiñ Dios, rioguañ no gneedz to ncuuañe yquiiin no, gneedz to zaatne gbiaaz no. <sup>5</sup> Tel naa, haxta raguiañ yquianie naa tib meñ wnaa ne gac tsiel naa, iñe sënne naa me zigne ruñ grëraa zha ne rdziuungza no dziin rii, zig nac Pedr, zig nacgaa grë zha bets meñ ne rnabey ne. <sup>6</sup> ¿Te loxaque grop no Bernabé naye znu zhaaque no dziuun no stib dziin, par gdziniaa no ncuuañe dioow no? <sup>7</sup> Golgan ganle, zig nac zha ne rzëeb lo xtsiñ menguiib, ¿niacxe zhaa lo dziin ne rdziniaa zho ncuuañe row zho rio zho lo xtsiñ menguiib? ¿Zha ne rangaa, niacxe rieguañd zho yquiiin zho ncuuañe rac zaatne ran zho? ¿Zha ne na rangaa ma, niacxe rieguañd zho yquiiin zho ma zigne racladz zho?

<sup>8</sup> Guiabde to togo bod guicse naa riab miñe rne naa nu, golgan ganle haxta lo ley ne psañ Moisés <sup>9</sup> no tib zaatne rnee: "Zeñe guñcuñ to xcon to dziin gzëeni ma mzion zhobxtil gacmbew, code to guix ro ma, golsaan gow ma miñe ygaa ro ma." Golwi ganle zha rnee Dios, nana pe nan to ngonse rquia zdoo me. <sup>10</sup> Lëda gon, grëse ne rquia zdoo me ne. Ga rlu me ganle, zha ne ruñ xtsiñ me, ible rieguañ zho ycaa zho miñe non xtsiñ zho. Zig nacaque guielgon, zigtaa zha ne rana, zigtagaa zha ne runmbe grë guielnzaac co, ible rieguañ

zho yquiiin zhow. <sup>11</sup> Teĭ no, rrieequia nazho tib gon i bdziuun no biadseed no to Xtiidz Dios, ħniacxe riogu-iald no dzigo gneedz to ncuuaņe yquiiin no?

<sup>12</sup> Blalaa zha ne nale griiņ riaadted lo to i, rnabey zho to rdeed to ncuuaņe rquiiin zho, ħpe leĭ no dzigo riogu-iald gnaba lo to? Mazdraa gon rioguial no gnab now, per haxta lo nadze gard dziuun no miņ co, notaa naņ zha rdziniaa no ncuuaņe rdioow no; zeena guiaand zdoow to, lozh ga laa to csaan miņe nac Xtiidz Dios.

<sup>13</sup> Led nanle to ganle, grē zha ne ruņ dziin leņ xyadoo Dios, psan me diidz grē ncuuaņe nac gon, ga xeņ zho pe yquiiin zho, zig nac zha ne ruņ dziin zaatne nac lo pcoog, lo ncuuaņe rielogon miech ga, ga rdioob ncuuaņe row zho. <sup>14</sup> Ni scaquegaa psan Jesús diidz, zha ne cseed miech Xtiidz me, ib none lo dziin co gdziniaa zho pe yquiiin zho. <sup>15</sup> Per teĭ naa gon, wialtaa peet gard gnab naa lo miech.

Laa naa rzet miņ rii lo to, per guiabde to togo ruņ naaw parne csilo to pe gneedz to lo naa. Ib zanaĭd naa miņ co, sac rley naa znu quiayazhd naa quiayuņ naa xtsiiņ Jesús, mazd maase guetgbin naa, lēdle ctiche zho guieĭbley rii lo naa. <sup>16</sup> Niicle ne znu quiayazhd naa quiayuņ naa dziin rii, per ni lalnu racniatsd naa, sacne ible laa Dios bzo naa par gne naa Xtiidz me lo miech; ni, ħprobsaxe naa teĭne gned naaw! <sup>17</sup> Noyuņd naaw par dien pe premio ygaa naa, sac zig rne naa ga Dios bzo naa, me rnabey naa quiayuņ naaw, masaque nacse naa zig tib nguņdziin. <sup>18</sup> Par naa, lēēle premio nu nac guieĭbley rii ne znu liga quiaseed naa miech Xtiidz Dios, rnabd naa gneedzpaaw zho ncuuaņe yquiiin naa niicle ne raguial naa gnab naaw.

### Tsoxco zho ygaa zho premio

<sup>19</sup> Stiba mazdragaa wena, znu choot noneedzd ncuuaņe yquiiin naa, sac sca grieelod cho gnabey naa; per niicle ne nagon choot rnabeyd naa, zhaal naa rac naa zig tib nguņdziin lo grēse miech, parne gdeeda diidz tso guic zho sēēb zho xnēz Jesús. <sup>20</sup> Gacxe waa zeene no naa lo grē zha Israel, rac naa zigne rac zho, zeena tso guic zho gliladz zho cho nac Jesús. Zeene no-gaa naa lo grē zha ne zienaĭ xley zha Israel, niicle ne rnalodraa naa ley, per ruņ naa grē ley ne zienaĭ zho, zeena sca grielo yquiabladz zho sēēb zho xnēz Jesús. <sup>21</sup> Scaquegaa zeene no naa lo grē zha ne ruņbeyd ley co, rioxco naa rac naa zig tib zha ne ruņbeyda; per guiabd ne togo haxta grē ncuuaņe rleyniedraa Dios ruņ naa. Laa naa ruņ miņ co, zeena ye zho sēēb xnēz Jesús. <sup>22</sup> Grē zha ne pense quiayacnaņ zha nac Xtiidz Dios, zeene no naa lo zho, ruņd naa gne naa grē ncuuaņe gard guieņ zho zha nac, ruņd naa csanwin naa zho, sac miņe rioxco naa lozh gliladz zho cho nac Dios. Tib tib miech, rguib naa rac naa zigne rac zho, parne grielo gzodiidz naa lo zho cho nac Jesús, zeena gacnaņ zho zha sēēb zho xnēz Dios. <sup>23</sup> Laa naa ruņ miņ co, parne gdeeda diidz gnee naa Xtiidz Dios grēse lo miech, ni scagaa, gley naa gan naa ye zho ygaa lo guieĭndzon ne zhobnee lo Xtiidz Dios.

<sup>24</sup> Nanle to ganle zha rzac zha ne rie tib lo corr, nzian zho nac zha ne rie per tibaque zha ne ruņ gan, zha co rcaa tib premio. Golgun cuent nasca tib lo corr i no to, grēse to goltsoxco xoon to zeena grēse to ygaa tib premio. <sup>25</sup> Grē zha ne sca rio tib lo wguite, par grielo gun zho gan rioxco zho raņ zho xcuerp zho, ruņd zho ncuuaņe csiaab xfuers zho. Nroob cuidad ne rap zho zho par gun zho gan tib coron guizh nguia ne znuse rgool. Scase nac premio ne rgaa zho, sangue ne gon, laa ne noxco ygaa ne tib premio ne gdziņd dze nitlo.

<sup>26</sup> Gacxe waa, teĭ naa tibaque noxco naa dien zha xoonraa naa. Nanpaa naa pa gdziņ naa, nacd naa zig zha ne riend dien pa gdziņ, zha ne lega rquiaagaa puñet, rdeete zhow zaatne no ygaaw. <sup>27</sup> Ni lalnu rdete naa diidz gac miņe racladztaaw xcuerp naa, tibaque rnabey naaw parne guieņa ncuuaņe nonguiel miņ co none guņa, led guņda ncuuaņe racladztaaw. Laa naa ruņ miņ co zeena gun naa gan, sac gon, guieĭtodox ga grieequia naa znu no naa none naa lo miech zha gun zho, ni teĭ lozh ga naapaze biaaņ bend naa gan.

### Nodne gleyne miech mdio

**10** Bets, bzian, golsoladz ganle zha bzhaac grē px-ozgol ne zha ne sca bzēnie Moisés ga. Pxeeĭ Dios tib xcow been ncal zaatne zieetaa zho, ni pteed me zho lo Nisdoo Nizhnie. <sup>2</sup> Zigtaa lo xcow cow, zigtaa lo nisdoo cow, masaque rrieequia lo co brobnis zho, parne tibaque niac zho niacnie zho Moisés.

<sup>3</sup> Grēse zho gon milagr nroob ne been Dios, bnabey me bliaaĭ quietxtil zhan gbaa bdeed me dow zho, <sup>4</sup> beencta me nis tib cho quie bdeed me go zho no zho dan bidz co. Lēēle Jesús ga bdeed nis co go zho. Lo zho ga zo me, rrieequia me ga nac quie ne bda nis go zho, sac mese rzhixcuaa lo grētaaw xliaadz miech. <sup>5</sup> Niicle scataa gon Dios zho, per led grēd zho bioxco nion xtiidz me, nacne ndal zho bnitlo bioliuse zho dan co. <sup>6</sup> Gase na ganle gotsaa gwi ne zha bzhaac zho, zeena gzoobladz ne dziuun ne grē ncuuaņe ndzinlid ne been zho. <sup>7</sup> Golguieņ gleyniede to mdio, zigne been zho. Rnee lo Xtiidz Dios: "Blozhse dow zho, go zho, laa zho psilo biee lo zhimdio zho."

<sup>8</sup> Gotsaa gwi ne ganle, pe guieĭnē ne bgaa zho zeene briequia bla zho lega bionie wnaa, tib dzeque bnabey Dios gut galptson mil zho. ħNi lalnu tsod guic to gun to miņ co! <sup>9</sup> Ib guņglēēde to Dios, sac zha, zeene benngulēē zho me, bnabey me briequia grē meel pquiaa maw zho, ndal zho gut. <sup>10</sup> Niicle glisquidgaa to teĭ pe nac miņe quiayuņ me, sac teĭ zha, sca been palal zho; nacne pxeelaque me anĭl ne rnitlo, ndal zho bnitlo anĭl co. <sup>11</sup> Sca nagon bzhaac grē pxoz gol ne ga, gotsaa guieņ ne sca dziuun ne miņe been zho, miņe been zho ga laaw zhobnee lo Xtiidz Dios parne gacndion new, guieņ ne zaacse gban ne, ne nac ne miech ne mban leņ dze rii ne znu ziaadyoble nitlo guidzliu.

<sup>12</sup> Gacxe waa, zha ne rzac mbanpaa zho zigne racladz Dios, none nsin so zho zeena guņd zho ncuuaņe guņctal xtoĭ zho. <sup>13</sup> Nli no ncuuaņe rcheep ne guņctal ne xtoĭ ne, per nacda ncuuaņe griiņ rien. Pe zhidaa miech



ne zieded lo miñ co. Tsod miñe guiab ne ib lëbd ne griee ne lo. Miñe naca none gnalo ne Dios, sac tel me ib csaand me guiab ne tib lo ncuaañe glëbd ne griee ne; sca nac xtiidz me, ni mesi goñ ctsëed me miñe rnee me. Me nac meñ ne gacnieñ ne griee lo griee ne low.

<sup>14</sup> Bets, bzian, gołguien sca ib none csaan to grë mdio, gnalodraa tow. <sup>15</sup> Miech nixbiini nac to, grë miñe rne naa lo to nu, nañ to ganle ncuaañe rquiina.

<sup>16</sup> Gołwi ganle, zeene rdioow ne quietxtil, rdio ne vin, rdziuuñ ne xtsee ne been Jesús ga, ga rlu tipse nac ne grë ne nacie ne me. <sup>17</sup> Niicle ne ndal nac ne, per ne tibaque quietxtil ne rdioow ne, miñ co gane tibaque cuerp nac ne grë ne, ni lëë xcuerp Jesús ga. <sup>18</sup> Scaque zha Israel, zeene row zho xpëel ma ne riogon lo Dios, ga rlu zho ne nacie zho me.

<sup>19</sup> Zha ne rnalogaa mdio, zeene row zho grë ncuaañe riogon lo mdio, scaque tibaque rac zho grë zho mdio. Per guiabde to togo mban mdio, togo mazdragaa nac bëel ne rgogon zho lo mdio. <sup>20</sup> Miñe racladz naa guien to, zeene sca ruñ grë miech pe rgogon zho lo grë mdio, lo meñdox ga rgogon zhow, led lo Diosda.

Gołguien sca, ib tsiesëebde to lo grë zha ne quaiyownie mdio, zeena gacniede to meñdox. <sup>21</sup> Lëdraaw ga goñ guñ to, tel rlozhse rquiin to xtsee ne psañ Jesús diidz ga dziuuñ ne, ni tsieque to tsieguie to, tsietow to zatne rownie zho meñdox. <sup>22</sup> ¡Guñscade to, guñglëede to Dios! ¡Gołguien ganle, lëbd ne dzian ne xquiełblëe me!

### Zha guñ zha ne riladzle Jesús

<sup>23</sup> Zig rne naa ga: "Nli zac guñ ne ncuaañe gacladzttaa ne, per led grëda nonguiel." Tel naa, zrieelo guñ naa ncuaañe gacladzttaa naa, per led grëda yquiin par guñ naa xyudar grëraa zha bets ne, lozh tsoguc zho Xtiidz Dios; <sup>24</sup> sac goñ, ib none dzioxco ne grëraa zha ne nac-grë ne. <sup>25</sup> Zig nac grë bëel ne rdo lo lgui, zac gow tow, ib guñde to gnabdiidz to dien zha naca, sac goñ nend bëel ne biogon lo mdiow, dzigo laa dzeb co tsonie guic to. <sup>26</sup> Gołguien ganle, Dios psañ guidzliu, scagaa grëtaa ncuaañe no low chen me naca.

<sup>27</sup> Zeene tel zha tsiegaa to tib wagw lidz tib zha ne gard gliladz Jesús, bëel ne gneedztaa zho gołgowa, per scaque gnabdiidzde to dien zha naca; zeena peet dzeb tsonied zdoo to. <sup>28</sup> Per telne grieequia tib zha ne gnë bëel ne biogon lo mdiow, gowde tow; zeena csande to zdoo zho. <sup>29</sup> Niicle ne ndionppaa ne led dołd ga guñ to gow tow, per zha ne gaña ga sadoł zdoo zho.

Nana gnë to: "¿Pe nac dzigo por stib zho grieelod guñ naa miñe racladz naa? <sup>30</sup> Tel rded naa xquizh lo Dios zeene pe tib guielwagw ne rquiin naa, ¿pe nac dzigo por miñe rzacse stib zho, grieelod gow naaw?"

<sup>31</sup> Gołguien ganle, racda por zha cose; sac grëse ncuaañe dziuuñ ne, haxta ncuaañe dioow new, ncuaañe dio new, none zeene nodziuuñ new cxobnen ne ganle pa lotaa meñ nroob nac Dios. <sup>32</sup> Gotsaa guien ne sca ganle dziuuñd ne ncuaañe yquiaaqui csañ ne zdoo stib miech, zigtaa zha Israela, zha stib guiedza,

zha ne nolegaa xnëz Dios. <sup>33</sup> Tel naa, zanałd naa ncuaañe gdziladz naa naase, sinque rioxco naa grëtaa ncuaañe ruñ naa, ruñ naaw par gacnie naa grëse miech, zeena griee lo tso guic zho gnab zho lo Dios csilaa me zho lo xtoł zho.

**11** Gołwi sca, zigne ran to noxco naa mban naa zigne blu Jesús, scaquegaa to gołsoxco gban to zigne ran to mban naa.

<sup>2</sup> Bets, bzian, rleynie naa to goñ sac tibaque rsoladz to naa, ni rioxco to zienal to grë miñe pseed naa to.

<sup>3</sup> Per gołsoladz ganle: grëse meñ wnaa, none zha bgui gnabey lo zho, tel zha bgui Jesús rnabey lo zho, zigne rnabey Dios lo me. <sup>4</sup> Gacxe waa, tel tib zha bgui yase nozodiidznie zho Dios, quiateedgaa zho xtiidz me, ni zob xombrel zho; xquiełto Jesús ga rbee zho. <sup>5</sup> Scagaa meñ wnaa, tel zhoobd bay guic zho ni zo zho nozodiidznie zho Dios, quiateedgaa zho xtiidz me, xquiełto mgui ga rbee zho; sac ga rlu zho rond zho miñe rnabey mgui. <sup>6</sup> Telne racladzdgaa zho gdze lad guic zho, mazd gnabey zho chug guitsguic zho. Laa telne rtoładz zho chuga, rtoładz zho gacruxa, dzigo mazd cxobguic zho xpay zho.

<sup>7</sup> Grë zha bgui, nod pe nacie gdze lad guic zho, sac choot samiech guidzliu zho rnabeyd lo zho. Zeene bzaa Dios mgui, bzaa me zho zigne nac me, zeena glu zho ganle pa lotaa meñ non nac me; scagaa wnaa, laa wnaa biaan par glu zho ganle non mgui. <sup>8</sup> Gotsaa gwi ne ganle, letxe xcuxtid wnaa waa biao mgui, sinque xcuxti mgui briece biao wnaa. <sup>9</sup> Stiba, zeene psañ Dios wnaa, ib laa me psañ zho par gacnie zho mgui.

<sup>10</sup> Gacxe nagon waa ib none gdze lad guic wnaa, zeena glu ganle nguzobdiidz zho lo zha ne rnabey zho; haxta grë anj ne no gbaa zley zho gan zho miñ co.

<sup>11</sup> Per guiabde to togo peet nond wnaa, gołsoladz ganle psañ Dios diidz zigtaa mguiw, zigtaa wnaaw rquiinsa zho; sac telne guienđ wnaa guienđ mgui, telne guienđgaa mgui guienđ wnaa. <sup>12</sup> Gotsaa gwi ne ganle, zeene biao wnaa cho mgui briece dzit ne biao wnaa, per zeene laa wnaa biaan, haxta lo nadze wnaale rzo mgui; zigtaa mguiw, zigtaa wnaaw Dios psañ zho grop zho. <sup>13</sup> ¿To nadien zha rzac to? ¿Pe nli nonguiela gdze lad guic wnaa zeene nonab zho lo Dios, te nonguielda ye? <sup>14</sup> Gołwi ganle ib no gdze guic wnaa, biaanle zho rroob guits guic zho parne ctsew lad guic zho; <sup>15</sup> tel zha, haxta rleynie zhow zeene scataa noola, sangue ne nac ne zha bgui, guiełtow ga guiool guitsguic ne. <sup>16</sup> Tel nogaa zha ne rzac led scada, maase gnee zho. Per ible znu goñ noseed no miech, ni grëragaa zha ne riladzle Xtiidz Dios, rien zho ne nli scaw.

### Zha none gac xtsee ne psañ Jesús

<sup>17</sup> Bets, bzian, ne nligaa rley naa tibaque rsoladz to naa, per bin naa zeene rcaalsa to row to xtsee ne psañ Jesús diidz, laa ne gley to ycaalsa to, leł quiaayñctal to xtoł to. Miñcosi nagon ni lalnu riod zdoo naaw. <sup>18</sup> Ziyon naa gzobtaa zeene rcaalsa to, pe na tsiegald tilidiidz to, laa ne tipse gac to leł rlëlsa to. Ni rogobey naa nli

scaw. <sup>19</sup> Rien naa masaque rzac to ible sca none gac to, parne glupaa cho nac zha ne non xtiidz, zeena guianzuiuu zho lo miech.

<sup>20</sup> Led zhixtseedraa Jesús i gon ruñ to. <sup>21</sup> Sac ron naa zeene laa to row, masaque lëëled rac to row to ncuaañe zienie to, ib rwide to no zha ne rdziñ ga quianied zho nroob ncuaañe gow zho. Squi rzob to rowcho to, haxta rzudz to; laa zha mbanse rac zho grieelod gow zho ncuaañe row to. <sup>22</sup> ¿Mod guiend lidz to, ga sob to gow to, guie to haxta zaatne guieltaa to, led node to runctoladz to zha ne squi guiend pe yquiin? I gon rlu to rleyniede to grë zha ne no xnëz Dios. ¡Ni palal gon rdziguiend naa ncuaañe noyuñ to!

<sup>23</sup> Golşoladz ganle zha nac ne laa xtsee rii biaan, Jesús psañ diidz gaca, sca gocnañ naaw ni scagaa bi- allu naaw lo to. Wdze ne bnaaz zho Jesús ga, zeene blozh dowtseenie me xpëëdsuel me, bzheñ me tib quietxtil, bdeed me xquizh lo Dios; <sup>24</sup> blozhse bdeed me xquizh, nzian lë been me quietxtil co, bdeed mew lo zho rëb me: "Golşquiina, rrieequia lëë xcuerp naa nu, sac gon znu guñ zho xcuerp naa parne csilaa naa to grë to. Golşgun xtsee rii, parne glu to ganle tibaque rsoladz to naa."

<sup>25</sup> Blozh ga, scaque bzheñ me tib cop no vin, rëb me lo zho: "Lëë stib trat cub nu gon riaan Dios grë me miech, rrieequia xchen naa nu nac vin rii, ren ne tso sell trat co par glu nona. Gzataa zeene znu guie to vin, golşoladz ganle zha naca."

<sup>26</sup> Golşguieñ sca, zeene guntaa to xtsee co zaacse golşguna, sac gon, ga quiaxobneñ to lo miech Jesús nac meñ ne gut xcuent to, psilaa me to. Tibaque none gun to xtsee co, haxta gdziñ dze ne laa me guiaad stib.

<sup>27</sup> Gacxe waa, zha ne rieniewguit guic rquiind zho xtsee co zigne no yquiin zhow, dol nroob ga ruñ zho, xcuerp Jesús ga, xchen me ga noguitnie zho. <sup>28</sup> Zeene gun to xtsee co, none wen wen sob to ganle zha naca, pe nacne laaw rac, dzigo lozh ga zac yquiin tow. <sup>29</sup> Sac gon zha ne lega gow quietxtil co, lega guie zho vin co, sac zhow zig beelze pe xtsee; rrieequia guieñe ne yгаа zho ga gow zho, guieñe co ga guie zho. <sup>30</sup> Miñ-cocxe waa, blactaa zha ne nacgrë to i quiayaan nsis, nogaa zho rzacnele, haxta nzian zho gutle. <sup>31</sup> Telne niaca miñe wen wen gwi ne ganle zha nac xtsee co, tsod pe nacne pe guieñe ne cxeel Dios dzian ne. <sup>32</sup> Ni zeene scagaa rteed me ne tib caxtigw, laaw ruñ me parne tsa ne biini gbiire gbig ne lo me, zeena led yed ne nitlo gal dze ne nitlo grëraa miech ne ziana ncuaañe lo guidzliu rii. <sup>33</sup> Bets, bzian, golşguieñ sca zeene ycaalsa to gun to xtsee co, golşcuëz grëraa zha ne nacgrë to dzigo tipse golşilo golşquiina. <sup>34</sup> Tel zha ne riengaa lëbd zho lozh gdziñ grëraa zha ne nacgrë zho, mazd gowgazh zho lidz zho, zeena yguibd zho yгаа zho guieñe co.

No spalal miñe racladz naa gacnañ to, per naa zeene guial naa nëz qui dzigo gne naaw lo to.

## Guiełbiini ne rdeed Espíritu Sant

**12** Bets, bzian, nugaa na ganle laa naa gzet zha nac guiełbiini ne rneedz Espíritu Sant, sac racladz naa wen wen guieñ to zha naca. <sup>2</sup> Rsoladz to ganle zeene gard gliladz to Xtiidz Dios, nëzrii nëzrec bio to güeygañ to stib stib grë mdio, ncuaañe ni tib lan diidz rneed; sangue Dios ne riladz to niina, led scad nac me. <sup>3</sup> Per nsin golşo dieñ cho nac zha ne noteed-paa xtiidz me, sac nzian zha ne rnee xtiidz Espíritu Sant noteed zho lo miech, per tel rzo zho rdzibdee zho Jesús, ga rlu rquidie zho. Sac zha ne nli nacnie Espíritu Sant, rdzibdeed zho Jesús, sinque rlu zho ne me rnabey zho, ni haxta dib zdoo zho rnee zhow.

<sup>4</sup> Tib tib zha ne riladz Jesús, zhaase zhaase nac guiełbiini ne rgaa zho, per tibaque meñ ne rdeeda, lëë meñ co nac Espíritu Sant. <sup>5</sup> Nzian mod zrieelo dziuun ne dziin lo Jesús, per grëse ne me rnabey ne. <sup>6</sup> Tib tib ne zhaase zhaase mod ne rlu Dios nacnie me ne, per grëse ne me nac meñ ne rlu zha dziuun ne xtsiñ me.

<sup>7</sup> Guiełbiini ne rneedz Espíritu Sant lo ne tib tib ne, laaw rneedz me parne dziuunlsa ne xyudar grë zha ne nacgrë ne gacndionraa ne zha racladz Dios.

<sup>8</sup> No lo zho rdeed me guiełbiini rien zho zha cso zho diidz lo miech,

no lo zho rdeed me guiełbiini rseed zho grë ncuaañe ngañ ni rlu zhow lo miech.

<sup>9</sup> No lo zho rdeed me guiełbiini dib zdoo zho rnalo zho Dios, niicle ncuaañe mazdraa ngañ rnab zho lo me, raca.

No lo zho rdeed me guiełbiini zeene rnab zho lo Dios, riac grë meñ rzacne.

<sup>10</sup> No lo zho rdeed me guiełbiini rnab zho lo Dios rac grë milagr,

no lo zho rdeed me guiełbiini rteed zho xtiidz Dios lo miech,

no lo zho rdeed me guiełbiini rien zho cho nac zha ne nlipaa nacnie me, cho zhagaa nacnie meñdoh.

No lo zho rdeed me guiełbiini rnee zho stib diidz ne gard cseed zho,

no lo zho rdeed me guiełbiini rien zho pe rnee zha ne rnee diidz co, dzigo rnee zhow.

<sup>11</sup> Grëse guiełbiini, Espíritu Sant rdeeda, ni me nañ pa miñe rneedz me lo ne tib tib ne. <sup>12</sup> Lo grëse ne ne nac ne zha ne no xnëz Jesús, rrieequia xcuerp me nac ne. Tel cuerp, niicle ne nzian part niaaw, per tibaque naca. <sup>13</sup> Ndal miech ne nac xcuerp me, no zho nac zha Israel, no zho nac zha zit, lo grë zho no zho ngadoo lo beñ, nogaa zho zonlaa, per grëse ne tibaque Espíritu ne nacnie ne, sac tibaque Espíritu bgaa ne zeene brobnis ne.

<sup>14</sup> Gotsaa gwi ne ganle, no ni ne, no nia ne, no diag ne, nzian lë niaa xcuerp ne, per tibaque naca. <sup>15</sup> Gacxe waa telne niaca miñe rnee ni ne, grieelod guiaba porne nacda nia ne, nacda xcuerp ne. <sup>16</sup> Scaque diag ne, grieelod guiaba porne nacda bziaalo ne led yedraaw nac xcuerp ne. <sup>17</sup> Sac telne niaca miñe gdipse xcuerp ne niaa bziaalo ne, ¿zha nadien gon ne? Telne

gdipsegaa xcuerp ne niaa diag ne, ¿zha gzoobzhi ne?  
<sup>18</sup> Lëezhe wen led scad psan̄ Dios xcuerp ne, sinque grëse part ne niaaw bzaa mew zigne gocladz me, psan̄se mew zaatne rquiina tib tiba. <sup>19</sup> Sac tel̄ne tipse niaa grëse part ne nac xcuerp ne, ¿zhazhe rlu ncuuan̄ co! <sup>20</sup> Gocda sca, sinque zhaase zhaase nac tib tib part co, per grësew tibaque cuerp naca. <sup>21</sup> Gacxe waa grieelod guiab bziaalo ne lo nia ne: "Ib rquiind naa luu"; guiaabgaa guic ne lo ni ne: "Ni lalnu rquiind naa to." <sup>22</sup> Grëse part ne niaa xcuerp ne nose zaatne rquiina, haxta miñe mazdraa nda lëë miñ co rquiinraa.

<sup>23</sup> Stiba, no part ne niaa xcuerp ne rzac ne zhi nona, no part haxta rtoladznie ne, per gotsaa gwi ne ganle part co nac zaatne ran̄raa ne, rioxcora ne rdze; <sup>24</sup> sangue part ne nziuu lo ne, zienied guic ne dien̄ zha gdzew. Ible sca psan̄ Dios xcuerp ne, zeena sca gacnon part ne rzac ne zhi non. <sup>25</sup> Sca niaa xcuerp ne, grëse part ne niaaw rquiinlsaw xcompañera; led yeda rtsol-sa. <sup>26</sup> Golwi ganle, zeene nê tib part xcuerp ne, grëse part ne niaaraaw zienie nê co; scaquegaa zeene rdioon̄ tib part co grësew zienie guiel̄bley co.

<sup>27</sup> Laa naa rne miñ rii lo to, sac racladz naa guien̄ to sca none tipse gac to. Golguien̄ ganle xcuerp Jesús i nac to grë to, tib tib part ne niaa cuerp co i nac to, rquiinlsa to zha ne nacgrë to. <sup>28</sup> Ni zigne sca tib tib part ne niaa cuerp nose zaatne rquiina, scaquegaa grëse zha ne no xnëz me, bzoze Dios zho pe nac dziin̄ ne guñ zho:

no zho rienee xtiidz me lo miech,  
 no zho rted xtiidz me lo miech,  
 no zho rseed miech xtiidz me,  
 no zho rnab lo me rac grë milagr nroob,  
 no zho rnab lo me riac men̄ rzacnë,  
 no zho rioxco run̄ xyudar grë miech,  
 no zho rzo rac zho zha rnabey,  
 nogaa zho rnee grë diidz ne gard cseed zho.

<sup>29</sup> Golgan̄ ganle, psod me zho grëse zho tsienee xtiidz me lo miech, grëse zho cteed xtiidz me, grëse zho cseed miech xtiidz me, grësegaa zho gnab gac milagr.

<sup>30</sup> Niicle psodgaa me zho grëse zho gnab guiac men̄ rzacnë, grëse zho gnee stib diidz, grësegaa zho gnee zha nac grë diidz co. <sup>31</sup> Zhaase zhaase nac guiel̄biini ne rgaa tib tib zha ne no xnëz me, per gol̄tsoxco ygaa to guiel̄biini ne mazdraa rquiin.

Sca nagon̄ naca, per gol̄quiaadiaga ganle, nu laa naa gzet lo to stib miñe mazdraa non lo grë guiel̄biini rii.

### Guiełwleynie

**13** Miñe mazdraa rquiin gon̄ nac ne gleynie ne samiech ne. Tel̄ niaca miñe bgaa naa guiel̄biini rne naa grë lose diidz ne rnee miech, haxta grë diidz ne rnee xanj̄l Dios rne naa, ni tel̄ rleynied naa samiech naa, ¿pa dien̄ rquiin rac naa grëtaa diidz co? Rrieequia nac naa ga zig tib lë guiib ne loxaque rzedz.

<sup>2</sup> Tel̄ niaca miñe rted naa xtiidz Dios lo miech, rien̄ naa pe nac miñe naraa cxobneñ me, grëse wseed ne no rien̄ naa, ni rleynied naa samiech naa, ¿paat rquiinda! Tel̄ dib zdoogaa naa rnalo naa Dios, haxta ncuane

mazdraa ngañ rnab naa run̄ mew, ni rleynied naa samiech naa, ¿peet nondal

<sup>3</sup> Tel̄ quizgaa naa grë ncuane quianie naa lo grë zha ne guien̄d pe yquiin, haxta gded naa naa tsec naa, per tel̄ rleynied naa samiech naa, ¿zhlëse ga guñ naa miñ co!

<sup>4</sup> Sac gon̄ zha ne nli mban zigne nac guiełwleynie co: riednied zho samiech zho, wen rac zho lo samiech zho, racnëd zdoo zho, niicle ran̄ zho wenraa noded stib miech lo zho,

run̄d zho ne lëëque zha guñnon zho, racniatsd zho lo samiech zho, <sup>5</sup> run̄d zho ncuane coguel̄në zho, guñglëegaa zho samiech zho,

zienałd zho ne tebaa lose zho yquiin grë pe cos, nacd zho zha ne lega zolëë, rapguiełnëd zho samiech zho,

<sup>6</sup> ni lalnu riod zdoo zho miñe run̄ zha ne rsacsi samiech, miñe rleynie zho nac diidzli.

<sup>7</sup> Zha ne nli rleynie samiech, ni lalnu peet grieelod yca gleynie zho zho; rquiaadiag zho miñe rnee zha co, rzhidznied zho zho; tibaque rquiabladz zho wen grieequia zho, rsaand zho zho, tibaque racnie zho zho.

<sup>8</sup> Dzidz dze yquiindraa cho cteed xtiidz Dios lo miech, yquiindraa gnee zho stib diidz, yquiindraa grë guiełrac, sangue guiełwleynie gdziñd dze ne nitlow. <sup>9</sup> Niicle ne nogaa ne guiel̄biini ne rneedz Espiritu Sant, niicle no zha ne rien̄ zha gnee zho Xtiidz Dios lo miech, per palalse nac ncuane rien̄ ne niina. <sup>10</sup> Sangue gal̄ dze ne laa Dios lozh gzhixcuaa ne zigne no gac ne, grëse guiel̄biini ne rdziaap ne niina, paat yquiindraaw.

<sup>11</sup> MASURE nac ne niina zig tib mëedlas. Tel̄ naa, zeene goc naa mëedlas grëse ncuane bne naa, grëse ncuane bien̄ naa, grëse ncuane pseed naa, grëse ncuane co beñ naaw zigne run̄ grëraa mëedlas. Per zeene laa naa broob, laa naa biao biini, grëse ncuane co laa naa bien̄paa zha naca; laa guiełmëedlas co bded. <sup>12</sup> Scadaa nagon̄ rziaac ne niina, palalse rien̄ ne zha nac Dios, rrieequia rdziañse ne me niina zigne ran̄ ne zhimlë ne lo beelze pe tib lë vidr; per dzidz dze laa ne dzian̄lo me zigne nacpaa me. Palalse ndion̄ ne niina zha nac me, palalse rsilo rdzian̄ ne me, per gal̄ dze co laa ne dziuun̄beypaa me zigne run̄bey me ne niina, nan̄paa me zha nac zdoo ne tib tib ne.

<sup>13</sup> Gol̄gacnan̄ sca ganle, grë guiel̄biini co dzidz dze ne yquiindraaw, sangue ne znu: dib zdoo ne rnalo ne Dios, noniepa guic ne zac miñe rnee me, ni rleynie ne samiech ne, lozhda. Per lo gza tson̄a nagon̄, guiełwleynie co nac miñe gdziñd dze ne gdzëë.

### Zha ne rnee stib diidz

**14** Laa to nan̄le pa miñ nac miñe mazdraa non, ¿gol̄leynie samiech to sca! Per scagaa gol̄nab ygaa to guiel̄biini ne rneedz Espiritu Sant. Zig nac guiel̄biini ne rgaa zha ne rted xtiidz Dios lo miech,

golnab yгаа to miñ co zeena sca grieelo cseed to miech xtiidz me.

<sup>2</sup> Sac tel zha ne rgaa guiełbiini rnee zho stib diidz, zeene rnee zho diidz co choot rienđ dien pew, sac lo Dios ga rnee zho. Tel pe nac miñe rnee zho ga, Espiritu Sant rsiaaba guic zho, per choot racnañđ dien zha naca. <sup>3</sup> Sangue zha ne rgaa guiełbiini rteed zho xtiidz Dios lo miech, miñe rnee zho ga rquiina par tsoguicraa miech zha racladz me, par guien zho pe nonguiel gun zho, ni rchooblada zdoos zho.

<sup>4</sup> Tib zha ne sca rnee stib diidz, lose zho rquiin guiełbiini co, sac zhase rioguicraa zha racladz Dios; sangue zha ne rteed xtiidz me, diidz ne rnee zho rquiina lo grëraa zha ne no xnëz me, grëse zho rioguicraa zha racladz me. <sup>5</sup> Wena tebaa grëse to yгаа guiełbiini co gnee to stib diidz, per mazdraa gon wena cteed to xtiidz Dios lo miech, cseed to miech xtiidz me; sac miñ co mazdraa rquiin, lëdle gnee to stib diidz. Zacauegaa gnee to stib diidz co, totsaque lozhse gnee tow, gneegazhaque to dien zha naca; zeena sca yquiina lo grëraa zha ne no xnëz Dios. <sup>6</sup> Bets, bzian, to gase nadien, tel niaca miñe glanso naa lo to i csilo naa gne naa stib diidz, zpa dien yquiina lo to? Per tel glanso naa, iñe csilo naa clar gne naa lo to pe nac miñe zinee Dios lo naa, pe nac grë miñe rien naa, pe nac miñe ziaadyob gac, zha nac grë miñe zhobnee lo Xtiidz Dios, led grëse miñ co zien to zha naca, ni squiina lo to grëse to.

<sup>7</sup> Haxta grë ncuane rool miech, zig nac bzie zig nacgaa vihuel, tel csilo zha ne noyoola tel zhataa gool zhow, z zha dien guien miech pa di noyool zho? <sup>8</sup> Zig nacgaa zha ne rcuedz cornet lo menguiib, telne tel zhataa ycuedz zhow, z zha dien gacnañ menguiib pe nac vis ne quiyun zho? <sup>9</sup> Scadaa nagon run to zeene rnee to stib diidz lo miech, z zha nadien guien zho pe nonee to? Rieequia lo mese ga rnee to. <sup>10</sup> Zig nac lo guidzliu ndal lo diidz rnee miech, per tib tiba nose mod ne rnee zhow, nose zha ne riena. <sup>11</sup> Telne guiaad tib zho lo naa csilo zho gnee zho, ni rienđ naa pe quiane zho, grieelod guien naa pe racladz zho, guiengaa zho zha rzaac naa.

<sup>12</sup> Nana sca, zha ne rquiablada yгаа guiełbiini ne rneedz Espiritu Sant, gnab zho yгаа zho miñe grieelo yquiin lo grëraa zha ne nacgrë zho, zeena grë zho tsoguic zha racladz Dios gban zho. <sup>13</sup> Gacxe nagon waa, zha ne rnee stib diidz, none gnab zho gdeed Espiritu Sant guiełbiini lo zho guien zho pe nac grë diidz co, parne gnee zhow lo miech; <sup>14</sup> sac zha ne sca rnee stib diidz, tel so zho gnab zho lo Dios, rienđ zho pe nonab zho, loxaque zhiespirituse zho quiane ga. <sup>15</sup> Gacxe waa zeene gnab ne lo Dios, zeene goolniegaa ne me, zac gnee ne stib diidz, per scagaa none gnee ne diidz ne rien ne, miñe rien gaa grëraa miech. <sup>16</sup> Sac gon tel stib diidz nonee ne noyoolnie ne Dios, nodeed ne xquizh lo me, z zha dien yquiab grëraa zha ne ndxie ni rienđ zho pe rnee ne? <sup>17</sup> Niicle ne ndzon sca nodeed ne xquizh lo Dios, per zha ne noquiaadiaga ga, paat yquiinda lo zho.

<sup>18</sup> Xquizh Dios, tel naa ye naa rne stib diidz, ni mazdraa gon rne naaw que zha ne rneew lo to i, <sup>19</sup> per zeene zo naa zaatne ndxie grë zha ne noquiaadiag Xtiidz Dios runđ naa ne gnee naa stib diidz, sinque rne naa miñe guien zho. Rien naa wenraaw gne naa maase gaayaque lan diidz, per miñe guien zho, lëdle so naa gne naa tsii mil diidz, ncuane ni tib choot guienđ.

<sup>20</sup> Bets, bzian, golguien sca golsaan guiełmëedlas qui. Zacgaa gac to mëedlas per nëz lo guiełntseeba, sangue xpensar to golgac zig zha ne baa biinile.

<sup>21</sup> Gotsaa gwi ne ganle zha nac stib diidz. Zhobnee lo Xtiidz Dios rëb me, laa me cxeel miech stib dan miech ne rnee stib diidz, par gnee zho lo zha Israel; per niicle tsienee zha co, ib guienđ zhow. <sup>22</sup> Gase naganle rlu rquiind stib diidz co par grë zha ne rnalole Dios, sinque laaw rquiin parne grë zha ne nod xnëz me gan zho ganle nli no me. Zha ne nole xnëz me, zha co rquiin gon zho pe nac miñe racladz me gacnañ zho, pe nac miñe zhobnee lo Xtiidz me. <sup>23</sup> Per niicle scaw, telne zob bla zha ne sca gard gliladz Xtiidz me, zobgaa bla zha ne pense rsilo rquiaadiaga, ni csilo to gnee to stib diidz, zeene gan zhow lëetaa miñe guiab zho rzhinle guic to sca rac to. <sup>24</sup> Laa telne grëse to no noteed to xtiidz me, nonee to miñe racladz me gacnañ miech, zha ne sca gard gliladz Xtiidz me, zha ne sca pense rsilo rquiaadiaga, zeene gon zho grëtaa miñe nonee to, haxta ziaa zho biini zien zho ne nli tib miech ngoopdol nac zho. <sup>25</sup> Zigse quiane to laa zdoos zho lozh yguudz, laa zho ted yquitsgzhib zho gnab zho perdon lo Dios; ga guien zho ganle ne nli nacie me to.

<sup>26</sup> Bets, bzian, golguien sca zeene ycaalsa to cseed to Xtiidz Dios, zigtaa zha ne goola, zha ne cteed xtiidz Diosa, zha ne gnee stib diidza, zha ne gneegaa zha nac diidz co, none tsiene guic zho miñe gun zho ga laaw yquiin parne tsoguicraa los demas zho zha racladz Dios gban zho. <sup>27</sup> Zeene gnee zho stib diidz, none choptaa zho, tsontagaa zho gneew. None tibga zho gnee, ni rquiin zole zha ne gnee pe nac diidz co. <sup>28</sup> Laa telne guienđ zha ne grieelo gnee dien pe naca, nodne gnee zhow; mazd len zdoose zho gnee zhow, Diosse gon pe nonee zho.

<sup>29</sup> Scaque zha ne cteed xtiidz Dios, choptaa zho, tsontagaa zho gneew, laa grëraa zha ne ndxie none yquiaadiag zho miñe nonee zho. Telne lëetaque nonee tib zho, ni csiaab Dios guic stib zho gnee, dzigo none cuëz zha ne quiane ga zeena grieelo gnee zha co. <sup>31</sup> Sca none gaca, none tibga tibga zho gnee, zeena grëse zha ne ndxie grieelo gon zho dien pew, parne cseed zho, ni gacngueelraa zho lo Xtiidz Dios.

<sup>32</sup> Zha ne sca rteed xtiidz Dios, none cseed zho gnabey zho zho, cuëz zho nieeda gdziñ hor ne gnee zho. <sup>33</sup> Sac tel Dios, rdziladz me guiots gnaaz pe cos, rdziladz me ncuane nzhiitni. Miñe rdziladz me zacse gac tib cos, ni scagaa run grëraa zha ne no xnëz me.

<sup>34</sup> Ni stiba, zeene sca rcaalsa to, racladz naa guien grë men wnaa dzese sob zho. Nodne so zho ye zho

gnee, sac goṅ mgui rnabey zigne zhobneeque lo Xtiidz Dios. <sup>35</sup> Ncuaaṅe racladz zho gacnaṅ zho, ro yu ga gnabdiidz zhow lo zha bgui, sac goṅ, rdzieelda lëë-paaze wnaa gnee zaatne rcaalsa to rquiaadiag to Xtiidz Dios. <sup>36</sup> Zaacse sca goṅgac, goṅguien gaṅle grieelod guṅ to miṅe notaa guic to, sac goṅ led loxaque todse nac zha ne ruṅbey Xtiidz Dios, par guiab to zigne racladz to gac tib cos, sca none gaca.

<sup>37</sup> Miṅe rne naa lo to nu xtiidz Dios naca, zha ne rteed xtiidz me lo to i, zha ne rapгаа pe stib guieṅbiini ne rneedz Espiritu Sant, zha co guṅbey gaṅle nli miṅe rnabey mew. <sup>38</sup> Zha ne gliladzdgaa, maase gliladz zhow.

<sup>39</sup> Sca nagoṅ naca. Goṅtsoxco sca yгаа to guieṅbiini cteed to xtiidz Dios lo miech, zeena gacnaṅ zho zha racladz Dios gban zho; per scagaa, ib ycade to teṅ cho zha ne rnee stib diidz. <sup>40</sup> Per zigne rne naa ga, grëse miṅe guṅ to none zaacse guṅ tow, tib tiba gacsew hor ne rieguiaṅa.

### Brieaban Jesús

**15** Bets, bzian, nu laa naa gbire gzet lo to gaṅle zha nac Xtiidz Dios. Zigne bialseed naa tow, scataque naca; led yeda rdzëë. Lëew ga pcaania to, ni haxta niinagaa rliladz tow. <sup>2</sup> Lëew rlu zha grielo ycaania Dios to, totsaque nli dib zdoo to bliladz tow, ni bii lëëgaaw rnalo to.

<sup>3</sup> Zeene bial naa lo to i, pseed naa tow zigne pcaanise naaw. Gocnaṅ to cho nac Jesús, gocnaṅ to por xtoṅ ne gut me lo cruz, zigne zhobneesew lo Xtiidz Dios.

<sup>4</sup> Gocnaṅ to gaṅle zeene goc tsoṅ ngbidz pqueets zho me laa me brieaban, zigne raquietaquew lo Xtiidz Dios. <sup>5</sup> Leṅ dze ne brieabanle me ga, goṅlo Pedr me, niicle grëragaa zha ne nacgza Pedr bzënie zho me, goṅlo zho me sac güeyted me lo zho. <sup>6</sup> Güey me güeyted me zaatne ndxie ndziibsráa gaay gayoo zha ne nole xnëz me, grëse zho goṅ me; ndal zha co bii mban niina. <sup>7</sup> Bded ga goṅaque Santiagw me, ni biire güey me lo zha ne bzënie me ga stib; <sup>8</sup> goc palal tiempa, lega naclew haxta lo naa brieequia me. Teṅ naa goṅ, rrieequia nac naa zig tib mëed ne rzamëed, <sup>9</sup> lo grëraa zha ne nac poxtl, ni lalnu peet nond naa, per ni rdzieeld gnee zho naa poxtl; sac goṅ pa lotaa ptsidiṅ naa grë zha ne glopaa bzëeb xnëz Dios. <sup>10</sup> Per xquizh Dios tibaque noxco me naa, bzooblo me naa gane laa naa nac miṅe nac naa niina. Ni led zhlëdgaa bzooblo me naa, sac goṅ nroobraa xtsiiṅ me noyuṅ naa lo miṅe noyuṅ grëraa poxtl; per rned naa togo naase quiayuṅa, sinque me noyacnie naa rrieelo noyuṅ naaw.

<sup>11</sup> Laa naa rzet miṅ rii, per nacda par glu dieṅ cho nroobraa noyuṅ xtsiiṅ me, sac miṅe mazdraa non nac ne noseed no miech Xtiidz me; lëew biadseed no to, ni bliladzdgaa tow.

<sup>12</sup> Nana sca, racladz naa gnë to dieṅ zha nacne no bla to i rnee nliid grieeban meṅgut; led wen wen name gocnaṅ to brieaban Jesús. <sup>13</sup> Teṅ rnee to nliid grieeelo grieeban meṅgut, rrieequia goṅ rnee to ga nliid brie-

ban Jesús. <sup>14</sup> Nana teṅe brieeband me, paat rquiind miṅe dzigo noseed no miech nu, zhlëse znu noteedxtse ne rnalo ne Dios. <sup>15</sup> Rrieequia noquidiee no miech, sac goṅ tibaque rnee no lo zho bleeban Dios Jesús; ni teṅe nli rrieeband meṅgut, ye Jesús dzigo bii noliu me niina. <sup>17</sup> Stiba, teṅe nliid brieeban me, zhlëse dzigo rnalo to me ycaania me to; teṅe nliid brieeban me, scase bii zëeb to grë xtoṅ to. <sup>18</sup> Grë zha ne bliladz me, zha ne nacle meṅgut niina, lëë bnitole zho ga dzigo. <sup>19</sup> Nana teṅe loxaque lo guieṅmban riise nona gnalo ne Jesús, ne dzigo nac miech ne mazdraa nxen.

<sup>20</sup> Per gacnaṅ to sca gaṅle, ¡brieaban Jesús! Me nac meṅ ne glopaa brieeban lo grëraa miech guizhiu ne grieeban. <sup>21</sup> Grëse ne ne nac ne miech, ible laa ne none guet; sac laa guieṅgut biaan por miṅe beeṅ Adán; per niina ne laa Jesús biaan, por miṅe beeṅ me grëse meṅgut laa zho none grieeban. <sup>22</sup> Zigne grëse miech ret porne ziaad zho lo xti Adán, scaquegaa grëse zha ne gbig lo Jesús, zгаа zho tib guieṅmban ndzon. <sup>23</sup> Ible sca none gaca, ndioṅ ne gaṅle laa Jesús brieabanle, ni zeene laa me guiaad, grë zha ne no xnëz me laa zho grieeban. <sup>24</sup> Gaṅ dze co laa me lozh gnitlo meṅdox ni grëraa ma ne nacie ma, dzigo laa me csaṅ grëse miech ne no xnëz me ladznia Dios meṅ ne nac Pxoṅ me; dze cota naagoṅ laa Dios guṅ guieṅwxtis. <sup>25</sup> Sac ible Jesús nonabey haxta gdziṅ dze co, zeene laa me gnitlo grëse meyoṅh ne rlëë lo me; zig nac guieṅgut, lëew nac miṅe lultm gnitlo me. <sup>27</sup> Zigne zhobneeque lo Xtiidz Dios, ladznia me biaan grëtaa ncuaaṅe no; per guiabd ne togo ye Dios no ladznia me, sac goṅ Dios nac meṅ ne bdeeda lo me. <sup>28</sup> Gacxe waa, zeene gaṅ dze ne laa me sca lozh gnitlo grë zha ne rlëë lo me, Pxoṅ me nac meṅ ne gnabey lo me; sac goṅ meṅ co gocnie me beeṅ me gan, ni meṅ co nac meṅ ne rnabey.

<sup>29</sup> Nana, ne rnee to i nliid rrieeban meṅgut, ¿pe nac dzigo no zha ne rrobnis xcuent zha ne gutle? <sup>30</sup> Teṅe niaca miṅe nliid grieeban meṅgut, ¿pe nac nadien znu gzataa dze quiabeeladz no no lo grë guieṅxtseeb?

<sup>31</sup> Bets, bzian, nligaa teṅ naa goṅ gzataa dze noxtseeb naa lo guieṅgut; naṅle to gaṅle zeene rne naa rleynie naa to, diidzli rnee naa; scaquegaa niina, miṅe rnee naa nu diidzliw. <sup>32</sup> Ne nligaa zeene glo bial naa guiedz Efés nu, ntseeb goc miech rii lo naa, pale grë ma ntseeb. Teṅe nliid grieeban meṅgut, zhlëse dzigo nodeed naa grë miṅ co; mazd teṅ zhataa dzigo gban ne, zigne rëbaque diidz ne rëb: “¡Goṅgotsaa dioow ne, goṅgotsaa dio ne, beṅque guieṅgutse quiambiaaz ne!”

<sup>33</sup> Per lëda ga goṅ. Zha ne zienaṅ miṅ co, ib yquiaadiagde to xtiidz zho, zeena gacde to zigne nac zho; zigne zëëbaque diidz: “Teṅe ndzinliid miech ne ctsieelsa luu, zdziṅ dze ne gac luu zigne nac zho.” <sup>34</sup> Goṅquix biini sca, guṅctaldraa to xtoṅ to; pe rtoladzde to, goṅwi gaṅle no bla to i gard sëeb xnëz Jesús, haxta ni rienṅ zho zhapaa nac Dios.

### Zha grieeban meṅgut

<sup>35</sup> Nana, no to gnë: “¿Per zha grieeban meṅgut? ¿Zhazhe nac cuerp ne grieebannie zho?” <sup>36</sup> ¡Aque nxen

wnabdiidz co! ¿Pe ranđe to zig nac grè midz ne rio liu rac bni, rlozhse rnitlo midz co dzigo laa guizh ne naca ga rlan? <sup>37</sup> Teĭ rnee to zha nac cuerp ne grieebannie zho, goĭwi ganĭle zig nac zhobxtil, zig nac grèragaa midz, ¿pe niacxe zigne nacsew riow liu, scasaque naca rlan? Led zeene laaw rlan, guizhle naca. <sup>38</sup> Tib midzse naca riow liu, Diosle nac meĭ ne rdeed zhiblaga zigne racladz me. Tib tib midz, psanĭle me dien zha gluw zeene laaw glan. <sup>39</sup> Zigne zhaase zhaase nac tib tib midz, tib tib guizh, scaque nzian lo cuerp no.

Zig nac miech, zhaa nac xcuerp zho lo xcuerp ma, nicle magaaw, zhaa nac xcuerp ma ne no lo liu, zhaa nac xcuerp ma ne no lo nis, ni zhaaque nac xcuerp ma ne rsiibe. <sup>40</sup> Grè anĭl ne no gbaa, zhaa nac xcuerp zho lo xcuerp ne nac ne miech guidzliu; zhaa nac xquieĭniow cuerp co lo xquieĭniow cuerp ne no lo guidzliu. <sup>41</sup> Gotsaa gwi ne ganĭle, zig nac xbiini ngbidz zhaa naca lo xbiini mēē, lo xbiinigaa mel. Niicle melgaaw, zhaase zhaase nac xbiini ma tib tib ma, no ma palase rlu, nogaa ma roĭ rna. <sup>42</sup> Scadaa nagon, zhaa rlu cuerp ne rap miech niina, ni zhaagaa glu miĭne yгаа zho zeene laa zho grieeban. Cuerp ne rdziaap ne niina, ncuaaĭne tib rded naca, sanĭgue cuerp ne grieebannie ne gaĭ dze co, led yedraa miĭ co nitlo. <sup>43</sup> Mban nac cuerp rii, sac rzacnēw, reta; sanĭgue cuerp ne grieebannie ne, tib cuerp ne gdziĭnd dze nitlo gaca. Lega zozhidz cuerp rii, sanĭgue cuerp co tib cuerp ndip ndaan gaca. <sup>44</sup> Cuerp ne rdziaap ne niina, tib cuerp ngoopdoĭ naca, sanĭgue cuerp ne grieebannie ne, miĭ co gac tib cuerp ne gban zigne racladzpa Dios. Sac zigne znu no cuerp ne rquiin lo guieĭmban rii, scaquegaa no miĭne yquiin stib lo guieĭmban ne gneedz Dios.

<sup>45</sup> Goĭsoladz ganĭle, rnee lo Xtiidz Dios Adán goc miech ne glopaa biaan ni Dios nac meĭ ne bdeed guieĭmban lo Adán; sanĭgue Jesús, me rap guieĭmban, ni zrieelo gdeed me guieĭmban co lo miech. <sup>46</sup> Scaque nagon, glo rgaa ne cuerp ngoopdoĭ ne rdziaap ne niina, dzigoraa yгаа ne cuerp ne gban zigne racladzpa Dios. <sup>47</sup> Gotsaa gwi ne ganĭle, zeene biaan Adán yudiese bzaa Dios me; sanĭgue Jesús, meĭ gbaa nac me. <sup>48</sup> Grèse ne nac ne miech, cuerp ne rdziaap ne lo guieĭmban rii, zigne gocdaa xcuerp Adán naca; per zha ne gnalo Jesús, zeene laa zho grieeban laa zho gapple tib cuerp zigne nac xcuerp me. <sup>49</sup> Masaque nac ne niina zigne goc Adán, ni scaquegaa zdziĭnd dze ne glu ne zigne rlu Jesús. <sup>50</sup> Goĭgacnaĭ sca ganĭle, cuerp ne rdziaap ne lo guidzliu rii, grieelod gdziĭna zaatne rnabey Dios; sac rdziĭnd dze ne rnitlow, grieelod gaca tib cuerp ne guete.

<sup>51</sup> Wen wen goĭzoobdiag miĭne gne naa lo to nu ganĭle, waltaa choot gard gacnaĭa: Grèse ne ne nac ne zha ne rnalo Jesús, gaĭ dze co zigtaa zha ne mbana, zha ne gutlegaaw ible stsēē Dios xcuerp ne. <sup>52</sup> Znuse gac miĭ co zig nacse zeene riab tib belye; lēē miĭ co gac lultm vuelt ne ycuedz xanĭl Dios zhitrompet zho. Zeene sedz trompet co, hor co grèse zha gut, laa zho grieebannie tib cuerp ne gdziĭndraa dze nitlo; scagaa grè zha ne bii zomban, hor co laa xcuerp zho gdzēē.

¿Grèse ne dziaap tib cuerp cub! <sup>53</sup> Ible sca none gaca, ib none gdzēē xcuerp ne gaca tib cuerp ne xiĭnd, tib cuerp ne gdziĭndraa dze nitlo. <sup>54</sup> Zeene gac miĭ co, ga grieequia miĭne raquiet lo Xtiidz Dios zaatne rnee: “Nasi laa guieĭgut bnitlo, guieĭmbanle nac miĭne rnabey. <sup>55</sup> Ah guieĭguta, ¿yora na zeene scataa psacsi luu? ¿Yora zeene scataa gocndip xtiidz luu?” <sup>56</sup> Grieelodraa pe gun guieĭgut ne hor co, sac led yedraa hor co tso doĭ, led yedraa hor co gnabey ley; sac por doĭ gane rrieelo rsacsi guieĭgut ne niina, ni por ley rlu pe nac xtoĭ ne. <sup>57</sup> ¿Xquizh xquieĭnzaac Dios pxeel me Jesús, sac gon por Jesús zrieelo grie ne ladznia guieĭgut!

<sup>58</sup> Bets, bzian, ne nac to zha ne rleyne naa, goĭguien sca tibaque dziits goĭso lo Xtiidz Dios; zig zie dze goĭtsoxcoraa goĭgun xtsiĭn me, beĭque nanĭle to ganĭle, grèse xtsiĭn me miĭne rdziuuĭ ne nacda ncuaaĭne zhlēse.

### Gon ne guey Jerusalén

**16** Laa zig nac gon ne noyacro guey gac xyudar grèraa zha ne no xnēz Jesús Jerusalén, laa naa rso diidz lo to zigne psoque naa diidz lo zha Galás.

<sup>2</sup> Teĭ palal ruĭ to gan tib len zhmaĭ, lo co goĭcob miĭne ral zdoo to gdeed to gac gon co; gzobse dze goĭtsiesana lo zha ne noyuuĭlow. Adeĭ na ganĭle haxta glansoraa naa i, dzigoraa no to dien zha topa. <sup>3</sup> Ni goĭzoobloga dien bla zha ne tsie tsiesana, na zeene glanso naa i dzigo yquia naa tib guits ne güey zho tsiesan zhow; <sup>4</sup> ni teĭ rquiinpagaa ye naa ga, dzigo na maase ga naa ganie naa zho.

<sup>5</sup> Len dze rii no guic naa gateed naa nēz Macedon, dzigo gale grie naa glanso naa lo to i. <sup>6</sup> Nend zbēz naa lo to i palal dze, togo iquegaa teed naa len mēē naĭ ne ziaad; ni racladz naa zeene gbi naa i, siguiel to gun to xyudar naa teĭ pa nēz ne no ga naa len dze co. <sup>7</sup> Teĭne zneedz Dios diidz cuēz naa lo to grè len dze co, zbēz naa, sac racladz naa tib guiaĭteed naa lo to i. <sup>8</sup> Niina ne no naa Efés nu, len dze riipaa rlu ndal miech ne no liaadz ycaania Xtiidz Dios, gane zbēz naa nu haxta ted ĩni Pentecostés. Nligaa ndal zha ne no liaadz co, per scagaa ndalake zha ne rtsidiĭa.

<sup>10</sup> Nacle diidz laa Timoté guiaad i; teĭ nanĭ new naraa guiaad me, goĭsiguiel zeene glanso me zaacse goĭcaania me, zaacse goĭcuēzlo me, zeena tsonley zdoo me; goĭganĭ ganĭle, ye me quiayuĭ xtsiĭn meĭ ne rnabey ne. <sup>11</sup> Goĭguien csanwinde to me, sinque goĭgap me respet; zeena zeene glanso me lo naa nēz rii ĩne nley gac me csoladz me zha biaadted me lo to i. Laa naa quiambēz glanso me nēz rii, gza me zha ne guiaadnalraa zhits me.

<sup>12</sup> Sanĭgue bets ne Apol, blactaa bnab naa lo me ni-aadgza me zha ne ziaad i niaadganĭ me to, per rzac me grieeloda niina. Riēn naa zeene gdeedtaaw diidz, ible ziaad me ziaadganĭ me to.

<sup>13</sup> Bets, bzian, nsin goĭso, tibaque goĭnalo Dios. Ib ct-sēēde to xtiidz to, tibaque goĭtsoxco tsienal to miĭne rnabey me. <sup>14</sup> Ncuaaĭne gunĭtaa to, goĭconie guic to gun

tow porne rleynie to Dios, porne rleyniegaa to samiech to.

<sup>15</sup> Laa naa rso diidz lo to, niowse gon golgac lo grë zha bets ne, zha ne run xyudar to i; zig nac Stef grë menlidz me, golgon xtiidz zho. Led nanle to ganle, Stef nac tib men ne gloopaa bliladz Xtiidz Dios nëz Gres i grë menlidz me; ni desde dze co laa me pquiabladz tibaque squi quiayun me xyudar grëraa zha ne no xnëz Jesús. <sup>17</sup> Rley naa gon zeene gon naa laa me blanso nu gza me Fortunat ni Acaic, haxta stib goc zdoo naa gocnan naa zha no to, masaque gun naa cuent grële lo to ga gon naa. <sup>18</sup> Ne nligaa bloonley zho zdoo naa, ni rien naa scaquegaa to nley gac to niina zeene gon to zha no naa. Golguien gon zha non nac zho, golwi ganle pa lotaa nac dziin ne quiayun zho.

<sup>19</sup> Grëse zha ne no xnëz Jesús nëz Asia nu, laa zho rxeeļ bdiuzh lo to, golcaania zhibdiuzh zho. Scaque Aquil grop me Priscil, ni grëraa zha ne rcaalsa lidz zho rieseed Xtiidz Dios, grë zho laa zho rxeeļ bdiuzh lo to.

<sup>20</sup> Scagaa grë zha ne no nu, ye zho laa zho rquiaabdiuzh to. Zeene ycaalsa to i, ine golnaaznialsa, golqueedzlsa, golcaania zhibdiuzh no.

<sup>21</sup> Nu laa naa cso schop lan xtidz naa lo to, ni golwi ganle naazhal yquaw: <sup>22</sup> Grëse zha ne gon nëd gleyniepaa Jesús, miech ndziibdeele ga nac zho. ¡Ni ile gon ziaad me! <sup>23</sup> Mese nac men ne gacnieñ to, me nac men ne no zhixco to, sac ne nligaa rleynie me to.

<sup>24</sup> Niicle naaw rleynie naa to, sac gon tibaque nac ne ngab ne lo me. ¡Lëed bii gdzieel ne sca!

Pabl

## 2 CORINTIOS

iDiuzh to grëse to!

**1** Naa nac Pabl, grop no bets ne Timoté, laa no rquia stib guits rii rxeel no guiedz Corint i. Nanle to ganle Dios bzo naa, pxeel me naa none naa Xtiidz Ndzon Jesús lo miech.

Laaw ziaad lo to i, grëse to ne nac to zha ne ngab xnëz Dios; zigtaa tow, zigtaa grëragaa zha ne no dib nëz Gres iw.

<sup>2</sup> Dios men ne nac Pxoze ne, ni Jesús men ne rnabey ne, me gunlay to, me glu ganle pa lotaa noxco me to zeena peet zhgab ctsebde to.

<sup>3</sup> Bets, bzian, golgotsaa gwi ne ganle, izha ndzontaa Dios, Pxoze Jesús men ne rnabey ne! Sac gon, pa lotaa rquia zdoo me ne, pa lotaa rchoobladz me zdoo ne <sup>4</sup> lo grëtaa guieinë ne rdieed ne. Ni laa me rchoobladz zdoo ne gon, zeena scagaa grëraa zha ne rdzian ne no guieinë, mban rac zho, guio ne guiochoobladz ne zdoo zho zigne rchoobladzaque me zdoo ne.

<sup>5</sup> Zig nac niina, nroob guieinë ne nodieed no loxaque ne riladz no Jesús, per scaquegaa ib rsaand me no tibaque nochoobladz me zdoo no. <sup>6</sup> Laa no nodzian grë guieinë rii, sacne noxco no nonee no lo miech zha laa zho lo dol, parne scagaa grieelo cchoobladz no zdoo to. Lo grë guieinë rii, me nac men ne nochoobladz zdoo no, gane ndion no scaque squia zdoo me to, schoobladz me zdoo to zeene gdziñ dze ne laa to gan grë guieinë ne nodzian no nu niina. Ni me gon nac men ne gacnieñ to glëb to gan tow.

<sup>8</sup> Bets, bzian, tel niaca miñe nian to ganle zha nactaa grë guieinë nroob ne bdieed no zeene no no nëz Asia. Ne nligaa nroob psacsi zho no, ncuaahe lëbdras no lo grë guieinë co, tibaque rdzieets no bod gataa niet no. <sup>9</sup> Masaque bzhiac no len dze co zig rzac tib zha ne nole guet, laa zho quiambëzse gal hor ne guet zho. Garaa bdzion no peet grieelod dziuun no ne nose, sinque Dios none gnalo no, mese zac csilaa no lo grëtaa guieinë; sac tel me, haxta mengut rbeeban me.

<sup>10</sup> Ni nligaa blee me no lo guieinë co, bla me no lo guieigut co; ni ndion no scaque zla me no lo grëraa guieixtseeb ne dzian no, <sup>11</sup> totsaque gacnie to no tibaque gnab to lo me gacnieñ me no. Zeena, tibaque gac ne grëse ne gdeed ne xquizh lo me.

<sup>12</sup> Rley no sacne rieñ no choot noquidied miech, ndzinli mban no, zigtaa zeene zo no lo tow, zigtaa zeene zogaa no lo grëraa miecha. Per guiabd ne togo por niini now, sinque ne nquialadz Dios no gane quiayacnieñ me no znu mban no. <sup>13</sup> Grë miñe rnee no lo guits ne zixeel no lo to, niapse diidzliw, ni miñe rgobey no grieelo guieñ to miñ co rquiaa no; gane racladz naa

gdziñ dze ne guieñ tow. <sup>14</sup> Nli runbeydpaa to zha nac naa, per racladz naa gley to zeene ran to naa, zigne gleyaque naa gan naa to gal dze ne laa Jesús, men ne rnabey ne guiaad stib.

<sup>15</sup> Sca nagon rzaac naa, gacxe na ni naa glo nialgan naa to, dzigo ile nrie naa nia naa nëz Macedon. Ni zeene mbire naa nëz co, nialteedaque naa lo to i stib; zeena niac chop vult ne nionley zdoo to. Lozh ga, ine niowse nzonëz to naa nia naa nëz Judé. <sup>17</sup> Ni pasëe naa nial. Per guiabde to togo bod notiblid guic naa zeene sca bne naa, o nacgaa naa zig nac grë zha ne laglaase rnee tib diidz, laa len zdoo zho nappaa zho gund zhow. <sup>18</sup> Dios zobwi ganle rdziuunscad no. Miñe rnee no, rdziuun now.

<sup>19</sup> Golgan ganle, zigtaa naaw, zigtaa Silvana, zigtagaa Timotéw, no biadseed to cho nac Jesús, men ne nac Xpëed Dios; ni zig nac Jesús, rquidied me. Grëse miñe rnee me run mew, <sup>20</sup> ni grëse miñe psan Dios diidz gun me, grësew noyun mew; gane niicle nogaaw rnee no lo miech ganle ible run me miñe rnee me, ga rlu ganle pa lotaa men nroob nac me. <sup>21</sup> Ni lëe Dios co gon nozhixcuaa lo xquieimban ne, laa ne ngab xnëz Jesús niina; me bzooblo no nonee no Xtiidz me. <sup>22</sup> Haxta pxeel me Espiritu Sant zdoo ne, rriequia bloobey me ne ga, par glu ganle lo me ngab ne, ni ible zгаа ne grëtaa guieinzaac ne bneele me gneedz me lo ne.

<sup>23</sup> Me zobwi, me nan ganle pe nacne gard guial naa. Gard gon guial naa, per por tow; sac rquia zdoo naa to, racladz naa loxaque guialquiago naa to i, lozh ga mban gac to. <sup>24</sup> Guiabde to sca togo bod racladz no guiaad no. Nli rquiindraa to guiadnee no lo to zha gliladz to Dios, sac dib zdoole to riladz to me; per laa no racladz ine guiaadlonley no zdoo to i. Golguieñ sca, miñ co racladz no, racladz no guiaadloguieinë no to.

**2** Miñ co nagon beñd naa ne nial naa, <sup>2</sup> sac nonguieida ga coguieinë naa to, ni to nac zha ne rgonley zdoo naa. <sup>3</sup> Ne racladz daxe naa miñ co waa, gane pxel naa tib guits co lo to glo, zeena nzhixcuaale lo guieito ne nobee to i, zeene laa naa nlanso. Sac tel lega nlansose naa, laa ne ndzio ne guieibley, lel guieinë ndzio ne. Ni nan to ganle, tipse nac guieibley ne rdziaap ne; zniacxe zrieelo nley gac to telne ran to mban rac naa?

<sup>4</sup> Tel gan to ganle zeene pxel naa guits co, ine nliipaa mban rac naa no naa zhizhgab to! Haxta roon naa zeene noquiaa naaw. Laa naa pxel guits co lo to, per pxeld naaw par ngoguieinë naa to; sinque laaw pxel naa, zeena xixcuaaniob lo ncuaahe ndzinlid ne noyac i; ni laa naa beñ miñ co sacne rquia zdoo naa to. <sup>5</sup> Zeene



bin naa zha nac do! ne noyuu zha co i, zig rne naa ga: bio naa guie!në; per rien naa mazdraa nroob bio to guie!në. <sup>6</sup> Nana gon, ne squi laa to pteedle zho tib cax-tigw, !lëëlew ga na! <sup>7</sup> Go!guiaan!adz miñe been zho ga, go!neewen lo zho stib, go!choobladz zdoo zho zeena gacmband zho. Sac te!ne csaanladz to zho, nend scase lozh guiuu zho lo xquie!në zho. <sup>8</sup> Rnab naa lo to, go!leynie zho stib, zigne rleyneque to zho glo.

<sup>9</sup> Ni stiba, laa naa pxel guits co lo to, zeena dien pe zon to diidz guñ to miñe rne naa lo to ga.

<sup>10</sup> Go!guiaan!adz miñe been zha co sca, te! naa laa naa biaan!adzlew. Jesús zobwi gan!e laa naa ben!e zho perdon, zeena gbiire zaacse gac to; <sup>11</sup> ni scagaa gleyd men!ox guñgüet ma ne. Led nan!e to gan!e, zombëz!e ma dien zha gnitnëz ma ne.

### Tibaque noxco Pabl cseed miech Xtiidz Dios

<sup>12</sup> Bded ga nagon dzigo bia naa guiedz Troas. Zeene bdziñ naa ga, ne nligaa bneedz Dios diidz niuñ naa xtsiin me ga. <sup>13</sup> Nac diidz ga ndzieelo naa bets ne Tit, per zeene gon naa bdziñd me, biotiblidraa guic naa. Nacne brieque naa ga bia naa nëz xtan zha Macedon, biaguib naa me.

<sup>14</sup> Per, !xquizh xquie!nzaac Dios! Sac zaatne ziotaa no, Jesús ner lo no, me rlu gan!e rdziuuñ no gan lo grëtaa ncuaane rca. Tibaque rnee no lo miech gacnan zho gan!e cho nac me, sca quiaxobnen no Xtiidz me, zig rzëbx!aa tib ncuaane nex r!aa. <sup>15</sup> Haxta no, masaque nac no lo Dios zig tib ncuaane sca nex r!aa; sca nac no lo me sacne laa no ngable lo Jesús. Nëzrii nëzrec nex zëbx!aa gox co, zigtaa lo grë zha ne ngable xnëz Dios, zigtagaa lo grë zha ne zie nëz ne nitlow. <sup>16</sup> Par grë zha ne nole nëz ne nitlo, masaque rzac zho no zig tib gox ne nguid r!aa, haxta rsoladz zho pe nac guie!gut ne quiambëz zho; san!ue grë zha ne nole xnëz Dios, rzac zho no zig tib gox nex ne run!soladz zho guie!mban ndzon ne no yгаа zho. !Ni led cho!d zha ne gon grieelo guñ dziin rii! <sup>17</sup> Nu rquiin zha ne dib zdoo rquiabladz guñ dziin lo Dios, glu zho ne nli Dios pxee! zho, ne nli Jesús nacne zho. Sac no zha ne, loxaque rquiaalo zho ye zho rseed miech Xtiidz Dios, per laa zho runa par cuee zho dimi.

**3** Nana ne znu rne naa, guiab to bod yeque no rdziuuñ zig run zha ne sca rquidie ga, lëëque zha runnon zho, rio zho dieen pe diidz ne rquia rey zho par glupaa dien cho nac zho. Ni lalnu rdziuuñnond no no, niicle peet diidz rquiindгаа no. <sup>2</sup> Led yed no rquiin pe diidz ne dzeey no, to rlu cho nac no. Grëse miech ne gan zha notsëë Dios lo xquie!mban to, gase guñbey zho no, ga glu pe nac dziin ne rdziuuñ no. <sup>3</sup> Gane rrieequia nac to zig tib diidz ne quialu gan!e cho nac no. Jesús zhal pquiaa diidz co, ni pquiind me pe tint ne nquiaa mew, sinque laa me pquiaaw con guie!biini cheñ zhiEspíritu Dios, men ne nguiamban. Ni pquiindгаа me pe lo guits ne nquiaa mew, sinque laa me pquiaaw zdoo to.

<sup>4</sup> Ni ndion!paa no nli scaw, sac Dios zhal rluw, ne nac no zha ne ngab lo Jesús. <sup>5</sup> Per guiabd ne togo nose

rrieelo rdziuuñ grë miñe rdziuuñ no, led scada, Dios nac men ne racniën no rdziuuñ now; <sup>6</sup> sac me bdixbiini no zha cseed no miech diidz cub ne psan me. Gane laa no noseed miech niina, per rseete no zho tsienal zho miñe rnabey ley, sinque laa no noseed zho guien zho tsienal zho miñe rnabey Espiritu Sant. Sac te! leya, lëë gdib rnabeya guet grëse miech ngoopdo!; san!ue Espiritu Sant, laa me rlu zha yгаа zho tib guie!mban ndzon.

<sup>7</sup> Go!soladz gan!e, zha blu Dios biini ne nac xquie!ndzon me zeene pcaania Moisés ley ne rnabey guet grë zha ngoopdo!. Biinidoo ne biaan lo Moisés dze co, haxta lëbd lo zha Israel gwi zho lo me, per dzega dzega biuu biini co. <sup>8</sup> Scaque nagon nolu Dios xquie!ndzon me, niina ne laa Espiritu Sant nolu zha yгаа miech guie!mban; per, !mazdraa gon nroob nac guie!ndzon rii! <sup>9</sup> Sac gon, te! scataa blu xquie!ndzon Dios zeene biaan guet grë zha ngoopdo!; mazdraa dzigo nroob nac guie!ndzon ne rlu niina. <sup>10</sup> Ne nligaa, palalse ga nac biini ne blu lo Moisés zeene pcaania Moisés ley co, mazdraa nroob biini ne ziaadnie xtiidz cub Dios niina. <sup>11</sup> Ni stiba, bza dze ne been ley co dziin; san!ue xtiidz cub me, gdziñd dze ne gdzëëw. Gacxe waa, mazdraa nac biini ne ziaadniew.

<sup>12</sup> Ni ne ndion!axe no waa gdziñd dze ne gdzëëw, gane tiblique laa no noneew lo miech; <sup>13</sup> rdziuuñd no zig been Moisés. Sac te! Moisés, pquia tib lë lar lo me dzigo gond zha Israel zha bnitlo biini ne biaan lo me ga. <sup>14</sup> Ni rrieequia ye lo grë zha Israel ga sca bdze, gacxe waa, haxta lo nadze rien!d zho zha zhobnee lo Xtiidz Dios, miñe psan me padzeela. Ible rien!d zho ne bdedle dze ne pquiin diidz gol co, Jesús!e none gliladz zho niina. Me nac men ne c!al lo zho. <sup>15</sup> Ne nligaa sca nac zho, haxta lo nadze niicle rlabraa zho lo guits ne pquiaa Moisés ga, tibaque ndip nac zdoo zho.

<sup>16</sup> Per te! zha ne csaan grë guie!ntseeb, dib zdoo zho guien zho cho nac Jesús, ible zlit me lar co lo zho; <sup>17</sup> sac gon, miech ne nacniele zhiEspiritu me, led yedraa zho ngadoo lo ley gol co. Ni ndion! ne gan!e, meque ga nac Espiritu. <sup>18</sup> Gacxe waa, grëse ne ne ngab ne xnëz Jesús, led yedraa lo ne ndze. Masaque nac ne niina zig tib quiewan, zeene ran miech zha mban ne, ga ran zho gan!e pa lotaa nac xquie!ndzon Dios. Tibaque nozhicuaa zhiEspiritu me lo xquie!mban ne, zigse zie dze noluraa me zha nactaa guie!ndzon ne rap me.

**4** Ne nligaa noxco Dios ne, gane niicle peet nond no laa me bzo no quianee no Xtiidz Ndzon me lo miech; ni choot rsaand dziin rii.

<sup>2</sup> Zeene rseed no miech, choot rquidied zho par gliladz zhow. Choot nolud wseed ne ziaate lo Xtiidz Dios; guie!tole ga, te! dzio no yquidiee no miech, cseed no zho ncuaane nacdraa Xtiidz me. Me zobwi gan!e niapse diidzli rnee no, niicle grëгаа zha ne rdziuuñbey no, nan zho rquidieed no.

<sup>3</sup> No grë zha ne ib nëd tsoguic zha nac zhiwseed Dios miñe nonee no; sac lëëque grë xto! zho notse lo zho, laa zho zie nëz ne nitlo zho. <sup>4</sup> Nëd zho gliladz zhow, sac ible men!ox (ma ne nonabey lo guidzliu rii) noyuuñ

ncow xquie|rrien zho; gane rienḁ zho ycaania zho Xtiidz Ndzon Jesús, meḁ ndzon ne biaadlu gaḁle zhapaa nac Dios.

<sup>5</sup> Laa no quiaseed miech, per rseete no zho gacnaḁ zho dieḁ cho nac no, sinque laa no noseed zho guḁbey zho cho nac Jesús. Gacnaḁ zho, ne me nac meḁ ne rn-abey; laa no, tib nguḁdziin winse nac no lo to, sacne rleynie no me. <sup>6</sup> ;Ne nligaa tib nguḁdziin winse nac no! Go|wi gaḁle Dioszhal, meḁ ne bnabey biaanḁ biini ne rziini guidzliu, me bdixbiini guic no bieḁ no xquie|ndzon me ga biaadlu Jesús.

### Rsaand Dios zha ne dib zdoo rnalo me

<sup>7</sup> Ne nlipaa, lega nacse no zig nac tib guies yu ne not-sow grētaa ncuaaḁe ndzon ne zieneedz Dios lo no. Gase na gaḁle rlu, Dios naccheḁa grēsew, peet nond no loxaque nose.

<sup>8</sup> Me nacnie no, niicle nroob zhgab ne rio no, per racmband no; niicle nroob nac guie|xtseeb ne rdziaḁ no, per choot rdziebd. <sup>9</sup> Tibaque notsidi| miech no, per rsaand Dios no; niicle rsacsi zho no zootle laa no nit-lole, per rbiire riochee no ga stib. <sup>10</sup> Zaatne ziotaa no, quiana| miech gut zho no, zigne beenaque zho Jesús; per me rsilaa no ladznia zho. Ga rlu gaḁle ne meḁ mban nac me, ni me nacnie no. <sup>11</sup> Gzataa dze noxtseeb no gut miech no, loxaque ne rdziuuḁ no xtsiḁ me; per ga rdeeda diidz rlu no gaḁle pa lotaa nacnie me no, niicle ne tib lēse beḁ nac no. <sup>12</sup> Ne nligaa, tibaque noxtseeb no lo guie|gut ne znu nonee no Xtiidz Jesús; per scagaa, porne biadnee now i laa to bgaa guie|m-ban ne gneedz Dios lo to. <sup>13</sup> Niicle nagonḁ ne znutaa noxtseeb no, per ndionḁpaa no me quianap no, gane rdziebd no noseed no miech Xtiidz me; zig zhob-neeque lo Xtiidz me, zaatne rnee: "Bliladz naa miḁe rnee me, gane rne naaw." <sup>14</sup> Ni ndionḁ ne gaḁle, zigne bleeban me Jesús, scaque zbeeban me ne, lozh ga tipse gac ne gdziḁnie Jesús ne lo me.

<sup>15</sup> Grēse guie|ḁne ne nodziaḁ no, laaw nodziaḁ no sacne nligaa noxco no to; zeenaḁ grēse to sēeb xnēz me. Sac te|ne ndal grē zha ne sēeb xnēz me, scaquegaa ndal zha ne gdeed xquizh lo me, cxobneḁ zho pa lotaa meḁ ndzon nac me. <sup>16</sup> Miḁcocxe waa, ib choot riablod. Nli zigse zie dze laa no bii noyoxraa, saḁgue zhiespíritu no, zigse zie dze laaw racncubraa, laaw riaanḁmberaa nēz lo Dios. <sup>17</sup> Ni stiba, niicle ne znutaa nodziaḁ no grē guie|ḁne rii, per ncuaaḁe tib rded naca, led ncuaaḁe rnada; sac goḁ, zeenaḁ laa no lozh dieed grē miḁ rii, mazdraa nroob nac lo guie|ndzon ne ygaa no, ni miḁ-cosi gdziḁndraa dze lozha. <sup>18</sup> Gacxe waa, choot rdziuuḁ-casd grē ncuaaḁe quiaziaḁ no lo guidzliu rii, sinque laa guic no nonie ygaa no grētaa guie|bley ne no gbaa. Sac grē ncuaaḁe raḁ ne niina, ncuaaḁe tib rded naca; saḁgue grē ncuaaḁe gard dziaḁ ne ga, led yedraa miḁ co nitlo.

<sup>5</sup> Ni ndionḁ ne gaḁle, zeenaḁ laa xcuerp rii ne nitlo, laa Dios gneedz stib miḁe gdziḁndraa dze nitlo. Masaque nacse xcuerp rii ne zig nac tib yu guizh win ne rbēz miech lo wga; saḁgue cuerp ne gneedz me lo

ne, rrieequia naca zig tib yu ne gbiaazpaa ne gbaa. <sup>2</sup> ;Blactaa guie|ḁne ne rdieed ne niina ne rdziaap ne cuerp rii! Gacxe waa, quiambiaaznē ne gdziḁ dze ne gneedz me stib cuerp co. <sup>3</sup> Sac goḁ, led niapdse es-píritu gdziḁ ga, sinque none gapa cuerp. <sup>4</sup> Ne nligaa, niina ne mbannie ne cuerp rii, zeenaḁ nē nodieed ne, rziaac ne tebaa laa ne mbanniele stib cuerp co. Per par ygaa ne cuerp cub co, ible none guet ne. Per zienied guic ne sca, sinque laa ne racladz zhits cuerp riise tsie cuerp co, zig nacse ne niina ygaa ne guie|m-ban ndzon co. Sca rziaac ne, sac choot rdziladz guet. <sup>5</sup> Dioszhal bzo ne ygaa ne miḁ co, ni ible zaca, sac goḁ laa me px-ee|le Espíritu Sant nacnie ne.

<sup>6</sup> Te| no, miḁ co nagonḁ quiambiaaz no; ndionḁle no la-ga mbannie no cuerp rii, grieelod ygaa no miḁ co, grieelod gdziḁ no zaatne no Jesús. <sup>7</sup> Nli rdziaḁ now niina, per dib zdoo no rliladz no ib laaw none gac.

<sup>8</sup> Gacxe waa, haxta nley rac zdoo no quiambiaaz no gdziḁ dze co; rziaac no tebaa laa no brieel leḁ cuerp rii, zeenaḁ guiobannie no Jesús. <sup>9</sup> Miḁ co nagonḁ, tibaque noxco no gac no zigne rdziladz me, zigtaa niina ne no no lo guidzliu riiw, zigtagaa zeenaḁ gdziḁ no lo mew.

<sup>10</sup> Sac goḁ, grēse ne zdziḁ dze ne laa ne gacredz lo me zaatne guḁ me guie|wxtis. Grēse ne ne nac ne miech, te| zha mban ne niina ne rdziaap ne cuerp rii: zigtaa zha ne zaacse mbana, zigtagaa zha ne te| zhataa mbana, ga ygaa ne miḁe guiogua| ne tib tib ne.

<sup>11</sup> Miḁ rii nagonḁ nonie guic no, gacxe waa noxco no nonee no lo miech zha nac Xtiidz Dios. Ni me naḁ gaḁle dib zdoo no nodziuuḁ no dziin rii, ni racladz naa guieḁ to gaḁle sca nac no.

### Zaacse go|gac lo Dios

<sup>12</sup> Grē miḁe blozh bne naa nu, zig bnele naa ga: naca par dziuuḁnon no no. Laa no rnee grē miḁ rii, zeenaḁ guieḁpaa to gaḁle cho nac no; ni scagaa, guieḁ to zha ctsire to lo xtiidz grē zha ne squi riaad i rlozhḁ gacniats zho. Te| zha, laglaase rlu zho miech wen nac zho. <sup>13</sup> Nligaa, dib zdoo no noxco no xtsiḁ Dios, laa miech masaque rzac zho riotsle guic no. Nana niicle te| riotsgaaw, per xtsiḁ Dios nodziuuḁ no. Saḁgue no, ndionḁpaa no riotsd guic no; laa no rdziuuḁ grē miḁ rii, sacne noxco no cseed to Xtiidz me. <sup>14</sup> Laa no nodziuuḁ dziin rii, sacne rleynie no Jesús, maase te| zhataa rzac miecha.

Ndionḁpaa no Jesús bgaa guie|gut ne niogua| ne; scaquegaa, ndionḁ no niina ne laa no bziaab xnēz me, rrieequia gutle no lo grētaa ncuaaḁe ndzinlid ne bdzi-uuḁ no glo. <sup>15</sup> Gacxe nagonḁ waa, grēse zha ne rzēeb xnēz me, nodraa gban zho zigne notaa guic zho, sinque laa zho none tsoxco gban zho zigne rdziladz me; guieḁ zho gaḁle, me gut bdiizh me xto| zho (ni brieeban me), par ygaa zho tib guie|m-ban ndzon ne gdziḁnd dze lozh.

<sup>16</sup> Gotsaa guieḁ sca, zha ne nole xnēz Dios, ziaacd ne zho zig rzac grēraa miech zho, rzac zho peet nond zho. Te| naa glo sca bzhaac naa Jesús, masaque bzob naa cho|ze miech nac me; saḁgue niina, ndionḁpaa ne gaḁle

cho nac me. <sup>17</sup> Sac gon, grëse zha ne ne nlipaa dib zdoorliladz Jesús, stible miech nac zho. Grëse tel zha goc zho glo, laa miñ co bdedle. ¡Ncube nac lo xquielmban zho! <sup>18</sup> Ni loxaque Diosse gon zrieelo sca gunncub miech. Sac gon, me pxeel Xpëed me Jesús biaadtizh grëse xtol ne, laa ne biaanwen lo me. Ni scagaa niina, me bzo no znu quiaseed no miech, zeena gacnan zho zha grieelo guiaanwen zho lo me. <sup>19</sup> Znu gon naca: Laa Dios nodeed diidz niina guiaanwen miech lo me, gunquizhd me zho tel pe nactaa xtol zho, totsaque gliladz zho cho nac Jesús. Miñ rii nagon bzo me no nonee no lo miech. <sup>20</sup> Golgan sca ganle, xmandad Jesús nac no. Me zobwi ganle laa no rnab lo to niina: ¡Golguiaanwen lo Dios! Golguien ganle, rrieequia gon Dioszhal rso diidz rii lo to. <sup>21</sup> Sac gon, Dios bzo Jesús bgaadz me grëse xtol ne, niicle ne ni tib dol rapd me; zeena niina ne laa ne wbig lo me, grieelo ndzinli gban ne, zigne racladz Dios. ¡Masaque Jesús bdiizh grëse xtol ne, psanwen me ne lo Dios!

**6** Gotsaa gwi ne ganle pa lotaa noxco Dios ne. Gacxe waa, no ne nac no zhingundziin me laa no rso diidz lo to: golguien golgon miñe nonee me lo to niina. <sup>2</sup> Lo Xtiidz me, no tib zaatne znu zhobnee: Lëetse len dze ne nosilaa naa miech, laa to bnab gacnie naa to.

Lëetse len dze ne rdeeda diidz gac miñe quiambëz to, laa grë xliaadz to blanso lo naa. ¡Ni lëe dze co nu nagon bdzin! ¡Nadzegazh quiambëz me gbig miech lo me, zeena csilaa me zho!

<sup>3</sup> Dziin rii quiazduun no, choot quiazduunxtald xtol miech, choot noguibd sozit zho lo Dios. Zaatne ziotaa no, tibaque noxco no zaacse gac no, zeena tsod pe yquiaaqui zho gneenë zho Dios. <sup>4</sup> Zigtaa ncuaañe rdziun now, zigtaa grëgaa ncuaañe nodieed now, rlu no ganle ne nli xtsiñ me nodziun no. Tel pe nactaa grë guielñe ne nodieed no, tel pe nactaa grë xliaadz no, niicle no zaatne rsacsi miech no, per choot rietede. <sup>5</sup> Blactaa zaatne rguin zho no, zaatne rsiogyu zho no, zaatne rrie zho ndal zho racntseeb zho lo no. Blactaa rdib rdzaag no rdziun no dziin, no zaatne rrie zhimcaalo no dipse guieel, no zaatne retgbin no.

<sup>6</sup> Ne nligaa rdioxco no ndzinli mban no, choot rietede, wen wen rdziunbey no zha nac Xtiidz Dios, sca ran miech ganle ne nli Dios pxeel no. Dib zdoorlilynie no samiech no, wen rac no lo zho, zilu no ganle pa lotaa racnie Espíritu Sant no.

<sup>7</sup> Niapse miñe nac diidzli miñ co rnee no, ni scagaa Dios, nolu me ganle ne nli scaw. Niapse guielwen, niapse diidz ndooladz rlu no ne nli lo Dios quiazduun no dziin. <sup>8</sup> Choot rsaand miñe pso Dios no nodziun no, maase niicle miñe runtaa miech no. No zaatne runnon zho no, nogaa zaatne rzhidznie zho no; no zaatne rneenë zho no, nogaa zaatne rlynie zho no. Niicle ne diidzli rnee no, per no zho rzac noquidiee no miech. <sup>9</sup> Runbeyd miech cho nac no, sangue Dios runbey me no. Niicle ne tibaque noxtseeb no lo guielgut, per peet gard gac no laa no bii mban; niicle ne rsacsi zho no, per choot gard guet. <sup>10</sup> Niicle ne no

hor mban rac zdoor, per znusaque rneedz Dios tib guielbley zdoor no. Nacd no zha dimi, per nroob nac grë guielnzaac ne rgaa miech zeene rnee no lo zho. Rdziaapd no grë ncuaañe rap grëraa miech, per ncuaañe rdziaap no, nroob nona.

<sup>11</sup> Bets, bzian, ne no to Corint i, laa no rzodiidznie to, laa no rnee lo to grëse zigne rza zdoor no. Ne nligaa rlynie no to. <sup>12</sup> Telne rzac to gard gacpaa ne tipse, per led nod naca. Tel no rlynie no to, sinque to gon rien no laglaase rlynie no to. <sup>13</sup> Ne nligaa peet rqueets naa lo to, laa naa rne lo to zig rnee tib dad lo mëed. ¡Scaquegaa to, golsiguie! zaacse golgac!

### Zhaa nac biini lo guielcow

<sup>14</sup> Golguien, guiabde to tipse gac to grë to zha ne gard sëeb xnëz Dios. Golgan ganle, tib zha ne nole xnëz me, rdzieeld gac zho zig rac zha ne bii no lo dol. Zig nacgaa biini, zhaa nac biini, zhaagaa nac lo guielcow. <sup>15</sup> Sac gon, tel Jesús, ¿niacxe tipse nac me grë me menodox? Scaquegaa grë zha ne nole xnëz mew, grielod tipse gac zho grë zho zha ne no lo dol. <sup>16</sup> Tel xyadoo Dios, nacda zig nac xyadoo grë mdio. Ni rrieequia gon ne nac xyadoo me, zigne raquiet lo Xtiidz me zaatne rnee:

Na gbannie naa to, iñe sënne naa to.  
Naa gliladz to, ni scagaa to, lo naa ygab to.

<sup>17</sup> Gacxe waa, rbiire me rnee me:  
¡Golriee lad grë zha qui, golbiche lo zho!  
Gunde to grë ncuaañe ndzinlid ne run zho,  
golbig lo naa, naa ycaania to.

<sup>18</sup> Naa gac Pxoz to grëse to,  
scagaa to, laa to gac xpëed naa.  
Lëe xtiidz men ne rnabey to nu.

**7** Bets, bzian, gotsaa gwi ne ganle zha nactaa ncuaañe psan Dios diidz ygaa ne. Gacxe waa, golgotsaa lozh griee ne lo grë zhgab yozh, lo grë ncuaañe ndzinlid ne runctal xtol ne. None zigse zie dze dzioxco-raa ne gban ne zigne rdziladz me.

<sup>2</sup> Ne nligaa, zaacse golgac golcaania no stib. Tel pe guielñe ne noded to, tel zha rzac to, to bguiba; zig nac no, choot noquidiede to, choot nosacside to. <sup>3</sup> Guiabde to togo noquiago naa to nu, laa naa nile ganle dib zdoorlilynie no to. Len ngbidz ne gbantaa no lo guidzliu rii, ib csaand no to. <sup>4</sup> Laa naa rne grë miñ rii lo to, sacne nanpaa naa zha nac to, nanpaa naa zac gne naa lo to zigne nose guic naa. Zeene rsoladz naa to, haxta riaanladz naa grë miñe nodeed naa, iñe riaad tib guielbley zdoor naa; haxta riats naa ne runbey naa to.

<sup>5</sup> Wlal ne blanso no Macedon nu, ni tib lë notiblid guic no; lala noxtseeb no lo grë zha ne quiana! no, lala nonieque to guic no dien yo to. <sup>6</sup> Per rsaand Dios zha ne no lo zhgab, me pchoobladz zdoor no; sac zeene blanso Tit lo no nu, <sup>7</sup> blansonie me diidz zaacse pcaania to me. Per nli rley no bdzion ndzinlile mban to, në me bio to guielñe grë len dze ne bded ga, ni në me nonie no guic to, quiambëz to tebaa zha ganñiob to lo no stib.

<sup>8</sup> Zeene pxeļ naa guits co lo to glo, mban goc zdoo naa sac bien naa ib zgoguelnēw to, saᅅgue niina racmbandraa zdoo naa; sac rien naa niicle ne bio to guielnē tib bla dze, per na laa ncuaaᅅ co bdedle. <sup>9</sup> Gacxe waa rley naa niina, per guiabde to togo rley naa bio to guielnē, sinque rley naa goᅅ naa laa to wbi-ire wbig lo Dios por guielnē ne bio to ga. Ni sca nagoᅅ racladz Dios goᅅ grē zha ne ngab xnēz me zeene ruᅅc-tal zho xtoļ zho, gane rienpaa naa led psacsid no to ga. <sup>10</sup> Zeene Dios rdeed diidz sca rio miech guielnē, lo guielnē co laa zho rbig lo me rsaᅅmbe me zho lo xtoļ zho; rsaan zho teļ pe nac ncuaaᅅ ndzinlid ne noyᅅᅅ zho. Zha ne sca rac-wen lo Dios, nodne gacmban zho guiab zho pe nacne bded zho guielnē co. Laa grēraa guielnē ne raᅅ miech, zig nac zha ne nod xnēz Dios, loxaque rlozh ruᅅmbana zho, laa zho bii zie nēz ne nit-lo zho. <sup>11</sup> Goļgaᅅ gaᅅle, pa lotaa bzhixcuaa to niina ne bio to guielnē co. Haxta baa to biini, bioxco to blee to zha co lo doļ ne quiayᅅᅅ zho ga; bien to gaᅅle nonguiela rliſqui naaw. Gacxe waa, zeene goᅅ to pa lotaa nac doļ co, gūeyniew guic to ni wbiᅅladz to; goᅅdzedraa to zho. Niicle ne gocladz to tebaa i zo naa nedz naa rson dieᅅ zha niuᅅ to; per tibaque beenquizh to zho miᅅe been zho ga. Wen ne sca been to, ga blu to gaᅅle rdziguieᅅde to doļ ne been zho.

<sup>12</sup> Ne nligaa tibaque noxco no zaacse gac to. Zeene pxeel no guits co lo to, guiabd ne togo zhizhgabpaa zha ne been doļ co no no, zhizhgabpagaa pxoz zho; sinque laa no pxeela sac tibaque noxco no zaacse gac to. <sup>13</sup> Gacxe waa, zeene bdzion no bin to diidz been to miᅅe rnee no lo guits co, per nli rley no.

Ni zeene bdzion no grēse to zaacse blēzlo to Tit, mazdraa bley no; niicle megaa rley me ne squi niowse goᅅ to me; haxta nguieel rac me niina. <sup>14</sup> Bzodiidzle naa lo me, ne squitaa wen miech nac to, gane rley naa psande to naa guielto. Teļ naa niapse diidzli rne naa, zig nac niina, zig repse naa lo Tit scase goᅅ me rac to. <sup>15</sup> Rley nie me to, rzac zdoo me zeene rsoladz me grēse to ndooladz goc to pcaania to me, ni bin to diidz been to miᅅe bnabey me to. <sup>16</sup> iNe nligaa, rley naa niina bin naa squi zaacse rac to! iNasi, naᅅpaa naa racnie to naa zigne racnie naa to!

### Dib zdoo to goļdeed gon

**8** Bets, bzian, laa no gzodiidz lo to gaᅅle pa lotaa quiayacnieᅅ Dios grē zha ne ngab lo Jesús nēz Macedon nu. <sup>2</sup> Nli nroob grē guielnē ne quiayaᅅ zho, per nguieel rac zho. Leᅅ dze ne bded nu beenlo zho tib gon, niicle ne zhis ncuaaᅅ rap zho, per nroob gon ne beenlo zho. <sup>3</sup> Laa naa rnew lo to, sac naazhal goᅅa. Ne nligaa, dib zdoo zho bleeladz zho grē ncuaaᅅ bloogon zho; ncuaaᅅ rgaataa lo zho laa zho bdeeda. <sup>4</sup> Dzigo bnab zho lo no gdeed no diidz ye xgon zho guey lo grē zha ne nacgrē ne, zha ne guiend pe yquii. <sup>5</sup> Ni lēdsew ga, bzee zdoo no zeene bdzion no blozhse psāᅅ zho zho ladznia Dios, laa zho wbig lo no nē zho, miᅅe csiaabtaa Dios guic no gnabey no zho, zuᅅ zhow. Ni lalnu goᅅ gūeynied guic no goᅅ zho grētaa miᅅ rii.

<sup>6</sup> Niina ne bdzion no znutaa biabgan zho nēz rii noyᅅᅅlo zho gon rii, nacne rdzieets no lo Tit siguiel me guiaad me nēz lo to i stib; zeena lozh goᅅlo to gon ne bnabeyle me to i quiayᅅᅅlo to. <sup>7</sup> Rdziuuᅅbey no to: dib zdoo to rnalo to Dios, zha niini nac to, rien to zha gnee to Xtiidz Dios lo miech, nguieel rac to ruᅅ to xtsiᅅ me, ni pseed to rley nie to samiech to. Nana sca, zig nac gon rii, scaque dib zdoo to goļtsoxco goļgoᅅᅅlo.

<sup>8</sup> Laa naa bzeta lo to nu zha been zha Macedon, per guiabde to bod nonabey naa to scapaa goᅅ to. Sinque laa naa bzeta lo to, zeena gacnaᅅ to gaᅅle ye zha co pquiabladz bdeed gon co. Nu nagoᅅ rdeeda diidz glu to ne nli rley nie to grēraa zha ne nacgrē ne, led loxaque diidzsew. <sup>9</sup> Goļwi gaᅅle, zig nac Jesús pa lotaa noxco me ne. Niicle ne me naccheᅅ grētaa ncuaaᅅ no, per bdeed me diidz goc me zig tib zha ne peet rapd; ga bгаа ne grētaa guielnzaac ne rap me. Laa me been miᅅ co sacne rley nie me ne.

<sup>10</sup> Wena, tebaa tsoxco to lozh goᅅlo to gon qui. Goļsoladz gaᅅle, topaa psilo bleebey gaclow wdibiz ga, iᅅe nguieel rac to psilo to. <sup>11</sup> Nana sca, zigne psilo to hor co, scaquegaa niina nguieel goļgac goļsiaaļ lo dzi-in co. Goļquiabladz teļ palaltaa ncuaaᅅ rгаа lo to tib tib to, dib zdoo to goļdeeda; <sup>12</sup> sac zeene dib zdoo miech rquiabladz zho cogon zho, teļ palaltaa miᅅe ygaa lo zho, scaania Diosa. Naᅅle me palal ncuaaᅅ rгаа lo tib tib miech, gnabd me ncuaaᅅ ni quianied zho.

<sup>13</sup> Sac nacda ne ygad to grēse ncuaaᅅ rap to lo stib zho, lozh ga guiaaᅅmban to; laa zha yquianie grēsew. <sup>14</sup> Led scada. Laa miᅅ rii rac, zeena grēse ne lalga ncuaaᅅ yquianie ne. Niina ne rgaaw lo to, goļdeed palala yquii grē zha ne rapd nrooba; zdzingaa dze na pe goᅅfalt lo to, dzigo laa zho gneedz teļ pe nacgaa ncuaaᅅ quianiede to. Sca none dziuuᅅlsa ne xyudar zha ne nacgrē ne, zeena zig rne naa ga: lalga ncuaaᅅ yquianie ne. <sup>15</sup> Goļsoladz gaᅅle, znu rnee lo Xtiidz Dios: "Zha ne ptop nrooba, beenᅅa sobr lo zho; niicle been-faltegaaw lo zha ne ptop zhisa."

### Laa Tit guiaad i stib

<sup>16</sup> Xquizh Dios psiaab me guic Tit, zigne rzacaque naa to scaque rzac me to; tibaque nonie to guic no.

<sup>17</sup> Zeene bnab naa lo me siguiel me guiaad me lo to i, bzhiguieelga me; ni nolegaa guic me guiaad me, sac ne nligaa racladz me guiaadso me lo to stib. <sup>18</sup> Nēz rii, no tib bets ne, nroob yudar quiayᅅᅅ me nogaaz Xtiidz Dios lo miech; zaatne rcaalsataa zha ne no xnēz Dios nu, grēse zho ruᅅbey me, tib meᅅ nziuu nac me lo zho. Me gacgrop Tit, niina ne laa no cxeel Tit lo to i; <sup>19</sup> ni meque bzooblo zho, sēnaļ zhits no zeene guiosaᅅ no gon rii. Nozhal guiosaᅅ, sac ne nligaa dib zdoo no noxco no zha gac xyudar grē zha ne guiend pe yquii. Nu rlu gaᅅle pa lotaa meᅅ nroob nac Dios, sac me quiayacnieᅅ ne ne laa dziin rii noyac. <sup>20</sup> Gza no bets co guio, zeena gzadoļd zdoo miech guiab zho nend zha lega zhiieᅅ no palal gon rii, sac goᅅ nligaa nroob naca. <sup>21</sup> Dios zobwi gaᅅle mbe lo no, ni racladz no ye

miech gan zho ganle ne nli zha legal nac no. Miñ co nagon, nache sca guio no gza no.

<sup>22</sup> Rdziuunbey no stib bets ne nu, rdzian no nli dib zdoo me rleynie me Dios. Niina ne laa grop zha co guiaad i, ye me guiaadnal zhits zho. Rley me ne laa me guiaadgan to i, sac ziyon me ye to noxco gacnie to zha ne nacgrè ne.

<sup>23</sup> Tel nanð new cho gnabdiidz lo to dien cho nac Tit, golguiab lo zho tipse nac no grop no me, xyudar naa noyuu me quiaseed no to. Ni tel gnabdiidz zho cho nac schop zha ne ziaadnal zhits me i, dzigo golguiab grè zha ne ne no nèz rii pxeel zho, dib zdoo zho noxco zho mban zho zigne rdziladz Dios. <sup>24</sup> Golguien sca, gza zho zigne ziaad zho lo to i, niowse golcuèzlo zho. Golju ganle ne nli dib zdoo to rleynie to zho, zigne rleynieque to naa; zeena gacnan grèraa zha ne nacgrè ne nli miñe rnee no zeene rzodiidz no lo zho zha nac to.

**9** Nanle naa, rquiindpaa gni naa lo to zha gdeed to gon ne gaclo nu gac xyudar grèraa zha ne nacgrè ne, sac laa to noyuuñolew. <sup>2</sup> Runbey naa to, nanle naa ible rquiablazd to guñ to xyudar zho, gacxe waa rley naa rzodiidz naa lo zha ne no nèz Macedon nu, rne naa lo zho: wdibizlaa psilo to nèz Acay i quiayuuñlo to gon co. Miñcocxe waa, zeene bin zhow, nzian zho pquiablazd laa zho bdeeda. <sup>3</sup> Per laa no rxeel gza bets rii ziaad i, ziaadgunçsoladz zho to lozh gunlo niob tow; zeena glu ganle led lega rneed no zha nac to. <sup>4</sup> Sac gon guielto ga griequia naa lo zha rii, tel guialnie naa bla zho i, ni gan zho peet gard gaclo. Nli ziaan naa guielto, per mazdraa gon nac guielto ne guiaan to. <sup>5</sup> Miñ co nagon, ni naa mazd cxeel naa zha rii, ziaadnerga zho zeena gun zho xyudar to lozh ycaalsa gon ne pquiablazd to gunlo to ga.

Laa naa rnab lo to, tel pe nac ncuane cogon to, dib zdoo to goldeeda. Golguien zha cogon to. <sup>6</sup> Golwi ganle zha nac guielgon: Zha ne zhis ran, zhis guielnzaac ne rcaa zho; sangue zha ne nroob ran, scagaa nroob guielnzaac ne rlis zho. <sup>7</sup> Tib tib to sca, golcobey palal ncuane gdeed to. Miñe gdeedtaa to, dib zdoo to goldeeda; ib gunde to ne guiab to por rac-wnabsew laa to gdeeda. Sac gon, zha ne dib zdoo rdeed ncuane rgogon zho, rleynie Dios zho. <sup>8</sup> Ni me ne nac me meñ ne rrieelo rneedz grèse ncuane rquiin, me nac meñ ne gneedz grètaa ncuane yquiin to; ni haxta ziaan miñe gdeed to gac xyudar grèraa zha ne nacgrè ne. <sup>9</sup> Zigne raquietaque lo Xtiidz me, zaatne rnee:

Zha ne nguzobdiidz lo Dios,  
dib zdoo zho rgad zho ncuane rap zho lo grè zha ne guieñd pe yquiin;

ni scagaa sëeb diidz ne miech wen nac zho.  
<sup>10</sup> Dios gunlay ncuane quianie to, ygaaw gdeed to, ni scagaa me gacnieñ to nroobraa guielnzaac ne yгаа to. Golwi ganle, zha runlay me zha ne ran: Me psan grèse lo bni ne ran zho, ni meque rchooba; rlozh ga, nroob guielnzaac ne rlis zho, rgaaw row zho.

<sup>11</sup> Ne nligaa, Dios nac meñ ne gunnroob ncuane quianie to, zeena scagaa nrooba cogon to. Golguien

ganle, zeene laa no guiosana lo grè zha ne yquiina ga, blactaa gley zho gdeed zho xquizh lo Dios. <sup>12</sup> Led lega nacdse gon ne gdeed to i. Sac gon, led loxaque xyudardse zho guña, sinque zeene laa zho ycaaniaw, haxta squiablazd zho dib zdoo zho gdeed zho xquizh lo Dios. <sup>13</sup> Zley zho gan zho grètaa ncuane cxeel to yquiin zho; ni zleynie zho Dios gan zho ron to miñe rnabey Xtiidz Jesús. <sup>14</sup> Haxta dib zdoo zho gnab zho gacnieñ Dios to, por grètaa guielnzaac ne gdeed me ga yгаа zho.

<sup>15</sup> iXquizh xquielnzaac Dios, sac gon tel me nroobraa nac guielnzaac ne bneedz me lo ne! iGotsaa gwi ne ganle, haxta Xpèèd me bleeladz me!

### Rieguial gnabey Pabl lo zha Corint

**10** Ziyon naa rnee zho i, zeene zose naa zit nguieex rzè xtids naa rxeel naa; laa zeene zo naa lo to, rdziidz naa pe gne naa. Sangue tel naa, tibaque nac naa, ndooladz rac naa lo to, niicle zeen tel pe diidz ne rsogaa naa, ndooladz rne naaw; zig gun Jesús, tel nia-ca miñe mezhaz gnee lo to. <sup>2</sup> iTebaa gdziñd dze pe yquiaaqui glu naa xquieldox naa lo to! Zha ne squi rzac lalaque nac no grè no grèraa miech, rnee zho miñe run miech, miñcoque rdziuuñ no, itebaa siguiel zho zacse gac zho, sac racladz naa tilnie naa zho!

<sup>3</sup> Nli miechse nac no, per ib zionald no gacndaan no zigne racndaan grèraa miech guidzliu. <sup>4</sup> Sac tel no, choot rnalod grè guiib las ne rnalo zho, sinque laa no rnalo poder ro ne rap Dios; miñcosi zrieelo gnitlo grètaa guielntseeb ne racladz mendox gac. <sup>5</sup> Con poder rii, zrieelo csioog no ro zha ne squitaa lega rnee, zha ne racndaan nèd zho gacnan miech cho nac Dios. Grè zha ne racntseeb lo Dios, con poder rii zrieelo co no guic zho gbiire gbig zho lo me, gac zho tib miech nguzobdiidz lo Jesús. <sup>6</sup> Ni poder co yquiin no gnee no lo to lozh guieñ to gban to zigne racladz Jesús; lozh ga, grèragaa zha ne racntseeb, lèèquew yquiin no par gacnan zho ganle zha rieguial gac zho.

<sup>7</sup> Zha ne rnee i loxaque rzedz yan naa, laglaase ga ran zho, nanð zho zhapaa nac naa. Naasi xnèz Jesús no naa; gacxe waa, zha ne rnee xnèz me no zho, none guieñ zho ganle cho nac naa. <sup>8</sup> Nana no to guiab guielniatsle nu, sac rlu naa ne naa rnabey lo to. Per nacda guielniats, ible Dios bzo naa gnabey naa lo to, ni laa me bzo naa par glu naa zha tsienal to grè miñe rnabey me, bzod me naa par yquidiee naa to tsienal to nèz ne nitlo to. <sup>9</sup> Golgacnan sca ganle Dios bzo naa, guiabde to togo lega rnese naa par ctseb naa to. <sup>10</sup> Sac nanle naa no zha ne rnee i: "Gonde to miñe rnee meñ qui. Loxaque lo guits ne rxeel me squitaa ndox rzè xtiidz me, per loxaque diidza. iZeene zo me lo ne, tib zha yozhsew, per ni rieñd me zha gnee me!" <sup>11</sup> Per led scada gon. Niina ne laa naa guial i, laa naa glu lo zho ganle zigne rzè xtids naa zo naa zit, sca nac naa.

<sup>12</sup> Ib guiabde to, togo ye naa quiayuuñ zigne run zha qui, lèèque lèè zho runniats zho. Tib guieln xen ga, sac gon lèèque zha runnon zho. <sup>13</sup> iTel no, choot rdziuuñnitsd no ncuane ni nacd no! Ni zeene rnee no cho nac

no, per miñe bzo Dios no nodziuuñ no miñ co rnee no; ni mecxe waa bzo no quiaseed no to.

<sup>14</sup> Ible rioguañ ne no gnabey lo to, sac gon no gloopaa biaad i biadseed no to zha nac Xtiidz Ndzon Jesús; choot noziaabd zaatne rioguañd no. <sup>15</sup> Stiba, rdziladzd no gdaannie no xtsiñ stib miech. Laa no bii cseed to lozh tsoguc to zha nac Xtiidz Dios, zeena haxta ye le to guñ xyudar no ygaazraa Xtiidz me. <sup>16</sup> Dzigosi nagon laa no guio grëraa guiedz ne ndxie dib nëz qui, guioseed no zho gacnañ zho zha laa zho lo dol; per zig rneque naa ga, guiosiaabd no zaatne psilole stib zho, zeena gañ miech gañle rdaannied no xtsiñ stib zho.

<sup>17</sup> Znu ziaad lo Xtiidz Dios, zaatne rnee: "Zha ne zienie guic xoobneñ lë zho por dziin ne ruñ zho, mazd tsoxco zho xoobneñ lë Dios." <sup>18</sup> Sac paat rquiinda ne lëëque ne gunnon ne, miñe mazdraa rquiin nacne Dioszhal glu zha non nac ne.

### Nlid Dios pxeel zha qui

**11** Laa naa rnab lo to, i goñxew yquiaadiag to miñe gne naa nu, niicle tel no miñe rzac to rquiind! <sup>2</sup> Golgacnañ gañle, zigne rzac Dios to scaque rzaac naa to, ib racladz naa cho guiaadquidie to. Miñe racladz naa Jesússe gleyne to, zig ruñ wnaa nguieg ne no xtiidz ctsieelnia. Sac tel wnaa nguiega, mgui ne no xtiidz zho mgui cose rleyne zho, haxta rdziñ dze ne rtsieelnia zho. <sup>3</sup> Sca none grieequia to lo me; per rdzieeb naa gon nend zha yguib menodox yquii ma to, gondraa to miñe rnabey Dios, dzigo laa to gac zig rac grëraa miech ndzinlid. Sac gon tel Ev, sca pquii ma Ev.

<sup>4</sup> Laa naa rzet miñ rii lo to, sac rien naa, zha ne riaadtaa i ween rdeed to diidz rquiaadiag to zhiwseed zho. No zho rzeet Jesús, rzeetгаа zho espíritu, per rzeete zho me zigne biadseed no to; rneegaa zho zha laa miech lo dol, per nacda zigne pseedle to glo. <sup>5</sup> Haxta rnee zho, rienraa zho lo grëraa zha ne noteed Xtiidz Dios; sangue naa, nanpaa naa led scada, zrieelo glu naa lo zho gañle peet rien d zho. <sup>6</sup> Nend nli gacd naa gne naa zigne rneetaa zho, per zeene rne naa rienpaa naa ne diidzli none naa; ni ziyañlegaa tow gañle.

<sup>7</sup> Rzaac naa lëda ga beñ naa, zeene bial naa bialseed naa to Xtiidz Dios; sac rsoladz to gañle ib peet bnabd naa lo to, scase bialseed naa to. Niicle mban bdeed naa, per bioxco naa wbig to lo Dios bgaa to guieñzaac nroob ne rap to niina. <sup>8</sup> To rieguiañ needz ncuaaņe nquiin naa, na leñ grë zha ne nole xnëz Jesús leñ dze co, zha co pxeel ncuaaņe pquiin naa, rrieequia bla naa xtimi zho ga. <sup>9</sup> Niicle bdziñ dze ne peet guieñdraa lo naa, per ni tib lo to ib psodziind naa; lëëtaque leñ dze co biaad bla zha bets ne zha ne ziaad nëz Macedon, zha co biaadnie ncuaaņe pquiin naa. Ib peet bnabd naa lo to hor co, ni gdziñdgaa dze ne pe gnab naa.

<sup>10</sup> Ni golgacnañ gañle, ib tedsod sodiidz naa grë miñ rii dib nëz Gres i. Ible zuñ naaw, led yed naa rquidie, sac gon ruñbey naa zha nac Xtiidz Jesús. <sup>11</sup> Per guiabde to togo rlëënie naa to, racladz naa csañ naa to guieñto; sac Dios zobwi gañle rleyne naa to. <sup>12</sup> Golgacnañ sca led scada, sinque laa naa gon miñ co, zeena csioog

naa ro zha ne rlozhd gacniats i, rnee zho ye zho quiayun xtsiñ Dios zigne quiadziuuñ now. <sup>13</sup> Sangue no, ndion no nlid Dios pxeel zho, lega noquidiese zho to i squi no zho, rquiaalo zho zig nacne nli xtsiñ Jesús quiayun zho.

<sup>14</sup> Ni led ncuaaņe gzeed zdoo ne ga. Sac ible sca ruñ menodox, no hor rzëeb ma rded ma zig tib xmandad Dios. <sup>15</sup> Gacxe waa, i zha ne squi ruñ xtsiñ ma, miñ-coque ruñ zho rquiaalo zho rac zho zig cho miech wen, rquidie zho miech! Per dzziñ dze ne laa zho ygaa guieñdëdox ne tsieguiañ zho, zaatne tsietizh zho grëtaa miñe noyun zho i.

### Blactaa ncuaaņe zadeed naa

<sup>16</sup> Laa naa rnab lo to nu stib, goñquiaadiag miñe gne naa, niicle tel rzë xtidz naa zig rzë xtiidz zha ne rzhinle guic. Nli lega niats gne naa, per goñxew gon tow, sac laa naa gunnon naa zig ruñ grë zha qui. <sup>17</sup> Led Jesús rnabey znu gne naa, sinque masaque laa naa gon miñ rii, zig ruñ tib zha ne riotsle guic. <sup>18</sup> Tel squitaa niats rac zha qui lëëque lëë zho ruñnon zho, lozhd gool zho lo to dieñ pe nac ncuaaņe noyun zho; goñquiaadiaggaa miñe gne naa nu na gañle:

<sup>19</sup> Conque rzac to name nixbiini to, i zha nac dzigo rdeed to diidz rquiaadiag to ncuaaņe rnee grë zha yozh qui? <sup>20</sup> iPe ib rien de to gañle quianabeyzhoole zho to i, quiasacsi zho to, quiaquidie zho to, quiala zho grë ncuaaņe rap to, quiasañwin zho to, ya zig zgap zho lo to? <sup>21</sup> iHaxta rtoladz naa gon, sac laa ne naa squi nabey to leñ zhale squitaa no!

Grë ncuaaņe riats zho i nac zho, ye naa zrieelo sca gunniats naa naa (znu nagon rac zha ne rzhin guic). <sup>22</sup> iTelne riats zho rnee zho zha Israel nac zho? Yecxe naa waa zha Israel nac naa. iTelne rnee zho lo dii ne bzooblo Dios ga ziaad zho? Ye naa lo dii co zial naa. iTelne rnee zho Abraham nac xmengol zho? Men cocxe waa nac xmengol naa. <sup>23</sup> iTelne niats rac zho rnee zho xtsiñ Jesús quiayun zho? Gacnañ zho gañle, naasi xtsiñpaa me quiayun naa. Nroob dziin ne ziyun naa, blactaa ncuaaņe zadeed naa, pe zhidaa zigo miech naa ladzguiib, blactaa zineedz dooguid zho naa, blactaa zaatne zadedlaa naa lo guieñgut. <sup>24</sup> Gaayle vuelt zisacsi zhiwxtis zha Israel naa, galptsibguieega nia dooguid bneedz zho naa. <sup>25</sup> Tsonle vuelt zineedzyag zho naa, stib vuelt bneedzquie zho naa. Tsonle vuelt zadzieelo naa rdedquie barcw ne no naa leñ nisdoo; tib vuelt, tib dze tib guieel bzhoobse naa lo nisdoo. <sup>26</sup> Pa lotaa grë dan ne ziya naa. Nzian vuelt ne bdedlaa naa niet naa: zaatne bdedlaa naa lo nis guiubee, zaatne bdedlaa naa lo ngbaan, zaatne bdedlaa naa lo grë menzit, zaatne bdedlaa naa lo grë menladz naa. Ziyoxtseeb naa lo guieñgut, zigtaa zaatne nac leñ guiedza, zaatne nac dana, zaatne nac lo nisdoo, zigtagaa lo grë zha ne laglaase rquiaalo rliadz Jesús. <sup>27</sup> Blactaa rdib rdzaag naa ruñ naa dziin, blactaa guieel ni niip raagiesd naa, blactaa zaatne retgbin naa, zaatne retnis naa, zaatne rcuan naa, zaatne mbanse rcuub naa ni guieñd lar ne piix naa. <sup>28</sup> Ni

zhaaque tibaque nonie guic naa dien yo to, grëse to ne nac to zha ne nole xnëz Dios, zha no to tib tib guiedz zaatne squi blansole Xtiidz Dios. <sup>29</sup> Zeene ron naa cho tib to racladz guiaan zdo, mban rac naa zeene rrieelod gane naa lo zho; zeene rongaa naa cho tib to quiauyñctal xtoñ stib zho, ni rrieelod galisqui naaw lo zho, scaque mban rac zdo naa.

<sup>30</sup> Grë miñe bne naa nu, nacda guieñniats; telne rieguialpaa gunniats naa naa, mazd gzet naa grë miñe rlu ganle peet gacd gun naa naase. <sup>31</sup> Zig bzhaac naa tib vult zeene bia naa Damasc, len dze co zob tib gbernador nac dziin lo rey Aret. Bnabey gobernador co xmennguiib me pquianap zho gzase puert ne rap biedz nroob ne ndze igo ro guiedz co; nan me naaz zho naa ngo zho naa ladzguiib. Per brieelod naaz zho naa, sac grë zha ne nole xnëz Jesús ga, zeene bin zhow dzigo bloo zho naa tib len chicuid pteed zho naa tib ro ventan ne quia cho biedz nroob co. Sca bdeeda diidz brie naa ga, biabd naa ladznia gobernador co.

Ni Dios gon, men ne nac Pxož Jesús, men ne rieguial dziuunnon ne gzataa dze, me zobwi ganle diidzli rne naa.

#### Racniatsd Pabl

**12** Nanle naa nonguielda lëëque ne gunniats ne, per laa naa sodiidz lo to ganle zha nac grë ncuaañe zinabey Dios zilulo lo naa, ni grëgaa miñe zinee me lo naa.

<sup>2</sup> Niina rac tsiida iz ga blis Dios naa güeynie me naa gbaa. Nanñ naa dien pe dib znu naa bia naa, te zhiespírituse naa ye güeynie me; loxaque mese nan dien zha güeynie me naa. Loxaque miñe bien naa ne laa naa bia lugar ndzon co, <sup>4</sup> ga bin naa grë diidz ndzon ne wialtaa gard gon miech, ncuaañe guieñd zho zha naca, ni nodgaa diidzbey gne naaw. <sup>5</sup> Zrieelopaa nagon gunniats naa naa ne laa naa bia ga, per ib gund naa miñ co. Laa ne gunniats naa naa zig rnele naa ga, mazd gzet naa grë miñe rlu ganle peet gacd gun naa naase. <sup>6</sup> Ni tel gacladzgaa naa gunniats naa naa por miñe blozh bzet naa nu, led guieñxend ga gun naa; sac miñe nlipaa goca. Per rund naa miñ co, sac laa naa racladz tozhal guieñ cho nac naa, beñque ran to ganle zha mban naa, rangaa to zha rne naa.

<sup>7</sup> Ne nligaa ndzondoo nac grë ncuaañe blu Dios lo naa ga, zac nazho gunniats naa naa sac naa gona; per parne gund naa miñ co, laa Dios bdeed diidz biaad tib xmandad menñox psanwin naa, biaan tib yoob xcuerp naa zig nac zeene pe tib guiets nroob ne niaaz naa. <sup>8</sup> Tsonle vult zinab naa lo Dios ctiche me yoob rii; <sup>9</sup> biontaa vult në me lo naa: "Bui ganle laa naa naciele luu, ni miñ co nac miñe rquiinraa lo luu. Peet tsienied guic luu sca, zha ne squi nsis rac, ga rdeeda diidz rlu naa ne nli naa naciele zho." Miñ co nagon rley naa, sac ne znu nsis rac naa, grëse miech zeene ran zho grëtaa ncuaañe rrieelo run naa, rien zho nli Jesús naciele naa. <sup>10</sup> Ne nligaa rley naa, sac niicle ne miech gzhe gzhele rac naa, niicle nroob guieñne ne nodeed naa, niicle rbidzgo miech lo naa, rtsidiñ zho naa, no hor

guieñd pe yquiin naa, per rley naa sac laaw nodeed naa porne no naa xnëz Jesús. Rne naa rley naa, sac zeene sca zootle grieequiadraa naa lo zhgab ne no naa, hor co laa Dios rlu ne me naciele naa.

<sup>11</sup> ¡Nligaa lega guieñxenle nu znu rne naa, rac naa zig tib zha ne rzhinle guic! Per to gon rap dol, sac laa ne cxobneñ to nli miech wen no, leñ zhaa miñe noyun to. Nli nacd naa cho zha non, per tsod ncuaañe csanwin grë zha qui naa, niicle ne squitaa rzac zho zha rien nac zho, niicle ne rnee zho Dios pxeel zho. <sup>12</sup> Gol-soladz ganle, zeene bialseed naa to i, blu naa lo to ne nli Dios pxeel naa noteed naa Xtiidz me, blactaa grë ncuaañe bneedz Dios diidz blu naa lo to, blactaa grë milagr, blactaa grë ncuaañe bzee zdo to gon to. Biod dze ne nieednie naa to. <sup>13</sup> Lëëse miñe beñd naa lo to i, nacne nab naa needz to pe nquiin naa; sac grëraa zaatne ziyaseed naa miech, zha rneedz ncuaañe rquiin naa. ¡Golgun dispensar telne rbiñladz guic to miñ co!

#### Nonie zha Corint guic Pabl

<sup>14</sup> Laa naa nozhixcuaale par guialgan naa to stib. Nu gac tson vult guial naa lo to i; ni scaquegaa niina gon ib csodziind naa lo to. Sac tel naa, noguibd naa dien pe gneedz to lo naa, sinque to guialguib naa. Golguieñ ganle, niicle ne racladzde to, per rrieequia gon mëed nac to lo naa; ni ndion ne ganle, led mëete rieguial gdeed ncuaañe yquiin dad, sinque dad none gdeed ncuaañe yquiin mëed. <sup>15</sup> Ne nligaa, tib guieñbleya lo naa quiateedlo naa to, laa naa noxco guieñ to zaacse gban to, zeena gdziñ to zaatne gneedz Dios cuëz to. Xco co no naa, ib rquiad zdo naa lozh grë ncuaañe rap naa, o lozhgaa naa lo xco co; maase niicle squi zootne laa ne rleyneraa naa to, leñ nozozit to lo naa.

<sup>16</sup> Nanle naa, no bla zha ne rnee i: "Nli peet bnabd me zeene biadseed me ne, per ne squi miech ndzielguic nac me bod no pa stib mod ne rienñd ne quiaban me ne." <sup>17</sup> Nana, zig nac zha ne zixeñ naa ziyaadgan to i, ¿pe niacxe biaadban zho to? ¿Pe niacxe biaadquidie zho to? <sup>18</sup> Naa quia bnab naa favor lo Tit biaad me i, ni pxeñ naa stib zha bets ne biaadgrop me. ¿Pe no pe bnab zho lo to? Golgacnan ganle nodziunñd no miñ co, sac zigtaa naaw, zigtagaa mew, dib zdo no nodziunñ no dziin rii, choot noquidied miech.

<sup>19</sup> Nana gza zdo to guiab to bod parne guiaanwen no lo to, gane znu rne naa. Dios zobwi ganle led scada. Bets, bzian, grë miñe none naa lo to nu, laaw rne naa sacne racladz naa lozh tsoguc to gban to zigne nac Xtiidz Dios. <sup>20</sup> Sac gon, rdziladzd naa telne glanso naa lo to i, ni gan naa racde to zigne racladz naa; dzigo niicle togaaw, tsod zdo to zeene gan to laa naa glisquiw. Adeñ gon zeene laa naa glanso i, leñ diñ no to; zha ne në rac zdo dien cho stib noded, zha ne nozhixcuaa diidzguizh, zha ne quianeene, zha ne quiaayacniats; nend haxta chop tson diile nac to. <sup>21</sup> Tel gan naa sca rac to, mbe gon stoladznie naa to ni haxta siaabguieñne to naa; sac nanle naa ni lalnu rdziladzd Dios grë miñ co. Zig nac grë zha ne squi padzeelale quiauyñctal xtoñ ni rsaand zho grëtaa guieñyožh, grë-

taa ncuaañe ndzinlid ne bii quiayun zho, mbe gon si-  
goon zho naa.

### Rso Pabl diidz

**13** Niina nagon ne gac tson vult guiaigan naa to, te pe nactaa falt ne cho quiayun i, guiaanda scase. Zigne rnee lo Xtiidz Dios: Te no chop zho, tson-gaa zha ne nappaa zha nac falt co, zha ne beena ga ib none laa zho quizh xfalt zho. Nu rac bion vult ne rso naa diidz rii lo to. <sup>2</sup> Laaw nile naa lo to lultm vult ne bialgan naa to, ni niina laaw rneque naa stib: Grëse zha ne quiayunctal xto i, zigtaa zha ne padzeelale squi no, zigtagaa zha ne wriin psilow, gacnan zho ganle zeene laa naa glanso i, grëse miñe quiayun zho ib tedlaad zho, laa naa gunquizh zhow zigne rieguial zho. <sup>3</sup> Ga gan to ganle nli Jesús rnabey naa, ni Xtiidz me none naa lo to; sac mesi gon, gdziguiend me sca gac to, sinque zigne racladz me sca none gac to. <sup>4</sup> Nli nguudz goc me bdeed me diidz pquiaa zho me lo cruz horco, sangue niina men rnabey nac me; laa me mban niina niapse por poder ne rap Dios. Ye no, zig nac niina miech nguudz nac no, per ible zгаа no tib guielmban ndzon, sacne me nacie no; ni zrieelo gnabey no to sacne rdziaap no xpoder me.

<sup>5</sup> Nana sca, tozhal golcobey dien zha mban to. Wen wen golcobey dien pe nli dib zdoo to rliladz to Jesús. ¿Pe nli mban to zig none gban zha ne rliladz me? ¿Pe zig zie dze rienraa to ne me nacie to, me rnabey lo to? ¿Te loxaque diidzse ye nac ne laa to rliladz me? <sup>6</sup> Sangue no gon, wen wen ndion no zha mban no, ndionpaa no ne lo Jesús ngab no.

<sup>7</sup> Tibaque rnab no lo Dios cxobnia me guic to zaacse gban to. Ni guiabde to togo par guianziuu no lo

miech gane noxcopaa no zaacse gac to; sinque laa no rdziuuña parne gban to zigne rieguial gban zha ne nli no xnëz Dios. Miñ co nagon noxco no, niicle te rzac to lëda nu quiadziuu no. <sup>8</sup> Sac te no, laa no zional gac to miech wen, zha ne zienal miñe nac diidzli; choot ziaate par lega gactox no lo to. <sup>9</sup> Gacxe waa, tib guiebley nroob ga lo no, te ne zhal to znuse xixcuaa to, gac to zha ne nlipaa dib zdoo rleyne Dios; laa ne yquiambëz to guiaadlisqui no grë ncuaañe noyun to. Laa no racladz gdziñ dze ne gac to zigne rdziladz Dios, ni miñcogaa quianab no lo me.

<sup>10</sup> Laa naa rso diidz rii lo to lo guits ne rxei naa nu, sacne racladz naa gactox naa lo to zeene laa naa glanso i. Nli Dios bzo naa rnabey naa lo to, ni miñe racladzpaa naa nacne lozh tsoguic to zhiwseed me; ib racladz naa yquiaago naa to.

<sup>11</sup> Nu ne laa naa csiaal lo guits rii, laa naa rnab lo to bets, laa naa rnab lo to bzian: Nley golgac, goitsoxco gban to zigne racladz Dios, zha ne mban rac, golchoobladz zdoo zho; iñe niowse golban, tipse golgac. Scagaa Dios zleyne me to, ni haxta zacnie me to zeena peet ctsebde to.

<sup>12</sup> Nana sca, tib tib zha ne nacgrë to golquiaabdiuzh zho, iñe golxen nia zho. Grëse zha bets ne, zha bzian ne, zha ne rliladz Jesús nëz rii; laa zho rxei bdiuzh lo to. Golcaania zhibdiuzh zho.

<sup>14</sup> ¡Dios sca guiaañie to! Ine nley golgac, golgan ganle pa lotaa rleyne me to. Peet tsienied guic to, Jesús nac men ne noxco grë zhizgab to; ni scagaa Espíritu Sant gacnie to tibaque tipse gac to.

Pabl



# GALATAS

¡Diuzh to grëse to!

**1** Naa nac Pabl, tib zha ne pxeel Dios nonee Xtiidz Ndzon me lo miech. Led miechd bzoo naa, led miechd pxeel naa, sinque Jesús pxeel naa, me ni Dios Pxoze me, men ne bleeban me.

<sup>2</sup> Laa naa rxeel tib guits rii ziaad lo to zigne no to nëz Galás i, nac to zha ne ngab lo Jesús; rquiaabdiuzh naa to, ni scagaa grë zha rii laa zho rxeel bdiuzh lo to.

<sup>3</sup> Dios men ne nac Pxoze ne, ni Jesús men ndzon ne rnabey, me nac men ne tsoxco grë zhizhgab to, zeena peet tsienied guic to. <sup>4</sup> Jesús bdeed xquieimban bdiizh me xto ne, psilaa me no lo grëtaa guieintseeb ne no lo guidzliu rii, laaw been me zigne gocladzse Dios men ne nac Pxoze me. <sup>5</sup> ¡Gotsaa dziuunnon ne Dios sca, ni gdziind dze ne csaan ne dziuunnon ne me! Sca rieguiaja.

<sup>6</sup> Rzee zdoo naa gon ne gardle gac nroob dze ga, laa to bzozitle lo Xtiidz Ndzon Dios, men ne bredz to pcaania me to, porne nquialadz Jesús to. Wseed ne riladz to niina, masaque rzac to na mincogaa csilaa to lo dol. <sup>7</sup> Per guieindraa stib wseed ne gon csilaa ne lo dol. Miñe naca zha ne biadseed to i, lega rquidiese zho to, racladz zho ctsëe zho miñe nac Xtiidz Ndzon Jesús.

<sup>8</sup> Grëse zha ne guiaadnie stiblo wseed miñe pseete no to, ni gnë zho lëe min co csilaa to lo dol; zha ne sca gon, miech ndziibdeele ga nac zho. Te chotaa sca gon, niicle te naazhala, tib anj ne quietgaa gbaaw, ible dzidibdee Dios zho. <sup>9</sup> Bnele naaw lo to, ni na laaw rneque naa stib: Te cho zha ne guidseed to stiblo wseed miñe pseete no to, ni gnë zho lëe min co csilaa to lo dol, ible dzidibdee Dios zho.

<sup>10</sup> Nana gon ne znu rne naa, no to guiab parne guianzuiuu naa lo miech gane znu rne naa; per golgacnan ganle, quiaguibd naa guianzuiuu naa lo miech, sinque laa naa noxco gon naa miñe rnabey Dios. ¡Sac telne lel ncuane gleyne miech noxco naa, nlid dzigo xtsiin Jesús ga noyuu naa!

## Jesús pxeel Pabl gnee Pabl Xtiidz me

<sup>11</sup> Bets, bzian, golgacnan sca ganle: Wseed ne nac Xtiidz Ndzon Jesús, miñe biadseed naa to, led guicd miech biaba. <sup>12</sup> Paat biad naa nseed miech naaw, sinque Jesús zhal bneedza lo naa.

<sup>13</sup> Led nanle to ganle, zha nactaa grë miñe ben naa zeene bii no naa lo zhiwseed zha Israel; ptsidi naa grë miech ne no xnëz Jesús, blëenie naa zho, pquiana naa nlóozh naa zho. <sup>14</sup> Bzhoob diidz ne naa nac zha ne pseedraa lo grë menladz naa, zha ne tipse biagrëe naa

scuel; naa nac zha ne neer lo zho, sac naa run grëse miñe rnabey zhiwseed zha Israel, ni naa rioxcoraa run grëse miñe been grë pxozgol no. Sca nagon goc naa lo zha Israel.

<sup>15</sup> Ible güeynied guic naa, antes ne gal naa laa Dios bzooblote naa gunbey naa Xpëed me; laa me bleextsole naa, niapse porne nquialadz me naa. Zeene bdziñ dze co <sup>16</sup> laa me blu me lo naa, bzo me naa ga naa zaatne ndxie grë miech ne nacdraa zha Israel, gaseed naa zho Xtiidz me miñe glu zha laa zho lo dol. Zeene blozh gon naa Xpëed me, biad naa niaguib naa ne goon dien cho nseed naa, <sup>17</sup> ni niicle biadgaa naa Jerusalén, nianabdiidz naa lo grë zha ne pxeelle me nonee Xtiidz me; sinque laa naa bia nëz Arab, wbirole naa nëz co, dzigoraa bdziñ naa Damasc stib.

<sup>18</sup> Gocle tson iza dzigoraa bia naa Jerusalén, hor coraa beenbey naa Pedr; blëz naa lo me ga tsiin ngbidz. <sup>19</sup> Gaque beenbey naa Jacob bets Jesús, laa grëraa zha ne pxeel Jesús noyuu xtsiin me, ni tib zho gon naa. <sup>20</sup> Dios zobwi ganle diidzli nac grë miñe rne naa nu, led lega rned naaw.

<sup>21</sup> Zeene brie naa ga, laa naa bia nëz Siria ni nëz Cilis. <sup>22</sup> Grë zha Judé zha ne nole xnëz Jesús, gard gunbey zho naa len dze co. <sup>23</sup> Diidz ronse zho rnee zla zha ne nacgrë zho: "Men ne scataa pquiana ne, yele me noseed miech Xtiidz Dios, ni glo scataa gocladz me nitlo mew." <sup>24</sup> Dzigo rley zho, rdeed zho xquizh lo Dios ne yele naa riladz Jesús.

## Rcaania zho Pabl

**2** Zeene blozh tsiida iza, dzigo laa naa biire bia Jerusalén stib, bio no grop no Bernabé, ni bionie no Tit. <sup>2</sup> Laa naa bia, sac ib Dios blu lo naa ne no ga naa. Dzigo ga pcaalsa no grë no zha ne zo rnabey lo grë zha ne no xnëz Jesús ga, bzodiidz naa lo zho zha noseed naa grë zha ne nacd zha Israel Diidz Ndzon ne rlu lo zho zha laa zho lo dol, ni naa zeena guien zho ganle ne nli rquiin dziin ne benle naa, ni miñe quiayungaa naa. <sup>3</sup> Ni nligaa bley zho bin zhow.

Niicle ne led zha Israeld nac Tit, per bnabeyd zho niopaa Tit bey ne rio grë zha Israel. <sup>4</sup> Per lo zha ne zioobgza no ga, lad co brieequia bla zha ne bnab nio Tit bey co, per choot pquiaadiagd xtiidz zho. Nac diidz ye zho riladz Jesús, per nlida; ib blud zho cho nac zho, ngueets bzëeb zho lad no biadleets zho dien zha mban no, niina ne Jesúsle rnabey no, rnabeydraa ley no. Gocladz zho nquiaadiag no xtiidz zho, biire ndziun no miñe rnabey ley. <sup>5</sup> Per ni palal bdeete no diidz

niac miñe rnee zho, laa no racladz guiaanñie to Xtiidz Ndzon Jesús miñe rlu zha laa miech lo dol, sac miñ co nac diidzli.

<sup>6</sup> Grè zha non ne zo rnabey lo grè zha ne no xnèz Jesús ga (zha non guiab ne, per ndion ne ganle grèse ne tibaque nac ne nèz lo Dios) <sup>7</sup> ib peet blisquid zho lo naa, niicle peet pseetragaa zho naa. Sinque laa zho gocnañ ganle ne ib Dios bzoo naa guñ naa xtsiin me, gaseed naa grè zha ne nacd zha Israel guien zho zha laa zho lo dol; zigne bzoque me Pedr noseed Pedr zha Israel. Dios meñ ne bzo Pedr quiaseed Pedr zha Israel, lèèque me bzo naa quiaseed naa grè zha ne nacd zha Israel.

<sup>9</sup> Gacxe waa, zig nac Pedr, Jacob, Juan, zha ne zo rnabey lo grè zha ne rliladz Jesús ga, laa zho bien ne ible naa bgaa guieInzaac rii, bneedz Dios dziin rii lo naa. Dzigo rley zho haxta bzheñ zho nia no grop no Bernabé, laa no biaan diidz ne zha tsieseed zha Israel, laa no guioseed grè zha ne nacd zha Israel. <sup>10</sup> Lèèse miñe pso zho diidz lo no, dzioxco no dziuun no xyudar grè zha ne guienñd pe yquiin; ni nligaa ib nonguiel miñ co ni laaw noyoxco naa.

#### Ractox Pabl lo Pedr

<sup>11</sup> Laa zeene bиаad Pedr Antioquí, dzigo ga nli laa naa goctox lo Pedr, sac ncuane ndzinlidraa quiayun Pedr. <sup>12</sup> Glo, grèse zha ne nacd zha Israel zha ne rliladzle Jesús, rzènie Pedr zho, tipse rbenie Pedr zho zeene laa zho row; ni blozh ga, zeene laa bla zha ne pxeel Jacob bdziñ ga, pasèraa Pedr sca tipse niownie zho, laa Pedr bzozit lo zho. Rdzieb Pedr zha ne bdziñ ga, sac lèè zha co racladz, grèse zha zit ne rzèèb xnèz Jesús ib none tso zho bey ne rio zha Israel. <sup>13</sup> Grè zha Israel ne nolie xnèz Jesús ga, yeque zho laa zho gocnie Pedr lo xtseb Pedr ga, haxta ye Bernabé wbig lo zho. <sup>14</sup> Nacne zeene gon naa sca zienaIdraa zho zigne nacpaa wseed ne ziaadnie Xtiidz Dios, squi ndxie grèse zha ne rcaalsa ga goctox naa lo Pedr, rep naa: "Luugase name niicle ne zha Israel luu, ni mband luu zigne nac zhiwseed zha Israel, ¿pe nac dzigo ne racladz luu gnabey luu grè zha ne nacd zha Israel, gban zho zigne nac zhiwseed zha Israel?"

#### Zha rlaa miech lo dol

<sup>15</sup> Golquiaadiaga ganle, tel no desde gol no zha Israel nac no, nacd no zigne nac grèraa miech ngoopdol ne nac stib nacion; ible pseed no grè miñe nac xley zha Israel. <sup>16</sup> Sangue niina laa no ndion ganle, niicle mazdraa guñ miech miñe nac ley grieelod guiaanñwen zho lo Dios, sinque zha ne dib zdoo gliladz Jesús, zha co nac zha ne guiaanñwen lo me. Gacxe waa, ye no laa no bliladz Jesús dib zdoo no, zeena guiaanñwen no lo Dios; ni laa no guiaanñwen lo me porne dib zdoo no rliladz no Jesús, nacd porne dziuun no miñe nac ley. Sac gon niicle zha ne tsoxcoraa guñ zho grè miñe nac ley, grieelod guiaanñwen zho lo Dios.

<sup>17</sup> Nana ne laa no wbig lo Jesús parne guiaanñwen no lo Dios, no zha ne rzac dol ga. Masaque rzac zho xtol no ga rdziuunñtal no porne rliladz no Jesús, per, ¡led scada gon! <sup>18</sup> Mazd dol ga guñ naa, telne rlozhle rseed naa miech rne naa lo zho ne led leyd nac miñe csilaa ne lo dol, ni lozh ga naaque no lozhd tsoxco guñ grè miñe nac ley. <sup>19</sup> Sac tel naa, ib brieelod niun naa grè miñe rnabey ley, ni zha ne rguiits ley gon ib none guet zho; gane niina masaque rriequia laa naa gutle. Niina ne laa Jesús gut por grè xtol naa, rriequia ye naa gutnie me ga, zeena grieelelo guñ naa miñe rnabey Dios. <sup>20</sup> Led naadraa nu znu mban, Jesúsle nu mbannie naa, ni guieImban ne mban naa niina, lèè miñ rii bneedz Dios lo naa porne rliladz naa Xpèèd me, meñ ne rquia zdoo naa, meñ ne bleeladz xquieImban ga beet zho me bdiizh me xtol naa. <sup>21</sup> Nana, telne niaca miñe nli zrieelo guiaanñwen ne lo Dios porne guñ ne miñe nac ley, zhlèse ga dzigo biaadguet Jesús. Golgacnañ sca ganle, Jesússe nac meñ ne csañwen ne lo Dios, gacxe waa nonguielIda ga csañ ne me tibladd, ni pa lotaa ga pquia zdoo Dios ne.

#### Jesús none gliladz miech

**3** ¡Nadzpaa nxen to nac to zha Galás! ¿Pe goc to, cho biaadgunñgüet guic to squi rac to? Pe led zeene biadseed no to, wen wen gocnañ to cho nac Jesús, ni zha nacne sca beet miech me lo cruz. <sup>2</sup> Zhal to golcobey dien, ¿pe ne been to grè miñe nac xley zha Israel, laa to bgaa guieIbiini chen Espíritu Sant, te ne bliladz to Xtiidz Diosa ye? <sup>3</sup> Pa lotaa gon rdziñ lo xquieInxen to i, conque laa to gonle ganle ne niapse por guieIbiini chen Espíritu Sant laa to psilo mban tib guieImban cub, ni na nanaque to tsienal to ley. <sup>4</sup> Pe nli-paa rnee to, ¿pe lega scase nazho gon to grè guieInè ne pteed miech to, zeene psilo bliladz to Xtiidz Jesús? <sup>5</sup> ¡Golzhixcuua guic to! Golguien ganle, laa Dios bneedz zhiEspíritu me lo to, ni laa me noyun grè milagr lo to, per nacda porne run to miñe rnabey ley, sinque porne dib zdoo to rliladz to Xtiidz mew, miñe biadseed no to. <sup>6</sup> Zig Abraham, porne dib zdoo me bliladz me xtiidz Dios miñe rèb Dios lo me, gane pcaania Dios me zig tib zha ne peet xtol. <sup>7</sup> Golgacnañ sca ganle, grèse miech ne dib zdoo gliladz Xtiidz Dios, grèse zha co laa Dios ycaania zho zig xpèèdpaa Abraham. <sup>8</sup> Ni miñe nodziañ ne niina, ib lo Xtiidzle Dios zhobneew, zeene bnee me ne grèse miech ne nacd zha Israel, silaa me zho telne dib zdoo zho gliladz zho me. Lèè miñ co ga bnee me zeene znu rèb me lo Abraham: "Grèse miech ne ndxie dibdoo lo guidzliu, zha ne dib zdoo gliladz naa zigne rliladz luu naa, zunlay naa zho." <sup>9</sup> Gane grèse zha ne dib zdoo rliladz Jesús, runlay me zho zigne beenlayaque me Abraham, zeene laa Abraham bliladz me dib zdoo Abraham.

<sup>10</sup> Sangue zha ne rnalo ley ne lèew csilaa zho, laa zho noyac ndziibdeele ga, sac lo Xtiidz Dios no tib zaatne rnee: "Ndziibdee grè zha ne grieelod guñ grèse zigne nac ley." ¡Ni tsod zha ne gon grieelelo guñ grèse miñe rnabey ley! <sup>11</sup> Gase naganle rlu tsod tib zha ne grieelelo

guiaanwen lo Dios por guñ zho miñe nac ley; ni laaw zhubneeque lo Xtiidz Dios zaatne rnee: “Zha ne guiaanwen lo Dios, laa zho guiaanwen porne dib zdoos zho gliladz zho me; ni zha co yгаа tib guiełmban ndzon.”<sup>12</sup> Led yed ley rnab dien cho dib zdoos gliladz; sinque rneew: “Zha ne racladz gban, none guñ zho grēse miñe rnabey ley.”

<sup>13</sup> Miñ co nagon, grēse ne nac ne miech laa ne biabdee, sac brieelod mban ne zigne nac ley. Per niina, laa Jesús biaadsilaa ne lo grētaa dee co, masaque lēē grē dee ne nac ne ga bi me zeene sca pquia me lo cruz; zigne zhubneeque lo Xtiidz Dios, zaatne rnee: “Miech ndziibdee ga nac grēse zha ne ret rquiangaazho tib lo yag.”<sup>14</sup> Ni por miñe sca bded Jesús ga, miñ co niina grēse miech ne nacd zha Israel, zac yгаа zho grēse guiełnzaac ne bzeet Dios lo Abraham ga; ni nicle tib tibгаа zha ne ngab lo mew, scaania zho Espiritu Sant, Espiritu ne rēb me cxeel me lo grē zha ne dib zdoos gliladz me.

### Zha ne nlipaa nac xpēēd Abraham

<sup>15</sup> Bets, bzian, laa naa gzet ncuaane rac lo guidzliu rii. Nanle to ganle, zeene laa chop miech run tib trat, rquia miñe rnee zho ga lo guits ni rquia lē zho lo guits co grop zho; zeene laa lē zho pquiase ga, ni tib zho gacdraa ctsēē trat co. <sup>16</sup> Nana gotsaa gwi ne ganle zha been Dios: Psañ me xtiidz me lo Abraham, ni tib lo men ne griequia lo xtii Abraham. Raquiete nzian zho, rēbd me: “grē zha xtii Abraham”, sinque tibaque men ne bzeet me, ni lēē men co ga nac Jesús.

<sup>17</sup> Znu nagon nac miñe quiane naa lo to nu: Tib trat ga been Dios grop me Abraham, zeene rēb me scaania me grēse zha ne dib zdoos gliladz me; ni ible laa xtiidz co me biaan zig tib trat ne quia lē me lo. Miñ co nagon, grieelod ctsēē ley trat co; zig nac ley, blozhle tap gayoo galptsii iz biaan xtiidz co me zeene laa ley biaad.

<sup>18</sup> Nana, telne por guñ ne miñe rnabey ley, laa ne yгаа grē guiełnzaac ne bzeet Dios lo zhitrat me gdeed me por tib men ne griequia lo xtii Abraham; ¿pazhe dzigo rquiin trat co? Sac lo trat co gon raquiet ne por tib men ne griequia lo xtii Abraham, laa me gneedz guiełnzaac co lo ne.

<sup>19</sup> Nana gnē to: “¿Pa dzigo rquiin ley ne laa ley biaan, ni tel nole trat co glo?” Laaw biaan gon zeena glu ganle zha nac miech, ib rond zho miñe rnabey Dios zho, laaw been dziin laga bdziñ dze ne laa men ne briequia lo xtii Abraham ga biaad, men ne bzeet Dios ga zeene psañ me xtiidz me lo Abraham. Ni tel ley, dze ne pcaania zha Israela tib xanj Dios pxeel me bdeeda lo Moisés, dzigo Moisésle psaña lo menguedz Israel.

<sup>20</sup> Sangue dze ne been Dios trat co grop me Abraham ne laa me csilaa miech lo dol, pxeeld me cho tib miech, cho tib anjlgaa niaadnie xtiidz me; sinque mezhal biadnew lo Abraham.

### ¿Pa rquiin ley?

<sup>21</sup> Nana gnē to: “¿Zig gocladz dzigo lēē nsiooglo xley Moisés lo trat ne been Dios ga?” ¡Led scada! Sac grieelod yгаа ne guiełmban ndzon ne gdziñ dze lozh ga, telne gnalo ne ley; ib grieelod ley csañwena ne nēz lo Dios. Telne niaca miñe nrieelo ley nsilaaw miech lo dol, nod pe nacne dzigo nxeel Dios Xpēēd me, biaad me biadbee me miech ladznia dol (sac rnee lo Xtiidz Dios masaque ngadoo miech lo dol). Jesússe gon zrieelo csilaa miech lo dol, totsaque dib zdoos zho gnalo zho me, mese zrieelo gdeed guiełmban ndzon co lo zho.

<sup>23</sup> Zeene gard guiaad Jesús ga, laa ley co pquiin pquianapa ne zigne rquianap wxtis zha ne nioogyu, laga bdziñ dze ne laa me biaad. <sup>24</sup> Zig tib ngudziaan ne riaan nie mēēdwin, sca pquiin ley co lo ne, pseeda ne zha gban ne, ni gacnan ne cho nac Jesús, men ne csilaa ne lo dol zeene dib zdoos gliladz ne me.

<sup>25</sup> Sangue niina ne laa Jesús biaadle, led ley codraa gnabey ne, ni nicle rquiindragaa pe cseeda ne.

<sup>26</sup> Gacxe waa, tel to xpēēdle Dios nac to porne dib zdoos rliadz to Jesús, <sup>27</sup> ni grēse zha ne brobnisle porne no zho xnēz Jesús, laa zho rlu ganle ne Jesúsle nacie zho, ni laa zho zienal gban zho zig racladz me.

<sup>28</sup> Miñcocxe nagon waa, grēse ne tibaque nac ne niina, guiełndraa ne goon cho nac zha Israel, cho nacгаа zha zit; dien cho nac ngundziin, cho nacгаа zha ne rnabey; goon dien cho nonraa pe mguiw te wnaaw ye; sac grēse zha ne naciele Jesús, tibaque nac zho grē zho.

<sup>29</sup> Ga nagon, telne ngable to lo Jesús, dzigosi nli zha xtii Abraham nac to, ni zгаа to grē guiełnzaac ne bzeet Dios zeene psañ me xtiidz me lo Abraham.

### Zha ne nac xpēēd Dios

**4** Golgona ganle, nligaa tib mēēdwin lēē, niicle guiaan nie win ncuaane rap pxoz win, per lega nase win zig tib nguñdziin win ne run xtsiñ pxoz win. Niicle chen win grē ncuaan co, per grieelod win gnabey wina. <sup>2</sup> Laa win riaan ladznia zha ne ran win, zha ne rseed win dien pe nac ncuaane guñ win, laga gdziñ dze ne laa win zacle ycaania ncuaane psañ pxoz win.

<sup>3</sup> Scadaa nagon bzhiac ne glo zeene gard guiaad Jesús, rriequia masaque ngadoo ne lo grē ley co, ni lo grēraa ncuaane rac lo guidzliu rii. <sup>4</sup> Laa zeene bdziñ dze ne laa Dios pxeel Xpēēd me Jesús lo guidzliu (tib wnaa bded por xniaa me, bzoob me diidz been me grēse zigne rnabey xley zha Israel), <sup>5</sup> laa me biaadsilaa ne, biadbee me ne ladznia ley co, bdiizh me grē xtol ne, zeena ycaania Dios ne gac ne mēēd lo Dios. <sup>6</sup> Ni parne glu ganle ne nli xpēēdle Dios nac ne, pxeel Dios zhiEspiritu Xpēēd me blēz zdoos ne; gacxe waa niina laa ne rien rnee ne lo me: “¡Papá yeen!” Espiritu co rnee ne Pxoz ne nac me.

<sup>7</sup> Ga nagon, led yedraa niina nac ne zig cholze cho ngundziin, sinque xpëedle Dios nac ne, ible ye ne yгаа grë guie|nzaac ne rap Dios.

### Rnee Pabl rnabeydraa ley

<sup>8</sup> Bets, bzian, go|soladz ganle, zee|ne bii gard gunbey to me|n ne nacpaa Dios, masaque rrieequia ngadoo to lo ncuaane nac zhimdio to hor co, rdib rdzag to run to grë mi|ne rzac to rdziladz grë mdio co. <sup>9</sup> Nana, laa to runbeyle Dios, mazd gni naa ganle ledaa Dios runbeyle to, |pe nac dzigo racladz to gbiire tsiegan to, tsiequitsgzhib to lo grë mdio co, gbiire guiab to ladz- nia grë ncuaane paat rquiind co, gnabeya to? <sup>10</sup> Rquia to gon run to grë lni, die|n pa meë ndzonraa, die|n pa dze nac dze ndaraa, pa iz nac iz ne ndaraa, die|n pa dze zac pe gow to, pa dzeegaa gacda. <sup>11</sup> |Rdziejnie naa to gon! |Pe nlipaa zhlëse bialseed naa to, ne squi laa to racladz csaan mi|ne bialne naa lo to!

<sup>12</sup> Bets, bzian, laa naa rnab lo to go|ban zigne mban naa, te| naa niicle ne zha Israel nac naa per zana|draa naa mi|ne nac xley zha Israel. Ngadoodraa naa lo ley, gane rne naa: Go|ban zigne mban naa. Ni guiabde to togo bod nend no pe falt ne been to lo naa. <sup>13</sup> Led rso- ladz to ganle, rzacne naa le|n dze ne psilo pseed naa to zha laa to lo do|; mi|n co nacre nzianlaa dze blëz naa lo to i. <sup>14</sup> Niicle ne sca rzacne naa, gon|dze to naa; laa ne mbix zdoo to nian to xquie|guidz naa, znu pquia zdoo to naa, rley to blëzlo to naa pale cho xan|l Dios o Jesús- gaa, te| niaca mi|ne mezhal niaadseed to. <sup>15</sup> |Ne nlipa- gaa rleydox to le|n dze co! Te| niaca mi|ne niac mbee to bziaalo to, zootle zig mbee tow ngad tow lo naa. |Yo grë guie|bley co na? |Yo ne scataa rleyne to naa le|n dze co? <sup>16</sup> Nana, pe rëb to rlëe naa lo to ne znu rne naa mi|ne nacpaa diidzli. |Lëda gon!

<sup>17</sup> Go|quiaadiaga ganle, grë zha ne gon squi ziadseed to i niina, nli laa zho noxco to per zhaa ncuaane no guic zho. Laa zho racladz tebaa zha guiaanladz to naa, csaan to grë mi|ne bialseed naa to, zee|na gbig to lo zho. <sup>18</sup> Rtsidi|d naa pe nacre cho gacnie to, totsaque zha ne nli nquialadz tow. Zig nac naa tibaque noxco naa to, led loxaque zee|ne zodse naa lo to i. <sup>19</sup> |Xin, ne nlipagaa gon rdedne naa ran naa squi rac to! Masaque nac guie|ne rii lo naa niina, zig tib yoob ne rquia grë me|n wnaa ne gap meëd. Ni lëe nole naa guie|ne rii nu nagon, haxta gdzi|n dze ne gan naa laa to wbiire wbig lo Jesús stib. <sup>20</sup> Tebaa niaca mi|ne grieelo guialzhaal naa lo to i niina, zee|na gan naa zha no to, dzigo die|n zha gnegaa naa lo to; per na ne znu zit zo naa, nan|d naa die|n pe nacraa ncuaane noy|n to.

<sup>21</sup> Zha ne racladz gnabey xley zha Israel zho, racladz naa gnë zho die|n, |pe ib riend zho zha zhobnee lo guits ne ziaad Xtiidz Dios <sup>22</sup> zaatne raquiet xingan Abraham? Rneew: Chop xingan Abraham, tib meëd co gop wnaa ne nac ngundziin lidz me, laa stib meëd gop wnaa ne nacpaa tsieel me. <sup>23</sup> Xpëed wnaa ne nac ngundziin ga, laa win goc meëd zig grëraa xpëed miech; san|gue meëd ne gop tsieel me ga, laa win gol porne ib Dios rëb ne laa me yquianie win.

<sup>24</sup> Lo grop wnaa co, tibga me rlu ganle zha nac grop trat ne been Dios: Mi|ne bzhaac Agar, ga rlu ganle zha nac trat ne been Dios guic gui Sinaí. Grëse zha ne zien- a|l trat co, nac zho zig goc xpëed Agar, ladz nia trat co no zho. <sup>25</sup> Gzoob ne Agar nac Gui Sinaí, gui ne riaan nëz Arab; me nac guiedz Jerusalén ne ndxie le|n dze rii, sac te| grë menguedz Jerusalén, masaque ngundziin nac zho lo ley. <sup>26</sup> San|gue wnaa ne gocpaa tsieel Abra- ham ga, rrieequia me nac Jerusalén ne no gbaa, za- atne ngab grë zha ne no xnëz Jesús, sac led yedraa grë zha co ngadoo lo ley; ye ne ngab ga, ni gzoob ne lëe xniaa ne ga nac wnaa co. <sup>27</sup> Lëe Jerusalén co ga raquiet lo Xtiidz Dios, zaatne znu rnee:

Luu, ne nac luu wnaa ne brielod niap meëd, bley ni- ina;

ngui|e|l goc, nguiedz broptsie lo guie|bley qui, luu ne bdzi|nd dze niacna|n luu zha nac yoob meëd. Sac gon ndalraa xpëed wnaa ne brielod niap meëd, lëdle grë xpëed wnaa ne gop meëd.

<sup>28</sup> Bets, bzian, go|gacna|n sca ganle, laa ne nacle niina zig Isaac, xpëed tsieelpaa Abraham, wnaa ne gacd yquianie meëd ga; sac te| Isaac, ib Dios psan diidz ne laa Isaac gac meëd lo Abraham. <sup>29</sup> Ni zigne sca blënie xpëed wnaa ngundziin co Isaac, meëd ne Dioszhal psan diidz gal ga; scasaque niina, no zha ne rlëe ran zho ziona|d ne mi|ne rnabey ley, sinque laa ne ziona| dib zdoo ne rililadz ne Jesús. <sup>30</sup> Ni nana, led lo Xti- idzaque Dios zhobnee ganle zha rëb Dios lo Abraham, rëb me: "Wnaa ne nac ngundziin lo luu i, bzonz me grop xpëed me, nongui|e|d ne ye meëd qui guiaan|nie ncuaane csa|n luu lo xpëed tsieel luu." <sup>31</sup> Gacxe nagon waa, te| ne nacd ne zig xpëed wnaa ngundziin co, sinque laa ne nac zig xpëed tsieelpaa Abraham.

### Dziits go|so

**5** Peet lo ngadoodraa ne niina, sac gon laa Jesús bi- aadsilaale ne, sinque to none dziits so zee|na ygadoode to lo xley zha Israel. <sup>2</sup> Naa nac Pabl, ni naazhal rne lo to nu. Go|gona sca ganle, te|ne laa to gdeed diidz tso to xbey zha Israel, nacniedraa to Jesús ga dzigo. <sup>3</sup> Ni laaw gneque naa lo to nu stib, grëse zha bgui ne rio bey co, ib none gon zho grëse zigne rnabey ley co. <sup>4</sup> Zha ne rzac por gon zho grë mi|ne rnabey xley zha Israel, mi|n co laa Dios csilaa zho lo do|, gacna|n zho ganle, le| nozozit zho lo Jesús ga; ygaad zho guie|nzaac ne yгаа zha ne gnalo Jesús. <sup>5</sup> San|gue te| no, ndion|paa no silaa Dios no lo do|, sacne dib zdoo no rililadz no Jesús ni nacie Espí|ritu Sant no. <sup>6</sup> Sac zha ne nli nole xnëz Jesús, peet liaadz nodraa zho bey ne rio zha Israel. Mi|ne noxcoraa zho nac ne dib zdoo zho gililadz zho Jesús, ni scagaa grieelo gleynie zho samiech zho.

<sup>7</sup> |Ese tow nli! |Pex goc to waa? Zaacse name rac to zee|ne psilo to bliladz to mi|ne nac diidzli. |Cho pquii|l to ne nëdraa to tsienal| tow? <sup>8</sup> Mi|ne squi nonie guic to i ni- ina, led zhiwseete Dios i, me|n ne bredz to grie|e to ladz nia ley. <sup>9</sup> Go|guien sca, adel| ye to sac zig rëb diidz ne rnee: "Niipaxe ncobi waa run|csibe ncob guietxil."

<sup>10</sup> Per nanpaa naa, ible meṅ ndzon ne rnabey ne meṅ co gacnie to, zeena csaande to miṅe nac diidzli; ni zha ne squi racladz guṅgüet to, teḷ chotaa nac zho ib ted-sod siaabzi Dios zho.

<sup>11</sup> Bets, saṅgue naa teḷ niaca miṅe nli ye naa quian-abey tso grè zha ne rliladz Jesús xbey zha Israel zig quianee zha qui, bod goonzhe ni ctsidiḷdraa zha Israel naa dzigo, glèèdraa zho zig rlèètaa zho niina zeene ron zho rne naa zha nacne biaadguet Jesús lo cruz.

<sup>12</sup> Zha ne squi ziaadnabey tsopaa to bey ne rio zha bgui nèz Israel, ḷtebaa mazd ladaque zho yga zho, ni icxe gdib nacse zho waa cueniaaḷ zho, led tsod zho noyuuṅneed zho to! <sup>13</sup> Bets, goḷguien ganle ne ygadoo-draaxe to lo ley waa, miṅ co nacne biaadsilaa Jesús to. Per guiabde to togo ne laa me psilaale to, laa to guṅ ncuaaṅe guiaabtaa guic to. Guṅscade to, sinque tib tib to goḷleynie samiech to, ine goḷguṅ ncuaaṅe rquiin grè zha ne nacgrè to; <sup>14</sup> sac niina totsaque gban to zigne rnabey Dios nu: “Bleynie samiech luu zigne rleynieque luu luu”; lèèle grè miṅe nac ley ga guṅ to. <sup>15</sup> Per teḷ laa ne gleynie to zha ne nacgrè to, leḷ diḷ no to, zig ruṅ grè ma ne lèèque ma noquiaalaylsa, lèèque ma noyowlsa; dzigo lèèque to gnitlo to ga. ḷGuṅscade to!

### Zha ne lega mbanse

<sup>16</sup> Gacxe, laa naa rnab lo to: Goḷtsoxco goḷban zigne racladz Espíritu Sant, ni me gacnieṅ to; led tsoḷde to dieṅ zha guṅ to grè ncuaaṅe ndzinlid ne racladz xcuerp to. <sup>17</sup> Sac goṅ grèse ncuaaṅ co, rleynie Espíritu Santa. Laa xcuerp ne ruṅ ncuaaṅe racladz Espíritu Sant, ni ncuaaṅe racladzga Espíritu Sant néd xcuerp ne gac miṅ co. Guṅde to miṅe racladz xcuerp to sca. <sup>18</sup> Teḷne gban to zigne rnabey Espíritu Sant, dzigosi nodraa pe nacne ygadoo to lo xley zha Israel.

<sup>19</sup> Ni miech ne sca ruṅ grè ncuaaṅe ndzinlid, ib paat ngueetsd zho:

rionie zho zha ne led tsiæld zho,  
ruṅ zho grè ncuaaṅe ndzinlid ne racladztaa xcuerp zho,

<sup>20</sup> riegaṅ zho grè mdio,  
rnab zho pe sac samiech zho,  
rlèènie zho samiech zho,  
rdiḷnie zho samiech zho,  
rzac zho adeḷ cho glale tsiel zho,  
rnadse pew laa zho rlèèle,  
ruṅctiḷ zho miech,  
rguib zho rtso miech,

rbeextso zho dieṅ cho zha ne gacnie zho,  
<sup>21</sup> nè rac zdoo zho raṅ zho ncuaaṅe quianie stib miech,

rzudz zho,  
rcaalsa zho zaatne loxaque rowcho zho, ni ruṅ zho grè guieḷyozh.

Grè ncuaaṅ co ruṅ zho ni grèragaa ncuaaṅe ndzinlid ne sca nac. Laa naa rbire rso diidz lo to, guṅde to grè ncuaaṅ co; sac goṅ grèse miech ngoopdoḷ ne sca rban, grieelod gdziṅ zho zaatne rnabey Dios.

<sup>22</sup> Saṅgue zha ne zienaḷ miṅe racladz Espíritu Sant, znu nac zha co:

rleynie zho samiech zho,  
tibaque nguieeḷ rac zho,  
peet dzeb nonied guic zho,  
rxecw zho, riedniobd zho,  
niowse rnee zho lo samiech zho,  
niapse ncuaaṅ wen ruṅ zho lo samiech zho,  
ruṅ zho miṅe rnee zho guṅ zho,  
<sup>23</sup> miech ndooladz nac zho,  
zha rnabey xcuerp zho.

Ni teḷne gban ne zigne nac grèse miṅ rii, ni tib ley noguiitsd ne ga. <sup>24</sup> Grèse miech ne nli xnèzle Jesús no, zieniedraa guic zho guṅ zho grè ncuaaṅe ndzinlid ne bzoobladz zho padzeela, grè ncuaaṅe ndzinlid ne racladznè xcuerp zho, sac rien zho paat rquiind ncuaaṅ co lo zho. <sup>25</sup> Gacxe nagoṅ waa, teḷne nli mban-nie ne guieḷmban ne nneedz Espíritu Sant, goḷgotsaa dzion ne miṅe rnabey me. <sup>26</sup> Dzigosi gacniatsdraa ne lo samiech ne, tsienaḷdraa ne dieṅ cho glaaraa guiaaṅ, tso ne nè gac zdoo ne gaṅ ne grè ncuaaṅe rap zho, ncuaaṅe racgaa zho.

### None gacnie ne samiech ne

**6** Bets, bzian, teḷne gaṅ to laa cho tib zha ne nacgrè to noyuuṅ pe tib doḷ, dzigo to ne nac to zha ne nli-paa zienaḷ miṅe rnabey Espíritu Sant, to goḷnee lo zho. Diidz wen, diidz ndooladz goḷco zdoo zho gbiire xix-cuaa guic zho; ni scagaa tib tib to none nsin so to, sac goṅ adeḷ nenda yeque to sca sac. <sup>2</sup> Zeene raṅ to zha ne mban noded, goḷguṅ xyudar zho, goḷchoobladz zdoo zho, sac goṅ sca rnabey Jesús gban miech.

<sup>3</sup> Teḷ zha ne rzac zha non nac zho, ni laa zho peet nond zho; lèèque zha noguitnie zho ga. <sup>4</sup> Tib tib to, wen wen goḷguien dieṅ pe quiayuuṅ to, teḷne ncuaaṅe ndzinliw ine goḷley, per tsoḷde to glèè zdoo to gaṅ to miṅe ruṅ stib zho. <sup>5</sup> Sac tib tib ne, psose Dios ne pe nac xtssiṅ me miṅe guṅ ne.

<sup>6</sup> Grè zha ne noseed Xtiidz Dios, ib none ncuaaṅe rgaataa lo zho gdeed zhow yquiin zha ne noluw lo zho.

<sup>7</sup> Tsienie wguite guic to sca, sac goṅ led yed Dios guiab ne quitnie ne. Tib tib ne, teḷ pe nac miṅe ruṅ ne miṅcoque ctsire me lo ne. <sup>8</sup> Zha ne ruṅ grè ncuaaṅe ndzinlid, lèè miṅe cueequia zho ga laa zho nitlo. Laa zha ne guṅ grè miṅe rnabey Espíritu Sant, lèè miṅe ygaa zho ga nac tib guieḷmban ndzon ne gdziṅd dze lozh. <sup>9</sup> Gacxe nagoṅ waa, tibaque gotsaa dzioxco ne dziuuṅ ne ncuaaṅe ndzinli, ncuaaṅe rquiin, guieete ne; sac teḷne sca tibaque dzioxco new, zeene gaḷ dze co laa ne ygaa miṅe guioquiaḷ ne. <sup>10</sup> Zeene gdeedtaaw diidz sca, goḷgotsaa dzioxco ne dziuuṅ ne xyudar grèse samiech ne, ni nana zeene zha ne noque xnèz Dios nac zho, mazdraa rieguiaḷ dziuuṅ ne xyudar zho.

### Rso Pabl diidz

<sup>11</sup> ḷGoḷwi ganle, naazhal pquia nu! ḷGoḷwi ganle mbee mbee nac letr rii pquia naa rso naa diidz lo to! <sup>12</sup> Grè

zha ne gon squi racladz tsopaa to bey ne rio zha Israel, laa zho runa zeeṅa glëëniéd miech zho, zigne rlëënie zho grë zha ne rseed miech ne ib laa Jesús gut lo cruz, psilaa me grëse miech lo dol.

<sup>13</sup> Nana, niicxe grë zha ne nole bey co, run daque zho grë miṅe rnabey ley; sinque laa zha qui nagon quiaguib tebaa gdeed to diidz tso to bey, zeeṅa sca lozhd guiats zho ne zha bnabey to bio to bey.

<sup>14</sup> Saṅgue tel naa, ib quiaguibd naa ne dieṅ zha gacniats naa, sinque laa naa quiaguib gacnaṅ miech ganle zha nac ne laa Jesús gut lo cruz. Sac tel naa, por grë miṅe bded Jesús ga, grëtaa ncuaaṅe no lo guidzliu laaw psaṅ naa tib lad; ni niicle naagaa, sca rzac grë miech guidzliu naa. <sup>15</sup> Grëse zha ne ygab xnëz Jesús, nacda ne dieṅ cho no bey ne rio zha Israel, chogaa no-

da; sinque miṅe non nacne ctsëë Dios lo xquieṅmban zho.

<sup>16</sup> Grëse to ne nac to zha ne zienaṅ diidz ne rso naa nu, Dios yquia zdoo to, ni me gacnieṅ to ctsebd grë zhgab to; niicle tow ni niicle grëragaa zha ne ngable lo mew.

<sup>17</sup> Bets, bzian, golgacnaṅ sca ganle, ib racladzdraa naa gon pe yquiaaqui gbiire gaquiet miṅe bnele naa lo to nu; sac tel naa, grëtaa mdel ne no xcuerp naa nu, lëëlew nac bey ne rlu ganle ne nli lo Jesús ngab naa, ni xtсии me noyuṅ naa.

<sup>18</sup> Jesús meṅ ndzon ne rnabey ne, me tsoxco grë zhizhgab to. Sca gaca.

Pabl

# EFESIOS

¡Diuzh to grëse to!

**1** Naa nac Pabl, tib zha ne pxeel Jesús nonee Xtiidz me lo miech, sac ible Dios bnabey ne sca gaca.

Laa naa rxel guits rii lo to grëse to bets, grëse to bzian, zigne nose to guiedz Efés i, ne nac to zha ne ngable lo Dios niina ne tiblque laa to riladz Jesús.

<sup>2</sup> Dios men ne nac Pxoze, ni Jesús men ndzon ne rnabey, me glu lo to guien to ganle pa lotaa noxco me to, ni me gacien to ctsebd grë pe zhgab to.

<sup>3</sup> ¡Gotsaa dzioolnie ne Dios, Pxoze Jesús, men ndzon ne rnabey ne! Sac gon, zha nactaa grë guielnzaac nroob ne bneedz Espiritu Sant lo ne niina ne laa ne ngab xnëz Jesús. <sup>4</sup> Haxta zeene gard cue guidzliu, bzooblo Dios ne gac ne zha ne gdziñ lo me zeene laa ne gliladz Jesús, gac ne tib miech peet xtoñd, zha ne gban zigne racladz me. <sup>5</sup> Nquialadz me ne, gane bzooblo me ne gac ne xpëed me zeene laa ne gliladz Jesús, ib me sca bnabey gaca sac ib sca gola zdoo me.

<sup>6</sup> Miñcocxe waa tibaque none dzioolnie ne Dios, sac gon zha wentaa me lo ne, pxeel me Xpëed me men ne nquialadz me ga, biaadgunlay me ne. <sup>7</sup> Ne nligaa nquialadzdox Dios ne, gane pxeel me Xpëed me bzhiiee xchen psilaa me ne lo grë doñ ne ngadoo ne, been me ne perdon grë doñ co. <sup>8</sup> Ni led loxaque miñcodse, sinque haxta bneedz me guielrien lo ne, bdixbiini me ne, <sup>9</sup> ni bneedz me diidz gocndion ne pe nac miñe no zdoo me, miñe mese nan, miñe nole me gun me. <sup>10</sup> Sac niina laa ne ndionle: Grëse ncuaañe no gbaa, ncuaañe no guidzliu, tibaque gaca grëw ni Jesús gnabeya grësew; sca gaca zeene laa dze co gdziñ.

<sup>11</sup> Grëse ncuaañe bnabeyle Dios no gac, run mew zigne racladz me. Gotsaa gwi ne ganle, glole bzooblo me ne ygaa ne grë guielnzaac ne nacle diidz gdeed me lo grë zha ne no xnëz me, guielnzaac ne bgaa ne zeene laa ne bziaab xnëz Jesús. <sup>12</sup> Ni laa me bzooblo ne, zeena ne ne nac ne zha ne glopaa psilo bnalo Jesús, cxobnen ne lo miech ganle pa lotaa men nroob nac me.

<sup>13</sup> Xquizh Jesús, ye to zeene laa to psilo pquiaadiag diidzli, Diidz Ndzon ne rnee ganle zha laa to lo doñ, ni bliladz to cho nac Jesús, laa Dios pxeel Espiritu Sant lo to zig tib bey, bey ne rlu lole me ngab to; zigne bneele me glo. <sup>14</sup> Ne znu pxeel me Espiritu Sant nacie ne, ga rlu ganle ib nli zgaa ne grë miñe bneele me gdeed me lo grë zha ne ngab lo me, ni lëe miñ co ygaa ne zeene gal dze ne laa me blozh psilaa grë zha ne ygab lo me; zeena grë ne gleynie ne me por squitaa men nroob nac me.

## Rnab Pabl guielbiini lo Dios

<sup>15</sup> Zeene gocnan naa ne nlipaa dib zdoo to riladz to Jesús, ni ne nli nquialadz to grëraa miech ne no xnëz Dios, <sup>16</sup> rded naa xquizh lo me. Zeene rzodiidznetaa naa me, rsoladz naa to, rnab naa lo me gneedz Espiritu Sant guielbiini lo to guien to cho nac me, zeena lozh gunbey to me. Lëe me nac xDios Jesús, lëe me nac Pxoze ndzon ne. <sup>18</sup> Rnab naa lo me quixbiini me guic to, guien to ganle zha nactaa grë ncuaañe ygaa to ne laa me bredz to, guien to ganle zha ndzontaa, zha nontaa ncuaañe gdeed me lo grëse miech ne ngab lo me, <sup>19</sup> ni guien to zha nroobtaa guielrnabey ne rap Dios, pa lotaa naca; lëe guielrnabey co nacie ne ne nac ne zha ne no xnëz me. Lëe guielrnabey co ga blu me <sup>20</sup> zeene bleeban me Jesús bzoob me me cue me gbaa, zaatne rieguial sob me ne nac me men rnabey, <sup>21</sup> bzo me me, me rnabey lo grëse zha ne rnabey, lo grëse zha ne non, ni lo grëragaa ncuaañe no; niicle niinaw, niicle len dze ne naragaa guiaada. <sup>22</sup> Grëse ncuaañe notaa, laa Dios psana ladznia me, ni bzo Dios me me rnabey lo grëse zha ne no xnëz me. <sup>23</sup> Sac grëse zha ne no xnëz me rriequia xcuerp me ga nac zho, gacxe waa grëse zha ne nac cuerp co, zha none cxobnen ganle pa lotaa men nroob nac me. Tel pe lotaaw me nacie zho, sac grëtaa ncuaañe no ladznia me now.

## Ne noxco Dios miech gane psilaa me zho

**2** ¡Laa Dios bneedzle tib guielmban cub lo to niina, niicle ne ntseeb goc to glo! Golsoladz ganle, zeene scataa beenctal to xtoñ to, masaque nac to lo Dios hor co zig tib zha ne gutle, <sup>2</sup> laa to güeynal niapse grë ncuaañe ndzinlid ne rac lo guidzliu rii, been to grë miñe rnabey ma ne rnabey lo mendox, ma ne rcheep grë zha ne ib nëd gon xtiidz Dios.

<sup>3</sup> Grëse ne sca wban ne glo, bional ne ncuaañe ndzinlid ne bzoobladztaa ne, bdziuuñ ne ncuaañe bdeedtaa guxt xcuerp ngoopdoñ ne, ncuaañe biaabtaa guic ne. Ni ne scataa nac ne, ib bioguial ngaa ne lo guielnëdnox ne cxeel Dios, lo guielnë ne noxtseeb grëraa miech niina. <sup>4</sup> Per ne nquialadz Dios ne nac ne miech, gane pquia zdoo me ne, <sup>5</sup> ni niicle ne rriequia mengutle nac ne ne scataa quiazziuuñ ne grë doñ co, per bleeban me ne; lëe miñ co ga been me zeene bleeban me Jesús. ¡Laa me psilaa ne lo guielgut co, niapse por mezhal noxco ne! <sup>6</sup> Laa me bleeban ne, zeena ygaa ne guiosionbie ne Jesús zaatne gnabey Jesús. <sup>7</sup> Zigtaa

len dze riiw, zigtagaa len dze ne ziaadraaw, ga gan miech ganle pa lotaa nquialadz me ne, pa lotaa wen me lo ne, sac pxeel me Jesús biaadsilaa ne. <sup>8</sup> Golgan ganle, ne wen me mezhax noxco guiaanwen miech lo me, gane rsilaa me ne lo dol zeene laa ne riladz Jesús dib zdo ne; guabd ne togo por pe guielwen ne gun ne laa me csilaa ne. Ible zdo me ral rsilaa me miech, <sup>9</sup> racda ne por pe guielwen ne gun zho; zeena gdaanied zho guielwen ne run zho. <sup>10</sup> Dios nac men ne psan ne, ni niina ne laa ne bziaab xnéz Jesús, laa me bredz ne dziuun ne gré guielwen ne racladz me, miñe bzooblol me ne dziuun ne.

### Grése zha ne ngab lo Jesús, tipse nac zho

<sup>11</sup> Golsoladz ganle miech ngoopdol, miech ne ngabd lo Dios, miech beed, sca lè to lo gré zha Israel glo (sac zha, ne rio zho bey zigne rnabey xley zho, rzac zho miech wen, miech mbe nac zho, zha nac zha ne ngabpaa lo Dios). <sup>12</sup> Len dze co gard ygab to lo Jesús, gard gac to tipse gré to zha Israel, led yede to no lo trat ne biaan Dios gré me zha Israel, nande to gré diidz ne psan me lo zho. Lega laa to mbanse, runbeyde to Dios, ni tib guielnzaac quiambézde to yгаа to. <sup>13</sup> Sangue niina ne laa to bzëëb xnéz Jesús porne bzhiee xchen me psanmbe me to, laa to ngable lo Dios.

<sup>14</sup> Jesús nac men ne psanwen ne gré ne, ptiche me grétaa ncuane pca zaacse ndzianlsa ne; zigtaa zha Israela, zigtagaa zha zita, tibaque been me ne lo me niina. <sup>15</sup> Zeene pquia me lo cruz, gataa ptiche me gré ley ne zienal zha Israel, ne scataa rsanglaa zho zho; gane niina zigtaa zha Israela, zigtagaa zha zita, laa me been zho tipse, been me zho tib guiedz cub ne ngab lo me. Sca nac ne laa me psanwen zho gré zho, ni psanwen me zho néz lo Dios.

<sup>17</sup> Jesús nac men ne biaadnie Xtiidz Ndzon me lo ne grése ne, gocndion ne zha guiaanwen ne néz lo Dios, zigtaa tow ne nac to zha ne zit zo lo Dios glo, zigtagaa zha Israela ne nac zho zha ne gax zo lo me. <sup>18</sup> Gane niina, niicle zha Israela, niicle zha zita, zrieelo ygab zho lo Dios men ne nac Pxoze ne, zeene laa Espiritu Sant gunquien zho none gbig zho lo me. <sup>19</sup> Gacxe waa, tel to nacdraa to menzit niina, lole Dios ngab to, lal non to, lal nac to gré to gréaa zha ne ngab lo me.

<sup>20</sup> Golguien ganle, grése ne niina gzoob ne nac ne zig tib yu ne noyaa, yu ne psilo gré zha ne pxeel Dios nonee xtiidz me lo miech niina, gré zha ne pxeelgaa me pteed xtiidz me lo miech padzeela, ni Jesús nac quie ne naaz yu co. <sup>21</sup> Grése zha ne zienal miñe rnabey me, rriequia nosoquiaraa zho yu co ga, haxta guirew gaca tib yadoo ne nlipaa mbe néz lo Dios. <sup>22</sup> Zig nac to gon, tib tib to ne nac to zha ne ngab lo Jesús, ye to nac yadoo co, zaatne rbéz Espiritu chen Dios.

### Pabl nac zha ne güeyseed zha zit

**3** Ni ne bialnecxe naa Xtiidz Jesús lo to waa, gocnan to ne niicle men zit nac to zrieelo ygab to lo Dios, miñ co gane znu nioogyu naa nu. <sup>2</sup> Nanlaxe to ganle

ne wen Dios, laa me bzo naa gun naa dziin rii cseed naa gré menzit. <sup>3</sup> Laa me blu lo naa zha nac gré ncuane no guic me gun me, mese nana per laa me blu lo naa zha naca, ni laa palala psilo bzetle naa lo to lo guits rii. <sup>4</sup> Zeene glab tow i, dzigo guien to ganle ne nli nan naa zha nac gré miñe gun Jesús, miñe mese nan. <sup>5</sup> Wlaltaa choot miech gocnanda, laa niina laa Dios pxeel zhiEspiritu me bneedz guielbiini lo no gocndion now, zigtaa no ne nac no zha ne pxeel me nonee xtiidz me, zigtagaa gré zha ne pxeel me noteed xtiidz me. <sup>6</sup> Ni znu naca: grése zha zit, zгаа zho guielnzaac ne rëb Dios gdeed me lo gré zha ne ngab lo me, tibaque nac guielnzaac ne yгаа zho gré zho zha Israel. Niicle zha Israela, niicle zha zita, laa Dios quiambéz gdeed me guielnzaac co lo zho, totsaque gliladz zho Xtiidz Ndzon Jesús.

<sup>7</sup> Niicle ne tib miech peet nond nac naa, per laa Dios bzooblo naa gne naa lo miech gacnan zho miñe blozh bzet naa nu, me nacie naa, me rneedz grétaa poder ne rap me parne grieelo gun naa dziin rii. <sup>8</sup> Ncuane gzee zdo new! Golwi ganle, naa nac tib zha ne mazdraa peet nond lo gré zha ne ngab lo Dios; per laa me bzooblo naa, naa bgaa dze ndzon rii gne naa Xtiidz Ndzon me nu lo gré zha zit, zeena gacnan zho ganle pe zhistaa gré guielnzaac ne gdeed Jesús lo zho. <sup>9</sup> Gne naa lo zho gacnan zho ganle zha nactaa gré miñe no guic Dios gun me, miñe wlaltaa choot gard gacnan; Dios, men ne bzaa grése ncuane no. <sup>10</sup> Nana gnè to: "¿Pe nacie sca been me?" Laa me beena zeena grése zha non, zha rnabey ne no gbaa, zeene gan zho tipse nac zha Israel gré zho zha zit ngab zho lo me, ga guien gré zha gbaa co ganle zha ndzielguictaa Dios. <sup>11</sup> Sca nac miñe no guic me padzeela, ni zeene laa me pxeel Jesús laaw goc. <sup>12</sup> Gacxe waa, niina ne laa ne ngable lo Jesús, peet lo ngadoodraa ne, niinasi zrieelo gbig ne lo Dios, sac ndion ne zha ne rnalo Jesús ible scaania Dios zho. <sup>13</sup> Laa naa rso diidz lo to sca, niicle ne znutaa quiadeed naa loxaque ne bialseed naa to, gunde to ne miñriise laa zdo to guiaan, sinque golley golwi ganle nu rlu zha nziuu, zha non nac to lo naa.

### Nquialadz Jesús miech

<sup>14</sup> Zeene rsoladz naa grétaa miñe no guic Dios gun me, ni miñe beenlegaa me (me ne nac me Dad lo grése zha ne ngab lo me, niicle lo guidzliu nuw, niicle gbaagaaw); rded naa xquizh lo me. <sup>16</sup> Ni ne squitaa ndzon, ne squitaa ncuane lozhd nac grétaa guielnzaac ne rap me, laa naa rnab lo me cxeel me zhiEspiritu me gneedz xfuers to dziits so to. <sup>17</sup> Ni rnab naa lo me tibaque dib zdo to gliladz to Jesús, zeena scagaa tibaque gbannie to me, parne guien to ganle pa lotaa nquialadz me to. <sup>18</sup> Ga guien to ganle gré to gréaa zha ne ngab lo me, ne nligaa pa lotaa nquialadz me to, nacda ncuane grieelo ctiix ne, guiab ne lalnuw. <sup>19</sup> Niicle ne znu nacda ncuane grieelo guiab ne znu znu naca, per laa naa rnab lo me zig zie dze guienraa to pa lotaa rleynie Jesús to; zeena glu ganle ne nli nacie Dios to.



<sup>20</sup> Ni Diosi gon ne nac me men ne ndzon, mazdraa ncuane grieelo gneedz me lo ne, ledle mine riab guic ne rnab ne lo me; ni ncuane gaca gon, sac me nacie ne. <sup>21</sup> Grëse ne ne nac ne zha ne no xnëz Jesús, itibaque golgotsaa gleynie ne me sca, ne squitaa ndzon me! Sca rieguiala.

#### None tipse gac zha ne riladz Jesús

**4** Zigne rne naa ga, laa naa niogyu nu loxaque ne run naa xtsiin men ndzon ne rnabey, per laa naa rnab lo to zaacse golgac, golban zigne rieguial gban grë zha ne bredzle Dios ngab lo me, sac gon laa me bredzle to. <sup>2</sup> Golgac tib miech ndooladz, tib miech wen, tib miech nlëëguicd, tib miech ne guieednied samiech sinque ine gleynie to zho. <sup>3</sup> Wenle na ndxie to niina, ni Espiritu Sant nac men ne gacnie to; zeena tibaque squi tipse gac to. <sup>4</sup> Sac gon tibaque cuerp nac ne grë ne, tibaque Espiritu nacie ne, ni tibaque nac mine ndion ne gneedz Dios lo ne, ne laa me bredz ne.

<sup>5</sup> Tibaque men ndzon ne rnabey ne, tibaque men ne riladz ne, tibaque wrobnis ne no par grë ne ne dib zdoo ne riladz ne me; <sup>6</sup> tibaque Dios no, me nac Pxoze ne grëse ne, me nac men nroob ne zo lo ne, me racnie ne grëse ne, ni me nacie ne.

<sup>7</sup> Tipse nac ne, per tib tib ne ppose Jesús ne pe nac dziin ne grieelo dziuun ne lo me, zigne gola zdoo me. <sup>8</sup> Min rii ga raquiet zaatne znu zhobnee lo guits ne ziaad Xtiidz Dios:

Blozhse psanwin me grëse zha ne rlëë ran me,  
laa me biire zey gbaa stib;  
ni ppose me tib tib miech pe nac dziin ne grieelo gun zho lo me.

<sup>9</sup> Golgotsaa gwi ne ganle, Jesús raquiet nu, rneew "biire zey me gbaa stib", ga rlu ganle tib men ne biet gbaaw biaad me lo guidzliu. <sup>10</sup> Sac me biet gbaa, ni biire zey me gbaa stib, zeena glu ganle tel pa lotaa zriee lo gdziin me. <sup>11</sup> Ni mezhal rzo ne tib tib ne pe nac dziin ne dziuun ne; me rzo:

zha ne rxeel me gnee xtiidz me,  
zha ne rxeel me cteed xtiidz me,  
zha ne rienee Xtiidz Ndzon me tib tib lo miech zha laa zho lo dol,  
zha ne rteedlo grë zha ne ngab lo me, ni  
zha ne rseed zho zha nac Xtiidz Ndzon me.

<sup>12</sup> Laa me run min co, sac laa me racladz grëse zha ne ngab lo me lozh xixcuaa lo xquielmban zho, zeena guien zho zha gun zho xtsiin me; <sup>13</sup> haxta gdziin dze ne tibaque mine giladz ne grë ne, grëse ne dziuunbeypaa ne men ne nac Xpëed Dios. Laa ne lozh sodziits, haxta gac ne zig me.

<sup>14</sup> Gacdraa ne zig cho cho mëedlas ne beelze pe riladz; niicxe guidaad grë zha ne guidaadnie stib wseed, zha ndzinlid ne zombëz loxaque dien zha gdeeda diidz yquidie zho miech; yquidied zho ne. <sup>15</sup> Sinque guional ne mine nac diidzli, ine gleynie ne samiech ne, tibaque laa ne guional zigne nac Jesús, men ne rnabey lo ne grë ne ne ngab ne lo me (rrieequia xcuerp me nac ne, me nac guic cuerp co). <sup>16</sup> Ni ne me nac men ne rnabey

lo ne, me rnabey zha gac tib tib dziin ne pso me ne dziuun ne; niicle ne nzian ne, per tipse nac ne laa ne nodziuun dziin ne pso me ne, zeena xixcuaaraa lo xquielmban ne, ni lozh guien ne zha gleynieraa ne samiech ne.

#### GuieImban cub ne rneedz Jesús

<sup>17</sup> Laa naa rso diidz lo to nu, ni golquiaadiaga zig nac zeene men ndzon ne rnabey ne rneew lo to: gbandraa to zigne mban grëraa miech ne zozit lo Dios, grë zha ne mban zigne notaa guic; <sup>18</sup> sac tel zha, ncow nac guic zho. Gard ygaa zho guieImban ndzon ne rdeed Dios, nan d zho zha nac guieImban co sacne ndip zdoo zho.

<sup>19</sup> Laa zho gocnadle, niapse lo grë ncuane ndzinlid no zho, ib rgobeyd zho run zho grëtaa guieIyozh ne no. <sup>20</sup> Sangue to gon, ne nac to zha ne no xnëz Jesús niina, led mincod noseed to; <sup>21</sup> telne nli noquiaadiag to ganle cho nac me, telne nli rien to zhiwseed me mine rlu ganle zha nac diidzli.

<sup>22</sup> Miech yozh ne goc to glo, grëtaa ncuane ndzinlid, grëtaa guieIyozh ne gocladztaa xcuerp to been to, igolsaana! <sup>23</sup> None gdzëe lo xquielmban to, zigtaa grë mine no zdoo to, zigtagaa grë mine rza guic to, <sup>24</sup> golgac tib miech cub, zaacse golban, ndzinli golgac; zeena glu ganle ne nli beenncuble me to zigne racladz me.

<sup>25</sup> Golguien sca, yquidiedraa to samiech to, sinque niapse mine nac diidzli golnee, sac gon tel ne pe nacie yquidielsa ne ni tibaque nac ne grë ne.

<sup>26</sup> Telne glëe to, code to guieIblëe co zdoo to dib dze, sac gon dol ga. <sup>27</sup> Gunde to mine racladz mendox.

<sup>28</sup> Zha ne goc ngbaan lëe, cuandraa zho, sinque gun zho dziin gdziniaa zho ncuane yquien zho, zeena sca-gaa grieelo gun zho xyudar zha ne guien pe yquien.

<sup>29</sup> Gneede to diidznë, sinque diidz ne ndzinli, diidz ne yquien golnee, zeena zha ne gona ine cchooblada zdoo zho, ine yquina lo zho. <sup>30</sup> Golguien, gunde to ncuane coguieInë to Espiritu Sant. Golgan ganle laa Dios pxeel me, nac me zig tib bey ne glu ganle ne nli lo Dios ngab to, gal dze ne laa me lozhpaa csilaa grë zha ne ngab lo me. <sup>31</sup> None csaan to:

guieInialadz, tso to gow gzhiih zdoo to;  
glëedraa to,  
sobzhiandraa to,  
coredzdraa to,  
gacntseebdraa to, ni  
grëragaa guieIntseeb ne no, gunde tow.

<sup>32</sup> Sinque none:

wen gac to lo samiech to,  
golquia zdoo samiech to,  
golgun samiech to perdon, zigne beenaque Dios to perdon zeene laa to beenbey Jesús.

#### None glu cho nac zha ne ngab lo Dios

**5** To ne laa to nacle xpëed Dios ni nquialadz me to, goltoxco gac to zig me. <sup>2</sup> Zaacse golban, golleynie samiech to zigne rleynie Jesús to, sac gon tel

me, haxta bleeladz me me gut me xcuent ne, gut me biogon me lo Dios psanmbe me ne lo xtoꞓ ne, me goc tib gon ne pcaania Dios.

<sup>3</sup> Golꞓguien sca, none glu to ne nli xnëz Dios no to; guñde to grë guielꞓyozh ne ruñ grë zha ne zienaꞓd zigne nacpaa guielꞓsieel, guñde to grë ncuaañe yozh ne ruñ miech ndzinlid, guñde to grë ncuaañe ruñ grë zha ne zienaꞓ loxaque dien zha guñlo dimi.

Guñde to grë ncuaañ co, per ni gzodiidzde tow.

<sup>4</sup> Gneede to grë diidzguidz, gneede to grë diidz ne paat rquiind, gneede to grë diidz ro nëz; sac gon rdzieeldraa gnee to grë ncuaañ co; sinque Dios golꞓgoolꞓnie, golꞓdeed xquizh lo me.

<sup>5</sup> Nanle to ganle, grëse: zha ne zienaꞓdraa zigne nac guielꞓsieel, zha ndzinlid ne ruñ grëraa guielꞓyozh, zha ne mbidz (zha ne rleynieraa dimi, laa ne gleynie zho Dios); ni tib zho grieelod gdziñ zaatne rnabey Jesús grop me Dios.

<sup>6</sup> Gdeete to diidz lo zha ne gacladz yquidie to gnë zho peet nacd grë miñ co, sac gon, grëcxe miñ co waa ruñ grë zha ne nëd gon xtiidz Dios, lozh ga, lëë miñe tsieguiaꞓ zho laa zho ygaa lo guielꞓzi ne csiaab me.

<sup>7</sup> Golꞓguien sca, yquiaadiagde to xtiidz grë zha ne sca rnee, per ni ctsieelsade to zho.

<sup>8</sup> Nli, ¿lëë?, ndzinlid wban to glo, rriequia lo ncow ga bio to, gocnie to mendox; sanꞓgue niina ne laa to nacie Jesús men ne nac biini, rriequia lo biinile no to. Golꞓguiena sca, zaacse golꞓban, <sup>9</sup> sac niina ne laa to nole lo biini, none gac to:

tib miech wen,  
tib miech ne zienaꞓ gac miñe nac diidzli,  
tib miech ne rnee diidzli.

<sup>10</sup> Goltsoxco guien to zha racladz Dios gban to.

<sup>11</sup> Ganꞓzede to grë ncuaañe ndzinlid ne ruñ grë zha ne no lo ncow, sinque gollisquiw; <sup>12</sup> sac grë ncuaañe ruñ zho nꞓueets zhlian, haxta ncuaañe ctoladz ne gnee new. <sup>13</sup> Grëse zha ne gbig lo biini co, zien zho ganle zha nactaa grë ncuaañe yozh ne noyũ zho; sac gon telne biiniw, tsod ncuaañe guianꞓꞓueets low. <sup>14</sup> No tib zaatne znu zhobnee lo Xtiidz Dios, rneew:

Luu ne tibaꞓque guieel no luu, blee mcaꞓ lo luu;  
briee lad grë zha ne squi nole ladznia guielꞓgut,  
zeena gban luu lo biini ne nac Jesús.

<sup>15</sup> Golꞓguien sca:

Miech nixbiini golꞓgac, ndzinli golꞓban; gbande to zig choꞓ cho grë miech nxen ne ruñ miñe notaa guic.

<sup>16</sup> Cteed zhlëde to xtse to lo ncuaañe paat rquiind, niicle ne niapse grë miñ co zienaꞓ grëraa miech len dze rii.

<sup>17</sup> Guñde to ncuaañe paat rquiind ne rza guic to, sinque golꞓguien dien pa minꞓpaa racladz Dios guñ to, dzigo goltsoxco miñ co golꞓguñ.

<sup>18</sup> Gzudzde to, sac gon lo guielꞓgonziu ruñ miech ncuaañe nonguielꞓdraa; sinque mazd golꞓnab gneedzraa Espíritu Sant guielꞓbiini lo to, zeena ine:

<sup>19</sup> gooꞓ to grë salm, grë himno, grë cant ne csiaab Espíritu Sant guic to; dib zdoo to golꞓgoolꞓnie men ndzon ne rnabey.

<sup>20</sup> Golꞓdeed xquizh lo Dios men ne nac Pxoꞓ ne, por grëtaa ncuaañe ran to, ncuaañe rded to; golꞓguien ganle lo Jesús ngab to.

### Zha none gban zha ne riladz Jesús

<sup>21</sup> To ne nac to zha ne ngable lo Jesús, tib tib to golꞓgon miñe rnee zha ne nacgrë to, zeena glu ganle me nac men non lo to.

<sup>22</sup> To ne nac to men wnaa ne ptsieelniale, golꞓgon xtiidz tsieel to, zigne rioxcoque to ron to miñe nac xtiidz men ndzon ne rnabey. <sup>23</sup> Sac ible tsieel to nac men ne no gnabey lo to, zigne Jesús rnabey lo grë zha ne no xnëz me (ni me psilaa zho lo doꞓ, laa zho nac zig xcuerp me). <sup>24</sup> Ni zigne sca ron zho xtiidz me, scaque none gon to miñe rnabey tsieel to to.

<sup>25</sup> Togaa ne nac to zha bꞓui ne ptsieelniale, golꞓleynie tsieel to, zigne rleynie Jesús zha ne no xnëz me. Tel me haxta bleeladz me xquielꞓmban me, <sup>26</sup> blee me zho lo doꞓ, ni biaanꞓmbe zho zeene laa zho pꞓquiaadiag xtiidz me, wban zhow ni brobnis zho; <sup>27</sup> zeena gal dze ne laa me ycaania zho, laa zho nacle miech ne rieguiaꞓ gdziñ lo guielꞓndzon ne no me, ni tib doꞓ rapdraa zho, miech mbele nac zho, zig tib lë lar nꞓuitsbie ne ni tib pxud neyd. <sup>28</sup> Sca nagon none guñ mꞓui, none ganꞓsi zho tsieel zho zigne ranꞓsi zho xcuerp zho. Mꞓui ne ranꞓsi tsieel, rriequia xcuerp zho ga ranꞓsi zho; <sup>29</sup> sac gon, tsod tib zha ne lëëque zha csacsi xcuerp zho, sinque ran zhow. Ni scadaa nagon rzac Jesús grëse miech ne ngab lo me, <sup>30</sup> sac nac zho zig xcuerp me. Ni lëë tib lë cuerp co nu nac ne.

<sup>31</sup> Zha ne pꞓatsieel-le, ible tibaꞓque cuerp nac zho grop zho, laaw zhobneeque lo Xtiidz Dios zaatne rnee: "Ib none grieezhaa mꞓui lo pxoꞓ zho, lo xniaa zho, zeena gbannie zho tsieel zho gac zho zig tibaꞓque miech grop zho." <sup>32</sup> Rꞓobey naa nganꞓ tsoꞓguic to zha nacie chop miech gac tibaꞓque cuerp; per ga gon rlu ne niicle nzian ne per tibaꞓque cuerp nac ne, ni lëë xcuerp Jesús ga. <sup>33</sup> Miñe racladzpaa naa csoladz to nu: to ne nac to men bꞓui, none gleynie to tsieel to zigne rleynieque to xcuerp to; ni niicle togaa ne nac to men wnaa, none gon to xtiidz tsieel to, cuede to xquielꞓto zho.

**6** To ne nac to mëed, golꞓgon xtiidz pxoꞓ to, xtiidz xniaa to, sac sca nonguielꞓa, ni scagaa glu ne nli rleynie to Dios. <sup>2</sup> Golꞓgan ganle, lo grë xley Dios no tib miñe znu rnee: "Bin xtiidz pxoꞓ luu, xtiidz xniaa luu, zeena ine niowse gac lo xquielꞓmban luu, ni nroob dze ne gban luu lo guidzliu rii." Ni lëëw glopaa rnee ganle pe nac miñe ygaa zha ne guñ miñe rnabeya, <sup>3</sup> sac rneew, niowse gac lo xquielꞓmban zho, ni nroob dze ne gban zho lo guidzliu rii.

<sup>4</sup>Togaa ne nac to men nguzan, gunde to ncuane yquiaaguieñe to xpëed to, sinque golcobey dien zha gun to parne gon zho diidz, ni cseed zho gban zho zigne rdziladz Dios.

<sup>5</sup>To ne nac to zha ne ngadoo lадznia ben, golgon xtiidz men ne rnabey to. Golguien zha rnabey to, dib zdoo to, goltsoxco golgun xtsiin zho, zig nac zeene xtsiin Jesús ga noyun to. <sup>6</sup>Gunde to ne loxaque zeene zose zho lo to, dzigose yquiaalo to gun to dziin zeena guianzuiu to lo zho, sinque ine nguieel golgac golgun xtsiin zho, zig nac zeene xtsiin Jesús ga quia to, ine dib zdoo to quiayun to mine racladz Dios. <sup>8</sup>Benque nanle to, zigtaa zha ne ngadoo lадznia bena, zigtagaa zha ne rnabeya, zdeedse Dios mine tsieguial zho tib tib zho tel pe nac ncuane wen ne noyun zho.

<sup>9</sup>Togaa ne nac to zha ne rnabey, niowse golgac lo zha ne quia xtsiin to, gacntseebde to lo zho. Golguien ganle, zigne rzacaque zho, scaque rzac to, no tib men ne rnabey to grë to, lëe me ga zob gbaa; ni tel me gon led yed me guiab dien cho rnabey, chogaa run dziin.

#### None nsin so zha ne riladz Jesús

<sup>10</sup>Bets, bzian, nu ne laa naa csiaalle, laa naa rnab lo to gon tibaque golnalo Dios; golgan ganle, con grëtaa guieñrnabey ne rap me, me gneedz grë lose fuerz lo to. <sup>11</sup>Zig nac grë menguiib, ible no grë ncuane rquiin zho zeene laa zho rie lo dil, scaque to niina nagon, golquiin grë lose fuerz ne bneedz Dios lo to, zeena glëbd mendox gungüet ma to. <sup>12</sup>Golgan ganle, led-xe miech guidzliud waa nodiñne ne, sinque laa ne nodiñne grë me yozh ne quianzë zhan gbaa, ma ne quianabey grëtaa guieñtseeb ne rac lo guidzliu rii. <sup>13</sup>Gane nagon none yquiin to grëse lo fuerz ne zineedzle Dios lo to, zeena guiablode to zeene laa grë me ntseeb co csilo ygaal to; ni scagaa, zeene laa ma biablo, tibaque dziits so to grë to.

<sup>14</sup>Dziits sca golso:

Dziits golso lo mine nac diidzli, zigne dziits dziits rzhi-doo len menguiib zeene laa zho tsie lo dil.

Golgun mine nonguiel zeena ctse to lo mendox, zigne rtse ncuane racw menguiib lo grë ncuane gnitlo zho.

<sup>15</sup>Nsin golso zeene laa to tsienee Xtiidz Dios lo miech gacnan zho zha guiaanwen zho lo me, zigne nsinle zo menguiib zeene laa zho no tsie lo dil.

<sup>16</sup>Guiaanladzde to, golnalo Dios, zeena peet grielod gun grë me yozh co to, zigne rnaló menguiib guiiblag ne rsaac zho lo zha ne nodiñne zho.

<sup>17</sup>Golsoladz ganle laa Dios psilaale to lo guieñgut, golsaca zigne rzac menguiib pchog guiib ne rzob guic zho, rsilaaw zho lo guieñgut. Ni golsac Xtiidz Dios mine rneedz Espiritu Sant lo to, zigne rzac menguiib xquiib zho.

<sup>18</sup>Nsin sca golso, guiablode to. Tibaque golzodi-idzne Dios. Golnab lo me mine rsiaab Espiritu Sant guic to, golnab gacnieñ me grëse zha ne ngab lo me; ni <sup>19</sup>golnab lo me gacnieñ me naa, csiaab me guic naa pe nac mine gne naa, peet dzeb tsod lo naa gne naaw lo miech; zeena gacnan zho ganle, zha nac Diidz Nd-zon ne rnee zha laa miech lo dol, mine choot gocnanđ glo.

<sup>20</sup>Ib me bzo naa cteed naa xtiidz rii me lo grë zha zit, ni mincocxe waa rquiaqui znu no grë guiib rii nia naa, ngoguiu zho naa nu. Golnab lo me gacnieñ me naa, gdzieebd naa gne naa ganle cho nac me. ¡Nsin sca golso!

<sup>21</sup>Laa naa rxeñ Tic lo to, me nac tib men nziuu lo naa, dib zdoo me laa me quiayun xyudar naa lo xtsiin men ndzon ne rnabey ne. Me guiaadnie diidz lo to ganle zha rac naa, zha no naa nu. <sup>22</sup>Mincopaa ziaad me i, ziaadnie me diidz zha no no nëz rii, zeena ine gley to tsoxcoraa to mine riladz to.

<sup>23</sup>Rnab naa lo Dios men ne nac Pxoz ne, ni lo Jesús men ndzon ne rnabey, me gacnieñ to peet zhgab ctseebde to, ine tibaque gliladz to me, ine gleyne to samiech to. <sup>24</sup>Me gunlay to, grëse to ne nac to zha ne nlipaa dib zdoo rleyne Jesús.

Pabl

# FILIPENSES

¡Diuzh to grëse to!

**1** Naa nac Pabl, grop no Timoté laa no rxeel guits rii guiedz Filip i. Laaw ziaad lo to ne nac to zha ne ngable lo Dios, ni nacie to Jesús; zigtaa tow, zigtaa zha ne zo lo tow, zigtagaa zha ne ruñ xyudar zhow. Nanle to ganle zigtaa naaw, zigtaa Timotéw, tib ngundziin nac no lo Jesús.

<sup>2</sup> Dios men ne nac Pxoze ne, ni Jesús men ndzon ne rnabey, me glu ganle pa lotaa noxco me to, zeena ni tib zhgab ctsebde to.

<sup>3</sup> Zeene rsoladztaa naa to, rded naa xquizh lo Dios; <sup>4</sup> ni zeene rzodiidznie naa me, rley naa gon rnab naa lo me gacnieñ me to; <sup>5</sup> sac desde dze ne laa to psilo bliladz Jesús haxta lo nadze, tibaque laa to quiayacnie naa, quiayun to xyudar naa noseed naa miech Xtiidz Ndzon me. <sup>6</sup> Ni nanpaa naa, zigne squi psilo Dios nozhixcuaa me lo xquieľmban to, zigse zie dze laa me gzhixcuaaraa to, zeena nsinle zo to gal dze ne laa Jesús guiaad stib.

<sup>7</sup> Min co racladz naa, ni ib rieguaľa sac ne nligaa rleynie naa to. Sac ib rsaande to naa, zigtaa zeene znu no naa ladzguiiba, zeene zonlaagaa naaw, zaatne racpaa rne naa ni rlu naa ganle ne nli diidzli nac Xtiidz Jesús. <sup>8</sup> Dios nan ganle pa lotaa nonie to guic naa, rquiané zdoon naa to, zigne rzacaque Jesús ne.

<sup>9</sup> Rnab naa lo Dios gacnieñ me to, zig zie dze gleyneraa to samiech to, tsabiiniraa to, <sup>10</sup> zeena guien to cue to niapse grë ncuane ndzinli gon to. Sca ine ndzinli nac lo xquieľmban to, ni tib xtoľ to guienď gal dze ne guiaad Jesús; <sup>11</sup> zaacse gban to. Ga glu to ganle lëe min co blu Jesús lo to, zeena sca csanglaa to Dios.

<sup>12</sup> Bets, bzian, racladz naa gacnan to ganle niicle tel pe nactaa ncuane nodeed naa, per led mincod gon cuéz ygaazdraa Xtiidz Ndzon Jesús, sinque leľ znu mazdraa ndal miech ne noquiaadiaga. <sup>13</sup> Sac tel niina, zigtaa grë zha ne rquia dziin lo gobierna, ni grëragaa miecha, laa zho nanle ganle ne loxaque noyun naa xtsiin Jesús gane znu no naa ladzguiib. <sup>14</sup> Sac ndal grë bets zeene gon zho laa naa znu biab ladzguiib, laa zho bguiaaľraa laa zho noseed miech Diidz Ndzon rii; peet rtoladzdraa zho, peet dzeb guienďraa lo zho, masaque Dios rndalo zho.

<sup>15</sup> Parga nli no stib dii zha ne psilo noyun dziin co, per laa zho noyuna loxaque par dien zha guianzuiu zho, sac në rac zdoon zho ran zho zha none naa Xtiidz me. Per zigne no zha ne sca nac, noque zha ne nli dib zdoon zho quiseed zho miech. <sup>16</sup> Lëe zha co nagon rlu ne nli rleynie zho naa; sac nan zho ib laa Dios bzo naa gne naa ni glu naa lo miech ganle ne nli diidzli nac Xti-

idz Jesús; laa zha ne sca noyun dziin co par guianzuiu zho, rzac zho na tel mazdraa glaa guiaan zho lo naa, mazdraa lozh coguieľnë zho naa ne laa naa znule no ladzguiib. <sup>18</sup> Per par naa, pex gon naa zho. Tel zha ne zie dib zdoon, zha ne ziedgaa dib zdoon, totsaque ne Xtiidz Jesús quiseed zho miech; min co nac mine mazdraa rley naa.

<sup>19</sup> Ni zleyragaa naa, sac nan naa ib zrie naa zaatne nioogyu naa nu; sac lala quianab to lo Dios por naa, ni lala nacie zhiEspiritu Jesús naa. <sup>20</sup> Dib zdoon naa racladz naa, tiblque gac naa lëeb naa gan naa mine tedtaa naa, gdzind dze ne gon naa ncuane cuee xquieľto naa. Racladz naa cxobneñ naa ganle zha men rotaa nac Jesús; niicle tel niaca por min co yquiaaqui gut miech naa. <sup>21</sup> Sac gon, par naa laa naa mban par gon naa mine rnabey Jesús, ni zeene guetgaa naa, nanpaa naa tib guieľbley nroob ne yгаа naa. <sup>22</sup> Per tel laga mban naa, nzianraa ncuane grieelo gon naa lo me; dzigo nagon riendaque naa dien pa min wenraa. ¡Pe wena gbanraa naa, te wena ye prontga gbi naa lo guidzliu rii! <sup>23</sup> No hor rzaac naa gbanraa naa, nogaa hor rzaac naa tebaa laa naa wbie lo guidzliu rii; zeena ziagaa naa lo Jesús, sac nligaa zoot naa laa naa bdzinle lo me. ¡Min co mazdraa wen, lëdle cuéz naa lo guidzliu rii! <sup>24</sup> Per rien naa ible none cuéz naa, sac rquiinpaa to naa. <sup>25</sup> Mincoxe nagon waa, rgobey naa zbanraa naa, zeena lozh cseed naa to choobraa to lo Xtiidz Jesús, ine nley gac to laa to riladza; <sup>26</sup> ni zeene laa naa gbire guial lo to i, rien naa nroob gley to, zdeed to xquizh lo Jesús porne racnieñ me naa.

<sup>27</sup> Per mine rsopaa naa diidz lo to gon: Goltsoxo golban zigne no gban zha ne ngab xnëz Jesús, zeena niicle telne grieelod guial naa, racladz naa gon naa tipse nac to grë to, tiblque dziits zo to lo Xtiidz Dios; ni noxco to dien zha gliladz grëraa miech Jesús, <sup>28</sup> ni lalnu rdziebde to grë zha ne rlëe ran to. Ga guien zho ganle nëz ne nitlo zho zie zho, sangue to ga rlu ne laa Dios psilaale to lo xtoľ to, ni nacie me to. <sup>29</sup> Sac gon, ible none gan to guieľnë porne no to xnëz me, bzooblod Jesús to loxaque par yгаа to guieľnzaac qui gnalo to me. <sup>30</sup> Niicle tow, niicle naagaaw none dzian ne min co. Gonle to ganle zha nactaa grë ncuane bdeed naa, ni ziyongaa to grë mine nodeed naa niina.

## Goc Jesús tib men ndooladz

**2** Nanle to ganle Jesús rchoobladz zdoon to, me rlu zha gleynie to samiech to, tipse nac to ni Espiritu Sant nacie to; nanle to ganle none yquia zdoon to

samiech to. <sup>2</sup> Gacxe nana sca, go|conley zdoo naa, ine tipse go|gac, go|leynie grë zha ne nacgrë to, tipse go|nee, ni tipse go|gac tel pa lo dziin ne gnediidz to guñ to. <sup>3</sup> Ncuaane guñ to, guiabde to ne laa to guña par dien zha csañwin to stib miech, zeen dien zha guianzuiuu to; sinque ine ndooladz go|gac, masaque go|tsienie guic ne nonraa stib miech lo to. <sup>4</sup> Ib yguibde to ne lose to yquiiin ncuaane guñ to, sinque go|guib dien zha guñ to xyudar grëraa miech.

<sup>5</sup> Go|soladz ganle pa lotaa ndooladz goc Jesús len dze ne biaadted me lo guidzliu, scaquegaa nasca ndooladz go|gac. <sup>6</sup> Sac tel me:

Niicle ne Dios nac me,  
per led miñcod niab me nrieded me lo guie|ndzon ne no me,

<sup>7</sup> sinque grëse zigne nac me, laa me psaña tib lad, laa me goc zig tib nguñdziin win, biaad me gol me lo guidzliu rii goc me miech.

Nacle me miech,  
<sup>8</sup> ni bii psañwin me me lo miech, haxta bdeed me diidz pquiaa zho me lo cruz, zig ruñ zho cho grë zha yozh.

<sup>9</sup> Miñcocxe waa, psanglaaraa Dios me, biaan me men ne mazdraa non, men ne mazdraa nroob;

<sup>10</sup> zeena zeene laa me gaquiet, grëse zha ne no gbaa, grëse zha ne no lo guidzliu, ni grëse zha ne no nöz len guidzliu, laa zho yquiiits-gzhib,

<sup>11</sup> ni grëse zho laa zho cueero, guiab zho ganle ne nli me nac men ne rnabey.

Ga laa zho cxobnen ganle, zha men nroobtaa nac Dios, men ne nac Pxoz me.

### Zha ne nac biini lo guidzliu rii

<sup>12</sup> Bets, bzian, ne nligaa rleyne naa to. Laa naa rnab lo to (zigne bioxco to bin to xtiaz naa zeene blöz naa lo to i, scaquegaa niina niicle ne zit zo naa, go|gon miñe rne naa nu), ib gdeete to diidz guiab to ladznia dol stib, niina ne laa Dios psilaale to; go|guien tsieniewguite guic to. <sup>13</sup> Benque Dioszhal rsiaab guic to rquiabladz to guñ to miñe racladz me, ni scagaa me racnien to rrieelo ruñ tow.

<sup>14</sup> Ni ncuaane rieguial to guñ to, ine nguieel go|gac go|gana, peet glisquide to, ni niicle tilidiidzdgaa to; <sup>15</sup> zeena tsod pe nacle cho glisqui guiab zho laa to pe falt, pe dol ne quiayun. Gollu ganle nli xpëedle Dios nac to; zaacse go|ban, niicle ne ladaque grë miech ntseeb, miech ncow ne ndxie lo guidzliu rii no to. Go|gac zig tib biini lo zho, zigne rziini mel gbaa lo ncow ne nac guieel. <sup>16</sup> Ib csaande to Xtiaz Ndzon Jesús, diidz ne rdeed guie|mban, lëew go|conie guic to. Sca go|gac, zeena gal dze ne laa Jesús guiaad stib, per nli gley naa gan naa led zhléd brie naa bial naa, bialseed naa to.

<sup>17</sup> Zig nac niina, tel niaca miñe no gded naa xquie|mban naa gaca zig tib gon, parne dib zdooraa to gliladz to Dios, haxta zley naa gded naa xquie|mban naa; sac racladz naa ye to ygaa guie|bley. <sup>18</sup> ;Go|ley sca! Zigne

no guie|bley rii zdoo naa, scaquegaa to go|co nley zdoo to, zeena grë ne gley.

### Timoté ni Epafrodit

<sup>19</sup> Telne gneedz men ndzon ne rnabey ne diidz, racladz naa cxeelniob naa Timoté guiaadwi dien zha no to, zeena haxta stibgac zdoo naa zeene laa Timoté glansonie diidz lo naa. <sup>20</sup> Me cxe| naa, sac guien stib zha ne zienie guic zig zienie guic naa, tel led med; sac tel me nonie to guic me. <sup>21</sup> Grëraa zho, ncuaane yquiiin lo zho rioxco zho, laa ne tsoxco zho miñe nac xtsiin Jesús. <sup>22</sup> Laa Timoté, led nanle to ganle zha ndzinli nac me, tel niina ine tib mëed nac me lo naa, nroob yudar ne quiayun me noseed no miech Xtiaz Ndzon Jesús. <sup>23</sup> Ible laa guic naa no cxe| naa me lo to i, loxaque gacnase naa dien zha csañ wxtis rii xcuent naa nu. <sup>24</sup> Ni ye naa nend pronaque guialso naa i dien yo to, sac rien naa ible zneedz Dios diidz guial naa.

<sup>25</sup> Ni rgobey naa nongue|aquew cxe| naa bets ne Epafrodit guiaad me nöz qui, sac laa me rbanle to, ni no me zhgab bin me laa to gocnañ ne laa me bzhaac-në. Nli laa to pxeel me lo naa nu, ni blactagaa noyun me xyudar naa ne znu mban nodeed naa, blactaa noy-acnie me naa lo dziin ne nodziun no. <sup>27</sup> Ni nligaa bzhaacnë me, nzho goc me zootle laa me nietle; per pquia zdoo Dios me ni pquiaagaa zdoo Dios naa peet gocd me, sac gon nole naa guie|në, ni tel pe niacaque me mazdraa niac nroob xquie|në naa. <sup>28</sup> Miñ co nagon laa naa cxe|gazh me, zeena gley to gan to lo me stib, ni scagaa niicle naaw zley naa. <sup>29</sup> Go|ley sca gon go|caania me, go|guien ganle bets to nac me, bets new grë ne ne nac ne zha ne ngab lo Dios; ni grëragaa zha ne nac zig nac me, go|leynie zho. <sup>30</sup> Go|gan ganle, tel me haxta bdedlaa me niet me nu niina ne biaadgun me xtsiin Jesús; per ib pquiad zdoo me me, bleeladz me xquie|mban me biaadgun me xyudar naa, porne brielod niaad-zhal to.

### Ncuaane mazdraa non

**3** Bets, bzian, go|ley ne laa to ngab lo Jesús men ndzon ne rnabey. Miñe ziesole naa diidz lo to, guieete naa zneque naaw stib, sac ncuaane yquingaa lo tow: <sup>2</sup> ;Ib cxende to lo grë mëcw dox qui! Grë miech ndzinlid ne squi quianzë, racladz zho tsopaa zha bguibey, sac rzac zho zha ne sca tso bey, ga rlu xnëzle Dios no zho. <sup>3</sup> Sangue ne, ndionle ne zha nac diidzli, zha ne rleyne Dios zigne rsiaab Espiritu Sant guic zho, ni dib zdoo zho ruñ zhow, zha co nac zha ne nlipaa no xnöz me. Ne ne nac ne zha ne no xnöz me, Jesús nac men ne rdziunnon ne, sac ndion ne por me laa Dios ycaania ne; rnalod ne grë ncuaane laglaase, <sup>4</sup> sac telne scaw; zig nac naa pe zhistaa ncuaane dzigo zrieelo gnalo naa. Tel no zha ne rzac por ncuaane been zho miñ co laa Dios csilaa zho; tel scaw, nroobraa ncuaane ziyun naa lo zho: <sup>5</sup> Xon ngbidz raap naa laa naa birole bey co, zha Israel nac naa, lo xtii Benjamín zial naa, merpaa zha Israel nac naa; sac niicle pxoz naaw, niicle

xniaa naaw zha Israel nac me. Niicle xleygaa zha Israela, nroob pseed naaw, zha farisé goc naa; <sup>6</sup>bleyniedox naa grë miñe zianał zha Israel, gacxe waa pquianał naa grë miech ne no xnëz Jesús; zig nac miñe raquiet lo ley, grësew beñ naaw zigne naca, ib biod dze ne cho zha pe nlisqui lo naa.

<sup>7</sup>Lëë grë ncuaañ co rnalo naa leñ dze co, sangue niina Jesús rnalo naa, grëse ncuaañ co laaw psañle naa tib lad. <sup>8</sup>Ni led loxaque psañdse naaw tiblād, sinque grësew peet nondraaw lo naa, miñe non lo naa niina nacne beenbey naa cho nac Jesús, meñ ndzon ne rnabey naa. Niina ne laa naa runbey me, grëse ncuaañ co rzaac naaw zig rzac ne grë pe guizh beed, sac laa naa racladz gbigrāa naa lo me, ni gacniera naa me. <sup>9</sup>Zanałdraa naa guñ naa miñe rnabey ley par guiaañmbe naa lo doł, sinque laa naa zanał dib zdo naa gliladz naa cho nac Jesús; sac zha ne dib zdo rna lo me, sañmbe Dios zho lo doł. <sup>10</sup>Racladz naa guieñraa naa zha nac Jesús, ni gaap naa poder ne pquiin Dios zeeñe blische me me leñ baa, ye naa teed grë miñe bded me, ni cueeladz naa xquiełmban naa zigne blee-ladz me xquiełmban me; <sup>11</sup>ni scagaa, nañpaa naa ye naa greeban gał dze ne guiadbeeban me grë zha ne no xnëz me.

**Stsëë Jesús xcuerp zha ne ngab lo me**

<sup>12</sup>Gnid naa togo laa naa beñle gan, nasi laa naa nacle zigne racladz Jesús gac naa; led scada, laa naa bii noxcow, sac nañpaa naa zac naa zigne no guic me gac naa zeeñe psilaa me naa. <sup>13</sup>Bets, bzian, gard guñ naa gan; per xco co no naa; grëse ncuaañe bded laaw biaanladzle naa, laa guic naa zienie ncuaañe naraa ziaad. <sup>14</sup>Masaque rzaac naa niina zig rzac zha ne rie prueb lo corr, rded naa fuerz gdziñ naa zaatne gneedz Dios zhipremio naa, guiełnzaac ne rbedz Dios ne yгаа ne zeeñe laa ne rliladz Jesús.

<sup>15</sup>Ni ib znu none tsonie guic grë zha ne nlipaa dziits zo lo Xtiidz Dios; telne nogaa bla zha ne rzac led scada, per Dios gdeed guiełbiini lo zho guieñ zho ganle zha naca. <sup>16</sup>Ni negaa, grë miñe rienle ne zha nac, none gban new.

<sup>17</sup>Bets, bzian, gołwi ganle zha mban naa, ni zha mbangaa grë zha ne zianał miñe blu no lo to grë to; dzigo sca gołban. <sup>18</sup>Sac gonñ nzian zha ne nacgrë to i (blactaale zizet naa zho lo to, ni niina haxta roon naa rzet naa zho stib), laa zho mban zigne racladztaa zho, rlëë zho ron zho pe nac gut Jesús lo cruz; <sup>19</sup>ni nëz ne nitlo zho ga zie zho. Laa ne tsianał zho miñe rnabey Dios, laa zho zianał grë ncuaañe gdeed guxt zdo zho, ncuaañe gdeed guxt xcuerp zho. Loxaque grë ncuaañe mbee guiełto zianał zho, per zha rlozhd gleynie zhow; niapse grë ncuaañ lo guidzliu rii nonie guic zho.

<sup>20</sup>Sangue ne, laa ne zianał ncuaañe yгаа ne gbaa, sac gbaa nac zaatne ngab ne, ni laa ne quiambiaaz quiet Jesús gbaa guiaad me stib (me nac meñ ne psilaa miech lo doł, me nac meñ ndzon ne rnabey); <sup>21</sup>zeeña ctsëë me xcuerp beñ wiich ne nu, gaca zig nac xcuerp

ndzon me. Ni ib zuñ mew, sac nroob poder ne rap me rnabey me grëtaa ncuaañe no.

**Rnab Pabl nley gac zha Filip**

<sup>4</sup>Bets, bzian, ne nlipaa gonñ rleynie naa to, haxta rzaac naa tebaa laa naa ranle lo to; to nac xquiełbley naa, to nac zig tib premio lo naa por grëtaa xtsiñ Jesús miñe beñ naa lo to. Laa naa rso diidz lo to, tibaque squi dziits gołso, ib csaande to zhiwseed Jesús.

<sup>2</sup>Rnab naa lo bzian ne Evodia, ni lo bzian ne Síntique glëëlsadraa zho, none tipse gnee zho; sac gonñ bel zho, xnëz Dios no zho grop zho. <sup>3</sup>Ni luu gonñ bets, ne nac luu zha ne tibaque quiaacnie naa lo dziin ne quiadziun ne, laa naa rnab lo luu bnee lo grop wnaa qui gneewen zho stib, sac gonñ ye zho blactaa miñe bded zho zeeñe bzënał zho zhits naa biotiiz no Xtiidz Jesús, ni zeeñe güeynalгаа zho zhits Clement, ni zla zha ne rdziuungza no dziin. Laa lë zho zhooble leñ libr ne quia lë grëse miech ne bgaale guiełmban ne gdziñdraa dze lozh.

<sup>4</sup>¡Golley sca, tibaque gołley! ¡Golgan ganle lo Jesús ngab to! Ni rneque naaw stib: ¡Golley! <sup>5</sup>Gołguien zacse gołbannie grëse samiech to, zeeña haxta gzëëb diidz ganle ne nli miech ndzinli, miech ndooladz nac to. ¡Golguien ganle, ile ziaad meñ ndzon ne rnabey ne!

<sup>6</sup>Teł pe nac grë ncuaañe quiaaded to, tsoode to zhgab, gdziebde to, sinque gołzodiidznie Dios, gołsan grësew ladznia me; per led loxaque gnabdsse to, sinque gołso-ladz gołdeed xquizh lo me. <sup>7</sup>Ni zeeñe sca csañ to grë xliaadz to ladznia me, haxta tibliladz guiaañ zdo to, peet dzeb tsoniedraa zdo to, peet zhgab tsoniedraa guic to, masaque Jesús nac meñ ne nacie to; grëraa miech ib guieñd zho zha nac ne scataa tibliladz rac to.

<sup>8</sup>Bets, bzian, nu ne laa naa csiaalle guits rii laa naa rnab lo to, miñ rii gołconie guic to:

niapse miñe nac diidzli,  
niapse grë ncuaañe nonguiel gac,  
niapse grë ncuaañe rac zigne nac diidzli,  
niapse grë ncuaañe mbe,  
niapse grë ncuaañe gleynie miech,  
niapse grë ncuaañe gley miech gon zho,  
niapse grë ncuaañe yquiin,  
niapse grë ncuaañe gzee zdo miech ni gleynie zho.  
Grë miñ rii gołconie guic to, ni lëëw gołtsoxco guñ to.

<sup>9</sup>Ni gołguien gonñ, grë miñe pseed naa to, miñe psañ naa diidz lo to guñ to, grë miñe bin to bne naa lo to, miñe gonñ to beñ naa, grë miñ co gołtsianał; zeeña scagaa zacnie Dios to ib peet zhgab ctsebdraa to.

**Gon ne bdeed zha Filip**

<sup>10</sup>Ne nlipaa rded naa xquizh lo meñ ndzon ne rnabey ne, ni rley naa ne laa to pxeel grë ncuaañe yquiin naa stib. Nañ naa ne led biaanladzde to naa, sac tibaque noxco to dieñ zha guñ to xyudar naa; sinque bdeed-niobda diidz. <sup>11</sup>Rley naa ne laa to psoladz naa, maase niicle nodpaa naa zhgab co dieñ pa gree pe yquiin naa, sac pseedle naa peet zienied guic naa niicle tel

zhataa nodeed naa. <sup>12</sup> Nañ naa zha nac guielprob, ni nanquegaa naa zha nac zeeñe quianie ne nroob ncuaañe yquiiin ne. Pseedle naa rzac zdoo naa miñe nodeedtaa naa, niicle zeeñe biodzë zdoo naaw, zeeñe rcaabedzgaa naaw; niicle zeeñe nroob ncuaañe yquiiin naa no, zeeñe peet guieñdga. <sup>13</sup> ;Grësew rrieelo naa, sacne nacie Jesús naa, me rneedz xfuers naa! <sup>14</sup> Per wen ga been to, pxeel to ncuaañe pquiiin naa lëëtaque leñ dze ne peet guieñd lo naa.

<sup>15</sup> Zeeñe brie naa nëz xtan zha Macedon i, leñ dze ne wriiñ psilo noseed naa miech Xtiidz Ndzon Jesús ga, tosaque nac zha ne been xyudar naa, beenlo to gon pxeel to lo naa, porne rleyne to dziin rii. <sup>16</sup> Scasaque leñ dze ne no naa Tesalónica, blalaa vuelt pxeel to pe pquiiin naa.

<sup>17</sup> Guiabde to togo bod ne dieñ zha ygadraa miech lo naa gane rzetpaa naaw; lëda, sinque rley naa ne squi rala zdoo to rgad to, sac squi nroobraa guieñzaac ne ygaa to. <sup>18</sup> Tel na gon, grële ncuaañe yquiiin naa no, haxta nrooblew nu. Ni ne pxeelaque to Epafrodit bi-

aadsañ stib nëza, haxta bdedsole goclow lo naa nu. Grëtaa ncuaañe bgad to lo naa, rrieequia naca zig tib gon ne bdeed to lo Dios, zig tib gox ndzon ne sac zdoo me ycaania me. <sup>19</sup> Scagaa niina nagon, grëse ncuaañe yquiiintaa to, Dios meñ ndzon ne rliladz ne, me gneedza lo to, porne nligaa dib zdoo to rliladz to Jesús; sac gon, nroobdoo grë guieñdzon, grë guieñzaac ne rap Dios. <sup>20</sup> ;Lëë xDios ne ga, me nac Pxoz ne grëse ne! ;Gotsaa dziuunnon ne me sca, mesi gdziñd dze ne nitlo xquieñdzon me! Sca rieguiala.

<sup>21</sup> Goideed tib zhibdiuzh naa lo grëse zha ne no xnëz Jesús i, grë zha ne squi noxco mban zigne racladz Dios. Scagaa goicaania zhibdiuzh grë zha bets ne, zha ne no lo naa nu. <sup>22</sup> Goicaania zhibdiuzh grëse zha ne no nu, zha ne rliladz Jesús; haxta ye grë zha ne rquia dziin lo rey Roma nu, laa zho rxeel zhibdiuzh zho lo to.

<sup>23</sup> Jesús, meñ ndzon ne rnabey ne; me noxco to, me nonie grë zhizhgab to. ;Me gunlay to grëse to!

Pabl

# COLOSENSES

¡Diuzh to grëse to!

**1** Naa nac Pabl, tib zha ne pxeel Jesús nonee Xtiidz me lo miech, sac ible Dios bnabey ne sca gaca.

<sup>2</sup> Grop no Timoté laa no rxeel guits rii Colós i, laaw ziaad lo to grëse to ne nac to zha ne noxco mban zigne racladz Dios, ni dib zdoo to rleyne to Jesús.

Dios men ne nac Pxoze, me glu ganle pa lotaa noxco me to, zeena peet dzeb tsonied guic to.

<sup>3</sup> Gzobtaa zeene rzodiidznie no Dios, Pxoze Jesús men ndzon ne rnabey ne, rnab no gacnieu me to, ni rdeed no xquizh lo me ne squitaa rneedz me guielbiini lo to;

<sup>4</sup> sac zidzion no ne nlipaa dib zdoo to riladz to cho nac Jesús, ni rleyne to grëse zha ne no xnëz Dios. <sup>5</sup> Miñ co nonie guic to, sac desde dze ne psilo pquiaadiag to Xtiidz Ndzon Jesús miñe nac diidzli, laa to gocnan ganle no tib guielnzaac nroob ne yгаа to gbaa.

<sup>6</sup> Golgacnan sca ganle, Xtiidz Ndzon Jesús, wseed ne riladz to, nzianraa zaatne quiagaaza, ni lëew notsëe lo xquielmban miech, zigne bdzëëque lo xquielmban to zeene pquiaadiag tow, laa to bien ganle ne nligaa pa lotaa noxco Dios to. <sup>7</sup> Lëe miñ co ga biadseed Epafr to; tib men ne nziuu lo no, ye me rquiagza no dziin; ranaxe to ganle zha rioxcotaa me xtsiin Jesús. <sup>8</sup> Me bzodiidz lo no ne squitaa rneedz Espiritu Sant guielbiini lo to, rleyne to samiech to.

<sup>9</sup> Gane zeene bdzion no squitaa ndzinli mban to, tibaque laa no quianab lo Dios quixbiiniraa Espiritu Sant guic to, guien to zhapaa nac grë miñe racladz Dios guñ to; <sup>10</sup> zeena grieelo gban to zigne no gban zha ne no xnëz Jesús, tibaque guñ to ncuaañe conley to zdoo me; dzigosi grëse ncuaañe ndzinli ne guñ to, zlpaa ncuaañe rquiina, ni ziogucraa to zha nac Dios.

<sup>11</sup> Ni rnab no lo me, niapse por poder ne rap me guñndip me zdoo to, guñndip me guic to; zeena niicle tel pe nactaa guielnë ne gan to, ib peet tsienied guic to, ib sacxuude to, <sup>12</sup> iñe gley to gdeed to xquizh lo me nac me Pxoze, ne squi laa me bzooblo to, psanmbe me to; zeena gdziñ to lo biini zaatne yгаа to miñe no gdeed me lo grëse miech ne no xnëz me. <sup>13</sup> Sac me nac men ne blee ne ladznia menodox, ma ne rnabey lo guielcow, psan me ne ladznia Xpëed me Jesús, men ne rleyne me ga. <sup>14</sup> Jesús nac men ne bdiizh grëse xtoñ ne zeene sca gut me lo cruz, me nac men ne psanmbe me ne nëz lo Dios.

## Grë ncuaañe been Xpëed Dios

<sup>15</sup> Niicle ne gard dzian ne Dios, per laa Xpëed me biaad biaadlu lo ne ganle zha nac me, sac zigne nacse

me scaque nac Xpëed me; ni ladznia Xpëed me no grëtaa ncuaañe no. <sup>16</sup> Zeene bnabey me tsa grëtaa ncuaañe no gbaa, grëtaa ncuaañe no lo guidzliu; Xpëed me bzaaw grësew, zigtaa grë ncuaañe rdzian new, zigtagaa grë ncuaañe grieelod dzian new, zig nac grë “me mban” ne rap guielrnabey, rap poder. Jesús bzaaw grësew, ni ible par me biaaw. <sup>17</sup> Nole Jesús zeene baa grë ncuaañ co, me naaza, gane tib tiba nosew zaatne rieguiaa. <sup>18</sup> Ni grëse zha ne no xnëz me, me nac men nroob ne rnabey lo zho; grëse zho laa zho nac zig tib cuerp, dzigo me nac guic cuerp co. Me nac men ne nole glo, ni me nac men ne glopaa brieeban; zeena glu ganle me nac men ne mazdraa nroob, me nac men ne mazdraa non; <sup>19</sup> sac ib Dios bnabey zigne nacse Dios scaque nac me.

<sup>20</sup> Niapse por Jesús grëse ncuaañe no zigtaa lo guidzliuw, zigtagaa gbaaw, laaw baañwen lo Dios, ni lëe miñ co goc zeene sca bzhee xchen Jesús lo cruz. <sup>21</sup> Zig nac to, glo zit zo to lo Dios, rrieequia rlëenie to me, sac niapse grë ncuaañe ndzinlid güeynie guic to been to; <sup>22</sup> sangue niina laa Jesús psanwenle to lo me, zeene sca goc me miech pquiaa zho me lo cruz. Ni laa me psanwen to, zeena iñe mbele to, ni tib doñ rapdraa to gdziñ to zaatne no me. <sup>23</sup> Per parne grielo gdziñ to ga, none tiblque golgun guic to, goltsienal Xtiidz Ndzon me miñe riladz to, ib guiaañladzde to guielnzaac ne no yгаа to, zigne raquiet lo Diidz Ndzon ne pquiaadiag to ga. Lëe Diidz Ndzon co quiagaaz dipse lo guidzliu niina, ni ye naa nac tib zha ne quia quianeew lo miech.

## Dios bzo Pabl tsoxco me zha ne ngab lo Dios

<sup>24</sup> Grë guielnë ne noyan naa porne rleyne naa to, rley naa noyan naaw. Laa Jesús gonle grë guielnë co zeene psilaa me grë zha ne ngab lo me niina, laa niina ye naa noyan spalala, loxaque ne noseed naa zho Xtiidz Ndzon me, ne nac zho zig xcuerp me. <sup>25</sup> Ni ible Diosgaa bzo naa noyuh naa dziin lo grë miech ne no xnëz me, zig nac to, gocnieu me to bzo me naa bne naa grëse zigne nac Xtiidz Ndzon me lo to. <sup>26</sup> Diidz ndzon ne gocnan grëtaa zha gol ne ziaadmban wlal ne bre guidzliu, laaw gocnan grë zha ne no xnëz me niina. <sup>27</sup> Ible zha gocladz me gacnan grëtaa guielnzaac ne yгаа zho zeene laa zho gacnan diidz co; haxta to ne nac to zha zit. Ni lëe diidz ndzon co nu: Zha ne nacnie Jesús, me gdziñnie zho zaatne nac lo guielndzon ne no me.



<sup>28</sup> Gacxe waa, zaatne ziotaa no, Jesús nac meñ ne rzeet no lo miech, ni megaa rneedz guielbiini lo no rseed no zho, rso no diidz lo zho; zeena gac zho tib miech ndzinli, zigne no gac zha ne ngab lo me. <sup>29</sup> Miñ co nac dziin ne noxco naa, per led dziin ligada, gane dib nacse guielndaan, dib nacse fuerz ne rneedz me lo naa, noxco naa noyuu naaw.

**2** Racladz naa gacnañ to ganle ne nlipaa tibaque no to guic naa, zigtaa tow, zigtagaa zha Laodicéw, ni grérageaa zha ne gard ganlo naaw. <sup>2</sup> Rnab naa lo Dios ib guiaand zdoos to, tipse gac to ine gleyne to grè zha ne nacgrè to, lozhaa tsaa biini xquielrien to guien to ganle zhapaa nac Jesús, sac gon naraa bdeed Dios diidz gunbey miech me. <sup>3</sup> Me nac meñ ne rap grèse guielrac, grèse guielbiini nroob cheñ Dios. <sup>4</sup> Laa naa rne miñ rii lo to, zeena choot yquidiede to, niicle paraa ndzielguic rzè xtiidz zho. <sup>5</sup> Niicle ne nli zozhaald naa lo to i, per zhiespíritu naa nacie naa to, ni rley naa ran naa squi zaacse mban to, tiblque nac guic to dib zdoos to riladz to Jesús.

### Tib guielmban cub

<sup>6</sup> Nana sca, zigne bzèeb to xnèz Jesús gnabey me to, scagaa gołtsienal miñe rnabey me, <sup>7</sup> masaque laznia me gołsan xquielmban to, me gołnalo, gołlu ganle ne nli dib zdoos to riladz to me, zigne pseed no to, ni tibaque gołdeed xquizh lo Dios.

<sup>8</sup> Nsin gołso: ib gac-wete to lo grè zha ne guiaadnie wseed lo guidzliu rii, grè godiidz ne paat rquiind, sac laa zho gacladz yquidie zho to. Tel zha, ib rzeete zho lo miech dien cho nac Jesús, sinque lel grè ncuane run grè xmengol zho, grè wseed ne rleyne grè miech lo guidzliu, miñ co rseed zho miech. <sup>9</sup> Sangue ne, ndion ne ganle zigne nac Dios scapaa nac Jesús. <sup>10</sup> Gacxe waa, to ne nacie to Jesús, peet rquiindraa to. Me nac meñ ne rnabey lo grèse zha ne rap poder, lo grèse zha ne rnabey.

<sup>11</sup> Zeene bnalo to Jesús rriequia hor co bio to tib bey, per nacda zig nac bey ne rio xcuerp zha bgui, sinque tib bey ne rlu ne laa to psaanle grè dol ne been to glo; ni Jesús nac meñ ne bloo to bey co. <sup>12</sup> Ni zeene brobnis to, rriequia bguetsnie to me ga ni brieebanie to me, sacne bliladz to poder ro ne rap Dios meñ ne blische me len baa. <sup>13</sup> Glo zha gutle nac to nèz lo Dios, lala por grètaa xtol to ni porne gard co Jesús to bey co; laa zeene bleeban Dios Jesús, meñ ne pxeel me biaadsilaa ne lo dol, laa to wbiire bgaa guielmban stib. <sup>14</sup> Ptiche Dios grèse miñe rioguañ ne, sac bdiits ne miñe nac xley me; grèse dol co pcaadz me Jesús zeene laa Jesús pquia lo cruz. <sup>15</sup> Ni zeene sca bded Jesús, ga psiaablo me mendox; grè me yozh ne rap poder, me ne rap guielrnabey, psan me ma guielto; sac gasi laa me blu lo miech ganle ne nli lazniale me no ma.

### Grè wseed ne paat rquiind

<sup>16</sup> Gacxe waa, ib guncasde to zha ne rlisqui dien pe nacne pe row to, pe nacne pe rie to, pe nacne runde to

grè zhilni zha Israel, runndade to dze ne rquia mée yeen, runndade to dze ne rdziiladz zha Israel lo dziin.

<sup>17</sup> Grè miñ co bioxco miech zeene gard guiaad Jesús, per lega gocse ncuane co zig tib zhimlè guielbiini ne biaadnie Jesús. <sup>18</sup> Ib gliladzde to xtiidz grè zha ne squi racladz csozit to lo Dios, niicle squitaa rquiaalo zho ndooladz rac zho, squitaa rleyne zho grè anjl, rnee zho goon dieen pe ncuane gbaa ne zielulo lo zho, lèeque lèe zho rlozhd gunniats zho por grè zhiwseed zho. <sup>19</sup> Led yed zho ngab lo Jesús, meñ ne rnabey lo ne grèse ne ne nac ne zha ne ngab lo me. Tel ne, me racnieñ ne, tipse noyuu me ne, laa ne noyabiiniraa zigne racladz Dios.

<sup>20</sup> Zeene sca gut Jesús, gataa bnitlo me grètaa miñe nac to glo, gane niina ngadoodraa to lo grè ncuane zienal grèraa miech guidzliu. ¿Pe nac dzigo ne bii zienal to grè miñ co? <sup>21</sup> Zig nac grè miñe rnabey zho to, rnee zho: “Nod gon yquiiin to ncuane rii, nod gow to miñ rii, gacd ygaal to ncuane rii.” <sup>22</sup> Ncuane tib rded nac grè ncuane qui, zig nac guielwagw led ncuane gdiid ga, grèse wseed qui miechse bleebeya. <sup>23</sup> Parga nli na zootle nixbiini nac grè wseed co, sac rioxco zho dien zha tsiegan zho grè anjl, rac ndooladz zho lo miech, ni rsacsi zho xcuerp zho; per rrieelod grè ncuane co ctsèew xpensar zho, zdoos zho, parne gnabey zho xcuerp zho.

**3** Golguien ganle, stible guielmban rap to niina, lèe guielmban co bgaa to zeene brieeban Jesús; gacxe waa, gołsoxco ygaa to grè guielnzaac ne no gbaa, zaatne zob Jesús cue Dios nèz derech. <sup>2</sup> Grè guielnzaac ne no gbaa miñ co gołconie guic to, led grèd ncuane no lo guidzliu rii; <sup>3</sup> sac gon, rriequia gutle to lo grè ncuane no lo guidzliu rii, laa to mban-niele Jesús, zigne racladz Dios. <sup>4</sup> Laa ne rdziaap tib guielmban cub niina, sacne nacie ne Jesús; gal dze ne laa me guiaad stib, laa ne no gdziñ lo me gban ne zatne nac lo xquielndzon me.

### Zha gban zha ne riladz Jesús

<sup>5</sup> Gacxe nana sca, gołsaan grètaa guielntseeb ne run miech lo guidzliu rii:

tsoniede to zha ne led tsielde to,  
gunde to grè ncuane mbeeguelto,  
gdeete to diidz gnabey xcuerp to to,  
gunde to ncuane ndzinlid ne racladz to,  
ni gacblède to lo dimi (sac tel scaw, dzigo dimi rsan to xlugar Dios).

<sup>6</sup> Grè dol rii run grè zha ne néd gon xtiidz Dios, lozh ga lèe miñe tsieguial zho laa zho ygaa lo guielzi ne csaab Dios. <sup>7</sup> Zig nac to, grè miñ co been to glo; <sup>8</sup> sangue niina, none csaan tow, ni lalnu:

glèeniedraa to samiech to,  
sobzhiandraa to,  
gundraa to guielntseeb,  
gdeenèdraa to samiech to,  
gneedraa to diidzguidz,  
<sup>9</sup> yquidiedraa to samiech to.

Sac gon, nacdraa to zigne nac to glo, laa to brielee lo grëtaa miñe been to. <sup>10</sup> Stible nac lo xquie|mban to niina: tib miech cuble nac to, ni laa to bii nodzëë haxta que ne gac to zigne racladz Dios meñ ne psañ miech, zeena scagaa lozh gunbey to zha nac me. <sup>11</sup> Zha ne bgaale guie|mban cub rii, led yedraa zho cue dien cho zha nac zha Israel, dien cho zhagaa nac zha zit; dien cho no bey, dien cho nodgaaw; dien cho ziaad guiedz nroob, dien cho ziaadgaa guiedz win; dien cho rac, cho gacdga; dien cho run xtsiin ben, dien chogaa nac zha rnabey. Miñe rquiinraa niina, nacne grëse zho guien ganle Jesús nac meñ ne mazdraa non, me none gnalo zho.

<sup>12</sup> Golgan ganle, zha nquialadztaa Dios to, ib laa me ble to gac to miech ne ygab xnëz me. Zaacse sca golban, ne nlipaa dib zdo to:

golquia zdo samiech to,  
niowse golgac lo samiech to,  
ndooladz golgac lo samiech to,  
nguudzladz golgac lo samiech to,  
guieedniede to samiech to.

<sup>13</sup> Guieedniede to samiech to, ni zeene cho zha run pe tib falt lo to, golgun zho perdon. Golguien ganle zha been Dios to perdon; scaque to, none gun to samiech to perdon. <sup>14</sup> Ni miñe mazdraa none tsoxco to, golveynie zha ne nacgrë to zigne racladz Dios, zeena tipse gac to; ni scagaa gleynie to grëraa samiech to. <sup>15</sup> Jesús nac meñ ne ctiche grëtaa ncuaañe ndzinlid ne no zdo to, zeena niowse gbannie to samiech to. Lëë tib guie|nzaac co no yгаа to ne laa Dios bredz to, ni scagaa none gban to, zeena tipse gac to grë to. Golsoladz goldeed xquizh lo me.

<sup>16</sup> Niapse miñe nac Xtiidz Jesús golconie guic to, golco zdo to. Golquien grë guie|biini ne rneedz me lo to, golseed grë zha ne nacgrë to, ni zha ne rxin, golnee lo zho zaacse gac zho. Dib zdo to goldeed xquizh lo Dios por grëtaa miñe run me, iñe golgoolnie me grë salm, golgoolnie me grë cant ne rdzioolnie ne me.

<sup>17</sup> Ncuaañe guntaa to, niicle zeene gnee tow, zeene gungaa to tib dziina, golguna zigne rdziladz Jesús, meñ ne rnabey ne; ni tibaque goldeed xquizh lo Dios meñ ne nac Pxoz to, niina ne laa to ngable lo Jesús.

<sup>18</sup> To ne nac to meñ wnaa ne ptsieelniale, golgon xtiidz tsieel to, sac ible sca nonguie| gban miech ne no xnëz Jesús.

<sup>19</sup> To ne nac to meñ bgui ne ptsieelniale, golveynie tsieel to; gacnchogde to lo me.

<sup>20</sup> To ne nac to mëed, golgon miñe rnee pxoz to, miñe rnee xniaa to, sac sca rdziladz Dios.

<sup>21</sup> Togaa ne nac to meñ nguzan, gunde to ncuaañe gunglëë to xpëed to, zeena csande to zdo zho.

<sup>22</sup> To ne nac to zha ne lega run xtsiin ben lo guidzliu rii, golgun grëse miñe rnabey zho to; gunde to zeene zose zho lo to dzigose yquiaalo to gun to dziin, zeena guianzuiu to lo zho; sinque dib zdo to golgun xtsiin zho, golguien ganle Dios zobwi ran me pe run to.

<sup>23</sup> Grëse dziin ne gun to, iñe nguiee| golgac golguna, zig nac zeene xtsiinzhaldz Dios noyun to. <sup>24</sup> Benque

nanle to, zгаа to miñe gdeed Dios lo grë zha ne ngab lo me, telne gon to diidz; sac gon Jesús nac meñ ne nli-paa rnabey to, ni lo me quia to dziin. <sup>25</sup> Golgon diidz sca, sac zha ne gonda, ib tedsod zdeed Jesús miñe tsieguial zho; sac gon, tel me led yed lo me ncuue miech.

**4** Togaa ne nac to zha ne quia miech xtsiin, zaacse golgac lo zho, csacside to zho. Golsoladz ganle, ye to tib ngundziin nac to lo meñ rnabey ne zob gbaa, ni me zobwi ganle pe run to.

### Gnab zho gacniën Dios Pabl

<sup>2</sup> Bets, bzian, tel petaa rzac to tibaque golzodiidznie Dios, nsin golso, goldeed xquizh lo me. <sup>3</sup> Golnab lo me gacniën me no, grieelo ziaab no zaatne guioseed no miech Xtiidz Ndzon Jesús, gnee no lo zho ganle cho nac Jesús meñ ne beenbeyd miech padzeela; sac zig nac niina por miñ co znu nioogyu naa nu. <sup>4</sup> Golnab lo me gneedzraa me guie|biini lo naa, zeene cseed naa miech xtiidz me, guien zho miñe rne naa; gun naa dziin co zigne no gun naaw.

<sup>5</sup> Golquien guie|biini ne rneedz Dios lo to, zeena guien to zha gnee to, zha gac to lo zha ne gard gliladz Xtiidz Jesús; ni zeene sca rdeeda diidz sodiidznie to zho, golnee lo zho ganle zha nac Xtiidz me. <sup>6</sup> Golguien tib godiidz ndzinli, tib godiidz niowse, miñ co golzodiidznie zho, ni none guien to zha ctsire to lo xtiidz zho tib tib zho.

<sup>7</sup> Laa bets ne Tic guiaad i, me guiaadnie diidz lo to ganle zha no naa nu. Rleynie no me, tibaque laa me noxco quiadziungza no me xtsiin meñ ndzon ne rnabey ne. <sup>8</sup> Ga nagon laa naa rxel me, me gnë lo to ganle zha no no nëz rii, ni gnee me lo to zeena cchoobladz me zdo to. <sup>9</sup> Ye menladz to Onésimo guiaadgrop me. Rleynie no Onésimo, ye me tibaque noxco me xtsiin meñ ndzon ne rnabey ne. Grop zho guiaadnie diidz i ganle zha nac grë ncuaañe quaiyac nëz rii.

<sup>10</sup> Golcaania zhibdiuzh Ristarc, meñ ne nioogyunie naa nu, zhibdiuzh Marcw betsyeeñ Bernabé (laa naa nile lo to ganle, telne laa Marcw guiaadgan to i, niowse golcuëzlo me); <sup>11</sup> ni zhibdiuzh Jesús, tib meñ ne rneeque zho Just. Lo grë zha Israel ne riladz Jesús, lëëse gza zha rii nac zha ne quiaayun xyudar naa quiaseed no miech zha sëëb zho xnëz Dios, ni blactaa zichoobladz zho zdo naa.

<sup>12</sup> Golcaania zhibdiuzh menladz to Epafr, ye me quiaayun xtsiin Jesús nëz rii; tibaque rzodiidznie me Dios rnab me dziits so to lo Xtiidz Jesús, ni tiblique gac guic to tsoxco to gban to zigne rnabey Dios. <sup>13</sup> Nanpaa naa ganle pa lotaa nonie to guic me, grë to zha Laodicé ni zha Hierápolis.

<sup>14</sup> Golcaania zhibdiuzh Demas ne, ni zhibdiuzh Luc meñ ne run rmed, lëë stib meñ ne nziuu lo no nu.

<sup>15</sup> Goldeed tib zhibdiuzh no lo grë zha ne no guiedz Laodicé, zha ne nacgrë ne. Goldeed zhibdiuzh no lo zhuz Ninf, ni lo grëraa zha ne rcaalsa lidz me i, rie-goolnie zho Dios.

<sup>16</sup> Zeene gon lozh glab to lo guits rii, dzigo go<sup>l</sup>xee<sup>l</sup>a lo zha Laodicé, zeena ye zho glaba; ni scagaa to, go<sup>l</sup>lab mi<sup>n</sup>e cxe<sup>l</sup> naa lo zho. <sup>17</sup> Ni go<sup>l</sup>guiab lo Arquip, tsoxco me zaacse gu<sup>n</sup> me dziin ne bdeed Dios lo me i.

<sup>18</sup> Naa nac Pabl, go<sup>l</sup>gan<sup>n</sup> gan<sup>le</sup> naazhal pquia tib bdi-uzh rii nu rxe<sup>l</sup> naa lo to. Go<sup>l</sup>soladz gan<sup>le</sup> ladzguiib no naa. Dios nac me<sup>n</sup> ne gun<sup>l</sup>ay to, me glu lo to gan<sup>le</sup> pa lotaa noxco me to.

Pabl

# 1 TESALONICENSES

¡Diuzh to grëse to!

**1** Naa nac Pabl, gza no Silas ni Timoté, laa no rxeel guits rii Tesalónica i; laaw ziaad lo to grëse to ne nac to zha ne ngable lo Jesús, men ndzon ne rnabey, ni lo Dios men ne nac Pxoze.

Dios ni Jesús, me glu ganle pa lotaa noxco me to, zeena peet zhgab ctsebbe to.

<sup>2</sup>Tibaque rdeed no xquizh lo Dios men ne nac Pxoze, squitaa rneedz me guielbiini lo to; gzobtaa zeene rzodiidznie no me rzeet no to lo me. <sup>3</sup>Ni zeene rzeet no to lo me, rsoladz no grëtaa dziin ne ruñ to niina ne dib zdoo to rleynie to me, ni zha quialëb to lo grëtaa guielnë ne noyan to, tibaque nonie guic to ne ible dzizh dze ne laa Jesús guiaad stib.

<sup>4</sup>Bets, bzian, rleyniedox Dios to, ni ndion ne ganle me bzooblo to ygab to lo me. <sup>5</sup>Zeene biaad no biadseed no to Xtiidz Ndzon Jesús, znuse ptsëw lo xquielmban to, sac gocnie Espiritu Sant to bien to ganle niapse diidzli nac grë diidz ne nonee no lo to; scagaa no, gon to ganle zha mban no, ga blu ne nli diidzli nac grë miñe noseed no miech. Ni golsoladz ganle zha biaadbannie no to i, bdzioxco no bdziuuñ no xyudar to, sac ne nligaa rleynie no to.

<sup>6</sup>Scagaa to, pseed to wban to zigne mban no, ni zigne wban men ndzon ne rnabey ne. Laa to pcaania xtiidz me, blozh ga, niicle nroob guielnë ne bded to, per bneedz Espiritu Sant guielbley lo to, ib peet güeynied guic to. <sup>7</sup>Grëse zha ne riladz Jesús nëz Macedon, nëz Acay, zeene bin zho zha mban to, yeque zho laa zho pseed mban zho zigne mban to. <sup>8</sup>Ni ne squi ndzinli mban to, nzianraa zaatne rzeet miech Xtiidz Ndzon Jesús, led loxaque gropdse lugar rii. Zaatne ziotaa no, zhoob diidz ne squitaa dib zdoo to riladz to Dios, rquiindraa ne no gzodiidza lo zho. <sup>9</sup>Zhale rzodiidz grëse zha biaad no lo to i, zha scataa niow blëzlo to no len dze co, ni zha psaan to grë zhiwseed xmengol to, grë ncuaañe nac mdio lo to, laa to bliladz men ne nacpaa Dios ne nguiamban, ni laa to zienal miñe rnabey me. <sup>10</sup>Ni rzodiidz zho zha zienie guic to ne ible dzizh dze quiet Jesús gbaa guiaad me stib, ni quiambëz to gdziñ dze co. Xpëed Dios nac Jesús, Dios bleeban me lo guielgut, ni me psilaa ne lo guielnëdox ne ziaadyob guiaad.

## Zha güeyseed Pabl zho

**2** Bets, bzian, nanle to ganle zeene biaad no lo to i biaad-zhlëd no, brieelo pseed no to. <sup>2</sup>Niicle ne wriiñ psacsi zho no guiedz Filip hor co, per laa no bii

biaad ladz to i, ni niicle igaaw bioxtseebaque no, per ib bdziebd no laa no pseed to Xtiidz Ndzon Jesús; sac ndion no Dios nacnie no. <sup>3</sup>Ni diidzli nac miñe pseed no to, choot biaate par nquidiee no to, niicle biaategaa no par dien pe niaadla no lo to. <sup>4</sup>Xtiidz Dios bnee no, me bzo no gnee no lo miech zha laa zho lo dol, ni miñ co nac dziin ne quiadziuuñ no. Nli nzian zha ne rlëñiew, per laa no bii rdziuuñ dziin co; sac zionald no gac miñe rdziladz miech, sinque laa no zional gac miñe rdziladz Dios, men ne nan ganle pe rza zdoo ne.

<sup>5</sup>Gon to ganle, bneed no pe diidz niow lo to par nquidiee no to, niicle bguibdgaa no dien zha ndeeda diidz needz to dimi lo no. Dios zobwi rdziuuñd no miñ co. <sup>6</sup>Waltaa ib bguibd no dien zha niacnon no lo miech, niicle lo tow, niicle lo stibgaa miecha. <sup>7</sup>Laa ne nlu no ganle zha rnabey nac no, sac gon Jesús pxeel no, lel ndooladz goc no lo to. Masaque zigne rleynie men wnaa xpëdyeen me, nda nda ran me win; scadaa bleynie no to, <sup>8</sup>bio no bdzioxco no pseed no to Xtiidz Dios. Ne nlijaa bleynie no to, telne niaca miñe niedziña haxta mbeeladz no no niet no por to.

<sup>9</sup>Bets, bzian, rsoladzaxe to ganle ni lalnu ib psodziind no to; blactaa, dze guieel bdziuuñ no dziin, nozhal bdziniaa ncuaañe pquiin no len dze ne biadseed no to. <sup>10</sup>Dios zobwi ran me ganle zha nac lo xquielmban no, ni niicle togaaw (ne nac to zha ne ngab lo me) gon to ganle ndzinli wban no zeene biaad no i, bdziuuñd no ncuaañe mbee no diidz ro miech, sinque laa no bdziuuñ miñe rdziladz Dios. <sup>11</sup>Masaque rziacac no to zig rzac tib dad xpëed zho, blactaa pchoobladz no zdoo to, bloonley no zdoo to tib tib to; <sup>12</sup>psa no diidz lo to zaacse gac to, gban to zigne no gban zha ne no xnëz Dios, men ne bredz to gdziñ to lo xquielndzon me, zaatne rnabey me.

<sup>13</sup>Ne nligaa rdeed no xquizh lo Dios, sac zigne biadnee no Xtiidz me lo to, laa to pcaaniaw, bien to Xtiidz me naca, nacda ncuaañe bleebey miech. Ni nligaa Xtiidz Dios, gacxe waa zha ne riladz zigne rzac tow niina, rzhixcuaa lo xquielmban zho. <sup>14</sup>Per zeene laa to bliladz, laa menladz to psacsi to; bded to zigne bdedaque grë zha Israel ne riladz Jesús, sac tel zhaw psacsi menladz zho zho. <sup>15</sup>Ni lëëque zha ne psacsi zho ga, zha co bnab psacsi zho Jesús men ndzon ne rnabey, zigne beetaque zho grë zha ne pxeel Dios biadteed Xtiidz me; ni lëëque zho benxoon no. Ncuaañe rbiñladz Dios ruñ zho, rlëënie zho grëse miech, <sup>16</sup>rt-sidil zho pe nacne nonee no lo grë zhazit zha laa zho lo dol. Loxaque quiayunctalraa zho xtol zho, per, iprob-

saxe zho, sac guielñëdox ne ziaadyob cxeel Dios ygaa zho!

### Racladz Pabl tsiegan Pabl zho stib

<sup>17</sup> Bets, bzian, nli gard dzianlolsa ne wlal ne wbii no i, per tibaque rsoladz no to; blactaa rnee no tel̄paa zha guiaaddzian no to. <sup>18</sup> Tel̄ naa blactaa gocladz naa nial̄ naa, nial̄gan̄ naa to. Laa no niaadle, per ptse men̄dox lo no gon̄, pca ma xnëz no pasëë no niaad. <sup>19</sup> Guiabde to togo quiayaanladz no to, sac gon̄ to rnalo no conley zdoo no gal̄ dze ne laa Jesús guiaad stib. To glu nli bdziun̄ no xtsiin̄ me, to glu ne nli riogual̄ no ygaa no premio ne gneedz me. <sup>20</sup> Ne nligaa rley no rdzian̄ no zha mban to, haxta riats no zeene raquiet to; sac to rlu gan̄le ne nli xtsiin̄ Dios nodziun̄ no.

**3** Ni ne scataa tibaque nonie to guic no, dzigo mazd pxeelaque no bets ne Timoté biaad lo to i, laa no biaan̄ guiedz Aten. (Nan̄axe to gan̄le ye Timoté nacgza no quiazziun̄ no xtsiin̄ Dios, quiaseed no miech Xtiidz Ndzon Jesús.) Laa no pxeel̄ me biaan̄gan̄ me to, biadchoobladz me zdoo to, biadnee me lo to lozh sodziits to lo Xtiidz Dios; <sup>3</sup> zeena niicle tel̄ pe guiel̄në ne noyanta to, ib guiaand̄ zdoo to. Nan̄le to gan̄le grëse ne ne rliladz ne Jesús, ib laa ne no dzian̄ guiel̄në. <sup>4</sup> Led rsoladz to zeene biaad no i, bneegazh no ne ib laa ne no dzian̄ guiel̄në; ni gon̄ to gan̄le scase goca.

<sup>5</sup> Ne nligaa tibaque bionie to guic naa, nacne mazd pxeelaque no Timoté, biaadso me dien̄ pe bii zienāl̄ to mine nac Xtiidz Dios; sac ni naa nend̄ pquiīl̄ men̄dox to biire zienāl̄ to ncuane rnabey ma, dzigo zhlëse biadseed no to.

<sup>6</sup> Laa niina ne laa Timoté blanso nu stib, blansonie me diidz, në me niowse mban to, rleyne to grë zha ne nacgrë to, dib zdoo to rliladz to Dios. Ni në me rleyne to no, ye to racladz tebaa zha gan̄ to lo no, zigne rziaaque no.

<sup>7</sup> Min̄ co nagon̄, bets, bzian, niicle ne nroob zhgab, nroob guiel̄në ne nodieed no nu, haxta biaan̄ladz no grë ncuane co zeene gocndion̄ no dziits zo to lo Xtiidz Dios, mine rliladz ne. <sup>8</sup> Haxta stib goc zdoo no bdzion̄ no squi tiblque laa to rleyne men̄ ndzon ne rnabey ne; <sup>9</sup> ni rdzieldraa no diidz ne gnee no gdeed no xquizh lo Dios por to. Ni ne znutaa bloonley to zdoo no, haxta Dios ran̄ gan̄le pa lotaa rley no. <sup>10</sup> Dze, guieel̄, quianab no lo me gneedz me diidzbey gbiire dzian̄ no lo to stib; zeena lozh cseed no to grëraa mine no gacnan̄ to lo Xtiidz me.

<sup>11</sup> Dios men̄ ne nac Pxoze ne, ni Jesús men̄ ndzon ne rnabey ne, me gacnieñ no grieelo guiaaddzian̄ no to. <sup>12</sup> Jesús gacnieñ to tsaaraa to biini, zeena gleyneraa to grë zha ne nacgrë to ni grëraa samiech to, zigne rleyne no to. <sup>13</sup> Ni rnab no lo me, gacnieñ me to tiblque gac to lo Xtiidz me, zeena ine mbe zdoo to, ni tib dol̄ rapde to zeene laa me gzo to lo Dios men̄ ne nac Pxoze ne, gal̄ dze ne laa me guiaad stib con grë zha ne nacie me.

### Guiełmban ne rdziladz Dios

**4** Zig zobwi Jesús men̄ ndzon ne rnabey, laa no rso diidz lo to: zigse zie dze gołtsoxcoraa gban to zigne rdziladz Dios, <sup>2</sup> ben̄que nan̄le to zhaw, sac lëë min̄ co rnabey Jesús no biadseed no to gon̄ to. <sup>3</sup> Sac gon̄, laa Dios racladz mbe guiaan̄ to lo me, gun̄de to guiel̄yozh yquiangob to zha ne led tsieelde to.

<sup>4</sup> Grë zha bgui, zeene laa zho gnee lo tsieel zho, none niowse ndzinli gac zho; <sup>5</sup> gun̄d zho zigne run̄ grëraa miech ne nan̄d zha nac Xtiidz Dios; sac tel̄ zha co, rzac zho loxaque par gdeedse guxt xcuerp zho, min̄cose rquiīn̄ wnaa. <sup>6</sup> Niicle yquiangobde to tsieel sabgui to; sac zha ne sca run̄, sabgui zho ga rguitnie zho; ni dol̄ co ible tedsod zun̄quish Dios zhow. Gołsoladz gan̄le psole no diidz rii lo to glo, ni na laa no rneequew stib. <sup>7</sup> Gol̄guien̄ gan̄le, bredzdaxe Dios ne waa parne dziun̄ ne grë guiel̄yozh, sinque laa me bredz ne gban ne zigne racladz me. <sup>8</sup> Gacxe waa, zha ne zienāl̄d wseed rii, gacnan̄ zho gan̄le xtiidz Dios ga (men̄ ne rdeed Espiritu Sant lo zha ne ngab lo me) noguiits zho, led xtiidz chol̄ze samiech zhow.

<sup>9</sup> Laa zig nac guiel̄wleynie, nan̄le to zha no gleyne to grë zha ne nacgrë to. Rquiīnd̄ cso no diidz lo to dien̄ zha gon̄ to, sac Dioszhal pseed to zha gleyne to zigtaa zha ne nacgrë tow, zigtagaa grë samiech tow. <sup>10</sup> Zig nac grë zha bets ne, zha bzian ne, zha ne no xtan zha Macedon, zëëb diidz rleyne to grë zha co. Gołtsoxco sca, gol̄leynieraa samiech to.

<sup>11</sup> Ni stib mine rso no diidz lo to: niowse gol̄bannie samiech to. Mine nac xtsiin̄ to tib tib to, min̄ co gołtsoxco, tozhal gołdziniaa ncuane yquiīn̄ to; <sup>12</sup> zeena peet gun̄falte lo to, ni scagaa grë zha ne gard gliladz Xtiidz Dios, haxta gzee zdoo zho gan̄ zho zha mban to. Gołsoladz gan̄le psole no diidz rii lo to glo.

### Ib ziaad Jesús stib

<sup>13</sup> Bets, bzian, nu na gan̄le laa naa gzodiidz lo to zha gac grë zha ne ret, zha ne ngable lo Dios; zeena tsode to guiel̄në zig rzac grë miech ne gard guien̄ gnalo Jesús.

<sup>14</sup> Ne, ne dib zdoo ne rliladz ne nli gut Jesús ni bleeban Dios me; scaquegaa none gliladz ne ible zbeeban Dios grëse zha ne dib zdoo rliladz Jesús, zeene laa Dios cxeel̄ me guiaad me stib. <sup>15</sup> Gol̄gacnan̄ sca gan̄le, znu gon̄ nac xtiidz me: Grëse zha ne ngab lo me, zha ne bii zomban gal̄ dze co (gal̄ dze ne guiaad Jesús) tednerd zho lo grë zha ne gutle. <sup>16</sup> Zeene laa me quiet gbaa, redz ro ne yquia, zlu zëëb tsi tib zha ne quianabey, tsi tib anjl̄ ne nonraa, ni tsi zhitrompet Dios; hor co laa me quiet gbaa, laa grë zha ne ngab lo me, zha ne gutle, laa zho grieeban. <sup>17</sup> Dzigo tipse gac zho grë zho zha ne bii zomban ga, laa zho soquia laglaa lo xcow tsiedzieelo zho me; dzigosi gdziñdraa dze ne gbiche zho lo me.

<sup>18</sup> Nana sca mine rne naa nu, gołsodiidza lo grëse zha ne nacgrë to; zeena conley to zdoo zho.

**5** Bets, bzian, nana par gni naa lo to dien pe guidze te guieel guiaad me, choot ndionda. <sup>2</sup> Golgacnan ganle, lega nacle zeene gan miech laa me ziaadle, zig nac zeene rzëëb ngbaan yu guieel, ¿cho dien nanpaa pa hor sëëb ngbaan? <sup>3</sup> Zeene laa grë miech guiab: "Nasi wen ndxie ne, peet guie|xtseeb nodraa", tibaque zeene guien zho laa dze ne nitlo zho bdziñle, ni gasi grieelodraa cho csilaa zho. Sac zig znuse rnaaz yoob meñ wnaa ne bdziñle dze gap xpëëd; scadaa gdziñ dze co.

<sup>4</sup> Sañgue to, bets, bzian, nacdraa to zha ne nonziaab lo ncow, tel pa hortaa guiaad me nsinle zo to; sacdraa to dze co zig rzac miech ngbaan, lega nacle zeene ran zho laa ngbaan rdziñ. <sup>5</sup> Miech ne nole lo xbiini Dios nac to, niini zo to; nacdraa to zha ne no glowtaa guieel, zha ne no lo ncow; <sup>6</sup> gacxe nagon waa, niini golso, tsienalde to miñe run zha ne zienal guie|ntseeb; sac nac grë zha co zig nac zha ne nixguies, tibaque guieel no zho. <sup>7</sup> Sac tel guieela, guieel raaguies miech, niicle zha ne rzuudzgaaw guieel rzudz zho. <sup>8</sup> Sañgue ne ne nac ne zha ne niini zo, none guien ne pe nac ncuaañe noyac. Tibaque dib zdoo ne gliladz ne Dios, gleynie ne samiech ne, zeena csaaca ne zig rsaac ncuaañe racw menquiib lo grë ncuaañe gnitlo zho; ni csoladz ne ganle laa Dios psilaale ne lo guie|gut, gotsaa ziaac new zig rzac menquiib pchog ne rzob guic zho rsilaaw zho lo guie|gut. <sup>9</sup> Sac gon bredzdaxe Dios ne waa ygaa ne guie|nëdox ne no guiaad, sinque laa me bredz ne csilaa me ne lo guie|në co. Ni lëë miñ co rac zeene laa ne rililadz Jesús. <sup>10</sup> Zeene gut Jesús, ga bdiizh me xto| ne; zeena yase mban ne o gutlegaa ne gal dze ne guiaad me, per me gbannie ne.

<sup>11</sup> Nana sca, tib tib to goldeed xfuers zha ne nacgrë to, niapse diidz ne gun xyudar zho choobraa zho lo Xtiidz Dios, miñ co golnee lo zho; zigne quiayunaque to niina.

### Rso Pabl diidz

<sup>12</sup> Bets, bzian, laa no rso diidz lo to: Niowse golgac, niowse golnee lo grë zha ne pso Dios noyñ xtsiñ me lo to, zig nac zha ne zo lo to, zha ne rnee lo to zha no

gban to. <sup>13</sup> Golguien ganle cho nac zho, golleynie zho, sac gon led lega nacd dziin ne quiayun zho lo to. Gol-soladz sca: ¡Zaacse golban, tilñiede to samiech to!

<sup>14</sup> Tel cho zha ne nacgrë to i, rsilo quiayacgbech, gol-gactox lo zho, zeena guien zho gun zho dziin. Grë zha ne quiasaan Xtiidz Dios, golnee lo zho zeena gleynie zhow stib; grëgaa zha ne gard tsoguicpaa zha naca, golgun xyudar zho tsoguic zhow; niicle grëragaa zha ne nacgrë tow, ib guieedniende to zho. <sup>15</sup> Golguien tel pe guie|ntseeb ne run miech lo to, guiabde to ne scaque gun to zho; sinque mazd goltsoxco tibaque niowse golgac lo grëse miech, niicle lo zha ne nacgrë tow, niicle lo grëragaa miecha.

<sup>16</sup> Tibaque nley golco zdoo to.

<sup>17</sup> Tibaque golzodiidznie Dios.

<sup>18</sup> Goldeed xquizh lo Dios, niicle zeene noyan to guie|nëw, zeena nogaa to guie|bleya, sac sca racladz me gun grëse zha ne no xnëz Jesús.

<sup>19</sup> Golquiaadiag miñe rnee Espiritu Sant lo to, ni golgunã.

<sup>20</sup> Golquiaadiag miñe rnee grë zha ne rnee grë diidz ne rsiaab Dios guic zho; <sup>21</sup> wen wen golwi dien pe nac miñe rnee zho, dzigo miñe rzac to rquiinraa lo to, miñ co golseed.

<sup>22</sup> Golbiche lo grëse guie|ntseeb ne no.

<sup>23</sup> Dios, meñ ne rtiche grëse dzeb, grëse zhgab, mezhal csañmbe to lo grëtaa guie|ntseeb; dib nacse to (zhiespíritu tow, xalm tow, xcuerp tow) zeena ni tib dol rapde to gal dze ne laa Jesús meñ ndzon ne rnabey ne gbiire guiaad stib. <sup>24</sup> Me bredz to, ni mesi run me miñe rnee me, gane ndion no ne ib zun me miñ rii.

<sup>25</sup> Grëse to bets, grëse to bzian, laa naa rnab lo to golsiguie| golnab lo Dios gacnieñ me no.

<sup>26</sup> Golcaania zhibdiuzh no i, iñe golxen nia grë zha ne nacgrë to, golllu ne nli rleynie to zho.

<sup>27</sup> Meñ ndzon ne rnabey, me rnabey naa laa naa rso diidz lo to, glab to guits rii lo grëse zha ne nacgrë to i.

<sup>28</sup> Jesús, meñ ndzon ne rnabey ne, me glu lo to ganle pa lotaa noxco me to.

Pabl

## 2 TESALONICENSES

¡Diuzh to grëse to!

**1** Naa nac Pabl, gza no Silas ni Timoté; laa no rxeeł stib guits rii guiedz Tesalónica i, laaw ziaad lo to grëse to ne nac to zha ne nole xnëz Dios, meñ ne nac Pxož ne, ni Jesús meñ ndzon ne rnabey.

<sup>2</sup> Dios meñ ne nac Pxož ne, ni Jesús meñ ne rnabey, me glu ganle pa lotaa noxco me to, zeena peet zhgab ctsebde to.

<sup>3</sup> Bets, bzian, ible rieguiała gdeed no xquizh lo Dios ne squitaa noneedz me guiełbiini lo to; sac goñ zigse zie dze dib zdooraa to rliladz to Xtiidz me, ni rleynieraa to samiech to. <sup>4</sup> Zaatne rdziñtaa no lo grë zha ne nole xnëz me, ne nligaa rley no rzodiidz no lo zho zha squitaa dziits zo to, tibaque dib zdoo to rliladz to me niicle maase rtsidił miech to, niicle maase nroob guiełnë ne quiaded to. <sup>5</sup> Nli nroob guiełnë noyañ to, per scagaa laaw noyañ to zeena tsieguiał to gdziñ to zaatne rnabey me. Nu rlu ganle, Diossi zeene ruñ me guiełwxtis, zigne no gaca sca ruñ mew. Zig nac niina, grë zha ne squi nosacsi to i, ib zgaa zho guiełnëdnox ne csiaab me.

<sup>7</sup> To ne nac to zha ne quiaded grë guiełnë qui, golgona ganle, gał dze ne quiet Jesús gbaa guiaad me stib, ible zgaa ne descans ne gneedz me. Gał dze co, laa me quietnie grë xanjł me, zha ne rapraa poder; <sup>8</sup> masaque tib beldox ne quietnie me, sac dzigosı laa me guiaad csiaabzi me grëse zha ne nëd niuñbey Dios, grëse zha ne nëd nquiaadiag Xtiidz Ndzon me. <sup>9</sup> Grëse zho laa me gnabey guey zho lo guiełnëdnox, zaatne gdziñdraa dze greee zho. Lëë bichele zho lo me ga, ib gdziñd dze gan zho lo xquiełndzon me, ganğaa zho grëtaa poder ne rap me. <sup>10</sup> Dze co, grëse zha ne no xnëz me laa zho goolnie me, guñnon zho me. Grëse zho see zdoo zho gan zho me; ye to gacgrë zho, sacne bliladz to Xtiidz me miñe biadseed no to.

<sup>11</sup> Gacxe waa, tibaque laa no quianab lo Dios gacniñ me to grieelo gban to zigne racladz me; zeena glu ganle led zhlëd bzooblo me to. Ni rnab no lo me gneedz me xpoder me lo to, zeena grieelo guñ to grëse ncuaañe rquiabladz to, zeena grieequia grëse dziin ne quiayuñ to porne rliladz to me. <sup>12</sup> Zeena sca cxobneñ to ganle pa lotaa meñ nroob nac Jesús, meñ ndzon ne rnabey ne; ni niicle megaaw, zuñnon me to. Sac zigtaa mew, zigtagaa Diosa, noxco me to.

### Ziaad Jesús stib

**2** Bets, bzian, ib laa Jesús meñ ndzon ne rnabey ne no guiaad, ni laa ne gbannie me. <sup>2</sup> Zeene gon to

laa miech gnë laa dze co bdziñle, niicle gnë zho Espíritu Sant bneew lo zho, ganğaa to palo nonee zhow zaatne ndxie nzian miech, o cxeelğaa zho pe tib guits lo to zig nac zeene no pxeelja; gliladzde tow. Laa no rso diidz lo to, peet tsienied guic to, gdziebde to. <sup>3</sup> Ib gdeete to diidz yquidie zho to. Sac goñ ansraa ne gdziñ dze co, ib none grieequia grë miech ne gacntseeb lo Dios; lozh ga, laa tib mgui ne nacie meñdnox grieequiaque, zacntseeb me lo Dios, per gabił ga nitlo me.

<sup>4</sup> Lëë zha co ctsidił grëse zhiwseed Dios, grëse ncuaañe naclay lo miech; ni haxta zie zho ziesob zho zaatne nac leñ xyadoo Dios, guiab zho zha nac Dios.

<sup>5</sup> Per no tib meñ ne notse lo zho niina, laga gdziñ dze ne laa zho guiaad. Gołsoladz ganle, blactaa bzeet naa miñ rii lo to leñ dze ne blëz naa i. <sup>7</sup> Grëse ncuaañe no guic zha ntseeb co guñ zho, laaw rsilole; loxaque ruñfalt gdeed meñ ne notse lo zho ga diidz guiaad zho.

<sup>8</sup> Zeene laa zho guiaad, hor co laa Jesús guiaadaque con grë xquiełndzon me, dzigo me ne grieese ro me gloozh me zho, gnitlo me zho.

<sup>9</sup> Masaque meñdnox gnabey zha ntseeb co, niapse xpoder ma gap zho, nzian ncuaañe glu zho; zuñ zho grë ncuaañe gzee zdoo miech, per led ncuaañe nlida.

<sup>10</sup> Zuñ zho grë ncuaañe lozh yquidie zho grë zha ne nole nëz ne nitlo, zha ne ib bzhiguiełd nliladz miñe nac diidzli. Teł niaca miñe nliladz zhow, nleynie zhow, nsi-laa Dios zho. <sup>11</sup> Saan Dios tsienal zho grë ncuaañ co, ni zliiladz zhow zig nac zeene diidzliw; <sup>12</sup> per ib siaabzi Dios zho, sac laa ne gliladz zho miñe nac diidzli, leł mazdraa gleynie zho grë guiełntseeb.

### Zha ne bdedlaale lo doł

<sup>13</sup> Bets, bzian, golguien sca tibaque golğotsaa gdeed ne xquizh lo Dios; sac goñ teł to padzeelale bzooblo me to csilaa me to lo doł. Nacle diidz zeene laa to gliladz Xtiidz me, miñe nac diidzli, laa Espíritu Sant csañmbe to lo me. <sup>14</sup> Miñ co nagon nacne pxeel me no biadseed no to xtiidz me, guieñ to zha laa to lo doł; zeena gdziñ to zaatne nac lo xquiełndzon Jesús, meñ ndzon ne rnabey ne. Gacxe waa, zha nziuu nac to lo me.

<sup>15</sup> Golguien sca, dziits gołso, ib csaande to grë miñe pseed no to leñ dze ne biaad no i, niicle miñe rneegaa no lo to lo guits ne rxeeł no. <sup>16</sup> Ni Jesúsaque, meñ ndzon ne rnabey ne, ni Dios meñ ne nac Pxož ne, me gneedz xfuers to dziits so to; zeena grëse miñe gnee tow, miñe guñ tow, wen grieequiaw. Me blu ganle pa lotaa rleynie me ne, laa me bneedz tib guiełbley ne

gdziṅd dze lozh lo ne, ni psan me diidz pe nac miṅe naraa no yгаа ne. Ga rlu ganle pa lotaa noxco me ne, niicle ne rioguaḷd new.

**3** Bets, bzian, nu ne laa no csiaalle, laa naa rnab lo to goḷnab lo Dios gacnieṅ me no, zeeṅa znuse znuse diiz no Xtiidz Ndzon meṅ ne rnabey ne; ni zha ne gontaaw, guieṅ zho ycaania zhow zigne pcaania tow. <sup>2</sup> Ni goḷnab lo me csilaa me no lадznia grē zha ntseeb, zha ne ruṅ miṅe notaa guic; sac goṅ led grēd miech riladz Xtiidz Dios.

<sup>3</sup> Dios meṅ ndzon ne rnabey, miṅe rnee me ruṅ mew; gacxe waa, ible zacnieṅ me to dziits so to lo Xtiidz me, ni squianap me to tsobede to lадznia meṅdox.

<sup>4</sup> Ndioṅ no ne me noyacnieṅ to noyuṅ to grē miṅe pso no diidz lo to, ni scagaa me gacnieṅ to bii guṅ tow.

<sup>5</sup> Me gacnieṅ to grieelo gleynie to samiech to zigne rleynie Dios ne, ni guiuude to lo guieḷnē, sinque goḷgac zigne been Jesús.

### None guṅ zho dziin

<sup>6</sup> Bets zig zobwi Jesús, laa no rso diidz lo to: Teḷ cho zha ne nacgrē to i, nēdraa yquia dziin gdziniaa zho ncuaaṅe gow zho, ib ctsieelsade to zho; sac goṅ pseete no to miṅ co. <sup>7</sup> Teḷ no, goṅ to ganle zha wban no zeene bḷiaaz no lo to i; ni sca goṅ none gban to. Ib bdeddzed no, <sup>8</sup> biod dze ne lega ndioow zhlē no xcuuṅ miech, blactaa haxta guieel bdziuuṅ no dziin bdziniaa no pe pquiin no; ib psodziind no lo to. <sup>9</sup> Niicle

ne ib rieguiaḷ nab no lo to needz to ncuaaṅe nquiin no, per choot peet bnabd. Miṅe bdziuuṅ no pquiaa no dziin bdziniaa no pe pquiin no, par gan to ganle zha nonguieḷ gban to. <sup>10</sup> Led rsoladz to leṅ dze ne bḷiaaz no i, pso no diidz rii lo to: Zha ne nēd guṅ dziin, scagaa nodne gow zho. <sup>11</sup> Laa niina laaw rzetaque naa stib, sac zidzion no no bla zha ne nacgrē to i, mbe ruṅdraa zho dziin scase quiaded dze zho; loxaque nēzrii nēzrec no zho rzēēb zho lo grē ncuaaṅe rieguiaḷd zho. <sup>12</sup> Zig zobwi Jesús meṅ ne rnabey ne, laa no rso diidz lo zha ne sca ruṅ: none guṅ zho dziin gdziniaa zho ncuaaṅe yquiin zho.

<sup>13</sup> Bets, bzian, ib guieete to, tibaque goḷtsoxco goḷguṅ niapse grē ncuaaṅe yquiin lo samiech to.

<sup>14</sup> Teḷ cho zha ne nacgrē to i nēd gon diidz gban zho zigne rso no diidz nu, goḷwi dieṅ chow, dzigo ctsieel-sadraa to zho; zeeṅa sca ctoladz zho. <sup>15</sup> Per guṅde to zho zig ruṅ zha ne rlēēnie samiech, sinque goḷnee lo zho gac-wen zho; goḷguieṅ ganle bets to grē to.

<sup>16</sup> Jesús nac meṅ ne rtiche grēse zhgab, grēse guieḷxtseeb, me cuee to lo grēse zhizhgab to, lo grēse guieḷxtseeb gzataa dze. Me gacnieṅ to grēse to.

<sup>17</sup> Naa goṅ nac Pabl, naazhal pquia bdiuzh rii rxeḷ naa lo to; naazhal pquia lē naa nu. Goḷgan ganle lēē xletr naa nu.

<sup>18</sup> Jesús meṅ ndzon ne rnabey ne, me gacnieṅ to, me glu lo to ganle pa lotaa noxco me to.

Pabl



# 1 TIMOTEO

¡Diuzh Timoté!

**1** Naa nac Pabl, tib zha ne pxeel Jesús nonee Xtiidz Ndzon me lo miech. Ible Dios men ne psilaa ne lo do], ni Jesús men ne rnalo ne, me bnabey quiayuñ naa dziin rii.

<sup>2</sup> Laa naa rxe] guits rii lo luu, rzaac naa luu zig tib xpëed naa ne squi dib zdoo luu rliladz luu Jesús. Dios men ne nac PxoZ ne, ni Jesús men ndzon ne rnabey ne, me yquia zdoo luu, me tsoxco grë zhizhgab luu zeena peet tsienied guic luu. Miñ co racladz naa, ni miñ co rnab naa lo Dios.

<sup>3</sup> Zigne psoque naa diidz lo luu leñ dze ne laa naa za nëz xtan zha Macedon ga, laa luu biaan Efés i; scagaa niina laaw rneque naa lo luu stib: Sca no luu i, bnee lo bla zha ne squi no i, csetraade zho miech grë zhiseed zho, sac ncuaane paat rquiinda. <sup>4</sup> Bnee lo zho, csaan zho grë cuent gox qui, zhale noyunnroobraa goon dien zharaa, peraa been grë xmengol ne. Ncuaane paat rquiind ga, loxaque runcti]diidza miech; mazd lo lal ne nodi]diidz zho, tsoxco zho cseed zho miech ganle pe nactaa grë guie]nzaac ne rgaa grë zha ne rquiabladz dib zdoo rliladz Jesús.

<sup>5</sup> Laa naa rso diidz rii lo luu, sac racladz naa guiaanmbe zdoo grëse miech qui, guiaanmbe xquie]rien zho ni dib zdoo zho gliladz zho Dios; zeena scagaa grielo gleyne zho samiech zho. <sup>6</sup> Sac gon, no bla zha ne quiasaanle Xtiidz Ndzon Jesús miñe nac diidzli, le] lo grë cuent ncuaane paat rquiind co no zho. <sup>7</sup> Racladz zho zha cseed miech zha nac xley Dios, ni nicle zha rienñ zha naca; zeene rseed zho miech ni zha rienñaque dien pe rnee zho.

<sup>8</sup> Ndionle ne ganle nli wen ley ne psan Dios, per tel niaca miñe yquiin miecha zigne psan me yquiina. <sup>9</sup> Go]guien ganle, biaan] ley par gnabeya grë miech ne nole xnëz Dios, sinque laaw biaan par gnabeya grë:

zha ne racndaan lo Dios,  
zha ne rond xtiidz Dios,  
zha ntseeb,  
zha ngoopdo],  
zha ne rzacdraa ne men nroob nac Dios,  
zha ne rguinle lë Dios,  
zha ne rut pxoz,  
zha ne rut xníaa,  
zha ne rut samiech,  
zha ne rionie zha ne led tsieeld,  
zha ne nac mrazh,  
zha ne rban samiech rieta zho zho stib nëz,  
zha ne rquidie,

zha ne rzeet lë Dios par gliladz miech xtiidz zho, ni nanpaa zho led diidzlid rnee zho.

Par grë zha rii nagon biaan ley; grë zha ne mband zigne nac Xtiidz Ndzon Dios; <sup>11</sup> wseed ne rlu ganle zha laa miech lo do]. Ni lëe wseed co gon pso Dios naa none naa lo miech.

## Pquia zdoo Dios Pabl

<sup>12</sup> Rded naa xquizh lo Jesús men ndzon ne rnabey ne, porne bzooblo me naa gun naa xtsiin me, ni noyac-nien me naa ne laaw quiayuñ naa. <sup>13</sup> Ne nligaa rded naa xquizh lo me, sac glo ntseeb goc naa, bneenë naa me, ptsidi] naa grë zha ne no xnëz me, ntseeb goc naa lo zho. Ni nicle ne scataa nac grë ncuaane ben naa, per pquia zdoo me naa; sac leñ dze co gard gliladz naa cho nac Jesús, lega lo xquie]n xen naa ga sca ben naa.

<sup>14</sup> ¡Pa lotaa pquia zdoo Dios naa! Ga blu me ganle zha noxcotaa me naa, pxobnia me guic naa bliladz naa cho nac Jesús, ni zig nac niina dib zdoo naa rleyne naa me. <sup>15</sup> Miñe rne naa nu niina, diidzliw, ni racladz naa grëse miech gliladz zho ganle, ible laa Jesús bиаad lo guidzliu, biaadsilaa me grëse miech lo xto] zho; ni naa-paa gon goc tib zha ne mazdraa ngoopdo]. <sup>16</sup> Gacxe waa pquia zdoo Dios naa, nicle ne scataa miech ngoopdo] naa per psilaa Jesús naa. Ga blu ganle pa lotaa paciens ne rap me; ni ga gwi grëraa miech ganle, zha ne gliladz me, zгаа zho tib guie]mban ne gdziñd dze lozh. <sup>17</sup> ¡Tibaque sca go]gotsaa dziuunnon ne me, go]gotsaa gnee ne grë diidz ndzon lo me, zigtaa ninaw zigtagaa leñ grëraa izdoo ne ziaada! Sac gon, me nac men nroob ne rnabey, men ne gdziñd dze ne nitlo. Sca rieguia]a.

<sup>18</sup> Timoté, xin, laa naa rso diidz lo luu gon: Tibaque dziits bzo, ib guiaan] zdoo luu; psoladz ganle scaque nac diidz ne bnee grë zha bets ne zeene psiaab Dios guic zho bzeet zho pe nac grë miñe pso Dios luu gun luu. <sup>19</sup> Bien tibaque dib zdoo luu bliladz Jesús, ib gun] luu ncuaane nan luu ndzinlid, zeena iñe mbe xquie]rien luu; sac gon no zha ne nicle rienpaa zho pa miñ nac ncuaane ndzinlid, ni laa zho runa. ¡Miñcocxe waa, grë zha ne sca nac, rsaanga zho miñe bliladz zho! <sup>20</sup> Zig nac Himené grop Lejandr, sca been zho; per laa zho bzonëzle naa sca tsie zho xnëz men]dox tel]ne sca racladz zho; zeena guien zho ganle nodne gneenë zho Dios.

### Gac-wnab lo Dios por grë miech

**2** Laa naa rso diidz lo to: Golguien none gnab to lo Dios por grëse miech ne ndxie lo guidzliu, goInab lo me gunlay me zho, gacnieñ me zho; ni goIdeed xquizh lo me por grëtaa ncuaañe ruñ me. <sup>2</sup> None gnab to lo me gacnieñ me grëse zha ne nac wxtis, grëse zha ne rnabey, gdeed me guieIbiini lo zho zaacse gun zho guieIwxtis, zaacse gnabey zho; zeena tibliladz cue miech, ine gban ne zigne racladz me, sin choot peet glisquid lo ne.

<sup>3</sup> Sca nagon nonguieI dziuun ne, ni scagaa rdziladz Dios, men ne pxeel Jesús biaadsilaa grëse miech lo dol; <sup>4</sup> men ne racladz grëse miech sëeb xnëz Jesús, gacnan zho miñe nac diidzli. <sup>5</sup> Guien zho ganle ne tibaque Dios no, ni tibaque men ne zac gdziñnie grëse miech lo me: lëe men co nac Jesús, men ne goc miech biaad lo guidzliu; <sup>6</sup> sac gon Jesús nac men ne bdeed xquieImban, beet zho me, bdiizh me xtoI miech. Miñ rii nagon racladz Dios gacnan miech leñ dze rii. <sup>7</sup> Ni laa me pxeel naa none naaw lo grëse zha ne nacd zha Israel, noseed naa zho grëse miñe nac diidzli, zeena guien zho dib zdoo zho gliladz zho Dios. (Miñe rne naa nu didzliw, rquidieed naa.)

<sup>8</sup> Laa naa racladz sca, zaatne notaa zha ne dib zdoo rliladz Dios, grëse zha bgui none gzodiidznie zho Dios. Ni zeene gzodiidznie zho me, none ine mbe zdoo zho, choot lo zha rlëed zho, choot zha nodiInied zho. <sup>9</sup> Laa grë men wnaa, racladz naa tsoxco zho zaacse gacwxab zho, niowse, tibliladzse gac zho. Sac grë men wnaa ne rliladz Dios, par gluniow zho rquiind ne goon dien paraa xixcuua guitsguic zho, dien pe quie rbebni, pe or gac xnil zho, gac zhibguiaa zho, pe lar niazh ne gacwgaa zho. <sup>10</sup> Par gluniow zho, rquiin zaacse gbannie zho samiech zho, zig none gban zha ne nole xnëz Dios. <sup>11</sup> Zig nac leñ yadoo, none tibliladzse gac zho, dzese sob zho yquiaadiag zho tel pe nac wseed ne noyac; <sup>12</sup> gnedzd naa diidz ne zha so cseed miech, o zhagaa gnabey lo mgui. None dzese sob zho, <sup>13</sup> sac gon zeene psan Dios miech lo guidzliu, glose bzaa me Adán, dzig-oraa bzaa me Ev. <sup>14</sup> Ni stiba, pquidied menox Adán, sinque laa ma güeyquidie Ev; ni porne bliladz Ev xtiidz ma, ga bdiits Ev xtiidz Dios. <sup>15</sup> Per silaa Dios wnaa lo xtoI zho, telne dib zdoo zho gliladz zho me, tsoxco zho gban zho zigne racladz me, guien zho gun zho miñe rieguiaI wnaa, gap zho xpëed zho ni cchoob zho win.

### Zha ne so lo grë zha ne ngab xnëz Dios

**3** Zha ne racladz so gnabey zho lo grë zha ne no xnëz Dios, tib dziin wen ga rquiabladz zho gun zho. Sca zëeb diidz rnee miech; ni nligaaw. <sup>2</sup> Per ga nagon rquiin:

tib zha ne zaacse mban,  
zha ne mbannie loxaque wnaa ne nacse tsieel zho,  
zha ne tibliladz,  
zha ne nixbiini, rien pe ruñ,  
zha ne mbe lo, choot lega gzhidznied zho,

zha ne ine nley rac, rbëzlo zho miech lidz zho;  
zha ne rien zha rseed miech,  
zha ne rquiad lo nziu,  
zha ne rleynied diI,  
zha ne wen zdoo,  
zha ne zaacse mbannie samiech,  
zha ne rzonaId dimi,  
zha ne zaacse mban lidz,  
zha ne rrieelo rnabey lidz, rnabey xpëed,  
zha ne nguzobdiidz nac xpëed, rbeed mëed xquieIto zho.

<sup>5</sup> Sac tel zha ne rrieelod gnabey lidz, gnabey xpëed; ¿pe lel ne so zho gnabey zho lo grë zha ne no xnëz Dios dzigo grieelo zho?

<sup>6</sup> Niicle tib zha ne griinpaas psilo bliladz Xtiidz Dios grielod gac zho dziin co; sac nend lëëque lëe zho gunnon zho, lozh ga lëëque zha yguib guiabdee zho. Golsoladz ganle zha bzhaac menox. <sup>7</sup> Ni ye rquiin tib zha ne zëeb xtiidz ne miech ndzinli nac zho, haxta lo zha ne nod xnëz Dios; zeena tsod lega pe glisqui miech lo zho, sca gleyd menox gac miñe racladz ma.

### Zha ne gun yudar leñ yadoo

<sup>8</sup> Scaquegaa zha ne so gun xyudar zha ne gnabey ga, ga rquiin:

tib zha ne zaacse mban,  
zha ne rnee niapse diidzli,  
zha ne rleynied guieIgonziu,  
zha ne zienaId dimi,  
zha ne dib zdoo rliladz grëse miñe zhobnee lo Xtiidz Dios (miñe rliladz ne, miñe nac diidzli),  
zha ne mbe lo,  
zha ne mbannie wnaa ne nacse tsieel zho,  
zha ne rrieelo rnabey lidz,  
zha ne rrieelo rnabey xpëed.

Ni stiba, antes ne so zho none glugazh zho dien pe nli zrieelo gun zho dziin co. Zig nac tsieel zhow, none gac me:

tib wnaa ne zaacse mban,  
wnaa ne rleynied diidzguizh,  
wnaa ne rleynied nziu,  
wnaa ne rquidied.

<sup>13</sup> Sac zha ne zaacse gun dziin co, zianzuiuura zho lo grë zha ne ngab lo Dios, ni scagaa ine mbe lo zho haxta no ro zho gnee zho lo miech zha nac ne laa zho rliladz Jesús.

### Miñe rliladz zha ne ngab lo Dios

<sup>14</sup> Ib laa guic naa no guialniob naa i, guialgan naa luu; per laa naa rxel diidz rii lo luu, <sup>15</sup> zeena telne grielod guialniob naa, per laa luu nanle naganle cho gzo luu yquiaanap grëraa zha ne ngab xnëz Dios nguiamban; zha ne runbey miñe nac diidzli, ni rlu zho ganle ne nli diidzliw. <sup>16</sup> Ne nligaa nroobdoo nac wseed ne ziaad lo Xtiidz Dios, miñe rliladz ne, ngan guien miech zha naca. Nu raquiet miñe been me:

Goc Jesús miech biaad me lo guidzliu,

ni blu Espíritu Sant ganle ne nli Xpëedpaa Dios nac me;

ni gon grë anjl me.

Brieets bliaa| Xtiidz me grë guiedz,  
ndaldoo miech ne bliladz ganle cho nac me,  
blozh ga biire zey me lo guie|ndzon ne no me gbaa.

#### Zha ne rsaan Xtiidz Dios

**4** Ib laa Espíritu Sant rneele ne len dze ne ziaadyob guiaad Jesús stib, ndal grë zha ne rliladzle Xtiidz me, laa zho csaana laa zho tsienal grë miñe rnee zha ne rquidie, grë miñe nac zhiwseed menox. <sup>2</sup> Grë zha ne guiaadnie wseed co, ni lalnu yquiad zdoo zho zeene laa zho yquidie miech. <sup>3</sup> Haxta stsidil zho ctsieelna miech, znabey zho ycuee ncuaañe gow miech; zig nac zeene led Diosd psan ctsieelna miech, zig nac zeene led med psan grë ncuaañe gow zho. Me psana grësew, zeena grëse zha ne ngab xnëz me (zha ne beenbey didzli), zeene laa zho yquiina gdeed zho xquizh lo me. <sup>4</sup> Sac grëse ncuaañe psan Dios, wena; zig nac grë ncuaañe rac wagw, peet nacda yquiin new, totsaque gdeed ne xquizh lo me zeene laa ne yquiina, <sup>5</sup> ni gnab ne gunlay mew; sac zeene rdeed ne xquizh lo me ni rnab ne gunlay mew, rsanmbe mew.

#### None gon Timoté xtsiin Jesús

<sup>6</sup> Zeene cseed luu grë zha bets ne, zha bzian ne i, pseed zho grë miñe rne naa lo luu nu, tibaque miñe nac zhiwseed Dios güeynal; sac sca no gon zha ne squi zo quianap grë zha ne ngab lo Dios. <sup>7</sup> Ib yquiaadiag luu grë cuent gox, grë cuent nxen ne paat rquiind; sinque Xtiidz Dios bioxco, miñ co bloonie guic luu. <sup>8</sup> Gzoob ne zha ne rguit, wguit ne run zho, nli rquiina lo zho par gac macis xcuerp zho; per zig nac Xtiidz Dios, mazdraa rquiin dzioxco new; sac miñcosi squiina lo ne zigtaa lo guie|mban riiw, zigtagaa lo guie|mban ne naraa dzian new. <sup>9</sup> Ne nligaa sca rieguial gon miech, ni grëse zho none tsoxco zhow! <sup>10</sup> Ni gacxe waa, laa ne quia dien zha gliladz zhow, niicle ne nroob grë guie|ñe ne quiazian ne; sac ible Dios nac men ne rna-lo ne, men nguiamban ne rsilaa grëse miech lo dol; sac grëse zha ne dib zdoo rliladz me, rsilaa me zho. <sup>11</sup> Bioxco sca pseed zho grë miñe rne naa lo luu nu, ni bnee lo zho gon zhow.

<sup>12</sup> Nli lëe tib zha nguiegse nac luu, per blu lo zho ganle zha none gban zho: Zeene gnee luu, niowse bguib diidz ne gnee luu, zaacse goc, ine bleynie samiech luu, tibaque dib zdoo luu bliladz Xtiidz Dios, ine ndzinli wban; zeena gan zho ganle niicle ne zha nguieg luu, per nixbiini luu.

<sup>13</sup> Laga gal dze ne glanso naa i, bioxco blab Xtiidz Dios lo grëse zha bets ne, zha bzian ne i, bnee lo zho zha naca, bnee diidz ne conley zdoo zho; zeena ine nguieel gac zho. <sup>14</sup> Ib csaand luu grë guie|biini ne bneedz Dios lo luu i (guie|biini ne bgaa luu zeene psi-aab me guic grë zha ne rnabey lo grë zha ne no xnëz me, pxobnia zho guic luu). <sup>15</sup> Grëse miñe rne naa lo luu

nu, bioxco; zeena gan grëraa miech ganle zigse zie dze laa luu quiaabiiniraa lo Xtiidz Dios. <sup>16</sup> Bien zaacse goc, bien miñe nac Xtiidz Dios, miñ co pseed miech, ib csaand luuw; zeena tedlaa luu lo grëtaa guie|ñe ne no guiaad, ni scagaa haxta grë zha ne rquiaadiag wseed ne rlu luu ni rban zhow, ye zho zlaa zho lo guie|ñe co.

#### Men wnaa ne gutle tsieel

**5** Grë zha bgui gol ne nac bets ne i, zeene zha rxin zho, bien gactoxd luu lo zho, sinque zaacse bnee lo zho zig nac zeene lo pxoz luu nonee luu; niiclegaa zha nguiega, zaacse goc lo zho, been zho cuent zig tib bets luu. <sup>2</sup> Scaque grë men wnaa ne nac zhagol, ndooladz bnee lo me, been cuent lo xniaa luu ga zo luu; lo grë wnaa nguiega, ndzinli goc, niowse bnee lo zho, bien ganle rreequia tib bzian luu ga.

<sup>3</sup> Grë men wnaa ne gutle tsieel, men ne nlipaa choot rapd, to none cteedlo me; totsaque nli Diosse rnalo me, dze guieel tibaque nozodiidznie me Dios. Sac no zho mban zigne notaa guic zho, laa zho zienal loxaque grë ncuaañe gdeed guxt xcuerp zho; zha ne sca run, rreequia gutle zho ga. Laa te| men wnaa ne scaque gutle tsieel, ni no xpëed me, no xiag me, dzigo zha none cteedlo me; none cseed zho gan zho menlidz zho, gan zho pxoz zho, gan zho xniaa zho, sac gon me pchoob zho. Sca nonguiela, ni scagaa rdziladz Dios.

<sup>7</sup> Pso diidz rii lo grë zha ne nacgrë to i, zeena cseed zho sca gban zho, ni scagaa tsod pe nacre gneene miech zho. <sup>8</sup> Sac zha ne tsoxcod gan zha ne nacgrë zho, ni miñe mazdraa telne niicle menlidz zho tsoxcod zho gan zho, rdzieeld dzigo guiab zho laa zho rliladz Dios, haxta mazdraa nac xto| zho que tib zha ne gard gliladz me.

<sup>9</sup> Ni stiba, grë men wnaa viud qui zha ne rquiablazd gon pe xtsiin Dios, bien zha ne psale tsongal iz zha co psëeb lo list. Ni wen wen gocnan telne: bionied me stib mgui zeene bii zomban tsieel me, zaacse mban me, zaacse pchoob me xpëed me, dib zdoo me rbëzlo me miech lidz me, ndooladz rac me lo grë zha ne no xnëz Jesús, run me xyudar grë zha ne no lo tib guie|ñe; ni run me niapse ncuaañe wen ne rquiin lo samiech me.

<sup>11</sup> Laa grë zha ne bii nguieg, ib yquiaad luu lë zho lo list co; sac nac wnaa nguieg, zeene sob guic zho ctsieelna zho, laa zho ctsieelna stib. Loxaque gunctal zho xto| zho ga, telne glo rquiablazd zho gon zho xtsiin Dios ni lozh ga laa zho csaanaquew. <sup>13</sup> Ni ye nac wnaa nguieg, rdziladz zho rquianzë zho; ni telne peet dziin gun d zho, racgbech zho; ni stiba, zeene sca guie|nd pe gon zho dzigo laa zho rhixcuua diidzguizh, laa zho rzëeb lo grë cuent ne rieguialdraa zho.

<sup>14</sup> Gacxe waa, racladz naa grëse wnaa nguieg ne sca ret tsieel, mazd ctsieelna zho stib; zeena yquiaanap zho xpëed zho, yquiaanap zho ro lidz zho. Sca yguibd zho tso grë zha ne rlëeniele Xtiidz Jesús, gneeneraa zho zha ne rliladza. <sup>15</sup> Sac gon, blale wnaa ne sca gut

tsieel zieriee xnëz Dios, leḷ laa zho zianaḷ grë miṇe rnabey menḁox.

<sup>16</sup> Psoladza ganḷe, teḷ cho tib zha bets ne, tib zha bzian ne i raclidz tib menḁ wnaa ne gutle tsieel, none zha ganḁ me, laa ne gnalo zho ne to yguib dienḁ zha gdioonḁ me; zeena grë ncuaaṇe ruṇlo to i, zgaaw yquiiṇ grë menḁ ne nlipaa guienḁ cho ganḁ.

### Miṇe rieguiaḷ zha ne zo lo zho

<sup>17</sup> Grë zha ne zo rnabey lo grë zha ne ngab xnëz Dios, zha ne zaacse noyuṇ dziin co, zig nac zha ne tibaque rnee Xtiidz Dios lo miech, zha ne rseedgaa miech zha naca, teḷ palal ncuaaṇe rcaa zho, ible rieguiaḷ ycaa zho chop lalgaw. <sup>18</sup> Gotsaa gwi ne ganḷe zha quia lo Xtiidz Dios, rneew: "Code to guieḁ ro xma to, zeene no ma ye noguiits ma zhobxtil; ḷgoḷsaan gow ma!" Laa stib lugar rnee: "Zha ne ruṇ dziin, ib none ycaa zho miṇe non xtsiiṇ zho."

<sup>19</sup> Bienḁ gonḁ Timoté, zeene guiaad zho lo luu, guiaad-zo zho tib menḁ ne rnabey lo to, ib yquiaadiagd luu miṇe rnee zho, teḷne gzod zho chop tsonḁ zha ne gonḁ ne nli beenḁ me miṇe rquiaqui zho me. <sup>20</sup> Teḷne bind me diidz, bii noyuṇ me doḷ co, dzigo squi ndxie grë zha ne nacgrë to, goctox lo me; zeena sca gdzieb grëraa zho guṇscad zho. <sup>21</sup> Zig zobwi Dios, zig zobwi Jesús grë xanjḷ me, laa naa rso diidz lo luu, beenḁ miṇe rne naa lo luu nu. Gdzieebd luu, yquiad zdoo luu, bnee lo zho teḷ chotaa nac zho.

<sup>22</sup> Zeene gzo luu zha ne guṇ xtsiiṇ Dios, guṇd luu ne lega teḷ chotaa gzo luu; sac gonḁ, nend lætse zha ne rap pe tib falt gzooblo luu, dzigo laa miech guiab nanḁpaa luu zha nac zho ni rlisquid luuw lo zho. Ible gdeete luu diidz guṇ luu ncuaaṇe guṇctal xtoḷ luu. <sup>23</sup> (Gnid naa togo ible grieelodraa guie luu vin, zac guie luu niipyeeṇa maase poc poc, laa ne guie luu niab nis; zeena glunëdraa zdoo luu.) <sup>24</sup> Sac grë zha ne no lo doḷ, no doḷ co znuse rzhooḁnenḁ; nogaaw, haxta gaḷ dze ne laa zho gacredz lo Dios, dzigoraa xoobneṇa. <sup>25</sup> Scaquegaa zha ne ruṇ guieḷwen, no ncuaaṇ co znuse glu; nogaaw, nicle ne rluda niina per ible dziiṇ dze ne laaw glu.

### Zha ne quiazho xtsiiṇ benḁ

**6** Grë zha bets ne, zha bzian ne, zha ne lega ruṇ xtsiiṇ benḁ, none gonḁ zho xtiidz menḁ ne quia zho xtsiiṇ; zeena yguibd zho gneenë miech Dios, gneenë zho Xtiidz me miṇe noseed ne miech.

<sup>2</sup> Scaquegaa grë zha ne ruṇ xtsiiṇ menḁ ne rliladzle Xtiidz Dios, none gonḁ zho miṇe rnabey me zho; led guiabd zho por bets zhow, guṇ zho miṇe racladztāa zho. Ni gale none tsienie guic zho wenraa grieequia grë dziin ne noyuṇ zho; sac gonḁ lo tib menḁ ne no xnëz Dios ga, lo tib menḁ ne rleynie zho ga yquiiṇ xtsiiṇ zho.

Grëse miṇe none naa lo luu nu, pseed grë miech quiw, ni pso diidz lo zho guṇ zhow. <sup>3</sup> Zrieequia zha ne guiaadnie stib wseed, miṇe ni nacdraa Xtiidz Jesús; sac zhiwseed Jesús rlu zha gban grë zha ne no xnëz Dios.

<sup>4</sup> Zha ne sca rlu stib wseed, lega:

tib miech niats ga nac zho,  
ible peet rienḁ zho,  
ruṇbeyd zho miṇe nac diidzli,  
rdziladz zho rdilḁidznie zho miech; ga rlan,  
laa miech rdilḷsa,  
laa miech rlëḷsa,  
laa miech rbidzgoḷsa; rlozh ga,  
rliladzdraa zho pe rnee samiech zho.

Masaque nanḁ zho teḷne sëeb zho xnëz Dios, nroob dimi ne guṇlo zho.

ḷBieṇ ib ctsieelsad luu zha co! <sup>6</sup> Parga nli zha ne rzëeb xnëz Dios, zeene rzac zdoo zho miṇe rzoladztāa Dios lo zho, tib guieḷnzaac nroob ga rgaa zho. <sup>7</sup> Ni sca nonguieḷa, sac gonḁ zeene rlanso ne lo guidzliu, peet rlansonied ne; ni scaquegaa zeene laa ne gbi, peet grielod güey ne. <sup>8</sup> Gacxe waa, none sac zdoo ne ni gley ne totsaque gneedz Dios ncuaaṇe gow ne, ni ncuaaṇe gacwxab ne. <sup>9</sup> Sac grë zha ne rzoobladz xēṇ nroob dimi, no zho rquiiḷ menḁox zho ruṇ zho ncuaaṇe ndzinlidraa par gdziniaa zho dimi co; rlozh ga rzhiiṇ lo xquieḷmban zho, haxta rnitlo zho. <sup>10</sup> Sac nac dimi, zeene rzoobladzdox miecha, ga rzobni ne laa zho ruṇ grë guieḷntseeb. Ndal zha ne ziesaan Xtiidz Dios, sac laa zho zianaḷ dienḁ zha xēṇ zho nroob dimi; per rlozh ga, stib stib guieḷnë ne ziedziṇ lo zho.

### Dib zdoo Timoté gliladz Timoté Dios

<sup>11</sup> Sangue luu gonḁ, bienḁ ganḷe xnëz Dios no luu, guṇd luu grë ncuaaṇ co. Bioxco zaacse wban, tibaque bioxco gban luu zigne racladz Dios, dib zdoo luu bliladz me, bleynie me ni bleynie samiech luu, ndooladz goc lo zho, ni lalnu ib guiaaṇd zdoo luu.

<sup>12</sup> Bleeladz luu beenḁ grë dziin ne ruṇ zha ne dib zdoo rliladz Dios, zigne ruṇ zha ne rie lo diḷ, rbeeladz zho zho. Gonḁ ganḷe, laa luu nole nëz ne ygaa luu guieḷmban ne gdziṇd dze lozh, ib csaand luu nëz co; sac niicle Dios ible miṇ co bzooblo me luu. Psoladz ganḷe, squi ndxie miech bleero luu ne dib zdoo luu rliladz luu Xtiidz Jesús. <sup>13</sup> Dios (menḁ ne rdeed xquieḷmban grëtaa ncuaaṇe no), ni Jesús (menḁ ne ni lalnu bdziebd zeene güeyzo zho me lo Pons Pilat, bnee me cho nac me); me zobwi ganḷe <sup>14</sup> laa naa rso grë diidz rii lo luu, bioxco beenḁ zigne no gaca. Tibaque bioxcow haxta gaḷ dze ne gbiire guiaad Jesús, menḁ ndzon ne rnabey ne. <sup>15</sup> ḷB laa me no guiaad! Ni Dios cxeeḷ me zeene laa dze co gdziṇ. Dios menḁ nroob ne rnabey, menḁ ne rnabey lo grëtaa zha ne nac rey, lo grëtaa zha ne rnabey. <sup>16</sup> Mesi ib gdziṇd dze guet me, lo biini ne no mew, tsod zha ne glëb gdziṇ ga; ni tib miech lo guidzliu rii gard ganḁ me, ni grieelodgaa ganḁ zho me. ḷGacxe waa, ible me none dziuuṇnon ne, sac gonḁ menḁ non, menḁ rnabey nac me! Miṇ co nagonḁ no dziuuṇ ne.

<sup>17</sup> Grë zha ne rapcheṇ, bnee lo zho cseed zho gdaanied zho grë ncuaaṇe rap zho, ib gnalod zho grë ncuaaṇ co; sac gonḁ ncuaaṇe tib rded ga. Dios none gnalo zho, ni mesi rneedz me grëtaa ncuaaṇe wen ne rquiiṇ ne. <sup>18</sup> Gudz lo zho gacmbidzd zho, none guṇ zho grë ncuaaṇe yquiiṇ lo samiech zho, ycad zho ncuaaṇe

quianie zho, iñe guñ zho xyudar zha ne peet quianied.

<sup>19</sup> Zha ne sca guñ, tib guieñzaac nroob ne yгаа zho; lëë guieñzaac co gañ zho leñ dze ne ziaadraa. ¡Ni hax-ta zгаа zho tib guieñmban ne gdziñd dze lozh!

<sup>20</sup> Timoté, laa naa rbire rso diidz lo luu nu guñ: ib csaand luu dziin ne bneedz Dios lo luu i. Yquiaadiagd luu grë wseed yozh ne ziaadnie stib miech, wseed ne rneenë Xtiidz Dios, niicle ne rnee zha ne ziaadniew zha

rac nac zho, per nlid ne diidzli rnee zho. <sup>21</sup> Sac guñ, blale zha ne ziesaan miñe nac diidzli, laa zho zienañ wseed co; per riend zho leñ znu rziaabñëz zho ga.

Dios meñ ndzon ne rnabey, me noxco luu, me gzhix-cuaa lo grë zhizhgab luu. Me gacniñ luu peet tsienied guic luu.

Pabl

## 2 TIMOTEO

¡Diuzh Timoté!

**1** Naa nac Pabl, tib zha ne pxeel Jesús nonee Xtiidz Ndzon me lo miech. Ible Dios bzo naa quiaseed naa miech diidz ne rdeed guielmban lo zha ne rzëëb xnëz Jesús.

<sup>2</sup> Laa naa rxeel stib guits rii lo luu i gon xin; xin rne naa lo luu sac rzaac naa luu zig tib xpëëd naa. Miñe racladz naa ni rnab naa lo Dios meñ ne nac Pxoze, ni lo Jesús meñ ndzon ne rnabey ne, yquia zdoo me luu, ni me tsoxco grë zhizhgab luu; zeena peet tsienied guic luu.

<sup>3</sup> ¡Gzataa zeene rzodiidznie naa Dios rzet naa luu lo me, niicle guidzew, niicle guieela, tibaque rded naa xquizh lo me ni rnab naa lo me gacnieñ me luu! Dib zdoo naa noxco naa zanañ naa miñe rnabey me, zigne bioxcoque grë xmençgoldoo naa güeynañ zhow.

<sup>4</sup> Zeene rsoladz naa blactaa roon luu zeene wbi naa i, zoot naa tebaa zha ganñiob naa luu stib; zeena tsonley zdoo naa. <sup>5</sup> Ni rsoladz naa scataa dib zdoo luu riladz luu Dios; lëëdaaque xnanit luu Loid, ni xniala luu Eunis, ni nanpaa naa scataque dib zdoo luu riladz luu me.

<sup>6</sup> Gacxe waa, laa naa rso diidz lo luu pquiin grëse guielbiini ne bneedz Dios lo luu zeene pxobnia naa guic luu, ni bnab naa beenlay me luu. ¡Ib csaand luuw! <sup>7</sup> Sac gon, laa Dios rneedz zhiEspíritu me lo ne, parne sodziebdræa ne, parne dziaapraa ne xfuers me, gleynieraa ne samiech ne, ni tsabiiniraa ne. <sup>8</sup> Gacxe nod pe nache gdzieeb luu, bnee lo miech ganle zha nac Xtiidz Ndzon Jesús; ni niicle gdzieebdgaa luu ne znu nioogyu naa nu, loxaque ne riladz naa me. Sinque bloo zdoo luu ne ib laa luu no gan grë guielnë rii, loxaque ne quiaseed ne miech Xtiidz me, diidz ne rlu ganle zha laa zho lo dol. Ga nagon rquiin fuerz ne rneedz Dios lo ne. <sup>9</sup> Gotsaa gwi ne ganle laa me psilaa ne lo grëtaa xtoñ ne, ni bredz me ne gban ne zigne racladz me. Ni nacda por pe guielwen ne bdziuuñ ne, sac haxta zeene gard cue guidzliu, laa me psan diidz ne laa me glu ganle pa lotaa rleyne me ne.

<sup>10</sup> Ni niina ne laa me pxeel Jesús (meñ ne rsilaa miech lo dol), laa me blu ganle ne nli nquialadz me ne. Jesús nac meñ ne biaadtiche poder ne rap guielgut, ni bi-aadlu me ganle parne yгаа miech tib guielmban ne gdziñd dze lozh, none gliladz zho Xtiidz Ndzon me.

<sup>11</sup> Ible miñ co nagon nache bzo Dios naa gne naa Diidz Ndzon rii lo miech, pxeel me naa ga naa grë guiedz za-atne nodraa zha Israel, gaseed naa zho zha naca;

<sup>12</sup> miñcocxe waa znataa grë ncuaaणे nodeed naa. Per ni lalnu ib rtoladz naa, sac wen wen nan naa cho nac

meñ ne riladz naa, ni nan naa mesi zrieelo yquiaanap me naa nitnëzd naa haxta gal dze ne laa me guiaad.

<sup>13</sup> Bien, güeynañ grë miñe pseed naa luu, sac gon miñ co nac miñe rquiin. Tiblique bliladz Dios, iñe bleyne samiech luu zigne no dziuuñ ne ne nac ne zha ne no xnëz Jesús. <sup>14</sup> Espiritu Sant meñ ne nacie ne, me yquiaanap luu, me gacnieñ luu ib csaand luu zhiwseed Dios, ib csaand luu dziin ne bzo Dios luu gon luu.

<sup>15</sup> Nanlaxe luu ganle zha been zha Asia, grëse zho bzozit lo naa; zig nac Figel, zig nac Hermoj, mbe psaan zho naa. <sup>16</sup> Sangue Onesifr, rnab naa lo Dios yquia zdoo Dios me grë menlidz me, sac blactaa biad-choobladz me zdoo naa. Niicle ne znu nioogyu naa nu, per ib been d me ne ntoladz me niaadgan me naa; <sup>17</sup> sinque zigne blanso me lad guiedz Roma nu, pquiaguib me naa haxta bdziel naa lo me. <sup>18</sup> Ni zoladzaxe luu ganle, pe zhistaa been me xyudar ne zeene no ne guiedz Efés i; rnab naa lo Dios yquia zdoo Dios me gal dze ne laa grëse miech gacredz lo Dios.

### Dziits so Timoté lo Xtiidz Dios

**2** Xin, sangue luu gon tibaque squi dziits bzo lo Xtiidz Dios, gon ganle Jesús noxco grëse zhizhgab luu.

<sup>2</sup> Grëse miñe gon luu pseed naa miech, scagaa niina bioxco bneew lo zha ne rgobey luu grieelo tsie tsie-neew lo stib miech. <sup>3</sup> Ib gacmband luu zeene noyan luu grë pe guielnë, sinque bioxco been xtsiñ Jesús zigne no gon luuw, masaque been cuent xmençguib me nac luu. <sup>4</sup> Sac gon, tib zha ne nac mençguib, grielod sëëb zho pe stib lo cuent ne nacd xtsiñ mençguib, sac none nsin so zho gon zho tel pe nac miñe rnee meñ ne rnabey zho. <sup>5</sup> Bioxco been miñe rnee meñ ne rnabey ne, zig run zha ne rie tib lo wguit; sac zha co telne tsoxcod zho quit zho zigne nacpaa lo wguit, ycaaniad zho premio. <sup>6</sup> Been xtsiñ me zigne no gaca, zig run zha ne ran; gon ganle zha ne rioxco ran, zha glopaa rquiin guielnzaac ne rac zaatne ran zho. <sup>7</sup> Miñe blozh bzet naa nu, blooniew guic luu, ni Jesús nac meñ ne gneedz guielbiini lo luu guien luu zha naca.

<sup>8</sup> Tibaque psoladz ganle cho nac Jesús, zha briequia me lo xtii rey David, ni zha brieaban me; zig nac naa miñ co rzet naa lo miech zeene rseed naa zho Xtiidz Ndzon me, par laa zho lo xtoñ zho. <sup>9</sup> Ni ne nonecxe naa Diidz Ndzon rii waa, gane nroob guielnë ne noyan naa; zig nac niina, laa naa ngadoo zaatne nioogyu naa nu zootne cho zha dox. Ni niicle ne znu nioogyu naa nu,

sangue Xtiidz Dios led yeda nioogyu. <sup>10</sup> Laa naa quiax-ecw miñe quiaeedtaa naa, zeena grëse zha ne bzooblote Dios gliladz Jesús, grieelo yquiaadiag zho zha laa zho lo dol, ni zha yгаа zho tib guiełmban ndzon ne gdziñd dze lozh.

<sup>11</sup> Ni znu gon naca:

Tełne xnëzle me no ne zeene laa ne guet, ib zгаа ne guiobannie ne me.

<sup>12</sup> Niicle nroob guiełnë dziañ ne porne rliladz ne me, scagaa ible dzziñ ne zaatne gnabeynie me ne; tełne guiab ne ruñbeyd ne me, scaquegaa me ziaab me ruñbeyd me ne.

<sup>13</sup> Niicle tełne riaañladz ne me, sangue me riaañladz me ne; miñe rnee me ruñ mew, sac mesi rtsëed me xtiidz me.

### Tsoxco Timoté grieequia xtsiñ Timoté

<sup>14</sup> Bien, beencsoladz grë zha bets ne i, zha bzian ne i grë miñ rii. Zig zobwi Dios ganle laa naa rso diidz lo luu, gudz lo zho tiłdiidzniedraa zho miech grë godiidz ne paat rquiind; led ncuaañe ndzinlida, loxaque ruñgüeta guic zha ne rquiaadiaga.

<sup>15</sup> Tibaque bioxco zaacse grieequia xtsiñ Dios, miñe noyñ luu, zeena wen grieequia luu zeene laa luu gdziñ lo me. Zigne nacse Xtiidz me, sca pseed miecha.

<sup>16</sup> Yquiaadiagd luu grë wseed yozh, ncuaañe ni lalnu paat rquiind; zha ne zianał wseed co, zig zie dze laa zho rzoitraa lo Dios. <sup>17</sup> Lega nac zhiwseed zho zig nac grë guiełguidzdox; sac teł guiełguidzdoxa, znuse rded miecha ni zha ne glana ible zet zho. Zig nac Himené grop Filet, wseed co rleynie zho, <sup>18</sup> sac teł zha zianałdraa zho miñe nac diidzli; rnee zho bleebanle Dios grë menğut. No palal zha ne rliladzle Xtiidz Dios, zeene ron zho miñ co, rienđraa zho dieñ pa miñe gliladz zho. <sup>19</sup> Sangue zha ne nlipaa no xnëz Dios, tsod pe nacne griee zho xnëz me sac lole me ngab zho; zigne zhobneeque lo Xtiidz me zaatne rnee: "Ruñbey Dios cho nac zha ne nlipaa no xnëz me"; ni rneequew: "Grë zha ne nlipaa ngab xnëz Jesús, none csaan zho grëse guiełntseeb."

<sup>20</sup> Zaatne nac lidz tib zha ricw lëë, no grë xtsiñ rotie zho miñe niaa or, miñe niaa plat, ni noquegaa miñe niaa yag, miñe niaa beñ. Miñe mazdraa niazh, miñ co rquiin zho rio ncuaañe row miech; laa miñe beelze niaa, ga rgo zho ncuaañe row ma. <sup>21</sup> Scaquegaa miech, zeene csaan zho grëse ncuaañe paat rquiind, ible squi in zho lo Dios guñ zho xtsiñ me miñe mazdraa nroob, zigne rquiin grë trast niazh co.

<sup>22</sup> Nac lo guiełnguieg, ndal grë ncuaañe ndzinlid rio guic miech ruñ zho, sangue luu gon tsienied grë ncuaañ co guic luu, bioxco zaacse wban, dib zdoo luu bnalo Dios, iñe bleynie grëse samiech luu, tiłnied luu zho; grë zha ne squi nli mbe zdoo, rbedz zho Dios, zaacse wbanne zho. <sup>23</sup> Ib yquiaadiagd luu grë godiidz ne paat rquiind, sac gon loxaque ruñctiła miech.

<sup>24</sup> Zha ne squi ruñ xtsiñ Dios, nodne tso zho dieñ pe tiłdiidz zho; sinque none wen gac zho lo grëse miech.

None guieñ zho zha cseed zho miech; ib guieednied zho miech, <sup>25</sup> ndooladz gac zho gnee zho lo zha ne rlëenie Xtiidz Dios. Ni scagaa Dios cxobnia guic grë zha co, yguudz zdoo zho csaan zho grë xquiełntseeb zho, gacnañ zho miñe nac diidzli; <sup>26</sup> zeena tsaa zho biini griee zho ladznia menğox, zaatne ngadoo zho.

### Leñ dze ne ziaadyob nitlo guidzliu

**3** Ni none gacnañ luu ganle, zeene laa dze ziaady-obpaa nitlo guidzliu, nroob nac guiełnë ne gan grë zha ne no xnëz Dios. <sup>2</sup> Zrieequia grë zha ne: gacladz tebaa lose zho yquiiin grëtaa ncuaañe no, loxaque dimi gleynie zho, niats gac zho, zdaannie zho ncuaañe ni rapd zho, zneenë zho Dios, gond zho xtiidz pxoz zho, xtiidz xniala zho; sacd zdoo zho miñe guñ miech lo zho, laa zho gban zigne notaa guic zho, ib yquiaadiagd zho Xtiidz Dios.

<sup>3</sup> Gacnañdraa zho pe nac guiełwleynie, ib yquiad zdoo zho,

loxaque diidz gzhixcuaa zho, lëbd zho gnabey zho xcuerp zho, sacci zho samiech zho, stsidił zho grëse ncuaañe rquiin,

<sup>4</sup> zgo zho zha ne ndzieeldiidz zho nia zha ne quin zho, ni lalnu guiełto tsod lo zho, loxaque dieñ zha gdeed guxt xcuerp zho tso zho, laa ne yguib zho xnëz Dios.

<sup>5</sup> Squiaalo zho ye zho rliladz Dios, per lo grë ncuaañe guñ zho, ga glu ne rliladz zho me.

Bien, ib ctsieelsad luu grë miech ne sca nac. <sup>6</sup> Sac lëë zha ne nacgrë zho ga, rzëeb yu rietsitnie grë wnaa yozh ne zianał ncuaañe gdeedtaa guxt xcuerp.

<sup>7</sup> Tibaque no zho dieñ peraa rseed zho, per ib rioguid zho miñe nac diidzli. <sup>8</sup> Zigne been chop zha ne biil diidz dox padzeela, Janes grop Jambres, gocndaan zho lo Moisés; scaque ruñ zha co niina, rlëenedox zho miñe nac diidzli. Miech yozha, ndzinlidraa nac guic zho, nacd zho zha ne gliladz Xtiidz Dios; <sup>9</sup> per gacdaquew xtse, zeene laa diidz guieñ ganle pe clas miech nac zho, dzigo lëëque grë ncuaañe yozh ne ruñ zho cuee xquiełto zho; zigne bzhaacaque zha ne sca blëenie Moisés.

### Csaand Timoté miñe pseed me

<sup>10</sup> Sangue luu, nanle luu ganle zha nac grë miñe pseed naa luu. Wen wen nañ luu ganle zha mban naa, pe no guic naa guñ naa, zha dib zdoo naa rliladz naa Dios, zha dib zdoo naa rleynie naa samiech naa, rieednied naa zho. <sup>11</sup> Nanle luu ganle zha rneedz Dios xfuers naa, rlëeb naa grëtaa miñe rteed miech naa, zig been zho naa guiedz Antioquí, guiedz Icon ni Listr, blactaa pquianał zho naa; per tibaque gocnie Dios naa, psilaa me naa lo grëtaa guiełntseeb co. <sup>12</sup> Ni scagaa naca, grë zha ne rquiabladz gban zigne rnabey Jesús,

ible squianaꝫ miech zho. <sup>13</sup> Per probsaxe grë zha ne sca quiayunctal xtoꝫ, zha ne sca noquidie miech, zig zie dze laa zho noteedquie zho nëz ne nitlo zho. Quiaguitnie zho miech, ni quiaguitniegaa men̄dox zho.

<sup>14</sup> Saꝅgue luu goꝅ, csaand luu grë miꝅe pseed luu. Nan̄ween luu gaꝅle diidzliw, ni run̄beygaa luu cho nac grë zha ne bneew lo luu. <sup>15</sup> Ni stiba, zigne ziadroob luu psilo quiaseed luu Xtiidz Dios, ni lëew bdixbiini guic luu gocnaꝅ luu ne Jesús none gliladz miech parne laa zho lo doꝫ. <sup>16</sup> Dib nacse Xtiidz Dios, Espiritu Sant psiaaba guic zha ne pquiaaw, laaw biaan̄:

rseeda ne miꝅe nac diidzli,  
rsow diidz lo ne guieꝅ ne pa lo quiaxiꝅ ne,  
rseeda ne zaacse gban ne.

<sup>17</sup> Zeena sca grëse zha ne no xnëz Dios, grieelo wen wen cseed zho, ni guieꝅ zho zha guꝅ zho grëse dziin ne rquiin, dziin ne rieguial̄ zho guꝅ zho.

#### None gnee Timoté Xtiidz Dios

**4** Zig zobwi Dios, zig zobwi Jesús men̄ ndzon ne rnabey ne, laa naa rso diidz lo luu, bnee Xtiidz Dios lo grëse miech. (Jesús nac men̄ guꝅquizh miech grëtaa ncuaaꝅe been̄ zho, zigtaa zha ne mbana zigtagaa zha ne gutlew, zeene gdziꝅ dze ne laa me guiaad gnabey me.) Bioxco tel̄ pa hortaa bneew lo zho, niicle zeene rzac luu riobda. Bloo guic zho gliladz zhow, bnee lo zho zeene gaꝅ luu pe falt ne noyꝅn̄ zho, ni scagaa bloonley zdoo zho. Bioxco tibaque pseed zho, ib guieednied luu zho. <sup>3</sup> Sac goꝅ, zdziꝅ dze ne siguiel̄draa miech yquiaadiag zho miꝅe nac diidzli; sinque laa zho yquiaguib zhaase zhaase dieꝅ cho cseed zho tel̄ pe nac ncuaaꝅe rdziladzse zho yquiaadiag zho. <sup>4</sup> Gleynied zho Xtiidz Dios, laa ne yquiaadiag zho miꝅe nac xtiidz me, leꝫ laa zho tsoxco yquiaadiag zho grë miꝅe nac zhiwseed miech guidzliu. <sup>5</sup> Saꝅgue luu goꝅ, nsin bzo gdeete luu diidz guꝅgüet zho luu. Zaacse been̄ grë miꝅe pso Dios luu guꝅ luu, bnee lo miech zha laa zho lo doꝫ; niicle tel̄ pe nactaa guieꝫnë ne noded luu, gacm-band luu.

<sup>6</sup> Rieꝅ naa ziaadyoble ne laa naa gbi lo guidzliu rii, zhile gdziꝅ dze ne laa zho gut naa. <sup>7</sup> Leꝅ ngbidz ne wban naa, tibaque dib zdoo naa bliladz naa Dios; xtsiꝅn̄ mew, laaw beꝅ naa zigne bnabey me naa, ni laaw psiaalgaa naa niina. Zigne run̄da grë men̄guib ne rie lo diꝫ, sca bleeladz naa naa beꝅ naa xtsiꝅn̄ me; <sup>8</sup> laa na nagoꝅ, miꝅe quiambëzse naa nac premio ne no gneedz me lo naa. Lëë premio co gneedz me gaꝫ dze ne guiaad me guiaadguꝅ me guieꝫwxtis; ni led loxaque naadse ygaaw, sinque grëse zha ne rlyenie me, grë

zha ne dib zdoo quiambëz gdziꝅ dze ne guiaad me stib, grëse zha co yгаа premio co.

#### Tsieniob Timoté

<sup>9</sup> Bzhiguiel̄ guiaadniob luu guiaadgaꝅ luu naa nu; <sup>10</sup> sac zig nac Demas, laa me bichele lo naa. Psaꝅaque me naa nu laa me zie nëz Tesalónica; sac mazdraa nonie grë ncuaaꝅe lo guidzliu rii guic me. Bay zig nac Crescent, laa me brieze zie me nëz Galás; Tit na, zieegaa nëz Dalmás; laa zho zie zaatne nacle diidz tsie zho. <sup>11</sup> Niicle Tic guieꝅn̄ nu, sac laa me pxel̄ naa zie me Efés. Loxaque Lucse biaan̄ lo naa nu.

Psoladz goꝅ tsieguib luu Marcw, zeene laa luu guiaad nëz rii bzhiguiel̄ guiaadnie luu me; sac rquiin me nu guꝅ me xyudar naa lo xtsiꝅn̄ Dios. <sup>13</sup> Ni psoladz-paa guiaadnie luu lar ne rbiix naa, miꝅe psan̄ naa guiedz Troas lidz Carp; ni guiaadnie luu grë xquits naa. Ib guiaan̄ladz luu miꝅe nac grë guits nroob ga.

<sup>14</sup> Tel̄ gaꝅ luu gaꝅle nzian ncuaaꝅe nonguiel̄draa been̄ Lejandr naa, men̄ ne nac wncadzguib ga; per Diostaa naꝅ zha guꝅquizh me Lejandr grë miꝅe been̄ Lejandr ga. <sup>15</sup> Ni niicle luugaa goꝅ, nsinaque bzo lo me; sac ne nlipaa rlëenie me wseed ne nolu ne lo miech nu.

<sup>16</sup> Zeene glopaa gocredz naa lo wxtis, choot bzëd nrree xfavor naa, grëse zho biche lo naa; rnab naa lo Dios guꝅquizhd me zho miꝅe been̄ zho, sca psaan zho naa. <sup>17</sup> Saꝅgue men̄ ndzon ne rnabey ne psand me naa, me pchoobladz zdoo naa, haxta bdeeda diidz bnee naa Xtiidz me lo grë zha zit rii. Sca gocnieꝅ me naa, guꝅ naa cuent role meedz psilaa me naa; <sup>18</sup> ni niicle niinagaa, nan̄le naa ne ib silaa me naa lo grëtaa ncuaaꝅe racladz miech cteed zho naa, ni me yquiaanap naa haxta gaꝫ dze ne laa me gdziꝅnie naa zaatne rnabey me gbaa. ¡Me rieguial̄ guiaan̄non gzataa dze, niicle nadzew, gzheew, ni grëragaa leꝅ iz-doo ne ziaada!

<sup>19</sup> Bzhiguiel̄ bdeed tib zhibdiuzh naa lo Aquil i grop Priscil, ni lo grë zha ne no lidz Onesifr. <sup>20</sup> Gacnaꝅ to gaꝅle, laa bets ne Rast biaan̄ Corint, laa Tróximo biaan̄ guiedz Milet, sac rzacnë me. <sup>21</sup> Bioxco goꝅ guiaadniob luu, zeena blansole luu nëz rii zeene laa mëë naꝫ sëëb. Pcaania zhibdiuzh Eubul, zhibdiuzh Pudent, zhibdiuzh Lin, zhibdiuzh Claud; ni grëragaa zha bets ne, zha bzian ne, zha ne no nëz rii, laa zho rxeeꝫ bdiuzh lo luu.

<sup>22</sup> Jesús men̄ ndzon ne rnabey, me gacnie luu. Dios glu lo to gaꝅle pa lotaa noxco me to. ¡Me guꝅlay to grëse to!

Pabl



# TITO

¡Diuzh Tit!

**1** Naa nac Pabl, tib nguñdziin win nac naa lo Dios, tib zha ne pxeel Jesús nonee Xtiidz Ndzon me lo miech. Laa naa none xtiidz me, zeena grëse miech ne bzooblote Dios, gliladz zho me, gacnañ zho zhapaa nac wseed ne zionañ ne (wseed ne rnee zha none gbannie miech Dios), <sup>2</sup> wseed ne rlu ganle ible laa ne quiambiaaz ygaa ne tib guieñmban ne gdziñdraa dze lozh. Ansraa ne tsaaguidzliu, laa Dios bzeetle ne laa me gneedz guieñmban co, ni mesi gonñ led yed me rquidie. <sup>3</sup> Ni niina ne laa dze co bdziñ, laa me blu lo ne ganle zha nac xtiidz me, miñcopaa nagon bzo me naa none naa lo miech. Lëe me ga nac Dios ne psilaa ne lo dol.

<sup>4</sup> Laa naa rxeñ guits rii lo luu gonñ Tit. Rzaac naa luu zig tib xpëed naa, sac nañ naa nli dib zdoo luu rililadz luu Dios zigne rililadz naa me.

Rnab naa lo Dios meñ ne nac Pxoaz ne, ni lo Jesús meñ ne psilaa ne lo dol, glu me ganle pa lotaa noxco me luu, zeena peet zhgab ctseebd luu.

<sup>5</sup> Rsoladzaxe luu ganle, zeene psañ naa luu lo guidzliu win ne lë Cret i, laa naa psañ luu zeena lozh guñ luu grëraa dziin ne no gac i, ni psañ naa diidz lo luu zha gzo luu zha ne so gnabey lo grë zha ne rililadz Jesús, tib tib guiedz qui. <sup>6</sup> Bien sca, zeene gzo luu zha co, ga rquiin:

tib zha ne zaacse mban, zeena peet glisquid miech lo zho;

tibaque wnaa ne mbannie zho, meñ ne nacse tsiel zho,

zaacse quiachoob zho xpëed zho, rililadz mëed Dios (zëëbd diidz pe guieñntseeb ne noyuñ mëed, o rondgaa mëed diidz).

<sup>7</sup> Sac zha ne sca so lo grë zha ne no xnëz Dios, ib none gac zho tib zha ne ndzinli mban, sac gonñ xtsiin Dios ga guñ zho. Nodne gac zho:

zha nlëëguic,  
zha ngonziu,  
zha nad ron diidz,  
zha nguibdij,  
zha ne rzonañ dimi.

<sup>8</sup> Sinque none gac zho tib zha ne:

ndzinli nac guic,  
iñe niowse rdeed zho zaatne rbëz miech ne rdziñtaa lidz zho,  
rioxco zho ruñ zho niapse ncuaañe rquiin lo samiech zho,  
zienañ zho gac niapse miñe nac diidzli,  
rioxco zho ruñ zho niapse miñe rnabey Dios,

rrieelo zho rnabey zho guic zho, rnabey zho xcuerp zho.

<sup>9</sup> Ni none tibaque tsienañ zho miñe nac Xtiidz Jesús, miñe pseed zho; zeena guieñ zho zha gnee zhow lo grë zha ne gard tsoguic zha naca, ni grieelo zho glu zho lo grë zha ne rlëënie Xtiidz Jesús, guieñ zha co nonguiel da ga glëënie zhow. <sup>10</sup> Sac no ndal grë zha ne nëd gon Xtiidz Jesús niina, ncuaañe paat rquiind rseed zho miech, rquidie zho; ni lëepaa zha ne sca ruñ nac zha Israel. <sup>11</sup> Gacxe waa, ib none guioog ro zho; sac gonñ par cueexlëse zho dimi no zho noseed zho miech grë ncuaañe paat rquiind; zaatne no tib yu miech, grëse zho rquidie zho.

Bieñ sca gonñ nsin bzo lo grë zha Cret i. Sac gonñ, <sup>12</sup> tib meñladzaque zho, tib meñ rac lo zho bzeet ganle zha nac zho zeene znu bnee me: "Nandraaque zha Cret, loxaque noquidielsa zho samiech zho. Masaque mban zho zigne mban grë ma ntseeb ne no guix; loxaque gowse zho zienie guic zho, rbech zho guñ zho dziin."

<sup>13</sup> Ni nligaa sca nac zho. Gacxe waa, bieñ gdziguiend luu grë miñe ruñ zho, goctox lo zho zeena sodziits zho lo Xtiidz Ndzon Jesús miñe no gliladz zho. <sup>14</sup> Bnee lo zho yquiaadiagdraa zho beelze pe grë godiidz ne rbee-bey zha Israel, ni niicle yquiaadiagdga zho grë miñe rnabey zha ne rlëënie Xtiidz Ndzon Jesús.

<sup>15</sup> Golganñ ganle, grë miech ne ndzinli nac guic, zha ne mbe xquieñrien, ncuaañe notaa, mbe naca lo zho; sangue zha ne rililadz Xtiidz Dios, zha ne ndzinlid nac guic, tsod tib ncuaañe mbe glulo lo zho; sac desde zdoo zho, desde xquieñrien zho mbed. <sup>16</sup> Rnee zho ruñbey zho Dios, per rlu nliida sac ndzinlid mban zho. Zha yozha, xquieñndaan yozh zho zienie zho, led zha ne guiabd ne guñ ncuaañe yquiina.

## Znu nac Xtiidz Ndzon Jesús

**2** Sangue luu gonñ, none gnee luu lo grë miech qui zigne nacse Xtiidz Jesús. <sup>2</sup> Grë meñ bgui ne nac zha gol lo to i, bnee lo zho:

tibililadz gac zho,  
guñd zho ncuaañe cuee xquieñto zho,  
quix zho biini, ncuaañe ndzinli tsienañ zho guñ zho;  
tibilique gac zho lo Xtiidz Jesús,  
gleynie zho samiech zho, ni  
dziits so zho tel pe nactaa grë guieñnë ne noyañ zho.

<sup>3</sup> Scaquegaa grë meñ wnaa ne nac zhagol, bnee lo zho:

gban zho zigne no gban zha ne nole xnëz Dios,  
gzhixcuaad zho diidzguizh,

gzudzd zho.  
None zaacse gac zho, <sup>4</sup> zeena zha glu lo grë wnaa nguieg zha gban zho. Cseed zho grë wnaa nguieg:  
gan zho tsieel zho,  
gan zho xpëed zho,  
<sup>5</sup> gac zho tib wnaa nix biini,  
quitnied zho tsieel zho;  
zaacse gun zho xtsiin zho,  
niowse gac zho, niowse gnee zho,  
gon zho xtiidz tsieel zho; zeena tsod pe nacne gneenë miech Xtiidz Dios.

<sup>6</sup> Ni scaquegaa bnee lo grë zha bgui nguieg, gac zho zha nix biini. <sup>7</sup> Luuzhal zaacse been grëse ncuane no gun luu, zeena ga gwi zho ganle zha none gban zho. Zeene cseed luu zho, ine tibiladz goc, gun d luu ne quitnie luu zho. <sup>8</sup> Bguib diidz ne gnee luu, zeena choot peet glisquid lo luu; ni scagaa, grë zha ne rlëenie Xtiidz Jesús, stoladz zho zeene gan zho guien d pe glisqui zho lo ne.

<sup>9</sup> Grë zha ne lega run xtsiin ben, pso diidz lo zho gon zho xtiidz men ne quia zho xtsiin, niowse gac zho, niowse gnee zho, yquiabrod zho lo me. <sup>10</sup> Ib cuand zho, sinque ine ti miech mbe lo gac zho; zeena ga gan miech ganle zha niowtaa nac lo xquielmban zha ne zienal Xtiidz Dios, men ne psilaa ne lo dol.

<sup>11</sup> Grë diidz rii nagon pso lo zho. Gotsaa gwi ne ganle zha noxcotaa Dios miech, gacxe psilaa me ne lo dol waa; <sup>12</sup> sac laa me racladz csaan ne grëse guieIntseeb, csaan ne grëtaa ncuane rleyne zha ne nod xnëz me, guien ne ndzinli gban ne, tibaque gwi ne dien pa min wen, pa mingaa wend, ine dzioxco ne gban ne zigne racladz me. <sup>13</sup> Sca none gban ne, haxta dzianlo ne gdzi dze ne laa Jesús guiaad stib, zigne psanle Dios diidz; gal dze co, laa me guiaad con grë xquielndzon me. Me nac Dios ro ne rliladz ne, me psilaa ne lo dol. <sup>14</sup> Sac gon, me bgaadz guieIgut ne nioguial ne, me bdiizh grëtaa guieIntseeb ne bdziuu ne, psanmbe me ne lo grëtaa ncuane bdziuu ne; gane niina, lo me ngab ne, ni none dzioxco ne gban ne zigne rnabey me.

<sup>15</sup> Grë min rii nagon pseed grë miech qui, bnee lo zho gban zhow. Zeene riegala gdzieebd luu goctox lo zho, sac gon luu riegual gnee lo zho. ¡Sca been, zeena choot quitnied luu!

### Znu riegual gban zha ne no xnëz Dios

**3** Been soladz zho ganle none gon zho mine rnee grë zha ne nac wxtis, gac zho tib zha nguzobdiidz, ni ib soliaadz zho gun zho grë tel pe ncuane yquii lo samiech zho. <sup>2</sup> Guien zho gneenëd zho samiech zho, ine zaacse gbannie zho samiech zho, niowse gac zho, niowse gnee zho, ni zeene cho lo gnee zho none ndooladz gac zho, ndooladz gnee zho.

<sup>3</sup> Sac gon haxta ne, ib peet rien d ne glo, ntseeb goc ne, bdiits ne grë mine rnabey Dios; laa ne ziole nëz ne nitlo ne hor co, masaque bgadoo ne lo grëtaa ncuane racladz xcuerp ne, lo grëtaa ncuane ndzinlid ne bley ne bdziuu ne. Niapse guieIntseeb bional ne, në rac zdo ne rdzian ne ncuane quianie, ncuane run stib miech; zigtaa row rzhiih zdo zho gon zho ne, scaque ne, zha ne rdziantaa ne, row rzhiih zdo ne bdzian ne zho. <sup>4</sup> Per bdzi dze, zeene laa Dios (men ne psilaa ne lo dol) blu ganle pa lotaa nac xquielwen me, pa lotaa nquialadz me miech, <sup>5</sup> laa me psilaa ne; per guiabd ne togo por pe ncuane wen ne bdziuu new, sinque porne pquia zdo me new. Psanmbe me ne lo grëtaa xtol ne, rreequia gol ne ga stib, ni bzhixcuaa Espiritu Sant lo xquielmban ne. <sup>6</sup> Niapse por Jesús men ne psilaa ne ga, laa Dios pxeel Espiritu Sant nneedz me grëse guieIbiini ne rquii lo ne. <sup>7</sup> Por mine been Jesús ni mine been Espiritu Sant laa ne biaanwen lo Dios; ni porne noxco me ne gane bnabey me sca goca. Gane niina, ndion ne ib zgaa ne tib guielmban ne gdzi dze lozh, sac ib sca nac xtiidz me.

<sup>8</sup> Mine rne naa lo luu nu, diidzliw. Racladz naa tibaque gnee luuw lo grë zha qui, zeena grëse zho ne nac zho zha ne rliladz Dios, tsoxco zho gun zho niapse grë ncuane ndzinli; sac gon, min co nac mine nonguiel, ni mincogaa rquii lo grëse miech.

<sup>9</sup> Biche lo zha ne racladz til diidznie luu grë ncuane paat rquiind, zig nac grë godiidz dien pe been grë mengol padzeela, dien pe nonguiel tsienal ne ley, te nonguiel da ye. Ncuane paat rquiind ga, loxaque runctila miech; ni lalnu riegual d gaquieta.

<sup>10</sup> Tel cho zha ne rsilo rgodil grë zha ne rliladz Dios, blisquiw lo zho. Bnee lo zho tib, tel gan luu rond zhow, bnee lo zho stib; telne rondaque zhow, dzigo bzonëz zho gan zho dien pa nëz tsie zho. <sup>11</sup> Zha ne sca run, gase rlu ne zieniedraa guic zho gon zho mine rnabey Dios; sac nanpaa zho dol ga, ni laa zho runa.

<sup>12</sup> Laa naa no cxel tib zha ne guiaad i, yase cxel naa Artem o cxeelgaa naa Tic. Zeene glanso zho i, siguieel luu guiaad luu Nicópolis ga gdzieel ne; sac ib ga ni naa cuëz naa len mëe nal ne ziaad nu. <sup>13</sup> Laga no luu i, bioxco zaatne grieelotaaw been xyudar Apol grop me licenciad Zenas. Bdeed grë tel pe ncuane yquii zho nëz; zeena peet gunfalte lo zho, grieelo gdzi dze zho zaatne no tsie zho. <sup>14</sup> Grëse zha ne nacgrë ne ne rliladz ne Jesús, none cseed zho gun zho xyudar zha ne no li-aadz; glu zho ganle rquii zho, led zhlëd mban zho.

<sup>15</sup> Grëse zha ne no lo naa nu, laa zho rxeel bdiuzh lo luu i. BzhiguieI bdeed tib zhibdiuzh no lo grëse zha ne rleyne no i; sac ye zho rliladz Jesús.

Guiaanne Dios to sca dien. Peet tsienied guic to, me gacniën to; sac gon me noxco grëse zhizhgab to.

Pabl

# FILEMON

¡Diuzh Filemón!

**1** Naa nac Pabl, laa naa no ladzguiib nu loxaque ne quiayuñ naa xtsiñ Jesús; grop no Timoté laa no rquia guits rii.

Laa no rxeela lo luu goñ Filemón, ne nligaa rleynie no luu squi ye luu noyuñ xtsiñ Jesús. <sup>2</sup> Laaw ziaad lo to i gza to bzian ne Apia, bets ne Arquip tib zha ne noyuñaque dziin rii, ni grëraa zha bets, zha bzian ne rcaalsa lidz luu i.

<sup>3</sup> Dios, meñ ne nac Pxož ne, ni Jesús meñ ndzon ne rnabey, me glu ganle pa lotaa noxco me to, zeena peet zhgab ctsebde to.

<sup>4</sup> Ib riaanladz naa luu, zeene rzodiidznie naa Dios, tibaque rded naa xquizh lo me squitaa noneedz me guielbiini lo luu. <sup>5</sup> Sac ziyonle naa squitaa dib zdoo luu riladz luu Jesús, rleynie luu me, ni scaque rleynie luu grë zha ne ngab lo me. <sup>6</sup> Rnab naa lo Dios, grëse miñe noseed luu grë zha ne no i, tsoguic zhow, zeena ygaa zho grëse guielnzaac ne rdeed Jesús lo grë zha ne ngab lo me. <sup>7</sup> Rley naa goñ bets, sac zigtaa naa zigtagaa grëraa zha ne ngab lo Dios, blactaa ziechoobladz luu, zigonley luu zdoo no, rlu luu ganle nli rleynie luu no.

<sup>8</sup> Niicle ne rieguiala gnabey naa luu miñe racladz naa guñ luu, sac goñ Jesús bzo naa none naa Xtiidz me, <sup>9</sup> per gnabeyd naa luu, sinque laa naa rnab lo luu yquiaadiag luu ganle zha racladz naa; sac goñ ndion ne zigne rleynie naa luu, scaque luu rleynie luu naa. (Goñ ganle, meñgol ne nac Pabl nu nonee lo luu, laa naa nioogyu nu loxaque ne quiayuñ naa xtsiñ Jesús.) <sup>10</sup> Niina goñ ne laa Onésimo glanso lidz luu i stib, bzhiguiel zaacse pcaania me, goñ ganle rriequia mēēd nac me lo naa niina, sac nu leñ ladzguiib nu bne naa Xtiidz Dios lo me, xquizhgaa Dios bliladz mew.

<sup>11</sup> Nli glo tib zha peet xtsiñd nac me lo luu, sangue niina goñ, zigtaa lo luuw zigtagaa lo naaw nroob yudar ne guñ me. <sup>12</sup> Laa me biire ziaad lo luu i, niowse pcaania me; masaque been cuent naa i zial i. <sup>13</sup> Gocladz naa mbéz me lo naa nēz rii, zeena me niuñ dziin lo naa nu xcuent luu, ne znu nioogyu naa nu loxaque ne noseed

naa miech Xtiidz Ndzon Jesús. <sup>14</sup> Per gocladz naa niunga naa miñe no guic naa, ni nañd naa dien pe gnë luu; gane ni naa mazd telne zrieelow, per zdoo luu gala.

<sup>15</sup> Nli laa Onésimo biche lo luu palal dze; per niina ne laa me glanso lo luu stib, lëë guiaaṅle me lo luu i.

<sup>16</sup> Per bien goñ, sacdraa luu me niina zig tib zha ne runse xtsiñ luu, goñ ganle rriequia tib bets luu i, tib zha ne nziuu lo luu i nac me. Tel naa, sca rzaac naa me, gacxe waa none gleynie luu me; sac goñ tel niina, led loxaque tib nguñdziindse nac me lo luu, sinque ye tib bets luu nac me, sac goñ yele me ngab lo Dios.

<sup>17</sup> Telne nlipaa rzac luu naa zig tib bets luu, porne tibaque meñ ne riladz ne, nana sca been cuent naa i zial i, pcaania me zig nac zeene naa glanso lidz luu.

<sup>18</sup> Ni tel no pe guielqui ne been me lidz luu, tel pe zëëbgaa me lo luu, lo naa bnaba. <sup>19</sup> Wi ganle, naazhal pquia diidz rii nu: Naa quizha. ¡Zig nac luu, goñ ganle zëëble luu lo naa, ni haxta nroobraa zëëb luu! Sac goñ, naa bnee Xtiidz Dios lo luu laa luu bgaa guielmban ndzon ne gdziñd dze lozh.

<sup>20</sup> Sca goñ bets gaca, bzhiguiel been guielnzaac co; bloonley zdoo naa, bien ganle tibaque lo meñ ne ngab ne.

<sup>21</sup> Laa naa pxel guits rii lo luu, sac rien naa ible zon luu miñe rne naa lo luu nu, rgobey naa haxta nroobraa miñe guñ luu lo miñe rnab naa. <sup>22</sup> Lëë nēzle nu rnaabaque naa lo luu, siguiel luu gneedz luu lidz luu cuēz naa zeene laa naa guial i; sac rien naa ib zuñ Dios miñe quianab to lo me, zneedz me diidz guial naa guialgan naa to.

<sup>23</sup> ¡Dios guiaaṅnie luu sca! Pcaania zhibdiuzh Epafr, meñ ne nioogyunie naa leñ ladzguiib nu loxaque ne rdziuuñ no xtsiñ Jesús. <sup>24</sup> Scaquegaa zla zha ne quiadziuuñgza no dziin, zig nac Marcw, Ristarc, Demas ni Luc, gza zho laa zho rxeel bdiuzh lo luu.

<sup>25</sup> Jesús meñ ne rnabey ne, me glu ganle pa lotaa noxco me luu. ¡Me guñlay luu!

Pabl

# HEBREOS

**1** Padzeela, ndal vult bnee Dios lo grë pxozgoldoo ne, pxeel me grë zha ne biadteed xtiidz me lo zho, bnabey me grë zha co zhaase zhaase mod ne bnee zho. <sup>2</sup> Saṅgue niina, Xpëedpaa me Jesús pxeel me biadnee xtiidz me lo ne. Jesús meṅ ne bzaagrop me grë-taa ncuuaṅe no, ni meṅ ne bzo me gnabeya grësew. <sup>3</sup> Zeene biaad Jesús lo guidzliu, me blu gaṅle zha ndzontaa Dios, zhapaa nac Dios, sac Dios nac me; me naaz grëtaa ncuuaṅe no, ni por xtiidz me laaw quiayun dziin. Ni zeene blozh bdiizh me xtoṽ ne, dzigo laa me biire zey gbaa bzob me cue Dios, zaatne rieguaṽ me ne nac me meṅ ne rnabey.

<sup>4</sup> Ga rlu gaṅle meṅ nroob nac Jesús, led lega lëd me Xpëed Dios; meṅ nroob nac me lo grë anjl. <sup>5</sup> Ni tib lo anjl bneed Dios zigne bnee me lo Jesús, zeene rëb me: "Xpëed naa nac luu. Desde nadze laa zho guṅbey ne Xpëed naa nac luu." Stib vult zeene bzeet me Jesús, rëb me: "Xpëed naa nac me, naa nac Pxoze me." <sup>6</sup> Ni zeene biaad Jesús lo guidzliu; meṅ ne nac Xpëedpaa me ga, rëb me: "Grëse xanjṽ naa, none yquitsgzhib zho lo me."

<sup>7</sup> Zaatne raquiet anjl, rneew:  
Tib mandadse nac zho lo Dios,  
pale zigne rzhooṅ me sca rzhooṅ zho rie zho zaatne rnabey me zho;

me rnabey rlu zho zigne rlu bel.  
<sup>8</sup> Saṅgue zaatne raquiet Xpëed me, rneew:  
Dios, luu nac meṅ ne zobnabey,  
ni gdziṅd dze ne griece luu;

zeene ruṅ luu guieṽwxtis, zigne rieguaṽa sca ruṅ luuw.

<sup>9</sup> Ni palal rdziguiend luu grë guieṽntseeb,  
niapse ncuuaṅe ndzinli, ncuuaṅe nongueṽ, miṅ co rleynie luu;

miṅ co gane bzooblo Dios luu, nac luu meṅ ne rnabey,

luu nac meṅ ne mazdraa nroob guieṽbley bgaa.

<sup>10</sup> Laa stib lugar rnee:  
Meṅ rnabey nac luu, luu bzaa guidzliu, luu bzaa gbaa dib nacsew.

<sup>11</sup> Nli dzziṅ dze nitlo grë ncuuaṅ co, grësew zlozha zigne riozh grë lar,

<sup>12</sup> dzigo laa luu ctibëda, zig rdibëd grë lar, laa luu cuee stib miṅ cub; zigne ruṅ zha ne rtsëëxab.

Saṅgue luu, tibaque nac luu,  
nacṽ luu meṅ ne nitlo, nacṽ luu meṅ ne lozh xquieṽmban.

<sup>13</sup> Haxta rëb Dios lo me:  
Cue naa nëz derech, nu bzob,

nieeda lozh gnaz naa zha ne rlëe lo luu, csaṅ naa zho ladznia luu.

Nligaa meṅ nroob nac me lo grë anjl, sac ni tib lo anjl bneescad Dios. <sup>14</sup> Lo me ga sca bnee Dios, sac goṅ grë anjl, mese nac zho ruṅ zho dziin lo Dios, rxeel me zho rquianap zho zha ne nacṽ diidz laa lo grëtaa guieṽnë ne csiaab me.

**2** Gacxe nagoṅ waa, gotsaa guieṽ ne gaṅle ib none dzioxcō ne wen wen gwi ne zha nac Xtiidz Ndzon Jesús miṅe zidzion ne; zeene gnitnëzd ne. <sup>2</sup> Sac goṅ, niicle zeene xanjṽse Dios biadteed xtiidz me lo miech padzeela, ni gocnona; grëse zha ne güeynaṽda, pteed Dios zho caxtigw ne rieguaṽ zho. <sup>3</sup> ¿Pe leṽgue niina dzi-go ne Jesús zhal biadnee zha laa ne lo doṽ? ¿Zha dieṽ tedlaa ne lo caxtigw, teṽne dzioxcod ne miṅe rnee me? Nli zha ne binlew zha co biadneew lo ne, per me nac meṅ ne psilo bneew; <sup>4</sup> niicle Diosgaa, blactaa grë ncuuaṅe quialu me, blactaa grë milagr ne ruṅ me, rlu me gaṅle ne nli diidzli biadseed zho ne; ni zhaagaa grë guieṽbiini ne ral zdoo me rdeed Espiritu Sant lo grë zha ne dib zdoo rnalo Jesús.

## Jesús nac meṅ ne grieelo gdziṅnie miech lo Dios

<sup>5</sup> Zig nac lo guidzliu cub ne ndioṅ ne naraa gneedz Dios, psanṽd me ne anjl gnabey low. <sup>6</sup> Lo Xtiidz me zhobnee gaṅle zeene znu rëb David lo me:

¿Cho nac miech ne squitaa noxco luu zho?

Zig nac tib meṅ qui, ¿pe nacne squitaa ruṅnon luu me?

<sup>7</sup> Tib blase dze psanṽwin luu me palal lo grë anjl; na laa luu psanṽglaa me stib, beenṅnon luu me, bzo luu me mele gnabey.

<sup>8</sup> Grëtaa ncuuaṅe no, laa luu psanṽ ladznia me.

Nli gard gac grë miṅe bnee David ga, <sup>9</sup> per ndioṅle ne gaṅle zha psanṽwin Dios Jesús lo grë anjl tib bla dze, ni blozh ga zeene laa me gut xcuent ne grëse ne, hor co laa Dios biire psanṽglaa me, laa Dios biire beenṅnon me. Ni nligaa noxco Dios miech, nquialadz me ne, gane bdeed me diidz gut Jesús psilaa me ne lo grëse xtoṽ ne.

<sup>10</sup> Ible sca gocladz Dios, meṅ nroob ne bzaa grëtaa ncuuaṅe no, ible me bdeed diidz scataa grë guieṽnë ne goṅ Jesús; gane niina, Jesússe nac meṅ ne grieelo ner lo grëtaa miech guizhiu ne no ygab lo me, gdziṅnie Jesús zho lo guieṽndzon ne no me.

<sup>11</sup> Grëse ne ne nac ne zha ne psanṽmbe Jesús ngab ne lo Dios, yeṽe ne nac mëed lo Dios. Gacxe waa, rley

Jesús rnee me bets me nac ne; <sup>12</sup> no tib lugar lo Xtiidz Dios zaatne raquiet zeene znu rëb me:

Zne naa lo grë bets naa, gacnañ zho ganle cho nac luu;

ni zeene ycaalsa zho grë zho, tipse dzioolnie no luu.

<sup>13</sup> Stib vuilt rëb me:

Dios nac men ne rnalo naa.

Ni rëb me:

Laa naa nu, quiayacnie naa grë zha ne nac xpëed Dios.

<sup>14</sup> Miñ co gane, zigne znu nac ne miech, scaque Jesús goc me miech zigne nac ne. Sca bdeeda diidz gut me, ni zeene gut me, ga psanwin me menox, sac glo masaque ladznia ma no miech par gnitlo ma zho.

<sup>15</sup> Sca psilaa me grë miech ne ngadoo lo guielgut; rriequia ngadoo zho, sac tibaque nonie xtseb guielgut guic zho.

<sup>16</sup> Ni wen wen ndion ne ganle, zeene biaad Jesús, biaate me par gacnie me grë anjl, sinque laa me biaad par gacnie me grë zha ne no ygab lo Dios. <sup>17</sup> Gacxe waa, goc me zig nac miech, zigne nac ne ne nac ne bets me; ni parne scagaa grielo gac me pxoz nroob ne gnab lo Dios por ne. Pquia zdoo me ne, bloogon me me bdiizh me grëtaa xtoñ ne; <sup>18</sup> nroob nac grë guielne ne bded me, pquianañ menox nquuil ma me niab me lo doñ. Ni ne mezhal bded grë miñ co, nanpaa me zha rzac zha ne nodeda, gane ible zacnieñ me zho.

### Guñndipde to zdoo to

**3** Bets, bzian, to ne nac to zha ne bredz Dios ngab to lo me; golguien cho nac Jesús, men ne pxeel me biadteed xtiidz me lo miech, men ne bzo me nac pxoz nroob ne rnalo ne niina.

<sup>2</sup> Tib men nguzobdiidz briequia Jesús lo Dios, zigne nguzobdiidz briequia Moisés zeene pquianap me grë zha Israel. <sup>3</sup> Per Jesús nac men ne non, sac gon lo me ngab grë miech co, laa Moisés loxaque pquianap me zho. <sup>4</sup> Zig nac zha ne rzhixcuaa tib yu, nli non zho, per mazdraa non men ne bzaa grëtaa ncuaane no; ni lëe men co nac Dios. <sup>5</sup> Nli bin Moisés didz been me xtsiin Dios, per laa me gocse zig tib ngundziin pquianap me grë zha Israel co, ni pteed me xtiidz Dios lo zho. <sup>6</sup> Sañgue Jesús, Xpëed Dios nac me, ni me rnabey grëse zha ne ngab lo Dios. Ni grëse ne, ne nac ne zha ne no xnëz me, lo Dios ngab ne; totsaque iñe nley gac ne dib zdoo ne yquiambiaaz ne gac grë miñe nacle diidz gneedz me lo ne.

<sup>7</sup> Ndionle ne sca ganle, men ro nac Jesús, gacxe waa gotsaa gwi ne ganle zha raquiet lo Xtiidz Dios rnee Espíritu Sant lo ne, rnee me:

Teñe gon to gnee me lo to nadze,

<sup>8</sup> guñndipde to zdoo to,

guñde to zigne been grë pxozgol to, gocntseeb zho lo Dios, zeene sca mban noded zho, no zho grë dan ngan co.

<sup>9</sup> Ga raquiet ganle zeene znu rëb Dios:

Ncuaane lëbdraa guic naa been zho,

per dipse len choo iz, blactaa ncuaane gon zho ben naa.

<sup>10</sup> Zeene gon naa scataa nac zho,

laa ne gon zho diidz tsie zho nëz ne rlu naa lo zho, leñ zhaa ncuaane run zho;

nacne nli beñgulëe zho guic naa.

<sup>11</sup> Lo guielblëe co, bdeete naa diidz ndziñ zho zaatne nded naa ndziiladz zho.

<sup>12</sup> Bets, bzian, golguien sca ganle ib guñndipde to zdoo to, zeena sozite to lo me ne nac me Dios nguiamban. <sup>13</sup> Gzataa dze, golnee lo grë zha ne nacgrë to (nasraa laga rdeeda diidz), zeena ni tib tsienald grë ncuaane runctal xtoñ miech, lozh ga lëew yquiaaqui gacntseeb to lo Dios. <sup>14</sup> Sac gon, par gdziñ ne zaatne no Jesús, ib none tiblque gac ne, tibaque gnalo ne Dios zigne bnalo ne me zeene psilo bdziunbey ne me. <sup>15</sup> Ni nadzegazh none dzioxco ne miñ co. Golso-ladz ganle zha rnee lo Xtiidz me:

Teñe gon to gnee me lo to nadze,

guñndipde to zdoo to,

guñde to zigne been grë zha ne sca gocntseeb lo me ga.

<sup>16</sup> Ni lëe miñ co gon bzhaac zha ne güeybee Moisés Egipt. Bin zho bnee Dios lo zho ni blozh ga gocntseeb zho lo me, <sup>17</sup> beenctal zho xtoñ zho. Dipse len choo iz ne sca bio zho dan co, bieednie me zho. <sup>18</sup> Zeene gon me rond zho xtiidz me, nacne bnee me lo zho rëb me gdziñd dze ne gdziñ zho zaatne ndeed me ndziiladz zho. <sup>19</sup> Ni nligaaw bdziñd zho, grëse zho gut dan co; sac sca beenndip zho zdoo zho, ib bliladz zho miñe rnee me.

**4** Sca nagon bzhaac grë miech co. Gacxe nagon waa, zig nac niina ne laa me rnee ganle laa me gneedz lugar ne gdziiladz gaa ne, none ndzinli gac ne, zeena ni tib choot sacd zig bzhaac grë zha co. <sup>2</sup> Sac zigne nagon nonee Dios lo ne niina dien zha gdziñ ne zaatne gneedz me ga, znuque bnee me lo zho; per zh-lëse bin zhow, ib bliladz zhow dib zdoo zho. <sup>3</sup> Sac loxaque zha ne dib zdoose riladz xtiidz Dios, zha cose zrieelo gdziñ zaatne nacle diidz ga gdeed me gdziiladz zho. Miñcocxe waa, zeene gon me bliladz zha co xtiidz me, bdeete me diidz ndziñ zho ga.

Niaale zaatne gdziiladz zho ga, nolew zeene blozh bzaa Dios grëtaa ncuaane no. <sup>4</sup> Sac gon rnee lo Xtiidz me: "Xoop ngbidz bzaa me grëtaa ncuaane no, laa zeene gol ngbidz gadz laa me bdziiladz." <sup>5</sup> Niaalew nagon, sinque ne gocntseeb zho lo me gane bdeete me diidz ndziñ zho.

<sup>6</sup> Grë zha ne glo gocnañ xtiidz me ga, brieelod ndziñ zho; per zig nac niina, laa me bii quiambëz sëeb grëraa zha ne no sëeb. <sup>7</sup> Gacxe waa, laa me biire pso stib dze ne ygaa zho guielnzaac co. Lëe miñ co ga znu bzeet David, zeene rëb me: "Teñe gon to gnee me lo to nadze, guñndipde to zdoo to." Ndaldoole iz sca bzhaac grë zhagol co, dzigora znu bzeet David; <sup>8</sup> ga nagon rlu no stib lugar ne gdziiladz miech. Nacdraaw zaatne bdziñnie Josué grë zha ne biaan zeene blozh gut grë zha ne gocntseeb ga; sac teñe lëele lugar co ga, nso-

draa Dios stib dze ne yгаа miech guieInzaac co. <sup>9</sup> Miñ co nagon, ndion ne ible no stib lugar co, ni ga gdziñ grëse zha ne ngab lo Dios. <sup>10</sup> Grëse zha ne gdziñ ga, gasi laa zho gdziiladz lo grëtaa xtsiin zho, zigne bdziiladzaque Dios zeene blozh bzaa me grëtaa ncuaañe no.

<sup>11</sup> Gacxe nana sca, golgotsaa dzioxcō ne dziuun ne miñe rnabey Dios, zeena gdziñ ne ga; dziuun d ne zigne been grë zha wladz ne sca bind xtiidz me. <sup>12</sup> Sac Diosi gon, diidz ne rnee me, nona. Zeene rnee me, rien ne grëse miñe nac ne. Nan me pe no guic ne, pe rza zdoo ne; niicle ncuaañe rzac ne mazdraa ngeetsa, nan mew. <sup>13</sup> Tsod ncuaañe tsongueets lo me. Grëse ncuaañe rac, me ran; ni tib tib ne, lo me cueero ne grëse tel zha mban ne.

### Lëe pxoz nroob ga nac Jesús

<sup>14</sup> Per zig rne naa ga, rdziaap ne tib pxoz nroob niina, ni pxoz cosi men ne bzoquia gbaaw. Lëe me ga nac Jesús, men ne nac Xpëed Dios, me none gnalo ne; none tiblīque gac ne. <sup>15</sup> Sac gon mesi rquia zdoo me ne, csaand me ne zeene zootle laa ne guiable lo dol, sac tel me gonle me zha nac lo guidzliu rii, gonle me grëtaa mod ne rquiiil men dōx ne par gunctal ne xtoI ne. Bzhaac me zigne rziaacaque ne niina, lëeraasi biabd me lo dol. <sup>16</sup> Gacxe nagon waa, iñe tibililadz golgot-saa gbig ne lo Dios, ndion ne ganle ible squia zdoo me ne, ni ible zacniēn me ne zeene rquiinpaā ne gun me xyudar ne, sac ne nligaa noxco me ne.

<sup>5</sup> Ible Jesús nac zhipxoz nroob ne niina. Gotsaa gwi ne ganle, men ne rgaa rac pxoz nroob, ladaque miech rcuee me run me dziin co, ni laa me rzo rteed me xtiidz miech lo Dios. Zig nac grë gon ne rgogon miech lo Dios, xchen ma ne rut zho par guiooglo lo xtoI zho, me riesaṅa lo pcoog; ni scaquegaa riesaṅ me miñe guiooglo lo xtoI me; sac gon, miech guidzliuque nac me. Ye me rzac zigne rzac grëraa miech, gane rien me rquia zdoo me grë zha ne peet rien d, grë zha ne mazdraa ngoopdol.

<sup>4</sup> Ni zha ne sca rac pxoz nroob, led zhald zho rzëeb zho rac zho dziin co, sinque Dioszhal rzooblo zho zigne bzooblo Dios Aarón, men ne glopaa goc pxoz nroob.

<sup>5</sup> Zig nac Jesús, Dioszhal bzooblo me ne laa me nac zhipxoz nroob ne; men ne znu rëb lo me: "Xpëed naa nac luu. Desde nadze laa zho gunbey ne Xpëed naa nac luu." <sup>6</sup> Ni rëb me:

Luu nac pxoz nroob, gdziñ dze ne gdzëe luu, luu gac zig pxoz Melquisedec.

<sup>7</sup> Zeene bii zo Jesús lo guidzliu rii, tib vult mban rac me zig zet me lo guieInë, haxta roon me, nguedz bnee me bnab me lo Dios csilaa Dios me lo guieIgut co; scagaa Dios psilaa Dios me, sac tib men nguzobdiidz nac me. <sup>8</sup> Niicle ne Xpëed Dios nac me, per tib men nguzobdiidz goc me, maase miñcopaa pqiaqui nroob guieInë ne bded me. <sup>9</sup> Ni ne sca bin me diidz been me grëse miñe bnabey Dios me, gacxe waa grëse miech ne gban zigne nac xtiidz me, me gdeed tib guieImban ne gdziñdraa dze lozh lo zho; <sup>10</sup> ni bzo Dios me nac me

pxoz nroob niina, zigne gocaque Melquisedec pxoz nroob.

### Gacde to zig cho mëdyeen

<sup>11</sup> Racladz naa gneraa naa lo to nu pe run zhipxoz nroob ne, zha nac me, per ne squi rac to peet nëde to yquiaadiag to, nagan gne naa lo to zha naca. <sup>12</sup> Lo lal dze ne psilo rnalo to Jesús, haxta none tole cseed miech niina, per na gon lel rquiiin to dien cho gbiire csilo cseed to stib. Rac mëdyeen to i gon, laa ne gow to ncuaañe row zha brooble lel racladz to tibaque nidz guie to. <sup>13</sup> Sac gon, mëdyeen rie nidz, ni rien d win dien pe nac ncuaañe ntseeb, pegaa nac ncuaañe wen. <sup>14</sup> Sangue grëloraa guieIwagw, miñ co rquiiin grë zha gol, ni zha co niinile zho, rien zho pe nac ncuaañe wen, pegaa nac ncuaañe ntseeb.

<sup>6</sup> Gacxe waa, none tsoxcō to gac to tib zha gol. Gunde to ne miñe pseedse to glo zeene psilo bna-lo to Jesús, lo miñ co ib grieede to. Laa to pseedle ganle:

zha none csaan to guieIntseeb gbig to lo Dios,  
zha none gnalo to Dios,  
<sup>2</sup> zha cxobnia to guic stib zho, gnab to lo Dios por zha,

zha nac wrobnis,  
zha cueeban Dios grë mengut,  
zha gun Dios guieIwxtis ne gloozh grëtaa guieIntseeb.

<sup>3</sup> Grële miñ rii nan to. Laa niina telne zneedz Dios diidz, laa to cseed miñe noraa gacnan to.

<sup>4</sup> Sac gon, no ncuaañe grieelod gac telne gneedzd Dios diidz gaca. Zig nac zha ne squi bienle zha nac Xtiidz Ndzon Dios, bley zho gon zho gol zdoo Dios psilaa me zho, bdeed Espiritu Sant guieIbiini lo zho, <sup>5</sup> bien zho zha wentaa nac xtiidz me, zha grieele sëeb zho za-atne ziaadyob gdziñ zho (zeene glu Dios grë poder ne rap me), <sup>6</sup> ni lozh ga csaan zhow, tsienal zho guieIntseeb stib; grieelod nose co guic zho gbiire sëeb zho xnëz Dios. Ni zha ne gon sca run, rrieequia no-quiaa zho Jesús lo cruz ga stib, gbiire gzhidznie miech me. <sup>7</sup> Zig nac tib lë liu ne rgaa grëse nisguie ne riab, zeene rrieequia grë ncuaañe ran zho low, runlay Diosa; <sup>8</sup> laa telne niapse yag guiets, niapse grë guizh guiets rroob low, paat rquiinda; ib tedsod dzibdee Diosa, ni lozh ga znabey me tseca. Scaque nagon nac miech ne runbey Xtiidz me.

<sup>9</sup> Bets, bzian, laa naa rne miñ rii lo to, per guiabde to togo miñe run to rzet naa. Tel to, rien naa briele to lo grë guieIntseeb, lole Dios ngab to niina. <sup>10</sup> Nanle to ganle, Diosi ncuaañe rieguial tib tib miech, miñ co rdeed me lo zho. Grëtaa ncuaañe noyūn to niina ne rleynie to me, grë tel zha rquia zdoo to been to xyudar grëraa zha ne no xnëz me, ni noyūngaa tow niina; grësew ible guiaanladzd mew. <sup>11</sup> Miñe rzoobladz naa, tibaque squi nguieel gac to, zeena scagaa zgaa to grë ncuaañe nacle diidz gneedz Dios lo to. <sup>12</sup> Sac dzigosi guieete to, ib gbechde to; masaque laa guic to tsienie

ycaania to grëtaa miñe bneele me gneedz me lo ne; zigne been grë zha ne nlipaa bnalo me.

### Minje rnee Dios ruñ mew

<sup>13</sup> Gołsoladz ganle, zeene psan Dios xtiidz me lo Abraham been mew zigne bneese mew. Lëë hor co rëb me laa me guñlay Abraham, ni ndal guñ me lo xtii Abraham. Ni lëëque lë me bzeet me, par glu ne ible zuñ me miñe bnee me. <sup>15</sup> Scagaa Abraham, tiblique bliladz me ne laaw gac; lëë gdib pquiambëz me bdziñ dze co.

<sup>16</sup> Zig nac miech, par glu ne zuñ zho miñe rnee zho, dzigo rzeet zho lë tib meñ ne mazdraa non lo zho; ni deque sca ruñ zho ga rlu ne gdzëedraa xtiidz zho.

<sup>17</sup> Scagaa Dios, laa me bzeet lë me sac guien draa stib meñ ne mazdraa non lo me. Ga blu me ne ible zuñ me miñe bnee me ga.

<sup>18</sup> Zeene sca rсан Dios diidz, ni rzeet me lë me, choot grieelodraa ctsëë miñe rnee me, ni niicle megaaw nacd me meñ ne rquidie. Gacxe waa, grëse ne ne nac ne zha ne wbig lo me, none iñe nley gac ne, sac ndionpaa ne ne ible zneedz me miñe psan me diidz ygaa ne.

<sup>19</sup> Miñ co nagon, none tiblique gac ne zig tib barcw ne dziits zob lo nis, sac no ncuaane naaza leñ nis; ndion ne ganle, ible dzziñ ne leñ yadoo nroob ne zob Jesús.

<sup>20</sup> Laa me bner bdziñ me ga nonab me lo Dios por ne. Me nac pxoz nroob niina, ni gdziñdraa dze ne gdzëë me; laa me nac zig goc pxoz Melquisedec.

### Pxoz nroob ne lë Melquisedec

**7** Nanle to ganle Melquisedec goc rey guiedz Salem, ni meque goc pxoz lo Dios ro ne zob gbaa. Gołsoladz ganle, zeene znu wbirele Abraham güeyguñcxoon me zha ne no grë guiedz ne rlëë lo me, Melquisedec goc pxoz ne güeydzieelo me, beenlay Melquisedec me. <sup>2</sup> Dzigo lo grëse ncuaane bla me lo grë zha co, been mew tsii lal, bdeed me tib lalgaw lo Melquisedec.

Melquisedec nac zig nacne rnee ne "guiełwxtis", miñ co nac ne rnee zho me "rey ne ruñ guiełwxtis"; ni rneeque zho me "rey ne rcuëëz lo dił", sac Salem (guiedz ne goc me rey ga) nac diidz co zig nac ne rnee ne "zaatne guieñd dił". <sup>3</sup> Ib raquiete dieñ cho goc pxoz me, dieñ cho goc xniaa me, dieñ cho gocgaa xmengol me; niicle raquietegaa dieñ zha blanso me lo guidzliu, dieñ pe gutgaa me. Ziaad gac me zig Xpëed Dios, meñ ne nac zhipxoz nroob ne, meñ ne gdziñd dze gdzëë.

<sup>4</sup> Rlu meñ non goc Melquisedec; sac gon:

a) Gołwi ganle, haxta pxozgol ne Abraham bdeed palal ncuaane bla me ga, lo Melquisedec. <sup>5</sup> Nana, telne niac Melquisedec zha xtii Leví guiab ne por miñ co pcaa mew, sac zeene laa ley biaad rnabeya ne grëse zha Israel, tel pe nactaa ncuaane quianie zho ruñ zhow tsii lal rdeed zho tib lala lo zha xtii Leví, sac zha co nac pxoz; ni tibaque dii ne nac zho. <sup>6</sup> Laa Melquisedec, niicle ne led zha xtiid Leví nac me, per bnab me bdeed Abraham tib lal grë ncuañ co lo me.

b) Me beenlay Abraham; ni laa Abraham biaanñiele diidz pe nac miñe gdeed Dios lo Abraham. <sup>7</sup> Ni ndion ne ganle meñ nroob nac zha ne ruñlay.

<sup>8</sup> c) Grë pxoz ne sca rcaania gon co, rdziñ dze ne laa zho ret; sangue Melquisedec, zigne raquiet me lo Xtiidz Dios rlu ne mban me.

<sup>9</sup> d) Rrieequia ye grë pxoz ne brieequia lo zha xtii Leví ye zho ga bdeed gon lo Melquisedec, zeene sca bdeed Abraham gon co lo me. <sup>10</sup> Sac niicle ne gard gal Leví hor co, per racle Leví cuent ga, sac xpëëdaque Abraham goc Leví.

<sup>11</sup> e) Grë pxoz ne brieequia lo xtii Leví ga, zig nac Aarón; zha co nac zha ne blu ley lo mengüedz Israel; per brieelod zho mbee zho miech lo doł, gane laa ne nxeel Dios stib pxoz ne ziaad lo xtii Aarón, mazd pxeel me tib pxoz zig pxoz Melquisedec.

<sup>12</sup> Zeene sca ptsëë Dios lo dii ne ziaad pxoz, hor co nacne bdzëëque grë xley pxoz. <sup>13</sup> Ndion ne ganle, Jesús meñ ne nac pxoz cub niina, lo xtii Judá brieequia me, ni ni tib zha dii co gard gac pxoz, sac ib bzod Moisés zha dii co ne laa zho niac pxoz. <sup>15</sup> Ga nagon rlu ne nli grëw bdzëë. Sac gon, Jesús meñ ne nac pxoz niina, meñ ne nac zig pxoz Melquisedec, <sup>16</sup> nacd mew porne ziaad me lo xtii Leví, sinque porne nac me tib meñ ne gdziñd dze lozh xquiełmban. <sup>17</sup> Zigne raquietaque me, zaatne rnee:

Luu nac pxoz nroob, gdziñd dze ne gdzëë luu, luu gac zig pxoz Melquisedec.

<sup>18</sup> Gataa laa grë xley pxoz biaan tib lad, sac grëse miñe bnabey pxoz hor co ruñ miech, paat pquiinda. <sup>19</sup> Ni lalnu brieelod nsanwena miech lo Dios; sangue niina, mazdraa wen zio ne, sac ndionpaa ne Jesús nac meñ ne csañwen ne lo Dios, sac me nac meñ nroob ne rnalone.

<sup>20</sup> Dioszhal rëb Jesús gac tib pxoz ne gdziñd dze gdzëë, ni haxta bzeet me lë me parne glu ne ctsëed me xtiidz me; <sup>21</sup> laa grëraa pxoz ne ziezo, ib been d me ne sca nzeet me lë me. Sac gon, lose Jesús znu rëb me:

Luu nac pxoz nroob, gdziñd dze ne gdzëë luu, luu gac pxoz nroob zig Melquisedec.

Naa rnew, ni naasi ctsëed naa xtidz naa.

<sup>22</sup> Miñcocxe waa ndion ne, diidz ne biaanñie Dios miech ga gdziñd dze ne gdzëëw; sac gon, por Jesús laaw noyac. <sup>23</sup> Glo, ndaldoo zha ne goc pxoz, sac grëse zho miech nac zho, rdziñ dze ne laa zho ret, zeene laa tib zho ret laa stib zho rzo. <sup>24</sup> Sangue Jesús, led yed me grieer par dieñ cho stib so, sac mesi gdziñd dze ne guet me. <sup>25</sup> Gacxe waa, grëse ne ne nac ne miech, zha ne gbigtaa lo me parne ycaania Dios zho, ible silaa me zho lo doł, ni lëë blaale zho ga. Tibaque laa me gnab lo Dios por zha, sac gdziñd dze ne guet me.

<sup>26</sup> Jesús nac tib meñ ne nlipaa mbe, ni tib doł rapd me, ib rdziguiend me guiełntseeb; gacxe waa, beennon Dios me, ni lëëpaa pxoz nroob co nagon rquiin ne. <sup>27</sup> Led yed me nac zigne goc grëraa pxoz nroob ne bio glo. Grë pxoz co, gzobse dze rut zho ma ne rgogon zho lo Dios, parne csañmbe me zho lo xtoł zho; ni rutaque zho ma ne riogon lo Dios parne

guiaanmbe grëraa mengüedz; sangue Jesús, tibaque vuelt bdeed me gon co, ni mezhäl goc gon co. <sup>28</sup> Stiba, glo, zha ne rgaa rac pxoz nroob zigne rnabey ley, ye zho runctal zho xtoł zho; sangue niina ne laa Dios psan stib xtiidz me, laa me bzo Jesús nac me zhipxoz nroob ne, mesi tib meñ mbe nac me, ni gdziñd dze ne gdzëë me.

### Jesúsle nac meñ ne rteed xtiidz ne

**8** Lo grë miñe quiane naa nu, miñe racladzpaa naa gacnañ to nac miñ rii: Jesús nac zhipxoz nroob ne, ni zaatne zob Dios, meñ nroob ne rnabey, ga zob me. <sup>2</sup> Gbaa no me, ga quiayuñ me dziin zaatne nacpaa yadoo, Dios bzaa yadoo co, led yedraa miñ co bzaa miech.

<sup>3</sup> Ndiön ne ganle, zha ne rac pxoz nroob, laa zho rzo, zeena grë ma, grëgaa ncuane rgogon miech, zha rdeeda lo Dios; scaquegaa Jesús, ye me bdeed me gon lo Dios. <sup>4</sup> Tel niaca miñe bii no me lo guidzliu niina, grieelod gac me pxoz nroob, sacne nole pxoz nroob ne rdeed grë gon co lo Dios, zigne rnabey ley. <sup>5</sup> Grë dziin ne run grë zha ne rac pxoz nroob lo guidzliu rii, lega nacsew zig zhimplë grë miñe rac gbaa; yadoo ne rio zho lo guidzliu riiw, lega nacsew zig zhimplë yadoo ro ne zob gbaa. Golşoladz ganle, zeene laa Moisés gzaa yadoo, rëb Dios lo me: "Zigne gon bluse naa lo luu guic gui ga, sca none gzaa luuw." <sup>6</sup> Gacxe waa, tel Jesús meñ ne nac zhipxoz nroob ne niina, mazdraa non dziin ne quiayuñ me; sac gon, zeene pso Dios me gac me pxoz nroob, psan Dios diidz stib zha grieelo ygaa ne grë guieñzaac nroob ne gneedz Dios lo ne, ni me gunctsiñ ne lo Dios.

<sup>7</sup> Wenraa nac diidz ne psan Dios ga, sac telne niaca nlëb diidz ne biaan glo ga zeene rëb me zha guiaanwen miech lo me, dzigo nod pe nacne mbiire nsañ me stib xtiidz me. <sup>8</sup> Ni bzeetlegaa me ne laa me csañ stib xtiidz me, sac grë zha ne biaanñie xtiidz me glo, loxaque beenctal zho xtoł zho. Miñ co ga raquiet lo Xtiidz me, zaatne znu rnee:

Rnee meñ ndzon ne rnabey: Zdziñ dze ne gbiire guiaan no diidz grë no zha Israel, ni zha Judá.

<sup>9</sup> Per gacdraaw zig diidz ne biaan no grë no xmengol zho,

zeene rrieequia bzheñ naa nia grë zha gol co, blee naa zho lo caxtigw ne noded zho Egipt; sac ni lalnu güeynałd zho diidz ne biaan no ga, nacne niicle naagaaw, psaanladz naa zho.

<sup>10</sup> Zeene gdziñ dze co,

znu nac diidz ne guiaan no grë no zha Israel: Grëse xley naa, nis nis gacnañ zhow, zig nac zeene haxta leñ zdoo zho, leñ guic zho zho-neew.

Dzigosi laa zho gunbey naa ne naa nac xDios zho, ni niicle naagaaw, laa naa gunbey zho ne lo naa ngab zho.

<sup>11</sup> Dzigosi yquiindraa tso zho gnee zho lo menlidz zho, lo menladz zho: "None gunbey luu Dios gon."

Sac leñ dze co, grëse zho runbeyle zho naa,

niicle zha ne mazdraa wina, niicle zha ne mazdragaa nona.

<sup>12</sup> Tel pe nactaa xquieñtseeb zho, zuñ naa zhow perdon;

gdziñdraa dze csoladz naa grë falt ne been zho lo naa.

<sup>13</sup> Zeene sca bzeet me ne laa me csañ stib xtiidz me, ga rlu ne rquiindraa miñe biaan glo ga; sac nac grë ncuaañ gox rquiindraaw, laaw nole par nitlow.

### Yadoo ne no gbaa

**9** Zeene glo biaan Dios diidz ga grë me zha Israel, hor co biaan diidz lo zho zha tsiegan zho me, ni zha tsaa yadoo ne gac zaatne tsiegan zho me. <sup>2</sup> Dzigo bzaa zho tib yu mantiad ne goc yadoo co, groltaa leñ yu co pquiaancaañ zho tib lar nroob, goc leñ yu co chop leñ. Tib leña, miñe riaan nëz ro yadoo, ga nac zaatne Nda, ga rzo tib candeler ne niaa niapse or, ni rzo tib mezh ne rbib quietxtil ne naclayle. <sup>3</sup> Laa stib leña, miñe riaan nëz zhits lar co, ga nac zaatne Ndadoo; <sup>4</sup> ga rzo tib yag ndiaab niapse or lada, dzigo lo co rec yaal; leen coque zhoob tib guin scaque niapse or ndiaab lada. Leñ guin co no grop lë quie lag ne pquia ley ne pcaania Moisés, ga no bar ne bzheñ Aarón, bar ne bdzib ben ga; leen coque no tib guies win niaa niapse or, leñ guies co no palal maná, quietxtil ne bguiaan Dios grë mengol co. Lëë guin co biaan par csoladz zho zha nac diidz ne biaanñie Dios zho. <sup>5</sup> Zhits guin co zoli chop anjl ne bzaa zho, masaque rbebel grop anjl co rtsiig me xiił me rtse me zhits guin co, zaatne rliaał xchen grë ma ne riogon lo Dios, par guiooglo lo xtoł mengüedz. Par gne naa zha nacraa grë ncuaañ co, rneedzraaw diidz nu niina.

<sup>6</sup> Sca nagon biaa yadoo co, dzigo grë zha ne rac pxoz tibaque rzëëb zho zaatne Nda ga; ga riegun zho dziin ne rnabey ley zho gun zho. <sup>7</sup> Laa stib leña, zaatne Ndadoo ga, loxaque meñ ne nacse pxoz nroob rrieelo rzëëb ga, ni tibaque vuelt tib leñ iz rzëëb zho. Zeene rzëëb zho, rienie zho xchen ma ne rgogon zho par guiooglo lo xtoł zho, ni guioogloogaa lo grë xtoł mengüedz, doł ne biend zho been zho. <sup>8</sup> Gase na ganle rlu Espiritu Sant lo ne, gacd sëëb grëraa miech zaatne Ndadoo ga, laga bii sca chop leñ nac yadoo.

<sup>9</sup> Golşotsaa gwi ne niina na ganle zha naca: Glo, niicle ne scataa riesañ zho gon, scataa rut zho ma ne rgogon zho, per brieelod grë ncuaañ co nsañmbew zdoo zho; <sup>10</sup> sac hor co, laa zho güeynał grë ncuane laglaase, rio zho dien pe zac gow zho, dien pe zac guie zho, dien zha gaz zho, dien zha tsar nia zho par guiaanmbe zho. Laa zho been miñ co, sac hor co gard gacncub diidz ne biaanñie Dios zho ga. <sup>11</sup> Sangue niina ne laa Jesús baaad, niina ne mele nac pxoz nroob, por me laa miech ygaa grë guieñzaac ne bneele Dios ga. Bdziñ dze laa me bzëëb yadoo ro ne zob gbaa (yadoo ne mazdraa non, yadoo ne mazdraa nzhixcuua, yadoo cosi led yeda bzaa miech), <sup>12</sup> zeene bzëëb me, bzëëb-nied me pe xchen chiv yeen, pe xchen ngon yeen, zigne been grëraa pxoz nroob; sinque xchenpaa me



bzëebnie me zaatne Ndadoo ga; tibaque vuelt bzëeb me, ni lëë psanmbele me ne lo grëtaa xtoꞓ ne ga.

<sup>13</sup> Nana, telne scataa pquiin zho xchen ngon yeen, xchen chiv yeen, rio zho rzëeg zho tib vac yeen rliaal xquidie co lad zha ne rap falt, par gbiche doꞓ co guiaanmbe zho lo Dios. <sup>14</sup> ¿Pe lel xchen Jesús dzigo? Mazdraa gon nac xchen me, ible sanmbew ne lo grëtaa ncuane paat rquiind ne bdziuun ne glo, niinasi zrieelo dziuun ne mine rnabey Dios nguiamban. Sac gon, tel Jesús ni tib doꞓ rapd me, ni Espíritu Sant bloo zdoo me bdeed me me goc me tib gon mbe. <sup>15</sup> Gacxe waa, Jesúsle nac men ne gdziñnie ne lo Dios, niina ne laa Dios psan stib xtiidz me. Zeene gut me, ga bdiizh me grëtaa xtoꞓ miech, zigtaa zha ne biaannie diidz glo cow, zigtagaa zha ne nobedz me len dze riw; niinasi grëse zho zrieelo ygaa zho guielmban ne gdziñd dze lozh ga, zigne nacle xtiidz me.

<sup>16</sup> Gotsaa gwi ne ganle, xtiidz miech, mine rsan zho par dien zha gac grë ncuane rap zho zeene laa zho guet, laga bii mban zho grieelod gacnon diidz co; <sup>17</sup> sinque haxta ret zho, dzigo laa diidz co racnon. <sup>18</sup> Scaque nagon, zeene psan Dios xtiidz me glo, gutgazh ma ne brieen ren bzhiee dzigora laa diidz co psilo gocnon. <sup>19</sup> Golgotsaa csoladz ganle, zeene blozh bnee Moisés lo menguietz zha nac diidz ne psan Dios ga, laa xchen ngon yeen, xchen chiv yeen ndxiembëzle notsa nis; dzigo bzoob me tib lë guits mëcwxii rna nizhnie tib guic bar, blozh ga, psëeb mew lo ren co blaal me ren co lo guits ne quia grë diidz co, ni blaal mew lad grëse miech co, <sup>20</sup> ni rëb me lo zho: "Laa ren rii bzhiee, zeena gacnan to desde nadzetaa laa diidz ne psan Dios lo to nu csilo gacnon, none gun to mine rnabeya." <sup>21</sup> Blozh ga, blaalaque me ren co gdipse len yadoo, ni blaal mew grëse lad ncuane racdziin len yadoo.

<sup>22</sup> Sca nagon nac ley co, grëse ncuane no guiaanmbe, ib ren sanmbew; scaque miech, haxta rzhiee xchen ma ne riogon dzigora riooglo lo xtoꞓ zho. <sup>23</sup> Minocxe waa, sca pxiee Moisés xchen ma biaannmbe yadoo co ni grë ncuane racdziin lena (nacse yadoo co zig zhimlë yadoo gbaa); sangue yadoo gbaa, ga pquiin ren ne mazdraa non lo xchen ma, ni lëë ren co goc xchen Jesús. <sup>24</sup> Zeene bzëeb Jesús zaatne Ndadoo güeynee me lo Dios por ne, güeyd me len yadoo ne bzaa miech, sinque len yadoo gbaa güey me; sac gon, nacse mine no lo guidzliu rii zig zhimlë mine no gbaa. <sup>25</sup> Grë pxoz nroob, gzob iz rie zho zaatne Ndadoo rienie zho xchen ma; sangue Jesús, xchenpaa me güeynie me, ni tibaque vuelt güeylogon me me. <sup>26</sup> Telne ye me niun zig run grëraa pxoz co, pe zhistaale vuelt na ziyet me wlal ne bre guidzliu, iper na, led yed me! Zeene laa dze bdziñ, laa me biaad, xchenpaa me bzhiee, ni tibaque vuelt bzhieew psanmbew ne lo doꞓ grëse ne ne nac ne miech. <sup>27</sup> Zigne biaann tibaque vuelt ret miech, lozh ga zeene laa Dios gun guielwxtis, laa zho none gacredz lo me; <sup>28</sup> scaquegaa tibaque vuelt gut Jesús bdiizh me xtoꞓ grëse miech; ni dzin ne guiaad me stib, per guiaatraa me par biire quizh me

xtoꞓ miech, sinque laa me guiaadsilaa grë zha ne quiambëzlo me, zeena gand zho grëtaa guielnë ne csi-aab Dios.

### Tibaque vuelt goc Jesús gon

**10** Grë mine rnabey ley run pxoz, lega nacsew zig tib zhimlë grëtaa mine been Jesús por ne. Horco niicle gzobse iz rienie grë miech co gon zigne rnabey ley, per brieeloda sanmbew zho lo doꞓ. <sup>2</sup> Tel niaca mine gon cose sanmbe zho, dzigo tibtaa vuelt ne niesan zhow lëë niaanmbele zho ga; niicle zhagaaw, niennpaa zho ne laa zho mbele. <sup>3</sup> Per na, gzobse iz zeene laa zho riesan gon co rsoladz zho ne bii no zho lo doꞓ, <sup>4</sup> sac gon, grieelod ne xchense ngon yeen, xchense chiv yeen guiaanmbe miech lo doꞓ.

<sup>5</sup> Minocxe waa, zeene laa Jesús biaad lo guidzliu, pe led znu rëb me lo Dios:

Grë xchen ma, grë ncuane riaadlogon zho lo luu, racladzdraa luuw;

gane bnabey luu goc naa miech, zial naa lo guidzliu.

<sup>6</sup> Grë ncuane rzëeg zho, grë ren ne rxiee zho, par guiaanmbe zho lo doꞓ; racladzdraa luu gan luuw.

<sup>7</sup> Gane niina, laa naa zial nu Dios, zeena gun naa mine gnabeytaa luu; zigne zhobnee lo Xtiidz luu gac naa.

<sup>8</sup> Gotsaa gwi ne ganle, blozhse rëb me racladzdraa Dios tso zho pe ncuane tsielogon zho lo me, tso zho cxiee zho xchen ma, gzëeg zho ma par guiaanmbe zho (niicle ne lo ley sca rnabey gun zho); <sup>9</sup> dzigo rëb me: "Dios, laa naa zial nu zeena gun naa mine gnabeytaa luu." Gase nagon rlu ptiche me diidz ne psan Dios ga glo, laa stib diidz cub ne biaannie Dios miech ga psilo noquiin. <sup>10</sup> Ni nligaa been me mine bnabey Dios, bdeed me me gut me lo cruz; ne sca nagon been me mine bnabey Dios, ga psanmbe me ne lo doꞓ. Tibaque vuelt sca goc me gon co, ni lëë psanmbele me ne ga.

<sup>11</sup> Grë pxoz, gzobse dze rio zho len yadoo rdziib zho grë gon ne riesan miech; blactaa iz tibaque sca nodziib zho grë gon co, per brieeloda sanmbew miech lo doꞓ; <sup>12</sup> sangue Jesús gon, tibaque vuelt bzhiee xchen me goc me gon psanmbe me miech lo doꞓ. Laa niina, cue Dios nëz derech ga zob me, <sup>13</sup> quiambëz me gdziñ dze zeene grëse zha ne rlëë ran me, laa zho guiaanwin lo me. <sup>14</sup> Tibaque gon ne bdeed me ga, psanmbegazh me grëse zha ne nodziñnie me lo Dios. <sup>15</sup> Ni nligaa scaw, haxta Espíritu Sant, zeene blozh bzeet me zha rëb Dios guiaanmie me zha Israel diidz stib, zha nis nis gacnan zho xley Dios, zig nac zeene haxta len zdoo zho, haxta len guic zho zhobneew; <sup>17</sup> dzigo bzeet me zeene znu rëb Dios: "Tel pe nactaa xquielntseeb zho, tel pe nactaa xtoꞓ zho, gdziñdraa dze ne csoladz naaw."

<sup>18</sup> Golgotsaa gwi ne sca ganle, rsoladzdraa Dios xtoꞓ ne sac laa Jesús bdiizhlew; gacxe waa, nodraa dzio ne dien pe gon ne gdeed ne par csanmbe me ne.

### None gbig ne lo Dios

<sup>19</sup> Bets, bzian, glo loxaque men ne nacse pxoz nroob rzëëb len yadoo zaatne Ndadoo ga; sangue niina, haxta zaatne Ndadoo len yadoo gbaa zrieelo gdziñ ne, sac xquizh xquieInzaac Jesús, bdeed me me bzhiee xchen me psanmbe me ne. <sup>20</sup> Zeene sca gut Jesús, rriequia tib nëz cub ga pxal me par gdziñ ne zaatne yгаа ne guieImban; lëë nëz co ga bzhial zeene sca briez lar ne quia len yadoo ga. <sup>21</sup> Ni ne me nac zhipxoz nroob ne no me yadoo gbaa, <sup>22</sup> niinasi zacle gdziñ ne haxta lo Dios. Nana sca, dib zdoos ne golgotsaa gbig ne lo Dios, dib zdoos ne golgotsaa gnalo ne me, benque laa me psanmbele ne lo grëtaa ncuane yozh ne rza zdoos ne, rza guic ne; rriequia bgaz me ne tib nis mbe.

<sup>23</sup> Tiblique sca golgotsaa gac ne, benque ndion ne ganle ible zdziñ dze ne gac mine rliladz ne; sac Dios psan diidz co, ni ndion ne rquidied me.

<sup>24</sup> Golgotsaa dzioxco ne cseedlsa ne gleyne ne zha ne nacgrë ne, ni dziuun ne ncuane yquiiin lo ne grë ne. <sup>25</sup> Dze ne nacle diidz ycaalsa ne dzioolnie ne Dios, ible none ycaalsa ne grëse ne, guionald ne mine run grë zha ne rozit. None cso ne diidz lo grë zha ne nacgrë ne, conley ne zdoos zho dziits so zho lo mine rliladz ne; xco co none dzio ne niina ne laa dze ne guiaad Jesús ziaadgaxle.

<sup>26</sup> Zha ne beenbeyle zha nac diidzli, ni lozh ga xtsiin-paa gunctal zho xtoI zho, tsodraa gon ne csanmbe zho lo doI co; <sup>27</sup> lëëtaa mine tsieguial zho nac guieInëdox ne yгаа zho zeene laa Dios gun guieIwxtis; dze co laa me cxeel zho lo guidox, zaatne nitlo grëraa zha ntseeb ne gocndaan lo me. <sup>28</sup> Gotsaa gwi ne ganle, niicxe ley ne na pcaania Moisés padzeela ga, zha ne rguits mine rnabeya, ni tel no chop tson zha ne gon ne nliw, niicle mazdraa mban rac zho ib rdedlaad zho rut zho zho.

<sup>29</sup> Nana, ¿pe lelgue zha ne dzigo quiits mine rnabey Jesús? Mazdraa gon nac guieInë ne yгаа zho, sac noguitnie zho xchen Jesús ga, rzhidznie zho Espiritu Sant ga sca gun zho. Noguitnie zho ren co, ni lëëw bzhiee biaanmbe zho lo doI, lëëw bzhiee zeene psan Dios stib xtiidz me zha gbig miech lo me; rzhidznie zho Espiritu Sant, ni men co no zhixco zho. <sup>30</sup> Zha ne sca gun, ible nroob guieInë ne yгаа zho; sac ndion ne ganle zha nac xDios ne, me znu rnee: "Naa raguial gun guieIwxtis; naa gded mine riegual tib tib miech." Ni zhobneeque lo Xtiidz me: "Grëse miech, lo me cueero zho grë ncuane been zho." <sup>31</sup> ¡Ne nligaa ncuane gdzieb ne ted grë zha ntseeb ne sca guiab ladznia Dios, men nguiamban!

<sup>32</sup> Sangue to, golsoladz ganle zha bded to zeene grin-paa psilo bnalo to Jesús, niicle ne scataa nroob guieInë ne gon to, per beenctalde to xtoI to. <sup>33</sup> Blactaa bdziitnie miech to, squi ndxie zha ne nowi laa zho nosacsi to; ni blactagaa gon to nosacsi zho zha ne nacgrë to. <sup>34</sup> Grë zha ne biab ladzguuib, mbanse rac zdoos to ran to zha rac zho; niicle zeene biaad zha ne biaadla grë ncuane nacchen to, psaan to ptiche zhow, peet güeyniedaque guic to; sac nanle to mazdraa nac

guieInzaac ne yгаа to gbaa, ni mincosi gdziñ dze ne nitlow. <sup>35</sup> Nana sca, scaque dziits gols; sac telne tibaque gnalo to Dios, ible zгаа to guieInzaac ne gneedz me. <sup>36</sup> Ible guiaand zdoos to, tibaque dziits gols-golgun mine rnabey me; zeena yгаа to grë ncuane bneele me gneedz me lo to. <sup>37</sup> Golsoladz ganle, znu zhobnee lo Xtiidz me:

Ible ile ziaad men ne nacle diidz guiaad ga, led nroob-draaw, laa me glansole.

<sup>38</sup> Grë zha ne zienal mine nac diidzli, ible zban zho sac rnalo zho naa;

laa telne guiaand zdoos zho sozit zho lo naa, ni lalnu gleynied naa zho.

<sup>39</sup> Sangue ne gon, nozozite ne lo Dios, sinque dib zdoos ne rnalo ne me. Grë zha ne sca rozit lo me, nëz ne nitlo zho ga zie zho; laa ne gon, ible zгаа ne tib guieImban ne gdziñ dze lozh, sacne znu dib zdoos ne rnalo ne me.

### Zhapaa nac ne dib zdoos ne gnalo ne Dios

**11** Znu nac ne dib zdoos ne gnalo ne Dios. Zha ne dib zdoos rnalo Dios, tiblique zienie guic zho ne ible zгаа zho mine quiambëz zho gdeed me lo zho; niicle ncuane gard gan zhow, per rzac zho zig nac zeene ranle zhow. <sup>2</sup> Zig nac grë xmenjol ne, ne scacxe waa bnalo zho Dios gane bleynie me zho.

<sup>3</sup> Scagaa niina, ne dib zdoos ne rnalo ne Dios, gane rliladz ne me bzaa guidzliu ni grëragaa ncuane no, zeene rnabey me biaaw, niicle ne peet guieIn hor co.

<sup>4</sup> Gotsaa gwi ne ganle lëë bla zhagol ne dib zdoos bnalo Dios nu:

Zig nac Abel, ne dib zdoos me bnalo me Dios, gane bleynie Dios gon ne bdeed me, lëdle gon ne bdeed bets me Caín. Ne sca bnalo me Dios, gane pcaania Dios me zig tib zha ne peet xtoId, ni pcaania Dios gon ne bdeed me ga; gacxe waa, haxta lo nadze, niicle ne gutle me, bii raquiet ganle pa lotaa dib zdoos me bnalo me Dios.

<sup>5</sup> Scaque Enoc, ne dib zdoos me bnalo me Dios, gane gute me, zomban me zeynie Dios me gbaa, choot gon-draa me. Zeene bii zomban me lo guidzliu, blu Dios ne rdziladz Dios zha mban me. <sup>6</sup> Sac zha ne rnalod Dios dib zdoos, grieelod gban zho zigne rdziladz Dios. Zha ne racladz gbig zho lo Dios, none dib zdoos zho gliladz zho ne nli no me, ni gliladz zho ne nli rcaania me zha ne nlipaa rio liaadz rbig lo me.

<sup>7</sup> Zig nac Noé, ne dib zdoos me bnalo me Dios, gane bliladz me xtiidz Dios zeene rëb Dios lo me pe nac ncuane ziaadyob gac; bin me diidz bzaa me tib barcw nroob, ni len barcw co bio me gza xpëed me ni tsiel me, blaa zho lo guieInë co. Ni ne sca bnalo me Dios, gane ible zгаа me grë mine gdeed Dios lo grë zha ne biaanmbele lo Dios; laa grë zha ntseeb co, ib bnalod zho Dios, gane sca britlo zho.

<sup>8</sup> Zig nac Abraham, ne dib zdoos me bnalo me Dios, gane zeene bredz Dios me ycaania me zaatne gdeed Dios lo me, binga me diidz briez me zie me, niicle ne nand me zha nac dan co. <sup>9</sup> Ni ne sca rnalo me Dios,

gane niicle bdziñ me lo liu co, laa me wbanse ga zig tib meñzit. Lega nacse leñ grë yu mantiad bio me grop me Isaac, scaquegaa Jacob; sac ye grop zha co biaan diidz naccheñ liu co. <sup>10</sup> Scase bio Abraham ga, sac nanpaa me no tib guiedz ndzon ne bzaa Dios, ni ga nac zaatne gdeed Dios gdziñ me.

<sup>11</sup> Scaque Sar, wnaa ne goc tsiel Abraham, ne dib zdoo me bnalo me Dios gane gop me mëed, niicle ne nacd me wnaa ne gap mëed, ni lala gol-le me; laa me gop win, sac zeene rëb Dios lo me laa me yquianie win, dib zdoo me bliladz me ible zuñ Dios miñe bnee me ga. <sup>12</sup> Ye Abraham, meñgol-le me, meñ ne yquianiedraa mëed nac me, ni zeene laa Sar gop mëed co, miech guizhiu ne brieequia lo dii co; pale mel ne ndziib gbaa, yuzh ne ndxieggaa ro nisdoo.

<sup>13</sup> Gza zha ne blozh goquiet nu, gardaque yгаа zho grë miñe bnee Dios gdeed me lo zho, laa zho gut; zeene bii zomban zho lo guidzliu rii, dib zdoo zho bnalo zho me gane bliladz zho ne ible zgaa zhow, rzac zho zig nac zeene ranle zhow. Bien zho ne tib ziaadtedse zho lo guidzliu rii, nacse zho zig tib meñzit. <sup>14</sup> Ni ne sca bien zho tib ziaadtedse zho lo guidzliu rii, ga rlu ne dzigoraa gdziñ zho zaatne gacpaa ladz zho. <sup>15</sup> Sac telne niend zho ne scaw, znuse mbire zho ney zho zaatne brieed zho ga. <sup>16</sup> Tibaque laa guic zho güeynie ne ib zdziñ zho zaatne gacpaa ladz zho gbaa; gacxe waa, rtoladzd Dios ne nac me Dios ne riladz zho, laa me bzhixcuaale guiedz ne gac ladz zho ga.

<sup>17</sup> Zeene been Dios Abraham prueb dieñ pe nli rnalo Abraham me, rëb me cogon Abraham xpëed Abraham Isaac; ne dib zdoo Abraham rnalo me Dios gane niicle tibaque mëed ga lo me, per bleeladz me mëed co, laa me niutle win niac win gon. <sup>18</sup> Ni laa xtiidz Dios nac ne win guñctal lo xti me! <sup>19</sup> Laa me niut win, sac nanpaa ne nroob poder ne rap Dios, telne niet win nrieelo mbeeban Dios win; ni nligaa rrieequia gut win ga ni bire brieeban win stib.

<sup>20</sup> Niiclegaa Isaac, ne dib zdoo me bnalo me Dios, gane zeene bnab me guñlay Dios grop xpëed me, Jacob ni Esaú, bzeet me zha gac lo xquielmban zho.

<sup>21</sup> Scaque Jacob, ne dib zdoo me bnalo me Dios, gane niicle laa me nole guet me bnab me guñlay Dios grop xpëedbgui José, bzeet me zha guñlay Dios zho; meñgol-le nac me, yagale zhoob me per tibaque rleynie me Dios.

<sup>22</sup> Scaque José, ne dib zdoo me bnalo me Dios, gane zeene laa me merle guet bzeet me ne ib zdziñ dze grieed zha Israel Egipt; haxta psañ me diidz güey zho xtsit me zeene laa zho grieed ga.

<sup>23</sup> Zig nac pxoz Moisés, xniaa Moisés, ne dib zdoo me bnalo me Dios, gane bloolan me mëed niow yeen co lidz me tson mëe; ib bdziebd me miñe bnabey rey Egipt.

<sup>24</sup> Niiclegaa Moisés, ne dib zdoo me bnalo me Dios, gane zeene laa me broob bdeetraa me diidz niunbey zho me zig xpëedmiag rey; <sup>25</sup> laa ne niaan me lidz rey nleynie me grë ncuane niunctal xtoñ me, mazd bleeladz me me psacsi zho me grë meñladz me. <sup>26</sup> Bien me

ne nonguielraaw ted me guielnë zig pteed zho Jesús, lëdle niaanne me grë ncuane non ne no Egipt; sacne miñe mazdraa nonie guic me nac guielnzaac ne gdeed Dios lo me.

<sup>27</sup> Ne sca rnalo me Dios, gane bdziebd me xquieldox rey, tiblque been me guic me brieed me Egipt; sac nanpaa me niicle ranle me Dios, per Dios nacie me. <sup>28</sup> Ne scaque rnalo me Dios, gane bnabey me been zha Israel Ini Pascw, ni bnabey me bdiaab xchen carner yeen grëse ro lidz zho, zeena guete xpëed glo zho wdze co.

<sup>29</sup> Grë zha Israel co, ne dib zdoo zho bnalo zho Dios gane wbiig lo Nisdoo Nizhnie, bzhal tib nëz mbidz bded zho; laa zeene gocladz grë xmenguiib rey Egipt nded zho, znuse bdzieel lo nisdoo co stib, grëse zho gut.

<sup>30</sup> Ne scaque dib zdoo zho bnalo zho Dios, gane bliaal biez nroob ne ndze igo guiedz Jericó, zeene bza gadz ngbidz noyecw zho igo biez co.

<sup>31</sup> Zig nac Rahab, wnaa ro nëz ne bio guiedz Jericó, ne dib zdoo me bnalo me Dios, gane peet gocd me dze ne bnitlo grëse meñladz me, sacne bnalod zho Dios; me ga bdeed zaatne blëz zha ne glole pxeel zha Israel güey wleets ga.

<sup>32</sup> Ni noragaa zha ne sca dib zdoo bnalo Dios, haxta tiemple ygaad gzet naa zho. Zig nac Gedeón, zig nac Barac, Sansón, Jefté, zig nac David, zig nac Samuel, ni grëragaa zha ne biadteed xtiidz Dios lo miech. <sup>33</sup> Ne sca dib zdoo zho bnalo zho Dios, no zho beencheñ grë guiedz nroob, no zho bnabey grë guiedz zigne nonguiela, no zho gonlo grë miñe bzeet Dios gdeed me lo zho, no zho role meedz bdedlaa zho; <sup>34</sup> no zho lo beldox bio zho ni peet gocd zho, no zho lo spadle bdedlaa zho, no zho gzhe gzhele rac zho per bdaan zho; no zho biablolë lo diñ ni biire pcaa zho fuerz stib, haxta beñcxoon zho zha zit ne nodilnie zho. <sup>35</sup> Grë meñ wnaa, no zho gonlo brieeban meñlidz zho.

Nzian grë zha ne sca bnalo Dios, no zho psacsixuu miech zho, per ib bdeete zho diidz niun zho miñe racladz miech, mazd bleeladz zho zho beet miech zho; sac nanle zho mazdraa ndzon guielmban ne yгаа zho zeene laa zho grieeban. <sup>36</sup> Nogaa zho bgaa beennguzee miech zho, bdiñ zho zho, bzoob zho zho lo caden, ni bloo zho zho ladzguiib; <sup>37</sup> no zho bdeedquie miech zho haxta gut zho, no zho bgaa bloosierr miech zho, no zho bgaa gut zho lo spad. Nogaa zho mbanse rac, pquianguzhoon zho lo miech, nëzrii nëzrec zie zho, mbanse rac zho guieñd pe gow zho, guieñd xab zho, tib lëse guid mëcwxiiil, tib lëse guid chiv nrieñ zho. <sup>38</sup> Miech wen nac zho, ni rieguiald grë miech guidzliu rii guiaadban zha co lo zho, per scataa bded zho. Niapse grë dan bidz, grë dan gui, bio zho; zaatne blëz zho grë leñ blë, zaatne blëz zho grë leñ blee.

<sup>39</sup> Ni gogacnan ganle, niicle nli biannziuu zho lo Dios ne sca dib zdoo zho bnalo zho me, per gardaque yгаа zho guielnzaac ne psañ me diidz ga yгаа zho; <sup>40</sup> sacne laa Dios racladz tipse ygaanie ne zho guielnzaac ne psanle me diidz gneedz me lo ne niina, sac miñ co nac miñe mazdraa nroob.

### Choot gbiched lo Jesús

**12** Nziandox grè zha ne sca dib zdoos bñalo Dios. Ni niina, grèse zha co laa zho ndxiwii lo ne; sac rrieequia tib lo prueb no ne noquiaa ne corr. Gacxe waa, golgotsaa csaan grè ncuuañe ruñctal xtoł ne, zeena ycadraaw parne grieelo tiblique dzio ne nöz gdziñ ne zaatne no gdziñ ne. <sup>2</sup> Tibaque golgotsaa guionie guic ne laa ne gdziñ lo Jesús ga, meñ ne zo lo ne grèse ne ne rñalo ne Dios, ni me lozh gzodziits ne. Teł me gon, niicle ne nroob psacsi miech me, haxta lo cruz pquiaa zho me, per tibaque güeynie guic me nroobraa nac guiełbley ne gan me zeene lozh ga. Ncuuañe mbeeguiełto ga zeene sca quia me lo cruz, per ptoladz me.

Ni nligaa, zig nac niina cue Dios nöz derech ga zob me gbaa.

<sup>3</sup> Golguien sca, zeene racmban zdoos to, zeene racladz guiaa zdoos to, ib gdeete to diidz; golsoladz ganle, zha pxcw Jesús bded me grètaa miñe pteed grè miech ngoopdoł co me. <sup>4</sup> Parga nli, nē noded to noxco to guñctalde to xtoł to, per gard guiab ne ygaa to ne gut miech to. <sup>5</sup> Golsoladz ganle zha rnee Dios lo grè zha ne nac xpèed me. Znu raquiet lo Xtiidz me, zaatne rnee:

Xin, zeene rso Dios diidz lo luu guñdraa luu grè ncuuañe nonguiełd, none sac zdoos luuw;

niicle zeene gactoxgaa me lo luu, gacmband luu.

<sup>6</sup> Sac gon zha ne sca rso me diidz lo, ga rlu ne rleynie me zho;

zha ne ractoxgaa me lo, ga rlu ne nli xpèed me nac zho.

<sup>7</sup> Golguien sca, gacmbande to teł pe caxtigw ne cteed Dios to. Golgan ganle, niicxe miech na, ractox zho lo xpèed zho zeene rond win diidz. <sup>8</sup> Nana, teł ib peet glisquidgaa me lo to, gase dzigo rlu ne led xpèete me nac to; sac gon, zha ne nac xpèed me, rlisqui me zeene rond zho xtiidz me. <sup>9</sup> Golsoladz ganle, zeene rac ne mèedlas rlisqui pxoz ne zeene rdziuuñ ne ncuuañe nonguiełd; scagaa ne, rien ne ne me rnabey lo ne. Nana, ¿pe leł Pxoz ne dzigo meñ ne zob gbaa gnabeyd me ne? Ni none gon dzion ne xtiidz me, zeena ygaa ne guiełmban. <sup>10</sup> Gotsaa gwi ne ganle, zig nac pxoz ne, rquia me rlisqui me zeene rdziuuñ ne ncuuañe nonguiełd, sac racladz me zaacse gban ne, ni chop tsonaque dze nac lo guiełmban rii; sañgue Dios gon, laa me noseed ne par gac ne tib miech mbe zdoos, zig me; ni lèe miñ co nonraa. <sup>11</sup> Parga nli, tsod zha ne gley zeene noded zho caxtigw, sinque nē rzac zhow; per zeene rded ga, zha ne rienpaa rquiina haxta wen riaan zdoos zho, sac rseed zho zaacse rban zho.

### Nodne gbiche miech lo Dios

<sup>12</sup> Nana sca, tełne bdzagle to, golgun ndip nia to, golgun ndip ni to stib, <sup>13</sup> zaacse golsè, tib nöz gołtso zeena gziaabnèzde to; dzigo scagaa zrieelo gacnie to zha ne lega noyobe.

<sup>14</sup> Gołtsoxco niowse golbannie samiech to, ib guñctalde to xtoł to; sac zha ne mbed zdoos, grieelod gdziñ zho lo Dios. <sup>15</sup> Tibaque golteedlolsa zha ne nacgrè to, golguien ganle racladz Dios gacnie me to, napaa na leł nozozit to lo me. Sac zha ne rzozit lo Dios, zeene laa miñe nac zho rzhooñeñ, nzian zdoos zha ne rsañ zho, rlozh ga grèse zha co ruñctal xtoł. <sup>16</sup> Ib guñde to grè ncuuañe tsod zdoos Dios, ib quitniede to guiełnzaac ne bneedz Dios lo to; guñde to zigne beñ Esaú, teł Esaú, por tib plat nis scuaan psaan me guiełnzaac ne bgaa me ne nac me mèedglo; <sup>17</sup> ni nanwen to ganle, zeene laa me gocladz nab pxoz me niunlay Dios me zig mèedglo, brieelodraaw. Dzigoraa rquia zdoos me, haxta roon me rnab me ygaa me guiełnzaac co stib, per pe xtsiñraaw.

<sup>18</sup> ¡Golguien sca ganle, nroob nac guiełnzaac ne bneedz Dios lo to niina! Led yede to ndziñ pa tib cho gui, zig bdziñ xmeñgol to cho Gui Sinaí padzeela. Grè xmeñgol to, zeene ndxie zho zhan Gui Sinaí, beldox ne gon zho rso guic gui co, ni goc tib ncw, lala rio bi ratisie nguzi ni rriee me; <sup>19</sup> ni lala nguiedz rcuedz trompet, ni nguiedz zèeb tsi Dios rnee me lo zho. Zeene gon zho scataa nguiedz rnee me, bdzieb zho; dzigo bnab zho lo me gneedraa me. <sup>20</sup> Bdzieb zho bin zho rëb me, zha ne tsep cho gui co none gdeedquie zho zho, gliz lanzgaa zho zho haxta guet zho; scaque grè ma.

<sup>21</sup> Ncuuañe gdziebdoo ne gon zho ga; haxta Moisés rzhidz lo dzeb co.

<sup>22</sup> Sangue to, rrieequia haxta Jerusalén, zaatne no Dios nguiamban gbaa bdziñ to, zaatne ndxie grè anjl guizhiu ne roolnie Dios; <sup>23</sup> zaatne ndxie grè zha ne gloopaa bzèeb xnèz me, grè zha ne zhooble lè gbaa ga. Laa to bdziñle lo Dios, meñ ne ruñ guiełwxtis; zaatne ndxie grè zha ne psanmbe Dios biaa zho zig tib zha ne peet xtołd. <sup>24</sup> Laa to bdziñle lo Jesús, meñ ne rdziñnie miech lo Dios niina ne laa Dios psan stib xtiidz me; laa to bdziñle zaatne rrieequia bliaał xchen Jesús len yadoo gbaa, lèe ren co mazdraa non lèdle xchen Abel.

<sup>25</sup> Miñ co nagon, golguien golgun miñe rnabey Dios to. Golsoladz ganle, zha britlo grè zhagol ne sca ib bind xtiidz me, ni tib miechse pteed xtiidz me lo zho. ¿Pe leł na dzigo ne mezhal quianee lo ne? Ib diedlaad ne gon tełne dziond ne miñe rnabey me. <sup>26</sup> Zeene bnee me lo grè zhagol co, haxta beñcxidz me guidzliu, ni rnee me: "Zbire naa guñcxidz naa guidzliu stib, haxta ye gbaa guñcxidz naa." <sup>27</sup> Gase na ganle rlu, lo grèse ncuuañe bzaa me dzziñ ne laa me csiniw, dzigo laaw nitlo; lozh ga, guiaa miñe gdziñdraa dze nitlo; <sup>28</sup> ni ga nagon gneedz me gbiaaz ne. Gacxe waa, golgotsaa dziiuuñ ne miñe rnabey me, golgotsaa gdeed ne xquizh lo me, guien ne meñ nroob nac me; ni scagaa me zley me. <sup>29</sup> Golguien ganle, teł me ne nac me Dios ne riladz ne, nac me zig nac tib beldox ne peet rdedlaad lo.

### Golban zigne racladz Dios

**13** Bets, bzian, golleynie grè zha ne nacgrè to, golguien ganle tibaque meñ ne nac Pxoz to.

<sup>2</sup> Go|deed zaatne cuëz grë menzit ne zo nëz. Blac zha ne sca bdeed lidz blëz zha ne zo nëz, no hor biend zho haxta xanj| Dios blëz lidz zho. <sup>3</sup> Go|tsiegan grë zha ne niogyu ladzguiib, go|tso xliaadz zho zig nac zeene ye to nogrë zho ga. Go|gacnie grë zha ne nosacsi miech, nanle to ganle zha rzac ne zeene no ne tib lo guie|në.

<sup>4</sup> To ne nac to zha ne ptsieelniale, sacde to guie|tsieel zig beelze pe wguib, ib yquidiede to tsieel to; sac zha ne yquiangob tib zha ne nonguiel|d tsonie zho o yquiangobgaa zho tib zha ne nole tsieel, ib tedsod zunquizh Dios zho do| co.

<sup>5</sup> Tsienal|de to loxaque dien zha gunlo to dimi; sinque gol|ley totsaque no miñe yquiin to. Go|soladz ganle, led znu rnee Dios lo ne: "Tibaque gacnie naa to, ib csaand naa to." <sup>6</sup> Gacxe waa, nod pe nacne ctseb zhgab ne, none tibaque dzionie guic ne dzieets ne:

Dios nac men ne nacnie naa, ¿pe nac nadien gdzieeb naa?

¡Peet grielod gun miech naa!

<sup>7</sup> Go|soladz zha goc men ne bzo lo to pseed to Xtiidz Dios, ni dib zdoo to go|nalo Dios zigne bnalo me Dios.

<sup>8</sup> Go|guien ganle, gdziñd dze ne gdzëë Jesús, zigne goc me padzeela, scaque nac me niina, ni scaquegaa gac me grëtaa len iz ne guiaadraa. <sup>9</sup> Ib gliladzde to grë wseed ne ziaadnie stib miech sca, wseed ne ni nacdraa Xtiidz Jesús. Diosse nac men ne lozh gzodziits ne lo miñe riladz ne; nacda por tsienal| to dien pe gow to, pegaa gowde to; sac zha ne zienal| miñ co, paat yquinda lo zho. <sup>10</sup> Grëse zha ne guiab tsienal| miñe rnabey ley parne ycaania Dios zho, tib ladle rsan zho miñe been Jesús ga. Rriequia no tib lo pcoog, ni nese zrieelo yquiin gon ne ndziib lo co; laa grë pxoz ne zienal| miñe rnabey ley, grielod yquiin zho gon co.

<sup>11</sup> Glo, zeene ret ma ne riogon lo Dios, rlozhse rielaal| pxoz nroob xchen ma zaatne Ndadoo parne guiooglo lo xto| men|guiedz, dzigo rienie zho xcuerp ma ro guiedz, ga rzëëg zhow. <sup>12</sup> Scaque Jesús, zeene bzhiee xchen me psan|mbe me miech lo do|; ro guiedz ga güeysacsi zho me gut me. <sup>13</sup> Scagaa ne niina, gol|gotsaa grieë ne lo grë ncuaañe lo guidzliu rii, gol|gotsaa cueeladz ne ne guional| ne zhits Jesús dzian| ne grë guie|në, tel|ne no dzian| new. <sup>14</sup> Ben|que ndion| ne ganle,

nacd lo guidzliu rii zaatne gbiaazpaa ne, sinque laa ne zional| ygaa ne zaatne naraa gneedz Dios gbiaaz ne.

<sup>15</sup> Laa ne ndionle ganle, Jesús nac men ne gunctsin| ne lo Dios; gacxe waa, gol|gotsaa gleynie ne Dios, gol|gotsaa gdeed ne xquizh lo me. Lëë miñ co gac zig tib gon ne gdeed ne lo me. <sup>16</sup> Go|tsoxco gol|gun grë ncuaañe yquiin lo samiech to, ncuaañe rgaa lo to, go|deed palala lo grë zha ne guieñd pe yquiin; sac rriequia lëë stib gon ga gdeed to lo Dios, ni miñcogaa rleynie me.

<sup>17</sup> Go|gon xtiidz zha ne zo lo to noseed to Xtiidz Dios, gol|guien zha rnabey lo to, sac gon zha quianap to ni zha gdeed cuent lo Dios zha pquianap zho to. None gon to xtiidz zho, zeena ine gley zho yquiaanap zho to; sac gon, tel|ne le| nogoguiel|në to zho, lëda ga gun to.

<sup>18</sup> Go|nab lo Dios gacnieñ me no tibaque znu dzioxco no dzuun no miñe racladz me, me nan ganle mbe zdoo no, mbe quie|rien no. <sup>19</sup> Ni miñe rsopaa naa didz lo to, go|soladz go|nab lo Dios gneedz me diidz gbi-ire guial|niob naa i, guial|gan naa to.

<sup>20</sup> Jesús nac men ne quianappaa ne, zig rquianap baxto xpëcwxii|l zho; me gut bzhiee xchen me zeene psan| Dios diidz stib zha gdziñ miech lo me; ni diidz cosi gdziñdraa dze ne gdzëëw.

Dios men ne bleeban Jesús, men ne racnieñ miech peet zhgab rtsebd zho, <sup>21</sup> me gneedz guie|biini lo to grieeo to gun to miñe rnabey me. Jesús sca go|nalo, zeena grieeo gban to zigne rdziladz Dios. Dios nac men ne rieguial| dzuunnon ne, zigtaa niinaw, zigtagaa grëraa len izdoo ne guiaada. Scaw nagon.

<sup>22</sup> Bets, bzian, laa naa rnab lo to ib glëëd guic to, gol|caania palalse diidz ne pso naa lo to nu.

<sup>23</sup> Racladz naa gacnan| to ganle, laa bets ne Timoté briele ladzguiib; tel|ne zlansonio|b me lo naa nu, grop no me guiaad lo to i.

<sup>24</sup> Go|siguie| go|deed tib zhibdiuzh naa lo grë zha ne zo lo to i, ni lo grëragaa zha ne nacgrë to ngab to lo Dios. Ye grë zha ne no nëz Italia nu, laa zho rxeel| zhibdiuzh zho lo to.

<sup>25</sup> Guiaa|ñnie Dios to sca. Me glu ganle pa lotaa noxco me to.

# SANTIAGO

¡Diuzh to grëse to!

**1** Naa nac Santiagw, tib zha ne quiayun xtsiin Dios, tib zha ne quiayun xtsiin Jesús, men ndzon ne rnabey. Laa naa rquiaabdiuzh to grëse to ne nac to zha ne ziaad lo xtii Israel, tel pa lotaa nac guidzliu ne no to.

<sup>2</sup> Bets, bzian, ndal ncuane rded ne parne glu dien pe nli dib zdo ne rnalo ne Dios. Tel pe nactaa ncuane noded to i, ib gacbande to, sinque golley.

<sup>3</sup> Sac gon, zeene squi ran ne gre pe guieñe, ga rseed ne tibiladz rac ne tel petaa noded ne. <sup>4</sup> Golseed sca tibiladz golgac. ¡Ib guiaand zdo to tel petaa nac guieñe ne gan to! Sac zeene sca cseed to gan to guieñe, zac to tib zha ne dziits so lo Xtiidz Dios, tib zha ndzinli, tib zha ne ib peet gdiebd.

<sup>5</sup> Zha ne racladz yгаа guieñiini co, zac gnab zhow lo Dios, ni mesi gon zdeed mew; sac guieñiini ne gnabta ne lo me zneedz mew. Led yed me yca, led yed me glisqui pe nacte pe gnab ne lo me. <sup>6</sup> Lëëraasi dib zdo ne none gnab new, nodne gacchop guic ne; sac zha ne racchop guic, gdziind dze yгаа zho mine rnab zho. Nac zho, tib dze dib zdo zho riladz zho zгаа zho mine rnab zho, stibгаа dze na riladzdraa zhow, ib ractiblid guic zho; masaque nac zho zig nac gre mtsiin ne rbib lo nisdoo, sac tel mtsiin co loxaque nëzrii nëzrec zienie mew.

<sup>9</sup> No zha bets ne, zha bzian ne, quianied zho ncuane yquiin zho, par miech peet nond zho; per none gon ine gley zho sac nroob non zho lo Dios. <sup>10</sup> Scagaa zha ne rapchen, none ine gley zho niina ne biaanwin zho, sac nëz lo Dios gre ncuane rap zho nonda. None guien zho niicle ne nroob rapchen zho, zeene laa zho gbi lo guidzliu rii nuque guiaan gre ncuane rap zho. Masaque nacse zho zig nac guieñe gre guizh ye, tel guiee cow, zhixtsëëse ngbidz rcuiidz guizh ne zoba lo, rlozh ga rliaalgaw, gataa rnitlo xquieñiowa.

<sup>12</sup> Dichos zha ne ib rzozite lo Dios niicle no nzian ncuane rcheep zho gunctal zho xtoj zho, per rund zhow; sac zha cosi zгаа zho tib guieñman ne gdziind dze lozh, guieñman ne bneele Dios gdeed me lo grëse zha ne rleynie me. <sup>13</sup> Zeene sca no ncuane rcheep ne gunctal ne xtoj ne, guiabd ne togo Dios noquill ne gun new; sac gon led yed Dios rzoobladz ncuane ndzinlid, ni niicle rquiildgaa me miech gun zhow. <sup>14</sup> Gre ncuane ndzinlid ne rzoobladz ne, gre ncuane yozh ne rionie guic ne, min co nac mine rquill ne. Lëew nac mine rcheep ne runctal ne xtoj ne, ni ndionle ne ganle, lëe gdib mine gdeed doj lo miech nac guieñnedox ne yгаа zho.

<sup>16</sup> Bets, bzian, gac-wete to sca. <sup>17</sup> Golguieñ ganle, ncuane rquiin, ncuane ndzinli, min co nac mine rneedz Dios. Tibaque nac me, led yed me rdzëe par guiab ne meque rnabey rac guieñntseeb. Me nac tib biini ne gdziind dze guiuu, ni tib lë guieñcow guieñd zatne no me. <sup>18</sup> Zdo me gola bneedz me tib guieñmban ndzon lo ne niina ne laa bliladz Xtiidz me, masaque rreequia ne nac mëedglo lo me.

## Nacda yquiaadiagse miech Xtiidz Dios

<sup>19</sup> Bets, bzian, ne nac to zha ne rleynie naa: Golgan ganle, ne ne nac ne zha ne no xnëz Dios, none dzioxcoraa ne yquiaadiag ne, zeene gnee ne none guien ne pa lotaa gnee ne, ni gun d ne ne rnadse pew laa ne glëele. <sup>20</sup> Sac gon, zeene rlëe ne, grieelod gun ne ncuane rdziladz Dios. <sup>21</sup> Golguieñ sca, golsaan grëtaa ncuane ndzinlid ne ziyun to, golbiche lo gre guieñntseeb ne znutaa quiayac niina. Ine ndooladz golgac, golleynie Xtiidz Dios, diidz ndzon ne pseedle to; sac gon lëew rlu zha laa to lo doj.

<sup>22</sup> Per guiabde to togo loxaque yquiaadiagse to Xtiidz Dios lëelew ga; sinque ib none gban to mine rquiaadiag to, sac tel ib gbande tow lëëque to noquidie to ga. <sup>23</sup> Sac zha ne rquiaadiag Xtiidz Dios, ni rband zhow, rzac zho zig rzac ne zeene rwi ne lo ne lo quiewan: <sup>24</sup> Sac zeene nowi ne lo quiewan, hor cose ran ne zha rac ne; zeene laa ne rbiche low rsoladzdraa ne zha rac lo ne. <sup>25</sup> Sangue zha ne rquiaadiag Diidz Ndzon ne rlu zha laa miech ga, ni zigne rquiaadiagse zhow scasaque rioxco zho rban zhow, zha cosi ib zunlay Dios zho lo grëtaa ncuane gun zho.

<sup>26</sup> Gaxe waa, zha ne rnee xnëz Dios no zho ni rgobeyd zho pe rnee zho, lëëque zha noquidie zho ga, ga rlu nlid zienal zho mine rnabey Dios.

<sup>27</sup> Sac gon, par Dios men ne nac Pxoz ne, zha ne no xnëz me none tsie zho tsiegun zho xyudar gre mëed-bziab, tsiegun zho xyudar gre wnaa ne ret tsieel, ni tsoxco zho zaacse gban zho, ib tsienald zho ncuane ndzinlid ne run grëraa miech.

## Lëda ga run zha ne rbe

**2** Bets, bzian, gunde to ne ncuane lo miech ne gnee to, sac zha ne sca run, zha dien guiab zho xnëz Jesús no zho. <sup>2</sup> Ron naa, zeene rlanso tib zha ricw zaatne rcaalsa to i, nacw zho xab niazh zho, no gre xnil or zho nia zho, lëelëd rio to dien pa lo wenraa sob zho; laa zeene rlanso tib zha mban beelze nac xab yeen, rnee to lo zho: "Ise bzo, telne racladzгаа luu sob luu,

lo liuse i bzob.”<sup>4</sup> ¿Pe sca na rac zha ne no xnëz Jesús? Zha ne gon sca run, ga rlu zho niapse guieIntseeb no guic zho.

<sup>5</sup> Lëda ga gon bets, lëda ga gon bzian. Golgacnan ganle, ible Dios ble miech ne peet rapd lo guidzliu rii, zeena dib zdoo zho gnalo zho me, zeena ygaa zho zaatne bneelee me gdeed me cuëz zha ne noxco rleynie me. Gotsaa gwi ne sca ganle, zha ricw nac zho nëz lo Dios; <sup>6</sup> laa to gon, no to rlozhd gzhidznie to zho. ¿Pe ib riende to, grë zha ricw co nac zha ne rsacsi to? Rgobniu zho to, riezto zho to lo wxtis; <sup>7</sup> haxta rdzibdee zho Jesús, men ndzon ne nacie to niina.

<sup>8</sup> Ib none gban ne zigne rnabey Xley Dios, lo xley me zhobnee: “Bleynie samiech luu, zigne rleynie luu luu.”<sup>9</sup> Golguien gon, dol i noyuh to squi rbe to dien cho nac zha ricw, chogaa nac zha mban; sac Xley Dios i quiaguiits to. <sup>10</sup> Golgacnan ganle, zha ne rguuits tibaque xley Dios, niicle maase ziana zho grëraaw, laa zho beenctal-le xto zho ga, rzacaque zho zig zha ne noguiits grëw. <sup>11</sup> Sac tibaque men ne psana grësew. Gacxe waa, tel zha ne ziana miñe rnee: “Gute luu samiech luu”, per rguuits zho miñe rnee: “Yquiangobd luu zha ne led tsieeld luu”, laa zho beenctal-le xto zho ga. <sup>12</sup> Niowse sca gulgac, niicle zeene neegaa tow, niowse golnee; sac gon, dzin dze cxobdol ne dien pe wban ne zigne rnabey Jesús, te wband new ye. <sup>13</sup> Grë zha ne ni lalnu rquiad zdoo samiech, gal dze co scaque ni lalnu yquiad zdoo Dios zho; sangue zha ne rquia zdoo samiech, ible zdedlaa zho lo guieInëdox ne cxeel me.

### Zha ne rnalo Dios none glu zhow

<sup>14</sup> Bets, bzian, zpa dien rquiiin guiab ne dib zdoo ne rnalo ne Dios, xnëz me no ne, ni tel rund ne xyudar samiech ne? ¿Niacxe scase laa Dios csilaale ne?

<sup>15</sup> Gzoob ne no zha ne nacgrë to i, yase tib bets tow, tib bziangaa tow, ranlo to guieñd xab zho, niicle quianied zho ncuaane gow zho; <sup>16</sup> ni guiab to lo zho: “Csacsid luu luu, got xabnal luu, dow ncuaane racladz luu”, per loxaque diidz sca guiab to, ni gdeete to ncuaane run falt lo zho. ¿Pa dien yquiiin diidz co? <sup>17</sup> Scadaa nagon paat rquiinda guiab ne rnalo ne Dios, ni tel rund ne miñe rieguial ne gun ne. <sup>18</sup> Gacxe waa, zha ne rnalo Dios ni run zho miñe rieguial zho, no zho gnë lëda i run zha ne rnee lëlew ga totsaque gnalo ne Dios. Ni rap zho rson, sac grieelod glu ne rnalo ne me, telne rund ne miñe rieguial ne.

<sup>19</sup> Nli wena run zha ne rliladz tibaque Dios no, per grieelod guiab zho lëlew ga, sac gon zig nac menodox ye ma rliladz tibaque Dios no, per led por mincod laa ma lo guieInë ne cxeel me, sinque haxta rdzieb ma me. <sup>20</sup> Nadzpaax nzen zha ne sca rzac, pe ni lalnu rien zho paat rquiinda guiab zho rliladz zho Dios ni telne rund zho miñe rieguial zho. <sup>21</sup> Golgan ganle, zig nac pxozgol ne Abraham, porne been me miñe rieguial me gane pcaania Dios me zig tib zha ne peet xto. Led rso-ladz to ganle, zeene rëb Dios lo me tsielogon me xpëed me, güey me zaatne pxeel Dios me. <sup>22</sup> Gotsaa

gwi ne ganle, zeene been Abraham miñe rnabey Dios me ga, ga blu ne nli rnalo me Dios, ni hor co mazdraa dib zdoo me bnalo me Dios. <sup>23</sup> Lo Xtiidz Dios zhobnee ne scataa dib zdoo Abraham bnalo me Dios, gane pcaania Dios me zig tib zha ne peet xto; zëeb diidz, tib zha ndzieeldiiz Dios goc me.

<sup>24</sup> Golgacnan sca ganle, led loxaque gliladzse miech Dios, laa me ycaaniale zho; sinque none glu zho nli rliladz zho me, gun zho miñe rnabey me zho. <sup>25</sup> Golso-ladz ganle, scaque wnaa rëz ne brieelë Rahab, por been me xyudar samiech me, gane pcaania Dios me zig tib zha ne peet xto; sac zeene gon me noxtseeb zha ne pxeel Josué zie wleets ga, bdeed me zaatne bilolan zho, ni blu me stib nëz ne wbire zho, bgaad zho. <sup>26</sup> Gase na ganle rlu, paat rquiinda guiab ne rliladz ne Dios ni tel rund ne miñe rieguial ne, nacse ne dzigo zho tib xcuerp ngutoo, tel cuerp cow, zpa dien yquiiina?

### Ncuaane run ludz miech

**3** Bets, bzian, guiabde to lega tso to glisqui to ncuaane run stib miech, sac tsod zha ne demaste wen lo guidzliu rii. Zha ne sca run, rzac zho zha so cseed zho miech, per gacnan zho ganle zha ne rseed miech, mazdraa nroob ncuaane tsasqui lo zho gal dze ne laa zho gacredz lo Dios.

<sup>2</sup> Grëse ne nzian mod ne rxin ne lo samiech ne. Tel niaca miñe no tib zha ne grieelo ycuëz ludz pa lotaa gnee zho, zha cosi cxind zho, haxta xcuerp zho zrieelo zho gnabey zhow. <sup>3</sup> Gotsaa gwi ne ganle zig nac guay, con tib lë win guuib ne rgo miech ro ma rrieelo rnabey zho ma, rienie zho ma nëz ne racladzta zho. <sup>4</sup> Scaque barcw, niicle ne nrooba, no hor rrieed medox lo nis rcheepa, per con tib lë yag lag win ne rsëe miecha, rrieelo rienie zhow nëz ne racladzta zho. <sup>5</sup> Scapaa nagon nac ludz ne; niicle ne winsew, per nroob guieiqui ne runa. jRan to ganle tib bzhi yeense name rzobgui dan! <sup>6</sup> Ni tel ludz ne gon, rrieequia tib bel ga naca. Tib lë win xcuerp ne naca, per guieiqui nroob ne runa, runctala xto miech. Gun ne cuent tib lë gui ne brie gabil naca; ni dipse lo xquieImban miech noxtseeb zho low.

<sup>7</sup> Golwi ganle, rrieelo miech runndoo zho grë ma ne rsiibe, grë ma ne rzëlen liu, haxta grë ma ntseeb, haxta grë ma ne no nisdoo, rnabey zho ma. <sup>8</sup> Per guieñd zha ne gon grieelo gnabey ludz; ncuaane ntseeb naca, choot grieelod gnabeya; masaque laaw no par gnitlow miech, zigne run grë guizh ncuuan. <sup>9</sup> Lëew name rquiiin ne roolnie ne Dios men ne nac Pxoz ne, ni rlozh ga lëëquew rdzibdee ne samiech ne, ni lalnu rien ne me bzaa zho, biaan zho zigne rlu me. <sup>10</sup> ¿Pe ga nadien, ro ne roolnie ne Dios, ni roque ne rgodee ne samiech ne?

<sup>11</sup> Bets, bzian, led scada gon. Zig nacse tib zhlian, zniacxe zaatne rlanaque nis nex gaque rlan nis yuzed?

<sup>12</sup> Tib yag nexgaaw, zniacxe rquia xnex yag oliv lo yag guigw, yquiaagaa guigw lo lbë uv? Nanle to ganle racd miñ co.

## Zha ne nixbiini

<sup>13</sup> Lo grë zha ne nacgrë to i, tel no zha ne rzac zha nixbiini nac zho, none glu zhow ine zaacse gbannie zho samiech zho, gac zho tib miech ndooladz zig none gac tib zha nixbiini. <sup>14</sup> Per tel tibaque në rac zdoo zho ran zho zha ne stib noded, tibaque noguib zho csanwin zho samiech zho; gacnan zho ganle, led scad rac zha nixbiini. Ni lalnu rieguiald tso zho csanziuu zho zho. <sup>15</sup> Led scad nac guielbiini ne rdeed Dios, sinque lëe zhiwseed mendox ga, lëe min co zienal grëraa miech guidzliu. <sup>16</sup> Zeene sca në rac zdoo miech ran zho cho stib noded, zeene sca tibaque no zho dien zha guianglaa zho lo samiech zho, loxaque dil, loxaque grë guelntseeb rzobni zho ga. <sup>17</sup> Zha ne nli rap guelbiini ne rdeed Dios, rund zho min co, laa zho zienal: ndzinlise gban zho, rleynied zho dil, rguib zho zaacse rnee zho lo miech, wen rac zho lo grëse miech, rquia zdoo zho samiech zho, rund zho cue zho zha ne mazdraa gacnie zho, ncuane run zho dib zdoo zho run zhow, niapse ncuane ndzinli rioxco zho.

<sup>18</sup> Zha ne sca rleynied dil, rioxco zho rnee zho lo miech tipse gac zho, tipse gnee zho; scagaa rdzin dze ne ran zho zeene laa grë miech co rac tib miech wen.

## Zha ne rleynie guelntseeb

**4** Ne squi tibaque rlëëlsa to, tibaque quiadij to, lëe min qui gon riegat por grë guelntseeb ne rio guic to. <sup>2</sup> Rio to riogui to ncuane grieelod yquianie to, rlozh ga, haxta rut to samiech to parne yquianie tow. Në rac zdoo to ran to cho zha quianie ncuane quianiede to, zeene ran to rrieelod yquianie tow laa to rlëënie zho, haxta rdilnie to zho. Rrieelod yquianie to ncuane racladz to, sacne rnabde tow lo Dios. <sup>3</sup> Niicle tel r nabgaa tow lo me, rneedzd mew, sacne laa guic to zienie yquianie tow loxaque par gdeedguxt zdoo to, gdeedguxt xcuerp to.

<sup>4</sup> iQue tal ntseeb to! iPe ib riende to, Dios gon rlëënie to zeene squi rio to rleynie to grë guelntseeb? Sac miech ne squitaa rleynie guelntseeb, lo Dios ga racntseeb zho. <sup>5</sup> Golgan ganle, zha rnee lo Xtiidz Dios: "Espíritu Sant, men ne pxeel Dios nacie ne, rleynie me ne, ni racladz me zhaa ncuane gleynie ne laa ne gleynie ne me."

<sup>6</sup> Ni tel Dios gon, noxco me ne, ib zacnie me ne gree ne lo guelntseeb; sca rnee lo Xtiidz me, zaatne rnee: "Zacnie Dios grë zha ndooladz, sangue grë zha niats, rdzigiend me zho."

<sup>7</sup> Golguien sca, ine ndooladz golgac, golgon mine rnabey Dios. Gdeetraa to diidz yquii mendox to, sca golgun zeena zhal ma gbiche ma lo to. <sup>8</sup> Dib zdoo to golsëeb xnëz Dios, zeena scagaa me zacnie me to. Goltsoxco guiaanmbe to lo grëtaa xtol to, golnab lo me csanmbe me zdoo to, mese gnalo to, gacchopdraa

guic to. <sup>9</sup> iGolguien ganle, ndzinlid i squi mban to! iMban golgac, goltso guelne, golgoon, laa ne tso to gzhidz to, laa ne tso to gley to! <sup>10</sup> iNdooladz golgac lo Dios, zeena cuee me to lo grë ncuane nac to, csanglaa me to!

<sup>11</sup> Bets, bzian, ib gneenëde to zha ne nacgrë to. Zha ne rneenë bets zho, bzian zho, bel zho, ni rdziibdol zho zho, Xley Dios ga rguits zho. Laa ne so zho gacladz zho zha gon guelwxtis, mazd tsoxco zho gban zho zigne rnabey ley. <sup>12</sup> Golguien ganle, Dios psan ley, ni mese rieguial gon guelwxtis, me nan zho cuibdol, chogaa csilaa me; per to nadien, zcho nac to par gdziibdol to samiech to?

<sup>13</sup> Togaa ne nac to zha ne rnee: "Na gzhe widz dien pa tib guiedz ne guioo ne, guiobiaaz ne ga tib iz, ga dziuun ne wzi dziuun ne wto, dziuunlo ne dimi", golquiaadiag mine gne naa lo to ganle. <sup>14</sup> Ne sca rnee to, ipe wen wen nan to dien yo to gzhe widz co! iPe ran to lega nacse xquielmban ne zigne nac xcow las ne rbe raj sil? Zhisaque rbew, zeene rlozh ga rludraa dien yow. <sup>15</sup> Mazd golguiab: "Telne zneedz Dios diidz gbanraa ne, min rii, min rii dziuun ne." <sup>16</sup> Led tso de tibaque guelniats qui zienie guic to, golguien guelntseeb ga ran zha ne rac niats. <sup>17</sup> Ni golsoladza ganle: Grëse zha ne nanpaa pe nac ncuane ndzinli ne no gon zho ni rund zhow, xtol zho ga runctal zho.

## Zha ricw ne zienal guelntseeb

**5** iGrë zha ne rapchen, zha ne zienal loxaque guelntseeb, golquiaadiaga ganle! Golgoon, golquiaadan redz niina, sac gon nroob nac guelne ne gan to. <sup>2</sup> Grë ncuane beenlo to i, peet nonda, lega naca zig nac grë ncuane biodzle; grë xab to i, rrieequia ncuane dowle mxila. <sup>3</sup> Grë guiib or, grë guiib plat ne squitaa quianie to, rrieequia noloozhle bioochena; ni scadaa gon nitlo to, masaque gac to zig tib ncuane riab lo gui.

Laa to beenlo grëtaa dimi qui, rzac to lëew yquii to len dze ne ziaad, ni nande to gon laa dze ne nitlo to ziaadyoble. <sup>4</sup> Lëe grë dimi qui gon zëeb to lo grë zha ne quia xtsiin to, noquidie to zho rguizhde to xtse zho. Per golgacnana ganle, grëse redz ne rquiaa zho zeene mban rac zho squi rsaci to zho, laa Dios binlew. <sup>5</sup> Lo grëtaa iz ne mban to lo guidzliu rii, loxaque grë ncuane gdeed guxt zdoo to, grë ncuane gdeed guxt xcuerp to noxco to, ncuane yozh ne riaabtaa guic to laa to runa, ib riende to laa dze ne nitlo to ziaadgaxle. iLëe to noyun xcuent ma ne noro par guet ma! <sup>6</sup> Pe zhistaa guelntseeb ne quiayun to, haxta zha ne peet xtol, zha ne nan glis nia lo miech, rquiaqui to zho ncuane rund zho, rnabey to ret zho.

## Nodne guieed zha ne rnalo Dios

<sup>7</sup> Bets, bzian, sangue to gon tiblque golgac haxta gan to gdzin dze ne laa Jesús guiaad stib, tel petaa run miech to peet tsienied guic to. Golgac zig zha ne ran, tel zha cow, zeene rlozh rlaal zho bni liu, tiblque rac



zho gdipse len mëë guie, rquiambëz zho haxta rdziñ dze ne rlaap zho. <sup>8</sup> Tiblique sca gołgac. İİb guiaand zdoo to, sac goñ zhile gdziñ dze ne laa meñ ndzon ne rnabey ne guiaad stib!

<sup>9</sup> Ib tsođe to guieednie to grë zha ne nacgrë to, zeena guñctalde to xtoł to; sac zhile gdziñ dze ne laa meñ ne no guñ guiełwxtis guiaad. <sup>10</sup> Gołsoladz ganle, grë zha ne biadteed xtiidz Dios padzeela, niicle nroob guiełnë goñ zho, per tiblique goc zho. <sup>11</sup> Zig nac Job, nañaxe to ganle zha nactaa guiełnë ne goñ Job, per ib bieete me, ni blozhse goñ me guiełnë co nroobraa guiełnzaac ne bdeed Dios lo me. Ga rlu ganle, zha ne sca rdeed me diidz rañ guiełnë, led lega rañd zhow; sac nquialadz me miech, rquia zdoo me zho. Dichos grë zha ne sca nac.

<sup>12</sup> Bets, bzian, zeene tsiegala glu to diidzli rnee to, tsođe to gzeet to gbaa, gzeetgaa to guidzliu par gliladz miech xtiidz to; guiab to: “Lëpaa gbaa qui”, “lëpaa guidzliu rii”, dien peragaa gzeet to. Tib diidz ne nliw, gołguiab: “Nliw”, tib diidz ne nliidgaaw, gołguiab: “Nliida”, zeena guñctalde to xtoł to; sac goñ zha ne ruñctal xtoł, ible zгаа zho guiełnë ne csiaab Dios.

<sup>13</sup> Lo grë to, zha ne no pe tib lo guiełnëw, gnab zho lo Dios gacnieñ me zho. Zha ne no pe tib guiełbleya, goołnie zho me. <sup>14</sup> Zha ne rzacnëgaaw, gnabey zho ga-

credz bla zha ne zo lo to, zha co quëëb nceit guic zho gnab zho lo Dios guiac zho. <sup>15</sup> Tełne dib zdoo zha co gnab zhow lo Dios, zunguiac Dios zha rzacnë co. Zlische me zho lo xquiełguidz zho, ni teł por pe falt ne beengaa zho lo me sca rzacnë zho, zuñ me zhow perdon.

<sup>16</sup> Gacxe waa, tib tib to zeene ruñ to pe tib falt, yqueetsde tow, gołzodiidza lo zha ne nacgrë to, lozhse ga gołnab lo Dios guñ me to perdon, zeena guiaañmbe to lo me. Sac tib zha ne biaanwenle nëz lo Dios, zeene sca pe rnab zho lo me ruñ mew, niicle ncuaaņe mazdraa ngaņa. <sup>17</sup> Gołsoladz Lí ganle, meñ ne biadteed xtiidz Dios lo miech padzeela, samiechaque new, per dib zdoo me bnalo me Dios. Tib dze bnab me lo Dios csiaabd Dios nisguie, ni scase goca, dipse len tsoñ iz groł ni tib lab nis guie biabd; <sup>18</sup> haxta bnabaa me lo Dios guiaba stib, dzigora biaba, laa guidzliu biire bdeed guiełnzaac.

<sup>19</sup> Bets, bzian, teł cho tib zha ne nacgrë to i sozit lo Xtiidz Dios, ni grieelo cho tib to ctsire zho nëz yozh ne zie zho ga; <sup>20</sup> gołgacnañ ganle, ladzniacle guiełgut ga rsilaa zho zho, grëse xtoł zha co zuñ Dios zhow perdon.

Santiagw

# 1 PEDRO

Bets, bzian, jdiuzh to grëse to!

**1** Naa nac Pedr, tib zha ne rxee| Jesús nonee Xtiidz Ndzon me lo miech. Laa naa rxe| tib guits rii ziaad lo to grëse to ne nac to zha Israel, no to stib ladz beñ: zig nac nëz Pont, nëz Galás, nëz Capadós, nëz Asia ni nëz Bitin.

**2** Dios meñ ne nac Pxoze ne, ible me bzooblo to mazd padzeela, sac nanle me laa to gac xpëed me. Bdziñ dze, zeene laa me pxeel Espíritu Sant bleextso to laa to ngab xnëz me, zeena gban to zigne rnabey me, ni lozh csañmbe Jesús to; sac ible miñ co nacne bzhiee xchen me. Dios glu ganle pa lotaa noxco me to, zeena peet zhgab ctsebde to.

**3** Xquizh xquie|nzaac Dios, Pxoze Jesús meñ ndzon ne rnabey ne, sac gon pquia zdoo me ne ptsëe me lo xquie|mban ne, rrieequia gol ne stib. Xquizh me bleeban me Jesús, sac gon ga rlu ib zgaa ne guie|nzaac nroob ne no diidz gneedz me lo ne, **4** guie|nzaac cosi ncuaane mbe naca, nacda ncuaane nitlo, nacda ncuaane gdzëelo, ni gbaa ga quianie mew.

**5** Ne squi dib zdoo to rnalo to me niina, gane quianap me to con grëtaa poder ne rap me, parne ygaa to guie|nzaac co. Zeene laa dze co gdziñ, zanlo to ganle zeene laa me ycaania to.

**6** Gacxe waa ine nley golgac. Nli zan to grë pe guie|në, per ncuaane tib rded ga. **7** Ib none gan to grë guie|në, parne ga glu dien pe nli dib zdoo to rnalo to Dios. Zig nac guib or, parne glu dien pe nli ora, none teda lo gui; scaquegaa to, none gan to guie|në parne glu to nli dib zdoo to rnalo to Dios; ni zig nac or, ncuaane rnitlo ga. Grëse zha ne tibaque gnalo me, nicle mazdraa guie|në ne gan zho, gal dze ne guiaad Jesús stib, ine zunnon Jesús zho, sannglaa me zho, zley me gan me zho, sac blu zho nli dib zdoo zho rnalo zho me. **8** Me i squitaa rleyne to, me i squitaa rnalo to, nicle ne gonde to me, nicle ne rande to me. Tib guie|bley nrooba lo to, tib guie|bley ndzona, nacda ncuaane grieelo gnee to zha naca; **9** sac gon, ne squi dib zdoo to rnalo to me, ib scaania me to.

**10** Grë zha ne biadteed Xtiidz Dios lo miech padzeela, bzeet zho laa Dios glu ganle pa lotaa noxco me ne, laa me csilaa ne lo dol; per ib biend zho dien zhapa gun me. **11** Zeene bdeed zhiEspíritu Jesús guie|biini lo zho bzeet zho ne ib laa Dios cxee| me, pe nac guie|në ne ted me, ni pe nac guie|ndzon ne guiaadnie me; go-cladz zho niacnañ zho dien cho nac meñ co, pa hor gac miñ co. **12** Nacne blu Dios lo zho gocnañ zho nacda ncuaane gac len dze co, sinque haxta nele ygaa dzi-ana. Sangue niina, nanwen to ganle laa grë miñ co go-

cle, lëe diidz cub co i gocnañ to niina, gbaa biet Espíritu Sant bdeed me guie|biini lo zha ne biadneew lo to. jNcuaane ndzona, haxta grë anj| racladz tebaa zha gacnañraa zho dien zha naca!

## None gban ne zigne racladz Dios

**13** Golquix biini xquie|rrien to sca. Tiblique golgun guic to ne laa to ygaa grëtaa miñe ral zdoo Dios gneedz me lo to, zeene laa Jesús guiaad stib. **14** Zig grë mëed ne ron xtiidz pxoze, sca nguzobdiidz golgac lo Dios; gun-draa to grë ncuaan ndzinlid ne beñ to zeene gard gunbey to me ga. **15** Goltoxo golban zigne racladz me, zeena ine mbe guiaan to lo dol; sac gon tel me, meñ mbe nac me, nacd me meñ ne rdziguien dol.

**16** Zigne zhobneeque lo Xtiidz me, zaatne rnee: "None guiaanmbe to lo dol, sac gon meñ mbe nac naa." **17** Pxoze to nac me, me rnalo to, nanle to zeene laa me gun guie|wxtis, led yed me cue; miñe beñ tib tib miech, zunquizh me zhow. Golguien sca, golgon xtiidz me gzataa dze ne gbanse to lo guidzliu rii.

**18** Golsoladz me blee to lo grë wseed ndzinlid ne psan grë xmengol to; nanwen to gozh brie to ga; per pquiind me ncuaane rnitlo zig nac pe dimi or, pe dimi plat; **19** sinque laa me pquiin xchen ndzon Jesús. Ren ne bzhiee goc zig tib gon, zigne rgogon miech carner yeen ne mazdraa niow, carner yeen ne mazdraa ndaan parne guiaanwen zho lo Dios. **20** Padzeelale, haxta zeene gard cue guidzliu bzo Dios me gac me gon co, ni nligaa zeene laa dze co bdziñ laa me biaad, biaad-sanwen me to lo Dios; laa Dios beñ miñ co sacne rleyne me to. **21** Gacxe waa, zrieelo dib zdoo to gnalo to Dios, mese none gliladz to. Me nac meñ ne bleeban Jesús, blu me ne meñ non nac Jesús.

**22** Ni niina ne laa to mban zigne nac Xtiidz Dios, miñe nac diidzli, laa zdoo to biaanmbele lo dol; nasi zrieelo gleyne to zha ne nacgrë to. Dib zdoo to sca golleyne zho, **23** golguien ganle, tib guie|mban cuble rap to niina, rrieequia gol to stib; per nacdraaw zigne gol to glo, sinque lëe guie|mban qui bgaa to zeene bliladz to Xtiidz Dios, diidz ne rneedz guie|mban, diidz ne gdziñ dze nitlo. **24** Zigne zhobneeque low, zaatne rnee:

Grëse ne nac ne miech, zdziñ dze ne lozh ne, lega nacse ne zig nac grë guizhye, grë xquie|ndaan ne, lega nacsew zig nac guieen guizh co.

Sac tel guizhyew, zeene laaw rbidz, laa guieena rli-aa|aque;

**25** sangue Xtiidz Dios, gdziñ dze ne nitlow.

Ni lëë diidz co ga gon biadseed zho to, lëew rlu zha laa miech lo grë xto| zho.

2 Nana sca:

gundraa to grë guie|ntseeb,  
yquidiedraa to samiech to,  
gundraa to ne laglaase glu to guie|wen,  
gacnëd zdoo to gan to cho zha stib noded,  
gzhixcuaadraa to diidzguizh.

<sup>2</sup> Sinque Xtiidz Dios go|tsoxco, zeena lozh tsotibli guic to dziits so to low. Zig rzac mëdyeen ne wriin ral, nidz-paa rdziladz win guie win; scadaa go|sac Xtiidz me, zeena ygaade to grë guie|nëdox ne csiaab me. <sup>3</sup> Laa to gonle ganle zha wentaa zdoo me, Xtiidz me sca go|t-soxco.

### Jesús nac zig tib quie mban

<sup>4</sup> Go|big lo Jesús, go|gan ganle lëë me nac zig tib quie ne rio squin yu, per tib quie mban. Ib bleynied miech me, sangue Dios, men non, men nziuu nac me lo me.

<sup>5</sup> Go|big lo me sca, zeena ye to gac quie mban ne tsaaxyadoo me. To gac grë pxoz ne nlipaa mbe zdoo, gun to dziin len yadoo co; go|ban zigne rdziladz Dios, zeena guie|mban co gac zig tib gon ne gdeed to lo me, ne nac to zha ne ngab lo Jesús. <sup>6</sup> Zigne zhobneeque lo Xtiidz Dios, zaatne znu rnee:

Men ne bzo naa cxe| naa Jerusalén,  
me gac zig tib quie nroob ne gnaaz dziits xyadoo naa,  
ni lëë yadoo co nac grë zha ne ngab lo naa.

Men non nac me, ni grëse zha ne gnalo me, ible csaand naa zho.

<sup>7</sup> Ne nligaa tib men non nac me lo ne, sangue grë zha ne riladzd me cholze miech rzoob zho me; zigne zhobneeque lo Xtiidz Dios, zaatne rnee:

Quie ne sca bron zho tib lad zeene quiazaa zho yu,  
laaw bron zho sac rzac zho paat rquiinda,  
ni niina lëëpaaw nac quie ne nlibdziits xcoc yu.

<sup>8</sup> Ni ziaad stib zaatne znu rnee:

Quie co griel ni miech, quie co gron zho.  
Grëse zha ne nëd gliladz Xtiidz me zaatne rnee cho nac me, scapaa sac zho me, ni ib zhobneeque ne min co ygaa zho.

<sup>9</sup> Sangue to, lo Diosle ngab to, me ble to, zigne rnee lo Xtiidz me: tole nac zhipxoz me, tole nac zha non ne quiayun xtsiin me; miech ne mbele lo do| nac to lo me, mele rnabey to sac me bredz to laa to brieel lo guie|cow bzëëb to lo xbiini ndzon me; zeena gnee to lo miech ganle zha nactaa grë ncuane run me. <sup>10</sup> Glo peet nonde to, sangue niina non to sac gon lo me ngab to; glo nande to pa lotaa rquia zdoo me to, sangue niina rley to ran to ganle squitaa rquia zdoo me to.

### Tibaque go|gun mine racladz Dios

<sup>11</sup> Bets, bzian, rleyne naa to. Ndion ne ganle, nacse xquie|mban ne lo guidzliu rii zig zha ne tibrded stib ladz ben; gane rso naa diidz lo to, ib gzoobladzde to gun to grë ncuane ndzinlid ne racladz xcuerp to; sac

min co rsacsi xalm miech. <sup>12</sup> Golguie|n zaacse go|gac lo grëraa zha ne gard gunbey Dios; niicle ne gneenë zho to niina, sac zho to zig cho grë zha ntseeb, per zeene gan zho ne ndzinli nac grë ncuane run to, haxta zleyne zho Dios ga| dze ne laa Jesús guiaadgun guie|wxtis.

<sup>13</sup> Golgon xtiidz grëse men ne nac wxtis lo guidzliu rii, sac sca rdziladz Dios: zigtaa presidenta, ne nac me zha nonraa, <sup>14</sup> zigtagaa grë zha ne nacie me dziina, sac zha run guie|wxtis, rdeed zho caxtigw ne rieguial grë zha ntseeb, ni scagaa runnon zho grë miech ne run ncuane rquiin. <sup>15</sup> Ible laa Dios racladz zaacse gac to, zeena grë zha nxen, grë zha yozh ne riend pe rnee, haxta ni ro zho tsod pe gneenë zho to.

<sup>16</sup> Go|lu ne peet lo ngadoodraa to, per guiabde to ne peet lo ngadoodraa to laa to gun grë ncuane ndzinlid ne gacladztaa to. Led scada gon, mine racladz Dios min co go|gun, go|lu mele rnabey to niina.

<sup>17</sup> Zaacse go|gac lo grë samiech to, golguie|n cho lo zo to. Go|leyne grë zha ne nacgrë to, ndooladz go|gac lo Dios, golguie|n ne men ro nac me; ni scagaa golgon xtiidz grë zha ne nac wxtis nroob.

<sup>18</sup> Bets, bzian, to ne nac to zha ne quia xtsiin ben, golgon mine rnabey men ne rree to; tel zhataa nac zho, zigtaa men wena, zigtagaa men ne ntseeba.

<sup>19</sup> Nley go|gac, go|deed xquizh lo Dios, tel porne noyun to mine rnabey me, laa zho rsacsi to! <sup>20</sup> Sac gon, telne nosacsi zho to por xquie|ntseeb to, niicle paraa cxcw to paat yquiinda; sangue tel rxcw to nosacsi miech to porne noyun to ncuane rdziladz Dios,

dzigosi zleyne me to. <sup>21</sup> Go|gacnan ganle, ible none ted to min co ne nac to zha ne ngab lo Dios; sac gon, niicxe Jesús, blactaa guie|në ne bded me bdiizh me xto| ne. Glo me sca bded, nana negaa ible none sca dieed ne. <sup>22</sup> Tel me ni tib do| beend me, ni tib miech pquidied me. <sup>23</sup> Niicle zeene blooredz zho lo me, ible ptsired me lo diidz co; niicle zeene quiasacsile zho me, ib gocntseebd me lo zho; sinque grësew psan me ladznia Dios, men co gun guie|wxtis zigne no gaca.

<sup>24</sup> Masaan Jesús bgaadz grëse xto| ne, blactaa psacsi zho me pquia me lo cruz bdiizh mew; laa me been min co, zeena grieelo griee ne ladznia do|, gban ne zigne rdziladz Dios. Ne scataa psacsi zho xcuerp me, ga bi me grëse xquie|në ne. <sup>25</sup> Glo lega nac to zig nac grë mëcwxiil ne zonziaab, sangue niina mele quianap to. Me nac tib baxtor ne rleyniepaa to.

### Zha gban zha ne ptsieelniale

**3** Bzian, to ne nac to men wnaa ne ptsieelniale, golgon xtiidz tsieel to. Niicle tel nëd zho gliladz zho Xtiidz Dios, per zeene gan zho ne nligaa ndooladz nac to, ine ndzinli rac to, haxta zhal zho laa zho yquibladz gliladz zhow. Yquiindraa ne goon chopaa yquia gneew lo zho. <sup>3</sup> Golguie|n sca, tsode to ne goon dien pa xix-cuaraa to par gluniow to lo miech; dieen pa xix-cuaraa guitsguic to, dieen pe bguiaa or ne yquia diag to, dieen pe grë guib or tso yan to, tso nia to, dieen pe lar niazh ne gacwraa to. Tsienalde to grë guie|niow co,

sac gon̄ ncuaañ laglaase ga; <sup>4</sup> sinque none xixcuua zdoos to, gac to tib zha tibliladz, tib zha ne ndooladz. Lëë guieñniow co nac miñe niowraa nëz lo Dios, ni miñ co gdziñd dze nitlo. <sup>5</sup> Lëë guieñniow co bioxco grë meñ wnaa ne biaadban padzeela, zha ne brieel lo dol wban zho zigne racladz Dios; tel̄ zha, dib zdoos zho bnalo zho Dios, ni bin zho xtiidz tsieel zho. <sup>6</sup> Zig nac Sar, sca goc me, bin me xtiidz tsieel me Abraham, haxta rëb me masaque Abraham nac meñ ne rnabey me. Ni scagaa to, tel̄ne tsoxco to xixcuua to, zac to zig goc Sar, dzigosi laa to gac zig xpëed me; haxta ni tsoxtseebde to pe glisqui tsieel to lo to.

<sup>7</sup> Scaquegaa to bets, ne nac to zha ne ptsieelniale, gołtsoxco tsoguc to zha nac tsieel to. Gołgan̄ me zigne nonguiela gan̄ to me, gołguien̄ gan̄le nda meñ wnaa; ni lala, non me lo Dios, sac gon̄ ye me yгаа guiełmban ne psañ Dios diidz gneedz me lo to. Sca gołban, zeena scagaa zeene gnab to lo Dios, squiaadiag me xtiidz to.

<sup>8</sup> Nana sca, tipse gołgac grë to. Ine niowse gołleynie zha ne nacgrë to, miech wen, miech ndooladz gołgac. <sup>9</sup> Zha ne gacntseeb lo to, gunde to ne yeque to gacntseeb lo zho; zha ne coredzgaa lo to, gunde to ne yeque to coredz lo zho; sinque mazd gołnab lo Dios gunlay me zho, zeena scagaa to, zunlay me to; sac gon̄, ible miñ co bredz me to. <sup>10</sup> Zigne zhobneeque lo Xtiidz me, zaatne rnee:

Zha ne racladz in̄e gley zho ne laa zho mban, wen ted zho len̄ ngbidz ne gban zho,

none tsoxco zho ycuëez zho ro zho, gneenëdraa zho, yquidiedraa zho;

<sup>11</sup> none csaan zho grëtaa guiełntseeb, niapse ncuaañ wen tsoxco zho gun̄ zho,

yguib zho cuewen miech, niicle zhagaa wen gac zho lo grëse miech.

<sup>12</sup> Sac grë zha ne sca wen rac nëz lo Dios, tibaque quianap me zho,

ni rquiaadiag me xtiidz zho tel̄ pe rnab zho lo me; san̄gue grë zha ntseeb, ni lalnu rdziguiend me ncuaañe run̄ zho.

#### Dichos zha ne mban rded lo samiech

<sup>13</sup> Gołguien̄ sca, ncuaañe yquiiin gołgun̄; scagaa tsod pe nacne ctsidil̄ miech to. <sup>14</sup> Laa tel̄ne ncuaañe yquinaquegaa noyun̄ to, ni laa miech rtsidil̄ to, j̄dichos to ga! Ib gdziebde to grë miech guidzliu, niicle peraa gnë zho gun̄ zho to. <sup>15</sup> Tibliladz gołgac, tibaque gołgun̄non Jesús meñ nroob ne rnabey ne, tibaque gołconie Xtiidz Dios guic to, zeena nan̄le to pe guiab to lo zha ne gnabdiidz dien̄ zha nacne rnalo to Jesús; in̄e niowse gołgac, diidz ndooladz gołnee lo zho.

<sup>16</sup> Zaacse sca gołban, zeena grë zha ne rneenë to porne nac to zha ne no xnëz Jesús, dzziñ tib dze ne ctoladz zho, zeene guien̄ zho lega bnexuu zho to.

<sup>17</sup> Wen zie zha ne ran̄ guiełnë, tel̄ne Dios rnabey gan̄ zhow zeene noyun̄ zho ncuaañ wen; lëdle gan̄ zhow por xquiełntseeb zho.

<sup>18</sup> Gołgan̄ gan̄le niicxe Jesús, zha nactaa grë guiełnë ne gon̄ me. Niicle ne ni tib dol̄ been̄d me, per haxta

beet miech me bdiizh me grëse xtol̄ ne nac ne miech ntseeb, psañwen me ne lo Dios. Nli gut xcuerp me, per zhiespíritu me gutew; <sup>19</sup> gane güeyted me zaatne niogyu zhiespíritu grë zha ne wban padzeela, güeynee me lo zho. <sup>20</sup> Lëë grë zha co ib bzhiguiel̄d nliiladz Xtiidz Dios, niicle ne dipse len̄ dze ne nozaa Noé barcw nroob co pquiambëz Dios niac-wen zho. Nan̄laxe to gan̄le, xonaque nac zha ne bdedlaa lo nis co. <sup>21</sup> (Lega rrieequia goc nis co zig nis ne rrobnis ne. Zeene rrobnis ne, ga rlu ne laa ne briele ladznia dol̄, ygaadraa ne guiełnëdox ne tsieguial̄ zha ngoopdol̄, sac gon̄ por miñcopaa gut Jesús ni brieeban me; ni guiabd ne togo nis co rsan̄mbe ne lo xtol̄ ne, sinque ga rxobneñ ne ne laa ne rnab lo Dios ctsëë me lo xquiełmban ne.)

<sup>22</sup> San̄gue niina gbaa ga no Jesús, ga zob me cue Dios nëz derech, grëse anj̄l non, grëse zha non ne no gbaa, rquiitsgzhib zho lo me ni run̄ zho miñe rnabey me zho.

**4** Gołguien̄ gan̄le, zha nactaa grë guiełnë ne bded Jesús bdiizh me xtol̄ ne; nana sca, scaque to gdziebde to gołcueeladz to gan̄ to guiełnë. Ib rquiiin guiełnë, sac zha ne no tib lo guiełnë, rioguid zho grë ncuaañe gun̄tal xtol̄ zho, <sup>2</sup> zëëb rguib zho gban zho zigne racladz Dios. <sup>3</sup> Grëtaa ncuaañe ndzinlid ne run̄ grëraa miech, gołguiaañladza. Gołguiaañladz zeene scataa ptsieelsa to zho, bzudz to, lega dowcho, lega gocho to nziu, haxta bionie to zha ne nacd tsieel to; bio to lo grë lni, bleyne to grë mdio.

<sup>4</sup> Grë zha co, rien̄ naa rlëë zho ran̄ zho rtsieelsadraa to zho lo grë ncuaañe ndzinlid co, gane haxta rneenë zho to. <sup>5</sup> Per gołsaan zho, ben̄que zha quizha zeene gacredz zho lo meñ ne guiaadgun̄ guiełwxtis, gal̄ dze ne gdeed me miñe tsieguial̄ tib tib miech, zigtaa zha mbana, zigtagaa zha ne gutlew. <sup>6</sup> Sac niicle zha ne gutlew, no zho gocnan̄paa zho zha nac Xtiidz Dios zeene bzomban zho. Ible rquiinpaa Xtiidz me, sac zha ne rquiaadiaga, niicle ne zetaque zho, per nëz lo Dios mban zhiespíritu zho.

#### Gołgacnie zha ne nacgrë to

<sup>7</sup> Zhile gdziñ gdze ne laa grë ncuaañe rac lo guidzliu rii nitlo; gołquix biini zaacse gołban, tibaque gołzodidznie Dios. <sup>8</sup> In̄e gołleynie grë zha ne nacgrë to, sac zeene nlipaa rleyne ne samiech ne, tel̄ pe falt ne gun̄taa zho zrieelo cteed new zdoos ne. <sup>9</sup> Zha ne guiaad lidz to, gołdeed zaatne cuëz zho; in̄e gołcuëzlo zho, guieedniede to zho.

<sup>10</sup> Tib tib to bneedzse Dios tib guiełbiini lo to. j̄Gołquiina sca, gołgun̄lsa xyudar zha ne nacgrë to! Ib ga rquiiin guiełbiini co bneedz mew lo to.

<sup>11</sup> Zha ne rseed miech Xtiidz Dios, none gnee zhow zigne racladz me. Zha ne run̄gaa pe stib xtsiñ Dios, ib yquiad zdoos zho none gun̄ zhow dib nacse guiełndaan ne rdeed Dios lo zho. Ncuaañe gun̄taa to, gołtsienie guic to ne laaw gun̄ to par csañnon to lë Dios. Ga glu ne xtsiñ Jesús quiayun̄ to, meñ ndzon ne rnabey, meñ ne gdziñd dze gdzëë. Sca rieguiala.

<sup>12</sup> Bets, bzian, ne nligaa rleyne naa to. Gołsoladz sca, tel̄ pe guiełnëtaa gan̄ to porne no to xnëz Jesús, peet

tsienied guic to, sac ib scale no gaca. <sup>13</sup> Mazd ine golley; sac gon ye Jesús sca gon guieInë, ni scagaa nroob guieIbley ne tso to gal dze ne glu ganle zha nactaa guieIndzon ne rap me. <sup>14</sup> Zeene rgodee miech to, rquiaago zho to loxaque ne no to xnëz Jesús, nley golgac; wen zie to ga, sac gon zhiEspíritu Dios nacie to.

<sup>15</sup> GuieI tow sca csacsi miech to, telne bgaa to laa to beet, laa to wban, laa to bzëëb lo cuent ne rieguialdraa to, pe stib guieIntseeb ne noyuragaa to.

<sup>16</sup> Saingue telne rsacsi zho to loxaque ne no to xnëz Jesús, led guieI tod ga. Laa ne ctoladz to, ;goldeed xquizh lo Dios, sac gon tib guieInzaac nroob bgaa to ngab to lo me! <sup>17</sup> Golgacnan ganle, grëse ne ne nac ne zha ne ngab lo Dios, len dze rii laa ne csilo dzian guieInë. Nana, telne ye zha ne ngab lo me ted guieInë, z zha naczhe mine ted grëraa zha ne nëd gliladz Xtiidz me, gal dze ne laa me gun guieIwxtis? <sup>18</sup> Zigne zhobneeque lo Xtiidz me, zaatne rnee: "Niicle zha ne wenle nëz lo Diosa, nroobaque nac guieInë ne ran zho haxta gdziñ dze ne ycaania me zho, zpe lelgue grë zha ne dzigo racntseeb lo me?" <sup>19</sup> Gacxe nagon waa, niicle tel pe nactaa guieInë ne gnabey Dios ted to, tibaque golban zigne rnabey me, golsan xquieImban to ladznia me; sac gon me nac men ne rneedz xquieImban to, ni mesi ib csaand me to.

#### Golgon xtiidz zha ne rnabey lo to

**5** Laa niina nagon, laa naa cso choplan diidz lo to, ne nac to zha ne rnabey lo grë zha ne no xnëz Jesús. Ye naa, dziin co nac naa, naa nac tib zha ne gonpaa zha psacsi zho Jesús, ni nanpaa naa zgaa naa lo guieIndzon ne no me, zaatne rnabey me, gal dze ne laa me guiaad.

<sup>2</sup> Rso naa diidz lo to gon, zaacse golquianap grë zha ne bgaa to noquianap to. Dib zdo to golgun dziin qui, sac sca racladz Dios, ib tsienied guic to guiab to dien zha lega cob to dimi lo zho. <sup>3</sup> Gunde to ne gnabey to zho zig cho xmoz to, sinque zaacse golgac lo zho, zeena lo to cseed zho zaacse gban zho. <sup>4</sup> Scagaa,

zeene laa men nroob ne quianap ne guiaad, zgaa to lo guieIndzon ne gneedz me, lugar co gac tib premio ne gdziñ dze lozh lo to.

<sup>5</sup> To ne nac to zha nguieg, golgon xtiidz grë zha ne zo rnabey lo to. Tib tib to, golgon xtiidz zha ne nacgrë to, sac gon: "Grë zha niats, rdziguiend Dios zho, saingue grë zha ndooladz, racnieñ me zho." <sup>6</sup> Telne guiaanwin to lo men ro ne nac Dios, ine ndooladz gac to lo me, scagaa me zunnon me to zeene laa dze co gdziñ. <sup>7</sup> Tel pe nactaa grë zhizhgab to, grë xliadz to, ladznia me golsana, sac gon me quianap to, noxco me to.

<sup>8</sup> ;Nsin golso lo mendox, sac gon tibaque quianaI ma gnitlo ma ne! Masaque rac ma zig rac grë meedz ne rgobeedz quiaguib ma ne gow. <sup>9</sup> Dziits golso gdeete to diidz yquiiI ma to. Tibaque dib zdo to gonalo Dios. Nanle to ganle dipse lo guidzliu, zha ne notaa xnëz me, scaque quiaded zho. <sup>10</sup> Tel pe nactaa guieInë ne noyan to, ible csaand Dios to sacne rleyniedox me to, zeene laa dze co gza, hor co laa me gzhixcuaaraa lo xquieImban to, gzodziits me to, guntibli me guic to. Me nac men ne bredz ne ygaa ne lo guieIndzon ne no me gon me Jesús, guieIndzon ne gdziñ dze nitlo.

<sup>11</sup> Mese nac men ne rnabey grëtaa ncuaane no, ni gdziñ dze ne gdzëë me. Nligaa sca nac me.

<sup>12</sup> Laa naa rxel guits rii lo bets ne Silas, ziaadnie mew lo to, bets ne rne naa me, sac nligaa dib zdo me rleynie me Dios. Mine rne naa lo to lo guits rii, laaw rne naa sac racladz naa guien to ganle pa lotaa noxco Dios to, pa lotaa rleynie me to; zeena tiblque gac to gbichede to lo me.

<sup>13</sup> Grëse zha ne rililadz Jesús Babiloin nu, zha ne bzooblo Dios gac xpëed me zigne bzoobloque me to, laa zho rxeeI bdiuzh lo to; scaque Marcw, men ne rzaac naa nu zig tib xpëed naa, ye me laa me rquiaabdiuzh to. <sup>14</sup> Laa naa rnab lo to, golquiaabdiuzh grëse zha ne nacgrë to, ine golxen nia zho.

Dios gacnieñ to peet zhgab ctsebde to, nac to zha ne no xnëz Jesús.

Pedr

## 2 PEDRO

Bets, bzian, jdiuzh to grëse to!

**1** Naa nac Simón Pedr, tib ngundziin win ne pxeel Jesús nonee Xtiidz Ndzon me lo miech. Laa naa rquia guits rii rxeel naa lo to, ne nac to zha ne squitaa ndzonse dib zdoo rnalo men nroob ne zob gbaa, zigne rnaloque no me. Xquizh Jesús men ne rsilaa miech, men ne nac Dios ne riladz ne, sac gon me gocnien to squi rnalo to me niina; sac mesi mine nonguiel gac, min co run me.

<sup>2</sup> Zigse zie dze, gołtsoxco lozh gunbey to zha nac Dios, zha nac Jesús men ne rnabey ne, zeena scagaa zig zie dze zunlayraa me to, zacnienraa me to, parne peet zhgab ctsebde to. <sup>3</sup> Sac zeene gunbey to zha nacraa me, con grëtaa poder ne rap me, zneedz me guielbiini lo to parne tibaque gban to zigne racladz me, tibaque gleynie to me. jGotsaa gwi ne ganle zha nactaa ncuaañe ro, ncuaañe gzee zdoo ne been me parne gbig ne lo me! <sup>4</sup> Ni psan me diidz pe nac grë ncuaañe ndzon ne gneedz me lo ne. Psan me diidz, ib laa me cuee ne lo grëtaa guelyozh ne rac lo guidzliu rii, parne gac ne tib miech mbe zigne nac me.

<sup>5</sup> Nli laa to rnalole Dios, per parne ygaa to min co, none tsoxco to:

zaacse golban,  
gołtsoxco guien to zha nac Dios,  
golseed gnabey to xuerp to,  
guieete to,  
tibaque gołtsoxco golgun mine racladz Dios,  
ine niowse golbannie grë zha ne nacgrë to, golsac  
zho zig tib menlidz to;  
golleynie samiech to.

<sup>8</sup> Nana, telne tsoxco to znu gban to, dzigosi mazdraa tsoguc to mine racladz Dios, dzigosi zlu run to mine rnabey Jesús men ndzon ne rnabey ne, led loxaque runbeydse to me. <sup>9</sup> Sac zha ne tsoxcoda, rrieequia rchool lo zho ga, rrieequia rowle guic zho ga, sac gon rsoladz zho zha nactaa lo grë dol ne blee Dios zho.

<sup>10</sup> Bets, bzian, golguien sca, niina ne laa Dios bzooblote to, laa me bredzle to ngab to lo me, gołtsoxco sca golban, parne guiabde to lo dol stib. <sup>11</sup> Niicle par gdzingaa to zaatne rnabey Jesús, men ne psilaa ne lo dol, men ne rnabey ne, tsod pe yca lo to, ine nzhal nëz zaatne ted to gdziñ to ga.

<sup>12</sup> Nli nanle to grë mine rne naa nu, nli dziitsle zo to lo Xtiidz Dios, per ib none guñsoladz naa tow. <sup>13</sup> Laa Jesús men ndzon ne rnabey ne, blule lo naa zhile gdziñ dze ne laa naa gbi lo guidzliu rii, gane niina laga bii mban naa rgobey naa ible nonguiela znu cso naa diidz

lo to; <sup>15</sup> zeena niicle wBILE naa lo guidzliuw, tibaque csoladz tow.

### Gonpaa Pedr Jesús

<sup>16</sup> Grëse mine bnee no lo to zeene pseed no to zha nactaa poder ne rap Jesús, ni zha guiaad me stib, guiabde to togo bod guicse no biaba. Led scada gon, tel naa grop lo naa gon naa xquielndzon me <sup>17</sup> guic gui ne scataa pxobnen Dios ne men non, men ro nac me. Binpaa naa zëeb tsi Dios gbaa hor co, në me: "Lëë Xpëed naa i gon, rleynie naa me, nziuu me lo naa."

<sup>19</sup> Ga nagon rlu ne diidzli nac grë mine bzeet grë zha ne biadteed Xtiidz Dios lo miech padzeela; gacxe waa, zig nac to ible nonguiel guien to zha naca. Masaque lëew quiaziini lo to niina, zig rziini tib biini guieel, haxta riini liu zeene laa Mel Ngol rlan; ni lëë Mel Ngol co nac Jesús. <sup>20</sup> Per scagaa, racladz naa gacnan to ganle, grielod ne lega tel zha guiaabtaa guic miech, guiab zho sca nac mine bzeet zha ne biadteed Xtiidz Dios, <sup>21</sup> sac gon tel zha co, bneed zho ncuaañe biaabtaa guic zho; sinque laa zho bnee mine bnabey Dios psiaab Espiritu Sant guic zho.

### Zha ne rquidie

(Judas 4-13)

**2** Grë zha ne biadteed Xtiidz Dios padzeela, mine bnabey me zho min co bnee zho; per brieequiaque zha ne pquidie rëb zho Dios pxeel zho, ni nli-da. Ni scaquegaa niina, grë zha ne rseed to, zrieequia zha ne yquidie lad co. Dzega dzega csilo zho glu zho grë zhiwseed yozh zho, ib gunbeydraa zho men ndzon ne rnabey ne, men ne psilaa zho lo xtol zho; per nanđ zho zha nactaa guielndox ne ygaa zho, tibaque zeene guien zho laa zho nole lo caxtigw co.

<sup>2</sup> Ndal miech ne grieequia tsienal grë ncuaañ yozh ne gon zho, niapse por zha laa grëraa miech csilo gneenë Xtiidz Dios. <sup>3</sup> Zha yozha, laa zho tsienal loxaque dien zha gunlo zho dimi, zguib zho yquidie zho to gdeed to dimi lo zho. Per ib tedsod zguizh zho min co, sac bzeetle Dios ganle zha nactaa lo guielndox ne ygaa zho; <sup>4</sup> sac Diossi gon, mine run grë zha ntseeb, csand mew scase. Golgan ganle, niicxe grë anjl ne sca been falt lo me, gonđzed me zho, bleegazh me zho gbaa, bnabey me bioogyu zho tib lo ncowdoo, ga nioogyu zho nieeda gal dze ne laa me gunquizh zho mine been zho. <sup>5</sup> Padzeela zeene wban Noé, grë miech ntseeb ne bnëd nion xtiidz me niicle ne bneepaa Noé lo zho, scaque gonđzed me zho, psiaab me tib guiedox bnitlo zho

grëse zho; loxaque Noé ni zgdaz menlidz Noé psilaa me lo nis co; sac wban Noé zigne racladz me. <sup>6</sup> Scaque len dze ne wban Lot, bdziguiend me grë miech yozh ne bio guiedz Sodom ni guiedz Gomorr, blaaj me gui grop guiedz co, bnitlo me zho grëse zho, xquidiése baañ. Laa me been miñ co, zeena ga gañ grëraa zha ntseeb gañle pe nac miñe tsieguiaj zho telne csaand zho xquieñtseeb zho. <sup>7</sup> Lotse psilaa me, sac bioxco Lot miñe rnabey me. Gapaa no Lot, ranpaa me zha ruñ grë miech co; haxta mban rac zdoo me, ran me gzataa dze loxaque grë guieyozh noyuj zho. <sup>9</sup> Gase na gañle rlu ib rsaand Dios zha ne rnalopaa me, rsaand me guiab zho lo dol; ni scagaa grë zha ne rsaand guieñtseeb, ib tedsod zho lo guieñdodox ne cteed me zho gal dze ne laa me guñ guieñwxtis.

<sup>10</sup> iZig nac zha ne guiaadquidie to ga, miñcopaa ygaa zho! Ni lalnu ganðzed Dios zho; sac goñ, laa zho zienaj loxaque grë guieyozh ne gdeed guxt xcuerp zho. Miech nad, miech niats nac zho, rzhidznie zho miñe rnabey Dios, ni lalnu dzeb guieñd lo zho rdzibdee zho grë meñ non ne no gbaa. <sup>11</sup> Per ni grë anjl, niicle ne zha nroob nac anjl, niicle ne rap anjl poder, per rdziñd anjl lo Dios gdzibdee anjl zho. <sup>12</sup> Per zha, lo xquieyozh zho ga, haxta ncuaane rieñd zho zha nac, rdzibdee zho. Lëëdaa grë ma nac zho, tel ma laa ma ralse par ygaa ma nitlo ma; guieñdraa xquieñrien zho, ncuaane racladztaa zho ruñ zho. Per zdziñ dze ne nitlo zho, zigne rnitloaque grë ma, <sup>13</sup> por grëtaa guieñtseeb, grëtaa guieyozh ne squitaa rley zho ruñ zho haxta zobna ngbidz.

Miech mbixladza, miech ngubeeguieñtow, rquiaalose zho miech wen nac zho zeene riaadsobnie zho to lo zhilni to. <sup>14</sup> Wnaa ne ganñaa zho, pe na gzoobladd zho tsonie zho wnaa co, tibaque quiayunñtal zho xtoj zho. Rio zho rquiil zho grë zha ne gard sodziits lo Xtiidz Dios; rieñle zho zha gla zho ncuaane rquiin lo zho. Miech ndziibdeele nac zho, <sup>15</sup> sac laa zho psaanle xnëz Dios, nëz ne nitlole zho no zho; lëe zho ruñ xcuent Balam, xpëed meñ ne lë Beor. Tel Balam, haxta miñe nongueñdraa been me par guñ me gan dimi; <sup>16</sup> per bdziñ tib dze zeene laa Dios blisqui lo me grëtaa ncuaane quiayun me ga. (Bnabey Dios lëëque xpurr Balam bnee, dzigoraa bien Balam psaan me xquieyozh me ga.)

<sup>17</sup> Masaque nac zho zig nac grë bzie ne bidzle nis, zig nacgaa xcow bidz ne nëzrii nëzrec zienie me; ni lalnu paat rquiind zho. iLaa zho nole guey zho lo guieñcowdoo ne rieguiaj zho, zaatne gdziñdraa dze griee zho!

<sup>18</sup> Niats rzë xtiidz zho, per ncuaane paat rquiind rnee zho. Miñe mazdraa mban ruñ zho, rio zho lëëque lo grë guieyozh ne rdeed guxt xcuerp zho rquiil zho grë zha ne pense brie lo dol, rlozh ga rbiire riab zha co lo grë dol co stib. <sup>19</sup> Rnee zho zac tel zhataa gban ne, nodne gnabey xley Dios ne. Rzac zho na choot rnabeyd zho, ni rieñd zho dol quianabey lo zho; sac grëse zha ne gacdraa csaan tel pe grë guieyozh ne ruñ zho, lëële grë ncuaan co rnabey lo zho. <sup>20</sup> Tib zha ne sca briele lo grëtaa ncuaane ndzinlid ne no lo

guidzliu rii (porne bliladz zho Jesús, meñ ndzon ne rnabey, meñ ne rsilaa miech lo dol), ni gbiireque zho gdeed zho diidz guiab zho low gnabeya zho, mban goñ tsie zho; sac dzigole mazdraa mban guiaañ zho. <sup>21</sup> Lëda ga goñ, telne gocnañle zho zha racladz Dios gban zho, ni lozh ga csañ zho xtiidz me tib lad, gbiire zho tso zho lo grë ncuaan yozh ne been zho glo. Nroobdox caxtigw ne gañ zha co, mazd zhi miñe ygaa zha ne gocnañd zha nac xtiidz me. <sup>22</sup> Zha copaa nagon ruñ miñe rnee diidz ne znu rëb: "Nandraaque mëcw, ncuaane bdzible ma rbiire ma row maw"; ni stib miñe znu rnee: "Ngutszhe, rlozhle raz ma nis mbe, ni rlozh ga riegaaque ma lo nis beñ."

### ¿Zha nacne gard guiaad Jesús?

**3** Bets, bzian, golgañ gañle lëële guits rii raca chop zixeñ naa. Gropse low, rso naa diidz lo to tsoxco to zaacse gban to, ine niini gac guic to. <sup>2</sup> Golñsoladz gañle, zha nac grëse miñe bnee grë zha ne biadteed xtiidz Dios padzeela; golñsoladz zha nac grë miñe rnabey Jesús, miñe biadseed no to. (Jesús, meñ ndzon ne rnabey ne, meñ ne psilaa ne lo grëtaa xtoj ne.)

<sup>3</sup> Racladz naa gacnañ to gañle, len dze ne ziaadyob guiaad Jesús, zrieequia zha ne gzhidznie xtiidz me, csilo zho guñ zho grëtaa guieyozh ne gzoobladz zho; <sup>4</sup> guiab zho: "iPe gliladz ne nazho guiaad Jesús! Telne nli rëb me laa me guiaad, zyo me na? Grë xmenñgol ne, zha ne scataa pquiambëz me, laa zho gutle, zcho na zho guiaad? Znutaque nac lo guidzliu wlal ne brew."

<sup>5</sup> Squiaalo zho rsoladd zho zha bnitlole guidzliu tib vuelt, ni zhagaa nitlo miñe no niina. Wen wen nañ zho gañle zha bnabey Dios baa guidzliu, me bnabey brieew lo nis, ni masaque lo nis now; miñcocxe waa nis bnitlow glo. <sup>7</sup> Scaque, nacle xtiidz Dios, zigtaa gbaaw, zigtaa guidzliu ne no niinaw, laaw nitlo, per lo guile nitlow; ni lo gui co nagon ygaa grëse zha ne ruñ guieñtseeb ted zho caxtigw.

<sup>8</sup> Zha ne rzac quiayaanladz Jesús diidz ne psañ me ga, per led quiayaanladz mew; sinque laa me quiambëz tebaa grëse miech gac-wen lo me. Laa me racladz, grëse zho csaan xquieñtseeb zho, zeena ni tib zho nitlod. Bets, bzian, nañle to gañle led yed me ngab xtse. Sac tel me, ncuaane guñ ne tib milraa iz, tib dzeque guñ mew; nroob rzac ne tib mil iz, per par me rzacse mew, lal ne rzac ne tib dze. <sup>10</sup> Ib laa me no guiaad, per choot nañd dieñ pa horpaa guiaad me; laa me guiaad zig rzëebse tib ngbaan yu, tibaque zeene gañ miech laa me ziaadle. Grëse ncuaane no, hor co laaw lozh; bidox ne gdzieb ne tso zeene laa gbaa nitlo; grë mel ne ndziib gbaa, masaque gazbel ma; haxta guidzliu, dib nacsew laaw tsec.

<sup>11</sup> Scataa nagon nitlo guidzliu rii, ni grëraa ncuaane rdziañ ne niina, i golñguieñ sca golñban zigne racladz meñ ndzon ne rnabey ne, guñtaldras to xtoj to! <sup>12</sup> Tibaque golñconie guic to ne ib laa me no guiaad; tibaque ndzinli golñban, golñlu ne quiambëz to gdziñniob dze ne sca gazbel grë ncuaane ran ne gbaa, dze ne sca tib guiaañse grë ncuaane niaaw. <sup>13</sup> Horco nagon

laa ne dzian tib gbaa cub, laa ne dzian tib guidzliu cub ne psanle me diidz ygaa ne; zaatne tsodraa guie|ntseeb.

<sup>14</sup> Bets, bzian, nligaa go|tsoxco ndzinli go|ban, guñc-talde to xto| to; niowse go|bannie samiech to, zeena ga| dze ne laa Jesús guiaad, ine gleyne me to gan me mban to zigne racladz me. <sup>15</sup> Go|soladz ganle, porne quiambëz me gbig grëraa miech lo me csilaa me zho lo do|, miñ co gane gard guiaad me.

Ye bets ne Pabl, meñ ne nziuu lo ne, lo grë guie|biini ne rdeed Dios lo me rquiaa me grë guits ne zixeel me, zineele me lo to grë miñe none naa nu. <sup>16</sup> Parga nli no miñe rnee me ga, ngañ guieñ ne zha naca; grë zha ne rdziinpaa racladz ctsëë Xtiidz Dios, zeene laa zho

rneew, laa zho rneelew zigne racladz zho; zigne ruñaque zho grëraa miñe zhobnee lo Xtiidz Dios. Zha ne sca ruñ, lëëque zha noguib nitlo zho ga.

<sup>17</sup> Laa naa rzet grë miñ rii lo to nu, zeena nsin so to, ib gdeete to diidz cho grë zha ntseeb ne sca nac guiaadquidie to, yquiil zho to csaan to miñe nac diidzli, csaan to nëz ne ziele to i. <sup>18</sup> Go|tsoxco zig zie dze guieñraa to pa lotaa rleyne Dios to, ni guieñraa to cho nac Jesús, meñ ndzon ne rnabey ne, meñ ne psilaa ne lo do|.

Me nac meñ non, me nac meñ nziuu, ible me rieguiäl guñnon miech, zigtaa niinaw, zigtagaa grë izdoo ne zi-aadraaw. Sca rieguiälä.

Pedr



# 1 JUAN

¡Diuzh to!

Laa naa gzodiidznie to ganle cho nac Jesús.

**1** Jesús nac Diidz Ndzon ne rdeed guielmban. No-taque me, nole me zeene bre guidzliu. Bdzin dze biaad me lo guidzliu; grop diag no bdzion no grë mine bnee me, grop lo no bdzion no grë mine been me; sac bdzionpaa no zha rac me, zha rnee me, haxta bzhieen no nia me. <sup>2</sup> Ni niina laa no quianee lo miech ganle cho nac me; golgacnan ganle, me rneedz tib guielmban ne gdzind dze lozh. Zaatne no Dios men ne nac Pxoze, ga no me; zeene biaad me lo guidzliu dzigo bdziunbey no me. <sup>3</sup> Gacxe waa, mine rnee no lo to led lega rneed now; nozhal bdziona, nozhal bdziona. Laaw rnee no lo to, zeena tipse gac ne grë ne, gacnie to no zigne nacie Dios no (men ne nac Pxoze), zigne nacie Jesús no, men ne nac Xpëed me. <sup>4</sup> Laa naa rnee grë min rii lo to lo guits ne rxel naa nu, zeena zigne nonley zdoo no scaquegaa to tsonley zdoo to.

<sup>5</sup> Znu nac mine bdzion no pseed Jesús miech, rëb me: Nac Dios zig nac tib biini, ni tib lë guielcow guien d zaatne no me; laa grë dol, masaque naca zig nac guielcow. Ni mincoque gon rnee no lo to. <sup>6</sup> Gacxe waa, telne rnee ne naciele ne me, ni rlozh ga tibaque lo guielcow co no ne, rquidie ne ga dzigo. <sup>7</sup> Telne nlipaa mban ne lo xbiini me, zigne mban Jesús lo biini co, dzigosi haxta tipse nac ne grë ne; ni scagaa, xchen Jesús nac mine csañmbe ne lo grëtaa xtol ne.

<sup>8</sup> Nana tel guiab ne: Tel naa ib peet dol rapd naa. Lëëque ne noquidie ne ga, rneelid ne ga zha nac ne. <sup>9</sup> Sangue telne cxobdol ne grëse xtol ne lo Dios, ible tedsod silaa me ne lo grëtaa dol co, sañmbe me ne lo grëtaa guielntseeb ne zidziuuñ ne; sac ible laa Jesús gut par csañmbe me ne. <sup>10</sup> Telne sca guiab ne rapd ne dol, rrieequia dzigo rzoob ne Dios zig tib men ne rquidie; sac tel me, nanpaa me grëse ne miech ngoopdol nac ne.

**2** Xin yeena, laa naa rso diidz lo to: Guñctaldras to xtol to; telne nan d gaa new cho tib to zha been pe tib dol, gojsoladz ganle no tib men ne quianab lo Dios men ne nac Pxoze ne yquia zdoo me ne, lëë men co nac Jesús, lo me golbig (tel me ni tib dol rapd me). <sup>2</sup> Sac me bded grëtaa guielnë ne rioguañ ne ndieed ne por grëtaa xtol ne, psañwen me ne lo Dios; me goc zig tib gon ne pcaania Dios gozh grëse xtol ne, ni xtol grëraa miech ne ndxie dibdoose lo guidzliu.

## Golleynie samiech to

<sup>3</sup> Golgona ganle: Telne run ne grëse mine rnabey Dios, gase rien ne nli xnëz me no ne. <sup>4</sup> Laa tel zha ne rnee: "Xnëz me no naa", ni rlozh ga rund zho grë mine rnabey me, rquidie zho ga. <sup>5</sup> Sac zha ne nli rleynie Dios, rioxco zho rban zho zigne nac xtiidz me; ni tel ne, ndion ne ganle nli xnëz me no ne. <sup>6</sup> Gacxe nagon waa, zha ne rnee xnëz me no zho, ib none zacse gban zho, zigne wban Jesús zeene biaad me lo guidzliu.

<sup>7</sup> Bets, bzian, golgacnan ganle, none gleynie to samiech to. Guiabde to togo ncub mine rne naa lo to nu gun to, laa naa rzet mine binle to glo zeene psilo pquiaadiag to Xtiidz Dios. Niicle ne padzeelale zhobneew, niicle ne pquiaadiagle tow, <sup>8</sup> per rrieequia ncuba niina; sac gon zeene biaad Jesús, me blu ganle zha none gleynie ne samiech ne. Ni scagaa niina ne laa to zianañ, laa to noriee lo guielcow ne no to glo, laa to nozëeb nëz lo xbiini Dios.

<sup>9</sup> Ga nagon, tel zha ne rnee lo biini co mban zho ni rlëenie zho samiech zho, rquidie zho ga; bii lo guielcow ga mban zho. <sup>10</sup> Zha ne rleynie samiech, zha cosi nli lo biini co mban zho, noxtseebd lega tsobe zho, sac ranpaa zho pa lo zie zho; <sup>11</sup> sangue zha ne rlëenie samiech, lo guielcow ga no zho. Masaque nac zho zig zha ne rold lo, niicle zha rien d dien pa nëz tsie zho, sac guielcow co quiantse lo zho.

<sup>12</sup> Xin yeena, laa naa rne grë min rii lo to, sac gon, tel to laa Jesús bdiizhle tel pe nactaa grë xtol to. <sup>13</sup> To ne nac to dad, laa naa rxel diidz rii lo to, porne nac to zha ne riladzle Jesús, nanle to ganle notaque me, nole me zeene bre guidzliu. Togaa ne nac to zha nguieg, laaw rxel naa lo to, sacne nligaa dziits zo to, rriee lodraa men d ox yquiiil ma to. To ne nac to mëedlas, xin yeena laa naa rxel diidz rii lo to, porne nac to zha ne nole xnëz Dios men ne nac Pxoze ne.

<sup>14</sup> Nana sca, zigtaa tow ne nac to dad ne runbeyle Dios; zigtagaa tow ne nac to zha nguieg, ne nataa ndip ndaan to laa to pcaaniale Xtiidz Dios dib zdoo to, ne nac to zha ne lëbdraa men d ox yquiiil, <sup>15</sup> golguien, gleyniede to grë ncuaañ rap to, gleyniede to grë ncuaañ ndzinlid ne rac lo guidzliu rii. Zha ne rleynie grë ncuaañ co, nliid rleynie zho Dios men ne nac Pxoze ne; <sup>16</sup> sac grëse ncuaañ rac lo guidzliu rii (zig nac zha ne zianañ ncuaañ gdeedguxt xcuerp, zha ne rzoobladz yquianie ncuaañ rdziladztaa, zha ne racnats lo samiech), grëse ncuaañ co led Diosd rnabeya,

sinque lëe miñe rzonał grëraa miech lo guidzliu ga. <sup>17</sup> Ni na tel zig nac guidzliu, zig zie dze laaw quialozh grëw grë ncuaañe rleynie miech low; sangue zha ne mban zigne rnabey Dios, laa zho bgaale tib guielmban ne gdziñd dze lozh.

### Zha ne rlëenie Jesús

<sup>18</sup> Xin yeena, zhile gdziñ dze ne laa guidzliu nitlo. Led binle to ganle ib zrieequia tib zha ne glëenie zhiwseed Jesús, ni nligaa niina leñ dze rii ndal-le zaatne norieequia grë zha ne rsilo quiatsidil Xtiidz me; gane ndion no ne laa dze co ziaadgaxle. <sup>19</sup> Nli ladaque zha ne nacgrë ne brieë grë zha co, per nlid naciepaa zho ne; sac tel niaca miñe nlipaa nacie zho ne, nrieextsod zho. Ga nagon blu zho ne nlid nacgrë zho ne.

<sup>20</sup> Sangue to, nacde to zig nac grë zha co, sac nacie Espiritu Sant to, bneedz me guielbiini lo to runbey to miñe nac diidzli. <sup>21</sup> Guits ne rxel naa lo to nu, nacda par cseed naa to miñe nac diidzli, sac runbeyle tow ni haxta rien to pa miñ nac guielwquidie; sinque laaw ziaad lo to par gacnañ to ganle zha nac zha ne noquidie i.

<sup>22</sup> Grë zha ne rnee i nlid lëe Meñ ne zëëble diidz cxeel Dios lo guidzliu ga nac Jesús, noquidie zho miech ga. Ni zha ne sca run, rlëenie zho me ga; ni ne sca rliladz zho cho nac me, yelex me ga rliladz zho. <sup>23</sup> Sac zha ne rlëenie meñ ne nac Xpëed Dios, ga rlu ne nlid rliladz zho cho nac Dios; sangue zha ne rxobneñ cho nac Xpëed me, zha cosi nli rliladz zho cho nac me.

<sup>24</sup> Laa naa rso diidz lo to sca: Goltsienal grë miñe pseed to zeene glopaa psilo bliladz to Xtiidz Dios, zeena zigtaa Dios, zigtagaa Xpëed mew, tibaque gbanie to me. <sup>25</sup> Golsoladz ganle, laa Jesús psanle diidz ne ib zгаа ne tib guielmban ne gdziñd dze lozh; lëe guielmban co yгаа grëse zha ne nacie me.

<sup>26</sup> Laa naa rzet miñ rii lo to, sac ne squi no grë zha ne ziaad racladz yquidie to. <sup>27</sup> Sangue to laa Jesús pxeelle Espiritu Sant nacie to, rquiind ne goon chora cseed to; sac Espiritu Santzhal nneedz guielbiini lo to rien to zha nac grëraa ncuaañe no gacnañ to, ni mesi gon miñe nac diidzli miñ co rseed me to, led yed me rquidie. Golguien sca, Jesús golbannie, golbannie me zigne noseed Espiritu Sant to.

### Zha ne nac xpëed Dios

<sup>28</sup> Xin yeena, nanle to sca sozite to lo Jesús, sinque tibaque golgacnie me; zeena iñe tibliladz gac to gal dze ne laa me guiaad. Sac zha ne sozit lo me gban zho zigne gacladztaa zho, zeene laa me guiaad mban gac zho; sac guielto ne guiaan zho lo me. <sup>29</sup> Nanle to ganle, mesi zigne rieguial gac guielwxtis sca run mew; gacxe waa, grëse zha ne nac xpëed me ible zdeed me miñe rieguial zho.

**3** Golwi ganle pa lotaa rleynie Dios ne, laa me nneedz diidz laa ne gac mëed lo me. ¡Ni nligaa tel ne, xpëedle me nac ne! Grëraa miech rliladz zhow, sacne runbeyd zho cho nac me.

<sup>2</sup> Bets, bzian, ne nligaa xpëedle Dios nac ne. Nli ndiond ne niina dien zha glu ne gal dze ne laa Jesús guiaad, per miñe ndionpaa ne, zeene gal dze co laa ne gac zigne nacpaa me; ni dzigosi laa ne dzian me grop lo ne. <sup>3</sup> Ni grëse zha ne zienie guic yгаа guielnzaac co, tibaque rioxco zho zig zie dze nosaan zho ncuaañe runctal xtoł zho, sac tel Jesús ranzed me dol.

<sup>4</sup> Grë zha ne runctal xtoł, xley Dios ga rguits zho, sac grëse dol ne runtaa miech ga rlu ganle ne rond zho miñe rnabey me. <sup>5</sup> Per nanle to ganle, laa Jesús biaad lo guidzliu, biaadsilaa me miech lo grëtaa xtoł zho; ni mesi ni tib dol rapd me. <sup>6</sup> Gacxe waa, zha ne nlipaa nacie me, zienaldraa zho ncuaañe gunctal xtoł zho; laa grë zha ne tibaque noyuncal xtoł, gase rlu ne gard guien zho cho nac me, gard gunbey zho me.

<sup>7</sup> Xin yeena, ib gliladzde to miñe rnee zha ne racladz guiaadquidie to. Golgan ganle, zha ne mban zigne rdziladz Dios, lëe zha co nli mbe zdoo, zigne meñ mbe nac Dios; <sup>8</sup> sangue grë zha ne tibaque quiayuncal xtoł, xnëz menodox ga ngab zho; sac tel menodox, desde padzeela tibaque guielntseeb quiayun ma. Ni miñ co nagon nacie biaadpaa Xpëed Dios lo guidzliu, biaadnitlo me grëtaa ncuaañe run ma. <sup>9</sup> Zha ne nac xpëed Dios, rdeetraa zho diidz gunctal zho xtoł zho, sacne laa guic zho zienie gban zho zigne racladz Espiritu Sant, meñ ne nacie zho; rienle zho nodne gunctal zho xtoł zho, sac laa zho nacle xpëed Dios.

<sup>10</sup> Nieenpaa cho nac xpëed Dios, chogaa nac xpëed menodox, sac grëse zha ne run guielntseeb, grëse zha ne rleynie samiech, led xpëete Dios nac zho; <sup>11</sup> sac gon, desde dze ne psilo bliladz to Xtiidz Dios, bingazh to ib none gleynie ne samiech ne. <sup>12</sup> Zig nac Caín, xnëz menodox ngab Caín, gane beet me bets me loxaque ne ndzinli mban bets me, laa me niapse guielntseeb run me. Ib gunde to miñe been Caín. <sup>13</sup> Gacxe waa, bets, bzian, zeene gan to laa grëraa miech rlëenie to, ib tsode to zhgab guiab to pe nacie sca run zho.

<sup>14</sup> Sangue ne rleynie ne samiech ne, gane ndion ne noxtseebdraa ne guioo ne gabil, laa ne bgaale tib guielmban ndzon ne gdziñdraa dze lozh; sac zha ne rleynie samiech, nëz ne nitlo zho ga zie zho. <sup>15</sup> Grë zha ne sca rlëenie samiech, rrieequia rut zho ga, ni nanle to ganle zha ne rut samiech, gard yгаа zho guielmban ndzon ne gdziñd dze lozh ga. <sup>16</sup> Ndion ne zha gleynie ne samiech ne, sac Jesús zhal blu zhaw zeene sca bleeladz me me gut me bdiizh me xtoł ne. Gacxe waa, zha ne nlipaa rleynie samiech, none cueeladz zho zho, cueeladz zho ncuaañe rap zho, gacnie zho samiech zho. <sup>17</sup> Gzoob ne, tib zha ne rnee xnëz Dios no zho, nroob rapchen zho, ranlo zho rcaalsad pe yquiiñ tib zha ne nacgrë zho, per ib rdeete zho palal pe yquiiñ zha co. ¿Niacxe na nli rleynie zha co samiech zho ga? <sup>18</sup> Xin yeena, golgacnañ sca ganle, led loxaque diidzde, led loxaque laglaadse gnee ne rleynie ne samiech ne; sinque none glu ne nli rleynie ne zho.

<sup>19</sup> Sca nagon none dziuun ne, dzigo niicle new ndionpaa ne nli xnëz Dios no ne, ni scagaa tsod pe nacie pe dzeb tsonie zdoo ne zeene laa ne gbig lo me. <sup>20</sup> Tel zha

ne rdzieb zdo, sac rien zho noyund zho miñe rnabey Dios, ib tedsod zlisqui Diosa lo zho; sac tel me grësew nan me. <sup>21</sup> Xin yeeña, laa zha ne desde zdo zho nan zho noguiitsd zho miñe rnabey me, scagaa tibliladzse gbig zho lo me; <sup>22</sup> hor cosi ncuaañe gnabtaa zho lo me squiaadiag mew, sacne mban zho zigne rnabey me, ni noxco zho noyund zho ncuaañe rdziladz me. <sup>23</sup> Ni lëë miñ rii rnabey me: Grëse miech, none dib zdo zho gliladz zho Jesús meñ ne nac Xpëed me, ni gleynie zho samiech zho zigne psanle me diidz ga. <sup>24</sup> Grë zha ne ron diidz ruñ miñ co, ga rlu ne nlipaa mbannie zho me, ni scagaa me mbannie me zho. Ni ndion ne ganle, ib nli mbannie me ne, sac pxeel me Espíritu Sant nacie ne.

**4** Bets, bzian, zha ne gnë zhiEspíritu Dios nacie zho, goon ye zho quianee Xtiidz me lo miech; ib guñde to ne lëëlëd gliladz to xtiidz zho, sinque golwigazh dieñ pe nli zhiEspíritu Dios nacie zho. Sac ndal grë zha ne quianzë lo guidzliu, rquidie zho rnee zho Xtiidz Dios noteed zho. <sup>2</sup> Parne guieñ to dieñ pe nli zhiEspíritu Dios nacie zho, golwi dieñ zha rzac zho Jesús: Tel zha ne rliladz ne nli zig tib miech goc me biaad me lo guidzliu, ga rlu ne nli zhiEspíritu Dios nacie zho. <sup>3</sup> Laa tel rliladz zho ne nli sca biaad me, nlid dzingo zhiEspíritu Dios nacie zho; sinque lëële espíritu ne rtsidi! Jesús ga nacie zho. Laa to binle ganle ib laa espíritu co guiaad; ni lëële espíritu ntseeb co nacie grë zha ne squi quianzë lo guidzliu niina.

<sup>4</sup> Xin yeeña, sangue to xnëzle Dios ngab to, yquidiedraa zha co to, sac gon mazdraa nroob poder rap meñ ne nacie to, lëdle espíritu ne nacie grë zha ne sca ziana! grë wseed yozh ne no lo guidzliu. <sup>5</sup> Grë zha co, ncuaañe rac lo guidzliu rii nonie guic zho; gacxe waa, niapse lëew rnee zho, ni gagaa grëque zha ne rleyne grë ncuaañ co, zha co rliladz zhiwseed zho. <sup>6</sup> Sangue ne xnëz Dios no ne. Ni scagaa zha ne ruñbey Dios, zha co rquiaadiag miñe rnee ne; laa grë zha ne ruñbeyd me, rquiaadiagd zhow. Gase na ganle rlu cho zha nacie zhiEspíritu Dios, ni cho zhagaa nacie espíritu ne ziaadquidie miech.

### Rleyne Dios miech

<sup>7</sup> Bets, bzian, golgotsaa gleynie ne samiech ne, sac gon, tel Dios grëse ne rleyne me ne. Gacxe waa, zha ne rlu nli rleyne zho samiech zho, gase rlu ne nli xpëed Dios nac zho, nli ruñbey zho me. <sup>8</sup> Laa grë zha ne rleyned samiech, ruñbeyd zho Dios ga gane sca ruñ zho; sac gon ib Dios rneedz guie!biini lo ne gleynie ne samiech ne. <sup>9</sup> Gotsaa gwi ne ganle, pa lotaa rleyne me ne: Tibpaa Xpëed me, ni pxeel me me biaadtizh me xto! ne, zeena ygaa ne tib guie!mban ndzon ne gdziñd dze lozh. <sup>10</sup> Led guiabd ne togo glo miech bleynie Dios gane rleyne me zho niina; led scada, sinque ible zdo me gola rleyne me ne. Ne nligaa gotsaa gwi ne ganle zha pxeel me Xpëed me, goc me zig tib gon ne gozh grëse xto! ne. Ga nagon rlu pa lotaa rleyne Dios ne.

<sup>11</sup> Bets, bzian, zigne scataa rleyne Dios ne, scaquegaa ne nagon none gleynie ne samiech ne. <sup>12</sup> Gard tso

tib zha ne gan Dios, per zha ne rleyne samiech, me ga nacie zho; ni zigse zie dze dib zdooraa zho rleyne zho samiech zho.

<sup>13</sup> Me nac meñ ne pxeel zhiEspíritu me nacie no, parne glu nacie me no, ni scagaa no nacie no me. <sup>14</sup> Ni stiba, grop lo no bdzion no biaad Xpëed me biaadsilaa me miech lo dol; ni miñ co nonee no lo miech niina. <sup>15</sup> Grëse zha ne rliladz Xpëed Dios nac Jesús, ni rnee zhow lo miech, ga rlu ne nacie Dios zho, ni scagaa zha nacie zho me.

<sup>16</sup> Ndion ne ganle nli rleynedox Dios ne, sac rienpaa ne rleyne me ne, ni rliladz ne zeene rnee me pa lotaa rleyne me ne. Ible niaa me par gleynie me, me rdeed guie!biini lo miech gleynie zho samiech zho, zigne rleyne me zho; gacxe waa, zha ne rleyne samiech, ga rlu nacie zho Dios, ni scagaa me nacie me zho. <sup>17</sup> Zig nac ne, niina ne laa ne naciele Jesús, zig zie dze laa ne lozh cseed gleynie ne me, ni gleynie ne samiech ne zigne racladz me; ni scagaa tsod pe nacie ctoladz ne, pe nacie gdzieb ne gdziñ dze ne laa me gon xquie!wx-tis me; sinque haxta gley ne dziañ ne me gal dze co.

<sup>18</sup> Nod pe nacie gdzieb ne me, sac gon ndion ne pa lotaa rleyne me ne. Led yedraa niina pe dzeb ne dzio ne, sac grëse dzeb rbiche zeene rien ne rleyne me ne. Zha ne rdzieb, zienie guic zho pe nac grë guie!ñe ne gan zho, ga rlu zho gard guieñ zho ne rleyne me zho, ni gardgaa guieñ zho gleynie zho me.

<sup>19</sup> Gotsaa guieñ sca ganle, nli laa ne rleyne Dios, laa ne rleyne samiech ne, per glo me blu ganle pa lotaa rleyne me ne. <sup>20</sup> Tel zha ne rnee, rleyne zho Dios, ni rlozh ga rlëënie zho samiech zho, rquidie zho ga. Sac gon, tel nanñd zho gleynie zho samiech zho, zha ne ranlopaa zho, zpe lel Dios dzigo gliladz ne nli rleyne zho, ni nac me meñ ne ranñd zho? <sup>21</sup> Sac gon, znu nac xtiidz Jesús: Zha ne rleyne Dios, zigne rleyne zho me, scaque none gleynie zho samiech zho. Ni miñ rii rnabey me dziuun ne.

### Zac csaan ne ncuaañe ruñctal xto! ne

**5** Grëse zha ne dib zdo rliladz ne ible lëë Meñ ne zëëble diidz cxeel Dios lo guidzliu ga nac Jesús, grëse zha co xpëed Dios nac zho.

Grëse zha co, par guieñ ne dieñ pe nli rleyne ne zho, none guieñ ne dieñ pe nli rleyne ne Dios, dieñ pe nli ruñ ne miñe rnabey me. Nac cuent rii, zig nac tib yu miech, zha ne rleyne pxoz mëed, scaquegaa rleyne zho mëed. <sup>3</sup> Sac zeene rleyne ne Dios, zuñ ne grëse miñe rnabey me. Ni grë miñe rnabey Dios, nacda ncuaañe guiab ne grielod gon ne; <sup>4</sup> sac grëse zha ne nacle xpëed Dios, totsaque rnalo zho ne Jesús gon xyudar zho, gac-wetraade zho lo grë ncuaañe gunctal xto! zho. <sup>5</sup> Golgacnan sca: zha ne dib zdo rliladz Xpëed Dios nac Jesús, zrieelo zho csaan zho grëtaa ncuaañe ruñctal xto! zho.

<sup>6</sup> Tel ne, ndion ne ni rliladz ne ganle nli Xpëed Dios nac Jesús, sac zeene biaad me horne norobnis me, horne nolozh me, ga blu ganle cho nac me. Ni ye Es-

píritu Sant nolu ganle ne scaw, ni miñe rnee me diid-zliw.

<sup>7</sup> Gotsaa gwi sca ganle, tson mod rlu cho nac Jesús: Tiba por miñe nolu Espíritu Sant, stiba por miñe blu zeene norobnis me, ni stiba por miñe blu zeene nolozh me. Zigtaa miñe nolu Espíritu Santa, zigtaa zeene brobnis mew, zigtagaa zeene nolozh mew, blu ganle Xpëed Dios nac me. <sup>9</sup> Miñe rnee Dios, none gliladz new. Xtiidz samiech ne name rliadz ne, ¿pe lel miñe rnee Dios dzigo gliladz ne? <sup>10</sup> Zha ne gliladz miñe rnee Dios, rriequia rzoob zho me ga zig tib zha ne rquidie; sangue zha ne gliladz miñe rnee me, zien zho ganle nli Xpëed me nac Jesús. <sup>11</sup> Laa me bneele ganle: zha ne gnalo Xpëed me, zgaa zho tib guielmban ndzon ne gdziñd dze lozh; sac Xpëedse me rdeed guielmban co. <sup>12</sup> Gacxe waa, zha ne rnalo Xpëed me, laa zho bgaale guielmban ndzon co; sangue zha ne rnalod Xpëed me, gard ygaa zhow.

#### Bgaale to guielmban ne gdziñd dze lozh

<sup>13</sup> To ne nac to zha ne rnalole Xpëed Dios, laa naa rzet miñ rii lo to zeena gacnañ to ganle laa to bgaale guielmban ne gdziñdraa dze lozh ga. <sup>14</sup> Ni scagaa, ndionpaa ne rquiaadiag Dios xtiidz ne, zeene ncuaane

rio zdoo me rnab ne lo me; <sup>15</sup> ni zigne ndion ne rquiaadiag me xtiidz ne, scaquegaa none gliladz ne ib zneedz me ncuaane rnab ne.

<sup>16</sup> Zig nac zeene gan to cho tib zha ne nacgrë to been pe tib dol, ni rlu nacda dol ne gnitlo zho, zac gnab to lo Dios guñ me zho perdon; ni gacnañ to ganle, ible zuñ me zho perdon. Sac goñ no dol ne rnitlo, ni zha ne guñ dol co, nodne gnab to lo Dios guñ me zho perdon.

<sup>17</sup> Nli grëse guieñtseeb dol naca, per no miñe rnitlod miech. <sup>18</sup> Ni ndion ne ganle, zha ne nacle xpëed Dios rundraa zho ne lega guñctal zho xtol zho; sac Jesús meñ ne nac Xpëed Dios, meñ co quianap zho, grieelodraa lega pe guñ meñdox zho.

<sup>19</sup> Zig nac ne, ndionpaa ne xnëz Dios no ne. Nli ndalraa zha ne zienañ ncuaane rnabey meñdox, <sup>20</sup> sangue ne, laa Xpëed Dios biaad bdixbiini me xquieñrien ne bdziuuñbey ne meñ ne nacpaa Dios. Niinasi laa ne ngable lo meñ ne nacpaa Dios ga, ni lëe me ga nac Jesús. Me nac Dios nguiamban, ni me nac meñ ne rdeed guielmban ndzon ne gdziñd dze lozh.

<sup>21</sup> Xin yeeña, golguien Diosse nac meñ ne gleynie to; guñde to ne lel grë ncuaane no lo guidzliu rii gleynie to, laa ne gleynie to Dios.

Juan

## 2 JUAN

¡Diuzh to grëse to!

<sup>1</sup> Laa tib zhagol rii rxeeł tib guits rii ziaad lo to i, ne nac to zha ne no xnëz Jesús. Dios bzooblo to, bredz me to ne laa to ngab xnëz me.

Ne nlipaa rleynie naa to gon, ni led naadsegaa, sinque ye grëraa zha ne runbey diidzli ne nac Xtiidz Dios. <sup>2</sup> Rleynie no to sacne tibaque nac diidzli ne rliladz ne, ni tsod dze ne csaan new.

<sup>3</sup> Dios ni Jesús men ne nac Xpëed me, me glu ganle pa lotaa noxco me to, zeena peet tsienied guic to, ni yquia zdoo me to; ni zunpaa mew, sac rleyniedox me to.

<sup>4</sup> Ne nlipaa gon bleydoo naa zeene gon naa nzian zha ne nocaania Xtiidz Dios i, noxco zho mban zho zigne nacpaa diidzli; zigne rnabey Dios men ne nac Pxo-oz ne.

<sup>5</sup> Bets, bzian, laa naa rnab lo to, golgotsaa gleynie ne samiech ne. Guiabd ne togo ncub miñe rne naa lo to nu gon to; sac gon, lëëquew ga bdzion ne zeene psilo bliladz ne Xtiidz Dios. <sup>6</sup> Telne nli rleynie ne Dios, dzigo none gban ne zigne rnabey me; gacxe waa, none niowse gban ne, iñe gleynie ne samiech ne, sac gon miñ co rnabey me.

<sup>7</sup> Ndal zha ne quianzë lo guidzliu niina, noquidie zho miech, rnee zho nlid goc Jesús zig tib miech zeene bi-aad me lo guidzliu. Nsin golso lo zho, sac gon notsidil zho miñe nac diidzli ga, rlëenie zho Jesús ga sca run zho. <sup>8</sup> Golguien, ib gdeete to diidz guiaadquidie zho to, zeena dziin ne quiayun to i gacda zhlëse. Goltsoxco tiblque golgac, zeena yгаа to grëtaa guiełnzaac ne no gneedz Dios lo to. <sup>9</sup> Sac gon, zha ne csaan miñe nacpaa zhiwseed Jesús, led xnëzdraa Dios ga no zho; ni scagaa, zha ne zienałpaaw zigne naca, zha cosi xnëz Dios ga, xnëz Xpëed me Jesús ga no zho. <sup>10</sup> Gacxe waa, zha ne guiaad lo to i ni tel ziaadnied zho wseed ne nacpaa Xtiidz Jesús, ycaaniade to zho. Ib gdeete to lidz to cuëz zho, ib tsode to gnee to pe diidz ne csanñziuu to zho; <sup>11</sup> sac telne sca gon to, rrieequia yele to rleynie grë zhiwseed yozh zho ga.

<sup>12</sup> Ndal grë ncuaane no gne naa lo to, per racladzd naa gzet naaw lo guits rii. Laa guic naa no guiałgan naa to i, dzigo mazd hor co naazhal gnew lo to; zeena nroob guiełbley ne dzio ne grë ne.

<sup>13</sup> Grë zha rii, zha ne bzooblo Dios bredz me zigne bredzaque me to bzëeb to xnëz me, laa zho rxeeł bdi-uzh lo to grëse to.

Juan

## 3 JUAN

¡Diuzh bets!

<sup>1</sup> Laa zha gol rii, pquiaa tib guits rii ziaad lo luu i gon Gay, ne nac luu tib zha ne nziuu lo naa.

<sup>2</sup> Bets, rnab naa lo Dios zigne squi wen mban luu nēz lo me, scaque zaacse grieequia grētaa ncuaane gun luu, ni gneedz me guie!ndaan lo luu. <sup>3</sup> Ne nlipaa bley naa, zeene baaad bla zha bets ne nu, bzodiidz zho lo naa squitaa ndzinli mban luu, tibaque noxco luu ziena! luu miñe nac diidzli. <sup>4</sup> Ne nligaa, nodraa pe stib conley zdoo naa zigne rleytaa naa zeene ron naa iñe niowse mban grē zha ne biane naa xtiidz Dios lo, ziena! zho miñe nac diidzli.

<sup>5</sup> Bets, ziyon naa squitaa tibaque noxco luu run luu xyudar grē zha ne nacgrē ne, ni mazdraa zeene nac zho zha ne ziaad stib guiedz. ¡Wen ga! <sup>6</sup> Squi ndxie grēraa zha ne riladz Jesús, rzodiidz zho squitaa nquial- adz luu zho. Bzhiguie! sca, bioxco tibaque squi been xyudar zho zeena griee!o gdziñ zho zaatne no tsie zho. Sca rdziladz Dios. <sup>7</sup> Sac gon, niapse porne rleyne zho Dios, laa zho brie ziegun zho xtsiiñ Jesús, ni ib rzigu- ie!d zho ycaania zho ncuaane rdeed grē miech ne riladz Xtiidz Dios. <sup>8</sup> Miñ co nagon, ib none ne yquiambiaazlo zho, ne none gdeed ncuaane yquiin zho, zeena dziuun ne xyudar zho ygaaz Xtiidz Dios.

<sup>9</sup> Pxelle naa tib guits lo grēse zha ne no xnēz Dios i, per zig nac Diótfrefes gon, meñ ne racladz so gnabey lo

to i, rond me miñe rnee no. <sup>10</sup> Gacxe na, te!ne laa naa guia! i, dzigo laa naa glisqui lo me dien pe nacne quia- neenē me no.

Ni tebaa miñcose, na haxta run me ib rbēzlod me grē zha bets, zha bzian ne rlanso i; niicle rdeetegaa me diidz cho gdeed zaatne cuēz zho. Zha ne rund miñe racladz me, rbee me zho lad grē zha ne nacgrē zho.

<sup>11</sup> Bets, sangue luu gon ib tsienald luu miñe run grē zha ne sca run guie!ntseeb, sinque bioxco güeyna! ncuaane ndzinli. Sac gon, zha ne run niapse ncuaane ndzinli, xnēz Dios no zho; laa grē zha ne run ncuaane ntseeb, gard sēēb zho xnēz Dios.

<sup>12</sup> Zig nac Demetr, grēse miech rnee ganle zaacse mban Demetr. Ni rlugaa nliw, sac gon tibaque ziena! me miñe nac diidzli. Niicle nogaaw, miñcoque rnee no, ni nañ luu ganle led yed no rquidie.

<sup>13</sup> Ndalraa ncuaane no gne naa lo luu, per racladz naa gzodiidz naaw lo luu lo guits rii; <sup>14</sup> sac laa guic naa no guia!gan niob naa luu i, dzigo hor co zodiidz ne grop ne.

<sup>15</sup> Guiaañnie Dios luu sca; peet tsienied guic luu. Grēse xamigw luu zha ne runbey luu nu, laa zho rxeel! bdiuzh lo luu. Scagaa bzhiguie! bdeed tib zhibdiuzh naa lo tib tib zha ne nac xamigw ne nēz qui.

Juan

# JUDAS

**1** Naa nac Judas, bets Santiagw; xtsiin Jesús quiayun naa.

Laa naa rxel guits rii lo to, grëse to ne nac to zha ne bredz Dios bzëëb xnëz me. Ne nligaa nquialadz me to, ni haxta quianap Jesús to.

<sup>2</sup> Dios glu ganle pa lotaa rquia zdoo me to, pa lotaa rleyne me to, ni pa lotaa noxco me to zeena peet tsienied guic to.

<sup>3</sup> Bets, bzian, miñe gocladz naa nzet naa nu ganle zha nactaa miñe been Dios psilaa me ne lo xtoj ne; per na rgobey naa nonguie|raaw cso naa diidz lo to, ib gandzede to grë zha ne rtsidi| miñe rliladz ne. Dios bneedz diidz gocndion new, ne nac ne zha ne brieë lo do| bziaab ne xnëz me. <sup>4</sup> Sac gon, blalaa zha ne rquiaa-lo rliladz Dios, ngeets zhliian laa zha bzëëb lad to i. Miech yozha, niapse lo do| no zho, rnee zho zac gun ne ncuaañe guiaabtaa guic ne, sac nquialadz Dios ne; ib rliladz zho Jesús, Meñ ro, Meñ nroob ne rnabey ne. Padzeelale goquiet, ne grëse miech ne sca nac, lëëque lo xtoj zho nitlo zho.

<sup>5</sup> Go|soladz ganle zha bzhaac grë zha ne gocntseeb lo Dios padzeela. Niicle ne nanle tow, per laaw gzet naa lo to nu, zeena csoladz tow: Zeene psilaa Dios grëse menladz ne lo guie|në ne noded zho Egipt ga, zha ne brieëquia ib bnëd niunbey me, ib gonzed me zho, bnitlo me zho. <sup>6</sup> Scaque grë anjl ne biche lo me, psaan zho dziin ne pso me zho; bdziguiend me zho, laa me nsioogyu zho tib lo guie|cowdoo, ga quiadoo zho haxta gdziñ dze ne laa me gun guie|wxtis. <sup>7</sup> Rsoladz to ganle zha goc guiedz Sodom, guiedz Gomorr, ni grëraa guiedz las ne bre gax ga. Grë miech ne bio grë guiedz co, laa zho güeyna| miñe nacdraa guie|t-sieel, tel| chotaa pquiangob zho, bionie zho haxta grë mrash; grëse zho, lo gui ga bnitlo zho. Ga rlu ganle, grëse zha ne csaand xquie|ntseeb, no tib lo guidox ne gdziñd dze guiuu, ni ga nitlo zho. <sup>8</sup> Ni zha ne gon blan-so lo to i, scadaa run zho; sac tel| zha, niapse guie|yozh ziana| zho, laa zho nosanbeed xcuerp zho, ib rond zho miñe rnee zha ne rnabey, haxta rdzibdee zho grë meñ non ne no gbaa. <sup>9</sup> Per ni anjl Miguel, anjl rnabey ne bdilnie menodox zeene güeyla me xcuerp Moisés, ib been d me ndziibdee me menodox; lëë gdib rëb me: "¡Dios nac meñ ne gunquizh luu miñe run luu i!" <sup>10</sup> Laa grë zha qui, haxta grë ncuaañe run Dios, ncuaañe ni r-oguidc zho zha nac, laa zho rdzibdeew; masaque mban zho zigne mban grë ma, laa zho run ncuaañe rdeedtaa guxt xcuerp zho; lëëque zha nonitlo zho ga. <sup>11</sup> ¡Probsaxe zho! Sac gon, nëz ne zey Caín ga ziana| zho. Lo guie|blë dimi, laa zho brieë xnëz Dios zigne

brieë Balam; ni zigne gut Coré zeene gocntseeb me lo Moisés, scaque nitlo zho.

<sup>12</sup> Zeene riaad zho lo guie|wagw ne run to, loxaque rzhidznie zho, loxaque runnguzee zho, rzob zho rlozhd gowcho zho, zieniedraa guic zho dieñ chora no gow; ni lalnu guie|to guieñd lo zho. Nëzrii nëzrec quianzë zho, masaque nac zho zig nac xcow ne ziaadnied nis-guie, loxaque nëzrii nëzrec rienie mew; zig nac tib yag bgool ne guieñd nex lo, len dze ne no yquia nex low. Laa zho bnitlole ga, masaque nac zho zig tib yag bidz ne bliadzle dib lo; sac tel| yag bidza, gdziñdraa dze ne yguiaw. <sup>13</sup> Zigne nëzrii nëzrec rchoon nisdoo grë mtsiin beed ne ndziib low, scadaa nëzrii nëzrec nolu grë ncuaañe mbeeguie|to ne quiayun zho. Laa zho ziele nëz lo guie|cowdoo ne rieguia| zho, zaatne gdziñdraa dze griee zho; zig tib mel gbaa ne bnitnëzle, laa ma nonziaabse lo guie|cow.

<sup>14</sup> Lëële zha qui ga bzeet Enoc (meñ ne brieëquia lo dii ne rac xoop xtii Adán), zeene psiaab Dios guic me, rëb me: "Go|wi ganle laa Dios ziaad, pe zhidaa grë anjl ne ziaadnie me, <sup>15</sup> ziaadgun me guie|wxtis. Grëse miech ntseeb, laa me gunquizh zho grëtaa do| ne been zho, grëtaa diidz dox ne brieë ro zho bneenë zho me." <sup>16</sup> Ni nligaa sca nac grë zha qui, ib nod ncuaañe tso zho conform, tibaque wlisqui no zho; laa zho ziana| grëtaa guie|yozh, ncuaañe racladztaa xcuerp zho. Rto zho guie|dzin, rlozhd dieen pa rac zho, rio zho pe diidz wen ne rnee zho lo miech, loxaque ne dieñ zha yquidie zho miech, gun zho miñe racladz zho.

## Laa naa rso diidz lo to

<sup>17</sup> Sangue to bets, bzian, go|soladz miñe bnee grë zha ne pxeel Jesús bnee Xtiidz me, zeene biadseed zho to; <sup>18</sup> led znu rnee zho: "Zeene zhile gdziñ dze ne laa guidzliu rii nitlo, zrieëquia grë miech ntseeb ne gzhidznie zhiwseed Jesús, laa zho gban zigne nactaa grë zhgab yozh ne guiab guic zho." <sup>19</sup> Ni nligaa ran to niina ganle sca quiayaca, lëë grë zha co i squi nogodi| grë zha ne no xnëz Jesús. Nacnied zho Espíritu Sant, gane niapse grë ncuaañe do| ne racladz xcuerp zho, miñ co run zho.

<sup>20</sup> Bets, bzian, go|guieñ sca tibaque dziits go|so lo Xtiidz Dios miñe rliladz to. Go|zodiidznie Dios, zigne csi-aab Espíritu Sant zdoo to. <sup>21</sup> Sozite to lo Dios, go|guieñ ganle zha rleynietaa me to; go|quiambëz dzian ne gal dze ne ygaa ne guie|mhan ne gdziñd dze lozh, miñe ndionpaa ne gneedz Jesús meñ ne rnabey ne, porne rquia zdoo me ne.

<sup>22</sup> Teḷ cho zha ne racchop guic lo Xtiidz Dios, goḷnee lo zho biire sodziits zho stib. <sup>23</sup> Zha ne bii no lo doḷ, goḷnee lo zho guieḅ zho csaan zhow; goḷcuee zho lo gui ne noxtseeb zho ygaa zho ga; scagaa grëraa miech, goḷquia zdoo zho, per ib cxende to lo zho. Ni lalnu gdziguiende to grë doḷ ne ruḅ zho, goḷsaca zig rzac to tib ncuaaḅe rbixnë zdoo to raḅ to.

<sup>24</sup> Tibaque Dios no, me psilaa ne lo doḷ, ni megaa csi-laa grëraa miech. Meḅ nroob nac me, ni zrieelo gac-

nieḅ me to guiabde to ladznia doḷ stib; zeeḅa iḅe mbe to, iḅe rley to laa me gdziḅnie to zaatne nac lo guieḅnd-zondoo ne no me. Niina ne laa ne rdziuuḅbeyle Jesús, zrieelo dziooḷnie ne me, mese nac meḅ nroob, meḅ ndzon, meḅ ne rap guieḷrnabey. Tibaque nac me, niicle mazd glow, niicle niinaw, ni gdziḅd dze ne gdzëe me.

Judas



# APOCALIPSIS

**1** Nu raquiet grë ncuuaḡe ziaadyoble gac. Dios bnabey Jesús glu mew lo grë zha ne no xnëz me. Nacne pxeel Jesús tib xanj l me biaad biaadluw lo ngundziin win ne nac naa nu, parne sca gacnaḡ zhow. <sup>2</sup> Grëse miḡe goḡ naa, grëse miḡe bin naa ga, laaw gne naa zigne goḡse naaw, zigne binse naaw. ¡Diidzliw! <sup>3</sup> Dichos grë zha ne glab lo guits rii, ni dichos grë zha ne yquiaadiag grë miḡe zhobnee low nu, ycaania zhow ni gliladz zhow; sac goḡ xtiidz Diosa, ni laa dze ne gac grë miḡe rzeeta nu, ziaadgaxle.

<sup>4</sup> Naa nac Juan, laa naa rquia guits rii rxe l naa ziaad lo to i, ne nac to zha ne ngab xnëz Jesús, zigne nose to gza gadz guiedz ne ndxie nëz Asia i.

Dios meḡ ne no padzeela, meḡ ne no niina, meḡ ne nacle diidz guiaad, me gacnieḡ to lo grë zhizhgab to, me cchoobladz zdoo to peet tsienied guic to; me ni Espiritu ne zo lo me zaatne nac lo xcan ndzon ne zob me; Espiritu ne rlu zha nac gadz guie l biini ne rap me; <sup>5</sup> ni Jesús meḡ ne rnee niapse diidzli, meḡ ne glopaa brieeban lo guie l gut, meḡ ne rnabey lo grëse zha non ne rnabey lo guidzliu.

¡Gotsaa dziuunnon ne Jesús! Sac goḡ pa lotaa rleynie me ne, bleeladz me me bzhiee xchen me psanḡmbe me ne lo grëtaa xto l ne, <sup>6</sup> tibaque beenḡ me ne, psanḡnon me ne; bzooblo me ne gac ne pxoz ne guḡ dziin lo Dios meḡ ne nac Pxoz me. ¡Mese nac meḡ ne rap guie l ndzon, mese rap grëtaa guie l rnabey! ¡Tsod cho stib zig me, ni gdziḡnd dze ne nitlo xquie l rnabey me! Sca nac me.

<sup>7</sup> ¡Bii zaḡaque to gaḡle zeeḡe laa Jesús ziad-zëeb lo xcow! Grëse miech zaḡ zho me, zig nac zha ne sca bdiḡ me, zha ne sca bliz lanz cue me, zaḡlo zho me; dibdoo guidzliu, hor co mbanse gac miech, haxta zoon zho, haxta dzidieb zho. Ible sca none gaca.

<sup>8</sup> Znu rnee Dios, meḡ nroob ne rap grëse guie l rnabey: "Grëse ncuuaḡe notaa, naa psilow ni naa csiaa l a; naa nac zigne nac letr "a" ni letr "z" lo grëse letr, "a" rsilow, "z" riala, zigne nac naa niina sca goc naa padzeela, ni scaque gac naa zeeḡe laa naa guial stib."

## Goḡ Juan Jesús

<sup>9</sup> Naa nac bets to Juan, tibaque nac ne niina grë ne, sac ye naa no xnëz Jesús; ye naa nodeed grë guie l nē ne noded to. Zigne rneedz me paciens lo to lēb to lo grëtaa guie l nē ne no gaḡ to, scaque racnieḡ me naa; ni ye naa gdziḡ lo me, zaatne no gdziḡ to.

Sodiidz naa lo to gaḡle zha bzhaac naa. Lëëtaaque no naa lo guidzliu win ne lē Patmos, ga ngoguii zho

naa loxaque ne noseed naa miech Xtiidz Dios, miḡe bi-aadlu Jesús zeeḡe biaad me lo guidzliu. <sup>10</sup> Tib dze, lëëtaque nacne Espiritu Sant naa nozodiidznie naa Dios, tibaque zeeḡe nguiedz zëeb tib tsi meḡ co, pale tsi tib trompet; <sup>11</sup> në me lo naa:

—Grëtaa ncuuaḡe raḡ luu nu niina, pquiaaw tib lo guits pxeela lo grëse zha ne ngab lo naa, grë zha ne no gza gadz guiedz rii nëz Asia: Efés, Smirn, Pérgamo, Tiatir, Sardis, Filadelf, ni Laodicé.

<sup>12</sup> Ptsire lo naa ni naa gwi naa dieḡ cho ga sca rnee lo naa. Zeeḡe bui naa, goḡ naa gadz candeler niaa niapse guiib or. <sup>13</sup> Glowtaa lo gza candeler co zo tib mgui zigne rlu miech lo guidzliu rii, nacw me tib lar nool rdziḡa haxta yaḡ ni me, ni ndxie tib cinch niaa niapse guiib or ngali ro zdoo me. <sup>14</sup> Ine bie rna guits-guic me, zootle zhiil nquits, zootgaa luu guieg, masaque riaazbel bziaalo me. <sup>15</sup> Ni mew, masaque rquiabniw zigne rquiabni guiib brons zeeḡe rlozh ri-aanḡmbe, zeeḡe rrieenëzgaaw lo gui; tsi mew, masaque rio bi rnee me zig rio bi grë guie l bee nroob ne zhoob naal nis. <sup>16</sup> Nia me miḡe nëz derech, nzheḡ me gadz mel gbaa; ni zob tib spad ro me, zigtaa nëz zhits spad cow zigtaa nëz low, gropse nëza ndox. Masaque biinidoo ne rriee lo me, zigne rlu lo ngbidz zeeḡe lega recye lo ngbidz.

<sup>17</sup> Zeeḡe goḡ naa me, mbe biaab naa zhan ni me zig tib zha ne gutle. Dzigo blis me nia derech me pxobnia me guic naa, në me lo naa:

—¡Gdzieebd luu! Naa psilo ni naa csiaa l, naa psanḡ grëtaa ncuuaḡe no, ni naa gnitlow; <sup>18</sup> ni mban naa. Nli gut naa per briebaan naa, mban naa niina, ni gdziḡndraa dze ne guet naa; ladznia naa no guie l gut. ¡Gdzieebd luu sca! <sup>19</sup> Grëse ncuuaḡe noyaḡ luu nu niina, pquiaaw lo guits grësew, niicle miḡe noyaclew, miḡe naragaa gaca. <sup>20</sup> Znu goḡ nac miḡe blozh goḡ luu ga: gadz mel gbaa ne goḡ luu nzheḡ naa ga con nia derech naa, tib tib mel co nac tib tib zha ne quianap yadoo ne no gza guiedz co; laa gza gadz candeler co, nac tib tib yadoo co.

## Diidz ne bnee Jesús lo zha Efés

**2** Blozh ga në me lo naa:

—Miḡe gni naa lo luu nu niina, pquiaaw pxeela Efés, lo zha ne quianap grë zha ne ngab xnëz naa ga, gudz lo zho: "Znu nac xtiidz meḡ ne nzheḡ gza gadz mel gbaa co, meḡ ne zodeed vult lo gza gadz candeler ne niaa niapse guiib or ga, rnee me:

<sup>2</sup>'Nañ naa zha mban to, nañ naa pa lotaa noxco to run to xtsiñ naa, ni nacde to zha ne lega znuse guiaan zdo; stiba, ib ranðzede to grè zha ntseeb. Grè zha ne ziyaad i rnee zho Dios pxeel zho ziadnee zho xtiidz me, per pquia to been to zho prueb, haxta gocnañ to rquidie zho. <sup>3</sup>Nañ naa zha nactaa guieñe ne noded to loxaque ne rliladz to naa; per niicle scaw tibaque dziits zo to, ib riaand zdo to.

<sup>4</sup>'Loxaque naca no tib ncuaañe glisqui naa lo to: jRleyniedraa to naa niina, zigne rleynietaa to naa glo, zeene glopaa bliladz to xtidz naa! <sup>5</sup>Gojsoladz pa lo pxin to. Gojbiire golgac stib zigne nac to glo zeene psilo bliladz to xtidz naa; sac gon, telne gac-wende to, ible zial naa i zialtichee naa xcandeler to zaatne zow.

<sup>6</sup>'Nli rleyniedraa to naa scataa, per rley naa ran naa ib rdziguiende to grè ncuaañe ndzinlid ne run zha ncolait, sac tel naa, ni lalnu ib rdziguiend naa ncuaañe run zho.

<sup>7</sup>'Zha ne riogucle godiidz rii, yquiaadiag zho ganle zha rnee Espiritu Sant lo grè zha ne no xnèz naa, rnee me: Grèse zha ne gdeete diidz gac-wet zho lo ncuaañe gunctal xtol zho, zha co ygaa gow xnex yag ne rdeed guieñmban ga, miñe zob len huert ndzon ne rap Dios ga."

#### Diidz ne bnee Jesús lo zha Smirn

<sup>8</sup>Blozh ga në me lo naa:

—Pquiaa miñe gni naa lo luu nu, pxeela Smirn, lo zha ne quianap grè zha ne ngab xnèz naa ga, gudz lo zho: "Znu nac xtiidz men ne psilo grètaa ncuaañe no, men ne csiaala, men ne gut ga ni brieaban me, rnee me:

<sup>9</sup>'Ran naa zha nactaa grè guieñe ne noded to. Ran naa mban rac to guieñd grè ncuaañe yquini to (nligaa peet rapde to lo guidzliu, per guieñzaac ne bgaa to i ngab to lo Dios, nroob nona). Ran naa, grè zha ne rnee i xpèed Dios zho sac zhasi zha Israel nac zho, no zho rneene zho to; per nlid gon xpèed Dios nac zho, sac zhiwseed menox zianañ zho.

<sup>10</sup>'Nroob grè guieñe ne ziaadyob gan to, per gdziebde to. Squiil menox miech, gnab zho tso to ladzguiib; ga nagon glu to dien pe nli dib zdo to rliladz to naa. Nli nzianlaa to guiab ladzguiib, per tib tsiise ngbidz sca yquiaanañ zho to. Laga mban to lo guidzliu sca, ible csaande to zhiwseed naa, zeena ycaania to guieñmban ndzon ne gnedz naa lo to.

<sup>11</sup>'Zha ne riogucle godiidz rii, yquiaadiag zho ganle zha rnee Espiritu Sant lo zha ne no xnèz naa, rnee me: Zha ne tiblque tsoxco gun miñe rnabey Dios, led yedraa zha co tsoxtseeb guey gabil."

#### Diidz ne bnee Jesús lo zha Pérgamo

<sup>12</sup>Blozh ga, nëque me lo naa:

—Miñe gni naa lo luu nu, pquiaaw pxeela Pérgamo, lo zha ne quianap grè zha ne ngab xnèz naa ga, gudz lo zho: "Znu nac xtiidz men ne nzobro tib spad lots ne ndox gropse nëz, rnee me:

<sup>13</sup>'Nanpaa naa masaque menox rnabey lad guiedz ne no to i, per ran naa tiblque dib zdo to rnalo to naa, niicle gon to zha psacsi zho Antip, beet zho me i, men ne scataa bioxco bnee xtidz naa lo miech.

<sup>14</sup>'Per no chop ncuaañe gon glisqui naa lo to: Lèda i run to ranðze to grè zha ne squi run zigne been Bal-am, men ne pquiil Balac bloo Balac guic grè zha Israel beenctal zho xtol zho, dow zho xpèel grè ma ne biogon lo mdio, ni pquiangob zho zha ne led tseeld zho. <sup>15</sup>Lèe tiba ga, laa stiba, ranðze to zha ne bii zianañ zhiwseed yozh zha nicolaít; tel naa, ni lalnu rdziguiend naa wseed co.

<sup>16</sup>'Laa naa rso diidz lo to: gojnab perdon, ni gojne lo grè zha co csaan zho grè ncuaañe ndzinlid ne run zho; sac gon, telne gond zho diidz, ible zial naa zialtini naa zho con spad ne zob ro naa nu.

<sup>17</sup>'Zha ne riogucle godiidz rii, yquiaadiag zho ganle zha rnee Espiritu Sant lo grè zha ne no xnèz naa, rnee me: Zha ne gdeete diidz lo grè ncuaañe gunctal xtol zho, zded naa guieñwagw ne rap naa gbaa yquini zho; ni zded naa tibga quie nquits lo zho, lo quie co quia lè cub zho, ni zhase gacnañ zha nac lè co zho."

#### Diidz ne bnee Jesús lo zha Tiatir

<sup>18</sup>Blozh miñ co, në me:

—Ye lo zha ne quianap zha ne no xnèz naa guiedz Tiatir, pxeel diidz rii, gudz lo zho: "Znu nac xtiidz Xpèed Dios, men ne masaque riaazbel bziaalo, men ne masaque rquiabni ni zigne rquiabni guiib brons ne tibaque riar; rnee me:

<sup>19</sup>'Nañ naa grèse zha mban to; ran naa pa lotaa rleynie to naa, dib zdo to rliladz to cho nac naa, noxco to quiayun to xtsiñ naa, tiblque rac to dziits zo to lo xtidz naa; ran naa noxcoraa to quiayun to xtsiñ naa niina.

<sup>20</sup>'Per no tib ncuaañe no glisqui naa lo to: lèda i gon run to ranðze to wnaa ne lè Jezabel i, rnee me Dios rsi-aab guic me grè ncuaañe rnee me, per nlida; sac gon, loxaque noquidie me grè zha ne no xnèz naa, noquiil me zho rquiangob zho grè zha ne led tseeld zho, ni row zho xpèel grè ma ne riogon lo mdio. <sup>21</sup>Blactaale pquiambèz naa nab me perdon, ntsèe me lo xquieñmban me; per nèd me csaan me grè guieyozh ne run me i.

<sup>22</sup>'Gacnañ to sca ganle, laa naa gnabey glan me tib guieñguidzdox, tsiechedraa me lo caxtigw co; scaque grèse zha ne zianañ zhiwseed me, nroob guieñe ne gnabey naa ted zho, tel laa zho csaand grè guieyozh co. <sup>23</sup>Ni haxta zut naa zho, zeena sca gan grèse miech ne no xnèz naa ganle, naasi nañ naa pe rza guic miech, pe rza zdo zho; gacxe waa, tel pe ncuaañe run zho, zdedse naa miñe rieguiañ zho tib tib zho.

<sup>24</sup>'Sanguue to grè to zha ne zianañd guieyozh ne rlu wnaa qui (wseed ne rnee zho i rdeed nroob guieñbiini, per nañd zho gon zhiwseed menoxa), peet glisquidraa naa lo to. <sup>25</sup>Per none gon tiblque golgac, zeena ine dib zdo to rnalo to naa gal dze ne laa naa guiañ stib. <sup>26</sup>Sac gon, grèse zha ne gdeete diidz lo grè

ncuaane guñctal xtoł zho, sinque tibaque tsoxco zho gban zho zigne rnabey naa, haxta gdziñ dze ne nitlo guidzliu, zded naa tib mel gbaa lo zho, mel ne rlan rał sil, ni so naa zho gnabey zho grē guiedz. Naa gded guiełrnabey co lo zho, zigne bneedz Pxoż naaw lo naa; ni lalnu yquiad zdoō zho, grēse miech ntseeb, zuñquizh zho zho grētaa guiełntseeb ne been zho.

<sup>29</sup> ;Grēse zha ne rioguicle godiidz rii, yquiaadiag zho ganle zha rnee Espiritu Sant lo grē zha ne no xnēz naa!”

### Diidz ne bnee Jesús lo zha Sardis

**3** Blozh ga, nē me:

—Miñe gni naa lo luu nu, pquiaaw pxeela guiedz Sardis, lo zha ne quianap grē zha ne ngab xnēz naa, gudž lo zho: “Znu nac xtiidz meñ ne nzheñ gadž mel gbaa, meñ ne nacie zhiEspiritu Dios, Espiritu ne rdeed gadž guiełbiini, rnee me:

<sup>1</sup> Nañ naa goñ pe nac grē ncuaane ruñ to, niicle zēēb diidz mban to, per par naa miech gutle nac to.

<sup>2</sup> ;Gołcuae zhimcaalo to sca! Gołsodziits lo spalalse xtiidz naa miñe rsoladz to, sac goñ zhile laa to lozh guiaańladza. Ne nligaa, rañ naa quiaayunde to xtsiin Dios zig none gaca. <sup>3</sup> Gołsoladz ganle zha nac grē wseed ne gocnañ to, grē wseed ne bin to; dzigo gołtsienala, ni gołnab lo Dios guñ me to perdon. Sac goñ, telne tsienalde tow, zeene laa naa guial, lega nacle zeene gañ to laa naa zole lo to; zig rzac zha ne rzēēb ngbaan lidz.

<sup>4</sup> Sca nac to, per lo to i goñ no bla zha ne bii mbe zdoō, sac zienałd zho grē ncuaane ruñ to; rrieequia rdeete zho diidz guiacbeed xab nquits zho ga. Ni zha co nagon rieguał sēnał zhits naa, sac gop zho xab zho cuidad.

<sup>5</sup> Gołgona ganle, grēse zha ne gdeete diidz lo grē ncuaane guñctal xtoł zho, scaania zho tib lar nquitsbie gacw zho; lē zhow, lēē quialew lo guits ne quia lē grē zha ne yгаа tib guiełmban ndzon ga; haxta zanie naa zho lo Pxoż naa ni lo grē xanjł me, guiep naa: Lēē zha rii goñ no xnēz naa.

<sup>6</sup> Zha ne rioguicle grē godiidz rii, yquiaadiag zho ganle zha rnee Espiritu Sant lo grē zha ne ngab xnēz naa.”

### Diidz ne bnee Jesús lo zha Filadelf

**7** Blozh ga, nē me:

—Miñe gni naa niina, pquiaaw pxeela guiedz Filadelf, lo zha ne quianap grē zha ne ngab xnēz naa, gudž lo zho: “Meñ mbe ne rapd ni tib doł, meñ ne rnee niapse diidzli, meñ ne rnabey zigne bnabey rey David; zaatne rxal me, tsod zha ne grieelo csiooga, zaatne csioogaa mew, tsod zha ne grieelo cxala; znu nac xtiidz me, rnee me lo to:

<sup>8</sup> Nañ naa grēse zha mban to; niicle ne squi bii nsis rac to, per rioxco to ron to xtidz naa, ni rqueetsde to ne nli rliładz to naa. Gacxe waa, rrieequia laa naa rxal tib puert ted to, ni choot grieelod csioog puert co. <sup>9</sup> Bii

zañ to ganle, zeene laa naa cxel gza zha ne ngab lo mendox i, guiaad zho guiadquiitsgzhib zho lo to, zha ne noquidie i rnee zho xnēz naa no zho. Ga gañ zho ganle nli rleynie naa to. <sup>10</sup> Ne squi tiblique rac to ron to xtidz naa, peet güeynied guic to niicle pquianał miech to, ible squianaap naa to, gande to guiełnēdōx ne gañ grē miech ne ndxie lo guidzliu.

<sup>11</sup> Gołsoladz ganle, merle guial naa. Gołguien csaande to xtidz naa miñe nañle to, zeena tsod stib zha ne ctiche miñe rieguał to gnedz naa lo to. <sup>12</sup> Grēse zha ne gdeete diidz lo grē ncuaane guñctal xtoł zho, so naa zho gac zho zig grē pilar nroob ne zo len xyadoo ro Dios, ni gdzindraa dze ne gree zho ga; cho pilar co, ga yquia naa lē Dios, ga yquia naa tib lē cub naa. Laa zho ngable guiedz ne rnabey Dios ga; lēē guiedz co nac Jerusalén cub ne gnabey me quiet gbaa.

<sup>13</sup> Zha ne rioguicle godiidz rii, yquiaadiag zho ganle zha rnee Espiritu Sant lo grē zha ne no xnēz naa.”

### Diidz ne bnee Jesús lo zha Laodicé

**14** Ni nē me:

—Miñe gni naa niina, pquiaaw pxeela guiedz Laodicé, lo zha ne quianap grē zha ne ngab xnēz naa ga, gudž lo zho: “Meñ ne rnee niapse diidzli, meñ ne ruñ grēse miñe rnabey Dios, meñ ne bzo Dios psañ grēse ncuaane no, znu nac xtiidz me, rnee me lo to:

<sup>15</sup> Nañ naa grēse zha mban to. Rañ naa noxcodē to grē miñe rnabey naa to, ni niicle rsaandgaa tow; nac to zig nac tib ncuaane loxaque ndzēēyopse, niicle ni-agda ni niicle nlēēdgaaw. ;Tebaa nac to zig tib nis yag, zig tib nis lēēgaa! <sup>16</sup> Per na goñ ne squi nac to zig tib nis ndzēēyopse, ni lalnu rdziguiend naa ncuaane ruñ to. ;Zhile goñ laa to guñctsib naa!

<sup>17</sup> Rnee to grēse ncuaane rquiin to laaw quianiele to, ible peet liaadz racdraa lo to, jni riende to goñ ni lalnu peet nonde to! To nac miech ne mazdraa mban, peet rapde to, ni lar ne ctse lad to guieñd, rrieequia haxta ni lo to rołdraa. <sup>18</sup> Laa naa rso diidz lo to: Telne racladz to nlipaa gapcheñ to, gołtē lo naa, naa cto guieb or ne mazdraa wen lo to; xab tow, naa cto lar ne mazdraa nquits gacw to, zeena ctoladzniedraa to to ne squi guieñd pe ctse lad to; haxta nis rmed ne tso bziaalo to, naa gnedza, zeena gbiire gañ to stib.

<sup>19</sup> Grē zha ne rleynie naa, rlisqui naa grē ncuaane nonguiełd ne ruñ zho, rteed naa zho tib caxtigw parne cseed zho ndzinli gban zho; gacxe waa gołgac ndzinli stib, gołtsoxco miñe rnabey naa. <sup>20</sup> Laa naa quiambēz to goñ gbiire gbig to lo naa. Rrieequia ro lidz to zo naa, quiabedz naa to. Zha ne yquiabladz cxal ro lidz sēēb naa, zdeed naa, ni haxta sobnie naa zho diowxtsee no grop no. <sup>21</sup> Grēse zha ne gdeete diidz lo grē ncuaane guñctal xtoł zho, zded naa diidz sob zho cue naa, zaatne sob naa gnabey naa; zigne zoob naa cue Pxoż naa niina nonabey no; sac tel naa, bdete naa diidz ni-uh naa miñe rnabey mendox.

<sup>22</sup> Zha ne rioguicle godiidz rii, yquiaadiag zho ganle zha rnee Espiritu Sant lo grē zha ne no xnēz naa.”

### Roolnie zho Dios gbaa

**4** Zeene bui naa stib, gon naa laa tib puert quia zhan gbaa, nzhialse puert co. Horco biire bin naa tsi men ne bnee lo naa ga glo, men ne nac tsi ga zig tsi tib trompet, në me:

—Biep, dè nu ganle, zeena glu naa lo luu zha nac grè ncuane ziaadyob gac.

<sup>2</sup> Zigne sca në me, hor co blu Espiritu Sant lo naa, gon naa laa tib xcan zo gbaa, tib xcan ne rzob men ne rnabeya. Lo xcan co, ga zob tib men co, <sup>3</sup> masaque rbebni me zigne rbebni quie ne rnee zho jasp, quie ne rneegaa zho cornalin. Igoxe xcan co quia tib guitye, rbebniw zigne rbebni quie ne rnee zho smerald; <sup>4</sup> ni zo zgalptap xcan igow, tibga mengol zob tib tib lo xcan co, dib nquitsbiese rna xab me, ni zob tibga coron or guic me. <sup>5</sup> Masaque riab belye, ratsie rnee nguzi, ni zëëb tsi miech zaatne zo xcan ne rian glowtaa ga. Zaatne nac delant lo xcan co, masaque rluw zig rlu lo nisdoon ni rbebela zig rbebel quie zed; ni noquia gadz biini nroob ga, lëë gadz biini co nac gadz guieibiini ne rap Dios.

Igo xcan co, ga zo tap bult mban, tibgaw zo tib nëz; nëz low, nëz zhitsaquew zob bziaalow. <sup>7</sup> Tiba rlu zig rlu meedz, stiba rlu zig rlu tib ngon yeen; laa schop mine rian ga, tiba rac lo zig rac lo miech, laa stiba rlu zig rlu tib msi nroob ne quiasibe. <sup>8</sup> Tib tiba zob xoopga xiila, ndziib bziaalow zhits xiila, len xiila ne; tibaque nguiedz zëëb tsiw, rneew:

¡Men ndzondoo nac Dios!

¡Men rnabey nac me, nroob poder ne rap me!

Notaque me, me ga no padzeela, me no niina, ni lëëque me ga no guiaad.

<sup>9</sup> Gza tap bult mban co, roolniew men ne zob lo xcan co, (men ne gdziñd dze guet) rsañnona me, ni rdeeda xquizh lo me. Zigse sca run gza bult co, <sup>10</sup> scasaque gza galptap mengol ne zob ga, rquitsgzhib me lo men ne zob lo xcan ro co, gzase me, rgob me xcoron me rguix mew nëz lo men ne zob lo xcan co, ni rnee me:

<sup>11</sup> Luu nac xDios no, luu nac men ne rnabey no.

Luuse nac men ne rieguial dzuuñnon no, ni gnee no grè diidz ndzon lo luu.

Nroob poder ne rap luu, sac grëtaa ncuane no, luu bzaaw;

laaw baa sac ible sca gocladz luu, ni laaw niaagaa niina, sac ible sca racladz luu.

### Tib guits ne nzhidoo gadz lë cint

**5** Zeene bui naa stib, gonpaa naa men ne zob lo xcan ro co, nose tib guits nroob nia derech me.

Gropse nëz guits co quia, ndibëdsew, nzhidoo gadz lë cint. <sup>2</sup> Ni gon naa tib anjl, tib men macis rlu me, nguiedz zëëb tsi me, bnabdiidz me rëb me:

—¿Cho rieguial cchug cint ne nzhidoo guits qui, cxal zho low?

<sup>3</sup> Ni tib choot pxald lo guits co, niicle gbaaw niicle lo guidzliuw, niicle zhan guidzliugaaw, brieequiad tib zha ne nchug cint co, nwi zho lo guits co.

<sup>4</sup> Mban goc naa, psilo naa nguiedz roon naa, gon naa sca brieequiad tib zha ne rieguial nxl lo guits co, nlab zho low. <sup>5</sup> Dzigo bnee tib mengol ne zo gax lo xcan co, në me lo naa:

—Goond luu. Lëz ganle, men ne brieequia lo xtii Judá, lo xtii rey David, me cchug gza gadz cint ne nzhidoo guits qui, me cxal low. Ible me rieguiala, sac gon psiaablo me grëse zha ne rlëë lo me; rrieequia nac me zig tib meedz.

<sup>6</sup> Horco bui naa zaatne nac lo xcan ro co, gon naa glowtaa lo gza bult mban co ni lo gza mengol co, ga zo tib Carner yeen. Rlupaa zha psacsi zho ma, zeene beet zho ma. Zob gadz zhoz ma, ni zob gadz bziaalo ma, rrieequia gza gadz bziaalo ma ga, min co nac gadz guieibiini ne rdeed zhiEspiritu Dios.

<sup>7</sup> Dzigo wbig men ne nac Carner yeen co, bnaaz me guits ne no nia derech men ne zob lo xcan ro co.

<sup>8</sup> Zigne bnaaz me guits co, laa gza bult mban co, ni gza galptap mengol co pquitsgzhib lo me. Tib tib mengol co nzheñse me tib arp ni tib ptsigui or, rso tib gox ndzon len ptsigui co (rrieequia gox co nac grè diidz ndzon ne rnee grè zha ne no xnëz Dios zeene rzodiidznie zho me).

<sup>9</sup> Dzigo psilo gza mengol co biil me tib cant cub. Znu rnee lo cant co:

¡Ible luu rieguial ycaania guits qui, luu rieguial cchug gza cint ne nzhidoo!

Sac luu bded grëtaa guieinë co psacsi zho luu, haxta bzhiie xchen luu;

sca psilaa luu grëlose dii miech,

tel pa guiedztaa nac zho, tel pa diidztaa rnee zho, tel pa naciontaa ngab zho.

<sup>10</sup> Laa luu bzhiie no grè no gac no tib guiedz cub, guiedz ne gnabey Dios;

no gac pxoz ne gun dziin lo me,

masaque tipse gban no zeene gnabey me lo guidzliu.

<sup>11</sup> Zeene bui naa, gon naa anjl guizhiu ne ndxie zaatne zo xcan ro co, led zha ne grieelod glab new.

<sup>12</sup> Nguiedz zëëb tsi zho grè zho gza bult mban co, ni grè mengol co, rnee zho:

¡Men non nac men ne nac Carner yeen ne squi rlu beet zho!

Me rieguial gnabey, men ro nac me, choot grieelod csiaablo me.

Ladznia me no grëse guieinzaac, me rap grëtaa guiein,

Men ndzon nac me, me none dzuuñnon ne, me none dzioolnie ne.

<sup>13</sup> Horco grëse miech, grëse ma, grëse ncuane bzaa Dios, zigtaa gbaaw, zigtagaa lo guidzliuw; zigtaa zhan guidzliuw, zigtagaa lo nisdoow; nguiedz zëëb tsi zho, rnee zho:

¡Nliw, men ne zob lo xcan ro qui, ni men ne nac Carner yeen qui,

ible rieguial dzuuñnon ne grop me!

¡Me rnabey, lo me none gnee ne grëtaa diidz ndzon; nadzew, gzhew, ni grëragaa izdoo ne ziaadraaw!

<sup>14</sup> Pquiab gza tap bult co, rëb zho:

—¡Scaw, sca no gaca!

Dzigo gzase menjol co, laa zho pquiitsgzhib lo men ne zob lo xcan ro co; psilo zho rnee zho grë diidz ndzon lo me.

### Gza gadz sell co

**6** Blozh ga, gonpaa naa zeene laa men ne nac Carner yeen co pchug primer cint ne nzhidoo guits co. Horco laa tib bult mban co bnee; masaque nac tsiw zig rio bi rnee nguzi, nëw lo naa:

—¡Dë ganle gwi luu!

<sup>2</sup> Dzigo wbig naa, gon naa tib guay nquits. Zhits guay co zob tib men co nzhen me tib yag arcw ne rquiaa zho flech; blozhse pcaania me tib coron ne rzob guic zha rnabey, dzigo laa me briece. Ine zob nzë me lad guay co, laa me zie ziegung me gan lo grë zha ne rlëë lo me.

<sup>3</sup> Blozh ga, laa men ne nac Carner yeen co pchug stib cint ne nzhidoo guits co. Dzigo bredz stib bult co naa.

<sup>4</sup> Dzigo bia naa, gon naa laa stib guay nizhnie briece, zob stib men co lad ma. Blozhse pcaania me tib spad nroob, ni pcaa me diidzbey tsielodij me miech lo guidzliu, zeena gutlsa zho; laa me briece ga, laa me zie.

<sup>5</sup> Zeene laa men ne nac Carner yeen co pchug bion cint ne nzhidoo guits co, dzigo bredz stib bult co naa, nëw lo naa:

—¡Dë ganle gwi luu!

Dzigo gon naa tib guay ngas, scasaque zob stib men co lad ma, nzhen me tib zhiguiib. <sup>6</sup> Ni groltaa zaatne zo gza bult mban co, zëëb tsi tib men co, rnee me:

—Tib kiltaa zhobxtil gon ycaa zha ne gun dziin tib dze; tel zhobgaaw, tsonata kila ycaa zho; sangue nceit ni vin ib ygaald luuw.

<sup>7</sup> Laa zeene goc cint co tap ziechug men ne nac Carner yeen co, dzigo laa stib bult mban co bredz naa.

<sup>8</sup> Horco, zeene bui naa, gon naa tib guay nguets; lad guay co zob tib zha co lë Guielgut; zhiits co nal stib zho lë Gabij. Lo tap lal ne nlë miech ne ndxie lo guidzliu, pcaa grop zha co diidzbey tsiegut zho tib lal grë miech co; zha ne guet lo dij, zha ne guet lo gbin, zha ne guet lo guielguidz, zha ne guetgaa lo grë ma ntseeb.

<sup>9</sup> Dzigo pchug men ne nac Carner yeen co stib cint co, goca gaay. Horco, zaatne nac zhan mezh ne nac mezh lo pcoog, ga gon naa grëse zha ne psacsi miech, beet miech zho loxaque ne bnee zho Xtiiidz Dios, ni dib zdoo zho bliladz zhow. <sup>10</sup> Nguiedz zëëb tsi zho rnee zho:

—Luu ne nac luu men nroob ne rnabey, luu ne nac luu men ne rnee niapse diidzli, zpa hor dzigo cuedz luu grë miech ne ndxie lo guidzliu, zha ne scataa psacsi no? ¿Pa hor gunquish luu zho grëtaa mine been zho ga?

<sup>11</sup> Dzigo bdeed me lar nquits got zho; rëb me lo zho no cuëz zho zniip, sac grëraa zha ne nacgrë zho ngab zho lo Jesús, no spalal zha ne naraa csacsi miech zigne

psacsi miech zho; haxta gza zho dzigo laa me gun guielwxtis.

<sup>12</sup> Blozhse ga, laa Carner yeen co pchug stib cint co, goca xoop; hor co laa tib zhodox bni. Gonpaa naa zeene laa lo ngbidz pcow, zig nac zeen tib lar ngas pquia lo ngbidz; laa mëë zig rludaa ren, sca nizhnie rlu lo mëë; <sup>13</sup> grë mel ne ndziib gbaa, masaque bliaa ma lo guidzliu zig rliaa grë guigw yeen zeene rriece medox. <sup>14</sup> Znuse bdibëd gbaa, goca zigne racse grë guits ne rdibëd; grë gui, grë guidzliu win ne no lo nisdoo, nëzrii nëzrec biaana. <sup>15</sup> Dzigo grëse zha ne nac zha rnabey lo guidzliu, grë zha ne nac zha non, grë zha ne rapchen, grë zha nroob ne rnabey lo menguiib, grë zha nroob ne non xtiidz, ni grëragaa miech, niicle grë zha ne run xtsiin beña, niicle grëgaa zha ne run xtsiin zhala, grëse zho biolan, zha ne biolan len grë bleece, zha ne biolangaa len grëraa quie ne no dan; <sup>16</sup> nguiedz roptsie zho rnee zho lo grë gui co, lo grë quie co:

—¡Golliaa! lad no, golcolan no, zeena gandraa men ne zob lo xcan ro co no! ¡Golcolan no, zeena dziaand no grëtaa guielnë ne cxeel men ne nac Carner yeen co! <sup>17</sup> ¡Sac nasi laa dze ro co bdzin! ¡Laa guielnëdoo co nagon ziaadle! ¡Ncuaane lëëbd no low!

### Zha ne pcuee lo grëse zha Israel

**7** Bded ga, gon naa tap anjl. Lo gza tap lad guidzliu, tibga anjl co zo tib lad nocuëz me me. Wdzeepaaw, per ni tib zhiblag yag rnidraa, niicle lo nisdoo dzese biaca; sac ni palal rriedraa me lo guidzliu.

<sup>2</sup> Tibaque zeene briequia stib anjl nëz ne rlan ngbidz, neyse me xsell Dios; nguiedz bnee me lo gza tap anjl co (anjil ne pcaa diidzbey ga gun guielqui lo guidzliu ni lo nisdoo) rëb me:

<sup>3</sup> —¡Golcuëz zniip! Gunde to guielqui lo guidzliu niina, niicle lo nisdoo, niiclegaa grë yaga; sac naraa lozh guioquiaa no xsell xDios ne quia grë zha ne run xtsiin me.

<sup>4</sup> Zeene blozh pquia sell co quia grë miech co, bin naa lo grë zha ne ziaad lo xtii zha Israel, rgaa zho tib gayoo chooptap mil:

Tsiipchop mil zha xtii Judá,  
tsiipchop mil zha xtii Rubén,  
tsiipchop mil zha xtii Gad,  
tsiipchop mil zha xtii Aser,  
tsiipchop mil zha xtii Neftalí,  
tsiipchop mil zha xtii Manasés,  
tsiipchop mil zha xtii Simeón,  
tsiipchop mil zha xtii Leví,  
tsiipchop mil zha xtii Isacar,  
tsiipchop mil zha xtii José,  
stsiipchop mil zha xtii Benjamín.

<sup>9</sup> Zeene bui naa zaatne zo xcan ro co, zaatne zo men ne nac Carner yeen co, miech guizhiu ne gon naa ndxie ga; grë lose dii miech ne ndxie dib lo guidzliuw. Ne nligaa miech guizhiuw, led miech ne lëbd ne glab new; grëse zho niapse lar nquits nacw zho, ni no tiblëga zin nguia nia zho; <sup>10</sup> nguiedz zëëb tsi zho, rnee zho:

Dios, meñ ne rdziuñbey ne, meñ ne zob lo xcan ro qui,

me nac meñ ne psilaa ne lo grëtaa xtoꞀ ne;  
me ni meñ ne nac Carner yeeñ qui.

<sup>11</sup> Horco grëse anjl ne ndxie igo xcan ro co, igo za-atne zob grë meñgol co, ni zo gza tap bult mban co; grëse zho laa zho pquitsgzhìb nëz lo xcan co, haxta bzooblo zho lo liu, rdeed zho xquizh lo Dios <sup>12</sup> rnee zho:

¡Scaw! Luu none dziooꞀnie no,  
none tibaque gneedz no xquizh lo luu,  
luu rieguaꞀ dziiuñnon no; sac luu nac xDios no.  
Luu nac nac meñ ne rienraa, meñ ne rap poder;  
gacxe waa luu none ycaania grëse diidz ndzon,  
gzataa dze, niicle nadzew, gzhew, ni grëragaa izdoo  
ne ziaada. ¡Sca none gaca!

<sup>13</sup> Dzigo nabdiidz tib meñgol co, në me lo naa:  
—¿Pe nañ luu sca cho nac grë zha ne nacw lar nquits  
qui? ¿Pe nañ luu pa nëz ziaad zho?

<sup>14</sup> Dzigo rep naa lo me:  
—Nañd naaw. BzhiguieꞀ bnëw lo naa.  
Nëchaa me:

—Lëë grë zha qui goñ bded grëtaa guieꞀnëdòx ne  
goc lo guidzliu. Laa zho nacw lar nquits qui, sac wbig  
zho lo Jesús psañmbe xchen me zho lo doꞀ. <sup>15</sup> Gacxe  
waa squitaa ndzon ndxie zho gax lo zhixcan ro Dios,  
dze guieel quiayoꞀnie zho me leñ xyadoo ro me. Me  
nac meñ ne quianap zho grëse zho; <sup>16</sup> led yedraa niina  
guet gbin zho, guet nisgaa zho; led yedraa niina ctsuu  
ngbidz zho, sonëggaa zho. <sup>17</sup> Meñ ne nac Carner  
yeeñ ne zo delant lo xcan ro qui, me gdeed ncuaaꞀne  
gow zho, ni zigne rienie baxtor xpëcwxiil zho ro guiuu,  
sca zienie me zho zaatne quiada nis ne rdeed guieꞀm-  
ban. Led yedraa niina goon zho.

**8** Laa zeene laa meñ ne nac Carner yeeñ co pchug  
stib cint ne nzhidoo guits co, cint ne naca gadz ga,  
dzese biac gbaa; xtselaa sca biac dze gbaa.

<sup>2</sup> Blozh ga, goñ naa zeene pcaania gadz anjl ne rzo lo  
Dios, tibga trompet. <sup>3</sup> Ni brieequia stib anjl nzhenñ tib  
ptsigui niaa niapse guieꞀ or. Zigne bdziñ me, bzo me  
delant lo xcan ro co, zaatne zo mezh or ne nac lo  
pcoog; ga pcaania me nroob yaal parne ctsieel mew  
grë diidz ne rnee grë miech ne no xnëz Dios zeene  
rzodiidznie zho Dios. <sup>4</sup> Dzigo bzëëg anjl co yaal co,  
tipse goc gox co grëw xtiidz grë zha ne no xnëz Dios,  
laaw bdziñ lo Dios. <sup>5</sup> Blozh ga, ptop me grë gui ne ndzi-  
ib lo pcoog co bloo mew leñ ptsigui ne nzhenñ me ga,  
blaaꞀ mew lo guidzliu; dzigo psilo masaque rnee nguzi,  
rio bi, riab belye ne, ni bni tib zhodox.

### Pcuedz gadz anjl trompet

<sup>6</sup> Horco laa gza gadz anjl ne pcaania gza gadz  
trompet co, laa zho nsinle nzheña, parne ycuudz zhow.

<sup>7</sup> Zeene laa tib anjl co pcuedz zhitrompet zho, hor co  
psilo bliaaꞀ guiequie lo guidzliu ni bliaaꞀ guiee notsa  
ren. Gzoob ne telne glë guidzliu tsonñ lal, dzigo  
masaque tib lala bnitlo, bnitlo grëse yag, grëse lo  
guizh nguia ne no low.

<sup>8</sup> Blozh ga, zeene laa stib anjl co pcuedz xquieꞀ, hor  
co biab tib ncuaaꞀ co nisdoo, masaque rluw zig rlu tib  
gui nroob ne quiaayzbel. Gzoob ne tel glë nisdoo tsonñ  
lal, bnitlo tib lala, bialow niapse ren zeene laa ncuaaꞀ  
co biab low. <sup>9</sup> Bnitlo grëse ma, grëse guizh ne no lo tib  
lalga nis co, haxta grë barcw ne no low bnitlo.

<sup>10</sup> Loxaque blozh goc miñ co, laa stib anjl co  
pcuedzaque xquieꞀ zho, hor co laa tib mel nroob briñ-  
gaa gbaa, masaque rso ma bel zig razbel tib lë guier,  
biab ma lo guidzliu. Lo grë guiebee, lo grë zhlian ne  
no lo guidzliu, lo tsonñ lal ne gzoob ne naca, pxinñ ma tib  
lala. <sup>11</sup> Grëse nis co goc nlayag, ndal miech ne gut low.  
Nacne bleelë zho mel co Nlayag.

<sup>12</sup> Zeene laa stib anjl co pcuedz xquieꞀ goc zho tap,  
hor co zigtaa lo ngbidza, zigtagaa lo mëëw, biuu tib ni-  
aza, schop niazaquew biaanñ rziini; grë mel ne ndziib  
gbaa, gzoob ne lo tsonñ lal ne nac ma, hor co biuu tib  
lal ma. Rlupaa lega net net rquiaa ngbidz; zaatne nac-  
gaa guieel, ni palal peet rlud.

<sup>13</sup> Laa naa nowi, tibaque zeene goñ naa laa tib anjl  
bdeed groꞀtaa zhan gbaa, haxta rlupaa rio bi zie me lo  
me, nguiedz zëëb tsi me rnee me:

—¡Probsaxe grë miech ne ndxie lo guidzliu! Sac  
ncuaaꞀne ntseebraa gac, zeene laa stsonñ anjl qui  
ycuedz xquieꞀ me.

**9** Zeene laa anjl ne nac zho gaay ga pcuedz xquieꞀ,  
hor co goñ naa laa anjl ne brieë gbaa padzeela ga  
pcaania tib liow, pxal zho ro tib guierdoo ro. Zeene laa  
ro guieer co bzhal, per nli goxdoo ne brieë ga, tib  
psioogsew zhan gbaa, per ni palal rludraa lo ngbidz.

<sup>3</sup> Lo gox co, ga brieë tiblo metso bliaaꞀ, bioogse ma  
gdipse lo guidzliu, grëse ma zob xcots ma, zig zob  
xcots meegu. <sup>4</sup> Nacle diidz, peet guñd ma grë guizh  
nguia, grë yag ne zëëb lo guidzliu, sinque laa ma tsie  
tsiesacsí ma grëse miech ne quiad xbey Dios quia.

<sup>5</sup> Yoobdox ne yquia zaatne yquiaaxcots ma, zigne rquia  
yoob zaatne rquiaaxcots meegu; per gute ma zho, lox-  
aque sca csacsi ma zho dipse leñ gaay mëë. <sup>6</sup> Leñ dze  
co, haxta zhal miech yguieꞀ zho dieñ zha guet zho, per  
grieelod guet zho; soobladznë zho, tebaa zha gdziñ  
guieꞀgut lo zho, per leꞀ sozita.

<sup>7</sup> Masaque rac grë metso co zig rac grë guay ne tsie-  
nie zho lo diꞀ. Rac lo ma zig rac lo miech, ni zob tib  
ncuaaꞀ co guic ma, rluw zig rlu tib coron or; <sup>8</sup> zëëb gui-  
tsguic ma zig zëëb guieꞀguic meñ wnaa, ni zëëb lay ma  
zig zëëb lay grë meedz. <sup>9</sup> Dipse lad ma ntse tib ncuaaꞀ  
co, rluw zig rlu guieꞀ; rio bi rzedz lo xiꞀ ma, pale bi ne  
rio zeene rded tib dzoon carret ne rgob guay, zie lo diꞀ.

<sup>10</sup> Lëëdaa meegu, sca zob xcots grë metso co lo xcol  
ma, miñe yquiaaxcots ma miech dipse leñ gaay mëë  
co. <sup>11</sup> Lëë grë metso co pxeel anjl dox ne rnabey guier-  
doo co, anjl ne rnee zha Israel Abadón, laa xtiidz zha  
Gres rnee zho ma Apolión. (Nac diidz co, zig rnee ne  
xtiitsë ne: Zha ne rnitlo.)

<sup>12</sup> Lëë tib guieꞀnë ne gañ miech ga, per bii ziaad  
schopa.

<sup>13</sup> Goñ naa zeene laa anjl ne nac zho xoop ga pcuedz  
xquieꞀ, hor co bin naa zëëb tsi tib meñ co lo mezh or

ne nac lo pcoog ne zo lo Dios ga. <sup>14</sup> Zëeb tsi meṅ co rnee me lo anjl ne blozh pcedz xquuib ga:

—Güey, güeyxadz gza tap anjl dox ne quiadoo ro guiubee nroob ne nac guiubee Eufrates.

<sup>15</sup> Ible bzole gza tap anjl dox co par guṅ ma guieḷqui zeene laa dze co, laa hor co gdziṅ; dzigo nac ne hor co laa ma blaa, parne tsiegut ma miech. Gzoob ne teḷne gac miech ne ndxie lo guidzliu tsoṅ tant, masaque tib tant zho gnitlo ma. <sup>16</sup> Bin naa chop gayoo millon zhaguuib ne gacnie ma, niapse guay sob grë zhaguuib co; masaque ma gnabey lo zho.

<sup>17</sup> Goṅpaa naa zha rlu grë zhaguuib co zob zho lad grë guay co. Grëse zho quiantse tib lë guuib gdipse zdo zho; masaque tsoṅ color rbeew, rbeew color nizhnie, color nguia gbaa, ni color guts. Laa grë guay co, niaa guic ma zig niaa guic meedz, masaque rriee bel, rriee gox, rriee zufr ro ma; <sup>18</sup> lo gza ncuaaṅ ne sca rriee ro ma, miṅ co beet lalga miech co.

<sup>19</sup> Lala rap grë guay co xquieḷntseeb ma ga nëz ro ma, ni rapaque maw nëz lo xcol ma; masaque nac xcol ma zig nac grë meeḷ dox, rias xcol ma rquiaa maw lad miech.

<sup>20</sup> Niicle scataa nzian miech ne gut, zha ne biaaṅ ib bdziebd zho. Tibaque laa zho no ziegaṅ zho meṅdox, ziegaṅ zho grë zhimdio zho, mdio ne niaa guuib or, mdio ne niaa guuib plat, mdio ne niaa guuib brons, mdio ne niaa quie, mdio ne niaagaa yag; ncuaaṅ ran-da, ncuaaṅ ronda, ncuaaṅ rzëda, per laa zho no tibaque ziegaṅ zhow. <sup>21</sup> Laa zho no quiayut zho samiech zho, quianab zho pe sac samiech zho, quiangob zho zha ne led tsieeld zho, tibaque quiaban zho, jni palal zienied guic zho csaan zho grë guieḷntseeb co gbig zho lo Dios!

### Anjl ne nzheṅ tib libr win

**10** Blozh ga, goṅ naa biet tib anjl gbaa, rlupaa tib anjl nona, masaque no me tib lo xcow, ni quia tib guitye glaa guic me. Biinidoo ne rriee lo me, lëëdaa lo ngbidz; scasaque ni me, masaque riaazbela. <sup>2</sup> Nzheṅ me tib libr win, nzhialse lo libr co.

Bdziṅ me lo guidzliu, bzo me ni derech me lo nisdoo, laa miṅ revés bzo me lo guidzliu. <sup>3</sup> Ga zo me pquiaa me tib redz nroob, lëëdaa zeene rgobeedz tib meedz; loxaque blozh pquiaa me redz co, zeene laa gadz nguizi bnee, pquiab lo redz ne pquiaa me ga.

<sup>4</sup> Laa naa zale yquia naa miṅe bnee gza nguizi co, tibaque bin naa tsi tib meṅ co gbaa, në me lo naa:

—iCoo, yquiaad luu miṅe bnee gza nguizi qui! Sac nodne gacnaṅ miecha.

<sup>5</sup> Dzigo goṅ naa blis anjl co nia derech me nëz gbaa, <sup>6</sup> bzeet me Dios (meṅ ne gdziṅd dze guet, meṅ ne bzaa gbaa, bzaa guidzliu, bzaa nisdoo, ni grëtaa ncuaaṅe no low), rëb me:

—Dios zobwi gaṅle, nasi goṅ laa dze co bdziṅ. <sup>7</sup> Grëse miṅe bnee me lo zha ne biadteed xtiidz me, laaw gac niina zeene laa stib anjl qui ycuedz xquuib zho. Grëse miṅe no guic me guṅ me ni gocnaṅd miecha, niina laa zho gaṅa.

<sup>8</sup> Dzigo wbiire bnee meṅ ne zëeb tsi gbaa ga, në me lo naa:

—Güey, bnaaz libr win ne nzheṅ anjl ne squi zo i.

<sup>9</sup> Nacne bia naa lo anjl co, rep naa lo me gneedz me libr win co, dzigo nëchaa me lo naa:

—Ledaaw nu, per lëëraasi none gow luuw. Zeene laa luu noyowa, nex sac luuw; per zeene gdziṅa zdo luu, laaw gacnla.

<sup>10</sup> Dzigo bnaz naa libr win co nia me, dow naaw. Nli-gaa nex rdioowa now ro naa, per zeene laaw bdziṅ zdo naa, beeṅnëw. <sup>11</sup> Blozh ga, nëchaa meṅ ne bin naa tsi glo ga:

—Naraa goṅ none gnee luu gaṅle zha nac ncuaaṅe ted grëraa miech, zigtaa zha ne no guiedz wina, zha ne no guiedz nrooba, zha ne rnabeygaaw.

**11** Dzigo biaad tib meṅ co bneedz me tib yag ne rbix lo naa, rgaaw zig tib metr, bnabey me naa ctix naa xyadoo Dios, ctix naa zaatne nac lo pcoog, ni glab naa dieṅ palal miech ne rie yadoo co riegaṅ zho Dios. Pso me diidz lo naa, në me:

<sup>2</sup> —Lëëraasi ctiixd luu nëz ley, sac laa lugar co nole laldnia zha zit; zha gnabeya, zha gnabey guiedz ndzon ne naccheṅ Dios i; dipse leṅ tsoṅ iz groḷ ne ziaad nu, guṅ zhow zigne gacladztaa zho. <sup>3</sup> Gane leṅ dze riique laa naa cxeḷ chop zha ne ruṅbepaa cho nac naa, tib lar beelze gacw zho, zig racwxab zha ne no guieḷnë; dipse leṅ tsoṅ iz groḷ co gnee zho gaṅle pe nac grë ncuaaṅe ziaadyob gaṅ miech.

<sup>4</sup> Lëë zha co nac grop zhan yag oliv ni grop biini ne raquietle lo Xtiidz Dios ga zo lo Dios (meṅ ne nac bizhuan guidzliu). <sup>5</sup> Zeene laa grop zha co bdziṅ, choot brieelod lega nsacsi zho, sac grëse zha ne wbig gocntseeb lo zho, tib bieese zha co lo bel ne brieer zho. <sup>6</sup> Bdeed Dios poder lo zho ycuëëz zho nisguie, zrieelo gnabey zho guiabda dipse leṅ dze ne nonee zho lo miech ga, haxta zrieelo gnabey zho tsaalo nis gaca ren; ni horne gacladztaa zho, zrieelo ndalraa grë guieḷzi ne gnabey zho gaṅ miech.

<sup>7</sup> Zeene bzase dze ne bnee zho lo miech ga, hor co laa tib madzabdoo brieer leṅ guierdoo co; ntseeb rac ma lo zho. Mbe blëbd zho lo ma, beet ma zho. <sup>8</sup> Tsoṅ ngbidz groḷ goot xcuerp zho groḷ leṅ guiedz ro co, guiedz ntseeb co. Pale Sodom, pale Egipt, sac goṅ guiedz coque, ga pquiaa miech meṅ ne rnabey zho lo cruz. Ib bdeete miech diidz ngeets zho, grëse miech ne no dib lo guidzliu goṅ sca nix zho ga; <sup>10</sup> dipse lo guidzliu, masaque tib guieḷbleydoo ne bio miech gza dze co, goṅ zho laa grop zha co gut, sac nroob beṅneed zho miech. Lo guieḷbley co, haxta bioxco miech pe ncuaaṅe bgadlsa zho lo samiech zho.

<sup>11</sup> Zeene blozh tsoṅ ngbidz groḷ co, tibaque zeene laa zhiEspiritu Dios bdeed guieḷmban lo grop zha co stib, laa zho guche ga; grëse miech ne ndxie lo guidzliu, zeene goṅ zhow, per nli bdzieb zho, rdzieldraa zho zha guṅ zho. <sup>12</sup> Horco nguiedz zëeb tib tsi meṅ co gbaa, bredz me grop zha co. Goṅlo grë miech ne rlëë ran zho ga, masaque no zho tib lo xcow, laa zho bzoquia gbaa; <sup>13</sup> loxaque laa zho bzoquia gbaa, zeene laa tib

zhodox bni. Gzoob ne teĵne nlë guiedz ro co tsii tant, tib tanta bnitlo lo zho co; gut gadz mil miech. Grëraa zha ne biaan, mazdraa bdzieb zho, lo dzeb co laa zho psilo roolnie zho Dios.

<sup>14</sup> Sca gañ miech stib guieĵnë co. Lëë bropa ga, per znusaque guiaad stiba. <sup>15</sup> Sac loxaque blozh ga, zeene gon naa laa stib anĵl ne nac zho gadz ga, pcuedzlaque xquib; hor co nzian tsi meñ co zëëb gbaa, nguiedz rnee me:

Nasi nagon,  
laa Dios gnabey grëse guiedz ne ndxie lo guidzliu,  
grop me Meñ ne pxeel me ga.

Mele gnabeya, grëtaa len izdoo ne ziaad.

<sup>16</sup> Psiloque gza galptap meñgol ne zob lo xcan ne zo lo Dios ga, pquiitsgzhib zho lo me, haxta bzooblo zho lo liu, rdeed zho xquizh lo me, <sup>17</sup> rnee zho:

Xquizh xquieĵnzaac luu,  
sac nasi laa luu glu meñ nroob nac luu, laa luu csilo gnabey.

Luutaque nac meñ ne mazdraa nroob.

<sup>18</sup> Grëse guiedz, brieequia zha ne gocntseeb lo luu; per nasi laa dze bdziñ, laa luu glugaa xquieĵblëë luu lo zho.

Grëse zha ne gutle,  
niina laa luu gdeed miñe rieguiaĵ zho tib tib zho.  
Grë zha ne been xtsiiñ luu, pteed zho xtiidz luu lo miech,

grë zha ne ngab lo luu, zha ne ruñnon lë luu,  
zigtaa zha gola, zigtagaa zha wina, niina laa luu gdeed zhipremio zho;

zha ne na loxaquegaa guieĵntseeb been,  
niinataa laa luu gnitlo zho.

<sup>19</sup> Loxaque blozh sca bnee gza meñgol co, zeene laa yadoo ne no Dios gbaa bzhal, nieenpaa guiñ ne not-sow quie lag ne pquia diidz ne psan me lo miech. Hor-co psilo bliaaĵ tib guiequiedox, loxaque nëzrii nëzrec riab belye, ni rio bi ratsie nguzi; guiequiedox co noli-aal, zeene laa tib zhodox bnique.

**12** Horco gon naa blu tib ncuaane gzee zdoo ne zhan gbaa. Ga brieequia tib wnaa, masaque igose me riab tib biini, zig riab xbiini ngbidz, ni zob tib coron guic me, quia tsiipchop mel cho coron co; ngali ni me zob mëë. <sup>2</sup> Rlupaa zoney me mëëd, rquiaadan me redz, laa me rquiale yoob ne gap me xpëëd me.

<sup>3</sup> Tibaque brieequia tib ma ngol, dipse ma rna nizhnie, niaa ma zigne niaa ngutsiets; zob gadz guic ma, ni tsii zhoz ma, tibga coron zob tib tib guic ma. <sup>4</sup> Znuse bzieecw ma xcol ma, blaaĵ ma palal mel gbaa lo guidzliu; gzoob ne nlë mel tson tant, masaque tib tant mel co blaaĵ ma. Wbig ma lo wnaa co, quiambëz ma gal xpëëd me, parne gow ma win.

<sup>5</sup> Per zigne gol mëëd co, znuse bdziñ win nëz lo Dios, zaatne zob me rnabey me; tib mëëdbguiw, nacle diidz tib meñ ndip xtiidz gac win, win gac meñ ne gnabey grëse guiedz ne ndxie lo guidzliu. <sup>6</sup> Horcogazhaquew bzhoon wnaa co ga, laa me zie tib dan zit, zaatne psanle Dios diidz gañ zho me dipse len tson iz groĵ.

<sup>7</sup> Nacne bio tib diĵ gbaa. Psilo anĵl Miguel, grë me grëraa anĵl ne nacie me, bdiĵnie me ma ngol co grë ma xanĵl dox ma; <sup>8</sup> per blëbd ma, beñcxoon zho ma gbaa. <sup>9</sup> Lëë ma ngol co ga nac meeĵ dox ne notaque padzeela, lëë meñdox ga, lëë Satanás ga, ma ne scataa tibaque noquidie miech; hor co laa zho bzonëz ma nëz lo guidzliu, grë xanĵl dox ma.

<sup>10</sup> Dzigo bin naa, nguiedz zëëb tib tsi meñ co gbaa, rnee me:

ĵLëëw nagon!  
ĵNasi laa dze ne ycaaniapaa Dios zha ne ngab lo me,  
laa dze co bdziñ!

Nasi laa me blu poder ne rap me,  
nasi laa Meñ ne pxeel me lo guidzliu ga gnabey lo grëse zha ne ngab lo me.

ĵLaa me beñcxoonle meñdox!

Ma ne scataa dze guieel nolisqui dien pe ruñ zho,  
nac zho zha ne nacgrë ne.

<sup>11</sup> Peet brieelod ma niuñ ma zho,  
sac niapse meñ ne nac Carner yeeñ ne gut lo cruz ga bnao zho;

ni lalnu ib bdziebd zho, bnee zho lo miech cho nac me,  
bleeladz zho xquieĵmban zho, no zho haxta beet miech zho.

<sup>12</sup> ĵGacxe waa tib guieĵbley nroob ne rac gbaa niina!

ĵGrëse to ne nac to zha ne no gbaa, goĵley!

ĵPer probsaxe grë zha ne no lo guidzliu, sac laa meñdox co tsiesacsi zho!

Ntseeb rac ma laa ma zie nëz co,  
rien ma riaandraa nroob dze ne sonlaa ma.

<sup>13</sup> Zeene gon ma sca bzonëz zho ma lo guidzliu, dzi-go ptsidiĵ ma wnaa ne gop mëëdbgui co. <sup>14</sup> Nacne bzoob zho chop xiĵ me, lëëdaa xiĵ msidoo; par grieelo xoon me lo ma, guey me dan zit ne nole diidz gañ zho me dipse len tson iz groĵ co. <sup>15</sup> Gocladz ma nsiloow ma me, blee ma tib nis naal ro ma, pale tib guiubee ro, <sup>16</sup> per psaand guidzliu me, znuse bzhal low psi grëse nis naal co.

<sup>17</sup> Horco mazdraa blëënie ma me, psilo ma noguib ma zha csacsi ma grëraa zha ne ziaad lo xtiie me. Lëë grë zha co zienaĵ miñe rnabey Dios, ni rdziebd zho rlu zho xnëz Jesús no zho. <sup>18</sup> Nacne güey ma, bzo ma ro nisdoo.

### Brieequia chop ma ntseeb

**13** Tibaque zeene gon naa laa tib ma nroob brieequia lo nisdoo co, ntseeb niaa ma. Ncuaane gdzieb ne rlu ma, gadzraa guic ma zob ni zob tsii zhoz ma; tibga coron zob tib tib zhoz ma. Gzase guic ma quia diidznë ne rneenë ma Dios. <sup>2</sup> Rna ma zig rna grë meedz rabon, per ni ma niaa zig niaa ni os, laa ro ma niaa zig niaa ro meedz. Dzigo bzo ma nizhnie co ma guiaañ ma xlugar ma co, male gnabey.

<sup>3</sup> No tib guic ma no tib mdel nroob, rlu mer niet ma zeene sca goc guic co ma. Miñ co gon miech, grëse zho psilo zho rleynie zho ma, miñe rnabeytaa ma zho, ruñ zhow. <sup>4</sup> Horco grëse zho rleynie zho ma nizhnie co,



rquiitsgzhib zho lo ma, rdeed zho xquizh lo ma bzo ma ma ntseeb co; scasaque rquiitsgzhib zho lo ma ntseeb co, rnee zho:

—¡Tsodraa stib zha zig luu! ¿Cho dien grieelo tilnie luu?

<sup>5</sup> Dzigo rëb ma nizhnie co lo ma gnee ma grë diidz dox, grë diidznë, gneenë ma Dios; bdeed ma co diidz gnabey ma lo guidzliu dipse len tson iz groj. <sup>6</sup> Nacne psilo ma rneenë ma Dios, rdzibdee ma me, rdzibdee ma grë zha no gbaa ne. <sup>7</sup> Grë zha ne no lo guidzliu, zha ne ngab xnëz Dios, bdeed me diidz psacsi ma zho, haxta beet ma zho; masaque ma bnabey grëse miech ne ndxie lo guidzliu. <sup>8</sup> Laa grëraa miech, güey zho güeygan zho ma, lëë grë zha co quiad lë lo xlibr men ne nac Carner yeen ne gut ga. Haxta zeene biao guidzliu no libr co, lo co quia lë grëse zha ne ygaa guielmban ne gdziñd de lozh.

<sup>9</sup> Lo grë to ne nac to zha ne rnalo Dios, zha ne no li-aadz miñe none naa nu, golquiaadiag miñe gne naa nu ganle: <sup>10</sup> Zha ne gnaaz to co zho to ladzguuib, yeque zho zio zho ladzguuib; zha ne csacsigaa to, tel zha gut zho to, scaque gut miech zho. Gacmbande to sca, sac gon ga glu to nli rnalo to Dios, nli zleb to tel pe nactaa guielnë ne gan to.

<sup>11</sup> Blozh ga, gon naa brieequia stib ma nroob lo guidzliu, scaque ntseeb niaa ma, zob chop zhoz ma zig zob zhoz carner, per ncuane gdzieb ne zeene laa ma roptsie. <sup>12</sup> Ye ma rap ma poder, squi zo ma ne no mdel nroob co guic rnabey ma tel zha racladz ma; bnabey ma yquitsgzhib grëse miech lo ma co. <sup>13</sup> Ncuane gzee zdoo miech run ma, haxta brieelo bnabey ma bi-et gui gbaa bliaala lo guidzliu. <sup>14</sup> Ne scataa grë ncuane ro ne rrieelo ma run ma, pquidie ma miech, bnabey ma zho bzaa zho tib mdio zig niaada ma ne bdedlaa lo guielgut ga, ma ne scataa nat guic ga bga.

<sup>15</sup> Blozh ga, bdeed ma xquielmban mdio co, parne grieelo gneew. Bnabey ma guet grëse zha ne soliaadz yquitsgzhib low, <sup>16</sup> ni bnabey ma grëse miech güey zho tib bey, yase yquiao nia derech zho, yquiaagaaw quia zho; grëse zho zigtaa zha gola, zigtagaa zha lasa, zigtaa zha ne rapcheña, zigtagaa zha ne peet rapda, zigtaa zha ne run xtsiin beña, zigtagaa zha ne choot rnabeyda. <sup>17</sup> Zha ne tsod bey co, grieelod gon zho wzi niicle grieelodgaa cto zho; sac bey co rlu cho nac zha ne ngab lo ma, lëë lë ma ga, lëë número co rlu zha lë ma. <sup>18</sup> Tib lë miech nac número co; xoop gayoo tsongal xoop naca. Zha ne ligier, zha ne niini, zien zho cho nac ma co.

### Biil tib gayoo chooptap mil zho

**14** Tibaque zeene gon naa laa men ne nac Xcarner yeen Dios ga zo guic Gui Sión, miech guizhiu ne zonie me ga; lëë grë zha co nac tib gayoo chooptap mil zha ne quia lë me guic ga, grop me Pxoz me. <sup>2</sup> Horco bin naa tib bi nroob gbaa, zig rio bi rrieengaa tib nis naal tib ro quie, zig ratsiegaa grë nguzidox, ni bin naa ndal tsi zha co zëëb noyool zho tib cant, rlu niapse arp noyoolnie zho cant co. <sup>3</sup> Tib cant cuba, laa zho noyoola

lo men ne zob lo xcan ro co, zaatne zo gza tap bult mban co, zaatne zob grë mengol co. Loxaque tib gayoo chooptap mil zha ne pcuee lad grë miech guidzliu ga, zha cose brieelo pquiab lo cant co. <sup>4</sup> Sac zha co ib beenctald xtol, rrieequia nac zho zig tib wnaa ne bgaald mgui; tibaque zo zho lo Men ne nac Carner yeen co, zaatne zieetaa me. Masaque nac zho lo Dios, ni lo men ne nac Carner co, zig tib nex ne glopaa riet riogon lo me. <sup>5</sup> Biod dze ne nquidie zho, mbe zdoo zho, mbe lo zho nëz lo me.

<sup>6</sup> Horco brieequia tib anjl nosiibe zhan gbaa, ney me Diidz Ndzon ne rdeed guielmban, diidz ne gdziñd dze nitlo ga; laa me ziaad par gnee mew lo grëse miech ne ndxie dipse lo guidzliu. <sup>7</sup> Nguiedz zëëb tsi me, rnee me:

—¡Golguien golgon miñe rnabey Dios, inë golleynie me, sac gon laa dze ne gon me guielwxtis bdziñle! Inë golquitsgzhib lo me, golgan ganle me bzaa gbaa, me bzaa guidzliu, me bzaa nisdoo, me psan grëse zaatne rlan nis.

<sup>8</sup> Zhits anjl co nal stib anjl, nguiedz rnee me:

—¡Nasi laa guiedz Babiloin nitlo! ¡Guiedz nroob ne scataa pquid grëraa guiedz, been grë menguedz co ncuane ndzab ne beña, pxina guic zho!

<sup>9</sup> Zhiits co nalaque stib anjl, scaque nguiedz zëëb tsi me, rnee me:

—¡Grëse zha ne yquitsgzhib lo ma ntseeb ne brieequia lo nisdoo ga, yquitsgzhib zho lo mdio ne niaa zig niaa ma ga, gdeedgaa zho diidz yquia xbey ma nia zho, yquiaagaaw quia zho, <sup>10</sup> ib tedsod ye zho ygaa lo grëtaa guielnëdox ne csiab Dios! Squi zobwi grë xanj me, squi zobwi Men ne nac Xcarner yeen me, laa zho guey lo guidox ne rieguial zho, zaatne tibaque quiazabbel tiblo ncuane rtsuu lë zufr. <sup>11</sup> Dze guieel cso laan ne tsec guidox co, ni palal gapd zho descans ga; sac sca pquitsgzhib zho lo ma ntseeb co, pquitsgzhib zho lo mdio ne niaa zig niaa ma ga, ni pquia zho xbey ma. <sup>12</sup> ¡Ga naganle gan grë zha ne ngab lo Dios, zha ne mban zigne rnabey me, zha ne tiblique zienal zhiwseed Jesús, zeena gacmband zho niicle tel pe nactaa grë guielnë ne noyan zho!

<sup>13</sup> Dzigo bin naa zëëb tib tsi men co gbaa, në me:

—Pquiaa miñe gni naa nu.

Nëchaa me:

—Dichos grëse zha ne rnalo Jesús, niicle niinaga guet zho.

Pquiabaque Espíritu Sant, rnee me:

—Nligaa dichos zho, sac grë guielnë ne bded zho, nataa laaw blozh; nasi laa zho ygaa guielnzaac nroob ne gdeed Dios lo zho, porne wban zho zigne rnabey me.

<sup>14</sup> Zeene bui naa stib, dzigo laa naa gonle tib xcow nquits; lo xcow co zob tib men co, rlu me zig rlu Men ne pxeel Dios ga biaad lo guidzliu. Zob tib coron or guic me, ni nzhen me tib yaguiits nroob.

<sup>15</sup> Dzigo brieet tib anjl len yadoo ro ne zob gbaa, nguiedz bnee me rëb me lo men ne zob lo xcow co:

—;Niinaga blooyaguiits grē zhob ne squitaa zēeb lo guidzliu! ;Sac goṅ gol-lew, laa dze ne tsasa bdziṅle!

<sup>16</sup> Dzigo pteed meṅ co yaguiits dipse lo guidzliu, ptop me grēse zhob co.

<sup>17</sup> Blozh ga, brieē stib anjl leṅ yadoo ro co nzheṅ me tib guiib hoz, rluṗaa per nli ndox low.

<sup>18</sup> Loxaque brieē anjl co, laa anjl ne quianap gui ne ndziib lo pcoog brieēque; nguiedz bnee me rēb me lo anjl ne nzheṅ hoz ga:

—;Niinaga pchug grēse mzhiiṅ uv ne squitaa zēeb lo guidzliu, sac goṅ laaw gule!

<sup>19</sup> Horco znuse pteed anjl co hoz lo guidzliu, pchug me grēse mzhiiṅ uv co, güeycodzēē mew tib leṅ pil nroob ne zob tib lad ro guiedz. Ga güeyzēēni zho grē uv co, ptaadz zhow; dzigo ren naaldox ne brieē zhan pil co, masaque lal ne rzēni miech xoop ngbidz, lal ga wbiig lo ren co igo pil co; teṷ niaca miṅe sēēb tib guay low, dzziṅa haxta zhan cho ro ma. Rrieēquia sca nagon gac miṅe gnabey Dios ted grē zha ntseeb.

**15** Tibaque zeēṅe goṅ naa, ncuaaṅe ro, ncuaaṅe gzee zdoo ne goc gbaa. Brieēquia gadz anjl, tib tib anjl co tibga guieṷnē guiaadnie me ted grē miech ne ndxie lo guidzliu; guieṷnē co lozh cueezhian Dios miech.

<sup>2</sup> Dzigo gax lo naa goṅ naa tib dzoob miech, masaque rquiabni, masaque rna gui zaatne zo zho, nēzrii nēzrec rac lo co, pale lo nisdoo. Lēē grē zha co beenṅ gan, pquiitsgzhibd zho lo ma ntseeb co, pquiitsgzhibd zho lo zhimdio ma, niicle biodgaa zho xbey ma. Grēse zho tibga xarp Dios nzheṅ zho, <sup>3</sup> quiayooṷ zho zig biil grē zha ne psilaa Moisés Egipt. Rley zho, sac niina laa Xcarner yeēṅ Dios psilaa zho lo ma ntseeb co; rnee zho:

Dios, luu ne nac luu meṅ ne grēsew rrieelo ruṅ, ncuaaṅe nroob, ncuaaṅe gzee zdoo miech, nac grē ncuaaṅe ruṅ luu.

Luu nac meṅ ne rnabey, lo grēse zha ne ngab lo luu, niapse diidzli rnee luu, niapse miṅe nonguieṷ rnabey luu.

<sup>4</sup> ¿Zha rna zha ne dieṅ gdzieebd luu?

¿Zha rna zha ne gleyd goṷnie luu?

Sac luuse nac meṅ mbe zdoo, meṅ ne ni tib doṷ rapd. Grēse guiedz ne ndxie lo guidzliu, zrieē miech guiaad zho yquiitsgzhibd zho lo luu; sac nasi laa luu blu zha ruṅ luu guieṷwxtis.

### Gadz anjl ne pxeēṷ guieṷnē lo guidzliu

<sup>5</sup> Horco goṅ naa bzhiāl zaatne nac Lugar Nda leṅ xyadoo Dios gbaa, <sup>6</sup> ga brieē gza gadz anjl ne guiaadnie guieṷnē ne no guiaad lo guidzliu ga. Ine nquitsbie rna xab gza anjl co, haxta rzēēg lada, ndxiega tib cinch or haxta ncaṅ leṅ zhiṅw me.

<sup>7</sup> Dzigo wbig tib bult mban co, bdeeda tibga cop nroob niaa niapse guiib or lo tib tib anjl co; leṅ cop co ga nodzē grēse guieṷnē ne nac xquieṷblēē Dios, meṅ ne gdziṅd dze guet. <sup>8</sup> Horco grēse xquieṷndzon Dios, grēse poder ne rap me, biodzē leṅ yadoo co, rluw zig rlu tib gox; choot brieelodraa nēēb leṅ yadoo co, hax-

ta blozh goṅ miech gza gadz guieṷnē ne güeynie gza anjl co.

**16** Dzigo bin naa nguiedz zēeb tib tsi meṅ co leṅ yadoo ro co, bnee me lo gza gadz anjl co, rēb me:

—Goṷtsie, goṷtsixiee gza guieṷnē ne nac xian Dios i lo guidzliu.

<sup>2</sup> Dzigo brieē tib anjl co, güey me, güeylaaṅ me xcop me lo guidzliu, hor co grēse zha ne noquiitsgzhibd lo zhimdio ma ntseeb co, zha ne quia xbey ma ga, psilo biaaṷ dipse lad zo, yoobdox ne rquia zho.

<sup>3</sup> Güeyaque stib anjl co, bdziṅ me blaāt me xcop me lo nisdoo, zeēṅe laa ncuaaṅ co bzhiēe lo nisdoo, grēse nis co biaalo ren ctoo; ni stib ma ne no low biaandraa.

<sup>4</sup> Laa miṅ co bded, zeēṅe laa stib anjl ne rac zho bioṅ ga güey, güeylaaṅ me xcop me grēse guiubee, grēse zaatne rda nis; nacne grēse nis co biaalo ren. <sup>5</sup> Dzigo bin naa tsi anjl ne rnabey nis, rēb me lo Dios:

—Dios, ible rieguiaṷ miṅe beenṅ luu i; luu ne nac luu meṅ mbe ne ni tib doṷ rapd, meṅ ne tibaque nac, meṅ ne gdziṅd dze gdzēē. Lēēw i beenṅ luu, squi beenquizh luu grē miech qui miṅe zēeb zho, <sup>6</sup> sac goṅ blactaa grē zha ne ngab lo luu, blactaa grē zha ne biadteed xtiidz luu psacsi zho, pxiee zho xchen grē zha co. Miṅ qui rquiin zho, guie zho grē ren qui na.

<sup>7</sup> Zēēbaque tsi stib meṅ co zaatne nac lo pcoog leṅ yadoo co, rnee me:

—;Dios, luu ne nac luu meṅ ne nroob ne grēsew rrieelo ruṅ, nligaa ible rieguiaṷa squi beenquizh luu grē zha qui miṅe beenṅ zho!

<sup>8</sup> Blozh ga, brieē stib anjl ne rac zho tap ga, güey me güeylaaṅ me xcop me lo ngbidz, hor co gocnlēēraa xbiini ngbidz, ptsuuw miech. <sup>9</sup> Niicle scale nodzu grē miech co, per ib biablod zho, laa ne nsaan zho xquieṷntseeb zho, nleynie zho Dios, leṷ psilo zho rneenē zho me, pe nacne noxeeṷ me grē guieṷnē co.

<sup>10</sup> Zeēṅe brieē stib anjl co, güey me güeylaaṅ me xcop me zaatne zobnabey ma ntseeb ne brieēquia lo nisdoo ga, dzigo znuse goc tib ncowdoo grēse guiedz ne rnabey ma. Lo yoobdox ne rquia grē miech co, haxta rowye zho ludz zho; <sup>11</sup> per niicle scaw, ib psaaṅ zho xquieṷntseeb zho, leṷ psilo zho rneenē zho Dios, pe nacne scataa rquia zho yoob, pe nacne scataa quiayaaṷ gdib lad zho.

<sup>12</sup> Zeēṅe laa anjl ne rac zho xoop ga güey, güeylaaṅ me xcop me leṅ guiubee Eufates, hor cogazh wbidz nis naal ne zhoob guiubee ro co. Nacne bio nēz ted grē meṅ ne zobnabey grē guiedz ne ndxie nēz ne rlan ngbidz.

<sup>13</sup> Horco goṅ naa tsoṅ me yozh, niaaw zig niaa mbiich, tiba brieē ro ma ngol nizhnie co, tiba brieē ro ma ntseeb ne brieēquia lo nisdoo ga, laa stiba brieē ro zha ne noteed xtiidz ma ntseeb co. <sup>14</sup> Chen meṅdox nac gza me co, ruṅa grē ncuaaṅe nroob ne rzee zdoo miech; dzigo güeya güeyzodiidzniew grēse zha rnabey ne no dipse lo guidzliu, parne tipse gac zho tiṷnie zho meṅ ro ne nac Dios, gaṷ dze ro ne gdeed me miṅe rieguiaṷ tib tib miech.

<sup>15</sup> Tibaque zeene laa meṅ ne rnabey ne ga bnee, nē me:

—Zhile goṅ laa naa guiaḷ. Nsin sca goḷso, sac zigne racnaṅd bizhuan yu pa hor sēēb ngbaan yu, scaque gacnaṅde to pa horpaa guiaḷ naa. Dichos zha ne yquiambēz naa, iṅe mbe xab zho nacw zhow; sac goṅ mban tsie zho teḷne scase zo zho zeene laa naa glanso, ni lala tib guieḷtodox ga grieequia zho.

<sup>16</sup> Dzigo pcaalsa grē zha rnabey co grē xmeṅguib zho, zaatne rnee zha Israel Armagedón.

<sup>17</sup> Horco güey anjḷ ne nac zho gadz ga güeylaa me xcop me lo me ne rriee lo guidzliu; dzigo bnee tib meṅ co zaatne nac lo zhixcan Dios leṅ yadoo gbaa ga, nguiedz zēēb tsi me rnee me:

—iNasi nagon ledaaw blozh bza!

<sup>18</sup> Dzigo psilo nēzrii nēzrec riab belye, loxaque bi rio ratsie nguzi. Lo belye co, lo bidox co, laa tib zhodox psiloque bni; waltaa ne ndxie miech lo guidzliu, gard gni tib zhodox zig miṅ co. <sup>19</sup> Grē guiedz ne ndxie lo guidzliu, per ni rludraa zha niaaw; zig nac guiedz nroob ne nac Babiloin ga, haxta tsoṅ lē goca. Horco beenquizh Dios zha Babiloin, grētaa guieḷntseeb ne zēēb zho; psiaabzi me zho por grētaa zhian ne pquiaa zho me. <sup>20</sup> Grēse guidzliu win ne no lo nisdoo, rludraa dien yow; grē gui glaa, loxaque nēzrii nēzrec bliaaḷa. <sup>21</sup> Miṅ co blozh, zeene psilo bliaaḷ tib guiequiedox lad grē miech co, tib tib guiequie co nēw maase choo kil. Goṅ zho scataa noyab guiequie co, laa zho noque rdz-ibdee zho Dios.

### Zob tib wnaa yozh lad tib ma ntseeb

**17** Lo gza gadz anjḷ ne sca blaas grē guieḷnē co lo guidzliu, lad co briee tib me baaad, nē me lo naa: —Dē gaṅle, zeena glu naa lo luu zha nactaa caxtigw ne yгаа wnaa yozh ne raṅ luu squi zob lo grēse nis ne no lo guidzliu. <sup>2</sup> Lēē wnaa qui pxin guic grēse miech ne no lo guidzliu güeynaḷ zho grētaa guieḷyozh ne been me; haxta grē zha rnabey, güeynaḷ miṅ co.

<sup>3</sup> Sca nolu Espiritu Sant grē ncuaaṅ co lo naa, dzigo güeynie anjḷ co naa tib dan zit. Ga goṅ naa laa wnaa co zoble lad tib ma nroob, ntseeb niaa ma co, zob gadzraa guic ma ni zob tsii zhoz ma; gdipse ma rna nizhnie, gdipse lad ma quia grē diidz ntseeb ne rneenē ma Dios.

<sup>4</sup> Glaa glaa zhits ma ntseeb co zob wnaa co, masaque nizhnie nlaan, nizhnie ren rna xab me, loxaque grē guib or, grē quie rbebni, grē quie perl, ngalguiee lad lar co. No tib cop nroob niaa me, niaaw niapse guib or, rrieequia leeṅ co nodzē grētaa guieḷntseeb, grētaa guieḷyozh ne ruṅ me. <sup>5</sup> Ni quia bla lan diidz quia me, rneew: “Lēē guiedz nroob ne nac Babiloin nu, guiedz ne nac xniaa grēse wnaa yozh, guiedz ne nac xniaa grēse zha ne ruṅ ncuaaṅe mbixladz.” Lēē lē me ga, hor coraa bzhoobneṅ zha nac lē me. <sup>6</sup> Dze rwi naa lo me, dzigo goṅ naa rac me zig rac zha ne rzudz. Nziandox zha ne no xnēz Jesús beet me, rrieequia grētaa ren ne pxiee me ga sca noyūṅ

me. Bzee zdoo naa, ni bdzieeb naa goṅ naa zha rac wnaa co. <sup>7</sup> Dzigo nēchaa anjḷ co lo naa:

—zPe nacre rdzieeb luu? Na gaṅle gni naa lo luu cho nac wnaa co, cho nac ma ne sca zob me lad ga.

<sup>8</sup> Padzeela no ma ntseeb co, guieṅd ma niinapaa, per zhile laa ma griee leṅ guierdoo ne niogyu ma, laa ma griee ga parne diunavez nitlo ma; grē zha ne quiad lē lo libr ne zhoobnee cho nac zha ne yгаа guieḷmban ga, seedox zdoo zho zeene gaṅ zho laa ma grieequia stib, sac tibaque naṅ zho gutle ma. <sup>9</sup> Wen wen pquiaadiaga gaṅle: gza gadz guic ma ga, rrieequia lēēw nac gza gadz gui win ne zob wnaa co zobnabey me. <sup>10</sup> Ni rrieequiaque lēē gadz zha ne rnabey ga: gaay zho bnabeyle, tib zho quianabey niina, laa stib zho naraa gnabey; per zeene laa zha co guiaad, zhis dze ne gnabey zho. <sup>11</sup> Lozhse gnabey zha co, laa ma gnabeyaque, ma gac zha rnabey co xon, niicle ne yeḷe ma ga goc zha co gadz; gataa laa ma nitlo.

<sup>12</sup> Zhoz ma, rrieequia lēē stii zha ne gnabey ga, gzase zha co naraa gnabey zho, tipse ycaania zho guieḷrnabey gza zho ma. Zhisaque dze sca gnabey zho, <sup>13</sup> dzigo laa gza tsii zha co guiaaṅ diidz gzo zho ma, ma gac zha nroob lo zho. <sup>14</sup> Zacnie zho ma, grēse zho tsie tsietilnie zho Xcarner yeṅ Dios, per znuse guṅ meṅ ne nac Carner yeṅ co gan lo zho; sac me nac meṅ ne rnabey lo grēse zha ne rnabey, lo grēse zha ne non. Grēse zha ne tsienal zhits me, tsietilnie zho ma co, lēē grē zha co nac zha ne bzooblo Dios bredz me zho bgab zho xnēz me, ni ib psaand zho me.

<sup>15</sup> Blozh ga, nēchaa anjḷ co lo naa:

—Lo grētaa nis ne goṅ luu sca zob wnaa yozh co, rrieequia lēē nis co nac grēse guiedz, grēse dii miech ne ndxie lo guidzliu. <sup>16</sup> Per zdziṅ dze lēēque ma ntseeb co, tiḷnie wnaa co, grē ma gza tsii zha ne rrieequia nac zhoz ma ga; zlēēniedox zho wnaa co, saṅwin zho me, haxta xab me cuee zho, znitlo zho me, sēēg zho me lo gui. <sup>17</sup> Ib Dios csiaab guic zho gnitlo zho wnaa co, ni meque csiaab guic zho gzo zho ma co gac ma zha ne gnabey lo zho; laa me guṅ miṅ co, parne grieequia grēse miṅe bneeḷe me no gac. <sup>18</sup> Laa wnaa co, rrieequia me nac guiedz ro ne rnabey lo grēse guiedz ne ndxie lo guidzliu.

**18** Blozh ga, goṅ naa laa stib anjḷ ziad-zēēb gbaa, rlu tib anjḷ nona, dipse lo guidzliu biab biinidoo ne ziaadnie me, <sup>2</sup> nguiedz zēēb tsi me rnee me:

—iNasi laa guiedz nroob ne nac Babiloin ga nitlo! iLoxaque meṅdox yquianzē ga, loxaque grē ma guix, loxaque grē ma mbixladz cuew! <sup>3</sup> Laaw nitlo, sac no-quiiḷa grēse miech ne ndxie lo guidzliu, grēse zha ne rnabey, quiaayūṅ zho grētaa guieḷyozh ne ruṅa. Lo grētaa guieḷyozh co quiaayūṅ ricwa grēse zha ne ruṅ wto; quiaixiṅ grē ncuaaṅ co zho, masaque quiaayūṅa zho zig ruṅ nziu.

<sup>4</sup> Dzigo zēēb stib tsi meṅ co gbaa, rnee me:

—iGrēse to ne nac to miech ne ngab xnēz naa, goḷgon diidz, goḷriee guiedz qui! Ib guṅde to doḷ ne quiaayūṅa; zeena ygaade to grētaa guieḷnē ne ygaaw, <sup>5</sup> sac nroobdox nac grē doḷ ne quiaayūṅa, teḷne niaca

ncuaane cue monton, rrieequia haxta gbaale rdziñ guic monton co; gane ib tedsod zunquizh Diosa grëtaa guieIntseeb co.

<sup>6</sup>Gacxe na grëse miñe beena miech, miñcoque saca. Grëse tel zha psacsiw miech, chop lalga miñe teda.

<sup>7</sup>Zigne squitaa now lo grëtaa ncuaane racladza; scagaa na guieInëdox ne gana, haxta goona lo grëtaa guieInë co. Niats raca rneew: "Naa rnabey. Nacd naa cho zha ne zotib, zig rzac grë wnaa viud; naasi gdziñd dze ne tso naa guieInë."

<sup>8</sup>Nli squitaa niats raca, per zeene guiaba ladznia guieIntgut, ladznia gbin, ladznia grëraa guieInë ne gana, tib dzeque lozha. Ni lozh ga, haxta zeca lo gui; miñ co gnabey Dios teda. iMe nac men ro ne gunquizha grëtaa miñe beena! <sup>9</sup>Grë zha ne rnabey grë guiedz, zha ne scataa bley been grë guieIyozh ne ruña; zeene gan zho goxdoo ne rso noyeca, mban gac zho, zoon zho zio zho xquieInëw. <sup>10</sup>Zdzieb zho gan zho grëtaa guieInë ne nodeda ga, lo dzeb co, ni lalnu gbigd zho. Lëë gdib so zho goptsie zho, guiab zho: "iProbsaxe luu Babiloin, guiedz nroob, guiedz non nac luu! iPa briece guieInë qui squi znuse nitlo luu!"

<sup>11</sup>Grë zha ne ruñ wto dipse lo guidzliu, ye zho zio zho xquieInëw, mban gac zho guieInëdraa cho si lo zho.

<sup>12</sup>Sac masaque lëëw rzi:

guiib or,  
guiib plat,  
grë quie non,  
grë perl,  
grë lar niazh,  
grë lar sed,  
grë lar nizhnie nlaan,  
grë yag ne nex rlaa,  
grë ncuaane niaa marfil,  
grë ncuaane niaa grë yag wen,  
grë ncuaane niaa guiib,  
grë ncuaane niaa brons,  
grë ncuaane niaa quie mármol,  
<sup>13</sup>grë blad canel,  
grë guizh scuaan,  
grë yaal ne ndzon rlaa,  
grë guizh, grë nceit ne nex rlaa,  
grë nziu,  
grë nceit,  
grë zhobxtil,  
grë rin niazh,  
grë ma ne rey yo,  
grë mëcwxiiil,  
grë carret,  
haxta grë miech ne ruñzhoo dziin lo samiech.

<sup>14</sup>Zrieequia zha ne guiab lo guiedz co: "iBdzinaque dze ne blozh luu, pa sëraa scataa yquianie luu grë ncuaane rdziladz luu! iGrëtaa ncuaan niazh, grëtaa ncuaane rap luu, gdziñdraa dze ne gbiire gan luuw!"

<sup>15</sup>Grë zha ne ruñ wto ga, zha ne scataa gocricw lo grë wto ne been zho guiedz co, zdzieb zho, zit so zho gan zho grëtaa guieInë ne nodeda. Zio zho xquieInëw, haxta zoon zho <sup>16</sup>guiab zho: "iProbsaxe guiedz ro qui,

squi znuse bnitlow! Biopaa dze gocnona, masaque go-ca zig tib wnaa ne racw grë lar niazh, grë lar nizhnie nlaan; wnaa ne rna grë guiib or, grë quie non, grë quie perl, rio yan, rio yan nia."

'Grë zha ne rnabey barcw, grë zha ne rsëëw, zha ne no leña, ni grëragaa zha ne ruñ dziin lo nisdoo, zit so zho gan zho tsec guiedz co; <sup>18</sup>zeene gan zho goxdoo ne rso noyeca, ziab zho: "iZha rnaraa dze ne dzian ne stib guiedz nroob zig guiedz qui?" <sup>19</sup>Mban gac zho, zio zho xquieInëw, zoon zho, squiaadan zho redz, guiab zho: "iProbsaxe guiedz ro qui squi znuse bnitlow! Lo grëtaa dimi ne pquianiew, blactaa beenricwa ne grë ne grëraa zha ne ruñ dziin rii."

<sup>20</sup>Sca nagon nitlo guiedz co. Grëse to ne nac to zha ne no gbaa, grëse to ne nac to zha ne ngab lo naa, grëse to ne nac to zha ne pxel naa güeynee xtidz naa, zha ne güeyteed xtidz naa, zeene gan to laa guiedz co nonitlo, golley, sac gan ga gunquizh Dios miech ne no ga grëtaa miñe been zho to.

<sup>21</sup>Zeene blozh bnee men co, dzigo gan naa tib anjl, rlu tib anjl macisa, znuse blis me tib quie nroob, niaaw zig niaa quie molin zhobxtil dipse gan bron mew lo nisdoo; blozhse bron mew, nëchaa me:

—Squi nagon nitlo guiedz ro ne nac Babiloin ga, gdziñdraa dze ne gbiire gan miecha. <sup>22</sup>Masaque nroobladzdoo ne raca niina, loxaque di noyag grë ro xnëza, zaatne noyoo! zho vihuel, zaatne noyoo! zho bzie, zaatne nocuedzga zho trompet, nëzrii nëzrec rac miech zie zho lo xtsiñ zho, loxaque lo grë quie molin rzedz nozoo zho zhob; per gal dze co grësew lozh. <sup>23</sup>Squitaa biini ne rquiaw niina, squitaa tibaque quiayac guieIntsieela, per gal dze co ncowse gnaw, pa sëraa gac lniw. Laaw nitlo, sac blactaa noyungüeta miech ne no grëraa guiedz ne ndxie lo guidzliu lo grë zhiwseed menox; pe zhidaa noyungüeta grë zha ne ruñ wto por grë wseed co; <sup>24</sup>pe zhidaa miech zëëba. Nzian zha ne ngab lo Dios, nzian zha ne riadteed xtiidz me, rnabeya ret zho.

**19** Zeene blozh ga, bin naa zëëb ndal tsi men co nëz gbaa, rlu miech guizhiuw, nguiedz rnee zho: iZha ndzontaa xDios ne! Me nac men ne rsilaa miech, parne ygaad zho lo caxtigw.

Me nac men ne rap poder,  
me nac men ne rieguial dziuunnon ne;  
<sup>2</sup>sac gan mesi ruñ me guieIwxtis zigne no gaca.

Gacxe waa, sca gunquizh me guiedz qui grëtaa guieIyozh ne noyuna, grëtaa xchen zha ne ngab lo me, zha ne bnabeya gut;

rrieequia naca zig tib wnaa yozh,  
quiayungüeta miech quiayunctal zho xto! zho.

<sup>3</sup>Blozh ga, biire bin naa tsi zho, rnee zho:

iZha ndzontaa Dios! iMin qui nagon rieguiala, gdziñd dze ne lozh csow gox!

<sup>4</sup>Horco laa gza galptap mengol co, ni gza tap bult mban co pquitsgzhil lo Dios lo xcan ne zob me ga, haxta bzooblo zho lo liu, beennon zho me, rnee zho: "iNliw! iLuuse nac men ne ndzon!"

<sup>5</sup> Zëëbaque stib tsi men co zaatne nac lo xcan co, rnee me:

¡Grëse to ne nac to zha ne quiayun dziin lo me, zha ne rien men non nac me, zigtaa zha wina, zigtagaa zha nona, golgoolnie me!

<sup>6</sup> Dzigo wbiire bin naa tsi grë miech guizhiu co nëz gbaa, rio bi zëëb tsi zho, pale zeene rio bi nisdoo, zeene riogaa bi rnee grë nguzidox, rnee zho:

¡Golgotsaa dzioolnie ne me!

¡Me nac xDios ne, me nac men nroob ne rnabey!

<sup>7</sup> Golgotsaa gley ne, golgotsaa dziuunnon ne me, sac gon laa dze bdzin laa Carner yeen ne nac Xpëëd me ga ctsieelnia;

grë zha ne ngab lo me, zha ne rriequia nac ndzooop ne ctsieelnia Carner yeen co, laa zho nacwxable.

<sup>8</sup> Masaque rlu zho zig tib ndzooop ne ctsieelnia, ine nquitsbie, ine rbebn lar niazh ne nacw zho; me bdeed diidz got zho lar co, ga rlu ganle mban zho zigne racladz me.

<sup>9</sup> Dzigo rneehaa anjl ne sca bron quie co lo nis:

—Wen zie grë zha ne bredz Dios tsie lo xquieltsieel men ne nac Carner yeen co.

Bnabey me naa pquia naa diidz co, blozhse ga, nëchaa me lo naa:

—Xtiidz Dios ga gon, me rneew.

<sup>10</sup> Horco pquitsgzhb naa lo anjl co ni naa gunnon naa me, per bzhiguiel d me.

—¡Coo! —në me lo naa—. ¡Guso i! Gocnan ganle ye naa tib ngundziinse nac naa lo Dios, nac naa zigne nacaque luu grë luu grëraa zha ne squi noxco zienal mine nac zhiwseed Jesús. Dios none gunnon luu, sac gon tib ngundziinse nac naa bzet naa min co, lëë gdib bne naa ganle zha nac xtiidz Jesús.

<sup>11</sup> Dzigo hor co gon naa bzhial zhan gbaa, ga briequia tib men co zob me lad tib guay nquits, zëëb diidz niapse diidzli rnee me, sac run me guielwxtis zigne no gaca, ni rdilnie me zha ne rieguiel tilnie me.

<sup>12</sup> Masaque rbebel bziaalo me, nzian xcuaa coron zob guic me, ni quia stib lë me quia me, loxaque mese nan dien zha nac lë co me. <sup>13</sup> Rnadraa xab me di ren, lëë me ga rnee zho: Xtiidz Dios. <sup>14</sup> Ndal grë menguiib ne no gbaa nal zhits me, ye zho niapse guay nquits zob zho; niapse lar niazh nacw zho, ine nquitsbie rna grë lar co. <sup>15</sup> Rlu choot grieelod gacndaan lo me, masaque zob tib spad lots ro me, laa me nzobro spad co parne tilnie me grë guiedz ne gacntseeb lo me. Masaque me gnabey grëse guiedz, ndip gac xtiidz me, ni tib choot quiitsd mine gnabey me; zeene laa me gunquizh miech grë xquielntseeb zho, cxeel me zhian ne csiaab Dios yгаа zho, zun me zho zigne run miech uv zeene rzëëni zhow. <sup>16</sup> Lad lar ne nacw me ga, ni tib cho cor me, ga quia cho nac me, rneew: “LËË MEN RII NONRAA LO GRËSE ZHA NON, ME RNABEY LO GRËSE ZHA NE RNABEY.”

<sup>17</sup> Blozh ga gon naa zo tib anjl lo ngbidz, nguiedz zëëb tsi me rbedz me grëse maxiil ne row grë magut, rnee me:

—¡Ligier golcaalsa! ¡Goltë zeena yquiin to guielwagw ne gneedz Dios lo to niina! <sup>18</sup> Goltë zeena gow to grë zha ne rnabey grë guiedz, grë zha ne rnabey lo menguiib, grë zhaguiib ne zëëb diidz nac zha valor; goltë gow to grë guay, gow to grë zha ne rzob lad ma. Goltë gow to grëse miech, zigtaa zha ne runcunzhoo miech dziina, zigtagaa zha ne choot rnabeyda, zigtaa grë zha ne nac zha nona, zigtagaa grë zha wina.

<sup>19</sup> Dzigo gon naa ma nroob ne briequia lo nisdoo ga, ma ne scataa ntseeb rlu ga, psilo ma ptop ma grëse zha ne rnabey grë guiedz ne ndxie lo guidzliu. Pcaalsa zho grë xmenguiib zho, zha guizhiuw, laa zho brie zietilnie zho men ne zob lad guay nquits co grë xmenguiib me. <sup>20</sup> Lo dil co, ga bgaa ma nroob co, ni bgaa zha ne pteed xtiidz ma lo miech; zha ne scataa squi zo ma been zho grë milagr co pquidie zho miech, bio guic zho bio zho xbey ma, ni beennon zho mdio ne rlu zig rlu ma ga. Zigtaa maw, zigtaa zha ne pteed xtiidz ma ga, nguia mban zho laa zho biab tib lo guidox zaatne noyec zufr. <sup>21</sup> Laa grëraa zha ne scataa gocnie ma ga, grëse zho gut lo spad ne nzobro men ne zob lad guay nquits co, hor co bdzinbe grëse maxiil ne row magut, güeytow ma grëse ngutoo co haxta biel ma.

### Bnabey Jesús tib mil iz

**20** Blozh ga, tibaque zeene gon naa laa tib anjl biet gbaa, nzhen me tib liow, ni nzhen me tib caden.

<sup>2</sup> Dzigo bnaaz me ma ngol ne rna nizhnie ga, meel ne notaque padzeela ga, ma ne nac mendox ga, ma ne nac Satanás ga, bzoob me ma caden co; <sup>3</sup> con liow ne nzhen me ga pxal me tib ro guierdoo, psëëb me ma len guierdoo co. Blozh ga dziits dziits psioog mew, zeena grieelod gree ma tsiequidieraa ma miech.

Ga tsogyu ma dipse len tib mil iz, lozhse tib mil iz co ible laa ma no gree ga, sonlaa ma zniip.

<sup>4</sup> Horco gon naa laa grë zha ne bzo Dios cobey pe nac xtol tib tib miech, laa zho bzob lo xcan ne rieguiel sob zho. Gonaque naa xalm grë zha ne psacsi miech, bga zho yan zho, beet zho zho loxaque ne no zho xnëz Jesús ni bnee zho xtiidz me lo miech; gon naa grë zha ne bzhiguiel d nquitsgzhb lo ma ngol ne briequia lo nisdoo ga, bzhiguiel d zho niunnon zho mdio ne rlu zig rlu ma, niicle bzhiguiel d zho nio zho xbey ma. Gon naa brieaban zho grëse zho, par gbannie zho Jesús, gnabey me grë me zho dipse len tib mil iz.

<sup>5</sup> Lëë grë zha co nac miech ne gloopaa grieaban, laa grëraa mengut, zha co grieaban zeene laa tib mil iz co gza. <sup>6</sup> Dichos grë zha ne glo grieaban ga; lo Diosle ngab zho ga, noxtseebdraa zho guey zho gabil, masaque lo Dios, lo Jesús gun zho dziin, gac zho zig tib pxoz lo me; tipse gnabey me grë me zho len tib mil iz co.

<sup>7</sup> Zeene blozh tib mil iz co, dzigo gon naa laa mendox brie zaatne niogyu ma ga, <sup>8</sup> güey ma güeyquidie ma zha Gog, güeyquidie ma zha Magog, grëse guiedz ne ndxie lo guidzliu güeyquidie ma miech, tipse been ma zho grëse zho parne tilnie zho Dios. Miech guizhiuw, miech ne lëb ne glab new, gun ne cuent yuzh ne ndxie

ro nisdoo, <sup>9</sup> ntseeb rac zho, grëse zho laa zho bdziñ za-atne ndxie guiedz ne rleynie Dios, zaatne no grë zha ne ngab lo me ga; per zeene laa zho ndxiele igo guiedz co parne gnitlo zhow, hor co bnabey Dios bliaal gui lad zho, bzëëga zho grëse zho. <sup>10</sup> Laa mendox, bnabey me bgaa ma bey ma lo guidox ne nac gabil, za-atne nole ma ngol ne sca brieequia lo nisdoo, grop ma co zha ne pteed xtiidz ma ga. Lo guidoxa, niapse zufr noyec lugar co, ga tsu ma dze guieel, gdziñdraa dze ne griee ma ga; caxtigwdox ne ted ma.

### Beenquizh Dios miech miñe been zho

<sup>11</sup> Blozh ga, gon naa tib men co zob me tib lo xcan ro, dib nquitsbiese rna xcan co. Zigtaa guidzliu, zigtaa gbaaw, zeene gona me znuse bichew, per bdziel pa niolana lo me. <sup>12</sup> Grëse zha ne brieeband glo ga, zigtaa zha nona, zigtaa zha wina, laa zho bdziñ lo me. Laa zho ndxie ga, zeene laa lo bla libr co bzhal, ni bzhalaque lo miñe quia lë zha ne bgaa guielmban cub ne rdeed Dios ga; hor co bgaase zho miñe rieguial zho tib tib zho tel zha zhobnee lo libr co wban zho. <sup>13</sup> Grëse zha ne biaan len nisdoo, blieequia nisdoo zho, grë zha ne bioliu blieequia baa zho; grëse zho blieequia guielgut zho. <sup>14</sup> Blozh ga, zigtaa guielguta, zigtaa zha ne quiad lë len libr ne no lë zha ne bgaa guielmban ga, laa zho biobe lo guidox ne nac gabil; lëë guielgut brop ga.

**21** Dzigo gon naa tib gbaa cub, ni tib guidzliu cub; sac zigtaa gbaa ne rdziunbey ne, zigtaa guidzliuw, zigtagaa nidoow grësew bnitlo. <sup>2</sup> Grop lo naa gon naa laa Jerusalén, guiedz ne nacchen Dios ga, ziad-zëëb zhan gbaa brieew zaatne zob me; tib guiedz cuba. Tib guiedz nzhixcuaa naca, pale tib ndzooop nguieg dze ne rtsieelnia zho. <sup>3</sup> Dzigo bin naa nguiedz zëëb tib tsi men co zaatne nac lo xcan ro ne zo gbaa ga, rnee me:

—Nasi nagon laa Dios cuëz lo miech, nasi laa me gbannie zho; zanlo zho me, peet gunfaltraade lo zho. <sup>4</sup> Led yedraa niina pa glunë zho, led yedraa niina tsoxtseeb zho lo guielgut, led yedraa niina mban gac zho cuedz zho dien cho gun xyudar zho, led yedraa niina goon zho; grëse nis ne zo lo zho zeene biin zho, niina laa me gunmbew. Grëse ncuane co, gdziñdraa dze gan zhow.

<sup>5</sup> Zëëb tsi men ne zob lo xcan co, rnee me:  
—Grëse ncuane no niina ncuble naca, ni naa beencuba.

Blozh ga, nëchaa me lo naa:  
—Grëse diidz ne gni naa lo luu nu niina gon, pquaaw, ib none gacnan miecha, sac ncuane no gaca. <sup>6</sup> jLëëw nagon, grëse miñe no gac, laaw blozh ben naa! jNaa psilow, ni naa psiaala, naa nac zigne nac letr “a” ni letr “z” lo grëse letr, “a” rsilow “z” riala!

jZha ne në r nab zhis, naa gded nis ne rdeed guielmban guie zho, ygad naa nis co lo zho, peet gacnonda! <sup>7</sup> Ni golgacnan ganle, grëse zha ne gdeete diidz lo grë ncuane gunctal xtol zho, ible zгаа zho grë guielnzaac ne noyaquiet nu, naazhal gbannie zho peet gunfalte lo

zho, masaque tib mëed gac zho lo naa. <sup>8</sup> Sangue grë zha ne rdzieb gban zigne rnabey naa, grë zha ne rbiche lo naa, grë zha ne run grë ncuane mbixladz, grë zha ne rut samiech, grë zha ne rionie zha ne led tsiield zho, grë zha ne rleynie guielbruj, grë zha ne rleynie grë mdio, grë zha ne tibaque noquidie samiech, grëse zha co miñe yгаа zho nac lo guidox ne noyec zufr ga; lëë guielgut brop ga.

### Guiedz ne gdziñ zha ne ngab lo Dios

<sup>9</sup> Lo gza gadz anjl ne bzhen cop ne bio grë guielnë ne gon miech ga, biaadgax tib me lo naa në me:

—Dë ganle zeena gan luu ndzooop nguieg ne gac tsiel men ne nac Xcarner yeen Dios i.

<sup>10</sup> Blozh ga, dzigo güeynie anjl co naa tib guic gui nroob, tib guic gui glaa, ga gon naa guiedz Jerusalén stib, guiedz ne nacchen Dios ga, gonpaa naa bieta za-atne zob Dios, laaw ziad-zëëb gbaa. <sup>11</sup> Masaque rbe-bela guielndzon ne rap me, lëëdaa grë quie niazh ne lë jasp, ni rol rnaw lëëdaa grë vidr. <sup>12</sup> Rna tib biedz nroob, tib biedz glaa ndze igow, quia tsiipchop puert cho biedz co, tibga anjl zo quianap tib tib ro puert co, tib tib puert co neysew tib lë mengoldoo ne goc xpëed Israel. <sup>13</sup> Tson puert co quia nëz ya, tsona quia nëz quiet, tsona quia ngali nëz ne rlan ngbidz, stsona quia ngali nëz ne rzëëb ngbidz. <sup>14</sup> Lo tsiipchop quie nroob ne zob biedz co, tibga lë xpoxtl men ne nac Xcarner yeen Dios ga quia lo co.

<sup>15</sup> Rlupaa cuadrad niaa guiedz co; dzigo gon naa no tib bar ne rbix nia anjl co, niaaw niapse guuib or, psilo me ptiix me guiedz co, ptiix me biedz ne ndze igow ga, ni ptiix me xpuerta. Zeene blozh ptiix mew, tib tib nëza no gaay gayoo choo kilómetro, lal ne rzëni miech tsiipchop ngbidz; lal ne zioola lalga nzhen, ni lalgaque glaaw; <sup>17</sup> laa xquielnaal biedz co nzhen lal ne rgaa tsiipchop docen dzit nia ne; ptiix mew zigne rtiiaque ne nac ne miech.

<sup>18</sup> Niapse guuib or niaa guiedz co, zigne rne naa ga, rol rnaw lëëdaa vidr. <sup>19</sup> Biedz ne ndze igow ga, niapse quie niazh ne lë jasp niaaw; scaque gza tsiipchop quie ne naaz biedz co, niapse quie niazh ngalguieew:

tiba ngalguiee quie niazh ne lë jasp,  
tiba ngalguiee quie niazh ne lë zafir,  
tiba ngalguiee quie niazh ne lë ágata,  
tiba ngalguiee quie niazh ne lë smerald,  
tiba ngalguiee quie niazh ne lë ónice,  
tiba ngalguiee quie niazh ne lë cornalin,  
tiba ngalguiee quie niazh ne lë crisólito,  
tiba ngalguiee quie niazh ne lë beril,  
tiba ngalguiee quie niazh ne lë topás,  
tiba ngalguiee quie niazh ne lë crisoprás,  
tiba ngalguiee quie niazh ne lë jacint,  
tiba ngalguiee quie niazh ne lë amatist.

<sup>21</sup> Gza tsiipchop puert ne quiaw ga, tibga quie perl niaa tib tib puert co; nëzyu ne rded grol guiedz co, niapse guuib or niaaw, masaque mbe rol rnaw.

<sup>22</sup> Ni tib yadoo gon naa, sac dipse lad guiedz co rleynie zho Dios, rleynie zho men ne nac Xcarner yeen

me. <sup>23</sup> Led yedraa ga rquiin xbiini ngbidz, rquiin xbiini mēē, sac masaque xquieḷndzon me, ni xquieḷndzon meḅ ne nac Xcarner yeeḅ me ga nac biini.

<sup>24</sup> Grēse miech ne ngab lo me, iḅe gziini biini co lo zho sē zho lad guiedz co; zha ne bnabey grē guiedz ne bre lo guidzliu, bio dze zha goc zha non, per zeēḅe gdziḅ zho ga ye zho zuḅnon zho me. <sup>25</sup> Led yedraa ga ycow liu, tibaque niini gnaw, tibaque gzhial gza xpuerta. <sup>26</sup> Grēse ncuaaḅe mbe ne gocnon lo grē guiedz ne bre lo guidzliu, laaw gdziḅ ga; <sup>27</sup> saḅgue grē ncuaaḅe mbixladz gdziḅda ga. Zig nac grē miech ne ruḅ grē guieḷntseeb, grē zha ne tibaque noquidie, gdziḅḅ zhow; loxaque zha ne zhoob lē leḅ xlibr meḅ ne nac Carner yeeḅ co (libr ne no lē zha ne ygaa guieḷmban cub ne gdeed Dios ga), zha cose gdziḅa.

**22** Blozh ga, blu anjl co tib guiubee lo naa, nē me zha ne guie nis co, zgaa zho guieḷmban; mbe rolḅ rḅaw, haxta rbebel low. Merse zhan xcan ne zob Dios ni zhan xcan ne zob meḅ ne nac Carner yeeḅ co, ga rriee guiubee co, <sup>2</sup> rdeda groḷḷaa nēzyu ne rded leḅ guiedz co. Gropse nēz ro guiubee co zēēḅ yag ne rdeed guieḷmban, gzobse mēē rquia nex low, tsiipchop vuet rdeeda nex tib leḅ iz, haxta ye zhiblaga rquiin grē zha ne no ga, parne sacnēd zho. <sup>3</sup> Led yedraa ga no ncuaaḅe ndziibdee, ga zo zhixcan Dios ni zo zhixcan meḅ ne nac Carner yeeḅ co; grēse miech ne ngab lo me, rleynie zho me ruḅnon zho me. <sup>4</sup> Raḅlo zho me, grēse zho quia lē me quia zho. <sup>5</sup> Led yedraa ga yquiin zho pe gziini lo zho, yquingaa zho xbiini ngbidz, sac Dioszhal rziini lo zho, led yed ga ycow liu; ga gban zho gdziḅdraa dze ne gree zho ga.

### Ile ziaad Jesús

<sup>6</sup> Dzigo nēchaa anjl co lo naa:

—Grēse ncuaaḅe quiayaḅ luu nu, ible ncuaaḅe no gaca. Bui gaḅle Dios meḅ ne rdeed guieḷbiini lo grē zha ne rieteed xtiidz me lo miech, rnee zho ncuaaḅe naraa gac, mezhāl pxeḷ xanjḷ me ziadnee lo luu, zeēḅa gacnaḅ grēse zha ne ngab lo me ziaadyoble gac grē ncuaaḅ rii. <sup>7</sup> Ible nacle xtiidz meḅ ne rnabey ne, zhile laa me guiaad. ¡Dichos grē zha ne gliladz grē miḅe noxobneḅ Dios nu!

<sup>8</sup> Grop lo naa goḅ naa grē ncuaaḅ rii, naazhal bin znu bnee anjl co. Nacne pquiitsgzhib naa lo me ni naa guḅnon naa me; <sup>9</sup> dzigo nēchaa me lo naa:

—Guso i, rieguiaḷd guḅnon luu naa, laa naa nile lo luu ye naa tib nguḅdziinse nac naa lo Dios, nac naa zigne nacaque luu grē luu grē zha ne noteed xtiidz meḅ ne rnabey ne lo miech, ni grēraa zha ne gliladz miḅe noxobneḅ me nu. Me none guḅnon luu.

<sup>10</sup> Blozh ga, nēchaa me:

—Bieḅ, grēse miḅe quiayaḅ luu nu, yqueetsd luuw, sac zhile gdziḅ dze ne gaca. <sup>11</sup> Lo spalalse dze ne riaaḅ niina, grē zha ne noyuḅ guieḷntseeb, teḷne racladz zho mazdraa guieḷntseeb ne guḅ zho, maase guḅ zhow; zha ne runḅaa guieḷyozh, teḷne miḅcotaā rleynie zho, maase guḅraa zhow. Saḅgue grē zha ne noxco guḅ miḅe rnabey Dios, none tsoxcoraā zhow; zha ne ngablegaa lo me, none guḅraa zho miḅe racladz me, gbiched zho lo me.

<sup>12</sup> Horco bin naa tsi meḅ ne nac Carner yeeḅ co, nē me:

—Psoladza sca goḅ, ible ziaḷniob naa; zeēḅe laa naa guiaḷ, hor co gded naa miḅe rieguiaḷ tib tib miech, teḷ zha wban zho. <sup>13</sup> Notaque naa, zig nac grē ncuaaḅ rii naa psilow ni naa csiaaḷa; nac naa zig nac letr “a” ni letr “z” lo grē letr, “a” rsilow, “z” riaḷa. <sup>14</sup> Dichos grē zha ne noxco guiaaḅmbe zho nēz lo Dios, sac rrieequia xab zho ga nosaḅmbe zho, parne grieelo ted zho ro puert ne quia guiedz cub ne nac Jerusalēn ga; gdziḅ zho ga iḅe gow zho xnex yag ne rdeed guieḷmban ga.

<sup>15</sup> Saḅgue grē miech ne racntseeb lo Dios, zha ne rleynie guieḷbruj, zha ne rionie zha ne led tsiield, zha ne rut samiech, zha ne rleynie grē mdio, zha ne loxaque noquidie samiech, ni tib zha co grieelod ted ro puert co. <sup>16</sup> Naa goḅ nac Jesús, naa pxeḷ xanjḷ naa ziaadlu grē ncuaaḅ rii lo luu, zeēḅa grēse zha ne no xnēz naa gacnaḅa. Naa ga brieequia lo xtii rey David, per naa psan grēse xmeḅgol me. Rrieequia naa nac mel ngol ne rziini raḷ sil.

<sup>17</sup> Zigtaa Espiritu Sant, zigtaa grē zha ne no xnēz me, zha ne rrieequia gac tsiel me ga, laa zho quiambēz me; niicle zha ne gacnaḅragaa laa me no guiaad, none yquiambēz zho me. Zha ne nē rnab zhis, teḷne gacladz zho zac gbig zho lo me, me gdeed nis ne rdeed guieḷmban guie zho; ygad me nis co lo zho, peet gacnonda.

<sup>18</sup> Grēse zha ne gon grē miḅe pxobneḅ Dios nu, laa naa rso diidz lo zho: Gneed zho ncuaaḅe nacda, sac zha ne gdziibraa diidz zeēḅe gnee zhow, scagaa me, lo grē guieḷnē ne raquiet nu ygaa miech, zdziibraa me miḅe ygaa zho; <sup>19</sup> zha ne ctichegaa palala zeēḅe gnee zhow, scaque stiche me lē zho lo libr ne zhobnee cho nac zha ne ygaa guieḷmban ne gdeed me, grieelodraa gdziḅ zho guiedz ne blozh goquiet nu, ygaadraa zho yquiin zho xnex yag ne rdeed guieḷmban ga.

<sup>20</sup> Meḅ ne blozh bnee lo naa ga, ible ziaadniob me rnee me. Gacxe waa, dib zdoo naa laa naa rne lo me nu:

—¡Scaw goḅ Jesús! ¡Dē, laa no quiambiaaz luu!

<sup>21</sup> Me nac meḅ ne gacnieḅ to grēse to, me guḅlay to. Juan